

儒

藏



精華編八四冊
經部

儒藏



北京大學《儒藏》編纂與研究中心

圖書在版編目(CIP)數據

儒藏. 精華編. 八四/北京大學《儒藏》編纂與研究中心編. —北京:北京大學出版社, 2014. 4

ISBN 978-7-301-11802-3

I. ①儒… II. ①北… III. ①儒家 IV. ①B222

中國版本圖書館 CIP 數據核字(2014)第 028352 號

書 名: 儒藏(精華編八四)

著作責任者: 北京大學《儒藏》編纂與研究中心 編

責任編輯: 童 祁

標準書號: ISBN 978-7-301-11802-3/B·0488

出版發行: 北京大學出版社

地 址: 北京市海澱區成府路 205 號 100871

網 址: <http://www.pup.cn> 新浪官方微博: @北京大學出版社

電子信箱: dianjiwenhua@163.com

電 話: 郵購部 62752015 發行部 62750672 編輯部 62756694
出版部 62754962

印 刷 者: 北京中科印刷有限公司

經 銷 者: 新華書店

787 毫米×1092 毫米 16 開本 46.25 印張 690 千字

2014 年 4 月第 1 版 2014 年 4 月第 1 次印刷

定 價: 500.00 元

未經許可,不得以任何方式複製或抄襲本書之部分或全部內容。

版權所有,侵權必究

舉報電話: 010-62752024 電子信箱: fd@pup.pku.edu.cn

教育部哲學社會科學研究重大課題攻關項目

「十一五」國家重點圖書出版規劃項目·重大工程出版規劃
國家社會科學基金重大項目
北京大學「九八五工程」重點項目

《儒藏》精華編第八冊

首席總編纂 季羨林

項目首席專家 湯一介

總編纂 湯一介 龐朴 孫欽善 安平秋
(按年齡排序)

本冊主編 姜廣輝

《儒藏》精華編凡例

一、中國傳統文化以儒家思想爲中心。《儒藏》爲儒家經典和反映儒家思想、體現儒家經世做人原則的典籍的叢編。收書時限自先秦至清代結束。

二、《儒藏》精華編爲《儒藏》的一部分，選收《儒藏》中的精要書籍。

三、《儒藏》精華編所收書籍，包括傳世文獻和出土文獻。傳世文獻按《四庫全書總目》經史子集四部分類法分類，大類、小類基本參照《中國叢書綜錄》和《中國古籍善本書目》，於個別處略作調整。凡單書已收入入選的個人叢書或全集者，僅存目錄，並注明互見。出土文獻單列爲一個部類，原件以古文字書寫者一律收其釋文文本。韓國、日本、越南儒學者用漢文寫作的儒學著作，編爲海外文獻部類。

四、所收書籍的篇目卷次，一仍底本原貌，不選編，不改編，保持原書的完整性和獨立性。

五、對入選書籍進行簡要校勘。以對校爲主，確定內容完足、精確率高的版本爲底本，精選有校勘價值的版本爲校本。出校堅持少而精，以校正誤爲主，酌校異同。校記力求規範、精煉。

六、根據現行標點符號用法，結合古籍標點通例，進行規範化標點。專名號除書名號用角號（《》）外，其他一律省略。

七、對較長的篇章，根據文字內容，適當劃分段落。正文原已分段者，不作改動。千字以內的短文一般不分段。

八、各書卷端由整理者撰寫《校點說明》，簡要介紹作者生平、該書成書背景、主要內容及影響，以及整理時所確定的底本、校本（舉全稱後括注簡稱）及其他有關情況。重複出現的作者，其生平事蹟按出現順序前詳後略。

九、本書用繁體漢字豎排，小注一律排爲單行。

《儒藏》精華編第八冊

經部 春秋類

公羊傳之屬

春秋公羊傳注疏〔東漢〕何休注

〔唐〕徐彥疏

.....

春秋公羊傳注疏

〔東漢〕何休注

〔唐〕徐彥疏

浦衛忠校點

目錄

校點說明	一
欽定四庫全書總目春秋公羊傳注疏二十八卷	一
中書門下牒	一
春秋公羊傳注疏校勘記序	一
監本附音春秋公羊注疏序	一
監本附音春秋公羊注疏隱公卷第一	一
起元年，盡元年	一
監本附音春秋公羊注疏隱公卷第二	三四
起二年，盡四年	三四
監本附音春秋公羊注疏隱公卷第三	五四
起五年，盡十一年	五四
監本附音春秋公羊注疏桓公卷第四	七八
起元年，盡六年	七八
監本附音春秋公羊注疏桓公卷第五	一〇三
起七年，盡十八年	一〇三

監本附音春秋公羊注疏莊公卷第六	一二七
起元年，盡七年	一二七
監本附音春秋公羊注疏莊公卷第七	一五二
起八年，盡十七年	一五二
監本附音春秋公羊注疏莊公卷第八	一七七
起十八年，盡二十七年	一七七
監本附音春秋公羊注疏莊公卷第九	二〇〇
起二十八年，盡閔公二年	二〇〇
監本附音春秋公羊注疏僖公卷第十	二二三
起元年，盡七年	二二三
監本附音春秋公羊注疏僖公卷第十一	二四七
起八年，盡二十一年	二四七
監本附音春秋公羊注疏僖公卷第十二	二七六
起二十二年，盡三十三年	二七六
監本附音春秋公羊注疏文公卷第十三	三〇七
起元年，盡九年	三〇七
監本附音春秋公羊注疏文公卷第十四	三三一
起十年，盡十八年	三三一
監本附音春秋公羊注疏宣公卷第十五	三三一

起元年，盡九年	三五五
監本附音春秋公羊注疏宣公卷第十六	
起十年，盡十八年	三八四
監本附音春秋公羊注疏成公卷第十七	
起元年，盡十年	四一〇
監本附音春秋公羊注疏成公卷第十八	
起十一年，盡十八年	四三七
監本附音春秋公羊注疏襄公卷第十九	
起元年，盡十一年	四五八
監本附音春秋公羊注疏襄公卷第二十	
起十二年，盡二十四年	四八四
監本附音春秋公羊注疏襄公卷第二十一	
起二十五年，盡三十一年	五〇六
監本附音春秋公羊注疏昭公卷第二十二	
起元年，盡十二年	五二七
監本附音春秋公羊注疏昭公卷第二十三	
起十三年，盡二十二年	五五五
監本附音春秋公羊注疏昭公卷第二十四	
起二十三年，盡三十二年	五七九

監本附音春秋公羊注疏定公卷第二十五	
起元年，盡五年	六〇九
監本附音春秋公羊注疏定公卷第二十六	
起六年，盡十五年	六三六
監本附音春秋公羊注疏哀公卷第二十七	
起元年，盡十年	六六四
監本附音春秋公羊注疏哀公卷第二十八	
起十一年，盡十四年	六八七

校點說明

《春秋公羊傳注疏》，漢公羊壽傳，何休解詁，唐徐彥疏。《四庫全書總目》曰：「徐彥疏，《文獻通考》作三十卷，今本乃止二十八卷，或彥本以經文併爲二卷，別冠於前，後人又散入傳中，故少此二卷，亦未可知也。彥疏，《唐志》不載，《崇文總目》始著錄，稱「不著撰人名氏，或云徐彥」。董道《廣川藏書志》亦稱：「世傳徐彥，不知時代，意其在貞元、長慶之後。考疏中「郊之戰」一條，猶及見孫炎《爾雅注》完本，知在宋以前。又「葬桓王」一條，全襲用楊士勛《穀梁傳疏》，知在貞觀以後。中多自設問答，文繁語複，與丘光庭《兼明書》相近，亦唐末之文體。」董道所云，不爲無理。故今從道之說，定爲唐人焉。」

流傳下來的《公羊傳》各種版本，除阮元《十三經注疏校勘記》中所列舉之唐石經《春秋公羊》十二卷外，經注本有《春秋公羊經傳解詁》，單疏本有《春秋公羊疏》，此外還有注疏合刻（附《釋文》）本。《春秋公羊經傳解詁》是現存年代較早的經注本，傳世的宋版書有兩本，一爲余仁仲萬卷堂刊本，刊刻於南宋紹熙二年，現藏國家圖書館及臺北故宮博物院。另一本爲南宋淳熙撫州公使庫刻紹熙四年重修本，現藏國家圖書館。

單疏本《春秋公羊疏》，據筆者所知，存於世者有兩本，一爲收入《續古逸叢書》中的七卷殘本（上海涵芬樓影印南海潘氏藏宋本），一爲舊鈔本《春秋公羊疏》三十卷（今藏於日本名古屋市蓬左文庫，原係尾張藩侯德川氏所儲，以下簡稱「單疏鈔本」）。日本學者杉浦豐治治《公羊》學，撰《公羊疏論考》，其中《公羊疏校記》一卷，乃以阮刻《重刊宋本公羊注疏附校勘記》二十八卷《本爲底本，與單疏殘本、單疏鈔本對校而成。其功之巨，不在阮氏

《春秋公羊傳注疏》校勘記》之下。

現存陸德明《經典釋文》較好的版本，為國家圖書館所藏宋元遞修單刻本，上海古籍出版社曾影印出版。宋代刊刻諸經，卷末多附陸氏所撰音義，以後更將音義散於經注之下，《經典釋文》的單刻本反而甚少流通，所以宋本極為罕見。

十三經之注疏合刻本，「莫先於浙東提舉茶鹽司本《易》、《書》、《周禮》三書。見於紹熙壬子三山黃唐《刊禮記正義跋》」（汪紹楹《阮氏重刻宋本十三經注疏考》，《文史》第三輯，一九六三年），行款版式相同，皆為半頁八行，故稱「八行本」。其後南宋福建建陽地區坊間又將經、注、疏及陸德明《經典釋文》合刻，因其行款為半頁十行，世稱「十行本」。這就是後來通行《十三經注疏》本的源頭。元代曾加以翻刻，明代多次翻刻修補《十三經注疏》多是依據的元刻十行本，如嘉靖李元陽刻閩本、萬曆北京國子監刻監本、崇禎常熟汲古閣毛氏刻毛本。《公羊傳》的注疏合刻本迄今尚未見宋刻

本傳世，所存最早的版本當為元刻明修本，如日本京都大學人文科學研究所東洋學文獻中心藏本、《中華再造善本》影印北京市文物局藏《十三經注疏·春秋公羊注疏》等皆是。清嘉慶二十年（或曰二十一年），阮元重刻《十三經注疏》，號稱「重刊宋本」，其中的《公羊傳注疏》，學者多指為元刻本。阮刻《十三經注疏》後曾多次翻印，可知者就有道光六年刻本、江西書局重修本（成於清同治十二年），此後又有世界書局、中華書局以及臺灣藝文印書館等影印本。臺灣藝文印書館影印嘉慶刊本是阮刻影印本中較好的本子。

本次校點，以《重刊宋本公羊注疏附校勘記》（嘉慶二十年江西南昌府學開雕，臺灣藝文印書館影印，簡稱「嘉慶本」）為底本，對校了京都大學人文科學研究所東洋學文獻中心藏本《監本附音春秋公羊註疏》二十八卷（元刻明修本，簡稱「京都本」）、《中華再造善本·金元編·春秋公羊注疏》（元刻明修本，積學齋徐乃昌藏本，現藏北京市文

物局，簡稱「再造善本」，中華書局一九八〇年影印原世界書局縮印《春秋公羊傳注疏》（簡稱「中華本」）。參校以《四部叢刊》影印宋余仁仲本《春秋公羊經傳解詁》（簡稱「余本」）、影印文淵閣《四庫全書》本《春秋公羊傳注疏》（清人齊召南、陳浩等考證，簡稱「閣本」）、《春秋公羊疏》單疏本（存七卷，《續古逸叢書》本，簡稱「單疏殘本」）、唐陸德明《經典釋文》（上海古籍出版社一九八五年影印國家圖書館藏宋元遞修《經典釋文》單刻本，簡稱「宋本《釋文》」）以及《四部備要》本陳立《公羊義疏》（中華書局據南菁書院《續經解》本排印）。參考了北京大學出版社《十三經注疏》繁體豎排本（二〇〇〇年十二月版）的標點部分，並在校勘中引錄了阮元《十三經注疏校勘記》、孫詒讓《十三經注疏校記》和王引之《經義述聞》、趙坦《春秋異文箋》、杉浦豐治《公羊疏校記》等。校記中凡所曰「單疏鈔本」之語，均來自杉浦豐治《公羊疏校記》。所曰「唐石經」、「何校本」、「宋本」、「鄂本」、「元本」、「閩本」、「監本」、「毛本」等諸語，均來自阮元《校勘

記》。阮元《春秋公羊傳注疏》校勘記與杉浦豐治《公羊疏校記》均在校勘中引據有「毛本」，為示區別，在本次校點中，分別以「毛本」、「杉浦校毛本」區別之。校記中所引杉浦校按本書體例做了適當調整，並非原文引用，但為清晰起見，今仍加引號標明起止。他校涉及的《周易》、《三禮》等經籍，俱採用阮刻《十三經注疏》中華書局影印原世界書局縮印本。又，底本個別卷端、卷末題或缺「附音」二字，或缺「第」字，今依文例統一補加，不再一一出校。由於按儒藏體例繁簡字、通假字、古今字、異體字等均不出校，故諸如「于」「於」、「后」「後」、「鍾」「鐘」之類多未出校。校點之前，拜讀了日本學者野間文史所著《評李學勤主編之〈標點本十三經注疏〉》等文，汲取了他們有益的研究成果。本書歷時四五年之久，終於完成，得到了儒藏中心李峻岫博士的許多幫助，謹此誌謝！

校點者 浦衛忠

欽定四庫全書總目春秋公羊傳注疏

二十八卷

漢公羊壽傳，何休解詁，唐徐彥疏。

案《漢書·藝文志》《公羊傳》十一卷，班

固自注曰：「公羊子，齊人。」案：《漢·藝文志》

不題顏師古名者，皆固之自注。顏師古注曰：「名

高。」案：此據《春秋說·題詞》之文，見徐彥疏所引。

徐彥疏引戴宏序曰：「子夏傳與公羊高，高

傳與其子平，平傳與其子地，地傳與其子

敢，敢傳與其子壽。至漢景帝時，壽乃與

齊人胡毋子都著於竹帛。」何休之注亦同。

休說見隱公二年「紀子伯莒子盟於密」條下。今觀傳

中有「子沈子曰」、「子司馬子曰」、「子女子

曰」、「子北宮子曰」，又有「高子曰」、「魯子

曰」，蓋皆傳授之經師，不盡出於公羊子。

定公元年傳「正棺於兩楹之間」二句，《穀

梁傳》引之直稱沈子，不稱公羊，是併其不

著姓氏者亦不盡出公羊子；且併有「子公

羊子曰」，尤不出於高之明證。知傳確為

壽撰，而胡毋子都助成之。舊本首署高

名，蓋未審也。又羅璧《識遺》稱：「公羊、

穀梁自高、赤作傳外，更不見有此姓。萬

見春謂皆姜字切韻脚，疑為姜姓假託。」

案：「鄒」為「邾婁」，「披」為「勃鞞」，「木」為

「彌牟」，「殖」為「舌職」，記載音譌；經典原

有是事，至弟子記其先師，子孫述其祖父，

必不至竟迷本字，別用合聲。璧之所言，

殊為好異。至程端學《春秋本義》竟指高

為漢初人，則講學家臆斷之詞，更不足與

辨矣。三傳與經文，《漢志》皆各為卷帙，

以《左傳》附經始於杜預，《公羊傳》附經則

不知始自何人。觀何休《解詁》但釋傳而不釋經，與杜異例，知漢末猶自別行。今所傳蔡邕石經殘字，《公羊傳》亦無經文，足以互證。今本以傳附經，或徐彥作疏之時所合併歟？彥疏，《文獻通考》作三十卷，今本乃止二十八卷，或彥本以經文併爲二卷，別冠於前，後人又散入傳中，故少此二卷，亦未可知也。彥疏，《唐志》不載，《崇文總目》始著錄，稱「不著撰人名氏，或云徐彥」。董道《廣川藏書志》亦稱：「世傳徐彥，不知時代，意其在貞元、長慶之後。考疏中『邠之戰』一條，猶及見孫炎《爾雅注》完本，知在宋以前；又『葬桓王』一條，全襲用楊士勛《穀梁傳疏》，知在貞觀以後。中多自設問答，文繁語複，與丘光庭《兼明書》相近，亦唐末之文體。」董道所云，不爲無理。故今從道之說，定爲唐人焉。

中書門下牒

奉敕，國家欽崇儒術，啟迪化源，眷六籍之垂文，實百王之取法，著於緗素，皎若丹青。乃有前脩，詮其奧義，爲之疏釋，播厥方來。頗索隱於微言，用擊蒙於後學。流傳既久，譌舛遂多。爰命校讎，俾從刊正。歷歲時而盡瘁，探簡策以惟精。載嘉稽古之功，允助好文之理。宜從雕印，以廣頒行。牒至准敕，故牒。

敕 故 牒

景德二年六月 日牒

工部侍郎參知政事馮

兵部侍郎參知政事王

兵部侍郎平章事 寇
吏部侍郎平章事 畢

春秋公羊傳注疏校勘記序^①

阮元撰

盧宣旬敬錄

漢武帝好《公羊》，治其學者，胡毋子都、董膠西爲最著。膠西下帷講誦，著書十餘萬言，皆明經術之意，至於今傳焉。子都爲景帝時博士，後年老歸教於齊，齊之言《春秋》者，莫不宗事之。《公羊》之著竹帛，自子都始，戴宏《序》稱「子夏傳與公羊高，高傳其子平，平傳其子地，地傳其子敢，敢傳其子壽，壽與弟子胡毋子都著於竹帛」是也。何休爲膠西四傳弟子，本子都條例以作注，著《公羊墨守》、《公羊文謚例》、《公羊傳條例》，尤邃於陰陽五行之學，間以緯說釋傳。疏不詳其所據，《漢

志》有《公羊外傳》五十篇，徵引或出此也。《公羊》傳文初不與經相連綴，《漢志》各自爲卷。孔穎達《詩》正義云：「漢世爲傳訓者，皆與經別行。」故蔡邕石經《公羊》殘碑無經，《解詁》亦但釋傳也。分經附傳，大氏漢後人爲之，而唐開成始取而刻石。徐彥疏，《唐志》不載，《崇文總目》始著錄，亦無撰人名氏。宋董道云：「世傳徐彥所作，其時代里居不可得而詳矣。」光祿寺卿王鳴盛云「即《北史》之徐遵明」，不爲無見也。蓋其文章似六朝人，不似唐人所爲者。《郡齋讀書志》、《書錄解題》並作三十卷，世所傳本乃止二十八卷，其參差之由，亦無可考也。元舊有校本，今更以何煌所

① 此序原附於底本卷一之末，下接《校勘記》，今移置此。

校蜀大字本、宋鄂州官本及唐石經本、宋元以來各注疏本，屬武進監生臧庸臚其同異之字，元爲訂其是非，成《公羊注疏校勘記》十一卷、《釋文校勘記》一卷，後之爲是學者，俾得有所考焉。阮元記。

引據各本目錄

單經本

唐石經《春秋公羊》十二卷原刻如此，後改爲十一卷。「閔公第四」下添注云「附莊公卷」，故「僖公第五」改卷四，「文公第六」改卷五，「宣公第七」改卷六，「成公第八」改卷七，「襄公第九」改卷八，「昭公第十」改卷九，「定公第十一」改卷十，「哀公第十二」改卷十一。

經注本

《經典釋文·公羊音義》一卷

注疏本

惠棟校本《春秋公羊傳注疏》二十八卷何焯字仲友，云：「康熙丁酉，假同門李廣文秉成所買宋槧官本手校，再令張翼庭、倪穎仲各校一過。」惠棟云：「有曹通政寅所藏宋本《公羊》，合何氏所校宋槧官本、蜀大字本及元版注疏，并參以石經，用朱墨別異。癸酉冬月識。」按，惠云「朱墨別異」者，今不能詳，大約鄂州官書經注本最爲精美。

監本附音《春秋公羊注疏》二十八卷款

式同《周禮注疏》，補刊修版至明正德止。首載景德二年中書門下牒一首，蓋此牒出北宋經注本也。閩本注疏亦首載此牒。

閩本《春秋公羊傳注疏》二十八卷

監本《春秋公羊傳注疏》二十八卷

毛本《春秋公羊傳注疏》二十八卷

浦鏜《春秋公羊傳注疏正誤》四卷

監本附音春秋公羊注疏序^①

漢司空掾任城樊何休序^② ○陸氏《音義》

曰：掾，弋絹反。【疏】「漢司空掾」。○^③解云：漢者，巴漢之間地名也。於秦二世元年，諸侯叛秦，沛人共立劉季以爲沛公。二年八月，^④沛公入秦，秦相趙高殺二世，立二世兄子嬰。冬十月爲漢元年，子嬰降。○年春正月，^⑤項羽尊楚懷王以爲義帝。其年二月，項羽自立爲西楚霸王，分天下爲十八國，更立沛公爲漢王，王巴漢之間四十一縣，都於南鄭。至漢王五年冬十二月，乃破項羽軍斬之。六年正月乃稱皇帝，^⑥遂取漢爲天下號，若夏、殷、周既克天下，乃取本受命之地爲天下號。云「司空」者，漢三公官名也。「掾」者，^⑦即其下屬官也，若今之三

①「監本附音春秋公羊注疏序」，阮校：「何煌校宋監本

「公羊」下有「傳」字，是也，此脫。閩、監、毛本改此爲「春秋公羊傳注疏」七字。閩本於此行下署「漢何休學□□□□疏」，另行署「明御史李元陽、提學僉事江以達校刊」。監本改署「皇明朝列大夫國子監祭酒曾朝節等奉敕重校刊」。毛本但存「漢何休學」四字，其實亦不當有也。單疏殘本作「春秋公羊疏卷第一隱公一起序盡元年正月」，單疏鈔本同。

②「漢司空掾任城樊何休序」，阮校：「唐石經同，《釋文》祇作「春秋公羊序」五字。何校本、閩本、監本、毛本此題及下序並傳皆低一格，惟《春秋》經文始頂格，通書並然。蓋後人以意爲之，非也。此本從唐石經，題序經傳皆頂格。」

③「○」，原無，據疏例補。

④「二」，阮校：「當作「三」。」

⑤「○」，杉浦校：「單疏鈔本、單疏殘本作「二」。」

⑥「六年正月乃稱皇帝」，阮校：「《漢書·高皇帝紀》：「五年十二月，斬羽。二月，即皇帝位。」此「六年正月」當本作「其年二月」，淺人未考秦以十月爲歲首，故蒙上五年十二月之文，改此爲六年正月也。據上文云冬十月爲漢元年，其年春正月，項羽尊楚懷王以爲義帝，知疏文於此本亦作「其年」。」

⑦「掾」，原作「祿」，今據京都本、再造善本、中華本、閣本改。

府掾是也。^①○「任城樊何休序」。○解云：任城者，郡名。樊者，縣名。姓何，名休，字邵公。^②其《本傳》云：「休爲人質樸訥口，而雅有心思。精研六經，世儒無及者。大傳陳蕃辟之，^③與參政事。蕃敗，休坐廢錮，乃作《春秋公羊解詁》，覃思不闕門十有七年」是也。序者，舒也，敘也，舒展已意，以次敘經傳之義，述已作注之意，故謂之序也。

昔者孔子有云：【疏】「昔者孔子有云」。○解

云：昔者，古也，前也。故《孝經》云「昔者明王」，鄭注云：「昔，古也。」《檀弓》上篇云「予疇昔夜夢」，注云：「昔猶前也。」然則若對後言之，即言前，若對今言之，即言古。何氏言前古孔子有云，云，言也。「吾志在《春

秋》，行在《孝經》」。【疏】「吾志在」至「孝經」。○解

云：案《孝經鈎命決》云「孔子在庶，德無所施，功無所就，志在《春秋》，行在《孝經》是也。所以《春秋》言「志在」，《孝經》言「行在」，^④《春秋》者，賞善罰惡之書，見善能賞，見惡能罰，乃是王侯之事，非孔子所能行，故但言「志在」而已。《孝經》者，尊祖愛親，勸子事父，勸臣事君，理關貴賤，臣子所宜行，故曰「行在《孝經》」也。此二一學者，聖人之極致，【疏】「此二」至「極致」。○解云：

二學者，《春秋》、《孝經》也。極者，盡也。致之言至也，言聖人作此二經之時，盡已至誠而作之，故曰聖人之極致也。治世之要務也。^⑤○治，直吏反。【疏】「治世」至「務也」。○解云：凡諸經藝等皆治世所須，但此經或是懲惡勸善，或是尊祖愛親，有國家者最所急行，故云「治世之要務也」，言治世之精要急務矣。《祭統》云：「凡治人之道，莫急於禮。」禮者，謂三王以來也，若大道之時，禮於忠信爲薄。正以孔子修《春秋》，祖述堯舜，故言此。考諸舊本皆作「也」字，又且於理亦宜然。若作「世」

①「若」，單疏殘本作「者」，屬上讀。

②「邵」，阮校：「按：此字當作「邵」，從尸，高也。表德之字，無取於地名。」

③「傳」，原作「傳」，今據京都本、再造善本、閣本改。

④「行在」下，阮校：「當脫「者」字。」杉浦校：「「行在」下單疏鈔本、單疏殘本有「者」字。」

⑤「也」，阮校：「疏云：『考諸舊本皆作「也」，若作「世」字，俗誤已行。』按，「也」作「世」，則屬下讀，曰「世傳春秋者非一」，俗本是。」

字者，^①俗誤已行。

傳《春秋》者非一，【疏】「傳春秋者非一」。○

解云：孔子至聖，却觀無窮，知秦無道，將必燔書，故《春秋》之說口授子夏。度秦至漢，乃著竹帛，故《說題辭》云：「傳我書者，公羊高也。」戴宏序云「子夏傳與公羊高，高傳與其子平，平傳與其子地，地傳與其子敢，敢傳與其子壽。至漢景帝時，壽乃共弟子齊人胡毋子都著於竹帛，^②與董仲舒皆見於圖讖」是也。故大史公云「董仲舒，廣川人也，以治《春秋》，孝、景時為博士，下帷講誦。弟子傳以久次相受業，或莫見其面。董生相膠西王，疾免歸家，以修學著書為事，終不治產業」是也。又《六藝論》云：「治《公羊》者，胡毋生、董仲舒，董仲舒弟子嬴公，嬴公弟子眭孟，眭孟弟子莊彭祖及顏安樂，安樂弟子陰豐，^③劉向、王彥。」故曰「傳《春秋》者非一」。舊云「傳《春秋》者非一」者，謂本出孔子而傳五家，故曰「非一」。本據亂而作，【疏】「本據亂而作」。○解云：孔子本獲麟之後得端門之命，^④乃作《春秋》，公取十二，則天之數。是以不得取周公、成王之史，而取隱公以下，故曰據亂而作，謂據亂世之史而為《春秋》也。其中多非常異

義可怪之論，○論，盧困反，下「持論」同。【疏】「其中」至「之論」。○解云：由亂世之史，故有非常異義可怪之事也。「非常異義」者，即莊四年齊襄復九世之讎而滅紀，僖二年實與齊桓專封是也。^⑤此即是非常之異義，言異於文、武時。何者？若其常義，則諸侯不得擅滅諸侯，不得專封，故曰「非常異義」也。「其可怪之論」者，即昭三十一年邾婁叔術妻嫂而《春秋》善之是也。說者疑惑，【疏】「說者疑惑」。○解云：此「說者」，謂胡毋子

^①「若」下，杉浦校：「單疏鈔本有『有』字，單疏殘本亦有。按：『若』下當有『有』字。」

^②「共」，原作「其」，今據單疏殘本改。

^③「陰豐」，阮校：「《六藝論》之『陰豐』，疑即《漢書》『冷豐』之誤。」

^④「端」，原作「瑞」。阮校：「閩、監、毛本作『端』，是也，此誤。」杉浦校：「單疏鈔本作『端』，單疏殘本、毛本亦然。」今據改。

^⑤「僖二年」，「二」字原闕，闕字處有「元缺」二小字。杉浦校：「『僖』下，單疏鈔本有『二』字，單疏殘本、毛本亦有。」今據單疏鈔本、單疏殘本、杉浦校毛本、京都本、再造善本、閣本補。

都、董仲舒之後，莊彭祖、顏安樂之徒。見經傳與奪異於常理，故致疑惑。至有倍經、任意、反傳違戾者。【疏】「至有」至「戾者」。○解云：此倍讀如反背之背，非倍半之倍也。^①言由疑惑之故，雖解經之理而反背於經。即成二年，逢丑父代齊侯當左，以免其主。《春秋》不非而說者非之，是背經也。任意者，《春秋》有三世異辭之言，顏安樂以為從襄二十一年之後，孔子生訖，即為所見之世，是任意。任意者，^②凡言見者，目觀其事，心識其理，乃可為見，故《演孔圖》云「文、宣、成、襄，所聞之世也」。而顏氏分張一公而使兩屬，是其任意也。反傳違戾者，宣十七年，「六月，癸卯，日有食之」，案隱三年傳云：「某月某日朔，日有食之者，食正朔也。其或日，或不日者，或失之前，或失之後。」「失之前者，朔在前也」，謂二日乃食。^③失正朔於前，是以但書其日而已。「失之後者，朔在後也」，謂晦日食。失正朔於後，是以又不書日，但書其月而已。即莊十八年「三月，日有食之」是也。以此言之，則日食之道不過晦朔與二日。即宣十七年言日不言朔者，是二日明矣，而顏氏以為十四日日食，是反傳違戾也。其勢雖問，不得不廣，^④【疏】「其勢」至

「不廣」。○解云：言說者疑惑，義雖不是，但其形勢已然，故曰「其勢」。雖復致問，不得不廣引外文望成其說，故曰「不得不廣」也。一說謂顏、莊之徒以說義疑惑，未能定其是非，致使倍經、任意、反傳違戾，是以何氏觀其形勢，故曰「其勢」。維適畏人問難，故曰「維問」。遂恐己說窮短，不得不廣引外文望成己說，故曰「不得不廣」也。「維誤為「雖」耳。是以講誦師言至於百萬猶有不解，【疏】是以「至」不廣」。○解云：此「師」謂胡、董之前公羊氏之屬也。言由莊、顏之徒解義不是，致地問難，^⑤遂爾謬說至於百萬言。其言雖多，猶有合解而

①「半」，京都本、再造善本、閣本作「畔」。

②「是任意任意者」，杉浦校：「「任意」，單疏鈔本不重，讀者行旁記此二字。」

③「二」，單疏殘本作「之」。

④「雖問」，阮校：「疏云：『一說其勢維適畏人問難，故曰「維問」，「維」誤為「雖」耳。』按：「維」當作「惟」。」

⑤「地」，阮校：「閩、監、毛本「地」作「他」為是。」杉浦校：「單疏鈔本作「他」，單疏殘本亦然。」

不解者，^①故曰「猶有不解」矣。時加釀嘲辭，^②○釀

嘲，陟交反。【疏】「時加釀嘲辭」。○解云：顏安樂等解

此《公羊》，^③苟取頑曹之語，不顧理之是非，若世人云「雨

雪其雩，臣助君虐」之類是也。援引他經，失其句

讀，【疏】「援引」至「句讀」。○解云：三傳之理不同多

矣，群經之義隨經自合，而顏氏之徒既解《公羊》，乃取他

經爲義，猶賊黨入門，主人錯亂，故曰「失其句讀」。以

無爲有，【疏】「以無爲有」。○解云：《公羊》經、傳本

無以周王爲天囚之義，而《公羊》說及莊、顏之徒以周王

爲天囚，故曰「以無爲有」也。甚可閔笑者，【疏】「甚

可閔笑者」。○解云：欲存《公羊》者，閔其愚闇，欲毀《公

羊》者，笑其謬通也。^④不可勝記也。【疏】「不可勝

記也」。○解云：言其可閔可笑處多，不可勝負，不可具

記也。是以治古學貴文章者謂之俗儒，【疏】

「是以」至「俗儒」。○解云：《左氏》先著竹帛，故漢時謂

之古學。《公羊》漢世乃興，故謂之今學。是以許慎作

《五經異義》，云「古者，《春秋左氏》說。今者，《春秋公

羊》說」是也。治古學者，即鄭衆、賈逵之徒，貴文章矣。^⑤

謂之俗儒者，即《繁露》云：「能通一經曰儒生，博覽群書

號曰洪儒。」則言乖典籍、辭理失所名之爲俗，教授於世

謂之儒。鄭、賈之徒謂《公羊》雖可教授於世，而辭理失

所矣。至使賈逵緣隙奮筆，以爲《公羊》可

奪，《左氏》可興。【疏】「至使」至「可興」。○解云：

賈逵者，即漢章帝時衛士令也。言「緣隙奮筆」者，莊、顏之

徒說義不足，^⑥故使賈逵得緣其隙漏，奮筆而奪之，遂作

《長義》四十一條，云《公羊》理短，《左氏》理長，意望奪去

《公羊》而興《左氏》矣。鄭衆亦作《長義》十九條十七事，

專論《公羊》之短，《左氏》之長，在賈逵之前。何氏所以

不言之者，正以鄭衆雖扶《左氏》而毀《公羊》，但不與識

合，帝王不信，毀《公羊》處少，興《左氏》不强，故不言之。

①「有」，京都本、再造善本無此字。

②「時加釀嘲辭」，阮校：「按，《釋文》作『讓嘲』。讓，相貴讓也。嘲，嘲笑也。言時加誚讓嘲笑之辭。作

「釀」誤，當據正。」下「釀」同。

③「等」，京都本、再造善本作「善」。

④「謬通」，阮校：「閩、監、毛本作『謬妄』。」

⑤「矣」，阮校引浦鍾云：「『矣』爲『者』之誤。」

⑥「足」，單疏殘本作「是」。

豈如賈逵作《長義》四十一條，^①奏御于帝，帝用嘉之，乃知古之爲真也，賜布及衣，將然存立，^②但未及而崩耳。然則賈逵幾廢《公羊》，故特言之。

恨先師觀聽不決，多隨二創。【疏】「恨

先」至「二創」。○解云：此先師，戴宏等也。凡論義之法，先觀前人之理，聽其辭之曲直，然後以正義決之。^③今戴宏作《解疑論》而難《左氏》，不得《左氏》之理，不能以正義決之，故云「觀聽不決」。「多隨二創」者，上文云「至有背經、任意、反傳違戾」者，與《公羊》爲一創。又云「援引他經失其句讀」者，又與《公羊》爲一創。今戴宏作《解疑論》多隨此二事，故曰「多隨二創」也。而舊云《公羊》先師說《公羊》義不著，反與《公羊》爲一創，賈逵緣隙奮筆奪之，與《公羊》爲二創，非也。此世之餘事，

【疏】「此世之餘事」。○解云：何氏言先師解義雖曰不是，但有已在《公羊》必存，故曰此世之餘事。餘，末也。言戴氏專愚，^④《公羊》未申，此正是世之末事，猶天下閑事也。舊云，何氏云前世之師說此《公羊》不得聖人之本旨，而猶在世之末說，故曰「世之餘事」也。斯豈非守文、持論、敗績、失據之過哉？【疏】「斯豈」至

「過哉」。○解云：「守文」者，守《公羊》之文。「持論」者，執持《公羊》之文以論《左氏》，即戴宏《解疑論》之流矣。「敗績」者，爭義似戰陳，故以敗績言之。「失據」者，凡戰陳之法，必須據其險勢以自固，若失所據，即不免敗績。若似《公羊》先師，欲持《公羊》以論《左氏》，不閑《公羊》、《左氏》之義，反爲所窮，已業破散，是失所依據，故以喻焉。余竊悲之久矣。【疏】「余竊悲之久矣」。○解云：何邵公精學十五年，專以《公羊》爲己業，見《公羊》先

①「四十一」，原作「四十二」。阮校：「此本此疏上文『遂作長義四十一條』，是作「一」，不作「二」。今據單疏殘本、單疏鈔本、監本、毛本改。

②「然」，單疏鈔本、單疏殘本、閩本、監本、毛本作「欲」。阮校：「此當是「慾」之訛。」

③「然後以正義決之」，原作「然以義正決之」，杉浦校：「單疏鈔本、單疏殘本、毛本「義正」作「正義」。沈氏《正字》校者按：此即署名沈廷芳、收入《四庫全書》的《十三經注疏正字》，實爲浦鏜所著。」云：「然」下疑（脫）「後」字。」按：沈說是也。「義正」當作「正義」。今據杉浦校及京都本、再造善本、閩本改。

④「愚」，阮校：「毛本「愚」作「慮」。」

師失據敗績，爲他《左氏》先師所窮，但在室悲之而已，故謂之「竊悲」。非一朝一夕，故謂之「久」。後拜爲議郎，一舉而起，陵群儒之上，已業得申，乃得公然歎息。往者略

依胡毋生《條例》，○毋音無。多得其正，【疏】「往

者」至「其正」。○解云：胡毋生本雖以《公羊》經，傳傳授

董氏，猶自別作條例，故何氏取之以通《公羊》也。雖取以

通傳意，猶謙未敢言已盡得胡毋之旨，故言「略依」而已。

何氏本者作《墨守》以距敵《長義》以強義，^①爲《廢疾》以難

《穀梁》，^②造《膏肓》以短《左氏》，蓋在注傳之前，猶鄭君先

作《六藝論》訖，然後注書，故云「往者」也。何氏謙不言盡

得其正，故言「多」爾。故遂隱括使就繩墨焉。○

隱括，古奪反，結也。【疏】「故遂」至「墨焉」。○解云：隱

謂隱審，括謂檢括，繩墨猶規矩也。何氏言已隱審檢括《公

羊》，使就規矩也。然則何氏最存《公羊》也，而讖記不見

者，書不盡言故也。而舊云善射者，隱括令審，射必能中，

何氏自言已隱括《公羊》，能中其義也。凡木受繩墨，其直

必矣，何氏自言規矩《公羊》，令歸正路矣。

監本附音春秋公羊注疏序終^③

①「何氏本者作墨守以距敵長義以強義」，「本」，原作「木」，今據京都本、再造善本、中華本、閩本改。阮

校：「浦鏜云：『者』疑『著』之誤，當在『敵』字下。龔麗

正云：何氏不聞著《長義》，此言「距敵長義」，言與賈

逵《長義》相距敵也。按：如龔說，則當讀「著作《墨

守》以距敵《長義》」爲句，下「以強義」三字似衍。」

②「廢」，單疏殘本作「癢」，是。

③「監本附音春秋公羊注疏序終」，閩本作「春秋公羊經傳解詁序終」，單疏殘本、監本、毛本無此數字。

監本附音春秋公羊注疏隱公卷第一

起元年，盡元年^①

春秋公羊經傳解詁隱公第一^②

○陸曰：解詁，佳買反，下音古，訓也。【疏】「春秋」至「第一」。○解云：案：舊題云「春秋隱公經傳解詁第一公羊何氏」，則云「春秋」者，一部之總名。「隱公」者，魯侯之謚號。「經傳」者，雜繹之稱。「解詁」者，何所自目。「第一」者，無先之辭。「公羊」者，傳之別名。「何氏」者，邵公之姓也。今定本則升「公羊」字在「經傳」上，退「隱公」字在「解詁」之下，未知自誰始也。又云「何休學」，今案《博物志》曰：「何休注《公羊》，云『何休學』。有不解者，或答曰：『休謙辭受學於師，乃宣此義不出於己。』」此言爲允，是其義也。○問曰：《左氏》以爲魯哀十一年夫子自衛反魯，十二年告老，遂作《春秋》，至十四年經成，不審《公羊》之義，孔子早晚作《春秋》乎？○答

曰：《公羊》以爲哀公十四年獲麟之後，得端門之命，乃作《春秋》，至九月而止筆。《春秋說》具有其文。○問曰：若《公羊》之義，以獲麟之後乃作《春秋》，何故「太史公遭李陵之禍，幽于縲紲，乃喟然而嘆曰：是余罪也」，「夫昔西

①「起元年盡元年」，單疏殘本起序，盡元年正月。

②「春秋公羊經傳解詁隱公第一」，阮校：「解云：『舊題「春秋隱公經傳解詁第一公羊何氏」，今定本升「公羊」字在「經傳」上，退「隱公」字在「解詁」之下，又云「何休學」。』臧琳《經義雜記》曰：『《詩》正義云：鄭注三《禮》、《周易》、《中候尚書》皆大名在下，孔安國、馬季長、盧植、王肅之徒其所注者莫不盡然，則《公羊傳》亦本「隱公」小題在上，「公羊」大題在下。定本誤改，故唐人多從之。』臧禮堂曰：「何氏題「何休學」，非也。杜預解《左傳》，止題「杜氏」，趙岐《孟子章句》但題「趙氏」，鄭注《孝經》但題「鄭氏」，古人遜謙，不欲自表其名，但著氏族，俾可識別耳。」按：唐石經「桓公第二何休學」，原刻作「何氏」，後磨改作「何休」。據疏引《博物志》，則晉時本已稱「何休學」矣。閩、監、毛本「何休學」三字在此題下，此本移於疏後，非也。元板同。」杉浦校：「此題，單疏鈔本、單疏殘本並如此。『何休學』三字，單疏鈔本、單疏殘本並在此題下。」

伯拘美里，演《易》。孔子厄陳、蔡，作《春秋》。屈原放逐，著《離騷》。左丘明失明，厥有《國語》。孫子膺脚，而論《兵法》。「此人皆意有所鬱結，不得通其道也」，故自黃帝始作其文也。案《家語》孔子厄於陳、蔡之時，當哀公六年，何言十四年乃作乎？○答曰：孔子厄陳、蔡之時，始有作《春秋》之意，未正作，其正作猶在獲麟之後也。故《家語》云「晉文之有霸心，起于曹、衛；越王句踐之有霸心，起于會稽」，「夫陳、蔡之間，丘之幸也」。庸知非激憤厲志，始於是乎者？是其有意矣。○問曰：若《左氏》以為夫子魯哀公十一年自衛反魯，至十二年告老，見周禮盡在魯，魯史法最備，故依魯史記修之以為《春秋》。《公羊》之意，據何文作《春秋》乎？○答曰：案閔因敘云：「昔孔子受端門之命，制《春秋》之義，使子夏等十四人求周史記，得百二十國寶書，九月經立。《感精符》、《考異郵》、《說題辭》具有其文。」以此言之，夫子修《春秋》，祖述堯、舜，下包文、武，又為大漢用之訓世，不應專據魯史，堪為王者之法也，故言據百二十國寶書也。周史而言寶書者，寶者，保也，以其可世世傳保以為戒，故名寶書也。①○問曰：若然，《公羊》之義，據百二十國寶書以作《春秋》，今經止有五十餘國，通戎夷宿潞之屬，

僅有六十，何言百二十國乎？○答曰：其初求也，實得百二十國史，但有極美可以訓世，有極惡可以戒俗者，取之，若不可為法者，皆棄而不錄，是故止得六十國也。②○問曰：若言據百二十國寶書以為《春秋》，何故《春秋說》云「據周史立新經」乎？○答曰：閔因敘云：「使子夏等十四人求周史記，得百二十國寶書。」以此言之，周為天子，雖諸侯史記，亦得名為周史矣。○問曰：《六藝論》云：「六藝者，圖所生也。」然則《春秋》者，即是六藝也，而言依百二十國史以為《春秋》何？○答曰：元本「河出圖，洛出書」者，正欲垂範於世也。王者遂依圖書以行其事，史官錄其行事以為《春秋》，夫子就史所錄，刊而修之，云出圖書，豈相妨奪也？○問曰：案《三統曆》云：「春為陽中，萬物以生，秋為陰中，萬物以成，故名《春秋》。」賈、服依此以解《春秋》之義，不審何氏何名《春秋》乎？○答曰：公羊何氏與賈、服不異，亦以為欲使人君動作不失中也。而《春秋說》云「始於春，終於秋，故曰

① 「名」，原作「云」，今據單疏鈔本、單疏殘本、京都本、再造善本、閣本改。

② 「故」，京都本、再造善本、閣本作「以」。

《春秋》者，道春爲生物之始，而秋爲成物之終，故云「始於春，終於秋，故曰《春秋》」也。而舊云《春秋說》云「哀十四年春，西狩獲麟，作《春秋》，九月書成」。以其書作秋成，^①故云《春秋》也者，非也。何者？案莊七年經云「星實如雨」，傳云：「不修《春秋》曰：『雨星，不及地尺而復。』」君子修之曰：「星實如雨。」何氏云：「不修《春秋》，謂史記也。古者謂史記爲『春秋』。」以此言之，則孔子未修之時已名《春秋》，何言孔子修之，春作秋成，乃名《春秋》乎？○問曰：《春秋》據史書而爲之，史有左右，據何史乎？○答曰：《六藝論》云：「《春秋》者，國史所記人君動作之事，左史所記爲《春秋》，右史所記爲《尚書》。」是以《玉藻》云：「動則左史書之，言則右史書之。」鄭注云：「其書，《春秋》、《尚書》其存者。」記文先言左史，鄭注先言《春秋》，明以左史爲《春秋》矣。云云之說，《左氏》首已成解，不能重載。^②夫子所以作《春秋》者，《解疑論》云：「聖人不空生，受命而制作，所以生斯民，覺後生也。西狩獲麟，知天命去周，赤帝方起，麟爲周亡之異、漢興之瑞，故孔子曰『我欲託諸空言，不如載諸行事』。又聞端門之命，有制作之狀，乃遣子夏等求周史記，得百二十國寶書，修爲《春秋》，故《孟子》云：『世衰道微，邪說暴行

有作，臣弑其君者有之，子弑其父者有之，孔子懼，作《春秋》。」故《史記》云《春秋》之中，弑君三十六，亡國五十二，諸侯奔走，不得保其社稷者，不可勝數，「故有國者，不可以不知《春秋》」。爲人臣者，不可以不知《春秋》。爲人君父而不通於《春秋》之義者，必蒙首惡之名。爲人臣子而不通於《春秋》之義者，必陷篡弑之誅。」以此言之，則孔子見時衰政失，恐文、武道絕，又見麟獲，劉氏方興，故順天命，以制《春秋》以授之。必知孔子制《春秋》以授漢者，案《春秋說》云：「伏羲作八卦，丘合而演其文，瀆而出其神，作《春秋》以改亂制。」又云：「丘攬史記，^③援引古圖，推集天變，爲漢帝制法，陳敘圖錄。」又云：「丘水精

① 「以其書作秋成」，阮校：「何校宋監本作『以書春作秋成』，此脫『春』字。閩、監、毛本『書』作『春』。

按：當作「以其書春作秋成」。」杉浦校：「單疏鈔本、單疏殘本皆作『以其春作秋成』，當據。」

② 「不能重載」，原作「不能○重載」，阮校：「何校本作『不能重載』，無『○』，是也。」今據單疏鈔本、單疏殘本及何校本改。

③ 「攬」，杉浦校：「單疏鈔本、單疏殘本作『覽』。」

治法，爲赤制功。」又云：「黑龍生爲赤，必告云象使知命。」^①又云：「經十有四年春，西狩獲麟，赤受命，倉失權，周滅火起，薪采得麟。」以此數文言之，《春秋》爲漢制明矣。○問：案莊七年「星實如雨」，傳云：「不修《春秋》曰：『雨星，不及地尺而復。』君子修之曰：『星實如雨。』」又昭十二年「齊高偃帥師納北燕伯于陽」，傳云：「伯于陽者何？公子陽生也。子曰：『我乃知之矣。』」在側者曰：「子苟知之，何以不革？」曰：「如爾所不知何？」《春秋》之信史也，^②其序則齊桓、晉文，其會則主會者爲之，其詞則丘有罪焉爾。^③何故孔子修《春秋》，有改之者何？可改而不改者何？○答曰：其不改者，勿欲令人妄億措，其改者，所以爲後法，故或改或不改，示此二義。○問曰：《公羊》以魯隱公爲受命王，黜周爲二王後。案《長義》云「名不正則言不順，言不順則事不成」，今隱公人臣而虛稱以王，周天子見在上而黜公侯，是非正名而言順也。如此，何以笑子路率爾？何以爲忠信？何以爲事上？何以誨人？何以爲法？何以全身？如此若爲通乎？○答曰：《孝經說》云：「孔子曰：『《春秋》屬商，《孝經》屬參。』」然則其微似之語獨傳子夏，^④子夏傳與公羊氏，五世乃至漢胡毋生、董仲舒，推演其文，然

後世人乃聞此言矣。孔子卒後三百歲，何不全身之有？又《春秋》藉位於魯，以託王義，隱公之爵不進稱王，周王之號不退爲公，何以爲不正名？何以爲不順言乎？又奉天命而制作，何不謙讓之有？^④○問曰：《春秋說》云：「孔子欲作《春秋》，卜得陽豫之卦。」宋氏云：「夏、殷之卦名也。」孔子何故不用周易占之乎？○答曰：蓋孔子見西狩獲麟，知周將亡，又見天命有改制作之意，故用夏、殷之易矣。或言卜則是龜之辭也，不從宋氏之說。若然，應言「陽豫之兆」，何言卦乎？蓋龜著通名，故言卜矣。○問曰：何氏注《春秋》，始乎隱公，則天之數，不審孔子何以正于獲麟止筆乎？○答曰：案哀十四年傳

①「告云」，單疏鈔本、單疏殘本、監本、毛本「云」作「示」。杉浦校：「單疏本作『告示』，注疏本改『告云』，重刊本因承之。」

②「信史」，原作「信忠」，杉浦校：「單疏鈔本、單疏殘本作『信史』。阮氏校勘記云：『閩、監、毛本作『信史』。按：昭十二年傳作『信史』。』按：『信忠』，『信史』之誤。」今據改。

③「傳」，京都本、再造善本作「得」。

④「不」，阮校：「閩本同，誤也。監、毛本『不』作『以』。」

云「《春秋》何以始乎隱」，注云：「據得麟乃作。」「祖之所逮聞也」，注云：「託記高祖以來，事可及問聞知者，猶曰『我但記先人所聞，辟制作之害』。」「所見異辭，所聞異辭，所傳聞異辭，何以終乎哀十四年」，彼注云：「據哀公未終也。」曰「備矣」，彼注云「人道浹，王道備，必止於麟者，欲見撥亂功成於麟，猶堯、舜之隆，鳳皇來儀，故麟於周爲異，《春秋》記以爲瑞，明大平以瑞應爲効也。絕筆於春，不書下三時者，起木絕火王，制作道備，當授漢也」是也。○問曰：既言始於隱公，則天之數，復言三世，故發隱公何？○答曰：若論象天數，則取十二，緣情制服，宜爲三世，故禮爲父三年，爲祖期，爲高祖，曾祖齊衰三月。據哀錄隱，兼及昭、定，已與父時事，爲所見之世。文、宣、成、襄，王父時事，謂之所聞之世也。隱、桓、莊、閔、僖，曾祖、高祖時事，謂之所傳聞之世也。制治亂之法，書大夫之卒，文有詳略，故日月備于隱。如是，有罪之見錄，不日卒于得臣，明有過以見罪，益師不日，著恩遠之辭。○問曰：鄭氏云：九者，陽數之極，九九八十一，是人命終矣，故《孝經援神契》云：「《春秋》三世，以九九八十一爲限。」然則隱元年盡僖十八年爲一世，自僖十九年盡襄十二年又爲一世，自襄十三年盡哀十四年又爲

一世，所以不悉八十一年者，見人命參差，不可一齊之義。又顏安樂以襄二十一年孔子生後，即爲所見之世。顏、鄭之說，實亦有途，而何氏見何文句，要以昭、定、哀爲所見之世，宣、文、成、襄爲所聞之世，^①隱、桓、莊、閔、僖爲所傳聞之世乎？○答曰：顏氏以爲襄公二十三年

「邾婁來奔」，傳云：「邾婁無大夫，此何以書？以近書也。」又昭公二十七年「邾婁來奔」，傳云：「邾婁無大夫，此何以書？以近書也。」二文不異，同宜一世，若分兩屬，理似不便。又孔子在襄二十一年生，從生以後，理不得謂之所聞也。顏氏之意，盡於此矣。何氏所以不從之者，以爲凡言見者，目覩其事，心識其理，乃可以爲見，孔子始生，未能識別，寧得謂之所見乎？故《春秋說》云「文、宣、成、襄，所聞之世」，不分疏二十一年已後，明爲一世矣。邾婁快、邾婁鼻我雖同有「以近書」之傳，一自是治近升平書，一自是治近大平書，雖不相干涉，^②而漫指此文乎？鄭氏雖依《孝經說》文取襄十二年之後爲所

① 「宣文」，此序世事，宣在文後，當作「文宣」。

② 「雖」，單疏鈔本、單疏殘本、毛本、京都本、再造善本、閣本作「實」。杉浦校：「作『實』，當據。」

見之世，爾時孔子未生，焉得謂之所見乎？故不從之。

○問曰：《孝經說》文實有九九八十一爲限之言，《公羊》信緯，可得不從乎？○答曰：《援神契》者，自是《孝經

緯》橫說義之言，更作一理，非是正解《春秋》之物，故何氏自依《春秋說》爲正解明矣。○問曰：《左氏》出自丘明，便題云《左氏》，《公羊》、《穀梁》出自卜商，何故不題曰「卜氏傳」乎？○答曰：《左氏傳》者，丘明親自執筆爲之，以說經意，其後學者題曰《左氏》矣。且《公羊》者，子

夏口授公羊高，高五世相授，至漢景帝時，公羊壽共弟子胡毋生乃著竹帛，胡毋生題親師，故曰《公羊》，不說卜氏矣。①《穀梁》者，亦是著竹帛者題其親師，故曰《穀梁》也。○問曰：《春秋說》云「《春秋》設三科九旨」，其義如何？○答曰：何氏之意，以爲三科九旨正是一物，若總

言之，謂之三科。科者，段也。若析而言之，謂之九旨。旨者，意也。言三个科段之內，有此九種之意。故何氏作《文謚例》云「三科九旨者，新周故宋，以《春秋》當新

王」，此一科三旨也。又云「所見異辭，所聞異辭，所傳聞異辭」，二科六旨也。又「內其國而外諸夏，內諸夏而外夷狄」，是三科九旨也。○問曰：案宋氏之注《春秋說》：「三科者，一曰張三世，二曰存三統，三曰異外內，是三科

也。九旨者，一曰時，二曰月，三曰日，四曰王，五曰天王，六曰天子，七曰譏，八曰貶，九曰絕。時與日、月，詳略之旨也。王與天王、天子，是錄遠近親疎之旨也。譏與貶、絕，則輕重之旨也。」如是，三科九旨，聊不相干，何故然乎？○答曰：《春秋》之內，具斯二種理，故宋氏又

有此說，賢者擇之。○問曰：《文謚例》云：「此《春秋》五始、三科、九旨、七等、六輔、二類之義，以矯枉撥亂，爲受命品道之端，正德之紀也。」然則三科九旨之義，已蒙前說，未審五始、六輔、二類、七等之義如何？○答曰：案

《文謚例》下文云：「五始者，元年、春、王、正月、公即位是也。七等者，州、國、氏、人、名、字、子是也。六輔者，公輔天子，卿輔公，大夫輔卿，士輔大夫，京師輔君，諸夏輔京師是也。二類者，人事與災異是也。」○問曰：《春秋說》云：「《春秋》書有七缺。」七缺之義如何？○②答

曰：七缺者，惠公妃匹不正，隱、桓之禍生，是爲夫之道缺

①「說」，杉浦校：「單疏鈔本、單疏殘本、毛本作「曰」。」
②「○」，原無。按原書通例，每節疏語起首之字在行首，版刻不加「○」標誌。此爲統一體例增補。下不另出校。

也。文姜淫而害夫，爲婦之道缺也。大夫無罪而致戮，爲君之道缺也。臣而害上，爲臣之道缺也。僖五年「晉侯殺其世子申生」，襄二十六年「宋公殺其世子痤」，殘虐枉殺其子，是爲父之道缺也。文元年「楚世子商臣弑其君髡」，襄三十年「蔡世子般弑其君固」，是爲子之道缺也。桓八年「正月，己卯，蒸」，^①桓十四年八月「乙亥，嘗」，僖三十一年「夏，四月，四卜郊不從，乃免牲，猶三望」，郊祀不修，^②周公之禮缺，是爲七缺也矣。

何休學○學者，言爲此經之學，即注述之意。

元年，春，王正月。○正月，音征，又音政，後

放此。【疏】「元年春王正月」。○解云：若《左氏》之義，不問天子諸侯，皆得稱元年。若《公羊》之義，唯天子乃得稱元年，諸侯不得稱元年。此魯隱公，諸侯也，而得稱元年者，《春秋》託王於魯，以隱公爲受命之王，故得稱元年矣。元年者何？諸據疑，問所不知，故曰「者何」。

【疏】「元年者何」。○解云：凡諸侯不得稱元年，今隱公爵猶自稱侯，而反稱元年，故執不知問。○注「諸據」至「者何」。○解云：謂諸據有疑理，而問所不知者，曰「者何」，即僖五年秋「鄭伯逃歸不盟」之下，傳云「不盟者

何」，注云：「據上言諸侯，鄭伯在其中，弟子疑，故執不知問。」成十五年「仲嬰齊卒」之下，傳云「仲嬰齊者何」，注云「疑仲遂後，故問之」是也。若據彼難此，即或言「曷爲」，或言「何以」，或單言「何」，即下傳云「曷爲先言王而後言正月」，注云：「據下秋七月天王，先言月，而後言王。」公何以不言即位，注云：「據文公言即位也。」「何成乎公之意」，注云「據刺欲救紀，而後不能」是也。而舊解云，案《春秋》上下，但言「曷爲」與「何」，皆有所據，故何氏云「諸據疑」者，皆無所據，故云「問所不知，故曰者何」也者，非。君之始年也。以常錄即位，知君之始

年。君，魯侯隱公也。年者，十二月之總號，《春秋》書十二月稱年是也。變一爲元，元者，氣也，無形以起，有形以分，造起天地，天地之始也，故上無所繫，而使春繫之也。不言公，言君之始年者，王者諸侯皆稱君，所以通其義於王者，惟王者然後改元立號。《春秋》託新王受命於

① 「蒸」，阮校：「閩、監、毛本『蒸』作『烝』。」桓公八年經作「烝」，此當作「烝」。

② 「郊」，原漫漶作「六」，今據京都本、再造善本、中華本、閣本改。

魯，故因以錄即位，明王者當繼天奉元，養成萬物。【疏】注「以常」至「始年」。○解云：正以桓、文、宣、成、襄、昭及哀，皆云「元年，春，王正月，公即位」，故曰「以常錄即位，知君之始年」。○注「君魯侯隱公也」。○解云：案《春秋說》云：「周五等爵法五精：公之言公，公正無私。侯之言候，候逆順，兼伺候王命矣。伯之言白，明白于德。子者，孳恩宣德。男者，任功立業。皆上奉王者之政教、禮法，統理一國，修身絮行矣。」今此侯爲魯之正爵，公者，臣子之私稱，故言「君，魯侯隱公也」。○問曰：五等之爵既如前釋，何名附庸乎？○答曰：《春秋說》下文云：「庸者，通也。官小德微，附於大國以名通，若畢星之有附耳然。」故謂之附庸矣。○注「變一爲元」。○解云：以下有二年三年，知上宜云一年，而不言一年，變言元年，故決之。○注「元者」至「始也」。○解云：《春秋說》云：「元者，端也，氣泉。」注云：「元爲氣之始，如水之有泉，泉流之原，無形以起，有形以分，窺之不見，聽之不聞。」宋氏云：「無形以起，在天成象；有形以分，在地成形也。」然則有形與無形，皆生乎元氣而來，故言「造起天地，天地之始也」。○注「故上」至「繫之」。○解云：《春秋說》云：「王不上奉天文以立號，則道術無原，故先陳

春後言王。天不深正其元，則不能成其化，故先起元，然後陳春矣。」是以推「元」在「春」上，「春」在「王」上矣。○注「不言」至「王者」。○解云：凡天子、諸侯同得稱君，但天子不得稱公，故《喪服》云「君」，鄭云「天子、諸侯及卿大夫有地者，皆曰君」是也。今據魯而言，不言「公之始年」，而言「君之始年」者，見諸侯不得稱元，會假魯爲王，乃得稱元，故傳言「君之始年」，微欲通魯于王故也。春者何？獨在「王」上，故執不知問。【疏】注「獨在」至「知問」。○解云：春夏秋冬皆是四時之名，而夏秋冬三時，常不得配王言之，唯有「春」字常在「王」上，故怪而問之。歲之始也。以上繫「元年」在「王正月」之上，知歲之始也。春者，天地開辟之端，養生之首，法象所出，四時本名也。昏斗指東方曰春，指南方曰夏，指西方曰秋，指北方曰冬。歲者，總號其成功之稱，《尚書》「以閏月定四時成歲」是也。○辟，婢亦反，本亦作「闕」。稱，尺證反，下「之稱」、「卑稱」同。【疏】「歲之始也」。○問曰：「元年，春，王，正月，公即位」，實是《春秋》之五始，而傳直於「元年」、「春」之下發言始，而「王」、「正月」下不言始何？○答曰：元是天地之始，春是四時之始，「王正

月，公即位」者，人事之始，欲見尊重天道，略於人事故也。○注「春者」至「之端」。○解云：《易說》云：「孔子曰：『《易》始於大極，大極分而為二，故生天地。』天地有春夏秋冬之節，故生四時也。」言天地開辟，分為四時，春先為端始也。○注「養生之首」。○解云：《乾鑿度》云：「震生萬物於東方，^①夫萬物始生於震。震，東方之卦也。陽氣施生，愛利之道，故東方為仁矣。」故言「養生之首」，言是養生萬物之初首。○注「法象所出」。○解云：《周禮·大宰》云：「正月之吉，始和，布政于邦國都鄙，縣治象之法于象魏，挾日而斂之。」是象魏之法于時出之，故曰「法象所出」矣。○注「四時本名也」。○解云：凡四時，先春，次夏，次秋，次冬，百代所不變，故言春者，四時本名矣。○注「昏斗」至「冬也」。^②○解云：皆《春秋說》文也。○注「歲者」至「之稱」。○解云：四時皆於萬物有功，歲者，是兼總其成功之稱也。若以當代相對言之，即唐虞曰載，夏曰歲，殷曰祀，周曰年。若散文言之，不問何代，皆得謂之歲矣。等取一名，而必取歲者，蓋以夏數為得天正故也。亦有一本云：「歲者，總號成功之稱也。」○注「尚書」至「是也」。○解云：此《堯典》文。彼鄭注云「以閏月推四時，使啓、閉、分、至不失其常，著之用成歲

歷，將以授民時，且記時事」是也。王者孰謂？孰，誰也。欲言時王則無事，欲言先王又無謚，故問誰謂。【疏】注「欲言」至「無事」。○解云：時王，即當時平王也。若是當時平王，應如下文「秋，七月，天王使宰咺來歸惠公仲子之賵」，是其事也。今無此事，直言王，故疑非謂當時之王矣。^③○注「欲言」至「無謚」。○解云：正以死謚，周道故也。謂文王也。以上繫王於春，知謂文王也。文王，周始受命之王，天之所命，故上繫天端。方陳受命制正月，故假以為王法。不言謚者，法其生，不法其死，與後王共之，人道之始也。【疏】注「以上」至「王也」。○解云：春者，端始。文王者，周之始受命制法之王，理宜相繫，故見其繫春，知是文王，非周之餘王也。○問曰：《春秋》之道，今有三王之法，所以通天三統，是以《春

① 「物」，單疏殘本重文。

② 「注昏斗至冬也」，阮校：「按：今本注中無『也』字，

「冬」上當有『日』字。」

③ 「謂」，單疏鈔本、單疏殘本、毛本、京都本、再造善本、

閣本作「是」。

秋說云「王者孰謂？」^①謂文王也。疑三代謂疑文王，而傳專云文王，不取三代何？○答曰：大勢《春秋》之道，實兼三王，是以《元命包》上文總而疑之，而此傳專云「謂文王」者，以見孔子作新王之法，當周之世，理應權假文王之法，故偏道之矣。^②故彼宋氏注云「雖大略據三代，其要主於文王者」是也。○注「文王」至「之王」。○解云：即《我應瑞》云「季秋之月，甲子，赤雀銜丹書入豐，止于昌戶，昌再拜稽首，受之」。又《禮說》云「文王得白馬、朱鬣、大貝、玄龜」是也。○注「天之」至「天端」。○解云：天端即春也，故《春秋說》云「以元之深」，^③正天之端。以天之端，正王者之政「是也」。○注「方陳」至「王法」。○解云：孔子方陳新王受命制正月之事，故假取文王創始受命制正朔者，將來以為法，其實為漢矣。○注「不言」至「共之」。○解云：死謚，周道，文王死來已久，而不言謚者，正言法其生時政教正朔，故曰「法其生，不法其死」也。言「與後王共之」者，不言謚，可以通之於後王。後王，謂漢帝也。○注「人道之始也」。○解云：何氏以見上文亦始，尊重天道，皆傳自有始文，故不須注云天道之始。今此實天下之始，但略於人事，無始文，故須注云「人道之始也」。曷為先言王而後言正月？據

下「秋，七月，天王」，先言月而後言王。王正月也。

以上繫於王，知王者受命，布政施教所制月也。王者受命，必徙居處，改正朔，易服色，殊徽號，變犧牲，異器械，明受之於天，不受之於人。夏以斗建寅之月為正，平旦為朔，法物見，色尚黑。殷以斗建丑之月為正，雞鳴為朔，法物牙，色尚白。周以斗建子之月為正，夜半為朔，法物萌，色尚赤。○徽，許韋反。械，戶戒反。夏以，戶雅反，後放此，以意求之。見，賢遍反，下「並見」同。【疏】注「王者」至「於人」。○解云：「王者受命，必徙居處」者，則堯居平陽，舜居蒲坂，文王受命，作邑於豐之屬是也。其「改正朔，易服色，殊徽號，異器械」者，《禮記·大傳》文。鄭注云：「服色，車馬也。徽號，旌旗之名也。器械，禮樂之器及兵甲也。」然則改正朔者，即「正朔三而改」下注云是也。易服色者，即《明堂位》云「鸞車，有虞

①「是以春秋說云」，阮校：「此下文當有脫誤。下『疑三代謂疑文王』同。按：當云『疑三代不專謂文王』則可讀。」

②「偏」，單疏鈔本、單疏殘本、閩本、監本、毛本作「偏」。

③「深」，阮校引浦鏜云：「『深』當作『氣』。」

氏之路也。鉤車，夏后氏之路也。大路，殷路也。乘路，周路也，「夏后氏駱馬黑鬣，殷人白馬黑首，周人黃馬蕃鬣」之屬是也。其殊徽號者，即《明堂位》云「有虞氏之旂，夏后氏之綬，殷之大白，周之大赤」之屬是也。其變犧牲者，即《明堂位》云「夏后氏牲尚黑，殷白牡，周騂剛」之屬是也。其異器械者，器即《明堂位》云「泰，有虞氏之尊也。山罍，^①夏后氏之尊也。著，殷尊也。犧象，周尊也」，注云「泰用瓦。著，著地無足」。「夏后氏之鼓足」，彼注云「足謂四足也」。「殷楹鼓」，彼注云「楹謂之柱，貫中上出也」。「周縣鼓」，注云「縣，縣之簣虞也」。其械者，即兵甲也，何氏莊三十二年注云「有攻守之器曰械」是。而言異者，即《釋器》云「弓有緣者謂之弓，無緣者謂之弭」，蓋以爲異代相變，故云異也。所以止變此等者，其親親、尊尊之屬不可改，即《大傳》云「其不可得變革者則有矣，親親也，尊尊也，長長也，男女有別，此其不可得與民變革者也」是也。○注「夏以」至「尚赤」。○解云：凡草物皆十一月動萌而赤，十二月萌芽始白，十三月萌芽始出而首黑，故各法之，故《書傳略說》云「周以至動，殷以萌，夏以牙」，注云「謂三王之正也。至動，冬至至物始動也。物有三變，故正色有三。天有三生三死，故土有

三王。^②王特一生死，^③是故周人以日至爲正，殷人以日至三十日爲正，夏以日至六十日爲正。是故三統三王，若循環，周則又始，窮則反本」是也。○問曰：若如此說，則三王所尚，各自依其時物之色，何故《禮說》云「若尚色，天命以赤尚赤，以白尚白，以黑尚黑」，宋氏云「赤者，命以赤鳥，^④故周尚赤。湯以白狼，故尚白。禹以玄珪，故尚黑也」。以此言之，三代所尚者，自是依天命之色，何言法時物之牙色乎？○答曰：凡正朔之法，不得相因，滿三反本，禮則然矣，但見其受命將王者，應以十一月爲正，則命之以赤瑞，應以十二月爲正，則命以白瑞，^⑤應以十三月爲正，即命之以黑瑞，是以《禮說》有此

①「罍」，原作「壘」。杉浦校：「按《禮記·明堂位》陸氏

《釋文》作「山罍」，音雷。仍此，則「壘」當作「罍」。今據單疏鈔本、單疏殘本、京都本、再造善本、閣本改。

②「土」，原作「士」，今據京都本、再造善本、中華本、閣本改。

③「王」，原作「生」，今據京都本、再造善本、中華本、閣本改。

④「鳥」，京都本、再造善本作「烏」。阮校云：「『烏』字是也。」
⑤「命」下，阮校：「當脫『之』。」

言，豈道不復法其牙色乎？何言乎王正月？據

定公有王無正月。【疏】注「據定」至「正月」。○解云：定公元年「春，王三月，晉人執宋仲幾于京師」，是有王無正月。凡十二公即位，皆在正月，是以不問有事無事，皆書「王正月」，所以重人君即位之年矣。若非即位之年，正月無事之時，或有二月王，或有三月王矣，但定公即位於六月，正月復無事，故書三月王也，其正月時不得書王矣。大一統也。統者，始也，總繫之辭。夫王者，^①始受命改制，布政施教於天下，自公侯至於庶人，自山川至於草木昆蟲，莫不一一繫於正月，故云政教之始。【疏】「大一統也」。○解云：所以書正月者，王者受命制正月以統天下，令萬物無不一一皆奉之以為始，故言大一統也。○注「總繫之辭」。○解云：凡前代既終，後主更起，^②立其正朔之初，布象魏於天下，自公侯至於庶人，自山川至於草木昆蟲，莫不繫於正月而得其所，故曰「總繫之辭」。○注「故云政教之始」。○解云：亦以傳不言始，故足之。

公何以不言即位？據文公言即位也。即位者，^③一國之始，政莫大於正始，故《春秋》以元之氣正天

之端，以天之端正王之政，以王之政正諸侯之即位，以諸侯之即位正竟內之治。諸侯不上奉王之政，則不得即位，故先言正月，而後言即位。政不由王出，則不得為政，故先言王，而後言正月也。王者不承天以制號令，則無法，故先言春，而後言王。天不深正其元，^④則不能成其化，故先言元，而後言春。五者同日並見，相須成體，乃天人之大本，萬物之所繫，不可不察也。○治，直吏反。夫，音扶。【疏】注「據文公言即位也」。○解云：文元年「春，王正月，公即位」是也。○問曰：桓公元年春亦書即位，傳所以不從始，而遠據文公何？○答曰：正以文公正即位之始故也。桓公篡而即位，非其正，故雖即

①「夫」，原作「天」，阮校：「宋鄂州官本、元本、閩本『天』作『夫』，咸十五年疏、定元年疏引此注同。當據以訂正。」今據改。

②「主」，阮校引盧文弨曰：「疑當作『王』。」

③「即位者」，阮校引盧文弨曰：「《春秋左氏正義》引此注作『公即位者』，多『公』字。」

④「天不」，余本、鄂本、元本、閩本、京都本、再造善本「天」作「夫」。阮校：「《釋文》作『夫不，音扶』。按：此陸德明一時誤會，未審其文理也。」

位在文公前，猶不據之。○注「即位者一國之始」。○解云：亦以傳無始文，故言此也。○注「政莫大於正始」。○解云：爲下作文勢也。言凡欲正物之法，莫大於正其始時，是以《春秋》作五始，令之相正也。○注「乃天」至「不察也」。○解云：元年春者，天之本；王正月，公即位者，人之本，故曰「天人之大本」也。言「萬物之所繫」者，《春秋》以之爲始，令萬物繫之，故不可不察其義。成公意也。以不有正月而去即位，知其成公意。○而去，起呂反，下「去」同。【疏】注「以不」至「公意」。○解云：下十一年傳云：「隱何以無正月？隱將讓乎桓，故不有其正月也。」然則正月者，是公縣象魏出教令之月，今公既有讓意，故從二年已後，終隱之篇，常去正月以見之，故曰「不有正月」也。然則今此注云「不有正月」者，謂從二年恒去正月也。今元年去即位，故知成公意矣。今元年言正月者，公時實行即位之禮，故見之。然則公意讓而行即位者，厭民臣之心故也。舊云以有正月而去即位，云無「不」字，言凡書正月爲公即位出也，以元年有正月，即公實行即位禮，而孔子去即位，知其成公讓意者，非。何成乎公之意？據刺欲救紀而後不能。○刺欲，

七賜反，後皆同，更不音。【疏】注「據刺」至「不能」。○解云：莊三年「冬，公次于郎」，傳曰：「其言次于郎何？刺欲救紀而後不能也。」然則欲救紀是善事，公不能救紀，是不終善事，而《春秋》書「次于郎」以刺之。今隱公有讓心，實是善事，但終讓不成，爲他所殺，亦是善心不遂，而《春秋》善之，故以爲難也。公將平國而反之桓。平，治也。時廢桓立隱不平，故曰平反還之。曷爲反之桓？據已立也。桓幼而貴，隱長而卑。長者，已冠也。禮，年二十見正而冠。《士冠禮》曰：「嫡子冠於阼，以著代也。醮於客位，加有成也。三加彌尊，諭其志也。冠而字之，敬其名也。公侯之有冠禮，夏之末造也。天子之元子猶士也，天下無生而貴者。」○隱長，丁丈反，注及下皆同。已冠，工亂反，下同。適子，丁歷反，下同。醮，子笑反。【疏】注「禮年」至「而冠」。○解云：若以襄九年《左傳》言，魯襄公年十二而冠也。依《八代記》，即少昊亦十二而冠，則知天子、諸侯幼即位者，皆十二而冠矣，是以《異義》《古《尚書》說》云：「武王崩時，成王年十三，後一年，管、蔡作亂，周公東辟之，王與大夫盡弁，以開金縢之書。」時成王年十四，言

弁，明知已冠矣，是其證也。但隱公冠當惠公之世，從士禮，故二十成人乃冠，是以何氏即引《士冠禮》以解之。所以必二十冠者，《異義》「今《禮》戴說」云「男子，陽也，成於陰，故二十而冠」是矣。而言見正者，欲道庶子不冠於阼階故也。○注「士冠」至「成也」。○解云：鄭彼注云「每加於阼，則醺之於客位，所以尊敬之，成其爲人也」是矣。凡此，①《士冠禮》及《禮記·冠義》、《郊特牲》亦有此文。鄭注《冠義》云：「阼，謂主人之北也。適子冠於阼，若不醺，則醺用酒於客位，敬而成之也。戶西爲客位，庶子冠於房戶外，又因醺焉，不代父也。」鄭注《昏義》云：「酌而無酬酢曰醺。醺之禮如冠醺與。」○注「三加」至「志也」。○解云：此《士冠·記》文。三加者，先加緇布冠，次加皮弁，次加爵弁也。彼記云：「始冠緇布之冠也，大古冠布，齊則緇之。」鄭注云「大古，唐虞以上」，「重古始冠，冠其齊冠也」。「諭其志」者，彼鄭注云「彌猶益也。冠服後加益尊，諭其志者，欲其德之進也」是矣。注《郊特牲》云「冠益尊，則志益大也」。○注「冠而字之敬其名也」。○解云：亦彼記之文。鄭注云「名者，質，所受於父母，冠成人，益文，故敬之」是也。○注「公侯」至「造也」。○解云：此亦《士冠禮·記》文。彼鄭注云：「造，作也。」

自夏初以上，諸侯雖父死子繼，年未滿五十者，亦服士服，行士禮，五十乃命也。至其衰末，上下相亂，篡弑所由生，故作公侯冠禮，以正君臣也。」引之者，見當時公侯有冠之言。○注「天子」至「貴者」。○解云：此亦記文。鄭注《郊特牲》云：「儲君副主猶云士也，明人有賢行著德，乃得貴也。」引之者，見隱公冠時年已二十，宜從士禮明矣。其爲尊卑也微，母俱媵也。○媵，以證反，又繩證反。國人莫知，國人，謂國中凡人。莫知者，言惠公不早分別也。男子年六十閉房，②無世子，則命貴公子。將薨亦如之。【疏】注「國人」至「別也」。○解云：古者一娶九女，一嫡二媵，分爲左右，尊卑權寵灼然，則朝廷之上，理應悉知。今此傳云國人不知，明是國內凡人也。雖然，事大非小，若早分別，亦應知悉，故注言惠公不早分別，是其義也。○注「男子」至「如之」。○解云：男子六十陽道閉藏，若仍無世子，其正夫人必無有生世子之理，故命貴公子以爲世子也。若未滿六十，則無立庶子爲世子之法，何者？立而復黜，是乃亂道故也。然

① 「凡」，原作「几」，今據京都本、再造善本、中華本改。

② 「男子」，阮校：「鄂本『男子』上有『禮』字，此脫。」

則言閉房者，行房之事閉也。知男子六十陽道閉藏者，《家語》云「男女不六十者不閒居」，閒居不禁，閉房明矣。言「將薨亦如之」者，謂未滿六十者，將薨之時，亦命貴公子矣。隱長又賢，此以上皆道立隱所緣。○以上，時掌反，他皆放此。諸大夫扳隱而立之。扳，引也。諸大夫立隱不起者，在春秋前，明王者受命不追治前事。孔子曰：「不教而殺謂之虐，不戒視成謂之暴。」○扳，普顏反，又必顏反，引也。舊數問反。【疏】注「諸大」至「秋前」。○解云：公子翬弑隱立桓公，仲遂弑赤立宣公，皆貶去公子以起見之。今此諸大夫廢桓立隱，亦是不正，何故不作文貶之以見罪？正以在春秋前，欲明王者受命，不追治前事故也。○注「不戒」至「之暴」。○解云：此《堯曰》文，何氏以不先告戒比視之，而責其成功爲暴矣。隱於是焉而辭立，辭，讓也。言隱欲讓。則未知桓之將必得立也。是時公子非一。【疏】注「是時公子非一」。○解云：隱公疑桓不知得立以否，故知公子非一。且如桓立，且如，假設之辭。則恐諸大夫之不能相幼君也。隱見諸大夫背正而立己，不正，恐其不能相之。○相，息亮反。背正，步內反，

下同。故凡隱之立，爲桓立也。凡者，凡上所慮二事皆不可，故於是已立，欲須桓長大而歸之，故曰「爲桓立」，明其本無受國之心，故不書即位，所以起其讓也。○爲，于僞反，注同。【疏】注「凡者」至「二事」。○解云：己若辭立，則未知桓之將得立以否，是其一慮也。假令使桓得立，又恐諸大夫不能相幼君，是其二慮也。隱長又賢，何以不宜立？據賢繆公與大夫，繆且長以得立。○繆，音穆。繆且，俱縛反，下子餘反。【疏】注「據賢」至「大夫」。○解云：文十二年經書「秦伯使遂來聘」，傳云：「秦無大夫，此何以書？賢繆公也。何賢乎繆公？以爲能變也。」注云：「感而自變悔，遂霸西戎，故因其能聘中國，善而與之，使有大夫也。」今此亦善隱能讓，何故不與使得立乎？故難之。○注「繆且長以得立」。○解云：文十四年「晉人納捷菑于邾婁」，傳曰：「貴則皆貴矣。雖然，繆且也長。」彼以繆且長，故傳與邾婁人立之。今此隱亦長，何故不宜立乎？故難之。然則傳言長，據繆且，傳言賢，據繆公，而何氏先解繆公者，以其事在前故。立適以長不以賢，立子以貴不以長。適，謂適夫人之子，尊無與敵，故以齒。

子，謂左右媵及姪娣之子，位有貴賤，又防其同時而生，故以貴也。禮，嫡夫人無子，立右媵；右媵無子，立左媵；左媵無子，立嫡姪娣；嫡姪娣無子，立右媵姪娣；右媵姪娣無子，立左媵姪娣。質家親親，先立娣；文家尊尊，先立姪。嫡子有孫而死，質家親親，先立弟；文家尊尊，先立孫。其雙生也，質家據見立先生，文家據本意立後生，皆所以防愛爭。○姪娣，夫結反，^①下大計反。爭，爭鬪之爭，下同。桓何以貴？據俱公子也。母貴也。據桓母右媵。母貴則子何以貴？據俱言公子。子以母貴，以母秩次立也。母以子貴。禮，妾子立，則母得爲夫人。夫人成風是也。【疏】注「夫人成風」。○解云：即文四年「冬，十有一月，壬寅，夫人風氏薨」，五年「三月，辛亥，葬我小君成風」是也。

三月，公及邾婁儀父盟于昧。^②及者何？與也。若曰公與邾婁盟也。○邾音朱。婁，力俱反。邾人語聲後曰婁，故曰邾婁。《禮記》同，《左氏》、《穀梁》無「婁」字。儀父，音甫，本亦作「甫」，人名字放此。昧，亡結反，《穀梁》同，《左氏》作「蔑」。會、及、暨，皆與也。都解經上會、及、暨也。○暨，其器反。

下皆同。曷爲或言會，或言及，或言暨？會猶最也。^③最，聚也。直自若平時聚會，無他深淺意也。最之爲言聚，若今聚民爲投最。○曷爲，如字，或于僞反，後皆同此。【疏】「及者何」。○解云：欲言汲汲，公仍在喪，欲言非汲汲，及是欲文，故執不知問。云「曷爲

^①「夫結反」，宋本《釋文》作「大結反」。

^②「昧」，阮校：「閩本「昧」作「昧」。《釋文》：「于昧，

《穀梁》同，《左氏》作「蔑」。《石經考文提要》云：宋景德本、宋鄂洋官書本皆作「昧」。按，《說文》：昧，從目，未聲。與從目未聲之字別。昧與蔑古音同。」今按：據阮校，則此地名當作「昧」。下同。段玉裁《說文解字注》曰：「考從未之字見于《公》、《穀》及《吳都賦》，從未之字未之見，其訓皆曰「目不明」。」《公羊義疏》云：「則作昧從未是也。」

^③「最」，王引之《經義述聞》：「家大人曰：正文及注「最」字，皆當作「取」（才句切），「取」與「聚」聲義皆同，故曰「取之爲言聚」也。《說文》：「取，積也，從「莫狄切」取，取亦聲。」徐鍇曰：古以「聚物」之「聚」爲「取」，世人多見「最」，少見「取」，故書傳「取」字皆訛作「最」。……此傳《釋文》不爲「取」字作音，則唐初已誤爲「最」，不始於開成石經矣。」

或言會」者，即下六年「公會齊侯盟于艾」之徒是也。^①云「或言暨」者，昭七年春「暨齊平」，^②定十年「宋公之弟辰暨仲佗、石彊出奔陳」是也。及猶汲汲也，暨猶暨暨也。及，我欲之，暨，不得已也。我者，謂魯也。內魯，故言我。舉及、暨者，明當隨意善惡而原之。「欲之」者，善重惡深，「不得已」者，善輕惡淺，所以原心定罪。【疏】注「我者謂魯也」。○解云：此通內外皆然，但傳據內言之，故言我謂魯也。○注「欲之」至「惡深」。○解云：善重者，即此文「公及邾婁儀父盟于昧」是也，以其汲汲於善事，故曰善重也。惡深者，即哀十三年「公會晉侯及吳子于黃池」是也，以其汲汲於惡事，故曰惡深也。○注「不得」至「惡淺」。○解云：善輕，則「暨齊平」是也。惡淺者，「宋公之弟辰暨仲佗、石彊」是也。儀父者何？邾婁之君也。以言「公及」不諱，知爲君也。【疏】「儀父者何」。○解云：欲言其君，經不書爵，欲言其臣，而不沒公，故執不知問。○注「以言公及不」至「君也」。○解云：凡《春秋》上下，公與外大夫盟，皆諱不言公，故莊二十二年「秋七月，丙申，及齊高傒盟于防」，傳云「公則曷爲不言公」？諱與大夫盟也。^③今

此不沒公，故知是君矣。其莊九年「公及齊大夫盟于暨」之屬不沒公者，皆傳注分明，不煩逆說。何以名？

據齊侯以祿父爲名。【疏】注「據齊」至「爲名」。○解云：即桓十四年冬「齊侯祿父卒」，是言齊侯以祿父爲名，故疑邾婁君亦以儀父爲名，是以難也。字也。以當

褒，知爲字。【疏】注「以當褒知爲字」。○解云：《春秋》以隱新受命而王，儀父慕之，故知當褒，是以《春秋》說云「褒儀父善趣聖者」是也。曷爲稱字？據諸侯當稱

爵。【疏】注「據諸侯當稱爵」。○解云：六年夏，「公會齊侯盟于艾」之屬是也。褒之也。以宿與微者盟書卒，

知與公盟當褒之。有土嘉之曰褒，無土建國曰封。稱字所以爲褒之者，儀父本在春秋前失爵，在名例爾。○褒之，保刀反。【疏】注「以宿」至「書卒」。○解云：所傳聞

之世，微國之卒，本不合書，而此年「九月，及宋人盟于宿」，宿爲地主，與在可知，以其與內微者盟，故至八年得

① 「徒」，阮校：「監、毛本『徒』作『役』。」

② 「昭」上，杉浦校：「單疏鈔本、單疏殘本有『即』字。」

③ 「屬」下，杉浦校：「單疏鈔本、單疏殘本有『是』字，是也。」

變例書卒見恩矣。云「有土嘉之曰褒」者，謂加爵與字，即儀父、滕侯之屬是也。云「無土建國曰封」者，即封邢、衛之屬是也。曷爲褒之？據功不見。○不見，賢徧反，下皆同。爲其與公盟也。爲其始與公盟。盟者，殺生歃血，詛命相誓，以盟約束也。傳不足言託始者，^①儀父比宿、滕、薛最在前，嫌獨爲儀父發始，下三國意不見，故顧之。○爲其，于僞反，注「爲其」、「獨爲」皆同。敵，所治反，又音所甲反。詛，莊慮反。約束，並如字，一音上於妙反，下音戍。【疏】注「傳不」至「顧之」。○解云：此傳應言「爲其始與公盟」，今不具其文句句始者，若言始與公盟，即恐下三國不是始，^②是以顧之，不得具其文。與公盟者衆矣，曷爲獨褒乎此？據戎、齊侯、莒人皆與公盟，傳不足託始，故復據衆也。○復，扶又反，下「復爲」同。【疏】注「據戎」至「公盟」。○解云：二年秋八月「公及戎盟于唐」、六年夏「公會齊侯盟于艾」、八年秋「公及莒人盟于包來」是也。○注「傳不足」至「衆也」。○解云：傳若鄉者足其文句，云道爲其始與公盟之時，義勢即盡矣，道理不得復言「與公盟者衆矣，曷爲獨褒乎此」，但上傳既無始與之文，而得褒賞，猶

自可怪，故更據衆難之。云託始者，言隱公實非受命之王，但欲託之以爲始也。因其可褒而褒之。《春秋》王魯，記隱公以爲始受命王，^③因儀父先與隱公盟，可假以見褒賞之法，故云爾。○王魯，于況反，下「而王」同，一音如字。後「王魯」皆放此。此其爲可褒奈何？漸進也。漸者，物事之端，先見之辭。去惡就善曰進。譬若隱公受命而王，諸侯有倡始先歸之者，當進而封之，以率其後。不言先者，亦爲所褒者法，明當積漸，深知聖德灼然之後乃往，不可造次陷於不義。○倡，尺亮反。造，七報反。【疏】注「漸者」至「之辭」。○解云：言「物事之端」者，猶言物事之首也。言「先見之辭」者，「見」讀如「見其二子焉」之「見」也，若公子陽生闖然之類也。云「去惡就善曰進」者，言能去惡就善，即是行

①「言」，阮校：「按：『言』字當誤衍。」

②「三國」，原作「二國」。阮校：「浦鏜云：『三』誤

「二」。按：惠棟校本不誤。」何注言「三國」，此釋何注，則此「二國」當爲「三國」之訛。今據單疏鈔本、單疏殘本及阮校改。

③「記」，阮校：「鄂本『記』作『託』，當據正。」

之進也。○注「不可」至「不義」。○解云：桓十五年夏，「邾婁人、牟人、葛人來朝」，朝桓惡人而貶稱人，夷狄之也者，是其造次陷於不義矣。昧者何？地期也。

會、盟、戰，皆錄地其所期處，重期也。凡書盟者，惡之也。爲其約誓大甚，朋黨深背之，生患禍重，胥命於蒲，善近正是也。君大夫盟例日，惡不信也。此月者，隱推讓以立，邾婁慕義而來相親信，故爲小信辭也。大信者時，柯之盟是也。魯稱公者，臣子心所欲尊號其君父。公者，五等之爵最尊，王者探臣子心欲尊其君父，使得稱公，故《春秋》以臣子書葬者皆稱公。于者，於也。凡以事定地者加「于」例，以地定事者不加「于」例。①○處，昌慮反。惡之，烏路反，下「惡不」、「惡其」皆同。大甚，音泰，或敕賀反。近正，附近之近。柯，音歌。【疏】「昧者何」。○解云：《春秋》之始，弟子未解地期之義，故執不知問。○注「凡書盟者惡之」。○解云：此言與公盟而得褒，何言惡者？直善其慕新王之義而得褒，豈善其盟乎？○注「胥命」至「是也」。○解云：即桓三年「夏，齊侯、衛侯胥命于蒲」，傳云「胥命者何？相命也。何言乎相命？近正也。此其爲近正奈何？古者不盟，結言而退」是也。○注「君大」至「信也」。○解云：言內君與大

夫共他外盟之時，其書日皆是惡其不信也，即下二年「秋，八月，庚辰，公及戎盟于唐」，文八年「冬，十月，壬午，公子遂會晉趙盾，盟于衡雍」之屬是也。○注「故爲小信辭也」。○解云：邾婁儀父歸于新王而見褒賞，不爲大信者，以下七年「秋，公伐邾婁」，是其背信也，功不足錄，但假託以爲善，故爲小信辭也。○注「大信」至「是也」。○解云：即莊十三年「冬，公會齊侯盟于柯」，傳曰「桓公之信著乎天下，自柯之盟始焉」是也。○注「故春」至「稱公」。○解云：謂以其臣子之辭書其葬者，悉皆稱公，即桓十年「夏，五月，葬曹桓公」、僖四年秋「葬許繆公」之屬是也。若然，桓十七年秋八月，「癸巳，葬蔡桓侯」，不稱公者，彼注云「稱侯者，亦奪臣子辭也。有賢弟而不能任用，反疾害之而立獻舞，國幾并於蠻荆，故賢季抑桓稱侯，所以起其事」是也。○注「凡以」至「于例」。○解云：謂先約其事，乃期于某處作盟會者加「于」，即僖二十八年夏五月，「盟于踐土」之屬是也。○注「以地」至「于例」。○解云：言先在其地，乃定盟會之事者不加

①「凡以事定地者加于例以地定事者不加于例」，阮校：「『二例』當爲衍文。」

「于」，即莊十九年「公子結媵陳人之婦于鄆」，遂及齊侯、宋公盟，襄三年夏六月，公會單子、晉侯以下「同盟于雞澤」，陳侯使袁僑如會，「叔孫豹及諸侯之大夫，及陳袁僑盟」之屬是也。

夏，五月，鄭伯克段于鄆。克之者

何？加「之」者，問訓詁，并問施于之爲。○段，徒亂反。鄆，音偃。【疏】「克之者何」。○解云：欲言其殺，而經書「克」。欲言非殺，克者大惡之文，故執不知問。○注「加之」至「之爲」。○解云：訓詁者，即不言「殺」而言「克」是也。所以直言「克者何」而并言「之」者，非直問其變殺爲克，并欲問其施于鄆之所爲矣。而不答「于鄆」之意者，欲下乃解爲當國，故此處未勞解之。弟子以其不答「于鄆」之意，是以下文復云「其地何」以難之。殺之也。殺之，則曷爲謂之克？大鄭伯之惡也。以弗克納，大卻缺之善，知加「克」，大鄭伯之惡也。○卻缺，去逆反，下起悅同。①【疏】注「以弗」至「之善」。○解云：文十四年秋，「晉人納接菑于邾婁，弗克納」，傳云「其言弗克納何？大其弗克納也」是也。曷爲大鄭伯之惡？據晉侯殺其世子申生，不加「克」

以大之。【疏】注「據晉」至「大之」。○解云：在僖五年春。母欲立之，已殺之，如勿與而已矣。②如即不如，齊人語也。加「克」者，有嫌也。段無弟又，③稱君甚之不明，又段當國，嫌鄭伯殺之無惡，故變殺言克，明鄭伯爲人君，當如傳辭，不當自己行誅殺，使執政大夫當誅之。克者，誅爲「殺」，亦爲「能」，惡其能忍戾母而親殺之。禮，公族有罪，有司讞于公，公曰宥之。及三宥，不對，走出，公又使人赦之，以不及反命。公素服不舉，而爲之變，如其倫之喪，無服，親哭之。○戾，力計反。讞，魚列反。宥之，音又，赦也。【疏】注「明鄭」至「誅之」。○解云：鄭伯爲人君之法，當如傳辭，不與其國而已，不宜忍戾其母而親殺之。其誅之者，自是執政大夫之事。○注「禮公」至「哭之」。○解云：皆出《文王世子》也。其文云：公族有罪，「獄成，有司讞于公。其死罪，則曰某之罪在大辟。其刑罪，則曰某之罪在小辟」。彼注

①「同」，宋本《釋文》作「反」，當是。

②「如勿與而已矣」，王引之《經義述聞》：「家大人曰：『如』上當有『不』字，而寫者脫之。」

③「又」，阮校：「鄂本『又』作『文』，當據正。」

云：「讞之言白也。」公曰：「宥之！」有司又曰：「在辟。」公又曰：「宥之！」有司又曰：「在辟。」及三宥，不對，走出，致刑于甸人。」注云：「對，答也。先者，君每言宥則答之，以將更宥之，①至于三，罪定，不復答，走往刑之，爲君之恩無已。」公又使人追之曰：「雖然，必赦之！」有司對曰：「無及也。」注云：「罪既正，不可宥，乃欲赦之，重刑殺其類也。」反命于公，注云：「白已刑殺。」公素服不舉，爲之變，如其倫之喪，無服，注云：「素服於凶事爲吉，於吉事爲凶，非喪服也。君雖不服臣，卿大夫死，則皮弁錫衰以居，往弔，當事則弁經，於士蓋疑衰，同姓則總衰以弔之。今無服者，不往弔也。倫，謂親疏之比也。素服亦皮弁矣。」親哭之，注云：「不往弔，爲位哭之而已。君於臣，使有司哭之，是也。」段者何？鄭伯之弟也。殺母弟，故直稱君。【疏】「段者何」。○解云：欲言世子母弟，無世子母弟之文，欲言大夫，復目鄭伯以殺，故執不知問。何以不稱弟？據天王殺其弟年夫稱弟。【疏】注「據天」至「稱弟」。○解云：在襄三十年夏。當國也。欲當國爲之君，故如其意，使如國君，氏上鄭，所以見段之逆。②其地何？

據齊人殺無知不地。【疏】注「據齊」至「不地」。○解云：即莊九年「春，齊人殺無知」是也。當國也。齊人殺無知，何以不地？據俱欲當國也。在內也。在內，雖當國不地也。其不當國而見殺者，當以殺大夫書，無取於地也。其當國者，殺於國內，禍已絕，故亦不地。不當國，雖在外亦不地也。明當國者，在外乃地爾，爲其將交連鄰國，復爲內難，故錄其地，明當急誅之。不當國，雖在外，禍輕，故不地也。月者，責臣子不以時討，與殺州吁同例。不從討賊辭者，主惡以失親親，故書之。○難，乃旦反，下「此難」同。吁，況于反。【疏】注「明當」至「地爾」。○解云：下四年「九月，衛人殺州吁于濮」及此皆是也。○注「不當」至「地也」。○解云：昭四年「秋，七月，楚子云云伐吳，執齊慶封，殺之」，昭八年夏「楚人執陳行人于徵師殺之」，皆是也。○注「月者」至「同例」。○解云：下四年「九月，衛

①「宥」，阮校：「浦鏜云：『寬』誤『宥』。按：《文王世子》注作『寬』。」

②「所以見段之逆」，阮校：「鄂本以下同，四年疏引作『所以見段之凶逆』。」

人殺州吁」之下，注云：「討賊例時，此月者，久之也。」○注「不從」至「書之」。○解云：若作討賊辭，當稱人以討，如齊人殺無知然。今不如此者，經本主爲惡鄭伯失親親而書，故曰「鄭伯」而不稱人也。

秋，七月，天王使宰咺來歸惠公仲子之賵。宰者何？官也。以周公加宰，知爲官也。

○咺，況阮反，一音況元反。賵，芳仲反。【疏】「宰者何」。○解云：以其言宰與周公同，疑宰爲官，以其言名又與宰周公異，復疑非官，故執不知問。○注「以周」至「官也」。○解云：僖九年「夏，公會宰周公」已下「于葵丘」是也。咺者何？名也。別何之者，以有宰周公，本嫌宰爲官。【疏】「咺者何」。○解云：繫宰是官，言名又卑稱，故執不知問。○注「別何」至「爲官」。○解云：所以不言宰咺者何而別何之者，正以周公加宰，爲周公身上官，故別何之令相遠。若然，上注云「以周公加宰，知爲官」，而此注又云「本嫌宰爲官」者，言宰周公，宰爲周公身上官，今此言宰咺，亦嫌宰爲咺之身上官也。不謂二注異，宰即非咺之身上官，^①而繫宰言之者，次士以官錄，言其是宰下之士故也。曷爲以官氏？據

石尚。【疏】注「據石尚」。○解云：定十四年秋，「天王使石尚來歸賑」，石尚亦是士，而不以官錄之，故以爲難也。宰，士也。天子上士以名氏通，中士以官錄，下士略稱人。【疏】注「天子」至「稱人」。○解云：天子上士以名氏通者，即「石尚來歸賑」是也。云中士以官錄者，言以所繫之官錄之，即此是也。云下士略稱人者，^②即僖八年春，「公會王人」以下「盟于洮」是也。惠公者何？隱之考也。生稱父，死稱考，入廟稱禰。○禰，乃禮反。【疏】「惠公者何」。○解云：《春秋》從隱至哀，魯無惠公，歸賵言來，故執不知問。○注「生稱父」。○解云：即《下曲禮》云「生曰父」是也。《廣雅》云：父者，矩也。以法度威嚴於子，言能與子作規矩，故謂之父。○注「死稱考」。○解云：即《下曲禮》曰「死曰考」是也。《周書·謚法》：「大慮行節曰考。」《爾雅》云：「考，成也。」言有大慮行節之度量，堪成以下之法，故謂之考。

① 「即」，阮校引浦鏜云：「『即』當『既』字誤。」

② 「士」，原作「言」，上何注云「下士略稱人」，此疏引注文，則此「下言」當爲「下士」之訛。今據單疏鈔本、單疏殘本、京都本、再造善本、閣本改。

鄭注《曲禮》云：「考，成也。言其德之成也。」義亦通於此。○注「人廟稱禰」。○解云：即襄十二年《左傳》曰「同族於禰廟」是也。舊說云「禰」字示傍爾，言雖可入廟是神示，猶自最近于己，故曰禰。仲子者何？桓之母也。以無謚也。仲，字。子，姓。婦人以姓配字，不忘本也，因示不適同姓。生稱母，死稱妣。○妣，必履反。【疏】仲子者何。○解云：正以上不見仲子卒文，而得歸贈，故執不知問。○注「以無謚也」。○解云：凡《春秋》之義，妾子爲君者，其母得稱謚，即文公九年冬「秦人來歸僖公成風之櫨」是也。今桓未爲君，故其母不得稱謚也，是以見其不稱謚，即知桓之母也。○注「仲字」至「同姓」。○解云：字者，本國所加，故稱字，見其不忘本國也。所以稱姓者，示不適同姓矣。○注「生稱」至「稱妣」。○解云：即《下曲禮》云「生曰父曰母」，「死曰考曰妣」是也。○問曰：考與妣是死稱，父與母是生稱，惠公、仲子之卒俱在《春秋》前，何故此傳惠公言隱之考舉死名，仲子言桓之母舉生名乎？○答曰：仲子已葬訖之後，實合舉死稱，但禮家本意母死曰妣者，比於父之義也，故鄭彼云：「妣之言嬀，嬀于考也。」但仲子是妾，桓未

爲君，其母不得爲夫人，卑不得比于父，故還以母言之。何以不稱夫人？此難生時之稱也。據秦人來歸僖公成風之櫨，成風稱謚，今仲子無謚，知生時不稱夫人。【疏】注「此難」至「稱也」。○解云：文九年冬，「秦人來歸僖公成風之櫨」，舉風之謚。案經成風生時，傳稱夫人，何者？禮，妾賤不得有謚故也。今仲子不舉謚，不與成風同，明生時不得稱夫人可知，故傳家遙難之。桓未君也。贈者何？喪事有贈。贈者，蓋以馬，以乘馬束帛。此道周制也。以馬者，謂士不備四也。《禮·既夕》曰「公贈，玄纁束帛兩馬」是也。①乘馬者，謂大夫以上備四也。禮，大夫以上至天子皆乘四馬，所以通四方也。天子馬曰龍，高七尺以上。諸侯曰馬，高六尺以上。卿大夫、士曰駒，高五尺以上。束帛，謂玄三纁二，玄三法天，纁二法地，因取足以共事。○乘馬，繩證反，注「乘馬」同。纁，許云反。共，音恭。【疏】「贈者何」。○解云：初入《春秋》，弟子未曉贈義，故執不知問。○注「此道周制也」。○解云：知者，正以上云以

①「帛」，阮校引浦鏜云：「經無『帛』字。」

馬，與《士既夕禮》同。下言乘馬，與士異，明知周之禮，大夫以上皆有四馬矣。○注「以馬」至「四也」。○解云：以下言乘馬，明上文直言以馬者，士禮兩馬可知，故即引《禮》為證矣。○注「禮大夫」至「方也」。○解云：案《異義》《古毛詩》說「天子至大夫同駕四，皆有四方之事，士駕二也」。《詩》云「四驅彭彭」，武王所乘。「龍旂承祀，六轡耳耳」，魯僖所乘。「四牡騤騤，周道倬遲」，大夫所乘，《書傳》云「士乘飾車兩馬，庶人單馬木車」，是也。○問曰：若然，《異義》《公羊》說「引《易經》云「時乘六龍，以馭天下也」」，^①知天子駕六，與此異何？○答曰：彼謹案亦從《公羊》說，即引《王度記》云「天子駕六龍」，^②諸侯與卿駕四，大夫駕三」以合之。鄭駁云「《易經》「時乘六龍」者，謂陰陽六爻上下耳，豈故為禮制？《王度記》云「今天子駕六」者，自是漢法，與古異。」大夫駕三」者，於經無以言之」者是也。^③然則彼《公羊》說者，自是章句家意，不與何氏合。何氏此處不依漢禮者，蓋時有損益也。○注「天子」至「以上」。○解云：《月令》「天子駕倉龍，是其高七尺者，漢制也。其六尺五尺亦然。」○注「諸侯曰」至「以上」。○解云：《魯頌》曰「魯侯戾止，其馬蹻蹻」是也。○注「卿大夫」至「以上」。○解云：《詩》

云「皎皎白駒，食我場苗」是也。○注「束帛」至「纁二」。○解云：《雜記上》云「魯人之贈，三玄二纁」是也。○注「玄三」至「共事」。○解云：天數不但三，地數不但二，而取三二者，因取足以共事故也。車馬曰贈，貨財曰賻，衣被曰襚。此者春秋制也。賻猶覆也，賻猶助也，皆助生送死之禮。襚猶遺也。遺是助死之禮。知生者賻賻，知死者贈襚。^④○賻，音附。襚，音遂。猶遺，唯季反。【疏】注「此者春秋制也」。○解云：上陳

^①「以馭天下也」，阮校引浦鏜云：「馭」，經作「御」。

「下」衍字。」

^②「龍」，孫詒讓《十三經注疏校記》（下簡稱孫校）引陳壽祺云：「龍」字衍。」

^③「王度記云」至「無以言之者是也」，孫校：「《王度記》云四字，疑本在「大夫駕三者」之上，逸《禮》「天子駕六」，不謂漢制也。《詩·邶風·干旄》正義引鄭駁《異義》云：「《王度記》曰「大夫駕三」，經傳無。」所言與此可互證。」

^④「知死者贈襚」，阮校：「《穀梁》疏引此作「知死者贈襚」，當據以訂正。疏云「何氏注知生知死皆言賻矣」可證。」

周制訖，下乃言贈賻，此三者是春秋之內事，故云「此者春秋制也」。○注「知生」至「贈賻」。○問曰：案《既夕禮》云「知死者贈，知生者賻」，^①鄭注云「各主於所知」，以此言之，賻專施于生者何？○答曰：賻專施于生，祔專施于死，贈實生死兩施，故何氏注知生知死皆言贈矣。而《既夕禮》專言知生者，對贈言之故也。○問曰：何知贈生死兩施乎？○答曰：案《既夕禮》云「兄弟贈奠可也」，注云「兄弟有服親者，可且贈且奠，許其厚也。贈奠於死生兩施」。又云「所知則贈而不奠」，鄭注云「所知，通問相知也。降於兄弟，奠施於死者為多，故不奠」。以此言之，明贈與奠皆生死兩施也。言奠於死者為多，故知贈生死等矣。恒未君，則諸侯曷為來贈之？據非禮。【疏】注「據非禮」。○解云：桓公未為君，則其母猶妾，故諸侯贈之為非禮。隱為桓立，故以桓母之喪告于諸侯。經言王者贈，赴告王者可知，故傳但言諸侯。○隱為，于僞反，下注「為」并年末注同。告，古毒反，一音古報反。【疏】注「故傳但言諸侯」。○解云：諸侯之贈及事，則在春秋之前，故不書矣。然則諸侯有相贈之道，隱以桓母成為夫人，告天子、諸侯，天子

猶來，何況諸侯乎？故傳舉以言焉。然則何言爾？成公意也。尊貴桓母，以赴告天子、諸侯，彰桓當立，得事之宜。故善而書仲子，所以起其意，成其賢。其言來何？據歸含且贈不言來。○歸含，本又作「含」，戶暗反，下同。【疏】注「據歸」至「言來」。○解云：文五年春，「王使榮叔歸含且贈」是。不及事也。比於去來為不及事，時以葬事畢，無所復施，故云爾。去來所以為及事者，若已在於內者。【疏】注「比於」至「云爾」。○解云：《公羊》之例，若其奔喪會葬，不問來之早晚，及事不及事，皆言來矣，故文元年春「天王使叔服來會葬」，夏四月「葬我君僖公」者，是其及事言來也。文五年三月「葬我小君成風」，下乃言「王使召伯來會葬」，注云「去天者，不及事」，是不及事亦言來矣。故元年傳云「其言來會葬何？會葬，禮也」，注云「但解會葬者，明言來者常文，不為早晚施也」。定十五年夏「邾婁子來奔喪」，傳云「其言來奔喪何？奔喪，非禮也」，彼注云「但

①「知生者賻」，阮校：「今《儀禮》同。據此疏下文，似《禮》經本作「知生者贈」，未詳。」

解奔喪者，明言來者常文，不爲早晚施也」。以此言之，則知奔喪會葬之例，不問早晚，悉言來矣。若其含贈襚，及事則不言來，不及事則言來，是以惠公仲子之葬，悉在春秋前，至此乃來歸贈，傳曰「其言來何？不及事也」，又注云「比於去來爲不及事，時以葬事畢，無所復施，故云爾」。去來所以爲及事者，若已在於內者」是也。若含不及事，亦須言來也，故文四年「冬，十有一月，壬寅，夫人風氏薨」，五年春「王使榮叔歸含且贈」，彼注云「不從含晚言來者，本不當含也」。以此言之，明諸侯含晚須言來矣。何者？諸侯鄰國，禮容有含故也。若其襚也，文九年「秦人來歸僖公成風之襚」，亦是不及事言來也，何氏不注者，以其可知，省文故也。所以如此作例者，以奔喪會葬，所以通哀序志，必有所費，容其事故稽留，不必苛責其及時也。其含贈襚之等，皆是死者所須，若其來晚則無及於事，故須作文見其早晚矣。其言「惠公仲子」何？據歸含且贈，不言主名。兼之。兼之，非禮也。禮不贈妾，既善而贈之，當各使一使，所以異尊卑也。言「之贈」者，起兩贈也。○一使，所吏反。【疏】注「言之」至「贈也」。○解云：以此言之，則文九年

「秦人來歸僖公成風之襚」，言「之襚」者，亦起兩襚矣。何以不言「及仲子」？據「及」者，別公、夫人尊卑文也。仲子即卑稱也。○別，彼列反。【疏】注「據及」至「文也」。○解云：即僖十一年「夏，公及夫人姜氏會齊侯于陽穀」是也。仲子微也。比夫人微，故不得並及公也。月者，爲內恩錄之也。諸侯不月，比於王者輕，會葬皆同例。言天王者，時吳楚上僭稱王，王者不能正，而上自繫於天也。《春秋》不正者，因以廣是非。稱使者，王尊敬諸侯之意也。王者據土，^①與諸侯分職，俱南面而治，有不純臣之義，故異姓謂之伯舅叔舅，同姓謂之伯父叔父。言歸者，與使有之辭也。天地所生，非一家之有，有無當相通。所傳聞之世，外小惡不書，書者來接內也。《春秋》王魯，以魯爲天下化首，明親來被王化漸漬禮義者，在可備責之域，故從內小惡舉也。主書者，從不及事也。○僭，子念反。而治，直吏反，下皆同。所傳，直專反，下文「所傳」并注同。被，皮寄反。【疏】注「月者爲內恩錄」。○解云：此文及文五年「春，王正月，王使榮叔歸含且贈」，皆是內恩錄之也。○注「諸侯」至「者輕」。○

① 「土」，余本作「上」。

解云：即文九年冬，「秦人來歸僖公成風之櫬」是也。○注「會葬皆同例」。○解云：若王使人來則書月，爲內恩錄之。若諸侯使人來即不月，以爲比王者爲輕，^①故文五年春三月「王使召伯來會葬」，文元年二月「天王使叔服來會葬」皆是也。其諸侯使人來會葬不月者，《春秋》之內，偶爾無之。其襄三十一年「冬，十月，滕子來會葬」，定十五年「九月，滕子來會葬」，皆書月者，彼是諸侯身來會葬，非使人，仍自非妨也。以此義勢言之，則鄉解王與諸侯者，皆是使人，非身自來也。而舊云「襄三十一年月者，爲下葬定公出之，會葬亦不蒙上月」者，非也。○注「春秋」至「是非」。○解云：若正之，當直言王，今不正之而亦言天者，所以廣見是非故也，何者？若單言王，是其正稱，今兼亦言天，見其非正矣。○注「稱使」至「意也」。○解云：成二年傳云「君不行使乎大夫」，由尊卑不敵故也。今天子與諸侯亦尊卑不敵，所以言使者，天子見諸侯與己分職，俱南面而治，有不純臣之義，故尊敬之，而使歸賄，故曰「尊敬諸侯之意」也。○注「有不」至「之義」。○解云：《喪服·斬衰》章云「臣爲君，諸侯爲天子」，既言臣爲君，而別言諸侯爲天子，明其與純臣者異。

其異者，即不居殯宮是。○注「故異」至「叔父」。○解云：《下曲禮》及《覲禮·記》文。○注「言歸者」至「之辭也」。○解云：《春秋》大例，先是己物乃言歸，即「歸譖及闡」之屬是也。今此賄之車馬，先非魯物而言歸者，與魯有之辭。○注「所傳」至「內也」。○解云：《春秋》之義，所傳聞之世，外小惡皆不書。今此緩賄，是外之小惡，當所傳聞之世，未合書見，而書之者，由接內故也。

九月，及宋人盟于宿。孰及之？內之

微者也。內者，謂魯也。微者，謂士也。不名者，略微也。大者正，小者治，近者說，遠者來，是以《春秋》上刺王公，下譏卿大夫，而逮士庶人。宋稱人者，亦微者也。魯不稱人者，自內之辭也。宿不出主名者，主國主名與可知，故省文，明宿當自首其榮辱也。微者，盟例時，不能專正，故賅略之。此月者，隱公賢君，雖使微者，有可采取，故錄也。○于宿，音夙，國名。說，音悅。逮，音代，又大計反。故省，所景反，後「省文」皆同。【疏】注「微者謂士也」。○解云：正以《公羊》之例，大夫悉見名

① 「王」，原作「玉」，今據京都本、再造善本、中華本、閩本改。

氏，與卿同。今此不見名氏，故知士也。○注「明宿」至「辱也」。○解云：理是則主人先榮，理非則主人先辱，故曰「首其榮辱」也。○注「微者」至「故錄也」。○解云：《春秋》之例，若尊者之盟，則大信時，小信月，不信日，見其責也。若其微者，不問信與不信，皆書時，悉作信文以略之，即僖十九年冬，「會陳人、蔡人、楚人、鄭人盟于齊」之屬是。今此書月者，義如注釋。

冬，十有二月，祭伯來。祭伯者何？

天子之大夫也。以無所繫言來也。○祭伯，側界反，五年注放此。【疏】「祭伯者何」。○解云：欲言王臣，不言王使，欲言諸侯，復不言朝，欲言失地之君，復不言奔，故執不知問。○注「以無」至「來也」。○解云：外諸侯臣來聘，宜繫國稱使，即文四年秋「衛侯使甯俞來聘」之屬是也。若直來亦有所繫，如閔元年「冬，齊仲孫來」之屬是。若外諸侯之臣來奔，^①當繫國言來奔，即文十四年秋「宋子哀來奔」、襄二十八年「冬，齊慶封來奔」之屬是也。今無所繫，直言來，故知宜是天子之大夫也。何以不稱使？據凡伯稱使。【疏】注「據凡伯稱使」。○解云：即下七年「天王使凡伯來聘」是也。奔也。奔

者，走也。以不稱使而無事，知其奔。【疏】注「以不」至「其奔」。○解云：下三年「武氏子來求賻」，文九年「毛伯來求金」，是無使文而有事也。上文「秋，七月，天王使宰咺」，文元年「天王使叔服」之徒，皆是有使有事也。今此無使復無事，故知其正是奔也。奔則曷為不言奔？據齊慶封來言奔。【疏】注「據齊」至「言奔」。○

解云：在襄二十八年冬。王者無外，言奔，則有外之辭也。言奔則與外大夫來奔同文，故去奔，明王者以天下為家，無絕義。主書者，以罪舉。內外皆書者，重乖離之禍也。當春秋時，廢選舉之務，置不肖於位，輒退絕之以生過失，至於君臣忿爭出奔，國家之所以昏亂，社稷之所以危亡，故皆錄之。錄所奔者，為受義者，明當受賢者，不當受惡人也。祭者，采邑也。伯者，字也。天子上大夫字，尊尊之義也。月者，為下卒也，當案下例，^②

① 「若」，阮校：「監、毛本『若』作『也』。按：『也』、『若』當並有。」

② 「當」，阮校：「二年注作『常案下例，當蒙上月』。解云：『祭伯來』之下已有此注。」然則此亦應作「常」。今按本疏所標起迄及所引注文仍作「當」。

當蒙上月，日不也。奔例時。一月二事，月當在上。十言有二者，起下復有二，^①非十中之二。○選，息變反。肖，音笑。采，七代反。【疏】注「故去」至「絕義」。○問曰：若王者以天下爲家，無絕義，故不言奔，何故襄三十年夏「王子瑕奔晉」、昭二十六年冬「尹氏、召伯、毛伯以王子朝奔楚」、成十二年「春，周公出奔晉」，皆言奔乎？○答曰：《春秋》進退無義，若來奔魯者，見王者以天下爲家，無絕義，故不言奔矣。若奔別國，即見《春秋》黜周與外諸侯同例，故言奔矣。既以魯爲王而不專黜周者，若專黜周，則非遜順之義故也。○注「主書者以罪舉」。○解云：一則罪祭伯之去主，^②一則罪魯受叛人，故曰「以罪舉」。○注「內外皆書者重乖離之禍也」。○解云：內書者，閔二年秋「公子慶父出奔莒」是也。又在外奔書者，昭二十年「冬，十月，宋華亥、向甯、華定出奔陳」之屬是也。○注「當春」至「於位」。○解云：《王制》云：「凡官民材，必先論之。論辨，然後使之。任事，然後爵之位定，然後祿之。爵人於朝，與士共之。」是擇人之法也。當春秋之時，不問賢與不肖，悉皆世位，故言此。○注「輒退」至「過失」。○解云：君若退絕其臣，不聽世祿，以生過失矣。○注「至於」至「出奔」。○解云：由不肖者在

位，故有忿爭出奔之事矣。○注「伯者字也」。○解云：知伯非爵者，正見桓八年經云：冬，「祭公來，遂逆王后于紀」。公是其爵，明伯是其字矣。○注「當案」至「不也」。○解云：一月有數事，重者皆蒙月也。若上事輕，下事重，輕者不蒙月，重者自蒙月。若上事重，下事輕，則亦重者蒙月，輕者不蒙月，故言「當案下例，當蒙上月」矣。「日不」者，謂一日有數事，即不得上下相蒙。故桓十二年冬十一月，「丙戌，公會鄭伯，盟于武父。丙戌，衛侯晉卒」，彼下注云「不蒙上日者，《春秋》獨晉書立記卒耳。當蒙上日，與不嫌異於篡例，故復出日，明同」是也。○注「奔例時」。○問曰：襄三十年夏五月「王子瑕奔晉」，^③昭二十六年冬十月「尹氏、召伯、毛伯以王子朝奔楚」，悉書月，何言例時乎？○答曰：案襄公三十年「五

①「起下復有二」，阮校：「鄂本「下」作「十」，當據正。」

②「去主」，杉浦校：「單疏鈔本、單疏殘本作「去王」。按：當作「去王」。」

③「襄三十年」，原作「襄二十年」。「王子瑕奔晉」在襄公三十年，今據單疏鈔本、單疏殘本、京都本，再造善本，闕本改。

月，^①甲午，宋災。伯姬卒。天王殺其弟年夫。王子瑕奔晉，昭二十六年「冬，十月，天王入于成周。尹氏、召伯、毛伯以王子朝奔楚」，以此言之，則似月爲上事，其二處出奔仍不蒙月，是以襄三十年「五月，甲午」之下，注云「外灾例時，此日者，爲伯姬卒日」；昭二十六年「冬，十月」之下，注云「月者，爲天下喜錄王者反正位」，是其月爲上事之明文，不妨出奔仍自時也，故此乃注云「月者，爲下卒」，「奔例時」也。舊云《春秋》王魯，是以王臣來奔魯者，悉與外諸侯之臣來奔同書時，故與襄二十八年「冬，齊慶封來奔」同書時矣。若王臣奔佗國者，悉皆書月，見別于諸侯之臣矣，是以王子瑕、毛、召之徒悉皆書月。○問曰：若然，成十二年「春，周公出奔晉」亦是出奔，何故不月？○答曰：王臣之例，實不言出，亦不書時，但周公自其私出奔，故自從小國例言出書時矣。凡諸侯出奔，大國例月，小國時。

公子益師卒。何以不日？據臧孫辰書

日。○不日，人實反。此傳皆以日月爲例，後放此。

【疏】注「據臧孫辰書日」。○解云：即文十年「春，王三月，辛卯，臧孫辰卒」者也。○問曰：下五年冬十二月，「辛巳，公子彊卒」，亦書日，所以不據之，而遠據文十年

之篇何？○答曰：下五年何氏云：「日者，隱公賢君，宜有恩禮於大夫，益師始見法，無駭有罪，俠又未命也，故獨得於此日。」以義言之，正由同在所傳聞之世，非常書日之限，故不據之。所聞之世，大夫日卒者非一，正據辰者，以其是所聞之始故也。遠也。孔子所不見。所

見異辭，所聞異辭，所傳聞異辭。所見者，謂昭、定、哀，已與父時事也。所聞者，謂文、宣、成、襄，王父時事也。所傳聞者，謂隱、桓、莊、閔、僖，高祖曾祖時事也。異辭者，見恩有厚薄，義有深淺，^②時恩衰義缺，將以理人倫，^③序人類，因制治亂之法。故於所見之世，恩已與父之臣尤深，大夫卒，有罪無罪，皆日錄之，「丙申，季孫隱如卒」是也。於所聞之世，王父之臣恩少殺，大夫

① 「襄公三十年」，原作「襄公十年」。宋災、伯姬卒、天王殺其弟年夫、王子瑕奔晉，皆在襄公三十年，本疏下文亦云「襄公三十年」，今據單疏鈔本、單疏殘本、京都本、再造善本、閣本改。

② 「深淺」，阮校：「鄂本作『淺深』，當乙正。」

③ 「將以理人倫」，原重「將」字，「倫」作「倫」，今據余本、閣本改。

卒，無罪者日錄，有罪者不日略之，「叔孫得臣卒」是也。於所傳聞之世，高祖曾祖之臣恩淺，大夫卒，有罪無罪皆不日略之也，公子益師、無駭卒是也。於所傳聞之世，見治起於衰亂之中，用心尚寬，故內其國而外諸夏，先詳內而後治外，錄大略小，內小惡書，外小惡不書，大國有大夫，小國略稱人，內離會書，外離會不書是也。於所聞之世，見治升平，內諸夏而外夷狄，書外離會，小國有大夫，宣十一年「秋，晉侯會狄於攢函」，^①襄二十三年「邾婁剌我來奔」是也。^②至所見之世，著治太平，夷狄進至於爵，天下遠近小大若一，用心尤深而詳，故崇仁義，譏二名，晉魏曼多、仲孫何忌是也。所以三世者，禮，為父母三年，為祖父母期，為曾祖父母齊衰三月，立愛自親始，故《春秋》據哀錄隱，上治祖禰。所以二百四十二年者，取法十二公，天數備足，著治法式，又因周道始壞絕於惠、隱之際。主所以卒大夫者，明君當隱痛之也。君敬臣則臣自重，君愛臣則臣自盡。公子者，氏也。益師者，名也。諸侯之子稱公子，公子之子稱公孫。○見恩，賢遍反，下「見治」皆同。殺，所介反。寵，才古反，又七奴反，《說文》「大也」。諸夏，戶雅反，凡「諸夏」皆放此。攢函，才官反，下音咸。太平，音泰。期，音基。齊衰，音

咨，本亦作「齋」，下七雷反。盡，津忍反。【疏】注「所見」至「事也」。○解云：孔子親仕之定、哀，故以定、哀為己時。定、哀既當於己，明知昭公為父時事。知昭、定、哀為所見，文、宣、成、襄為所聞，隱、桓、莊、閔、僖為所傳聞者，《春秋》緯文也。○注「時恩衰義缺」。○解云：當時子弑父，父殺子為恩衰也。^③臣弑君，君殺臣為義缺，故《喪服四制》云「為父斬衰三年，以恩制。為君斬衰三年，以義制」是也。○注「將以」至「之法」。○解云：孔子見時如此，遂制《春秋》。理人倫者，斷理君臣之倫次，令得所也；序人類者，類謂父子，序父子之恩，使之厚也，因以制治亂之軌式矣。○注「故於」至「卒是也」。○解云：隱如逐君而書日，即定五年「丙申，季孫隱如卒」是也。若

① 「攢函」，據宣公十一年經當作「橫函」。《釋文》及此卷下疏「攢函」多誤作「攢函」，不另出校。

② 「剌」，阮校：「閩、監、毛本作『鼻』。按：『鼻』是也。」

③ 「也」，阮校：「閩、監、毛本無『也』，此衍。否則，『為義缺』下亦當有『也』。」

非罪書日，即昭二十五年「冬，十月，戊辰，仲孫舍卒」，^①二十九年「四月，庚子，叔倪卒」是也。而此注不言之者，從省文也。○注「於所」至「日錄」。○解云：無罪書日者，即襄五年冬十有二月「辛未，季孫行父卒」，襄十九年「八月，丙辰，仲孫蔑卒」，是無罪而書日者錄之故也。若然，文十四年「九月，甲申，公孫敖卒于齊」，敖實有罪而書日者，彼注云「已絕卒之者，為後齊脅魯歸其喪，有恥，故為內諱，使若尚為大夫」是也。○注「有罪」至「是也」。○解云：宣五年九月，「叔孫得臣卒」，何氏云「不日者，知公子遂欲弑君，為人臣知賊而不言，明當誅」，是有罪而不日者，略之故也。○注「於所見」至「卒是也」。^②○解云：公子益師無罪而不日，即此是也。無駭有罪而不日，即下八年「冬，十有二月，無駭卒」是也。若然，莊三十二年「秋，七月，癸巳，公子牙卒」，僖十六年「三月，壬申，公子季友卒」，「秋，七月，甲子，公孫慈卒」，並是所傳聞之世而得書日。「牙卒」之下，何氏云「莊不卒大夫而卒牙者，本以當國，將弑君。書日者，錄季子之過惡也」。^③其「季友」之下，何氏云「日者，僖公賢君，宜有恩禮於大夫，故皆日也」。其「公孫慈」之下，何氏云「一年喪骨肉三人，故日痛之」是也。○注「錄大略小」。○解云：謂錄大

國卒葬，小國卒葬不錄是也。○注「內離」至「是也」。○解云：內離會者，即下二年春「公會戎于潛」，桓元年春「公會鄭伯于垂」是也。外離會不書者，桓五年「齊侯、鄭伯如紀」，傳云：「外相如不書，此何以書？離不言會也。」何氏云：「時紀不與會，故略言如也。」○注「於所」至「升平」。○解云：升，進也。稍稍上進而至於太平矣。○注「宣十」至「攢函」。○解云：即此一經，而當是二義也。○注「襄二」至「是也」。^④○解云：若然，莊二十四年冬「曹羈出奔陳」，莊二十七年冬「莒慶來逆叔姬」，皆非所聞之世，而小國得有大夫書名者，「曹羈」之下傳云：「曹無大夫，此何以書？賢也。」「莒慶」之下傳云：

^①「仲孫舍卒」，杉浦校：「單疏鈔本、單疏殘本、毛本『仲』作『叔』」。按：此誤，昭二十五年云「冬，十月，戊辰，叔孫舍卒」可證。

^②「見」，阮校：「何校本『見』作『傳』，是也。」

^③「過」，原作「過」。阮校：「閩、監、毛本『過』作『過』，與襄三十二年注合。此本『過』字係改刻。」杉浦校：「單疏鈔本、單疏殘本作『過』。」今據改。

^④「注襄二至是也」，杉浦校：「按：注疏本脫『小國有大』，此標注當作『注小國至是也』。」

「莒無大夫，此何以書？譏爾。」^①大夫越境逆女，非禮也。」然則一譏一賢，故變例書之爾。○注「至所」至「大平」。○解云：當爾之時，實非大平，但《春秋》之義，若治之大平於昭、定、哀也。猶如文、宣、成、襄之世，實非升平，但《春秋》之義，而見治之升平然。○注「夷狄」至「於爵」。○解云：即哀四年夏「晉人執戎曼子赤歸于楚」，^②十三年夏「公會晉侯及吳子于黃池」是也。^③○注「晉魏萬多」，^④仲孫何忌是也。○解云：哀十三年「晉魏多帥師侵衛」，傳云「此晉魏曼多也，曷爲謂之晉魏多？譏二名。二名非禮也」。定六年仲孫忌圍運，^⑤傳云「此仲孫何忌也，曷爲謂之仲孫忌？譏二名。二名非禮也」。何氏云「春秋定、哀之間，文致大平」，^⑥欲見王者治定，無所復爲譏，唯有二名，^⑦故譏之，此《春秋》之制也。○注「所以」至「三年」。○解云：母雖不斬衰，哀痛與斬同，故連言之。○注「爲曾」至「三月」。○解云：不言高祖父母者，文不備。○注「立愛自親始」。○解云：即《祭義》云：「子曰：『立愛自親始，教人睦也。』」鄭注云「親長，父兄也。睦，厚也」是。○注「故春」至「祖禰」。○解云：即《大傳》云：「上治祖禰，尊尊也。下治子孫，親親也。旁治昆弟，合族以食，序之昭穆，^⑧別之以仁義，人道竭矣。」鄭注云：「治猶正也。竭，

盡也。」○注「取法」至「法式」。○解云：考諸舊本，皆作「式」字，言取十二公者，法象天數，欲著治民之法式也。若作「戒」字，言著治亂之法，著治國之戒矣。○注「諸侯」至「公孫」。○解云：出《喪服傳》也。

監本附音春秋公羊注疏隱公卷第一

- ① 「譏」，阮校：「何校本『譏』下有『何譏』二字，與莊廿七年傳合。」
- ② 「曼」，阮校：「監、毛本『曼』作『蠻』。按：哀四年疏云：『《左氏》作戎蠻子。』可證徐氏所據《公羊》經作『曼』，不作『蠻』。」
- ③ 「晉」，原作「齊」。杉浦校：「單疏鈔本、單疏殘本、毛本『齊』作『晉』，與哀十三年經合。」今據改。
- ④ 「萬」，阮校：「按：作『曼』是也，『萬』者，聲之誤。」
- ⑤ 「定六年」，原作「定二年」。杉浦校：「按：『二』當作『六』。」今據單疏鈔本、單疏殘本、毛本、京都本、再造善本、閩本改。
- ⑥ 「文」，原作「又」，今據京都本、再造善本、中華本改。
- ⑦ 「二」，原脫，阮校：「浦鏜云：『名』上脫『二』。按：浦云是也，定六年注有『二』字。」杉浦校：「單疏鈔本、單疏殘本『有』下有『二』字。」今據補。
- ⑧ 「序之昭穆」，阮校：「《大傳》云：『序以昭穆。』」

監本附音春秋公羊注疏隱公卷第二^①

起二年，盡四年

何休學

二年，春，公會戎于潛。凡書會者，惡其虛

內務，恃外好也。古者諸侯非朝時不得踰竟。所傳聞之世，外離會不書，書內離會者，《春秋》王魯，明當先自詳正，躬自厚而薄責於人，故略外也。王者不治夷狄，錄戎者，來者勿拒，去者勿追。東方曰夷，南方曰蠻，西方曰戎，北方曰狄。朝、聘、會、盟，例皆時。○惡，烏路反。好，呼報反。非朝，直遙反，凡此字不音者皆同。踰竟，音境，今本多即作「境」字，更不音。所傳，直專反，年末「相傳」同。【疏】注「凡書會者」至「外好也」。○解云：以其非自求多福之義故也。○注「古者諸侯」至「踰竟」。○解云：案《曲禮下》云「諸侯相見於隙地曰會」，故定十四年注云「古者諸侯將朝天子，必先會閑隙之地」。以此言之，則會合於禮。言會為惡之，非朝時不得踰竟者，正

以《春秋》之會，非為天子而作之，故得然解。○注「古者不治」至「勿追」。^②○解云：言當是所傳聞之世，王者草創，夷狄有罪不暇治之，即先書晉滅下陽，末書楚滅穀，鄧是也。而此經錄戎者，來者勿拒故也。○注「東方曰夷」至「曰狄」。○解云：《下曲禮》及《王制》皆有此文。○注「朝聘」至「皆時」。○解云：朝書時者，即文十五年「夏，曹伯來朝」，昭十七年「春，小邾子來朝」之類是也。^③其聘書時者，即文四年秋「衛侯使甯俞來聘」、文六年「夏，季孫行父如陳」之屬是也。其會書時者，即莊十三年「春，齊侯、宋人」以下「會于北杏」，十四年「冬，單伯會齊侯、宋公」以下「于鄆」之屬是也。盟書時者，即莊十三年「冬，公會齊侯盟于柯」之屬是也。其有書日月者，皆別著義，即不信者日，小信者月之屬是也。

① 「附音」，原無，依例當有，今補。以下各卷皆同，不出校。

② 「古者」，杉浦校：「單疏鈔本、單疏殘本『古』作『王』」。阮校：「注作『王者』」。解云：「王者草創，夷狄有罪不暇治之。」不作「古」。

③ 「邾」，阮校：「浦鏜云：『邾』下，《公羊》經有『婁』字。是也。」

夏，五月，莒人入向。人者何？得而不居也。

入者，以兵入也。已得其國而不居，故云爾。

凡書兵者，正不得也。外內深淺皆舉之者，因重兵害衆，

兵動則怨結禍，^①更相報償，伏尸流血無已時。諸侯擅興

兵不爲大惡者，^②保伍連帥，本有用兵征伐之道，魯人杞

不諱是也。人例時，傷害多則月。○莒，音舉。向，舒亮

反，國名。更，音庚。償，時亮反。擅，市戰反。【疏】「人

者何」。○解云：侵、伐、戰、圍、入皆是用兵之文，^③而不

言帥師，^④故執不知問。○注「凡書兵」至「得也」。○解

云：言《春秋》之內，凡書兵事者，皆欲言正之道，其理不

合然。○注「諸侯」至「是也」。○解云：保伍連帥者，即

《禮記·王制》云「五國爲屬，屬有長，二屬爲連，連有帥」

是也。^⑤言本有用兵征伐之道者，謂禮五國爲屬，屬有

長，二屬爲連，^⑥連有帥，三連爲卒，卒有正，七卒爲州，州

有伯。若州內有無道者，則長、帥、正、伯當征之，若其不

征，則與同惡，故曰有征伐之道。知非大惡者，正以《春

秋》之義，內大惡皆諱不書。而魯人杞者，即僖二十七年

秋「公子遂帥師入杞」者是也。若然，禮法「諸侯賜弓矢，

然後專征伐」，而保伍連帥得有征伐之道，謂隨州伯故

也。○注「人例」至「則月」。○解云：人例時者，即成七

年秋「吳人州來」，定五年夏「於越入吳」之屬是也。傷害

多則月者，此文及僖三十三年「春，王二月，秦人入滑」是

也。若然，僖二十七年秋八月，「乙巳，公子遂帥師入

杞」，而書日者，彼注云「日者，杞屬修禮朝魯，雖無禮，君

子躬自厚而薄責於人，不當乃入之，故錄責之」者，是其

不引者，以此求之。

無駭帥師入極。無駭者何？展無駭

也。何以不氏？據公子遂帥師入杞，氏公子也。

○駭，戶楷反。【疏】「無駭者何」。○解云：欲言其君，經

不書爵，欲言大夫，又復無氏，故執不知問。○注「據公

子遂帥師」至「子也」。○解云：在僖二十七年秋。貶。

①「禍」，阮校：「鄂本「禍」上有「構」，此脫。」

②「大」，原作「之」，今據余本、京都本、再造善本、中華

本改。

③「用」，原重文，今據單疏殘本刪。

④「師」，原作「帥」，今據單疏殘本改。

⑤「五國」至「連有帥」，《禮記·王制》作「五國以爲屬，

屬有長。十國以爲連，連有帥」。

⑥「屬」，京都本、再造善本作「以」。

貶猶損也。○貶，彼檢反，損也。曷爲貶？據公子遂俱用兵人杞不貶也。疾始滅也。以下終其身不氏，知貶。疾始滅，非但起人爲滅。【疏】注「據公子遂俱用」至「貶也」。○解云：欲決隱八年「庚寅，我人邠」，非用兵故也。○注「以下終」至「爲滅」。○解云：即下八年「無駭卒」，傳曰：「何以不氏？疾始滅也。」故終其身不氏。然則若直欲起此人爲滅，止應此經貶之而已，不應終身貶之，故知并欲起其疾始滅也。始滅昉於此乎？^①昉，適也，齊人語。據傳言撥亂世。○昉，甫往反，適也。【疏】注「昉適也齊人語」。○解云：胡毋生齊人，故知之。若《鄭譜》云「然則《詩》之道放于此乎」之類。○注「據傳言撥亂世」。○解云：哀十四年傳云「君子曷爲爲《春秋》？撥亂世反諸正，莫近諸《春秋》」是也。既言作《春秋》治亂世，明知往前相滅非一矣。而此經爲疾始滅，^②是以據而難之。前此矣。前此者，在春秋前，謂宋滅郕是也。○郕，古報反。前此則曷爲始乎此？託始焉爾。焉爾，猶於是也。【疏】注「謂宋滅郕是也」。○解云：桓二年「夏，四月，取郕大鼎于宋」，傳云「此取之宋，其謂之郕鼎何？器從名」，彼注

云「從本主名名之，宋始以不義取之，故謂之郕鼎」是也。然則宋滅郕在春秋前，故如此解。曷爲託始焉爾？據戰伐不言託始。【疏】注「據戰」至「託始」。○解云：隱二年「鄭人伐衛」，桓十年「齊侯、衛侯、鄭伯來戰于郎」，傳皆不言「託始焉爾」，故難之。而注先言戰者，直漫據《春秋》上下戰伐之事而已，故意及則言，不爲次第矣。《春秋》之始也。《春秋》託王者始，起所當誅也。言疾始滅者，諸滅復見不復貶，皆從此取法，所以省文也。○復見，扶又反，下「不復」同。見，音賢偏反。

^①「昉」，阮校：「唐石經、諸本同。《隸釋》載漢熹平石經《公羊》殘碑「昉」作「放」。又鄭氏《詩譜·序》、《考工記》注皆言「放于此乎」，本《公羊》傳文，是蔡、鄭所據本皆作「放」，當以「放」爲正。昉，俗字，下同。按：古多作「放」，後人作「倣」，作「仿」、作「昉」，皆俗字也。《公羊傳》寫作「昉」，俗字耳。惠棟乃疑《嚴氏春秋》作「放」，《顏氏春秋》作「昉」，何用顏，其說誤也。」

^②「疾始」，原作「始疾」。杉浦校：「單疏鈔本、單疏殘本「始疾」互倒，作「疾始」是也，與隱元年傳合。」今據上傳文、注文及單疏鈔本、單疏殘本改。

【疏】注「言疾滅」至「省文也」。^①○解云：諸滅復見不復貶，即定四年「蔡公孫歸姓帥師滅沈」、定六年「鄭游邀帥師滅許」之屬是也。此滅也，其言入何？據齊師滅譚不言入。

內大惡，諱也。明魯臣子當爲君父

諱。滅例月，不復出月者，與上同月，常案下例，當蒙上

月，日不。○當爲，于僞反，下「爲後背隱」同。【疏】注

「據齊師滅譚不言入」。○解云：在莊十年。^②○注「滅

例月」至「同月」。○解云：莊十年「冬，十月，齊師滅譚」，

莊十三年「夏，六月，齊人滅遂」之屬是也。○注「常案

下」至「日不」。○解云：元年「祭伯來」之下，已有此注，

而復言之者，正以彼月爲下公子益師卒，其祭伯來奔不

蒙月。今此夏五月二事皆蒙之，^③嫌其異，故重發之。

秋，八月，庚辰，公及戎盟于唐。後不

相犯。日者，爲後背隱，而善桓能自復爲唐之盟。○

背，音佩。【疏】注「後不相」至「之盟」。○解云：《春

秋》之例，不信者日，故後不相犯。^④日者，言爲後背

隱，而善桓能自復爲唐之盟者，即桓二年秋九月，「公

及戎盟于唐」是也。言背隱者，桓是弑君之賊，而與桓

盟，是背隱之義矣。言善桓能自復者，戎與桓同好相

隨，繼其所能，故善其得國矣。若《左氏》之義，以極是戎國都。案此經傳及注，似非一物，而舊解曰「以爲戎能自復者」，非也。

九月，紀履緌來逆女。紀履緌者何？

紀大夫也。以逆女不稱使，知爲大夫。○履緌，音

須，《左氏》爲「裂繻」。^⑤【疏】「紀履緌者何」。○解

云：不書爵，又不言使，君臣不明，故執不知問。○注「以

逆」至「大夫」。○解云：正以桓三年秋「公子翬如齊逆

女」之屬，皆是大夫爲君逆女，而文皆不言使，今此履緌

逆女不言使，故知是大夫也。或者「使」爲「爵」字誤也。

何以不稱使？據宋公使公孫壽來納幣稱使。婚

①「疾」，阮校：「按：『疾』下脫『始』。」

②「十年」下，杉浦校：「單疏鈔本、單疏殘本有『冬』字。」

③「此夏」，原作「此下」，杉浦校：「單疏鈔本、單疏殘本、毛本作『此夏』，當據正。」今據單疏鈔本、單疏殘本、毛本、京都本、再造善本改。

④「故」下，杉浦校：「單疏鈔本、單疏殘本有『云』字。」

⑤「爲」，宋本《釋文》作「作」。

禮不稱主人。爲養廉遠恥也。【疏】注「據宋公」至「稱使」。○解云：在成八年夏。○注「爲養廉遠恥也」者。謂養成其廉，遠其慙恥也。然則曷稱？稱諸父兄師友。宋公使公孫壽來納幣，則其稱主人何？辭窮也。辭窮者何？無母也。禮，有母，母當命諸父兄師友，稱諸父兄師友以行。宋公無母，莫使命之，辭窮，故自命之。自命之則不得不稱使。【疏】「辭窮者何」。○解云：弟子未解辭窮之義，故執不知問。○注「禮有母」至「師友」。○解云：即《昏禮·記》云「宗子無父，^①母命之」是也。○注「稱諸父」至「以行」。○解云：謂使者稱之，而文不言使者，以其非君故也。○注「宋公」至「稱使」。○解云：^②即《昏禮·記》云「親皆沒，已躬命之」是也。然則紀有母乎？曰：有。以不稱使知有母。有則何以不稱母？據非主人，何不稱母通使文。母不通也。禮，婦人無外事，但得命諸父兄師友，稱諸父兄師友以行耳。母命不得達，故不得稱母通使文，所以遠別也。○別，彼列反。外逆女不書，此何以書？據伯姬歸于宋不

書逆人。【疏】注「據伯」至「逆人」。○解云：在成九年春。譏。譏猶譴也。○譴，遣戰反。何譏爾？譏始不親迎也。禮所以必親迎者，所以示男先女也。於廟者，告本也。夏后氏逆於庭，殷人逆於堂，周人逆於戶。○親迎，魚敬反，注及下同。先，悉薦反。【疏】注「禮所」至「先女也」。○解云：出《昏義》文。○注「於廟者」至「於戶」。○解云：即《書傳》云「夏后氏逆於廟庭，殷人逆於堂，周人逆於戶」者是也。始不親迎昉於此乎？前此矣。以惠公妃匹不正，不嫌無前也。○妃，音配，又芳非反。【疏】注「以惠」至「前也」。○解云：不以正妃匹者，是不重昏姻之禮，故知往前宜有不親迎之事矣。前此則曷爲始乎此？託始焉爾。焉爾，猶於是也。曷爲託始焉爾？據納幣不託

①「宗」，原作「言」。阮校：「浦鏜云：『宗』誤『言』。按：浦說是也，《儀禮·士昏禮》作『宗』。」今據單疏鈔本、單疏殘本改。

②「注宋公至稱使」○解云，杉浦校：「單疏鈔本、單疏殘本作『注宋公無母莫使命之辭窮故自命之者』，無『解云』二字。」

始。《春秋》之始也。《春秋》正夫婦之始也。夫婦

正則父子親，父子親則君臣和，君臣和則天下治，故夫婦者，人道之始，王教之端。內逆女常書，外逆女但疾始不常書者，明當先自正，^①躬自厚而薄責於人，故略外也。

○治，直吏反。【疏】注「夫婦正」至「之端」。○解云：《昏義》鄭注云「言子受氣性純則孝，^②孝則忠」是也。○注

「內逆女常書」者。即桓三年公子翬，宣元年公子遂，成十四年叔孫僑如之屬是也。女曷爲或稱女，或稱

婦，或稱夫人？女在其國稱女，未離父母之

辭，「紀履緌來逆女」是也。○未離，力智反，下同。在

塗稱婦，在塗見夫服從之辭，「公子結媵陳人之婦」是

也。【疏】「女曷爲或稱女」者，即此經是也。或稱婦者，

莊十九年「陳人之婦」是也。○注「在塗見」至「之辭」。

○解云：案僖二十五年、宣元年傳皆云「其稱婦者何？有姑之辭也」者，兼二義故也，何者？在塗稱婦者，服從

夫辭，其至國猶稱婦者，對姑生稱也。人國稱夫人。

人國則尊，尊有臣子之辭，「夫人姜氏入」是也。紀無大

夫，書「紀履緌」者，重婚禮也。月者，不親迎例月，重錄

之。親迎例時。【疏】注「人國」至「人是也」。○解云：在

莊二十四年秋是也。^③○注「月者」至「例時」。○解

云：不親迎例月者，即此文及桓三年秋七月公子翬，宣元年正月公子遂之屬是也。其親迎時者，即莊二十四年夏

「公如齊逆女」、莊二十七年冬「莒慶來逆叔姬」之屬是也。有不如此者，別見義，即文四年「夏，逆婦姜」，成十

四年「秋，叔孫僑如」之屬是也。當文自有解，不能逆說也。

冬，十月，伯姬歸于紀。伯姬者何？

內女也。以無所繫也。不稱公子者，婦人外成，不得

獨繫父母。【疏】「伯姬者何」。○解云：欲言內女，於紀

言歸，欲言外女，文無所繫，故執不知問。○注「不稱公」

至「父母」。○解云：正以莊元年傳云「群公子之舍，則已

①「先自正」，阮校：「浦鏜云：成十四年疏引此注作

「先自詳正」，與上「公會戎于潛」注同，當據以補正。

按：四年疏內引此，亦無「詳」字。」

②「注夫婦正至之端」○解云昏義鄭注云「單疏殘本作

「夫婦正則父子親父子親則君臣和者出昏義鄭注」，

「云」字下屬。杉浦校：「注疏本標注作「至之端」，亦

誤也。」

③「秋是也」，杉浦校：「「秋」下「是」字當爲衍文。」

卑矣」，①明有得稱公子之道，故注者決之。其言歸

何？據去父母國也。婦人謂嫁曰歸。②婦人生

以父母爲家，嫁以夫爲家，故謂嫁曰歸。明有二歸之道。

書者，父母恩錄之也。禮，男之將取，三日不舉樂，思嗣

親也。女之將嫁，三夜不息燭，思相離也。內女歸例月，

恩錄之。○取，七住反。【疏】注「婦人生」至「爲家」。○

解云：謂始生時。○注「明有二歸之道也」。○解云：即

此「伯姬歸于紀」、宣十六年「秋，郊伯姬來歸」之屬是也。

○注「禮男之」至「女將嫁」。○解云：皆出《禮記·曾子

問》。○注「內女歸」至「錄之」。○解云：即此文冬十月、

隱七年三月「叔姬歸于紀」、成九年「二月，伯姬歸于宋」

之屬是也。

紀子伯、莒子盟于密。紀子伯者何？

無聞焉爾。言「無聞」者，《春秋》有改周受命之制，孔

子畏時遠害，又知秦將燔《詩》、《書》，其說口授相傳，至

漢公羊氏及弟子胡毋生等，乃始記於竹帛，故有所失也。

○紀子伯，《左氏》作「子帛」。遠，于萬反。燔，扶元反。

毋，音無。【疏】「紀子伯者何」。○解云：欲言紀君，經不

稱侯，欲言大夫，復敘人君之上，故執不知問。

十有二月，乙卯，夫人子氏薨。夫人

子氏者何？隱公之母也。以不書葬。【疏】「夫

人子氏者何」。○解云：欲言魯之夫人，終無葬處，弟子

未識，故執不知問。○注「以不書葬」。○解云：今隱公

欲表己讓，故宜屈卑其母，不成夫人之禮，是以見其不書

葬，知其是隱公母也。何以不書葬？據姒氏書葬。

○姒，音似。【疏】注「據姒氏書葬」。○解云：即定十五

年九月「辛巳，葬定姒」是也。彼定姒之子哀公者，未踰

年之君也，其母亦得書葬。今隱公雖欲讓桓，不作成君，

應比未踰年之君。今其母不書葬，故據而難之。成公

意也。何成乎公之意？據已去即位。○去，起

呂反。子將不終爲君，故母亦不終爲夫人

①「已」，阮校：「今傳作『以』。」

②「婦人謂嫁曰歸」，阮校：「按：《毛詩傳》本作『婦人

謂嫁歸』，無『曰』字。陸德明本有『曰』字，謂依《公羊

傳》文。唐石經《公羊》『婦人』以下損缺，以每行十字

計之，不當有『曰』字，若有『曰』字，則此行十一字矣。

考何注云「故謂嫁曰歸」，「曰」字恐因注衍也。」

也。時隱公卑屈其母，^①不以夫人禮葬之，以妾禮葬之，以卑下桓母，無終為君之心，得事之宜，故善而不書葬，所以起其意而成其賢。子者，姓也。夫人以姓配號，義與仲子同。書薨者，為隱公恩錄痛之也。日者，恩錄之，公、夫人皆同例也。○下，遐嫁反。【疏】注「子者」至「子同」。○解云：上文仲子之下而注云：「仲，字。子，姓。婦人以姓配字，不忘本國，^②示不適同姓。」今此稱姓者，亦是示不適同姓之義，故云義與仲子同。其不稱字之義乃自異，故注云「以姓配號」，號即夫人是也。

鄭人伐衛。書者，與人向同。侵、伐、圍、入例皆時。【疏】注「書者與人向同」。○解云：即上注云「凡書兵者，正不得也。外內深淺皆舉之者，因重兵害衆」是也。○注「侵伐圍入例皆書時」。^③○解云：其侵伐書時者，^④即僖二十八年「春，晉侯侵曹，晉侯伐衛」之屬是也。入例時者，已說於上，而注言此者，正以文承日月之下，故須解之。

三年，春，王二月，二月、三月皆有王者，二月，殷之正月也，三月，夏之正月也。王者存二王之後，使統其正朔，服其服色，行其禮樂，所以尊先聖，通三統，

師法之義，恭讓之禮，於是可得而觀之。【疏】注「二月」至「王者」。○解云：二月有王，即此是。三月有王者，即定元年王三月之屬是也。○注「使統其正朔」。○解云：統者，始也，謂各使以其當代之正朔為始也。○注「所以尊」至「觀之」。○解云：《春秋》黜杞，而言通三統者，黜杞為魯也。通三王之正者，為師法之義。己巳，日有食之。何以書？諸言「何以書」者，問主書。

【疏】注「諸言」至「主書」。○解云：至此乃解之者，正以有所據。下言何以書者，還言據彼難此之例，^⑤故不得然解也，即上二年傳云「外逆女不書，此何以書」是也。今此直言「何以書」，上無所據，則是問主書，故如此解。記異也。異者，非常可怪，先事而至者。是後衛州吁弑其君完，諸侯初僭，魯隱係獲，公子翬進諂謀。○殺

①「卑屈」，余本、鄂本作「屈卑」。

②「國」，阮校：「浦鏜云：『因』誤『國』。按：與元年注合。」

③「書時」，阮校：「何校本無『書』字是也。」

④「其」，杉浦校：「單疏鈔本無。」

⑤「言」，單疏鈔本、京都本、再造善本作「在」。

其，申志反，下「殺其君」同。鞏，許韋反。諂，敕檢反。

【疏】注「是後衛」至「完」。○解云：在四年春。○注「諸侯初僭」。○解云：下五年秋「初獻六羽」，傳云「何以書？譏。何譏爾？譏始僭諸公也。始僭諸公昉於此乎？前此矣。前此，則曷為始乎此？僭諸公猶可言也。僭天子不可言也」是也。○注「魯隱係獲」者。○解云：即下六年「春，鄭人來輸平」，傳云「狐壤之戰，隱公獲焉」是也。○注「公子」至「諂謀」。○解云：下四年「秋，鞏帥師及宋公」以下「伐鄭」，傳云「公子鞏諂乎隱公，謂隱公曰『百姓安子，諸侯說子，益終為君矣』」是也。此等諸事，皆是陰陽之象，故取之日食。日食，則曷為或日或不日？或言朔或不言朔？曰：某月某日朔，日有食之者，食正朔也。桓三年「秋，七月，^①壬辰，朔，日有食之」是也。此象君行外疆內虛，是故日月之行無遲疾，食不失正朔也。【疏】「日食則曷為或日」者。○解云：即此是也。或不日者，莊十八年「三月，日有食之」是也。或言朔者，桓三年「秋，七月，壬辰，朔，日有食之」是也。○注「此象君」至「朔也」。○解云：外疆者，謂外有威嚴，其民臣望而畏之。內虛者，虛

心以受物，正得為君之道，故食不失正朔也。《祭義》云「虛中以治之」，鄭注云「虛中，言不兼念餘事」是也。其或日，或不日，或失之前，或失之後。失之前者，朔在前也。謂二日食，「己巳，日有食之」是也。此象君行暴急，外見畏，故日行疾，月行遲，過朔乃食，失正朔於前也。失之後者，朔在後也。謂晦日食，莊公十八年「三月，日有食之」是也。此象君行懦弱見陵，^②故日行遲，月行疾，未至朔而食，失正朔於後也。不言月食者，^③其形不可得而觀也，故疑言日有食之。^④孔子曰：「多聞闕疑，慎言其餘，則寡尤。」不傳天

①「七月」，原作「十月」，今據桓公三年經及中華本、閩本改。

②「懦」，京都本、再造善本、中華本作「儒」。阮校：「按：『儒』當『懦』之訛，此懦弱正字也。」

③「食」下，阮校：「鄂本有『之』，是也。」

④「日」，阮校：「鄂本『日』作『曰』。按：作『曰』是也。不敢正言月食日，故疑言之曰有食之者而已。」

下異者，從王錄內可知也。^①○懦，乃亂反，又乃卧反。

【疏】注「不傳」至「可知也」。○解云：正以僖十四年「沙鹿崩」，成五年「梁山崩」，傳皆云「何以書？記異也。外異不書，此何以書？為天下記異也」。今無此傳，故須解之也。彼不從王內錄者，以其皆在晉竟內故也。

三月，庚戌，天王崩。平王也。何以不

書葬？據書葬桓王。【疏】注「平王也」。○解云：知

者，以本紀當之故也。○注「據書葬桓王」。○解云：即

莊三年「五月，葬桓王」是也。天子記崩不記葬，

必其時也。至尊無所屈也。諸侯記卒記葬，有

天子存，存，在。不得必其時也。設有王后崩，

當越紼而奔喪，不得必其時，故恩錄之。○紼，音弗。

【疏】注「設有」至「奔喪」。○解云：何氏以意言之。不言

天子崩者，舉輕以明重故也。曷為或言崩，或言

薨？天子曰崩，大毀壞之辭。諸侯曰薨，小毀

壞之辭。大夫曰卒，卒猶終也。士曰不祿。不

祿，無祿也。^②皆所以別尊卑也。葬不別者，從恩殺略

也。書崩者，為天下恩痛王者也。記諸侯卒葬者，王者

亦當加之以恩禮，故為恩錄。○以別，彼列反，下同。恩

殺，所界反。為天，于僞反，下「故為」、「主為」，傳「所為」同。

夏，四月，辛卯，尹氏卒。尹氏者何？

天子之大夫也。以尹氏立王子朝也。○尹氏，《左

氏》作「君氏」。朝，如字。【疏】「尹氏者何」。○解云：欲

言諸侯，不言國爵。欲言外臣，而書其卒。欲言內臣，內

無尹氏，故執不知問。○注「以尹氏立王子朝也」者。○

解云：^③在昭二十三年。^④其稱尹氏何？據宰渠

氏官，劉卷卒名。○卷，音權。【疏】注「據宰渠氏官」者。

①「錄內」，阮校：「鄂本作『內錄』」。按：疏亦云「彼不從王內錄者」，當據以乙正。

②「不祿無祿」，阮校：「諸本『錄』皆作『祿』，是也。唐石經：『士曰不祿』」。

③「注以尹氏立王子朝也者」○解云「，阮校：『閩、監、毛本刪『者』』」。下疏「注據宰渠氏官者」，「注劉卷卒名者」同。

④「按：依單疏本，則標注末尾多有『者』字，此其類也。然則此是，閩、監、毛本則非。」

④「年」下，杉浦校：「單疏鈔本有『秋』字，是。」

○解云：①即桓四年「夏，天王使宰渠伯糾來聘」是。○注「劉卷卒名」者。○解云：在定四年秋。貶。曷爲貶？據俱卒也。【疏】注「據俱卒也」。○解云：據劉卷言之。譏世卿。世卿者，父死子繼也。貶去名者氏者，②起其世也，若曰世世尹氏也。○去，起呂反。世卿，非禮也。禮，公、卿、大夫、士皆選賢而用之。卿大夫任重職大，不當世，爲其秉政久，恩德廣大。小人居之，必奪君之威權，故尹氏世，立王子朝，齊崔氏世，弑其君光，君子疾其末則正其本。見譏於卒者，亦不可造次無故驅逐，必因其遇卒絕之，③明君案見勞授賞，④則衆譽不能進無功，案見惡行誅，則衆讒不能退無罪。○見譏，賢偏反，下同。造，七報反。【疏】「世卿非禮也」。○解云：《詩序》云：「古之仕者，世祿也。」於賢者言之也。○注「齊崔」至「君光」。○解云：崔氏世者，即宣十年「齊崔氏出奔衛」，傳云「崔氏者何？齊大夫也。其稱崔氏何？貶。曷爲貶？譏世卿。世卿，非禮也」者是也。言弑其君光者，在襄二十五年夏。○注「君子疾其末」。○解云：即襄二十五年與昭二十三年是也。○注「則正其本者」。○解云：即此及宣十年是也。○注「見譏」至

「絕之」。○解云：必因過卒絕之者，過即「崔氏出奔衛」、「尹氏立王子朝」是也。卒即此文是也。若然，「尹氏立王子朝」還言尹氏，而「崔杼弑其君光」不復言崔氏者，正以大夫弑君例稱其名故也。○注「明君」至「無功」。○解云：衆譽者，若共工、鯀等迭相爲譽之類是也。○注「案見惡」至「無罪」。○解云：謂君有明德，案見惡行誅，則刑不濫也，故雖衆讒亦不能退黜無罪之善人也。舊云言不能退無罪者，謂不能退使無罪，非也。外大夫不卒，此何以卒？據原仲不卒。【疏】注「據原仲不卒」。○解云：即莊二十七年「秋，公子友如陳，葬原仲」，而經不書原仲之卒是也。天王崩，諸侯之主也。

- ①「注據宰渠氏官者」○解云「，杉浦校：『單疏鈔本無』」○解云「，單疏殘本闕。按：『○解云』蓋後人竄補，『者』字乃原有。」
- ②「貶去名者氏者」，余本作「貶去名言氏者」，是。
- ③「遇」，阮校：「監、毛本作『過』，閩本『過』字『曷』旁剗改，蓋本作『遇』字。按：依疏，則作『過』是也。」今按：疏引作「過」。
- ④「賞」，原作「償」，今據余本、京都本改。

時天王崩，魯隱往奔喪，尹氏主饋贊諸侯，與隱交接，而卒，恩隆於王者，則加禮錄之，故爲隱恩錄痛之。日者，恩錄之，明當有恩禮。【疏】注「時天」至「恩禮」。○解云：魯隱奔喪而不書者，蓋以得其常故也。若遣大夫往則書之，即文九年「二月，叔孫得臣如京師。辛丑，葬襄王」是也。彼傳云「王者不書葬，此何以書？不及時書，過時書」，彼注云「重錄失時」。「我有往者則書」，彼注云「謂使大夫往也，惡文公不自往，故書葬以起大夫之會」是也。①○注「恩隆」至「錄之」。○解云：言隱公恩隆於王者，則加禮錄其饋贊之人也。

秋，武氏子來求賻。武氏子者何？

天子之大夫也。其稱武氏子何？據宰渠氏官，仍叔不稱氏，尹氏不稱子。【疏】「武氏子者何」。○解云：欲言王臣，不言王使，欲言諸侯之臣，文無繫國，故執不知問。○注「據宰渠氏官」者。○解云：即桓四年「夏，天王使宰渠伯糾來聘」是也。○注「仍叔不稱氏」。○解云：即桓五年「天王使仍叔之子來聘」是也。譏。何譏爾？父卒，子未命也。時雖世大夫，緣孝子之心，不忍便當父位，故順古先試一年，乃命於宗廟。

武氏子父新死，未命而便爲大夫，薄父子之恩，故稱氏言子，見未命以譏之。【疏】注「時雖世大夫」。○解云：知者，正見尹氏之屬故也。○注「緣孝」至「宗廟」。○解云：知如此者，正以此經譏父卒子未命而便爲大夫故也。何以不稱使？據南季稱使。【疏】注「據南季稱使」。○解云：即下九年「春，天王使南季來聘」是也。當喪未君也。當喪，謂天子也。未君者，未三年也。未可居君位稱使也，故絕正其義，與毛伯同。【疏】注「未君」至「伯同」。○解云：即文九年「春，毛伯來求金」，傳云「何以不稱使？當喪，未君也。踰年矣，何以謂之未君」，「以天子三年，然後稱王」，「緣民臣之心，不可一日無君」，故踰年即位，「緣孝子之心，即三年不忍當」，②是故三年乃稱王命使大夫矣。武氏子來求賻，何以

①「之會」，阮校：「浦鏜云：『會之』誤倒。是也。」杉浦校：「單疏鈔本作『會之』，與文九年注合。」
②「即」，文公九年傳作「則」。

書？不但言何以書者，嫌以主覆問上所以說二事，^①

不問求賻。○覆，芳服反。【疏】注「不但」至「求賻」。

○解云：上二事者，即父卒子未命，當喪未君是也。嫌言父卒子未命何以書，當喪未君何以書，故須連言之。注主爲求賻書也者，嫌爲上二事書故也。譏。何譏爾？

喪事無求。求賻，非禮也。主爲求賻書也。禮

本爲有財者制，有則送之，無則致哀而已，不當求，求則皇皇傷孝子之心。【疏】注「求則皇」至「子之心」。

○解云：言制禮本意，所以喪事無求者，恐傷孝子之心故也，何者？正以孝子本意無心求矣。蓋通于下。云爾

者，嫌天子財多不當求，下財少可求，^②故明皆不當求之。

【疏】蓋通于下。○解云：蓋，詰爲「皆」，若似「蓋云歸哉」之類，或者不受於師，故疑之。

八月，庚辰，宋公和卒。不言薨者，《春秋》

王魯，死當有王文。聖人之爲文辭孫順，不可言崩，故貶外言卒，所以褒內也。宋稱公者，殷後也。王者封二王後，地方百里，爵稱公，客待之而不臣也。《詩》云：「有客宿宿，有客信信」是也。○孫，音遜。【疏】注「故貶」至「內也」。○解云：魯得尊名，不與外諸侯同文，即是尊魯

爲王之義。

冬，十有二月，齊侯、鄭伯盟于石門。

癸未，葬宋繆公。葬者曷爲或日或不

日？不及時而日，渴葬也。^③不及時，不及五

月也。禮：天子七月而葬，同軌畢至。諸侯五月而葬，同

盟至。大夫三月而葬，同位至。士踰月，外姻至。孔子

曰：「葬於北方，北首，三代之達禮也，之幽之故也。」

渴，喻急也，乙未葬齊孝公是也。○宋繆公，音穆，《左

氏》作「穆」。凡此後倣此。首，手又反。【疏】注「禮天

子」至「姻至」。○解云：皆隱元年《左傳》文。○注「孔

子」至「故也」。○解云：《檀弓》下篇文云：「孔子曰」之

①「嫌以主覆問上所以說二事」，阮校：「浦鏗云：定二

年疏引此注無二「以」字，哀三年疏引此注無上「以」

字。按：二「以」皆衍文，當據定二年疏刪正。」

②「可求」，阮校：「按：『可求』上當脫『不』字。」

③「渴葬也」，阮校：「《廣韻》十四泰引《公羊傳》『不及

時而葬曰渴』，『渴，急也，苦蓋切』。」

④「孔子曰」，阮校：「疏本『孔子曰』之下無『禮』字，然

則注文本有『禮』字也。」

下無「禮」字。○注「渴喻」至「是也」。○解云：即僖二十七年「六月，庚寅，齊侯昭卒」，「八月，乙未，葬齊孝公」是也。而言渴葬者，謂更無他事，但孜孜於葬，故不待五月矣。不及時而不日，慢葬也。慢葬，^①不能以禮葬也，八月葬蔡宣公是也。【疏】注「慢薄」至「葬也」。○解云：即下八年「夏，六月，己亥，蔡侯考父卒」。○注「八月」至「是也」。○解云：言但自慢薄不依禮，故不待五月也。過時而日，隱之也。隱，痛也。痛賢君不得以時葬，「丁亥，葬齊桓公」是也。【疏】注「隱痛」至「是也」。○解云：即僖十七年冬十二月，「乙亥，齊侯小白卒」，十八年「秋，八月，丁亥，葬齊桓公」是也。過時而不日，謂之不能葬也。解緩不能以時葬，「夏，四月，葬衛桓公」是也。○解，古避反，又古賣反。【疏】注「解緩」至「是也」。○解云：即下四年二月，「戊申，衛州吁弑其君完」，至五年「夏，四月，葬衛桓公」是也。當時而不日，正也。「六月，葬陳惠公」是也。○當時，丁浪反，又如字，下同。【疏】注「六月」至「是也」。○解云：即定四年「二月，癸巳，陳侯吳卒」，「六月，葬陳惠公」是也。當時而日，危不得葬也。此當時，何危

爾？宣公謂繆公曰：「以吾愛與夷，則不若愛女。以為社稷宗廟主，則與夷不若女，^②盍終為君矣。」與夷者，宣公之子，繆公者，宣公之弟。○與夷，如字，又音餘。凡人名字及地名之類皆放首音，借假字則時復重出。愛女，音汝，下及注同。盍終，戶臘反，四年傳同。【疏】「當時」至「葬也」。○解云：即此年八月「宋公和卒」，十二月「癸未，葬宋繆公」是也。而注不言之者，以下有問，不注可知也。○「以吾」至「愛女」。○解云：若，如也。言吾愛於與夷，則不止如女而已，言其甚也。云「以為社稷宗廟主，則與夷不若女」者，言不如女，道其不賢。云「盍終為君矣」者，何不遂為君，不聽其反讓。宣公死，繆公立。繆公逐

①「慢葬」，疏引作「慢薄」。

②「以吾愛與夷」至「則與夷不若女」，王引之《經義述聞》：「傳意是謂『與夷雖我所甚愛，而不可以為宗廟社稷主』，今乃言愛與夷不若愛女，則是愛之不甚，非其語意也。今案：『與夷』字，『女』字當是上下互訛，尋文究理，蓋本作『以吾愛女，則不如愛與夷』，寫者錯亂耳。」

其二子莊公馮與左師勃。左師，官。勃，名也。

○馮，皮冰反。曰：「爾爲吾子，生母相見，死

毋相哭。」所以遠絕之。○生母，音無，下同。與夷

復曰：復，報。「先君之所爲不與臣國，而納

國乎君者，以君可以爲社稷宗廟主也。今

君逐君之二子，而將致國乎與夷，此非先

君之意也。且使子而可逐，則先君其逐臣

矣。」繆公曰：「先君之不爾逐，可知矣。爾，

女也。可知者，欲使我反國。吾立乎此，攝也。」暫

攝行君事，不得傳與子也。謙辭。○傳與，直專反，下音

與。終致國乎與夷。莊公馮弑與夷。馮與督

共弑殤公在桓二年，危之於此者，死乃反國，非至賢之

君，不能不爭也。○馮殺，^①音試，注同。爭，爭鬪之爭。

【疏】注「馮與」至「二年」。○解云：即桓二年「春，王正

月，戊申，宋督弑其君與夷及其大夫孔父」是也。○注

「死乃」至「爭也」。○解云：至賢之君，謂受國者。正以

與夷不賢，故終見篡矣。故君子大居正。明修法守

正，最計之要者。【疏】「故君子大居正」。○解云：言由

是之故，君子之人大其適子居正，不勞違禮而讓庶也。

宋之禍，宣公爲之也。言死而讓，開爭原也。繆

公亦死而讓，得爲功者，反正也。外小惡不書，錄渴隱

者，明諸侯卒，王者當加恩意，憂勞其國，所以哀死閔患

也。【疏】注「言死而」至「原也」。○解云：言後人見其死

乃讓己，疑非誠心至意，是以還讓其子，終致後禍，故曰

「開爭原也」。○注「繆公」至「反正也」。○解云：其繆公

之功，即桓二年馮弑君是也。○注「所以哀死閔患也」。

○解云：哀死者，即慢之屬是也。閔患者，隱之是也。

四年，春，王二月，莒人伐杞，取牟婁。

牟婁者何？杞之邑也。以上有伐杞。○牟，武

侯反。【疏】「牟婁者何」。○解云：外相取邑，例所不書，

疑非凡取，故執不知問。外取邑不書，此何以

書？據楚子伐宋取彭城不書。【疏】注「據楚」至「不

書」。○解云：即襄元年傳曰「魚石走之楚，楚爲之伐宋，

取彭城，以封魚石」者是也。疾始取邑也。外小惡

不書，以外見疾始，著取邑以自廣大，比於貪利差爲重，

①「殺」，京都本、再造善本、宋本《釋文》作「弑」。

故先治之也。內取邑常書，外但疾始不常書者，義與上逆女同。不傳託始者，^①前此有滅，不嫌無取邑，當託始明，故省文也。取邑例時。○見疾，賢徧反，年末「見衆」同。差，初賣反。【疏】注「內取邑常書」者。○解云：即下十年取郛、防，昭三十二年取闕之屬是也。○注「義與上逆女同」。○解云：即上注云「內逆女常書，外逆女但疾始不常書者，明當先自正，躬自厚而薄責於人，故略外」是也。○注「傳不託始者」。○解云：何故不發傳云「取邑昉於此乎？前此矣。前此，則曷爲始於此？託始焉爾。曷爲託始焉爾？《春秋》之始也」？凡不託始之義有四：一則見其經而不託始，即上二年彼注云「據戰伐不言託始，納幣不託始之類」是也。二則其大惡不可託始，即五年「初獻六羽」之下，傳云：「始僭諸公昉於此乎？前此矣。前此，則曷爲始於此？僭諸公猶可言，僭天子不可言。」彼注云「傳云爾者，解不託始也」。三則省文，不假託始，即此是也。四則無可託始，即桓七年「焚咸丘」之下，注云「傳不託始者，前此未有，無所託也」是也。○注「取邑例時」。○解云：即下六年「冬，宋人取長葛」之屬是。然則「取牟婁」雖在月下，不蒙上月也。

戊申，衛州吁弑其君完。^②曷爲以國

氏？據齊公子商人弑其君舍，氏公子。○弑其，申志反。弑字從式，殺字從殳，不同也。君父言弑，積漸之名也。臣子云殺，卑賤之意也。字多亂，故時復音之。可知，則不重出也。完，音丸。【疏】注「據齊」至「公子」。

○解云：在文十四年秋也。商人所以得稱公子者，正以商人次正當立，其罪差輕故也。當國也。與段同義。

日者，從外赴辭，以賊聞例。【疏】注「與段同義」者。○

解云：即上元年注云「欲當國爲君，故如其意，使如國君，氏上鄭，所以見段之凶逆」是也。○注「日者」至「聞例」。

○解云：《公羊》之例，合書則書，不待赴告。而言「從外赴辭」者，謂其君被弑，此君之臣即以其日赴於天子諸侯，望天子諸侯早來救己，是以《春秋》悉皆書日，故云「日者，從外赴辭」也。言「以賊聞例」者，言以賊弑君聞

^①「不傳託始者」，阮校：「此本疏中標注作『傳不託始者』，此誤倒，當據以訂正。按：依疏云『何故不發傳』，然則『不傳』者言不發傳也，謂此應有託始之傳，而竟不發此傳也。」

^②「弑」，阮校：「唐石經、諸本同。《釋文》本作『殺』，其音申志反，今本亦改作『弑』。」

於天子諸侯，例日。如此，故下八年傳云「卒何以日而葬不日？卒赴」，何氏云「赴天子也」。緣天子閔傷，欲其知之，義亦通乎此。^①

夏，公及宋公遇于清。遇者何？不

期也。一君出，一君要之也。古者有遇禮，為

朝天子，若朝罷朝，卒相遇于塗，^②近者為主，遠者為賓，稱先君以相接，所以崇禮讓，絕慢易也。當春秋時，出入無度，禍亂姦宄，多在不虞，無故卒然相要，小人將以生心，故重而書之，所以防禍原也。言「及」者，起公「要之」，明非常遇也。地者，重錄之。遇例時。○要之，一遙反，注同。易，以鼓反。【疏】「遇者何」。○解云：欲言冬見，其文曰夏，欲言會聚，又不言會，故執不知問。○注「言及者」至「遇也」。○解云：正以及者，汲汲之文故也。其常遇者，即朝天子罷朝之時，相遇于塗是也。○注「遇例時」者。○解云：即隱八年「春，宋公、衛侯遇于垂」，莊三十年「冬，公及齊侯遇于魯濟」，及此之屬皆是。而僖十四年「夏，六月，季姬及鄫子遇于防」，書月者，彼注云「甚惡內」是也。

宋公、陳侯、蔡人、衛人伐鄭。

秋，鞏帥師會宋公、陳侯、蔡人、衛人伐鄭。鞏者何？公子鞏也。以人桓稱公子。

【疏】鞏者何？○解云：無公子，故執不知問。○注「以人桓稱公子」。○解云：即桓三年秋「公子鞏如齊逆女」

是也。何以不稱公子？貶。曷為貶？據叔

老會鄭伯伐許不貶。【疏】注「據叔」至「不貶」。○解云：在襄十六年夏。與弑公也。弑者，殺也，臣弑君

之辭。^③以終隱之篇貶，知與弑公也。○與弑，音預，下

及注同。【疏】注「以終隱」至「弑公」。○解云：即此及十

年「夏，鞏帥師會齊人、鄭人伐宋」，傳云「此公子鞏也，何以不稱公子？貶。曷為貶？隱之罪人也，故終隱之篇

貶也」是也。其與弑公奈何？公子鞏諂乎隱

公，諂猶佞也。謂隱公曰：「百姓安子，諸侯

說子，盍終為君矣？」隱曰：「吾否！否，不

也。○說，音悅。吾使修塗裘，吾將老焉。」塗裘

①「乎」，杉浦校：「單疏鈔本作「于」，單疏殘本闕。」

②「卒」，阮校：「當作「猝」。」

③「弑」，阮校引浦鏜云：「「殺」誤「弑」。」

者，邑名也。「將老焉」者，將辟桓，居之以自終也。故南面之君，勢不可復為臣，故云爾。不以成公意者，隱本為桓守國，國邑皆桓之有，不當取以自為也。○將辟，音避，今本多即作「辟」字，後不更音。復，扶又反。本為，于偽反，下「自為」、傳「吾為」皆同。【疏】注「不以成」至「為也」。○解云：上元年傳云：「公何以不言即位？成公意也。」此傳何以不言營塗裘？何以不書成公意也？言隱非正君，直為他守國而已，邑非己有，不當擅取之，取之非，是以不得作成公意解也。公子翬恐若其言聞乎桓，於是謂桓曰：「吾為子口隱矣。口猶口語相發動也。【疏】注「口猶」至「動也」。○解云：語，讀如「子語魯大師」之「語」。隱曰「吾不反也」。桓曰：「然則奈何？」曰：「請作難，難，兵難也。○難，乃旦反，注同。弑隱公。」謚者，傳家所加。【疏】注「謚者」至「所加」。○解云：死謚，周道也。今始請弑，已言隱公者，公羊子從後加之。所以至此乃注者，嫌是傳語，故明之。於鍾巫之祭焉，弑隱公也。鍾者，地名也。巫者，事鬼神禱解以治病請福者也，男曰覡，女曰巫。傳道此者，以起淫祀之無福。

○禱解，丁老反，或丁報反，下古賣反，又古買反。覡，戶狄反。【疏】注「男曰覡女曰巫」者。①○解云：《楚語》文也。○注「傳道」至「無福」。○解云：直言弑隱公，義勢已盡，而必言於鍾巫之祭焉者，以起淫祀之無福故也。

九月，衛人殺州吁于濮。其稱人何？

據晉殺大夫里克，俱弑君賊不稱人。○濮，音卜，一音剥。【疏】注「據晉殺大夫里克」。②○解云：在僖十年夏。③討賊之辭也。討者，除也。明國中人人得討之，所以廣忠孝之路。書者，善之也。討賊例時，此月者，久之也。【疏】注「討賊例」至「久之也」。○解云：「討賊例時」者，莊九年「春，齊人殺無知」是也。桓六年秋八月，「蔡人殺陳佗」，亦書月者，與此同也。

冬，十有二月，衛人立晉。晉者何？

公子晉也。以下有衛侯晉卒，又言立。【疏】「晉者

- ①「女曰巫者」，阮校：「閩、監、毛本刪「者」。」
- ②「殺」下，杉浦校：「單疏鈔本有「其」字。按：此本標準作「其大夫」，然則疏本當有「其」字。」
- ③「僖十年」，原作「僖十五年」。「晉殺其大夫里克」在僖公十年，今據京都本、再造善本、閩本改。

何」。○解云：欲言次正，而文言立，欲言非正，而舉衆立之，故執不知問。○注「以下」至「言立」。○解云：以有衛侯晉卒，則知此文「衛人立晉」者，是先君之子，今始立之爲君矣。^①又言立者纂文，知非正太子，故知公子矣。其衛侯晉卒在桓十二年冬。^②立者何？立者不宜立也。諸侯立不言立，此獨言立，明不宜立之辭。

【疏】「立者何」。○解云：諸侯之立，例所不書，今特言立，故執不知問。其稱人何？據尹氏立王子朝也。

【疏】注「據尹」至「朝也」。○解云：在昭二十三年秋。衆立之之辭也。晉得衆，國中人人欲立之。然則孰立之？石碯立之。^③石碯立之，則其稱人何？據尹氏立王子朝不稱人。○碯，七略反，一音七洛反。^④衆之所欲立也。衆雖欲立之，其立之非也。凡立君爲衆，衆皆欲立之，嫌得立無惡，故使稱人，見衆言立也，明下無廢上之義，聽衆立之，纂

者，大國纂例月，小國時。立、納、入皆爲纂。卒日，葬月，達於《春秋》，爲大國例。主書從受位也。○纂，初患

反。【疏】注「不刺」至「權重也」。○解云：刺桓公嗣子失位者，即不書晉之立矣，故襄十四年「衛侯衍出奔齊」，襄二十六年傳云「曷爲不言剽之立」？不言剽之立者，以惡衛侯也，彼注云「欲起衛侯失衆出奔，故不書剽立。剽立無惡，則衛侯惡明矣」。今書晉立，則不刺嗣子可知。

○注「月者」至「國時」。○解云：大國纂例月者，即此文冬十二月「衛人立晉」、莊六年「夏，六月，衛侯朔入于衛」、哀六年秋七月「齊陽生入于齊」之屬是也。而莊九年夏「齊小白入于齊」不月者，彼注云：「不月者，移惡于

①「之爲」，原作「爲之」，今據單疏鈔本、京都本、再造善本、閩本改。

②「衛侯晉」，原作「衛晉侯」。桓公十二年經作「丙戌，衛侯晉卒」，今據單疏鈔本、京都本、再造善本、閩本改。

③「碯」，阮校：「《隸釋》載漢石經《公羊》殘碑「碯」作「蹠」。惠棟《九經古義》云：《說文》無「碯」字，當從漢石經作「蹠」。」

④「七」，原作「十」，今據余本、宋本《釋文》改。「聽衆立之纂也」，阮校：「鄂本作「聽衆立之爲立纂也」，當據以補正。」

魯也。」其小國時者，即僖二十五年「秋，楚人圍陳，納頓子于頓，昭元年「秋，莒去疾自齊入于莒」之屬是也。○注「立納人皆爲篡」。○解云：「立」爲篡者，此文「衛人立晉」、昭二十三年「尹氏立王子朝」之屬是也。其「納」爲篡者，「納頓子于頓」，及文十四年「晉人納捷菑」之屬是也。其「入」爲篡者，小白、陽生之屬是也。○注「卒日」至「大國例」。○解云：隱八年「夏，六月，己亥，蔡侯考父卒」，秋「八月，葬宣公」之屬是也。①○注「主書從受位也」。○解云：謂主惡晉之從立矣。

監本附音春秋公羊注疏隱公卷第二

① 「葬宣公」，隱公八年作「八月，葬蔡宣公」。阮校引浦鏜云：「『葬』下脫『蔡』字。」杉浦校：「此誤，單疏鈔本『葬』下有『蔡』字。」

監本附音春秋公羊注疏隱公卷第三

起五年，盡十一年

何休學

五年，春，公觀魚于棠。何以書？

譏。何譏爾？遠也。公曷爲遠而觀魚？

據浚洙也。○觀魚，《左氏》作「矢魚」。浚，思俊反。洙，

常朱反。【疏】注「據浚洙也」。○解云：莊九年「冬，浚

洙」，傳曰：「洙者何？水也。浚之者何？深之也。曷

爲深之？畏齊也。」注云：「洙在魯北，齊所由來。」然則

近國北自有洙水，何故遠至棠地而觀魚乎？故難之。

登來之也。登，讀言「得來」。^①得來之者，齊人語也。

齊人名求得爲得來，作登來者，其言大而急，由口授也。

○登來，依注登音得。【疏】注「得來」至「語也」。○解

云：齊人名求得爲得來，而云此者，謂齊人急語之時，得

聲如登矣。○注「由口授也」。○解云：謂高語之時，猶

言得來之，至著竹帛時乃作「登」字，故言由口授矣。百

金之魚，公張之。解言登來之意也。百金猶百萬

也。古者以金重一斤，若今萬錢矣。張謂張罔罟障谷之

屬也。^②○罟，音古。鄣，之尚反，又音章。【疏】注「解

言「至」意也」。○解云：正以價直百金，故言得來之。○

注「障谷之屬也」。○解云：僖三年傳云「桓公曰「無障

谷」云是也。^③登來之者何？弟子未解其言大小

緩急，故復問之。○解，戶買反，或佳買反。故復，扶又

反，下「不得復」同。^④美大之辭也。其言大而急

者，「美大」多得利之辭也。實譏張魚而言觀譏遠者，恥

公去南面之位，下與百姓爭利，匹夫無異，故諱使若以遠

觀爲譏也。諸諱主書者，從實也。觀例時，從行賤略之。

^①「登讀言得來」，阮校：「按：此當作「登，讀言得」，猶云登讀爲得也。『來』當誤衍。」^②「張謂張罔罟障谷之屬也」，阮校：「閩、監、毛本同，鄂本「罔」作「網」，《釋文》「障」作「鄣」。」^③「云是也」，杉浦校：「單疏鈔本重「云」字，是也。」^④「下」字，原脫，今據京都本，再造善本、閣本、宋本《釋文》補。

【疏】注「觀例時」。○解云：莊二十三年「夏，公如齊觀社」，及此是也。彼此非禮，故言從行賤略之。棠者

何？濟上之邑也。^①濟者，四瀆之別名。江、河、

淮、濟爲四瀆。○濟上，子禮反，注同，濟水之上。【疏】

「棠者何」。○解云：正以棠非水名，而於之觀魚，故執不知問。○注「江河」至「四瀆」。○解云：即《釋水》云：

「江、河、淮、濟爲四瀆。四瀆者，發源注海者也。」

夏，四月，葬衛桓公。【疏】「夏四」至「桓公」。

○解云：即上三年傳云「過時而不日，謂之不能葬也」，何氏云：「解緩不能以時葬，夏，四月，葬衛桓公」是也。然則桓公見弑在去年之春，過期乃葬，故以解緩言之。

秋，衛師入盛。曷爲或言率師，或不

言率師？將尊師衆稱某率師，將尊者，謂大夫

也。師衆者，滿二千五百人以上也。二千五百人稱師，

無駭率師入極是也。禮，天子六師，方伯二師，諸侯一

師。○入盛，音成，《左氏》作「邲」。【疏】注「將尊」至「夫

也」。○解云：《公羊》之例，大夫見名氏，故云此。○注

「二千」至「稱師」。○解云：《大司馬》序官文。○注「無

駭」至「是也」。○解云：在上二年夏。○注「天子」至「六

師」。○解云：天子六師者，即「周王于邁，六師及之」是

也。方伯者，九州牧也，即《王制》云「千里之外設方伯」

是也。二師者，即昭五年「春，王正月，舍中軍。舍中軍

者何？復古也」是矣。然則魯之初封，地方七百里，至

於僖公，復伯禽之宇，更爲州牧，而以二軍爲復古，是爲

方伯二師。方伯之屬而以二師爲正，則知凡平諸侯一師

明矣。然則《論語》云「子曰『三軍可奪帥』」之屬，其指王

官之伯乎？將尊師少稱將，師少者，不滿二千五百

人也，「衛孫良夫伐廬咎如」是也。^②○咎，音羔。【疏】注

「衛孫」至「是也」。○解云：成三年「晉郤克、衛孫良夫伐

將咎如」是也。^③不言「郤克」者，科舉以言之。將卑

①「棠者何濟上之邑也」，阮校：「《隸釋》載石經《公羊》殘碑，此下直接下傳「曷爲或言率師，或不言率師」，

無「夏四月葬衛桓公秋衛師入盛」十二字。蓋古者經

傳異本，後儒省兩讀始合并之。漢石經《公羊》有傳

無經，此漢以前舊式可考者。」

②「廬」，阮校：「成三年經作「將咎如」，《左氏》作「廬」，此誤。」

③「將」，成公三年經及京都本、再造善本、閣本作「廬」。

師衆稱師，將卑者，謂士也，衛師人盛是也。將卑

師少稱人。鄭人伐衛是也。【疏】注「鄭人伐衛是

也」。○解云：在上二年冬也。君將不言率師，書

其重者也。分別之者，責元帥，①因錄功惡有大小，救

徐、從王伐鄭是也。○分別，彼列反。元率，所類反，本

又作「帥」。【疏】注「分別」至「小大」。○解云：責元帥

者，凡書兵者，是正不得，故責之也。因錄功惡有小大

者，即將尊師衆而有功小，將卑師少而有功大。將卑師

少而無功爲惡小，將尊師衆而無功爲惡大是也。○注

「救徐」至「是也」。○解云：僖十五年春「公孫敖率師及

諸侯之大夫救徐」，桓五年「秋，蔡人、衛人、陳人從王伐

鄭」是也。公孫敖救徐者，將尊師衆無功，是其惡大也。

蔡人等從王伐鄭，稱人而行義，是其功大也。

九月，考仲子之宮。考宮者何？考

猶入室也，始祭仲子也。②考，成也。成仲子之

宮廟而祭之，所以居其鬼神。猶生人入宮室，必有飲食

之事。不就惠公廟者，妾母卑，故雖爲夫人，猶特廟而祭

之。禮，妾廟子死則廢矣。不言立者，得變禮也。加之

者，宮廟尊卑共名，非配號稱之辭，故加之以絕也。【疏】

注「考宮者何」。③○解云：上無立文，而經言「考」。《春

秋》之內，更無考禮，故執不知問。○注「猶生」至「之

事」。○解云：即《下雜記》云「路寢成則考之而不釁」，鄭

注云：「言路寢者，生人所居。不釁者，不神之也。考之

者，設盛食以落之。」《檀弓》曰「晉獻文子成室，諸大夫發

焉。張老曰：「美哉倫焉！美哉煥焉！」④歌於斯，哭於

斯，聚國族於斯。」文子曰：「武也！得歌於斯，哭於斯，

聚國族於斯，是全要領以從先大夫於九原。」北面再拜稽

首「者是也」。○注「禮妾」至「廢矣」。○解云：即《喪服小

記》云「慈母與妾母不世祭」，鄭注云「以其非正」，即引

《穀梁傳》云「於子祭，于孫止」是也。○注「不言」至「禮

①「元帥」，原作「元師」。本疏引作「元帥」。《釋文》作

「元率」，云：「本又作帥。」今據余本改。

②「始祭仲子也」，阮校：「唐石經、諸本同，《隸釋》載漢

石經無「也」字。」

③「注」，杉浦校：「單疏鈔本無「注」字，單疏殘本闕。

按：「注」字當刪去。此本疏中標傳，上無「傳」字，標

注則有「注」字。」

④「美哉倫焉美哉煥焉」，阮校：「閩、監、毛本「倫」作

「輪」，「煥」作「奐」，《禮記》同。」

也」。○解云：欲決成六年「立武宮」，定元年「立煬宮」，皆言立者，以其非禮故也。○注「加之」至「絕也」。○解云：言宮廟尊卑共名者，尊亦言宮，故武煬是君，仲子是妾，是尊卑共名。號稱者，即仲子是也。武煬是君，配宮言之，正是其宜。仲子是妾，不宜與宮廟連文，故加「之」以絕之矣。桓未君，則曷爲祭仲子？據無子不廟也。【疏】注「據無子不廟也」。○解云：即上解「於孫止」是也。其子死訖猶尚不祭，其子未君之時不祭明矣，故難之。然則妾母之貴，正由其子爲君，即元年傳云「母以子貴」是也。若子未爲君之時，義與未踰年之君相似。莊三十二年傳云「未踰年之君也，有子則廟」，「無子不廟」，義亦通於此。隱爲桓立，故爲桓祭其母也。然則何言爾？成公意也。尊桓之母爲立廟，所以彰桓當立，得事之宜，故善而書之，所以起其意，成其賢也。○隱爲，于僞反。

初獻六羽。初者何？始也。六羽者何？舞也。持羽而舞。【疏】「初者何」。○解

云：獻羽是常，而反言初，故執不知問。○「六羽者何」。○解云：諸侯仍用四，此反言六羽，故執不知問。初獻

六羽何以書？譏，何譏爾？譏始僭諸公也。僭，齊也。下倣上之辭。①【疏】「初獻」至「以書」。

○解云：不但言「何以書」，嫌覆問上文始與舞，故復舉句而問之。不注之者，與三年「求賻」同，故省文。六羽

之爲僭奈何？天子八佾，佾者，列也。八人爲

列，八八六十四人，法八風。○佾，音逸，列也。諸公

六，六人爲列，六六三十六人，法六律。諸侯四。四

人爲列，四四十六人，法四時。諸公者何？諸侯

者何？天子三公稱公，王者之後稱公，其

餘大國稱侯，大國謂百里也。【疏】「諸公者何」。○

解云：正以諸公有二等，故執不知問。○「諸侯者何」。

○解云：漫言諸侯，明是五等總名。文次公下，復疑偏指

七命，故執不知問。所以不待答訖而連句問之者，正以

上文并解諸公六、諸侯四故也。○注「大國謂百里也」。

○解云：公侯方百里，《王制》文也。侯與公等者，據有功

①「下倣上之辭」下，余本有「倣戶教反」四字，宋本《釋文》作「下倣，戶教反」五字。此當脫。

者言之矣。小國稱伯、子、男者，正以上已有侯，故不復言之。其實凡平之侯正與伯同。^①小國稱伯、子、

男。小國謂伯七十里，子、男五十里。【疏】注「小國」至

「五十里」。○解云：《王制》文。彼注云：「此地，殷所因

夏爵三等之制也。《春秋》變周之文，從殷之質，合伯、

子、男以爲一，則殷爵三等者，公、侯、伯也，異畿內謂之

子。周武王初定天下，更立五等之爵，增以子、男，而猶

因殷之地，以九州之界尚狹也。周公攝政致大平，斥大

九州之界，制禮成武王之意，公地方五百里，侯四百里，

伯三百里，子二百里，男一百里，諸侯亦以功黜陟之。其

不合者，皆益之地爲百里焉，是以周世有爵尊而國小，爵

卑而國大者，唯天子畿內不增。」天子三公者何？

天子之相也。相，助也。○之相，息亮反，注及下同。

【疏】「天子三公者何」。○解云：正以《春秋》上下無「三

公」之文，故執不知問。天子之相則何以三？據

經但有祭公、周公。【疏】注「據經」至「周公」。○解云：

即桓八年「祭公來」云云，僖九年「公會宰周公」是也。經

但有二公，而傳言三公，故難之。自陝而東者，周

公主之。自陝而西者，召公主之。一相處

乎內。陝者，蓋今弘農陝縣是也。禮，司馬主兵，司徒

主教，司空主土。《春秋》撥亂世，以絀陟爲本，故舉絀陟

以所主者言之。○陝，失冉反，何云「弘農陝縣」也。一

云當作郟，古洽反，王城郟。召公，上照反，又作

「邵」，^②音同。絀，敕律反。【疏】注「司馬」至「言之」。○

解云：上傳云「諸公者何，天子之相。天子之相，則何以

三」云云，不道「二王之後者何？二王之後何以二也」

者，正以天子三公主絀陟，故偏取言之，是以注者解其

意。始僭諸公，昉於此乎？^③前此矣。前

此則曷爲始乎此？僭諸公猶可言也，僭

① 「同」，杉浦校：「單疏鈔本、毛本作『等』，單疏殘本闕。」

② 「召公上照反又作邵」，余本、京都本、再造善本、宋本《釋文》作「邵公上照反又作召」。

③ 「昉」，阮校：「《隸釋》載漢石經作『放』。」

天子不可言也。傳云爾者，解不訖始也。^①前僭八

佾於惠公廟，大惡不可言也。還從僭六羽議，^②本所當託者非但六也，故不得復傳上也。加初者，以為常也。獻者，下奉上之辭。不言六佾者，言佾則干舞在其中，明婦人無武事，獨奏文樂。羽者，鴻羽也，所以象文德之風化疾也。夫樂本起於和順，和順積於中，然後榮華發於外，是故八音者，德之華也。歌者，德之言也。舞者，德之容也。故聽其音可以知其德，察其詩可以達其意，論其數可以正其容，薦之宗廟足以享鬼神，用之朝廷足以序群臣，立之學官足以協萬民。^③凡人之從上教也，皆始於音，音正則行正，故聞宮聲，則使人溫雅而廣大。聞商聲，則使人方正而好義。聞角聲，則使人惻隱而好仁。聞徵聲，則使人整齊而好禮。聞羽聲，則使人樂養而好施。所以感蕩血脉，通流精神，^④存寧正性，故樂從中出，禮從外作也。禮樂接於身，望其容而民不敢慢，觀其色而民不敢爭，故禮樂者，君子之深教也，不可須臾離也。君子須臾離禮，則暴慢襲之，須臾離樂，則姦邪入之。是以古者天子諸侯，雅樂鍾磬未曾離於庭，卿大夫御琴瑟未曾離於前，所以養仁義而除淫辟也。《魯詩傳》曰：「天子食日舉樂，諸侯不釋縣，大夫、士日琴瑟。」王者治定制

禮，功成作樂。未制作之時，取先王之禮樂宜於今者用之。堯曰《大章》，舜曰《蕭韶》，夏曰《大夏》，殷曰《大護》，周曰《大武》，各取其時民所樂者名之。堯時民樂其道章明也，舜時民樂其修紀堯道也，^⑤夏時民樂大其三聖相承也，殷時民樂大其護己也，周時民樂其伐討也，^⑥蓋異號而同意，異歌而同歸。失禮鬼神例日，此不日者，嫌獨考宮以非禮書，故從末言初可知。○夫樂，音扶，發句

① 「傳云爾者解不訖始也」，阮校：「宋本、監本、毛本

「訖」作「託」，鄂本「云」作「言」。此本、閩本「託」誤「訖」。杉浦校：「單疏鈔本、單疏殘本疏標起訖作『注傳云爾者解不託始也』。按：今本何注作『訖始』，誤也。」

② 「議」，原作「議」。阮校引浦鏜云：「《儀禮經傳通解》引作『議』。」今據余本、鄂本改。

③ 「官」，原作「官」，今據余本、京都本、再造善本、閣本改。

④ 「通流」，阮校：「鄂本作『流通』。」

⑤ 「紀」，阮校：「鄂本『紀』作『紹』，當據正。浦鏜云：『《儀禮經傳通解》作『紹』。按：以『紹』作『韶』，以同音為訓詁也。』

⑥ 「討」，閩本、監本、毛本、宋本《釋文》作「紂」。

之端放此。朝廷，徒佞反。好義，呼報反，下同。徵，張里反。施，式豉反。爭，爭鬪之爭。離也，力智反，下同。邪，似嗟反。未曾，在能反，下同。淫辟，匹亦反。縣，音玄。治定，直吏反。韶，常昭反。夏曰，戶雅反，下同。護，戶故反。紂，直久反。【疏】注「傳云」至「始也」。○解云：其託始者，即上二年傳云：「無駭者何？展無駭也。何以不氏？貶。曷爲貶？疾始滅也。始滅，昉於此乎？前此矣。前此，則曷爲始乎此？」^①託始焉爾。曷爲託始焉爾？《春秋》之始也。今傳亦宜云：「前此則曷爲始乎此，託始焉。」^②曷爲託始焉爾？《春秋》之始也。而云「僭諸公猶可言，僭天子不可言」，解不得託始意也。○注「前僭」至「公廟」。○解云：謂自此以前，不必要指《春秋》前也。而言惠公廟者，欲道於周公廟時不爲僭故也。○注「本所」至「傳上也」。○解云：由非六之故，是以不得復祭傳，^③云上古已有六矣。○注「羽者」至「化疾」。○解云：知鴻羽者，時王之禮，且以舉則沖天，所以象文德之風化疾故也。《詩》云「右手秉翟」者，其兼用之乎？○注「夫樂本起於和順，和順積於中，然後榮華發於外」者，^④《樂記》文也。^⑤○注「故聞」至「性故」。^⑥○解云：溫雅而廣大者，土之性也。方正而好義

者，金之性也。惻隱而好仁者，木之性也。整齊而好禮者，火之性也。樂養而好施者，水之性也。○注「樂從」至「作也」。○解云：《樂記》文。樂由中出，和在心是也。禮自外作，敬在貌是也。此注皆出《樂記》。○注「取先王」至「用之」。○解云：謂同其文質也。王者治定制禮，

- ① 「則」，原作「貶」。阮校：「浦鏜云「則」誤「貶」，是也。」杉浦校：「單疏鈔本、單疏殘本「則」作「貶」。今據隱公二年傳及單疏鈔本、單疏殘本改。」
- ② 「焉」下，阮校：「閩、監、毛本有「爾」字。」有「爾」字者與二年傳合。
- ③ 「祭」，阮校：「按：「祭」當「發」之訛。」杉浦校：「單疏鈔本、單疏殘本「祭」作「發」。按：阮說是也，此當從單疏本訂正。」
- ④ 「於」，原重文，杉浦校：「單疏鈔本、單疏殘本「於」字不疊。按：「於」字其一當衍，今《禮記》作「發外」，無「於」字。」今據上注文及單疏鈔本、單疏殘本刪。
- ⑤ 「注夫樂本起於和順」至「樂記文也」，此節正義與本疏體例不合，疑有訛脫。
- ⑥ 「注故聞至性故」，阮校：「何校本作「故聞至正性」，無「故」字，是也。」杉浦校：「單疏鈔本、單疏殘本作「故聞官聲則使人溫雅而廣大云云」。」

功成作樂，功成治定同時爾，功主於王業，治主於教民，故《明堂位》曰：「周公治天下六年，朝諸侯於明堂，制禮作樂。」○注「失禮」至「可知」。○解云：「失禮鬼神例日」者，成六年二月，辛巳，立武宮之屬是也。言考宮與獻羽實同日，若置日於考宮上，則嫌獻羽不蒙之，獨自考宮以非禮而已，^①故從下事言初。初是非禮辭，則獻羽非禮亦可知。然考宮得變禮，而不置於獻羽上者，嫌別日故也。知初是非禮者，正以「初稅畝」同文矣。

邾婁人、鄭人伐宋。邾婁小國序上者，主會

也。【疏】注「邾婁」至「會也」。○解云：伐宋而言「主會」者，謂相共伐宋，時邾爲首故也。

螟。何以書？記災也。災者，有害於人

物，隨事而至者。先是隱公張百金之魚，設苛令急治，^②以禁民之所致。○螟，亡丁反，蟲食苗心。苛，音何。^③【疏】注「災者有害於人物隨事而至者」。○解云：欲對異爲先事而至故也。○注「先是」至「所致」。○解云：苛令急法者，即三年「春，王二月，己巳，日有食之」，注云「此象君行暴急外見畏」是也。

冬，十有二月，辛巳，公子彊卒。日者，隱

公賢君，宜有恩禮於大夫。益師始見法，無駭有罪，據俠又未命也，^④故獨得於此日。○彊，苦侯反。見，賢徧反。

【疏】注「日者」至「大夫」。○解云：正以所聞之世，例不合日故也。○注「益師始見法」。○解云：元年十二月「公子益師卒」，是所傳聞之世，初始欲見三世之法，故不書日也。○注「無駭有罪」。○解云：即八年「冬，十有二月，無駭卒」，傳云「何以不氏？疾始滅也，故終身不氏」是也。○注「俠又未命也」。○解云：即九年三月「俠卒」，^⑤傳云「俠者何？吾大夫之未命者」是也。^⑥

宋人伐鄭，圍長葛。邑不言圍，此其

①「禮」下，杉浦校：「單疏鈔本、單疏殘本有『書』字。按：『禮』下有『書』字，與何注合，是也。」
②「急治」，阮校：「疏及閩、監、毛本皆作『急法』，此誤。」

③「何」，宋本《釋文》作「河」。

④「據俠又未命也」，阮校：「鄂本無『據』，疏中標注同，此衍，當刪正。浦鏜云：元年『益師卒』疏引此注亦無『據』字。」

⑤「俠」，原作「挾」，今據京都本、再造善本、中華本改。
⑥「之」，原作「云」，今據隱公九年傳及中華本、閣本改。

言圍何？據伐於餘丘不言圍。【疏】注「據伐」至「言

圍」。○解云：即莊二年「夏，公子慶父帥師伐於餘丘」是

也。疆也。至邑雖圍當言伐，惡其疆而無義也。必欲

爲得邑，故如其意言圍也。所以不知鄭疆者，公以楚師

伐宋圍緡不言疆也。○疆，渠羌反，下同。惡，烏路反。

六年，春，鄭人來輪平。輪平者何？

輪平猶墮成也。何言乎「墮成」？據鞏會諸

侯伐鄭後未道平也，何道墮成？○輪平，式朱反，墮也，

《左氏》作「淪平」。墮，許規反。【疏】「輪平者何」。○解

云：正以言異於常例，故執不知問。○注「據鞏」至「墮

成」。○解云：上四年「秋，鞏帥師會宋公、陳侯、蔡人、衛

人伐鄭」是也。敗其成也。鞏伐鄭後，已相與平，但

外平不書，故云爾。【疏】注「鞏伐」至「云爾」。○解

云：魯與鄭平而言外平者，謂伐鄭之後，時公子鞏在外與

鄭平，不得公命，是以不書，故曰「外平不書」耳。曰：

吾成敗矣。吾，魯也。【疏】「曰吾成敗矣」。○解

云：稱魯人之辭，故加「曰」。吾與鄭人末有成也。

末，無也。此傳發者，解鄭稱爲人共國辭。①【疏】注「此

傳」至「國辭」。○解云：傳發此「吾與鄭人末有成」一段

事者，非直解鄭擅獲諸侯爲有罪，而魯侯不能死難亦當

絕，故令鄭稱人。言輪平，則魯侯亦合稱人矣。一個人

字，兩國共有，故云「稱人爲共國辭」。吾與鄭人則

曷爲末有成？據無戰伐之文。狐壤之戰，隱

公獲焉。時與鄭人戰於狐壤，爲鄭所獲。○壤，如丈

反。然則何以不言戰？戰者，內敗文也。據鞏戰

君獲言師敗績。【疏】注「戰者內敗文也」。○解云：即桓

十年「齊侯、衛侯、鄭伯來戰于郎」，傳云：「何以不言師敗

績？內不言戰，言戰乃敗矣。」彼注云《春秋》託王於

魯，戰者，敵文也。王者兵不與諸侯敵，戰乃其已貶之

文，故不復言師敗績」是也。○注「據鞏」至「敗績」。○

解云：成二年「季孫行父」以下「帥師，會晉卻克」云云，

「及齊侯戰于鞏，齊師敗績」，「秋，七月，齊侯使國佐如

①「爲共國辭」，阮校引段玉裁曰：「疏云「一個人字，兩

國共有」，當是「國共」，非「共國」也。下注「稱人共國辭」者同誤。」

師」云云，傳云：「君不行使乎大夫，此其行使乎大夫何？」^①佚獲也。」注云：「佚獲者，已獲而逃亡也。」然則彼獲言敗績，則知此時魯侯被獲，亦宜言戰，故難之。諱獲也。君獲不言師敗績，故以輸平諱也，與鞏戰辟內敗文是。^②戰例時，偏戰日，^③詐戰月。不日者，鄭詐

之。不月者，正月也，見隱終無奉正月之意。不地者，深諱也，使若實輸平，故不地也。稱人共國辭者，嫌來輸平獨惡鄭，擅獲諸侯，^④魯不能死難，皆當絕之。○難，乃且反。【疏】注「君獲」至「諱也」。○解云：君獲不言師敗績，即僖十五年「晉侯及秦伯戰于韓，獲晉侯」，傳云「此偏戰也，何以不言師敗績」，注云「舉君獲爲重也」是也。然則此由魯公見獲，是以不得言戰，故以輸平諱之。○

注「與鞏」至「敗文」。○解云：成二年傳云：「君不行使乎大夫，此其行使乎大夫何？佚獲也。」注云：「當絕賤使與大夫敵體以起之。君獲不言師敗績，等起不去師敗績者，辟內敗文也。」然則鞏戰之時，實齊侯被獲，宜去敗績，直言戰而已。但時內大夫在焉，辟內敗文，故不得言戰矣。今此輸平之經，自由魯公見獲，是以不得言戰，故云與鞏戰辟內敗文異。○注「戰例時偏戰日」。○解云：即桓十二年「丁未，戰于宋」，傳云「此偏戰也，何以不

言師敗績」云云是也。○注「詐戰月」。○解云：即莊十年「春，王正月，公敗齊師于長勺」之屬是也。○注「不地者深諱也」。○解云：若地，宜言輸平于狐壤，似若戰于之類。

夏，五月，辛酉，公會齊侯盟于艾。

秋，七月。此無事，何以書？《春秋》

雖無事，首時過則書。首，始也。時，四時也。過，歷也。春以正月爲始，夏以四月爲始，秋以七月爲始，冬以十月爲始。歷一時無事，則書其始月也。○艾，

①「君不行使乎大夫此其行使乎大夫何」，阮校：「盧文

詒曰：唐石經及各本皆無上「行」字。嚴杰曰：下節疏及閏一年疏引皆有上「行」字。」

②「是」，阮校：「鄂本『是』作『異』，疏中引注同，當據正。」

③「偏」，原作「徧」，今據余本、閣本改。

④「擅獲諸侯」，阮校：「鄂本上有『明鄭』二字，當補正。」

五蓋反。^①【疏】「夏五月」至「則書」。^②○解云：下無相犯之處而書日者，以下八年三月，「庚寅，我入邲」，傳云：「其言我何？言我者，非獨我也，齊亦欲之。」然則雖不復侵伐，亦有爭邑之隙，故書日也。首時過，則何以書？據無事也。《春秋》編年，四時具，然後爲年。明王者當奉順四時之正也。《尚書》曰「欽若昊天，歷象日月星辰，敬授民時」是也。有事不月者，人道正，則天道定矣。○編，必連反，《字林》、《聲類》皆布千反，一音甫連反。吳，戶老反。

冬，宋人取長葛。外取邑不書，此何以書？久也。古者師出不踰時，今宋更年取邑，久暴師苦衆居外，故書以疾之。不繫鄭舉伐者，明因上伐圍取也。○更，音庚。暴，步卜反。【疏】「外取」至「以書」。○解云：據與四年牟婁同。

七年，春，王三月，叔姬歸于紀。叔姬者，伯姬之媵也。至是乃歸者，待年父母國也。婦人八歲備數，十五從嫡，二十承事君子。媵賤書者，後爲嫡，終有賢行。紀侯爲齊所滅，紀季以鄒人于齊，叔姬歸之，能處隱約，全竟婦道，故重錄之。○從適，丁歷反，本亦

作「嫡」，下同。賢行，下孟反，下「異行」同。鄒，戶圭反。

【疏】注「叔姬」至「國也」。○解云：知如此注，見上二年冬「伯姬歸于紀」，^③自爾以來，不見紀伯姬卒之文，今叔姬又歸之，明知是其媵矣。○注「婦人」至「君子」。○解云：《書》傳文。○注「媵賤」至「賢行」。○解云：《春秋》

之內，例不書媵，以其賤故。今此書者，以其後爲嫡，終有賢行也。知後爲嫡者，正以莊二十九年冬十二月「紀叔姬卒」，三十年「八月，癸亥，葬紀叔姬」，卒葬皆書，爲嫡明矣。而成九年「伯姬歸于宋」，書二國媵者，彼傳云「錄伯姬」是也。○注「紀侯爲齊所滅」。○解云：即莊四年夏，「紀侯大去其國」是也。○注「紀季」至「于齊」。○解云：在莊三年。○注「叔姬」至「錄之」。○解云：莊十二年「春，王三月，紀叔姬歸于鄒」，傳云「其言歸于鄒

①「五」，余本、京都本、再造善本作「王」。

②「夏五月至則書」，阮校：「此本與唐石經同，不分經傳，故此節疏在「此無事何以書」節注下，閩、監、毛本強分經傳，移此疏於「公會齊侯盟于艾」下，改「夏五月至則書」爲「至于艾」。」

③「知如此注見上二年冬」，杉浦校：「單疏鈔本、單疏殘本作「知如此者正見上二年冬」。」

何？隱之也。何隱爾？其國亡矣，徒歸于叔爾也」是也。

滕侯卒。何以不名？據蔡侯考父卒名。

【疏】注「據蔡」至「卒名」。○解云：在下八年夏。微國也。小國，故略不名。微國則其稱侯何？據大

國稱侯，小國稱伯、子、男。【疏】注「據大」至「子男」。○

解云：上五年傳文。案彼大國非直侯，而注特言大國稱侯者，案彼傳之成文故也。不嫌也。滕侯卒不名，下

常稱子，不嫌稱侯爲大國。【疏】注「下常稱子」。○解

云：桓二年「滕子來朝」，因茲已下常稱子矣。《春秋》

貴賤不嫌同號，貴賤不嫌者，通同號稱也。若齊亦

稱侯，滕亦稱侯，微者亦稱人，貶亦稱人，皆有起文，貴賤不嫌同號是也。○號稱，尺證反。【疏】注「齊亦稱侯」。

○解云：不云晉者，晉爵未大故。○注「微者亦稱人」。

○解云：隱元年「九月，及宋人盟于宿」之屬是也。○注

「皆有起文」。○解云：滕侯卒不名，下恒稱子，起其微

也。齊侯恒在宋公之上，^①起其大也。宋人盟于宿不書

日，亦起微也。鄭人來輸平稱人者，共國辭，^②起其貶之，

故曰皆有起文也。○注「貴賤」至「是也」。○解云：不論

貴賤不嫌者，通其同號稱，由是之故，《春秋》同其號也。

美惡不嫌同辭。若繼體君亦稱即位，繼弑君亦稱即

位，皆有起文，美惡不嫌同辭是也。滕，微國，所傳聞之

世未可卒，所以稱侯而卒者，《春秋》王魯，託隱公以爲始

受命王，滕子先朝隱公，《春秋》褒之以禮，嗣子得以其禮

祭，^③故稱侯見其義。○惡，烏路反，又如字，注同。傳，

直專反。見，賢徧反。【疏】注「若繼」至「即位」。○解

云：文、成之屬是也。○注「繼弑」「即位」。^④○解云：

桓、宣是也。○注「皆有起文」。○解云：前君之薨書地

者，起其後即位者是繼體之君也。若前君薨不地者，起

其後即位者非是繼體之君也。○注「美惡」至「是也」。

○解云：謂美惡不嫌者，通其同辭。由是之故，《春秋》同

其辭矣。○注「滕子」至「其義」。○解云：在十一年，即

此君之子也。滕子、薛侯俱朝隱公，滕并褒其父而薛否

①「在」，單疏鈔本、單疏殘本、京都本、再造善本作「以」。

②「共國辭」，阮校：「當作『國共辭』」。

③「禮」，余本、鄂本作「祿」。

④「弑」下，依疏標起訖例，當有「至」字。

者，薛侯父卒在春秋之前，故無褒之文。

夏，城中丘。中丘者何？內之邑也。

城中丘，何以書？上問中丘者何，^①指問邑也，故

因言何以書，^②嫌但問書中丘，故復言「城中丘，何以書」也。○復，扶又反。【疏】「中丘者何」。○解云：楚丘同，

皆直云城，文無別，故執不知問。以重書也。以功

重，故書也。當稍稍補完之，至令大崩弛壞敗，然後發衆

城之，猥苦百姓，空虛國家，故言城，明其功重，與始作城

無異。城邑例時。○令，力呈反。弛，尸爾反，^③又式氏

反。^④【疏】注「城邑例時」。○解云：即下九年「夏，城郎」，襄十三年「冬，城防」之屬是也。

齊侯使其弟年來聘。其稱弟何？

據諸侯之子稱公子。母弟稱弟，母兄稱兄。

母弟，同母弟。母兄，同母兄。不言同母言母弟者，若

謂不如爲如矣，齊人語也。公別同母者，^⑤《春秋》變

周之文，從殷之質。質家親親，明當親厚異於群公子

也。聘者，問也。來聘書者，皆喜內見聘事也。古者

諸侯朝罷朝聘，爲慕賢孝禮，^⑥一法度，尊天子。不言

聘公者，禮，聘受之於大廟，孝子謙，不敢以己當之，歸

美於先君，且重賓也。○別，彼列反。大廟，音泰，下

同。【疏】「母兄稱兄」。○解云：昭二十年「秋，盜殺

衛侯之兄輒」是也。

秋，公伐邾婁。

冬，天王使凡伯來聘。書者，喜之也。古者

諸侯有較德殊風異行，^⑦天子聘問之，當北面稱臣，受之

於大廟，所以尊王命，歸美於先君，不敢以己當之。戎

^①「問」，阮校：「定二年疏引此注「問」作「言」，當據正。

下文云「因言」可證。若作「問」，則與「指問邑也」

「問」字複矣。」

^②「故」，阮校：「定二年疏引此注「故」作「欲」，當據

正。」

^③「尸」，原作「戶」，今據宋本《釋文》改。

^④「式」，原脫，今據宋本《釋文》補。

^⑤「公」，阮校：「宋本「公」作「分」，《釋文》出「分別」

二字，當據以訂正。」

^⑥「孝」，阮校：「鄂本、宋本「孝」作「考」，當據正。」

^⑦「較」，阮校引惠棟曰：「較」讀爲「覺」，《詩》曰：「有覺德行。」

伐凡伯于楚丘以歸。凡伯者何？上言聘，此

言伐，嫌其異，故執不知問。【疏】注「上言聘此言伐」。

○解云：謂聘伐辭異，嫌其非一人也。天子之大夫也。此聘也，其言伐之何？據出聘與郊，柳異，

不得言伐也。問伐加之者，辟問輕重兩舉之。【疏】注

「據出」至「伐也」。○解云：昭二十三年「晉人圍郊」，傳

云：「郊者何？天子之邑也。曷爲不繫于周？」^①不與

伐天子也。「宣元年」晉趙穿帥師侵柳，傳云：「柳者何？

天子之邑也。曷爲不繫乎周？不與伐天子也。」然則

郊、柳皆是天子之邑，猶可言其侵圍，今此聘大夫不應得

言伐，故難之。先言郊者，文便言之，故不次也。○注

「問伐」至「舉之」。○解云：桓十二年「及鄭師伐宋。丁

未，戰于宋」，傳云「戰不言伐，此其言伐何」，彼問輕重兩

舉不言之，故此言之者，^②辟問輕重兩舉之。執之也。

執之則其言伐之何？據執季孫隱如不言伐。

【疏】注「據執」至「言伐」。○解云：昭十三年平丘之會，

「晉人執季孫隱如以歸」是也。大之也。尊大王命，責

當死位，故使與國同。曷爲大之？據王子突繫諸

人。【疏】注「據王」至「諸人」。○解云：莊六年「春，王三

月，王人子突救衛」，傳云「王人者何？微者也。子突者

何？貴也。貴則其稱人何？繫諸人也」是也。等是王

臣，一伸一屈，故難之。不與夷狄之執中國也。

因地不接京師，故以中國正之。中國者，禮義之國也。

執者，治文也。君子不使無禮義制治有禮義，故絕不言

執，正之言伐也。執天子大夫而以中國正之者，執中國

尚不可，況執天子之大夫乎？所以降夷狄，尊天子，爲

順辭。其地何？據執季孫隱如不地。大之也。

順上伐文，使若楚丘爲國者，猶慶父伐於餘丘也。不地

以衛者，天子大夫衛王命至尊，顧在所諸侯，有出入所在

赴其難，當與國君等也。錄以歸者，惡凡伯不死位，以辱

王命也。○難，乃旦反。惡，烏路反。【疏】注「順上」至

「命也」。○解云：莊二年「夏，公子慶父帥師伐於餘丘」，

傳云「於餘丘者何？邾婁之邑。曷爲不繫乎邾婁？國

之也」者是。

① 「于」，原作「乎」，今據昭公二十三年傳及京都本、再造善本、中華本改。

② 「故」下，杉浦校：「單疏鈔本、單疏殘本有「知」字。按：此從單疏本作「故知此言之者」爲是。」

八年，春，宋公、衛侯遇于垂。宋公序上

者，時衛侯要宋公，使不虞者為主，明當戒慎之。無王者，^①遇在其間，置上則嫌爲事出，置下則嫌無天法可以制月，文不可施也。○要，一遙反。爲事，于僞反，下「欲爲魯」、「爲小國」、「爲桓」并年未注皆同。【疏】注「宋公」至「其間」。○解云：何氏以爲，會盟則以大小爲序，遇則以不虞爲先，故如此解，是以莊三十二年經云「夏，宋公、齊侯遇于梁丘」，齊在宋下，是其一隅耳。○注「置上」至「事出」。○解云：若言「八年，春，王、宋公、衛侯遇于垂」，即嫌桓王亦與之遇，^②故言「則嫌爲事出」。事，謂遇事也。或者嫌爲遇事之故出此王，故云則嫌爲遇事出也。○注「置下」至「施也」。○解云：天法，即春是也。

三月，鄭伯使宛來歸郕。宛者何？鄭之微者也。郕者何？鄭湯沐之邑也。

天子有事于泰山，諸侯皆從泰山之下，諸侯皆有湯沐之邑焉。有事者，巡守祭天告至之禮也，當沐浴絜齊以致其敬，故謂之湯沐邑也，所以尊待諸侯而共其費也。禮，四井爲邑，邑方二里，東方二州四百二十國，凡爲邑廣四十里，袤四十二里，取足舍止共稟穀

而已。歸郕書者，甚惡鄭伯無尊事天子之心，專以湯沐邑歸魯，背叛當誅也。錄使者，重尊湯沐邑也。王者所以必巡守者，天下雖平，自不親見，猶恐遠方獨有不得其所，故三年一使三公巡視，五年親自巡守。巡猶循也，守猶守也，循行守視之辭，亦不可國至人見爲煩擾，故至四嶽，足以知四方之政而已。《尚書》曰「歲二月，東巡守，至于岱宗，柴，望秩于山川，遂覲東后。協時月正日，同律度量衡。修五禮，五玉、三帛、二生、一死贄，如五器，卒乃復。五月，南巡守，至于南嶽，如岱禮。八月，西巡狩，^③至于西嶽，如初。十有一月，朔巡守，至于北嶽，如西禮。還至嵩，如初禮。歸，格于禰祖，用特」是也。○宛，於阮反，人名也。一音烏卯反，又烏勉反。郕，彼命反，又音丙，鄭邑，《左氏》作「昉」。從，才用反。巡守，手又反，本又作「狩」，下除「猶守」、「守視」以外同。絜齊，

①「王」，余本、京都本、再造善本作「主」。

②「即」，單疏殘本作「則」。

③「巡狩」，《釋文》曰：「巡守，本又作狩。」注言「王者所以必巡守者」，又言「守猶守也」、「東巡守」、「南巡守」、「朔巡守」，皆作「巡守」，則此「狩」字亦當作「守」。

側皆反，本多即作「齋」字，後放此，更不音。而共，音恭，下同。費，芳味反。廣，古曠反。衰，音茂。稟，古老反。甚惡，烏路反，下同。背，步內反。使，^①所吏反。行，下孟反。量，音亮。贊，音至。嵩，夙忠反。格，本又作「假」，同，古百反。欄，乃禮反，本又作「藝」。【疏】宛者何。○解云：欲言大夫，經不言氏，欲言微者，書名見經，故執不知問。○「邠者何」。○解云：欲言魯物，先無取文，欲言鄭邑，於魯言歸，故執不知問。○注「歸邠」至「誅也」。○解云：正以將所傳聞之世，外小惡不書故也。○注「錄使」至「其所」。○解云：正決哀八年「齊人歸譚及鄆」之屬，不錄使故也。○注「故三」至「紂陟」。○解云：《書傳》文。○注「五年」至「而已」。○解云：《堯典》文。○注「尚書」至「是也」。○解云：惟是一字注者言之，^③以上皆《堯典》文也。鄭注：「歲二月者，正歲建卯之月也。巡守者，行視所守也。岱宗者，東嶽名也。柴者，考績燎也。望秩于山川者，遍以尊卑祭之。五嶽視三公，四瀆視諸侯，其餘小者或視卿大夫，或視伯、子、男矣。秩，次也。東后，東方之諸侯也。協正四時之月數及日名，備有失誤者。度，丈尺。量，斗斛。衡，斤兩。五禮，公、侯、伯、子、男朝聘之禮矣。五玉，瑞節，執之曰

瑞，陳列曰玉也。三帛，所以薦玉也。受瑞玉者，以帛薦之。帛必三者，高陽之後用赤繒，高辛氏之後用黑繒，其餘諸侯皆用白繒，周禮改之爲纁也。二生，一死贊者，羔、鴈生也，卿大夫所執；雉死，士所執也。如者，以物相授與之。言授贊之器有五，卿、大夫、上士、中士、下士也。器各異飾，飾未聞所用也。周禮改之飾羔鴈、飾雉，執之而已，皆去器。卒，已也。復，歸也。巡守禮畢，乃反歸矣。每歸，用特牛告于文祖矣。^④五月不言初者，^⑤以其文相近。八月、十一月言初者，文相遠故也。」

^①「使」，原作「便」，今據京都本、再造善本、中華本、閣本改。

^②「注五年至而已」，杉浦校：「單疏鈔本、單疏殘本作『注五年親自巡守者』。按：下文云『堯典文』，則標注當如此本。」

^③「惟是一字」，阮校：「按：『一字』當作『也』，謂注中『是也』二字乃何休語，自『歲二月』至『用特』，則《尚書》語矣。」

^④「牛」，京都本、再造善本作「牲」。

^⑤「初」，原作「於」。阮校引浦鏜云：「『初』誤『於』。」杉浦校：「單疏鈔本、單疏殘本『於』作『初』。」今據改。

庚寅，我入邲。其言入何？據上書歸，

取邑已明，無事復書入也。○復書，扶又反，下「故復」

同。難也。入者，非已至之文，難辭也。此魯受邲，與

鄭同罪當誅，故書入，欲爲魯見重難辭。○難也，乃且

反，一音如字，注及下同。見重，賢徧反，下同。【疏】注

「入者」至「之文」。○解云：直就而入之，非是將歸之辭也。其日何？據取邑不日。【疏】注「據取邑不日」。

○解云：即隱四年「春，王二月，莒人伐杞，取牟婁」之屬

也。難也。以歸後乃日也。言時重難，不可即入，至

此日乃入。其言我何？據吳伐我，以吳伐，^①故言

我。【疏】注「據吳」至「言我」。○解云：在哀八年春。

言我者，非獨我也，自入邑不得言我，有他人在其

中乃得言我，故能起其非獨我。齊亦欲之。時齊與

鄭、魯比聘會者，亦欲得之，故以非獨我起齊惡。齊惡

起，則魯蒙欲邑，見於惡愈矣。【疏】注「時齊」至「得之」。

○解云：即上三年冬「齊侯、鄭伯盟于石門」，六年夏「公

會齊侯盟于艾」，七年夏「齊侯使其弟年來聘」，九年「冬，

公會齊侯于邲」，十年「春，王二月，公會齊侯、鄭伯于中

丘」之屬是也。

夏，六月，己亥，蔡侯考父卒。

辛亥，宿男卒。宿本小國，不當卒，所以卒而

日之者，《春秋》王魯，以隱公爲始受命王，宿男先與隱公

交接，故卒褒之也。不名不書葬者，與微者盟功薄，當褒

之爲小國，故從小國例。【疏】注「宿男」至「交接」。○解

云：即上隱公元年秋，「九月，及宋人盟于宿」是也。○注

「爲小」至「國例」。○解云：即上七年春「滕侯卒」，不書

其葬，傳云「何以不名？微國也」者是。

秋，七月，庚午，宋公、齊侯、衛侯盟于

瓦屋。

八月，葬蔡宣公。卒何以名而葬不

名？卒從正，卒當赴告天子，君前臣名，故從君臣

之正義言也。而葬從主人。至葬者有常月可知，不

赴告天子，故自從蔡臣子辭稱公。卒何以日而葬

不日？卒赴，赴天子也。緣天子閔傷，欲其知之。

又臣子疾病，不能不具以告。而葬不告。不告天子

①「吳」，原作「日」，今據單疏鈔本、單疏殘本、鄂本改。

也。發傳於葬者，從正也。【疏】注「發傳」至「正也」。○解云：言從正者，謂卒日葬不日者，是卒葬之正法。三年經云「癸未，葬宋繆公」，而書日，即失其正也。其衛桓公葬不發傳者，桓公者初則見弑于州吁，終有簡慢之失，侵小國之略，^①故發傳於此。

九月，辛卯，公及莒人盟于包來。公

曷爲與微者盟？據與齊高偃盟諱之。○包來，《左

氏》作「浮來」。偃，音兮。【疏】注「據與」至「諱之」。○

解云：莊二十二年秋，「及齊高偃盟于防」，傳云「齊高偃者何？貴大夫也。曷爲就吾微者而盟？公也。公則曷爲不言公？諱與大夫盟也」是也。稱人則從不

疑也。從者，隨從也，實莒子也。言莒子，則嫌公行微不肖，諸侯不肯隨從公盟，而公反隨從之，故使稱人，則隨從公不疑矣。隱爲桓立，狐壤之戰不能死難，又受湯沐邑，卒無廉恥，令輦有緣諂，爲桓所疑，故著其不肖，僅能使微者隨從之耳，蓋痛錄隱所以失之，又見獲受邑，皆諱不明，因與上相起也。○行，戶孟反。難，乃旦反。令，力呈反。僅，其靳反。^②【疏】注「言莒」至「桓立」。○解云：行微者，其行卑微。不肖者，鄭注《昏禮·記》云

「不肖者，不似」是也。○注「狐壤」至「廉恥」。○解云：^③在上六年春。○注「令輦」至「失之」。○解云：皆以其行微不肖，卒無廉恥故也。○注「又見」至「起也」。○解云：見獲諱不明者，即言輪平是也。受邑諱不明者，即「庚寅，我入邲」是也。何者書日入者，見其重難。言我者，見其非獨我故也。言因與上相起者，此經著其不肖，起其實甚惡矣。

螟。先是有狐壤之戰，中丘之役，又受邲田，煩擾

之應。○應，應對之應。【疏】注「有狐壤之戰」。○解云：在六年。○注「中丘之役」。○解云：在上七年。

冬，十有二月，無駭卒。此展無駭也，

①「略」，阮校引浦鏜云：「疑作「咎」。」

②「靳」，宋本《釋文》作「靳」。

③「注狐壤至廉恥」○解云：，杉浦校：「單疏鈔本、單疏殘本作「注狐壤之戰者」，無「○解云」。按：下云「在上六年春」，則此標注當作「狐壤之戰者」。注疏本改作「至廉恥」○解云：，非也。又注中「不能死難」至「無廉恥」，乃何休語矣。」

何以不氏？莊公子彊卒，^①氏公子。疾始滅也，

故終其身不氏。嫌上貶主起人為滅，不為疾始，故復為疾始滅，終身貶之，足見上貶為疾始滅。【疏】「此展

無駭也」。○解云：正以上二年師展無駭，^②故此弟子因難之。○注「據公子彊卒」。○解云：在五年。

九年，春，天王使南季來聘。

三月，癸酉，大雨震電。何以書？記

異也。何異爾？不時也。震雷電者，陽氣也。

有聲名曰雷，無聲名曰電。周之三月，夏之正月，雨當水雪雜下，雷當聞於地中，其雉雖^③電未可見，而大雨震電，此陽氣大失其節，猶隱公久居位不反於桓，失其宜也。日者，一日之中也。凡災異一日者日，歷日者月，歷月者時，歷時者加自文為異。發於九年者，陽數可以極，而不還國於桓之所致。^④○震電，徒練反。雉，古豆反。

見，賢徧反。【疏】注「雷當」至「中也」。○解云：《月令》

二月「雷乃發聲」，故知正月之時聞於地中矣。其雉雖雞乳，雖起季冬之月，此時猶然，故得言此也。亦有一本云「雷當聞於雉雉」，誤也。○注「凡災」至「所致」。○解云：一日者日，即此文是。歷日者月，即桓八年「冬，十

月，雨雪」之屬是也。歷月者時，即桓元年「秋，大水」之屬是也。歷時者加自文為異者，即文二年「自十有二月不雨，至于秋七月」之屬是也。

庚辰，大雨雪。何以書？記異也。

^①「莊」，阮校：「鄂本、宋本『莊』作『據』，疏中標注亦作『據公子彊卒』，當據正。」

^②「正以上二年師展無駭」，阮校：「閩本『師』下剝擠

「云」字，監、毛本排入。」杉浦校：「單疏鈔本、單疏殘本『師』下有『解云』二字，是。當讀『師解云展無駭』為句。」

^③「雷當聞於地中其雉雉」，阮校：「按解云：『一本云『雷當聞於雉雉』，誤也。』武億云：『《夏小正》『雉震』條：『正月必雷，雷不必聞，惟雉為必聞之。何以謂之？雷則雉震，相識以雷。』注文蓋本此。疏即牽引非倫，又云『一本云雷當聞於雉雉』，皆謬言也。」

^④「陽數可以極而不還國於桓之所致」，阮校：「按：『可』字疑衍，『以』、『已』通。」「還」，京都本、再造善本作「遷」。

何異爾？俶甚也。俶，始怒也。始怒甚，猶大甚也。^①蓋師說以爲平地七尺雪者，^②盛陰之氣也。八日之間，先示隱公以不宜久居位，而繼以盛陰之氣大怒，此桓將怒而弑隱公之象。○雨，于付反。俶甚，尺叔反，始也。大甚，音泰。

俠卒。俠者何？吾大夫之未命者也。以無氏而卒之也。未命所以卒之者，賞疑從重。

無氏者，少略也。○俠卒，音協，《穀梁》云「所俠」。少，詩照反。【疏】「俠者何」。○解云：欲言大夫，經不書氏，欲言微者，而記其卒，故執不知問。○注「以無」至「略也」。○解云：無氏，降於大夫，書卒，降於微者，故知其未命耳。

夏，城郎。

秋，七月。

冬，公會齊侯于邠。○于邠，《左氏》作「防」。

十年，春，王二月，公會齊侯、鄭伯于中丘。月者，隱前爲鄭所獲，今始與相見，故危錄內，明君子當犯而不校也。【疏】注「犯而不校」。○解云：謂校

接之交，不謂爲報也。^③

夏，鞏帥師會齊人、鄭人伐宋。此公子翬也，^④何以不稱公子？據楚公子嬰齊貶，後復稱公子。○復，扶又反，又音服。【疏】「此公子翬」。

○解云：^⑤正以上四年師解云言公子翬，故此弟子因以難之。○注「據楚」至「公子」。○解云：成二年「公及楚

①「俶始怒也始怒甚猶大甚也」，阮校：「按：此當作「俶始也始甚猶大甚也」，二「怒」字皆衍文。《釋文》

「俶甚，尺叔反，始也」，不云「始怒也」可證。下文「盛陰之氣大怒，桓將怒而弑隱之象」，此因「始甚」之文申說之辭，淺人蓋據此加「怒」字於上矣。」

②「七尺」，阮校：「浦鏜云：「一」誤「七」，從《六經正誤》校。」

③「謂校接之交不謂爲報也」，阮校：「按：當作「謂交接之交，不爲報也」。」

④「此公子翬也」，阮校：「《隸釋》載漢石經此上有「十年」二字，蓋雖不載經，猶紀某公年數以相識別。考其殘碑，可想見其全經體式也。」

⑤「此公子翬」○解云：「，杉浦校：「單疏鈔本作「此公子翬也者」，無「○解云」，單疏殘本亦然。按：單疏本標注「翬」下有「也」字，與此傳合，此當據正。」

人「已下」盟于蜀，彼傳云「此楚公子嬰齊也，其稱人何？得壹貶焉爾」，至成六年書「楚公子嬰齊率師伐鄭」是也。貶，曷爲貶？隱之罪人也，故終隱之篇貶也。嫌上一貶可移於他事者，故終隱之篇貶之，明爲隱貶，所以起隱之罪人也。○明爲，于僞反，下「先爲」同。【疏】注「嫌上」至「人也」。○解云：上一貶，謂四年時也。

六月，壬戌，公敗宋師于菅。○公敗，必

邁反，凡臨佗曰敗，^①皆同此音。菅，古顏反。辛未，

取郕。○郕，古報反。辛巳，取防。取邑不日，

此何以日？據取闕不日也。○闕，苦暫反。【疏】注

「據取闕不日也」。○解云：即昭三十二年春王正月「取

闕」是也。一月而再取也。欲起一月而再取，故曰。

何言乎一月而再取？據取渚東田及沂西田，亦

一月再取兩邑，不日。○渚，火號反，又音郭。沂，魚依

反。【疏】注「據取」至「不日」。○解云：哀二年「春，王二

月，季孫斯、叔孫州仇、^②仲孫何忌帥師伐邾婁，取渚東

田，及沂西田」是也。甚之也。甚魯因戰見移生事，^③

利心數動。○數，所角反。內大惡諱，此其言甚之何？《春秋》錄內而略外，於外大惡書，小惡不書，於內大惡諱，小惡書。明取邑爲小惡，一月再取，小惡中甚者耳，故書也。於內大惡諱，於外大惡書者，明王者起，當先自正，內無大惡，然後乃可治諸夏大惡，因見臣子之義，當先爲君父諱大惡也。內小惡書，外小惡不書者，內有小惡，適可治諸夏大惡，未可治諸夏小惡，明當先自正，然後正人。小惡不諱者，罪薄恥輕。敗宋師日者，見結日偏戰也。不言戰者，託王於魯，故不以敵辭言之，所以彊王義也。○見，賢徧反，下同。

秋，宋人、衛人入鄭。

①「敗」，原作「貶」，今據余本、宋本《釋文》改。

②「仇」，原作「仇」。杉浦校：「單疏鈔本、單疏殘本、毛本作「仇」。按：「仇」當作「仇」。今據哀公二年經及杉浦校改。

③「移」，阮校：「鄂本「移」作「利」，當據正。」

宋人、蔡人、衛人伐載，^①鄭伯伐取之。

其言伐取之何？據國言滅，邑言取。又徐人取舒

不言伐。【疏】注「據國言滅」。○解云：僖五年「滅弦」之

屬是也。○注「又徐」至「言伐」。○解云：在僖三年夏。

易也。其易奈何？因其力也。因誰之

力？因宋人、蔡人、衛人之力也。載屬爲上

三國所伐，鄭伯無仁心，因其困而滅之，易若取邑，故言

取，欲起其易，因上伐力，故同其文言伐，就上載言取之

也。不月者，移惡上三國。○易，以豉反，下及注同。

屬，音燭，適也。【疏】注「不月」至「三國」。○解云：正以

滅國例月故也。

冬，十月，壬午，齊人、鄭人人盛。日者，

盛，魯同姓，於隱篇再見入者，明當憂錄之。○人盛，《左

氏》作「邲」，後皆放此。【疏】注「日者」至「錄之」。○解

云：正以入例時，傷害多則月，今此云日，故解也。云「再

見入」者，謂五年「秋，衛師入盛」，及此爲再入者也。

十有一年，春，滕侯、薛侯來朝。其言

朝何？據內言如。【疏】注「據內言如」。○解云：即

成十三年春「公如京師」之屬是也。諸侯來曰朝，大

夫來曰聘。傳言來者，解內外也。《春秋》王魯，王者

無朝諸侯之義，故內適外言「如」，外適內言「朝聘」，所以

別外尊內也。不言朝公者，禮，朝受之於大廟，與聘同

義。○別，彼列反。【疏】注「傳言來者解內外也春秋至

外也」。^②○解云：謂內鄉外不言來，外鄉內乃言來。今

言諸侯來曰朝，大夫來曰聘者，據外鄉內言之，故云解內

外也。○注「與聘同義」。○解云：即上七年夏「齊侯使

其弟年來聘」，注云「不言聘公者，禮，聘受之於大廟，孝

子謙，不敢以己當之，歸美於先君」是也。其兼言之

何？據鄧、穀來朝不兼言朝。【疏】注「據鄧」至「言

朝」。○解云：桓七年「夏，穀伯綏來朝。鄧侯吾離來朝」

是也。微國也。略小國也。稱侯者，《春秋》託隱公以

爲始受命王，滕、薛先朝隱公，故褒之。已於儀父見法，

①「載」，阮校：「按：《漢書·五行志》作『戴』。」

②「注傳言來者解內外也春秋至外也」，阮校：「按：下五字衍，何校本無。」杉浦校：「單疏鈔本、單疏殘本作『注傳言來者解內外也者』，無『春秋至外也』。」

復出滕、薛者，儀父盟功淺，滕、薛朝功大，宿與微者盟功尤小，起行之當各有差也。滕序上者，《春秋》變周之文，從殷之質，質家親親，先封同姓。○見法，賢徧反，年末注同。復出，扶又反，下文「不復」，注「故復」同。

夏，五月，公會鄭伯于祁黎。○祁黎，祁

音巨之反，又上之反。黎音力兮反，又力私反。《左氏》作「時來」。

秋，七月，壬午，公及齊侯、鄭伯入許。

日者，危錄隱公也，為弟守國，不尚推讓，數行不義，皇天降災，諂臣進謀，終不覺悟。又復構怨人許，危亡之釁，外內並生，故危錄之。○為弟，于偽反，年末注同。數，所角反。釁，許靳反。【疏】注「日者」至「降災」。○解云：上二年「夏，五月，莒人入向」，彼注云：「人例時，傷害多則月。」此書日，故決之。○注「諂臣進謀」。○解云：上四年傳云「百姓安子，諸侯說子」是也。

冬，十有一月，壬辰，公薨。何以不書

葬？據莊公書葬。【疏】注「據莊公書葬」。○解

云：即閔元年「夏，六月，辛酉，葬我君莊公」是也。隱

之也。何隱爾？弑也。為桓公所弑。○弑，申

志反，注及下並同。弑則何以不書葬？^①據桓公

書葬。【疏】注「據桓公書葬」。○解云：桓十八年冬十二

月，「己丑，葬我君桓公」是也。桓亦被弑而書葬，故難

之。《春秋》君弑賊不討，不書葬，以為無臣

子也。道《春秋》通例，與文、武異。【疏】注「道春秋」至

「武異」。○解云：言文、武之時，周之盛德，既無諸侯相

犯，寧有臣子弑君父者？是以古典無責臣子討賊之義。

《春秋》據亂而作，時則有之，因設其法，故言與文、武異。

子沈子曰：「君弑，臣不討賊，非臣也。不

復讎，^②非子也。葬，生者之事也。《春秋》

君弑賊不討，不書葬，以為不繫乎臣子

①「弑也弑則何以不書葬」，阮校：「漢石經『弑』皆作『試』。《釋文》作『殺也』，云『申志反，注及下並同』。」

今按：宋本《釋文》作「弑也」，與阮校所據本異。

②「不復讎」，阮校：「唐石經、鄂本皆作『子不復讎』，此脫『子』字。」

也。」^①子沈子，後師。^②明說此意者，明臣子不討賊當絕，君喪無所繫也。沈子稱子冠氏上者，著其爲師也。不但言子曰者，辟孔子也。其不冠子者，他師也。○冠氏，古亂反，下同。【疏】注「沈子」至「師也」。○解云：知子沈子爲己師者，正下文宣五年傳云「子公羊子」同故也。○注「不但」至「他師也」。○解云：即昭十一年傳云「子曰『我乃知之矣』」之屬是也。^③公薨何以不地？據莊公薨于路寢。不忍言也。不忍言其僵尸之處。○僵，居良反。處，昌慮反。【疏】注「不忍」至「之處」。○解云：不終天年者，非人所欲，故謂被殺之處爲僵尸之處，讀如齊人強之強，非強弱之強。隱何以無正月？據六年輪平不易。^④隱將讓乎桓，故不有其正月也。嫌上諸成公意，適可見始讓，不能見終，故復爲終篇去正月，明隱終無有國之心，但桓疑而弑之。公薨主書者，爲臣子恩痛之。他國自從王者恩例錄也。○去，起吕反。【疏】注「嫌上」至「錄也」。○解云：即元年傳曰「公何以不言即位？成公意」，「歸賵」之下，傳云「然則何言爾？成公意」。二年「子氏薨」之下，傳云「何以不書葬？成公意」。五年「考仲子之宮」下，

傳云「然則何言爾？成公意」。非止一處，故言諸也。^⑤

監本附音春秋公羊注疏隱公卷第三

①「以爲」，阮校：「漢石經無『以爲』二字。」

②「後師」，阮校：「蜀大字本作『己師』。解云『知子沈子爲己師者』，亦作『己』字，當據正。」

③「十一」，杉浦校：「單疏鈔本、單疏殘本作『十二』。按：此誤，當據單疏本訂正。」

④「不易」，阮校：「宋本、鄂本作『不月』，當據正。」

⑤「故言諸也以」，杉浦校：「單疏鈔本、單疏殘本、毛本無『以』字。此當作『故言諸也』。」

監本附音春秋公羊注疏桓公卷第四

起元年，盡六年

何休學

元年，春，王正月，公即位。^①繼弑君不言即位，此其言即位何？^②據莊公不言即

位。○繼弑，申志反，注皆同，二年放此。【疏】「繼弑君不言即位」。○解云：莊元年傳云「繼弑君，^③子不言即位」，而此不言子者，欲見桓無臣子之道，不念其君父故也。寧知不由桓非隱子，故不言子者，正見僖元年傳云「公何以不言即位？繼弑君，子不言即位。此非子，其稱子何？臣子一例也」。正以僖是閔兄而言子，故知桓公若有臣人之道，言子矣。○注「據莊」至「即位」。○解云：即莊元年經云「元年春，王正月」，不言公即位是也。如其意也。弑君欲即位，故如其意，以著其惡，直而不顯，諱而不盈。桓本貴當立，所以為篡者，隱權立，桓北面君事隱也。即者，就也。先謁宗廟，明繼祖也。還

之朝，正君臣之位也。事畢而反凶服焉。【疏】注「直而」至「不盈」。○解云：繼弑君者無即位之文，今此書其即位，直是桓弑，但不顯道其弑，故曰直而不顯也。言諱而不盈者，桓之弑隱，是為內諱，而書其即位，以見其弑，不盈滿其諱文，故曰諱而不盈也。○注「先謁」至「服焉」。○解云：皆時王之禮也。

三月，公會鄭伯于垂。桓公會皆月者，危之也。桓弑賢君，篡慈兄，專易朝宿之邑，無王而行，無仁

^①「元年春王正月公即位」，王引之《經義述聞》：「《春秋繁露·玉英篇》：『桓之志無王，故不書王。其志欲立，故書即位。書即位者，言其弑君兄也。不書王者，以言其背天子。是故隱不言立，桓不言王者，從其志，以見其事也。』先言不書王，後言書即位，皆指元年而言也。隱不言立，桓不言王，亦謂隱、桓之元年也。據此，則「元年春」下無「王」字，與《左氏》、《穀梁》不同。何注「三年春正月」曰：「無王者，以見桓無王而行也。」不注於元年而注於三年，則「元年春」下有「王」字，與《左氏》、《穀梁》同，所見本異也。」
^②「此」，原重文，今據余本、京都本，再造善本刪。
^③「繼弑君」，阮校：「何校本無「繼」字，與莊元年傳合。」

義之心，與人交接，則有危也，故爲臣子憂之。不致之者，爲下去王，適足以起無王，未足以見無王罪之深淺，故復奪臣子辭，成誅文也。○爲下，于僞反，下「爲告」同。去，起呂反。見，賢遍反。故復，扶又反，下同。【疏】注「桓公」至「危之也」。○解云：即此文，及下二年「三月，公會齊侯」已下「于稷」，三年「春，正月，公會齊侯于贏」，六年「夏，四月，公會紀侯于成」之屬是也。而十年「秋，公會衛侯于桃丘，弗遇」，不書月者，彼是公欲要衛侯，衛侯不肯見，公以非禮動，見拒有恥，是以不復見其危矣。○注「不致」至「文也」。○解云：即下二年注云：「凡致者，臣子喜其君父脫危而至。」今不致之，若其受誅殺，故曰奪臣子辭成誅文也。

鄭伯以璧假許田。其言以璧假之何？據實假不當持璧也。易之也。易之則其言假之何？爲恭也。爲恭孫之辭，使若暫假借之辭。○孫，音遜。曷爲爲恭？據取邑不爲恭敬辭。【疏】注「據取」至「敬辭」。○解云：即哀八年「齊人取謹及僎」之屬是。有天子存，則諸侯不得專地也。許田者何？地皆不得專，而此獨爲恭辭，

疑非凡邑，故更問之。魯朝宿之邑也。諸侯時朝乎天子，天子之郊，諸侯皆有朝宿之邑焉。時朝者，順四時而朝也，緣臣子之心，莫不欲朝朝莫夕。王者與諸侯別治，勢不得自專朝，故即位比年使大夫小聘，三年使上卿大聘，四年又使大夫小聘，五年一朝。王者亦貴得天下之歡心，以事其先王，因助祭以述其職，故分四方諸侯爲五部，部有四輩，輩主一時。《孝經》曰「四海之內，各以其職來助祭」，《尚書》曰「群后四朝，敷奏以言，明試以功，車服以庸」是也。宿者，先誠之辭。古者天子邦畿千里，遠郊五百里。諸侯至遠郊，不敢便入，必先告至，由如他國至竟而假塗也，皆所以防未然，謹事上之敬也。王者以諸侯遠來朝，亦加殷勤之禮以接之。爲告至之須，^①當有所住止，故賜邑於遠郊，其實天子地，諸侯不得專也。桓公無尊事天子之心，專以朝宿之邑與鄭，背叛當誅，故深諱使若暫假借之者，不舉假爲重，復舉上會者，方諱言許田。不舉會，無以起從魯

①「須」，阮校：「宋本作「頃」，當據正。按：二年注云：「俄者，謂須臾之間，創得之頃也。」「頃」字正此意。」

假之也。○朝朝，上如字，下直遙反。莫，音暮。治，直吏反。背叛，音佩，凡「背叛」之類皆放此。【疏】注「故即位」至「小聘」。○解云：此《孝經說》文。《聘義》亦云「天子制諸侯，比年小聘，三年大聘，相厲以禮也」，是與此合。○注「五年一朝」。○解云：《虞傳》文。○注「尚書曰」至「庸是也」。○解云：此逸書也。^①言群后四朝者，謂諸侯順四時而朝也。敷奏以言者，謂諸侯來朝之時，備奏以言語也。言明試以功者，國功曰功，謂明試以國事之功也。言車服以庸者，民功曰庸，若欲賜車服之時，以其治民之功高下矣。○注「宿者先誠之辭」。○解云：宿，可以轉訓為「肅」也。是以《祭統》云「先期旬有一日，宮宰宿夫人，夫人亦散齊七日，致齊三日」，鄭注云「宮宰，守宮官也。宿，讀為肅，肅猶戒也，戒輕肅重」是也。此魯朝宿之邑也，則曷為謂之許田？諱取周田也。諱取周田，則曷為謂之許田？繫之許也。曷為繫之許？近許也。此邑也，其稱田何？田多邑少稱田，邑多田少稱邑。分別之者，古有分土無分民，明當察民多少，課功德。○近，附近之近。別，彼列反。【疏】「諱取

周田也」。○解云：謂魯人諱取周田而專用之。「近許也」。又云：②《魯頌》云：「居常與許，復周公之宇。」以此言之，似魯國界內舊自有許，何言近許而繫之許也？彼注云：「常，許，魯南鄙，西鄙。」此在王圻之內，則非此許也。○「田多」至「稱邑」。○解云：田多邑少稱田者，謂邑外之田多，邑內家數少，如此之時則稱田，即此是也。言邑多田少稱邑者，謂邑內家數多，而邑外之田頃畝少，如此之時則稱邑，即哀八年「齊人取謹及僇」是也。○注「分別」至「功德」。○解云：知古有分土無分民者，正以《詩》云「誓將去汝，適彼樂土」，《論語》云「四方之民襁負其子而至矣」，皆是樂就有德之義故也。

夏，四月，丁未，公及鄭伯盟于越。○

越，本亦作「粵」，音同。【疏】「夏四月」至「于越」。○解云：所以日者，正以十年冬，「齊侯、衛侯、鄭伯來戰于

①「逸書」，阮校引段玉裁云：「按：『逸書』二字，當作『堯典文』三字。」

②「近許也又云」，阮校引浦鏜云：「當作『○近許也○解云』。」杉浦校：「單疏鈔本、單疏殘本『又』作『解』。」

郎」，相負故也。

秋，大水。何以書？記災也。災傷二穀

以上，書災也。經曰「秋，大水，無麥苗」，傳曰「待無麥，然後書無苗」是也。先是桓篡隱，百姓痛傷，悲哀之心既蓄積，而復專易朝宿之邑，陰逆而與怨氣并之所致。○以上，時掌反，凡言「以上」皆放此。蓄，敕六反。【疏】注「災傷」至「之邑」。○解云：自「經曰」以下，皆是莊七年傳文也。①彼傳云「曷爲先言無麥，而後言無苗？一災不書，待無麥然後書無苗」，彼注「明君子」云云，「至麥苗獨書者，民食最重」是也。以此言之，則知此經災傷二穀以上，故不書穀名，直言大水而已。而莊二十八年經云「冬，築微。大無麥禾」，不兼言大水者，傳云：「冬，既見無麥禾矣，曷爲先言築微，而後言無麥禾？諱以凶年造邑也。」彼注云「諱使若造邑而後無麥禾者，惡愈也。此蓋秋大水所傷，②就築微下俱舉水，則嫌冬水」者是也。○注「陰逆」至「所致」。○解云：陰逆者，專易朝宿之邑是。怨氣者，百姓痛傷悲哀之心是也。

冬，十月。

二年，春，王正月，戊申，宋督弑其君

與夷，及其大夫孔父。賢者不名，故孔父稱字。

督，未命之大夫，故國氏之。③【疏】「及其大夫孔父」。○

解云：此經之下亦有注，云「賢者不名，故孔父稱字。督，

未命之大夫，故國氏之」者，但考諸舊本，悉無此注，且與

注違，則知有者衍文也。「及」者何？以公、夫人言

及，仲子微不得及君，上下大夫言及，知君尊亦不得及

臣，故問之。【疏】注「以公夫人言及」。○解云：即僖十

一年「夏，公及夫人姜氏會齊侯于陽穀」是也。○注「仲

子」至「及君」。○解云：隱元年秋，「天王使宰咺來歸惠

公仲子之賵」，傳云：「何以不言及仲子？仲子微也。」彼

注云「比夫人微，故不得並及公」是也。○注「上下」至

「問之」。○解云：哀六年「夏，齊國夏及高張來奔」，是國

①「皆」，杉浦校：「單疏鈔本作「智」，單疏殘本作

「知」。

②「大水」，阮校：「今注無「大」字。」

③「賢者不名故孔父稱字督未命之大夫故國氏之」，阮校：「疏本無此注，與何義不合，當是別家注竄入者。

解云：「考諸舊本，悉無此注，且與注違，則知有者衍文也。」按：與注違者，注云「督不氏者，起馮當國」，

此云「未命之大夫，故國氏之」，是與注違也。」

夏上大夫，高張下大夫。累也。累，累從君而死，齊人語也。弑君多矣，舍此無累者乎？曰：有。

仇牧、荀息皆累也。舍仇牧、荀息無累者乎？曰：有。叔仲惠伯是也。○舍此，音捨，下同。

【疏】「仇牧」至「曰有」。○解云：仇牧之事，在莊十二年秋。荀息之事，在僖十年春。○注「叔仲惠伯是也」。○

解云：應在文十八年，但成十五年傳乃言之。有則此

何以書？賢也。何賢乎孔父？據叔仲惠伯

不賢。【疏】注「據叔」至「不賢」。○解云：成十五年傳

云：「叔仲惠伯，傅子赤者也。文公死，子幼，公子遂謂叔仲惠伯曰：『君幼，如之何？』願與子慮之。」叔仲惠伯

曰：「吾子相之，老夫抱之，何幼君之有？」公子遂知其不可與謀，退而殺叔仲惠伯，弑子赤而立宣公。」彼注云：

「殺叔仲惠伯不書者，舉弑君爲重。叔仲惠伯事與荀息相類，不得爲累者，^①有異也，叔仲惠伯直先是殺爾，^②不

如荀息死之。」^③以此言之，則叔仲惠伯不可與謀而見殺，非衛君而死，《春秋》不賢之，是以不書，故此注云「叔仲

惠伯不賢」也。孔父可謂義形於色矣。以稱字見

先君死。○見先，賢遍反，下「形見」、「目見」、「斥見」、

「見恩」並同。下悉薦反。【疏】「孔父」至「色矣」。○解

云：孔父事君之正義，形見於顏色矣。其義形於色

奈何？督將弑殤公，孔父生而存，則殤公

不可得而弑也，故於是先攻孔父之家。大夫

稱家。父者，字也。禮，臣死，君字之。以君得字之，知

先攻孔父之家。○殤，式羊反。【疏】注「大夫稱家」。○

解云：即定十二年「孔子行乎季孫，三月不違，曰『家不藏

甲，邑無百雉之城』是也。○注「父者字也」。○解云：

《穀梁傳》文。○注「禮臣」至「家」。^④○解云：臣死，君

不名之，稱謚若字也者，出《玉藻》文。殤公知孔父

^①「不」，原作「下」，今據京都本、再造善本、中華本、閣本改。

^②「是」，阮校：「浦鏜云：『見』誤『是』。按：浦說是也，成十五年注作『見』。」杉浦校：「單疏鈔本、單疏殘本

「是」作『見』。」

^③「如」，原作「知」，今據成公十五年注及單疏殘本、京都本、再造善本、閣本改。

^④「注禮臣至家」，單疏殘本作「注禮臣云云」。阮校：「按：當作『至之家』。」

死，已必死，趨而救之，皆死焉。趨，走也。傳

道此者，明殤公知孔父賢而不能用，故致此禍。設使殤公不知孔父賢，焉知孔父死已必死？設使魯莊公不知季子賢，焉知以病召之？皆患安存之時則輕廢之，^①急

然後思之，故常用不免。○死焉，於虔反，注同。【疏】注

「設使」至「思之」。○解云：莊公三十二年傳云「莊公病，

將死，以病召季子。季子至，授之以國政，曰「寡人即不起此病，吾將焉致乎魯國」云云是也。○注「故常用不

免」。○解云：謂宋殤公不免死，魯莊公不免亂。孔父

正色而立於朝，則人莫敢過而致難於其君者，孔父可謂義形於色矣。內有其義而外形見

於顏色，孔子曰「君子正其衣冠，尊其瞻視，儼然人望而畏之」是也。重道義形於色者，君子樂道人之善。言及

者，使上及其君，若附大國以名通，明當封為附庸，不絕其祀，所以重社稷之臣也。督不氏者，起馮當國。不舉

馮弑為重者，繆公廢子而反國，得正，故為之諱也。不得為讓者，死乃反之，非所以全其讓意也。○難，乃旦反。

嚴，魚檢反，本又作「儼」。重，直用反。故為，于偽反，傳「為隱諱」，下注「不為諱」，「為後」同。【疏】注「督不」至

「諱也」。○解云：《春秋》之內，當國不氏者，無知、州吁之屬是也。今宋督實戴公之孫，而不言公孫者，正欲起其取國與馮故也。○注「不得」至「意也」。○解云：昭二十年傳云「何賢乎公子喜時？讓國也」，昭三十一年傳云「何賢乎叔術，讓國也」。繆公之傳不言讓國者，死乃反之，非所以全其讓意也。

滕子來朝。

三月，公會齊侯、陳侯、鄭伯于稷，以成宋亂。內大惡諱，此其目言之何？目，見也。斥見其惡，言成宋亂。遠也。所見異辭，所聞異辭，所傳聞異辭。^②所以復發傳者，益師以臣

① 「輕」，原作「經」，今據京都本、再造善本、中華本、閣本改。

② 「所見異辭所聞異辭所傳聞異辭」，阮校：「《隸釋》載石經殘碑曰：「桓公二年，顏氏有「所見異辭所聞異」，以下缺。然則熹平立石者為《嚴氏春秋》，於此無「所見異辭」三句。何氏所注者為《顏氏春秋》，於此有之，漢石經於碑末列其同異。按：無此三句，則「遠也」、「隱亦遠矣」文相承，有則與哀十四年傳複出矣。」

見恩，此以君見恩，嫌義異也。所見之世，臣子恩其君父尤厚，故多微辭是也。所聞之世，恩王父少殺，故立煬宮不日，武宮日是也。所傳聞之世，恩高祖，曾祖又少殺，故子赤卒不日，子般卒日是也。○傳聞，直專反，注「傳聞」及下注「傳之」皆同。以復，扶又反，下「反復」同。少殺，所介反，下同。煬，餘亮反，舊始郭反。^①般，音班。【疏】注「所以復發傳者」。○解云：隱元年「公子益師卒」之下已有傳，故言復矣。○注「益師」至「尤厚」。○解云：彼以臣之故，欲見君恩之濃厚，故曰以臣見恩也。此以君之故，欲見君恩之厚薄，^②故曰以君見恩也。^③○注「故多微辭」。○解云：定元年傳云「定、哀多微辭」，彼注云：「定公有王無正月，不務公室，喪失國寶。哀公有黃池之會，獲麟，故總言多。」是其定公有王無正月。得為微辭者，即定公元年傳云：「定何以無正月？正月者，正即位也。定無正月者，即位後也。」彼注云：「雖書即位于六月，實當如莊公有正月。」今無正月者，昭公出奔，國當絕，定公不得繼體奉正，故諱為微辭，使若即位於正月後，故不書正月者是也。其不務公室者，即定二年：「冬，十月，新作雉門及兩觀。其言新作之何？修大也。修舊不書，此何以書？譏。何譏爾？不務乎公室也。」彼

注云「務，勉也。不務公室，亦可施於久不修，亦可施於不務如公室之禮，微辭也」者是也。其喪國寶得為微辭者，^④定公八年「盜竊寶玉大弓」，傳云：「寶者何？璋判白。」彼注云：「不言璋言玉者，起圭、璧、琮、璜、璋五玉盡亡之也。」傳獨言璋者，所以郊事天，尤重。書大弓者，使若都以國寶書，微辭也。謂之寶者，世世保用之辭是也。其黃池之會得為微辭者，哀十三年「公會晉侯及吳子于黃池」，傳云：「其言及吳子何？會兩伯之辭也。不與夷狄之主中國，則曷為以會兩伯之辭言之？重吳也。曷為重吳？吳在是，則天下諸侯莫敢不至也。」彼注云「不書諸侯者為微辭，使若天下盡會之，而魯侯蒙俗會之者，惡愈」是也。其獲麟得為微辭者，哀十四年「春，西狩獲麟」，不言為漢之將興，不言為周之將亡，故得為微辭也。

① 「鄭」，原作「彰」，今據余本、京都本，再造善本、閣本、宋本《釋文》改。

② 「厚薄」，阮校：「閩、監、毛本皆作『薄厚』，此誤倒。」

③ 「君見」，原作「見君」，此釋何注「益師以臣見恩」，此以「君見恩」，則當作「君見」。今據單疏鈔本、單疏殘本、京都本，再造善本、閣本改。

④ 「喪國寶」，阮校引浦鏜云：「『喪』下脫『失』。」

○注「所聞」至「武宮日是也」。○解云：立煬宮不日者，即定元年九月，「立煬宮」是也。立武宮日者，成十六年二月，^①辛巳，立武宮是也。《公羊》之義，失禮鬼神例日，故言此。○注「所傳」至「卒日是也」。○解云：子赤卒不日者，文十八年「冬，十月，子卒」，傳云：「何以不日？隱之也。何隱爾？弑也。弑則何以不日？不忍言也。」注云「所聞世臣子恩事王父深厚」，^②故不忍言其日，與子般異是也。其子般卒日者，莊三十二年「冬，十月，乙未，子般卒」，彼注云「日者，為臣子恩錄之也。殺不去日，見隱者降子赤也」者是。隱亦遠矣，曷為為隱諱？據觀魚諱。隱賢而桓賤也。宋公馮與督共弑君而立，諸侯會於稷，欲共誅之，受賂便還，令宋亂遂成。桓公本亦弑隱而立，君子疾同類相養，小人同惡相長，故賤不為諱也。古者諸侯五國為屬，屬有長，二屬為連，連有帥，三連為卒，卒有正，七卒為州，州有伯也。州中有為無道者，則長、帥、卒、正、伯當征之，不征則與同惡。當春秋時，天下散亂，保伍壞敗，雖不誅，不為成亂。今責其成亂者，疾其受賂也。加「以」者，辟直成亂也。○令，力呈反。相長，丁丈反，下同。帥，所類反，下同。為卒，子忽反，下皆同。【疏】注「據觀魚諱」。

○解云：隱五年「春，公觀魚于棠」，彼注云「實譏張魚而言觀。譏遠者，恥公去南面之位，下與百姓爭利，匹夫無異，故諱使若以遠觀為譏」者是也。○注「古者諸侯」至「有伯也」。○解云：《王制》及《春秋說》文。○注「加以」至「亂也」。○解云：下十四年傳云：「以者何？行其意也。」彼注云：「以己從人曰行，言四國行宋意也。」今此言以成宋亂者，若言公為三國所以，遂行其意，而成宋亂，非公本意，故云「加以者，辟直成亂也」。

夏，四月，取郕大鼎于宋。此取之宋，其謂之郕鼎何？據莒人伐杞取牟婁，後莒牟夷以牟婁來奔，不繫杞也。【疏】注「據莒」至「杞也」。○解云：隱四年「莒人伐杞取牟婁」，昭五年「莒牟夷以牟婁來奔」是也。器從名，從本主名名之。地從主人。從後所屬主人。器何以從名？地何以從主

①「成十六年」，阮校：「浦鏜云：『十』衍文。是也。」
「立武宮」在成公六年，作「成十六年」當誤。

②「事」，杉浦校：「單疏鈔本、單疏殘本、毛本作『痛』。」
按：文十八年注作「痛」。

人？據錯。【疏】注「據錯」。○解云：二理相違，故謂

之錯。器之與人，非有即爾。^①即，就也，若曰取

彼器與此人異國物。凡人取異國物，非就有取之者，皆持以歸爲有，爲後不可分明，故正其本名。【疏】「非有即

爾」。○解云：謂非有就而有之爾。宋始以不義取

之，故謂之郤鼎。宋始以不義取之，不應得，故王之

謂之郤鼎。^②如以義應得，當言取宋大鼎。郤本所以有

大鼎者，周家以世孝，天瑞之鼎，以助享祭。諸侯有世孝

者，天子亦作鼎以賜之。禮，祭，天子九鼎，諸侯七，卿大

夫五，元士三也。【疏】「宋始」至「取之」。○解云：謂滅

郤取之也。○注「如以義應得」者。○解云：謂若天賜之

也。○注「周家」至「享祭」者。○解云：謂殷衰之時，鼎

没于泗水，及武王克殷之後，鼎乃出見，故《漢書》云「鼎

於周出」是也。○注「禮祭」至「三也」。○解云：《春秋

說》文。而《膳夫》云「王日一舉，鼎十有二物」，何氏不取

也。而《士冠禮》、《士喪禮》皆一鼎者，《士冠》、《士喪》略

於正祭故也。至乎地之與人，則不然，凡取地皆

就有之，與器異也。俄而可以爲其有矣。俄者，

謂須臾之間，制得之頃也。^③諸侯土地各有封疆里數，今

日取之，然後王者起，興滅國，繼絕世，反取邑，不嫌不明，故卒可使以爲其有，不復追錄繫本主。○疆，居良反。然則爲取，可以爲其有乎？爲取，恣意辭

也。弟子未解，故云爾。○解，音蟹。曰：否。何

者？何者，將設事類之辭。若楚王之妻媼，無

時焉可也。媼，妹也。引此爲喻者，明其終不可名有

也。經不正者，從可知省文也。○媼，音胃，妹也。【疏】

「若楚」至「可也」。○解云：媼，音于貴反。以妹爲妻，終

無可時，似若器從今主之名，地取便爲己有，亦無可時，

故言此也。本更散亡，難可推據，^④未知此君名號云何。

^①「器之與人非有即爾」，王引之《經義述聞》：「據注，則傳文當作『非即有爾』。傳作『非即有爾』，故注云

『凡人取異國物，非就有』也。下文『至乎地之與人則

不然』，注曰：『凡取地皆就有之，與器異也。』蓋足以

見器之與人非即有矣。疏出『非有即爾』四字而解之

曰『謂非有就而有之爾』，則所據本已誤作『有即』，唐

石經亦誤。」

^②「王」，阮校：「鄂本作『正』，當據改。」

^③「制」，阮校：「宋本作『創』。」

^④「推」，杉浦校：「單疏鈔本、單疏殘本、毛本作『指』。」

○注「明其」至「有也」。○解云：若作名字，言器不可從今主之名，地不可作後主之有也。考諸古本，「名」作「多」字。雖恣意取之，亦不得多有也。若如此解，以覆上爲取之義矣。○注「經不」至「文也」。○解云：地不得爲今主之有，而經不繫本國以正之者，從可知省文。

戊申，納于大廟。何以書？譏。何

譏爾？遂亂受賂，納于大廟，非禮也。納

者，入辭也。周公稱太廟。所以必有廟者，緣生時有宮室也。孝子三年喪畢，思念其親，故爲之立宗廟，以鬼享之。廟之爲言貌也，思想儀貌而事之，故曰「齊之日，思其居處，思其笑語，思其志意，思其所樂，思其所嗜」，「祭之日，入室，僾然必有見乎其位；周旋出入，^①肅然必有聞乎其容聲；出戶而聽，慨然必有聞乎其嘆息之聲」，孝子之至也。質家右宗廟，上親親，^②文家右社稷，尚尊尊。○大廟，音泰，下及注同。嗜，市志反。僾，音愛，又烏改反。慨，苦愛反。【疏】注「納者入辭也」。○解云：即莊九年傳云「納者何？入辭也」是也。○注「故爲」至「享之」。○解云：《孝經》文。○注「故曰」至「所嗜」。○解云：皆《祭義》文也。彼注云「所嗜，素所欲飲食」是也。○注「祭之」至「之聲」。○解云：亦《祭義》文。彼注云

「周還出戶，謂薦設時也。無尸者闔戶，若食間則有出戶而聽之」是也。○注「質家」至「尊尊」。○解云：《春秋說》文。《祭義》篇末云「建國之神位，文家右社稷而左宗廟」，^③所謂一隅也。

秋，七月，紀侯來朝。稱侯者，天子將娶於紀，

與之奉宗廟，傳之無窮，重莫大焉，故封之百里。月者，明當尊而不臣，所以廣孝敬，蓋以爲天子得娶庶人女，以其得專封也。【疏】注「稱侯」至「百里」。○解云：知天子將娶於紀者，正以下八年冬「遂逆王后于紀」、九年「春，紀季姜歸于京師」之文也。知其元非大國者，正以隱二年「紀子伯、莒子盟于密」，伯、子並稱之，故知此侯非本爵也，知非暫得褒賞而已。而知封之百里者，正以自今以後恒稱侯故也，即下六年夏「公會紀侯于成」、十三年

①「出入」，阮校：「按：《禮記》作『出戶』。」

②「上」，阮校：「浦鏜云：『尚』誤『上』。按：否則下『尚尊尊』當作『上』，庶不歧出。」孫校：《周禮·小宗伯》疏引「上」作「尚」。

③「建國之神位文家」，阮校：「浦鏜云：下『文家』二字當衍。按：浦說是也。」

春「公會紀侯、鄭伯」之屬是也。○注「月者」至「孝敬」。○解云：凡朝例時，以其尊而不臣，故書月，令與朝異。○注「蓋以」至「封也」。○解云：此欲道諸侯不得專封，是以不取于大夫以下，即文四年「夏，逆婦姜于齊，略之也」，彼注云「賤，非所以奉宗廟，故略之」是也。

蔡侯、鄭伯會于鄧。離不言會，此其言會何？據齊侯、鄭伯如紀。二國會曰離，二人議各

是其所是，非其所非，所道不同，不能決事，定是非，立善惡，不足采取，故謂之離會。【疏】注「據齊」至「離會」。

○解云：五年「齊侯、鄭伯如紀」，^①當時紀不與會，是以齊侯、鄭伯為離會也。但離不言會，故變言如矣。蓋鄧與會爾。時因鄧都，得與鄧會。自三國以上言會者，重其少從多也，能決事，定是非，立善惡。《尚書》曰「三人議，則從二人之言」，蓋取諸此。○與會，音預。【疏】注「尚書」至「之言」。○解云：《洪範》文。

九月，入杞。

公及戎盟于唐。不日者，戎怨隱不反國，善桓能自復，翕然相親信。

冬，公至自唐。致者，君子疾賢者失其所，不

肖者反以相親榮，故與隱相違也。明前隱與戎盟，雖不信，猶可安也。今桓與戎盟，雖信，猶可危也，所以深抑小人也。凡致者，臣子喜其君父脫危而至。【疏】注「故與隱相違也」。○解云：即隱二年「秋，八月，公及戎盟于唐」，不書致故也。^②○注「明前」至「安也」。○解云：隱公之盟書日，故言不信也。不書致，故言猶可安。○注「今桓」至「而至」。○解云：不日，故為信，書致，故言危也。

三年，春，正月，公會齊侯于贏。無王

者，以見桓公無王而行也。二年有王者，見始也。十年有王者，數之終也。十八年有王者，桓公之終也。明終始有王，桓公無之爾。不就元年見始者，未無王也。二月非周之正月，所以復去之者，明《春秋》之道，亦通於三王，非主假周以為漢制而已。○贏，音盈。以見，賢偏反，下并年末「以見」同。復，扶又反，下同。去，起呂反。

① 「五年」，阮校：「何校本『年』下有『夏』字，與五年經合。」

② 「故」，單疏鈔本、單疏殘本、京都本作「是」。杉浦校：「當作『是』。」

【疏】注「二年」至「始也」。○解云：即二年「春，王正月，戊申，宋督弑其君與夷」是也。○注「十年」至「終也」。

○解云：即十年「春，王正月，庚申，曹伯終生卒」是。○注「十八年」至「終也」。○解云：即十八年「春，王正月，公會齊侯于濼」是也。○注「不就」至「始者」。○解云：

元年春王正月，初即位之時，自知己篡，戰懼畏討，未敢無王，是以《春秋》於正月之際，不得見始，須臾之後，還復爲惡，擅易天子之田，^①俄然無憚，故至二年正月言王以見始。○注「二月無王」。^②○解云：即七年「二月，己亥，焚咸丘」，十有三年「春，二月，公會紀侯、鄭伯」云云，十五年「春，二月，天王使家父來求車」之屬是也。

夏，齊侯、衛侯胥命于蒲。胥命者

何？相命也。胥，相也。時盟不歃血，但以命相

誓。○歃，本又作「歃」，所治反，又所甲反。【疏】「胥命者何」。○解云：《春秋》上下，更無胥命之文，故執不知問。

○注「時盟」至「相誓」。○解云：亦相誓敕，^④但不歃血而已，故謂之盟也。何言乎相命？據盟亦相命，不

道也。近正也。以不言盟也。○近正，附近之近，下

及注同。【疏】「近正也」。○解云：古者不盟而言近正，

雖不歃血，口相誓敕，^⑤不若古者結言而退，故言近正而已。此其爲近正奈何？古者不盟，結言而退。善其近正，似於古而不相背，故書以撥亂也。○背，音佩。

六月，公會紀侯于盛。○盛，音成。

秋，七月，壬辰，朔，日有食之，既。既者何？盡也。光明滅盡也。是後楚滅鄧、穀，上僭稱王，故尤甚也。楚滅鄧、穀不書者，後治夷狄。【疏】「既者何」。○解云：與例不同，故執不知問。○注「是後

①「擅」，原作「檀」，今據京都本、再造善本、中華本、閣本改。

②「注二月無王」，單疏殘本「王」下有「者」字。今按：今何注無「二月無王」之語，疑有訛誤。

③「七年」，阮校引浦鏗云：「『年』下脫『春』。」

④「亦」，阮校：「毛本改『口』。」

⑤「相」，原作「雖」，杉浦校：「單疏鈔本、單疏殘本、毛本作『相』。按：『口雖』當作『口相』。今據京都本、再造善本、閣本及杉浦校改。」

楚滅鄧穀。^①○解云：即下七年「夏，穀伯綏來朝。鄧侯吾離來朝」，傳云「皆何以名？失地之君也」是也。○注「上僭稱王」。○解云：《春秋說》云「桓三年「秋，七月，壬辰，朔，日有食之，既」，其後楚僭號稱王，滅穀、鄧，政教陵遲」是也。

公子翬如齊逆女。

九月，齊侯送姜氏于謹。何以書？何譏爾？諸侯越竟送女，非禮也。以

言姜氏也。禮，送女，父母不下堂，姑姊妹不出門。○謹，呼官反。【疏】注「以言姜氏也」。○解云：謹若齊地，宜言齊侯送孟姜于謹，今言姜氏，故知越竟也。○注「禮送」至「出門」。○解云：時王之禮。此人國矣，何以不稱夫人？據謹魯地。自我言齊，恕己以及人也。父母之於子，雖為鄰國夫人，猶曰吾姜氏。所以崇父子之親，從父母辭。不言孟姜言姜氏者，從魯辭，起魯地。【疏】「猶曰吾姜氏」。○解云：若有言孟姜者，「孟」為衍字也。○注「從父」至「魯地」。○解云：孟姜者，即《詩》云「彼美孟姜」，正謂此也。「孟」字亦有作「季」字者，誤也。

公會齊侯于謹。夫人姜氏至自齊。

翬何以不致？據遂以夫人婦姜至自齊致。【疏】注

「據遂」至「齊致」。○解云：在宣元年。得見乎公

矣。本所以致夫人者，公不親迎有危也。翬當并致者，

翬親迎重在翬也。上會謹時，夫人以得見公，得禮失禮

在公，不復在翬，故不復致。不就謹上致者，婦人危重，

故據都城乃致也。月者，為夫人至，例危重之。○親

迎，^②魚敬反，下同。為夫，于僞反，下同。【疏】注「不就」

至「乃致」。○解云：若就謹致，即鄉者至謹之時書之，宜

在「公會齊侯于謹」上。○注「月者」至「重之」。○解

云：即宣元年「三月，遂以夫人婦姜至自齊」，成十四年

「九月，僞如以夫人婦姜氏至自齊」是也。

冬，齊侯使其弟年來聘。

有年。「有年」何以書？方分別問大有

①「滅鄧穀」，阮校：「何校本作「滅穀鄧」。」

②「親迎」，原作「迎迎」，今據京都本、再造善本、中華本改。

年，故不但言何以書。○別，彼列反。以喜書也。

「大有年」何以書？亦以喜書也。此其曰

「有年」何？僅有年也。僅猶劣也，謂五穀多少

皆有，不能大成熟。○僅，其靳反，劣也。【疏】注「謂五

至「成熟」。○解云：舊本如是，其「穀」下云「皆有不能大

成熟」，「多少」二字或衍文也。若必存字解之，多謂麥

禾，少謂豆之屬，是事皆有，但不能大熟也。彼其曰

「大有年」何？問宣十六年也。大豐年也。謂

五穀皆大成熟。①僅有年，亦足以當喜乎？

恃有年也。恃，賴也。若桓公之行，諸侯所當誅，百

姓所當叛，而又元年大水，二年耗減，民人將去，國喪無

日，賴得五穀皆有，使百姓安土樂業，故喜而書之，所以

見不肖之君爲國尤危。又明爲國家者，不可不有年。○

行，下孟反。耗減，呼報反，下佳斬反。喪，息浪反。

四年，春，正月，公狩于郎。狩者何？

田狩也。田者，蒐狩之總名也。古者肉食，衣皮服，捕

禽獸，②故謂之田。取獸于田，故曰狩。《易》曰：「結繩

罔以田魚。」③○狩，手又反，冬獵也。【疏】「狩者何」。○

解云：正以春而言狩，故執不知問。○注「田者蒐狩之總

名也」。○解云：即《尚書》云：「文王不敢盤于遊田。」○

注「古者肉食，衣皮服，捕禽獸，故謂之田。取獸于田，故

曰狩。易曰，結繩罔以田魚」。○解云：此古者，謂三皇

之時也。故禮進退三皇時云，④昔者先王，未有火化，食

草木之實，鳥獸之肉，飲其血，茹其毛。未有麻絲，衣其

羽皮。後聖有作，然後修火之利。治其麻絲，以爲布帛，

以養生送死，以事鬼神」。又《下繫辭》云：⑤「黃帝、堯、

舜，垂衣裳而天下治」。彼注云：「始去羽毛」。故鄭注《易

①「熟成」，阮校：「『熟』當作『孰』，三《禮》注『成熟』字皆作『孰』。」

②「獸」，原作「者」，孫校曰：余本「者」作「獸」。今按：疏引起訖亦作「獸」，則作「獸」是也，據改。

③「罔」，阮校：「閩、監、毛本作『網』。按：此本疏中亦作『罔』。」

④「故禮進退三皇時云」，此句有訛誤，以下爲《禮記·禮運》文。杉浦校：「單疏鈔本『進退三』作『運道二』，單疏殘本作『運道三』。按：此作『運道三』是也。」

⑤「下」，京都本、再造善本作「易」。

說云：「古者田漁而食之，因衣其皮，先知蔽前，後知蔽後。後王易之以布帛，而猶存其蔽前者，重古道，不忘本。」以此言之，則黃帝以後，始有火化而去毛羽，則此古者，三皇時可知。春曰苗，苗，毛也。明當見物取未懷任者。①【疏】「春曰苗」。○解云：《周禮》「春田謂之蒐」，何氏所不取。秋曰蒐，蒐，簡擇也。簡擇幼稚，取其大者。○曰廋，本又作「搜」，亦作「蒐」，所求反，簡擇也。冬曰狩。狩猶獸也。冬時禽獸長大，遭獸可取。不以夏田者，春秋制也。以為飛鳥未去於巢，走獸未離於穴，恐傷害於幼稚，故於苑囿中取之。○長大，②丁丈反，年末同。③離，力智反。囿，音又。【疏】注「不以」至「制也」。○解云：正以《周禮》四時皆田故也。常事不書，此何以書？譏。何譏爾？遠也。以其地遠。禮，諸侯田狩不過郊。【疏】注「以其」至「遠也」。○解云：十年冬，「齊侯、衛侯、鄭伯來戰于郎」，傳云：「郎者何？吾近邑。」④莊三十一年「春，築臺于郎」，傳云：「何以書？譏。何譏爾？臨民之漱浣也。」以此言之，則郎為近邑。言遠也者，蓋以郎邑在郊內，其屬地在郊外，若據邑言之則為近，若據地言之則為遠也。故

哀十一年《左氏》郊之戰，《檀弓》謂之戰于郎也者，是郎邑在郊內之證也。則此言狩于郎者，據郊外屬地言之，故言遠，是以此注云「以其地遠。禮，諸侯田狩不過郊」，下五年「大雩」之下，⑤注云「去國遠狩」是也。而舊云以其云大野遠，⑥故言遠者，非。諸侯曷為必田狩？據有囿也。【疏】注「據有囿也」。○解云：即成十八年「築鹿囿」之屬是也。一曰乾豆，一者，第一之殺也。

- ①「見」，阮校：「閩、監、毛本同，此淺人所改。鄂本『見』作『毛』，當據正。毛猶現也，《詩》『左右毛之』，《玉篇》見部引作『現』。」
- ②「大」，原脫，今據余本補。
- ③「末」，原作「未」，今據宋本《釋文》改。
- ④「邑」下，阮校：「何校本有『也』字。」
- ⑤「下五年」，原作「不五年」，今據京都本、再造善本、中華本改。
- ⑥「以其云大野遠」，阮校：「疑當作『以其去野太遠』。」杉浦校：「單疏鈔本、單疏殘本『云』作『去』。」

自左臠射之，達於右臠，^①中心死疾，^②鮮屑，^③故乾而豆之，中薦於宗廟。豆，祭器名，狀如鐙。天子二十有六，諸公十有六，諸侯十有二，卿、上大夫八，下大夫六，士二。^④○左臠，毗小反，又扶了反，《上倉》云「小腹兩邊肉」，^⑤《說文》云「脅後髀前肉」。射之，食亦反，下同。右臠，本又作「臠」，魚俱反，又五苟反，《說文》云「肩前也」，《字林》云「肩前兩乳骨也」，五口反。中心，丁仲反，下同。鐙，都鄧反，又音登。【疏】注「自左」至「如鐙」。○解云：時王之禮，古制無文。○注「天子」至「士二」。○解云：自「下大夫六」以上，《禮器》文也。其士三者，何氏左之。^⑥案《聘禮》「致饗餼于上大夫，堂上八豆，設于房西」，^⑦則知此者，堂上豆數也。^⑧《公食大夫禮》曰「宰夫自東房薦豆六，設于醬東」，則食下大夫之禮而豆六，則知食卿、上大夫亦八明矣。《周禮》公之豆四十，侯、伯之豆三十有二，子、男之豆二十有四者，蓋普言之。一一曰賓客，二者，第二之殺也。自左臠射之，達於右脾，^⑨遠心死難，故以為賓客。○遠，于萬反。【疏】「二曰賓客」。○解云：言以為賓俎實。為猶作也。三曰充君之庖。充，備也。庖，厨也。三者，第三之殺也。自左臠

射之，達于右臠，中腸胃汚泡，死遲，故以充君之庖厨。已有三牲，必田狩者，孝子之意，以為己之所養，不如天地

- ①「臠」，余本作「臠」。阮校：「閩、監、毛本作「右臠」。按：《釋文》作「右臠」，云「本又作臠」。按：依《說文》當作「臠」，古書有作「臠」者。」
- ②「中心」，原作「心中」，今據余本、京都本、再造善本、宋本《釋文》改。
- ③「鮮屑」，阮校：「鄂本作「鮮絮」，閩、監、毛本「絮」作「潔」，非。按：「屑」猶絮也，故不絮謂之不屑。」
- ④「下大夫六士二」，阮校：「鄂本「二」作「三」，《穀梁》疏引亦作「三」，此誤，疏標起訛同。」
- ⑤「上倉」，「上」當為「三」之訛。宋本《釋文》作「三蒼」。
- ⑥「其士三者何氏左之」，阮校：「此本「差」誤「左」。杉浦校：「單疏鈔本、單疏殘本「左」作「差」。」
- ⑦「房」，阮校引浦鍾云：「「戶」誤「房」。」
- ⑧「則知此者堂上豆數也」，杉浦校：「單疏鈔本「者」作「皆」，單疏殘本「知」作「如」，「者」作「皆」。」
- ⑨「自左臠射之達於右脾」，阮校：「《釋文》作「左脾」，云：「方爾反，又步啓反，股外也。本又作臠。」按：左右脾皆脾股之脾，非脾肺之脾。」又云：「何注「脾」字二見，皆當依《說文》作「脾」。」

自然之性逸豫肥美。①禽獸多則傷五穀，因習兵事，又不空設，故因以捕禽獸，②所以共承宗廟，示不忘武備，又因以爲田除害。狩例時，此月者，譏不時也。周之正月，夏之十一月，陽氣始施，鳥獸懷任，草木萌牙，非所以養微。○庖，步苞反。左脾，方爾反，又步啓反，股外也，本又作「臠」。右肱，羊紹反，《字林》：子小反，一本作「肱」，音賢。泡，普交反，又百交反。捕，音步，本又作「搏」，音博，又音付。共，音恭。爲田，于僞反，下音同。【疏】注「狩例時」。○解云：即莊四年「冬，公及齊人狩于郕」，僖二十八年冬「天王狩于河陽」是也。○注「此月者」至「養微」。○解云：在哀十四年，孔子欲夏之孟冬以爲田狩之月。

夏，天王使宰渠伯糾來聘。宰渠伯糾者何？天子之大夫也。其稱宰渠伯糾何？據劉卷卒，氏采不名且字。○糾，居黝反。氏采，

七代反，後放此。【疏】「宰渠伯糾者何」。○解云：欲言微者，而經稱伯，欲言尊卿，連名言之，故執不知問。○注「據劉」至「且字」。○解云：在定四年也。劉是其采，卷是名也。③下大夫也。天子下大夫，繫官氏名且字。繫官者，卑不得專官事也。稱伯者，上敬老也。上

敬老則民益孝，上尊齒則民益弟，是以王者以父事三老，兄事五更，食之於辟離，天子親袒而割牲，執醬而餽，執爵而醕，冕而總干，率民之至也。先王之所以治天下者有五：貴有德，爲其近於道也；貴臣，爲其近於君也；貴老，爲其近於父也；敬長，爲其近於兄也；慈幼，爲其近於子弟也。禮，君於臣而不名者有五：諸父兄不名，經曰「王札子」是也，《詩》曰「王謂叔父」是也；上大夫不名，祭伯是也；盛德之士不名，叔肸是也；老臣不名，宰渠伯糾是也。下去二時者，桓公無王而行，天子不能誅，反下聘之，故爲貶，見其罪，明不宜。○弟，大計反。更，音庚。食，音嗣。辟，必亦反。袒，音但。饋，其愧反。醕，以刃反，又士刃反。其近，附近之近，下同。札，側八反。肸，許乙反。去，起吕反。見，賢徧反。【疏】注「天子」至「益弟」。○解云：言繫官以爲氏，渠是名，糾是且字也。○

①「如」，原作「知」，據余本、京都本、再造善本、中華本、閩本改。

②「捕禽獸」，阮校：「《釋文》：『捕，本又作搏，音博。』按：當作『搏禽獸』。」

③「名」，阮校引段玉裁云：「定四年疏『卷』是字，此作『卷是名』，誤。」

注「是以」至「之至也」。○解云：《祭義》云：「食三老五更於大學，天子親袒而割牲，執醬而饋，執爵而醕，冕而總干，所以教諸侯之弟也。」鄭注云「割牲，制俎實也。冕而總干，親在舞位，以樂侑食也，教諸侯之弟次事親」是也。《樂記》亦有此文。○注「先王」至「弟也」。○解云：皆《祭義》文也。○注「禮君」至「是也」。○解云：皆何氏之意，故皆取經以當之。○注「諸父」至「是也」。○解云：宣十五年「王札子殺召伯、毛伯」，傳云：「王札子者何？長庶之號也。」注云「天子之庶兄。札者，冠且字也。禮，天子庶兄冠而不名，所以尊之」是也。○注「上大夫」至「是也」。○解云：隱元年「祭伯來」，傳云「祭伯者何？天子之大夫也」是也。○注「盛德」至「是也」。○解云：宣十七年「公弟叔肸卒」，彼注云「稱字者，賢之。宣公篡立，叔肸不仕其朝，不食其祿，終身於貧賤，故孔子曰：『篤信好學，守死善道，危邦不入，亂邦不居。天下有道則見，無道則隱。』此之謂也」是。○注「老臣」至「不宜」。○解云：渠是其名，而言不名者，謂計其官爵之時，實合氏官名而且字，但以其年老，故兼稱伯，示有不名之義也，故知之矣。

五年，春，正月，甲戌，己丑，陳侯鮑

卒。曷爲以二日卒之？愾也。^①愾者，狂也。

齊人語。○愾，呼述反，狂也，齊人語。甲戌之日

亡，己丑之日死而得，君子疑焉，故以二日

卒之也。君子，謂孔子也。以二日卒之者，闕疑。

【疏】注「君子」至「闕疑」。○解云：正以哀十四年傳云

「君子曷爲爲《春秋》故也。

夏，齊侯、鄭伯如紀。外相如不書，此

何以書？據蔡侯東國卒于楚，不言如也。【疏】注「據

蔡」至「如也」。○解云：在昭二十三年夏也。案襄二十

六年「許男甯卒于楚」，在蔡侯之前而不據之者，科取一

以當之，不以後見義，^②或者正以蔡是大國，齊之類，故取

之。離不言會也。^③時紀不與會，故略言如也。《春

①「愾」，原作「戡」。阮校：「按：當「愾」字之訛也。」今

據改，下同。

②「後」上，杉浦校：「單疏鈔本、單疏殘本有「前」字。

按：當有「前」字。」

③「也」，原作「疏」，下「時紀不與會」至「以別嫌疑」皆爲何休注文，今據余本、京都本改。

秋始錄內小惡，書內離會，略外小惡，不書外離會。至所聞之世，著治升平，內諸夏而詳錄之，乃書外離會。嫌外離會常書，故變文見意，以別嫌明疑。○與，音預。治，直吏反。見意，賢徧反，下文注並同。別，彼列反。

【疏】注「書內離會」者。○解云：即隱二年「公會戎于潛」是也。○注「不書外離會」者。○解云：即此文變會言如是也。○注「乃書外離會」。○解云：即宣十一年「晉侯會狄于攢函」是也。①○注「嫌外」至「明疑」。○解云：若不載此事，以略言如，則嫌所傳聞之世，合書外離會，但遇無之而已，故曰嫌外離會常書也。故書而變其文，見所傳聞之世，不書外離會之意，故曰「變文見意」也。所以別其嫌而明其疑，故曰以別嫌明疑也。

天王使仍叔之子來聘。仍叔之子者何？天子之大夫也。其稱仍叔之子何？

據宰渠氏官，武氏子不稱字，又不加「之」，尹氏不稱子。【疏】「仍叔之子者何」。○解云：欲言大夫，而文言「之子」，欲言未仕，而天王使之，故執不知問。○注「據宰渠氏官」。○解云：即上四年「夏，天王使宰渠伯糾來聘」是也。○注「武氏」至「加之」。○解云：即隱三年「秋，武氏子來求聘」是也。○注「尹氏不稱子」。○解云：即隱三

年「夏，四月，辛卯，尹氏卒」是也。譏。何譏爾？

譏父老，子代從政也。禮，七十縣車致仕。②不言

氏者，起父在也。加「之」者，起子辟一人。○縣，音玄。

【疏】注「禮七十縣與致仕」。③○解云：案《春秋說》文。謂之縣與者，《淮南子》曰：「日至於悲谷，是謂晡時。④

至於淵隅，是謂高春。至於連石，是謂下春。至於悲泉，爰止其女，爰息其馬，是謂縣與。」⑤舊說云：日在縣與，

一日之暮，⑥人年七十，亦一世之暮，而致其政事於君，故

曰「縣與致仕」也。亦有作「車」字者。○注「不言」至「在也」。○解云：言仍氏子，則與武氏子文同，嫌亦無父，故

①「攢」，杉浦校：「單疏鈔本、單疏殘本作「攢」，與宣十一年經合。」

②「縣車」，阮校：「疏本作「縣輿」，解云：亦有作「車」字者。」

③「七」，原脫，此引何注，當有「七」字。今據中華本、閣本補。

④「晡」，原作「脯」，今據中華本、閣本改。

⑤「縣輿」，阮校引盧文弨曰：「《淮南》作「縣車」，《初學記》、《藝文類聚》引同。」

⑥「日」，原作「目」，今據中華本、閣本改。

曰「起父在」。○注「加之」至「一人」。○解云：若言仍叔子，則與僖三十三年百里子與蹇叔子之類是一人，故曰「加之者，起子辟一人」。

葬陳桓公。不月者，責臣子也，知君父有疾，當營衛，不謹而失之也。傳曰：「葬，生者之事。」【疏】注「不月」至「之也」。○解云：正以卒日葬月，乃是大國之例，今書時，故決之。○注「傳曰」至「之事」。○解云：隱十一年傳文。

城祝丘。

秋，蔡人、衛人、陳人從王伐鄭。其言

從王伐鄭何？據河陽舉王狩，別出朝文，文不連

王，王師不道所加。○從王，如字，又才用反，下及注同。

【疏】注「據河」至「連王」。○解云：僖二十八年「冬，公會

晉侯」以下「于溫。天王狩于河陽」，「壬申，公朝于王

所」。彼舉王狩，此不舉之，彼別出公朝之文，其文不連

上王，今言從王伐鄭，經連王言之，故難之。或者上會于

溫，諸侯之文連王言之。○注「王師不道所加」。○解

云：成元年「秋，王師敗績于貿戎」，不道伐某，今言伐鄭，

故難之。**從王，正也。**美其得正義也，故以從王征伐

錄之，蓋起時天子微弱，諸侯背叛，莫肯從王者征伐，以善三國之君，獨能尊天子死節。稱人者，刺王者也。天下之君，海內之主，當秉綱撮要，而親自用兵，故見其微弱。僅能從微者，不能從諸侯，猶莒稱人，則從不疑也。不使王者首兵者，本不為王舉也。知實諸侯者，以美得正。○撮，七活反。不為，于僞反，下「所為」、「與為」，六年同。【疏】注「猶莒」至「疑也」。○解云：即隱八年「公及莒人盟于包來」，傳曰：「公曷為與微者盟？稱人則從不疑也。」注云「從者，隨從也，實莒子也。言莒子，則嫌公行微不肖，諸侯不肯隨從公盟，而公反隨從之，故稱人，則隨從公不疑矣」是也。○注「不使」至「得正」。○解云：若使王者首兵，宜言王以蔡人、衛人、陳人伐鄭，似若僖二十六年「公以楚師伐齊，取穀」然。

大雩。大雩者何？旱祭也。雩，旱請雨

祭名。不解大者，祭言大雩，^①大旱可知也。君親之南郊，以六事謝過，自責曰：「政不一與？民失職與？宮室榮與？婦謁盛與？苞苴行與？讒夫倡與？」使童

①「大」，原作「人」，今據京都本、再造善本、中華本、閣本改。

男女各八人，舞而呼雩，故謂之雩。不地者，常地也。○一與，音餘，下同。苴，子餘反。【疏】注「君親」至「責曰」。○解云：皆《韓詩傳》文。○注「政不一與」。○解云：謂政不專一，出自權臣之門。○注「民失職與」。○解云：謂廢其農業。○注「宮室榮與」。○解云：謂若丹楹刻桷之屬。○注「婦謁盛與」。○解云：謂阿諛亂國。○注「苞苴行與」。○解云：謂受人之饋，^①政以賄成。○注「讒夫倡與」。○解云：謂若魯任鄭瞻。○注「使童至之雩」。○解云：《論語》云「冠者五六人，童子六七人」，與此異者，彼言「暮春者，春服既成」，明魯人正雩，故其數少，復不言男女。今此書見于經，非正雩也。凡修雩者，皆為早甚而作之，故其數多，又兼男女矣，是以《司巫》職曰「若國大旱，則率巫而舞雩」是也。《春秋說》云「冠者七八人，童子八九人」者，蓋是天子雩也。○注「不地者常地也」。○解云：謂在魯城南沂水上。然則何以不言早？據日食鼓用牲于社。【疏】注「據日」至「于社」。○解云：莊二十五年經，彼舉日食，乃言「鼓用牲于社」，此不言早，直言大雩，^②故據難之。言雩，則早見。言早，則雩不見。從可知，故省文也。

日食獨不省文者，與大水同禮，若但言鼓用牲，則不知其所為。必見雩者，善其能戒懼天災，應變求雨，憂民之急也。○應，應對之應，下同。【疏】注「與大」至「急也」。○解云：諸言日食與大水，皆鼓用牲也，即莊二十五年「秋，大水，鼓用牲于社」是也。何以書？記災也。早者，政教不施之應。先是桓公無王行，比為天子所聘，得志益驕，去國遠狩，大城祝丘，故致此早。【疏】注「比為天子所聘」。○解云：即注四年「夏」，^③天王使宰渠伯糾來聘」是也。○注「去國遠狩」。○解云：即四年春，「公狩于郎」是也。○注「大城祝丘」。○解云：在今年夏，正以大崩壞敗，然後發衆城之，故曰大城。

蠲。何以書？記災也。蠲者，煩擾之所生，與上旱同說。○蠲，音終，本亦作「蠲」，《說文》：蠲，或「蠲」字。

冬，州公如曹。外相如不書，此何以

① 「饋」，原作「貴」，今據京都本、再造善本、中華本改。
② 「雩」，原作「雲」，今據中華本、閣本改。
③ 「注」，阮校：「浦鏜云：皆「上」字之誤。按：浦說是也。」杉浦校：「單疏鈔本、單疏殘本「注」作「上」。」

書？過我也。爲六年「化我」張本也。傳不言化我者，張本非再化也。稱公者，申其尊，起其慢，責無禮。○過，古禾反，又古卧反。【疏】注「稱公」至「無禮」。○解云：天子三公稱公，王者之後稱公。州國非此二者，必非是公。但今過魯自尊若公，故如其意，書之曰公，以起其無禮也。但諸文不知本爵是何，諸家之意，《左氏》已具也。

六年，春，正月，寔來。寔來者何？

猶曰是人來也。猶曰是人來，不錄何等人之辭。○

寔，^①市力反。【疏】「寔來者何」。○解云：不書其人，而經言「寔來」，^②故執不知問。孰謂？謂州公也。

以上如曹書。曷爲謂之「寔來」？慢之也。

曷爲慢之？據葵丘之盟曰。化我也。行過無禮

謂之化，齊人語也。諸侯相過，至竟必假塗，人都必朝，所以崇禮讓，絕慢易，戒不虞也。今州公過魯都不朝魯，是慢之爲惡，故書寔來見其義也。月者，危錄之，無禮之人，不可備責之。○易，以豉反。見其，賢徧反，下「見無正」同。【疏】注「據葵」至「盟日」。○解云：僖九年「九月，戊辰，諸侯盟於葵丘」，傳云：「桓之盟不日，此何以

日？危之也。何危爾？桓公震而矜之，叛者九國。震之者何？猶曰振振然。」注云：「亢陽之貌。」「矜之者何？猶曰莫若我也」，注云：「色自美大之貌。」然則桓公振矜慢人而書日危之，本魯慢州公，非敬逆之道，是以據而難之。○注「行過」至「義也」。○解云：今州公過魯而慢之，傳言「化我」，故知「化我」是行過無禮之言，是以哀六年傳云：「陳乞曰：『常之母有魚菽之祭，願諸大夫之化我也。』」諸大夫皆曰：「諾。」於是皆之陳乞之家。」亦是行過無禮之事。○注「月者」至「責之」。○解云：凡朝例時，此不朝，故書月以見危。不書日以見其危者，無禮之人，不可備責故也。

夏，四月，公會紀侯于成。

秋，八月，壬午，大閱。大閱者何？

① 「寔」，原作「實」，今據余本、京都本、再造善本、中華本、閣本、宋本《釋文》改。

② 「寔」，原作「實」，今據京都本、再造善本、中華本、閣本改。

簡車徒也。^①大簡閱兵車，使可任用而習之。○閱，

音悅。任，音壬。【疏】「大閱者何」。○解云：欲言習兵，

而不言狩，欲言他事，而經書大閱，故執不知問。何以

書？蓋以罕書也。罕，希也。孔子曰：「以不教

民戰，是謂棄之。」故比年簡徒謂之蒐，三年簡車謂之大

閱，五年大簡車徒謂之大蒐，存不忘亡，安不忘危。不地

者，常地也。蒐例時，此日者，桓既無文德，又忽忘武備，

故尤危錄。【疏】「何以」至「書也」。○解云：大閱之禮，

三年一爲。桓公忽忘武備，過於三年，是以書之。○注

「孔子」至「棄之」。○解云：何氏之意與鄭別。○注「故

比」至「之蒐」。○解云：即昭八年「秋，蒐于紅」之屬是

也。○注「三年」至「大閱」。○解云：此文是也。○注

「五年」至「大蒐」。○解云：即定十四年「大蒐于比蒲」之

屬是也。知其年數者，漢禮猶然。○注「不地者常地

也」。○解云：蓋在郊內，而賈注經云「簡車馬于廟」也

者，何氏不取。○注「蒐例時」者。昭八年「秋，蒐于紅」，

定十四年夏「大蒐于比蒲」之屬是也。^②○注「此日」至

「危錄」。○解云：例合書時而乃書日，故以爲尤危錄也。

蔡人殺陳佗。陳佗者何？陳君也。

以躍卒不書葬也。○佗，大阿反。【疏】「陳佗者何」。○

解云：欲言陳君，經不書爵，欲言大夫，又不言氏，故執不

知問。○注「以躍」至「葬也」。○解云：十二年「八月，壬

辰，陳侯躍卒」，注云：「不書葬者，佗子也。佗不稱侯者，

嫌貶在名例不當絕，故復去躍葬也。」^③是以昭十一年「楚

^①「大閱者何簡車徒也」，王引之《經義述聞》：「當作

「大閱者何簡車也」，「徒」字涉昭十一年傳而衍也。

「蒐者何？簡車徒也」，當作「蒐者何？簡徒也」，

「車」字亦涉昭十一年傳而衍也。蓋蒐惟簡徒，大閱

惟簡車，大蒐則合車徒而並簡之，故傳分別言之。何

注「大閱者何？簡車也」曰：「大簡閱兵車，使可任

用而習之。」但言車而不言徒，則「車」下無「徒」字可

知。注「蒐者何？簡徒也」曰：「徒，衆。」但言「徒」

而不言「車」，則「徒」上無「車」字可知。《穀梁傳》

曰：「大閱者何？閱兵車也。」不言「徒」，亦不言

「馬」，與《公羊》古本合。」

^②「定十四年夏大蒐于比蒲」，按《春秋》定公「大蒐于比

蒲」有二，一在定公十三年夏，一在定公十四年秋。

此作「定十四年夏」，誤。

^③「去」，原作「云」，今據桓公十二年注及單疏鈔本、單

疏殘本、京都本、閩本改。

師滅蔡，執世子有以歸用之，傳云：「此未踰年之君也，其稱世子何？不君靈公，不成其子也。不君靈公，則曷爲不成其子？誅君之子不立。」以此言之，正由陳佗不君而見絕，故去其子葬，是故以躍不書葬，知佗是陳君。若其不然，不知陳侯躍何以不書葬矣。陳君則曷爲謂之陳佗？據殺蔡侯般，不言蔡般。○侯般，音班。

【疏】注「據殺」至「蔡般」。○解云：昭十一年「楚子虔誘蔡侯般，殺之於申」是也。絕也。絕者，國當絕。曷爲絕之？據戕鄫子不絕。○戕，在良反。鄫，才陵反。【疏】注「據戕」至「不絕」。○解云：宣十八年「邾婁人戕鄫子」，稱子而不名是也。賤也。其賤奈何？外淫也。惡乎淫？惡乎，猶於何也。○惡，音烏，烏乎猶於何也，注同。淫于蔡，蔡人殺之。蔡稱人者，與使得討之，故從討賊辭也。賤而去其爵者，起其見卑賤，猶律文立子姦母，見乃得殺之也。不月不書葬者，^①從賤文。○去，起吕反。【疏】注「猶律」至「之也」。○解云：猶言對子姦母也。○注「不日」至「賤文」。○解云：陳佗是君而見弑，例合書日，即隱四年「戊申，衛州吁弑其君完」之屬是也。君被外國殺者，不責臣子不討賊，

例合書葬，即桓十八年「葬我君桓公」是也。今不書日不書葬者，從賤文故也。

九月，丁卯，子同生。子同生者孰謂？謂莊公也。以夫人言「同非吾子」。○嚴公，

音莊，本亦作「莊」，案後漢諱莊改爲嚴。【疏】「子同生者孰謂」。○解云：《春秋》之內魯侯多矣，皆不書生，今特書，故問爲誰。○注「以夫」至「吾子」。即莊元年傳云「夫人譖公于齊侯，公曰「同非吾子，齊侯之子也」者是也。正以道公疑非己子，則是其長子同，既繫體是常，^②故知莊公也。何言乎「子同生」？據君存稱世子，子般不言生。【疏】注「據君」至「言生」。○解云：莊三十二年「冬，十月，乙未，子般卒」，傳云「子卒云子卒，此其稱子般卒何？君存稱世子，君薨稱子某，既葬稱子，踰年稱公」是也。喜有正也。喜國有正嗣。未有言「喜有正」者，此其言「喜有正」何？久無正也。子公羊子曰：「其諸以病桓與？」其

① 「月」，阮校：「鄂本「月」作「日」，當據正。」
② 「繫體是常」，阮校引浦鏜云：「疑當作「繼體是長」。」

諸，辭也。本所以書莊公生者，感隱、桓之禍生於無正，故喜有正，而不以世子正稱書者，明欲以正見無正，疾惡桓公。日者，喜錄之。禮，生與來日，死與往日，各取其所見日也。禮，世子生三日，卜士負之寢門外，以桑弧蓬矢射天地四方，明當有天地四方之事。三月，君名之，大夫負朝于廟，以名徧告之。○桓與，音餘。稱，尺證反。惡，烏路反。射，食亦反。徧，音遍。【疏】注「而不」至「桓公」。○解云：若以正稱書，宜言世子同生也。同實世子，而不以正稱書之，^①是其以正見無正之義。桓由不正而篡弑，故曰疾惡桓公也。○注「日者」至「日也」。○解云：與由數也。由生數來日，故書丁卯而錄之。凡人謂方至為來，已過為往，故云生與來日，死與往日也。鄭注《曲禮上》篇云「生數來日，謂成服杖以死明日數也。死數往日，謂殯斂以死日數也」者，與何氏異。○注「禮世」至「告之」。○解云：皆出《內則》文也。

冬，紀侯來朝。朝聘例時。

監本附音春秋公羊注疏桓公卷第四

① 「不以」，單疏鈔本、單疏殘本、京都本、再造善本作「以不」。

監本附音春秋公羊注疏桓公卷第五

起七年，盡十八年

何休學

七年，春，二月，己亥，焚咸丘。焚之者何？樵之也。樵，薪也。以樵燒之故，因謂之樵之。樵之，齊人語。○樵，似遙反，薪也。【疏】焚之者何。○解云：咸丘是邑，而反焚之，故執不知問。樵之者何？以火攻也。何言乎以火攻？據戰伐不道所用兵。○攻，音貢，又如字，下同。【疏】「樵之者何」。○解云：雖言焚言樵，仍非攻邑之義，故執不知問。疾始以火攻也。征伐之道，不過用兵，服則可以退，不服則可以進。火之盛炎，水之盛衝，雖欲服罪，不可復禁，故疾其暴而不仁也。傳不託始者，前此未有，無所託也。○復，扶又反。咸丘者何？邾婁之邑也。曷爲不繫乎邾婁？據邢、鄆、郛繫紀。

○邢，步丁反。鄆，子斯反，一音晉。郛，音吾。【疏】「咸丘者何」。○解云：欲言是國，經典未有，欲言非國，文無所繫，故執不知問。○注「據邢鄆郛繫紀」。○解云：莊元年冬，「齊師遷紀邢、鄆、郛」是。國之也。欲使如國，故無所繫。加之者，辟寔國也。曷爲國之？據邢、鄆、郛不國。君存焉爾。所以起邾婁君在咸丘邑，明臣子當赴其難，與在國等也。日者，重錄以火攻也。○難，乃旦反。【疏】注「日者」至「攻也」。○解云：正以侵伐例時，即隱七年「秋，公伐邾婁」之屬是也，故決之。

夏，穀伯綏來朝。鄧侯吾離來朝。皆何以名？據滕、薛不名也。【疏】注「據滕薛不名也」。○解云：即隱十一年「春，滕侯、薛侯來朝」是也。失地之君也。其稱侯朝何？據以賤也。【疏】「失地之君也」。○解云：即《曲禮下》云「諸侯失地名」是。貴者無後，待之以初也。穀、鄧本與魯同貴爲諸侯，今失爵亡土來朝，託寄也，義不可卑，故明當待之如初，

所謂「故舊不遺，則民不偷」。^①無後者，施於所奔國也。獨妻得配夫，託衣食於公家，子孫當受田而耕，故云爾。下去二時者，桓公以火攻人君，故貶，明大惡。不月者，失地君朝惡人，輕也。名者，見不世也。○不偷，他侯反，本又作「媮」。^②去，起吕反。見，賢偏反。【疏】注「無後」至「大惡」。○解云：知如此者，正以《郊特牲》云「諸侯不臣寓公，故古者寓公不繼世」，彼注云「寓，寄也。寄公之子，非賢者世不足尊也」，是其義。又云：「繼世以立諸侯，象賢也。」，注云：「賢者，子孫恒能法其先父德行。」○注「不月」至「輕也」。○解云：朝例時，春秋常典，即文十五年「夏，曹伯來朝」是也。而此責其月者，以文十二年「春，王正月，盛伯來奔」，傳云：「盛伯者何？失地之君。」彼書月，見其奔重，宜厚遇之，此不月者，朝惡人輕故也。僖二十年「夏，郕子來朝」，僖公非惡人而不月者，正以朝輕于奔故也。然則此注因桓惡人，故言此。若其不然，正宜直云失地之君來朝輕矣。○注「名者見不世也」。○解云：郕子、盛伯皆不名者，兄弟故也。

八年，春，正月，己卯，烝。烝者何？

冬祭也。春曰祠，薦尚韭卯。祠猶食也，猶繼嗣也。春物始生，孝子思親繼嗣而食之，故曰祠，因以別死

生。○烝，之承反，冬祭也。祠，嗣絲反。卯，力管反。猶食，音飼，^③下同。別，彼列反。夏曰杓，薦尚麥苗。麥始熟可杓，^④故曰杓。○杓，音予若反，^⑤本又作「禴」，^⑥同。【疏】「烝者何」。○解云：欲言宗廟之祭，而文無所繫，欲言祭天，天無烝名，故執不知問。○注「薦尚韭卯」，又注「薦尚麥」至「曰杓」。○解云：《王制》云：「春薦韭，夏薦麥，秋薦黍，冬薦稻。韭以卵，麥以魚，黍以肫，稻以鴈。」秋曰嘗，薦尚黍肫。嘗者，先辭也。

①「不偷」，阮校：「《釋文》作『不偷』，云『本又作偷』。按當依陸本作『偷』。今本從人旁，非。《周禮·大司

徒》『以俗教安，則民不偷』，今本亦改『偷』。按：

「偷」、「偷」古今字，《說文》無「偷」，鄭箋《詩》有之。」

②「不偷他侯反本又作媮」，宋本《釋文》作「不偷他侯反本又作偷」。「媮」，余本、京都本、再造善本作「偷」。

③「飼」，宋本《釋文》作「嗣」。

④「薦尚麥苗麥始熟可杓」，阮校：「閩、監、毛本『苗』作『魚』，無下『麥』字。按：『苗』字誤，當定從『魚』。宋

本亦有下『麥』字，《穀梁》疏引同，與《儀禮經傳通解》合。今本無者，誤脫也。」

⑤「音」，余本、宋本《釋文》無此字。

⑥「禴」，宋本《釋文》作「禴」。

秋穀成者非一，黍先熟可得薦，故曰嘗。冬曰烝。薦尚稻鴈。烝，衆也，氣盛貌。冬萬物畢成，所薦衆多，芬芳備具，故曰烝。無牲而祭謂之薦。天子四祭四薦，諸侯三祭三薦，大夫、士再祭再薦。祭於室，求之於幽；祭於堂，求之於明；祭於祊，求之於遠，皆孝子博求之意也。大夫求諸明，士求諸幽，尊卑之差也。殷人先求諸明，周人先求諸幽，質文之義也。禮，天子、諸侯、卿大夫牛羊豕凡三牲，曰大牢。天子元士、諸侯之卿大夫羊豕凡二牲，曰少牢。諸侯之士特豕。天子之牲角搔，^①諸侯角尺，卿大夫索牛。○祊，必庚反。少，詩照反。索，所百反。【疏】注「無牲」至「之薦」。○解云：謂無牛羊豕之牲也。而《中雷禮》云：「祭五祀于廟，用牲有尸，皆薦于奧。」何以薦用牲？彼謂正祭之時，先薦于奧，仍自無牲，其正祭五祀，乃用牲有尸耳。○注「天子」至「差也」。○解云：皆時王之禮，《中雷禮》亦然。○注「殷人」至「義也」。○解云：即《郊特牲》云「殷人先求諸陽，周人先求諸陰」是也。○注「禮天」至「大牢」。○解云：皆時王之禮也。○注「天子」至「索牛」。○解云：皆指祭宗廟之牲也，仍不妨《王制》云「祭天地之牛角繭栗，賓客之牛角尺」之文也。常事不書，此何以書？譏。何

譏爾？譏亟也。亟，數也。屬十二月已烝，今復烝也。不異烝祭名而言烝者，取冬祭所薦衆多，可以包四時之物。○亟，去冀反，數也，注及下同。數，所角反。屬十，音燭，下同。今復，扶又反，下同。【疏】注「屬十」至「烝也」。○解云：烝者，冬祭之名。明去年十二月已有烝，但得常不書，今正月復作烝，故言亟。○注「不異」至。②○解云：烝者，冬時祭名，前已作訖，今宜易名，而猶言烝，故說之也。亟則黷，黷則不敬。黷，溲黷也。○黷，徒木反。溲，息列反。君子之祭也，敬而不黷。君子生則敬養，死則敬享。故將祭，宮室既修，牆屋既繕，③百物既備，序其禮樂，具其百官。散齊七日，致齊三日，夫婦齊戒沐浴，盛服。君牽牲，夫人奠酒，君親獻尸，夫人薦豆。卿大夫相君，命婦相夫人，洞洞乎，屬屬乎，如弗勝，如將失之。濟濟乎致其敬也，愉愉

①「搔」，余本作「握」。阮校：「鄂本及《儀禮經傳通解》作「角握」，《穀梁疏》疏引同，當據正。」
②「注不異至」，阮校：「閩、監、毛本下有「之物」二字。」
③「繕」，阮校：「今《祭義》作「設」。」

乎盡其忠也，勿勿乎其欲饗之也。^①文王之祭，事死如事生，孝子之至也。○養，餘亮反。散齊，素旦反，下側皆反。相君，息亮反，下同。洞洞，大董反。勝，音升。濟濟，子禮反，又似兮反。愉愉，羊朱反。勿勿，如字。【疏】注「君子」至「敬享」。○解云：《祭義》文也。彼鄭注云：「享，猶祭也。」○注「故將祭」至「百官」。○解云：皆出《祭義》，何氏差約言之也。○注「散齊七日」。○解云：即《祭統》云「故散齊七日以定之」，注云「定者，定其志意也」。定其志意者，謂齊之日不御不樂不弔是也。○注「致齊三日」。○解云：即《祭統》云「致齊三日以齊之」，是致齊者，即鄭氏云「致之言至，致謂深也，審也」之屬是也。○注「夫婦」至「奠酒」。○解云：案今《祭義》「酒」作「盎」字。鄭注云：「奠盎，設盎齊之罇。」^②蓋所見異，或何休以義引之，不取正文。○注「君親」至「如事生」。○解云：皆出《祭義》，唯「孝子之至」一句，注者之言也。注禮本下為士制者，^③即《士喪禮》、《士虞》、《士相見》之屬是也。言此者，欲道庶人無禮篇，故傳家偏舉言之。即《曲禮上》篇「禮不下庶人」，鄭注云：「為其遽於事，且不能備物。」義亦通於此。疏則怠，怠則忘。怠，解。^④○疏，音疎，下注同。解，古賣反。士不及

茲四者，則冬不裘，夏不葛。禮本下為士制。茲，此也。四者，四時祭也。疏數之節，靡所折中，是故君子合諸天道，感四時物而思親也。祭必於夏之孟月者，取其見新物之月也。裘葛者，禦寒暑之美服。^⑤士有公事，不得及此四時祭者，則不敢美其衣服，蓋思念親之至也。故孔子曰：「吾不與祭，如不祭。」○折中，之設反，下丁仲反。御寒，魚呂反，又如字。不與，音預。

天王使家父來聘。家，采地。父，字也。天

子中大夫氏采，故稱字，不稱伯仲也。【疏】注「天子」至「仲也」。○解云：上大夫稱伯仲者，即祭伯、南季之屬是也。次大夫不稱伯仲者，即此是也。下大夫稱官氏名且

①「勿勿乎其欲饗之也」，阮校：「依《祭義》，當作「其欲其饗之也」。」

②「罇」，《禮記·祭義》鄭注今作「奠」。

③「注禮本下為士制者」，阮校：「按：『者』當為「○」，下脫「解云」二字。自此以下，皆屬下節「士不及茲四者」疏。」

④「怠解」，阮校：「鄂本作「怠懈」。」

⑤「禦」，阮校：「閩、監、毛本作「御」。按：《釋文》作「御」。」

字者，即宰渠伯糾是也。

夏，五月，丁丑，烝。何以書？譏亟

也。與上祀同爲亟也。【疏】注「與上」至「亟也」。○解

云：周之三月，乃是夏之孟月，自有春祠之禮。今周之五月，乃夏之三月也，猶與上祠同在一時而復爲烝，故曰與上祀同爲亟也。

秋，伐邾婁。

冬，十月，雨雪。何以書？記異也。

何異爾？不時也。周之十月，夏之八月，未當雨雪，

此陰氣大盛，兵象也。是後有郎師、龍門之戰，沬血尤深。

○雨雪，于付反。沬，古流字。【疏】注「是後」至「尤深」。

○解云：郎師，即下十年「齊侯、衛侯、鄭伯來戰于郎」是也。其龍門之戰者，即下十三年「公會紀侯、鄭伯。己

巳，及齊侯、宋公、衛侯、燕人戰」云云是也。《春秋說》云「龍門之戰，民死傷者滿溝」，故此注云「沬血尤深」也。

祭公來，遂逆王后于紀。祭公者何？

天子之三公也。天子置三公、九卿、二十七大夫、八

十一元士，凡百二十官，下應十二子。祭者，采也。天子

三公氏采稱爵。○祭公，側介反，後「祭仲」、「祭叔」放

此。應，應對之應。【疏】「祭公者何」。○解云：欲言諸

侯，而逆王后，欲言大夫，而經文言公，故執不知問。○

注「天子」至「采也」。○解云：《春秋說》云：「立三台以

爲三公，^①北斗九星爲九卿，二十七大夫內宿部衛之

列，^②八十一紀以爲元士，凡百二十官焉。下應十二子。」

宋氏云：「十二次，上爲星，下爲山川也。」此言天子立百

二十官者，非直上紀星數，亦下應十二辰，故曰「下應十

二子」也。○注「三公氏采稱爵」者。○解云：即祭公、周

公是也。上大夫即例稱五十字，即祭伯、南季、榮叔之屬

是也。次大夫例稱二十字，即家父之屬是也。下大夫繫

官氏名且字，即宰渠伯糾是也。上士名氏通，石尚是也。

次士以官錄，即宰咺是。下士略稱人，「公會王人于洮」

是也。其劉子、單子之屬，不稱字而稱子者，謂諸侯入爲

天子大夫，故設文，非王臣之常稱。若然，祭公、周公官

爵適等，而僖九年「夏，公會宰周公」，特加「宰」者，彼傳

云：「宰周公者何？天子之爲政者也。」注云「宰猶治也，

①「立」，阮校引浦鏜云：「『立』當『法』字誤。」

②「內」，阮校引浦鏜云：「『內』上疑脫『爲』。」

三公之職號，尊名以加宰，^①知其職大尊重，當與天子參聽萬機，而下爲諸侯所會，惡不勝任，^②故加宰，仍非常稱也。何以不稱使？據宰周公稱使。【疏】注「據

宰周公稱使」者。○解云：即僖三十年「天王使宰周公來聘」是也。而稱宰者，義與九年同。婚禮不稱主人。

時王者有母也。遂者何？生事也。生猶造也。

專事之辭。大夫無遂事，此其言遂何？據待

君命，然後卒大夫也。【疏】注「據待」至「夫也」。○解

云：成十七年十一月，「壬申，公孫嬰齊卒于貍軫」，傳云

「非此月日也，曷爲以此月日卒之？待君命然後卒大

夫。曷爲待君命然後卒大夫？曷爲待君命然後卒大

夫？^③前此者，嬰齊走之晉。公會晉侯，將執公，嬰齊爲

公請。公許之反爲大夫，歸至於貍軫而卒，無君命不敢

卒大夫。公至，曰：「吾固許之反爲大夫。」然後卒之」者

是也。成使乎我也。以上來無事，知遂成使于我。

○成使，所吏反，注及下「成使」同。其成使乎我奈

何？使我爲媒，可則因用是往逆矣。婚禮

成於五：先納采、問名、納吉、納徵、請期，然後親迎。時

王者遣祭公來，使魯爲媒，可則因用魯往迎之，不復成

禮。疾王者不重妃匹，逆天下之母若逆婢妾，將謂海內何哉？故譏之。不言如紀者，辟有外文。○媒，亡盃反。請期，音情，又七井反。迎，魚敬反。妃匹，音配，絕句。【疏】注「不言」至「外文」。○解云：外相如者，例所不錄，言如紀即外相如，故曰辟有外文也。女在其國稱女，此其稱王后何？王者無外，其辭成矣。【疏】「女在其國稱女」者。○解云：即隱二年「紀履緌來逆女」，上三年「公子翬如齊逆女」之屬是也。

九年，春，紀季姜歸于京師。其辭成矣，則其稱紀季姜何？自我言紀。父母之於子，雖爲天王后，猶曰吾季姜。明子尊不加於父母。京師者何？天子之居也。以季姜

^①「職號尊名」，阮校：「何校本此下有『也』字。」僖公九年注作「三公之職號尊名也」，則有「也」字是。

^②「任」上，阮校：「何校本有『其』字。」僖公九年注作「惡不勝其任也」，則有「其」字是。

^③「曷爲待君命然後卒大夫」，阮校：「此本複衍此十字，闕、監、毛本刪正是也。」杉浦校：「單疏鈔本，單疏殘本不重此十字。」

言歸。【疏】「京師者何」。○解云：欲言天子之居，而文不言王，欲言凡國，而爲王后所歸，故執不知問。京者何？大也。師者何？衆也。天子之居，必以衆大之辭言之。地方千里，周城千雉，宮室官府，制度廣大，四方各以其職來貢，莫不備具，所以必有地者，治自近始，故據土與諸侯分職而聽其政焉，^①即《春秋》所謂內治其國也。書季姜歸者，明魯爲媒，當有送迎之禮。○治自，直吏反。【疏】「京者」至「言之」。○解云：京師之名，理須訓解，故分而問之。○注「地方千里」。○解云：即《詩》云「邦圻千里」是也。○注「周城千雉」。○解云：在定十二年。○注「即春」至「之禮」。○解云：《春秋》據魯爲王，故內魯，若周公制禮，內京師然也。

夏，四月。

秋，七月。

冬，曹伯使其世子射姑來朝。諸侯來

曰朝，此世子也，其言朝何？據臣子一例當言聘。○射，音亦。【疏】「諸侯來曰朝」。○解云：隱十一年師解云爾，故此弟子執而難之。○注「據臣」至「言

聘」。○解云：僖元年傳文。《春秋》有譏父老子代從政者，則未知其在齊與？曹與？在齊

者，世子光也。時曹伯年老有疾，使世子行聘禮，恐卑，故使自代朝，雖非禮，有尊厚魯之心，傳見下卒葬詳錄，故序經意依違之也。小國無大夫，所以書者，重惡世子之不孝甚。○齊與，音餘，絕句，下同。惡，或烏路反。^②

【疏】注「在齊」至「光也」。○解云：即襄九年「冬，公會晉侯」已下「齊世子光、滕子、薛伯、小邾婁子伐鄭」，^③十一年「公會晉侯」已下「齊世子光、莒子、邾婁子」云云「伐鄭」是也。○注「時曹」至「之心」。○解云：正以十年春卒，今又世子代其朝，故知其疾也。○注「傳見」至「詳錄」。○解云：即十年「王正月，庚申，曹伯終生卒。夏，五月，葬曹桓公」是也。○注「故序」至「孝甚」。○解

① 「土」，原作「士」，今據中華本、閣本改。

② 「惡或烏路反」，宋本《釋文》作「重惡，如字，或烏路反」。

③ 「齊世子光滕子薛伯小邾婁子伐鄭」，阮校引浦鏜云：「經「齊世子光」在「小邾婁子」下，十一年伐鄭同。此誤倒。」

云：世子代朝，明亦合譏，世子序諸侯之上，明亦合譏，而傳云未知在齊、曹者，正以其卒葬詳錄，故依違之不信言耳。

十年，春，王正月，庚申，曹伯終生卒。

夏，五月，葬曹桓公。小國始卒，當卒月葬

時，而卒日葬月者，曹伯年老，使世子來朝，《春秋》敬老重恩，故爲魯恩錄之尤深。【疏】注「小國」至「尤深」。○解云：所傳聞之世，未錄小國卒葬，所聞之世乃始書之。其書之也，卒月葬時，文九年「秋，八月，曹伯襄卒」，冬，「葬曹共公」者是也。今卒日葬月者，正以敬老重恩故也。云云之說，當文皆自有解。

秋，公會衛侯于桃丘，弗遇。會者

何？期辭也。其言「弗遇」何？公不見

要也。時實桓公欲要見衛侯，衛侯不肯見，公以非禮動，見拒有恥，故諱使若會而不相遇。言弗遇者，起公要之也。弗者，不之深也，起公見拒深。傳言公不要見者，^①順經諱文。○見要，一遙反，注同。【疏】會者何？○解云：經既書會，作聚集之名，尋言弗遇，是未見之稱，故執不知問。

冬，十有二月，丙午，齊侯、衛侯、鄭伯來戰于郎。郎者何？吾近邑也。以言來也。

【疏】「郎者何」。○解云：欲言是邑，戰於其內，欲言非邑，經有城郎之文，故執不知問。○注「以言來也」。○

解云：凡言來者，鄉內之辭，今經言來，故知近邑也。而僖四年「楚屈完來盟于師」，是時在召陵，而言來者，據師道楚，故得言來。吾近邑，則其言「來戰于郎」

何？據齊師、宋師次于郎不言來，公敗宋師不言戰，龍

門之戰不舉地也。【疏】注「據齊師」至「不言來」。○解云：在莊十年。○注「公敗」至「不言戰」。○解云：隱十

年「公敗宋師于營」，莊十年「公敗宋師于乘丘」，莊十一年「公敗宋師于鄆」，凡有三經，宜隱十年以當之。○注

「龍門」至「地也」。○解云：即下十三年春，「公會紀侯、鄭伯。己巳，及齊侯、宋公、衛侯、燕人戰」云云，依《春秋

說》云是「龍門之戰」，而不言「戰于龍門」是也。近也。

①「要見」，阮校：「閩、監、毛本作『見要』。按：上云『時桓公欲要見諸侯』與此合，傳則云『公不見要也』。」

惡乎近？近乎圍也。地而言來者，明近都城，幾

與圍無異。不解戰者，從下說可知。○惡，音烏。明近，

附近之近。^①幾，音祈。【疏】「近也」至「圍也」。○解

云：近，讀如「附近」之「近」。國，讀如圍。言兵圍都城相

似，故言近乎圍也。考諸古本，「圍」皆作「國」字，而舊解

以國爲圍。此偏戰也，何以不言師敗績？據

十三年師敗績。偏，一面也。結日定地，各居一面，鳴鼓

而戰，不相詐。【疏】注「據十」至「相詐」。○解云：即龍

門之戰，「齊師、宋師、衛師、燕師敗績」是也。內不言

戰，言戰乃敗矣。《春秋》託王於魯。^②戰者，敵文

也。王者兵不與諸侯敵，戰乃其已敗之文，故不復言師

敗績。魯不復出主名者，兵近都城，明舉國無大小，當戮

力拒之。○不復，扶又反，下同。戮，音六，又力彫反，字

亦作「勦」。

十有一年，春，正月，齊人、衛人、鄭人

盟于惡曹。月者，桓公行惡，諸侯所當誅，屬上三國

來戰于郎，今復使微者盟，故爲魯懼，危錄之。○行，下

孟反。屬，音燭。今復，扶又反，下「故復」同。爲，于僞

反。【疏】注「月者」至「錄之」。○解云：正以微者盟例合

時，今而書月，故須解之。

夏，五月，癸未，鄭伯寤生卒。○寤，吾

故反。

秋，七月，葬鄭莊公。莊公殺段，所以書葬者，

段當國，本當從討賊辭，不得與殺大夫同例。【疏】注「莊

公」至「同例」。○解云：《春秋》之例，君殺無罪大夫，皆

去其葬，即成十年「晉侯孺卒」，^③注云「不書葬者，殺大夫

趙同」等是。今段有罪，故莊公書葬也。然則此言不得

與殺大夫同例者，謂不得與殺無罪大夫同例耳。

九月，宋人執鄭祭仲。祭仲者何？

鄭相也。^④不言大夫者，欲見持國重。○相，息亮反。

見，賢偏反，下同。【疏】「祭仲者何」。○解云：欲言無

①「附近」，原脫「近」字，今據京都本、再造善本、中華本補。

②「王」，原作「正」，今據京都本、再造善本、中華本改。

③「孺」，阮校：「閩、監、毛本『孺』作『孺』，是也。」據成

公十年經，作「孺」是。

④「鄭相也」，阮校：「唐石經作『鄭之相也』。嚴杰

云：《周禮·大司徒》正義引亦無「之」字。」

罪，聽脅立篡，欲言有罪，褒而稱字，故執不知問。何以不名？賢也。何賢乎祭仲？據身執君出，不能防難。○防難，乃旦反，下同。以爲知權也。權者，稱也，所以別輕重，喻祭仲知國重君輕。君子以存國，除逐君之罪，雖不能防其難，罪不足而功有餘，故得爲賢也。不引度量者，取其平實以無私。○稱，尺證反。別，彼列反。其爲知權奈何？古者鄭國處於留，先，鄭伯有善于鄆公者，通乎夫人，以取其國，而遷鄭焉，遷鄭都于鄆也。○鄆，古外反。而野留。^①野，鄙也。傳本上事者，解宋所以得執祭仲，因以爲戒。莊公死已葬，祭仲將往省于留，塗出于宋，宋人執之。宋人，宋莊公也。謂之曰：「爲我出忽而立突。」突，宋外甥。○爲，于僞反，下注「爲突」、「非能爲突」、「爲賂」、「爲突歸」、「爲承」同。祭仲不從其言，則君必死，國必亡。祭仲死，而忽旋爲突所驅逐而出奔。經不書忽奔，見微弱甚。是時宋強而鄭弱，祭仲探宋莊公本弑君而立，非能爲突，將以爲賂動，守死不聽，令自入，見國無拒

難者，必乘便將滅鄭，故深慮其大者也。○令自，力呈反，下同。便，婢面反。【疏】注「祭仲死」至「者也」。○解云：下十五年「秋，九月，鄭伯突入于櫟」，傳云「櫟者何？鄭之邑。曷爲不言入于鄭？未言爾。」^②曷爲未言爾？祭仲亡矣。然則曷爲不言忽之出奔？言忽爲君之微也。祭仲存則存矣，祭仲亡則亡矣者是。注「祭仲探宋莊公弑君而立」者，在桓二年。從其言，則君可以生易死，國可以存易亡，少遼緩之。宋當從突求賂，鄭守正不與，則突外垂於宋，內不行於臣下，遼假緩之。【疏】君可以生易死。○解云：謂易去死也。○「國可以存易亡」。○解云：易去亡也。則突可故出，而忽可故反，是不可得則病，使突有賢才，是計不可得行，則已病逐君之罪。【疏】則突可故出。○解云：突可以此之故出之也。○「而忽可故反」。

- ①「野留」，阮校：「何注：『野，鄙也。』按：《周禮·大司徒》職注引《春秋傳》曰：『遷鄭焉而鄆留。』「野」作「鄆」，與注合。『遷鄭焉』上無「而」字，與何本異。」
- ②「未」，原作「未」，今據京都本、再造善本、中華本、閣本改。

○解云：言忽可以此之故而反之也。○「是不可得則病」。○解云：言已終能出突而反忽，則爲權之成。若不能如是，乃爲其病矣。然後有鄭國。已雖病逐君之罪，討出突，然後能保有鄭國，稱愈於國之亡。^①【疏】然後有鄭國。○解云：言突有賢才，已計不行，雖然，仍須勉力討之。令忽有國，雖費功力，猶愈於國之亡也。古人之有權者，祭仲之權是也。古人，謂伊尹也。湯孫大甲驕蹇亂德，諸侯有叛志，伊尹放之桐宮，令自思過，三年而復成湯之道。前雖有逐君之負，后有安天下之功，猶祭仲逐君存鄭之權是也。○大，音泰。【疏】注「古人」至「之道」。○解云：出《書序》。《長義》云：「若令臣子得行，則閉君臣之道，啓篡弑之路。」解云：權之設，所以扶危濟溺，舍死亡無所設也。若使君父臨溺河井，寧不執其髮乎？是其義也。權者何？權者反於經，然後有善者也。權之所設，舍死亡無所設。設，施也。舍，置也。如置死亡之事不得施。【疏】「權者何」。○解云：欲言正，逐君立庶，欲言不正，今又言權，故執不知問。行權有道：自貶損

以行權，身蒙逐君之惡，以存鄭是也。不害人以行權。已納突，不害忽是也。殺人以自生，亡人以自存，君子不爲也。祭仲死則忽死，忽死則鄭亡。生者，乃所以生忽存鄭，非苟殺忽以自生，亡鄭以自存。反覆道此者，皆所以解上死亡不施於己。宋不稱公者，魯鄭之篡，^②首惡當誅，非伯執也。祭仲不稱行人者，時不銜君命出使，但往省留耳。執例時，此月者，爲突歸鄭奪正，鄭伯出奔。○覆，芳服反。使，所吏反。【疏】注「皆所」至「於己」。○解云：言上辟死辟亡，皆爲忽故也。○注「宋不」至「執也」。○解云：決成十五年「晉侯執曹伯歸于京師」稱爵也。即僖四年傳云「稱侯而執者，伯討也。稱人而執者，非伯討」是也。○注「祭仲」至「留耳」。○解云：決定六年「秋，晉人執宋行人樂祁犂」之屬稱行人也。○注「執例時」者。○解云：即祁犂言秋是也。而僖十九年六月，「己酉，邾婁人執鄫子用之」，而書日者，彼注云「日者，魯不能防正其女，以至於此，明當痛其女亡也」，當據正。^①「稱」，阮校：「鄂本『稱』作『猶』，疏亦云『猶愈於國之亡也』，當據正。」^②「之篡」，阮校：「鄂本作『立篡』，此誤。」

禍而自責之」。然則凡執例時，而在日月下者，皆當文有解。

突歸于鄭。突何以名？據忽復歸于鄭，

俱祭仲所納，繫國稱世子，不但名也。【疏】注「據忽」至「名也」。○解云：即十五年「鄭世子忽復歸于鄭」是。

挈乎祭仲也。挈猶提挈也。突當國，本常言鄭突，^①

欲明祭仲從宋人命，提挈而納之，故上繫於祭仲。不繫國者，使與外納同也。時祭仲勢可殺突，以除忽害，而立之者，忽內未能懷保其民，外未能結款諸侯，^②如殺之，則宋軍強乘其弱，滅鄭不可救，故少遼緩之。○挈，苦結反，提挈也。【疏】注「欲明」至「同也」。○解云：言與外納同者，即繫祭仲言于鄭是也。言似僖二十五年「楚人圍陳，納頓子于頓」、文十四年「晉人納接菑于邾婁」之屬是也。其言歸何？據小白言入。【疏】注「據小白言入」。○解云：即莊九年「齊小白入于齊」是也。順祭仲也。順其計策，與使行權，故使無惡。【疏】注「順其」至「無惡」。○解云：下十五年傳例云「歸者出入無惡」，故言此。

鄭忽出奔衛。忽何以名？據宋子既葬稱

子。【疏】注「據宋」至「稱子」。○解云：僖九年三月，「宋公禦說卒」，「夏，公會宰周公、齊侯、宋子」已下「盟于葵丘」是也。若然，案彼經文，宋公禦說三月卒，夏則公會宋子于葵丘，計應未葬，故注云：「宋未葬不稱子某者，出會諸侯，非居尸柩前，^③故不名也。」此云「宋子既葬稱子」者，謂以其非居尸柩之前，故時已葬之稱，^④而單言子，況此鄭忽之父，久已葬訖而反名，故難之。《春秋》伯、

子、男一也，辭無所貶。《春秋》改周之文，從殷之質，合伯、子、男爲一，一辭無所貶，皆從子，夷狄進爵稱子是也。忽稱子，則與諸侯改伯從子辭同，^⑤於成君無所貶損，故名也。名者，緣君薨，有降既葬名義也，此非罪貶也。君子不奪人之親，故使不離子行也。王者起所以

①「常」，阮校：「鄂本『常』作『當』，宜據正。」

②「款」，阮校：「鄂本作『助』。」

③「非居尸柩前」，阮校引浦鏜云：「注作『非尸柩之前』。」

④「時已」，杉浦校：「單疏鈔本作『將既』，單疏殘本作『時既』。按：『時』當『將』字誤。」

⑤「諸侯」，阮校：「鄂本『諸侯』作『春秋』，當據正。」

必改質文者，爲承衰亂救人之失也。天道本下，親親而質省，地道敬上，尊尊而文煩。故王者始起，先本天道以治天下，質而親親，及其衰敝，其失也親親而不尊。故后王起，^①法地道以治天下，文而尊尊，及其衰敝，其失也尊尊而不親，故復反之於質也。質家爵三等者，法天之有三光也。文家爵五等者，法地之有五行也。合三從子者，制由中也。○省，所景反。【疏】注「夷狄」至「名也」。○解云：襄二十九年「吳子使札來聘」，哀十三年「公會晉侯及吳子于黃池」之屬是也。○注「名者」至「義也」。○解云：言君薨稱子某，既葬稱子者，正以既葬稍殺，故不得名也。然則初薨所以名者，降於既葬也。今鄭忽書名者，緣君薨而名之義也。○注「天道本下親親而質省」者，已下至「反之於質」。皆出於《樂說》文。○注「質家爵三等法天之有三光也」已下，皆《春秋說》文也。

柔會宋公、陳侯、蔡叔盟于折。柔者何？吾大夫之未命者也。以俠卒也。輒發傳

者，無氏嫌貶也。所以不卒柔者，深薄桓公，不與有恩禮於大夫也。盟不日者，未命大夫盟會用兵，上不及大夫，下重於士，罰疑從輕，故責之略。蔡侯稱叔者，^②不能防正其姑姊妹，使淫於陳佗，故貶在字例。○折，之設反，

又時設反。一本作「析」，思歷反。【疏】「柔者何」。○解云：欲言大夫，經不言氏，欲言微者，而書其名，故執不知問。○注「以俠卒也」。○解云：隱九年春「俠卒」，傳云：「俠者何？吾大夫之未命者也。」彼注云：「以無氏而卒之也。」然則此亦無氏而書見，故知未命之大夫也。○注「輒發」至「貶也」。○解云：凡內大夫不書氏有二義：若未命大夫亦無氏，而此與俠是也；^③貶者亦無氏，即無駭與翬之屬是也。故此注云「無氏嫌貶也」。○注「所以至「夫也」。○解云：欲道俠之卒當隱公之世，故得書之。○注「盟不」至「之略」。○解云：《春秋》之例，不信者日，下十二年「及鄭師伐宋。丁未，戰于宋」，是其違信矣。不日者，正以未命大夫，故責之略也。○注「蔡稱」至「字例」。○解云：正以隱八年「蔡侯考父卒」，故有其姑姊妹淫於陳侯佗之事。在上六年。

①「后」，阮校：「鄂本『后』作『後』，此非。」

②「蔡侯稱叔者」，阮校：「鄂本無『侯』，此衍。疏標起訖亦作『蔡稱』。」

③「而」，阮校引浦鏜云：「『而』疑『則』字誤。」

公會宋公于夫童。○夫童，音扶，下音鍾，又如字，《左氏》作「夫鍾」。

冬，十有二月，公會宋公于闕。○闕，口暫反。

十有二年，春，正月。

夏，六月，壬寅，公會紀侯、莒子，盟于毆蛇。○毆蛇，丘于反，又音曲侯反。蛇，音移，又音池。《左氏》作「曲池」。

秋，七月，丁亥，公會宋公、燕人，盟于穀丘。○燕，音胭。

八月，壬辰，陳侯躍卒。不書葬者，佗子也。佗不稱侯者，嫌貶在名例，不當絕，故復去躍葬也。○躍，予若反。佗子，大何反。故復，扶又反，下同。去，起呂反。

公會宋公于郟。○郟，音談，二傳作「虛」。

冬，十有一月，公會宋公于龜。

丙戌，公會鄭伯，盟于武父。○父，音甫。

丙戌，衛侯晉卒。不蒙上日者，《春秋》獨晉

書立記卒耳。當蒙上日，與不嫌異於篡例，故復出日明同。【疏】注「不蒙」至「明同」。○解云：《春秋》之例，篡

不明者，至卒時合去日以略之，即僖二十四年冬「晉侯夷吾卒」、襄十八年冬十月「曹伯負芻卒于師」之屬是也。

若其篡明，有立、人之文者，不嫌非篡，故不勞去日，即僖十七年冬十二月「乙亥，齊侯小白卒」、莊二十一年「夏，

五月，辛酉，鄭伯突卒」之屬是也。今此衛侯晉亦隱四年有立文，不嫌非篡，當日。若不重言「丙戌」，則嫌不蒙上

日，以其篡故略之，是以重言「丙戌」以明嫌也。而言「獨晉書立」者，鄭突、齊小白皆上有入文，^①不言立，故言獨。

十有二月，及鄭師伐宋。丁未，戰于

宋。戰不言伐，此其言伐何？辟嫌也。

惡乎嫌？嫌與鄭人戰也。時宋主名不出，不言

伐，則嫌內微者與鄭人戰于宋地，故舉伐以明之。宋不

出主名者，兵攻都城，與郎同義。○惡乎，音烏，十三年

傳同。【疏】注「宋不」至「同義」。○解云：上十年「來戰

①「入」，原作「人」，今據京都本、再造善本、中華本、閣

本改。

于郎」，注云「魯不復出主名者，兵近都城，明舉國無大小，當勦力拒之」是也。此偏戰也。何以不言師

敗績？內不言戰，言戰乃敗矣。【疏】「此偏」

至「敗矣」。○解云：上十年郎戰之下已有此傳，今復發之者，上經來戰于魯，此則往戰于宋，嫌其異，故明之。

十有三年，春，二月，公會紀侯、鄭伯。

己巳，及齊侯、宋公、衛侯、燕人戰，齊師、宋師、衛師、燕師敗績。曷爲後日？據鞏之

戰先書日。○鞏，音安。【疏】注「據鞏」至「書日」。○解

云：成二年六月癸酉云云，「及齊侯戰于鞏」是也。恃

外也。其恃外奈何？得紀侯、鄭伯，然後

能爲日也。得紀侯、鄭伯之助，然後乃能結戰日以

勝。君子不掩人之功，不蔽人之善，故後日以明之。○

勝，詩證反。蔽，必婢反。內不言戰，此其言戰

何？據公敗宋師于菅。○菅，古顏反。【疏】注「據公」

至「于菅」。○解云：在隱十年。從外也。從外諸侯

相與戰例。曷爲從外？據戰于宋，不從外言敗績。

【疏】注「據戰」至「敗績」。○解云：即上十二年也，于時

有鄭人，不書敗績之文矣。恃外，故從外也。明當

歸功於紀、鄭，故從紀、鄭言戰。何以不地？據在下

句。【疏】注「據在下句」。○解云：即下云「郎亦近矣，郎

何以地」。近也。惡乎近？近乎圍。郎亦

近矣，郎何以地？郎猶可以地也。郎雖近，

猶尚可言其處。今親戰龍門，兵攻城池，尤危，故恥之。

績，功也。非義不戰，故以功言之。不言功者，取其積聚

師衆，有尊卑上下次第行伍，必出萬死而不奔此，^①故以

自敗爲文，明當坐也。燕戰稱人，敗績稱師者，重敗也，

戰少而敗多。言及者，明見我者爲主，^②故得汲汲敗勝之

文。○處，昌慮反。行，戶郎反。【疏】「郎猶可以地也」。

○解云：即上十年「齊侯、衛侯、鄭伯來戰于郎」是也。○

注「郎雖」至「其處」。○解云：謂郎雖在郊內，仍非攻城，

猶可以舉其地。○注「今親」至「恥之」。○解云：《春秋

說》云「龍門之戰，民死傷者，滿溝也」者，主說此經，故知

之。○注「績功」至「不戰」。○解云：凡書兵者，正得奉

①「此」，阮校：「鄂本「此」作「北」，當據正。」

②「明見我者爲主」，阮校：「按：「者」字當衍。」

王命伐無禮，乃有戰事，故言非義不戰。○注「必出萬死」。○解云：若武王萬民致死而定天下之類。○注「燕戰」至「敗也」。○解云：蓋師不盡戰，故言戰少，敗時悉走，故言敗多。而莊二十八年「齊人伐衛，衛人及齊人戰，衛人敗績」，傳即據此經云「敗者稱師，衛何以不稱師？未得乎師也」。彼注云「未得成列爲師也」。詐戰不言戰，言戰者，衛未有罪，方欲使衛主齊見直文也。者是。

三月，葬衛宣公。背殯用兵而月，不危之者，

衛弱於齊，宋，不從亦有危，故量力不責也。○背殯，音佩，後「背殯」皆放此。【疏】注「背殯」至「責也」。○解云：隱三年傳云：「當時而不日，正也。當時而日，危不得葬也。」然則衛宣公去年十一月卒，至今年三月，正當五月之際，而又背殯用兵，宜書日以見危，而不日者，正以量力不責故也。

夏，大水。爲龍門之戰，死傷者衆，民悲哀之所致。○爲，于僞反。

秋，七月。

冬，十月。

十有四年，春，正月，公會鄭伯于曹。

無冰。何以書？記異也。周之正月，夏

之十一月，法當堅冰。無冰者，溫也。此夫人淫泆，陰而陽行之所致。○泆，音逸。行，下孟反。

夏，五。鄭伯使其弟語來盟。「夏五」

者何？無聞焉爾。來盟者，聘而盟也。不言聘

者，舉重也。內不出主名者，主國也，莅盟可知。莅盟，

來盟例皆時。時者，從內爲王義，明王者當以至信先天

下。○莅盟，音利，又音類，下同。【疏】「夏五者何」。○

解云：正以文異常例，故執不知問。○注「莅盟」至「天

下」。○解云：其莅盟書時者，僖三年「冬，公子友如齊莅

盟」，定十一年冬「叔還如鄭莅盟」之屬是也。其來盟書

時者，宣七年「春，衛侯使孫良夫來盟」之屬是也。而文

十五年春，「三月，宋司馬華孫來盟」書月，彼注云「月者，

文公微弱，大夫秉政，宋亦蔽于三世之黨，一亂結盟，故

不與信辭」是也。然則來盟之例，例不言月，而此言「夏

五」，師所不說，何氏以「五」字或衍文，故如此解。

秋，八月，壬申，御廩災。御廩者何？

稔盛委之所藏也。黍稷曰稔，在器曰盛。委，積

也。御者，謂御用于宗廟。廩者，釋治穀名。禮，天子親

耕，東田千畝，諸侯百畝。后夫人親西郊采桑，以共粢盛祭服，躬行孝道，以先天下。○廩，力甚反。粢盛，音咨，下音成。委，于鬼反，注同。積，子賜反。共，音恭。【疏】「御廩者何」。○解云：欲言宮室，而文言御廩，欲言倉庫，今被災之，於義不强，故執不知問。○注「廩者釋治穀名」。○解云：謂廩之言藻之義故也。^①○注「禮天」至「天下」。○解云：皆出《祭義》之文。「御廩災，何以書」者，嫌覆問上粢盛委之所藏，故不但言何以書。御廩災，何以書？記災也。火自出燒之曰災。先是龍門之戰，死傷者衆，桓無惻痛於民之心，不重宗廟之尊，逆天危先祖，鬼神不饗，故天應以災御廩。○應，應對之應。【疏】注「火自」至「曰災」。○解云：《公羊》之例，內悉言災，而復言火自出燒之者，人《春秋》始有此災，欲通人火不書之義也。乙亥，嘗。常事不書，此何以書？譏。何譏爾？譏嘗也。譏新有御廩災而嘗之。曰：猶嘗乎？難曰：四時之祭不可廢，則無猶嘗乎？○難，乃旦反。御廩災，不如勿嘗而已矣。當廢一時祭，自責以奉天災也。知不以不時者，書本不當嘗也。【疏】注「知不」至「嘗也」。○

解云：周之八月，非夏之孟秋，而反爲嘗，故以不時言之。冬，十有二月，丁巳，齊侯祿父卒。

宋人以齊人、衛人、蔡人、陳人伐鄭。

以者何？行其意也。以己從人曰行。言四國行

宋意也。宋前納突求賂，突背恩伐宋，故宋結四國伐之。

四國本不起兵，當分別之，故加以也。宋恃四國乃伐鄭，

四國當與宋同罪，非爲四國見輕重。○背，音佩。別，彼

列反。見，賢徧反。【疏】「以者何」。○解云：正以宋非

強國而以齊、衛，故執不知問。○注「宋前納突求賂」。

○解云：上十一年宋人執鄭祭仲，「突歸于鄭」是。○注

「突背恩伐宋」者。○解云：上十二年「及鄭師伐宋。丁

未，戰于宋」是也。

十有五年，春，二月，天王使家父來求

車。何以書？譏。何譏爾？王者無求，

求車非禮也。王者千里，幾內租稅，足以共費，四方

^①「藻」，阮校：「『藻』疑『澡』」。

^②「御廩災」至「但言何以書」，阮校：「按此釋下傳，當另節屬下。」

各以其職來貢，足以尊榮，當以至廉無爲率先天下，不當求。求則諸侯貪，大夫鄙，士庶盜竊。求例時，此月者，桓行惡不能誅，反從求之，故獨月。○共費，音恭，下芳味反。行，下孟反，下「行惡」同。【疏】「何以書」至「禮也」。○解云：隱三年「武氏子來求賻」之下，傳云：「何以書？譏。何譏爾？喪事無求，求賻非禮也。」然則彼已有傳，而重發之者，正以彼云「喪事無求」，恐此吉時得求，^①故明之。○注「諸侯」至「盜竊」。○解云：相對爲優劣之稱也。○注「求例時」。○解云：隱三年「秋，武氏子求賻」，文九年「春，毛伯來求金」之屬是也。

三月，乙未，天王崩。桓王也。

夏，四月，己巳，葬齊僖公。當時而日者，

背殯伐鄭，危之。【疏】注「當時」至「危之」。○解云：去年十二月齊侯卒，至今年四月，是爲當時。隱三年傳云：「當時而不日，正也。當時而日，危不得葬。」今此書日，故曰「危」也。其背殯伐鄭者，即去年冬十二月「宋人以齊人」已下「伐鄭」是。

五月，鄭伯突出奔蔡。突何以名？據

衛侯出奔楚不名。不連爵問之者，并問。上已名，今復

名，故使文相顧。○復，扶又反，下注「故復」，及傳文「復入」并注下「不復」皆同。【疏】注「據衛」至「不名」。○解云：在僖二十八年夏。○注「不連」至「并問」。○解云：正以下十六年傳云「衛侯朔何以名」，哀八年傳云「曹伯陽何以名」，故決之。○注「上已」至「相顧」。○解云：欲言十一年已書名，故言復也。奪正也。明祭仲得出之，故復於此名，著其奪正，不以失衆錄也。月者，大國奔例月，重乖離之禍，小國例時也。^②【疏】注「著其」至「錄也」。○解云：決襄十四年夏四月「己未，衛侯衍出奔齊」之屬，書其名者，爲失衆錄之故也。○注「月者」至「之禍」。○解云：下十六年十一月「衛侯朔出奔齊」，及此書五月之屬皆是。○注「小國」至「時也」。○解云：昭三年冬「北燕伯款出奔齊」之屬是也。鄭世子忽復歸于鄭。其稱世子何？據上出奔不稱世子。【疏】注「據上」至「世子」。○解云：上十一年「鄭忽出奔衛」是也。復正也。欲言鄭忽，則嫌其出奔還入，與當

① 「得」，單疏殘本作「後」。

② 「時也」，阮校：「鄂本無「也」，此衍。疏標起訖同。」

國同文，反更成上鄭忽爲當國，故使稱世子明復正，以效祭仲之權，亦所以解上非當國也。【疏】注「欲言」至「復正」。○解云：莊九年夏，「齊小白入于齊」，傳云「曷爲以國氏？」當國也「者是也」。○注「以效祭仲之權」。○解云：即上十一年傳云「而忽可故反」是也。曷爲或言歸，或言復歸？復歸者，出惡，歸無惡。復入者，出無惡，人有惡。入者，出入惡。歸者，出入無惡。皆於還人乃別之者，入國犯命，禍重也。忽未成君出奔，不應絕。出惡者，不如死之榮也。入無惡者，出不應絕，則還人不應盜國。○別，彼列反。【疏】「曷爲或言歸」。○解云：僖三十年「衛侯鄭歸于衛」之屬是。○「或言復歸」。○解云：此經是也。○「復入者」至「有惡」。○解云：襄二十三年「晉欒盈復入于晉」之屬是也。○「入者出入惡」。○解云：下文「許叔入于許」，「鄭伯突入于櫟」之屬是也。

許叔入于許。稱叔者，春秋前失爵，在字例

也。入者，出入惡，明當誅也。不書出時者，略小國。【疏】注「稱叔」至「字例」。○解云：正以莊十六年「同盟于幽」，經書許男故也。○注「不書」至「小國」。○解

云：正上文忽與突出入並書故。

公會齊侯于鄆。○鄆，戶老反，又火各反。

《左傳》作「艾」，《穀梁》作「蒿」。^①

邾婁人、牟人、葛人來朝。皆何以稱

人？據言朝也。【疏】注「據言朝也」。○解云：正以

隱十一年傳云「諸侯來曰朝」。夷狄之也。桓公行

惡，而三人俱朝事之。三人爲衆，衆足責，故夷狄之。

秋，九月，鄭伯突入于櫟。櫟者何？

鄭之邑。曷爲不言入于鄭？據齊陽生立陳乞

家，言入于齊。○櫟，力狄反，一音匹沃反。【疏】「櫟者

何」。○解云：欲言國都，不言鄭，欲言入于鄭，復言櫟

邑，故執不知問。○注「據齊」至「于齊」。○解云：在哀

六年。彼傳云「景公死而舍立，陳乞迎陽生于諸其家」，

「諸大夫不得已，皆逡巡北面，再拜稽首，而君之爾」。然

則陽生實入于陳乞家，而言入于齊。今突入于櫟，而不

言「于鄭」，故難之。末言爾。末者，淺也。解不言入

①「左傳作艾穀梁作蒿」，阮校：「按：『艾』、『蒿』同物也，『蒿』、『鄆』同音也。」

國意。曷爲末言爾？據俱篡也。祭仲亡矣。

亡，死亡也。祭仲亡則鄭國易得，故明入邑則忽危矣，不須乃入國也，所以效君必死，國必亡矣。○易，以豉反。

然則曷爲不言忽之出奔？據上言出奔也。言

忽爲君之微也。祭仲存則存矣，祭仲亡則亡矣。言忽微弱甚於鴻毛，僅若匹夫之出耳，故不復

錄，皆所以終祭仲之言，解不虛設危險之嫌。【疏】注「皆

所」至「之言」。○解云：上云祭仲亡則亡矣者，所以效十

一年「君必死，國必亡」之文。今此傳云「言忽爲君之微

也」已下者，可以終十一年「國可以存易亡」之文，故言皆

所以終祭仲之言也。十一年雖不出祭仲之口，但傳家爲

祭仲而爲此辭，故得云祭仲之言也。○注「解不」至「之

嫌」。○解云：權者，危險之事，祭仲比來欲爲君存國，非

徒然也。但國內凡人嫌其虛設，故作經傳以解之，故曰

「解不虛設危險之嫌」。

冬，十有一月，公會齊侯、宋公、衛侯、

陳侯于侈，伐鄭。月者，善諸侯征突，善錄義兵也。

不舉伐爲重者，用兵重於會，嫌月爲桓伐有危舉，不爲義

兵錄，故復錄會。○侈，昌氏反，^①二傳作「袤」。爲桓，于

僞反，下同。【疏】注「月者」至「錄會」。○解云：正以隱

七年「秋，公伐邾婁」之屬，則言征伐例時，而此書月，故

決之。

十有六年，春，正月，公會宋公、蔡侯、

衛侯于曹。

夏，四月，公會宋公、衛侯、陳侯、蔡侯

伐鄭。

秋，七月，公至自伐鄭。致者，善桓公能疾

惡同類，比與諸侯行義兵伐鄭。致例時，此月者，善其比

與善行義，故以致，復加月也。○復，扶又反。【疏】注

「致者」至「伐鄭」。○解云：桓是篡賊，動作有危，今能疾

篡脫危而至，故致之。○注「致例時」。○解云：即上二

年「冬，公至自唐」之屬是。

冬，城向。○向，式亮反。

十有一月，衛侯朔出奔齊。衛侯朔何

以名？據衛侯出奔楚不名。【疏】「衛侯朔何以名」。

①「氏」，宋本《釋文》作「示」。

○解云：嫌問出奔之屬何以名，故復連句問之。○注「據衛」至「不名」。○解云：在僖二十八年。絕。曷爲絕之？據俱奔也。得罪于天子也。其得罪于天子奈何？見使守衛朔，朔，十二月朔政事也。月所以朝廟告朔是也。而不能使衛小衆。時天子使發小衆，不能使行。越在岱陰齊，越，猶走也。岱，岱宗，泰山也。山北曰陰。先言岱陰，後言齊者，明名山大澤不以封諸侯，以爲天地自然之利，非人力所能加，故當與百姓共之。傳著朔在岱陰者，明天子當及是時，未能交連五國之兵早誅之。【疏】注「明天子」至「誅之」。○解云：其五國者，莊五年「冬，公會齊人、宋人、陳人、蔡人伐衛」是。屬負茲舍，不即罪爾。屬，託也。天子有疾稱不豫，諸侯稱負茲，大夫稱犬馬，士稱負薪。舍，止也。①託疾止不就罪。○屬負茲，音燭，注同。屬，託也。諸侯有疾稱負茲，言朔託有疾。【疏】注「天子」至「負薪」者。○解云：皆漢禮之名。豫，詰爲樂。諸侯言負茲者，謂負事繁多，故致疾。大夫言犬馬者，代人勞苦，行役遠方，故致疾。士稱負薪者，祿薄不足代耕，故致疾。

十有七年，春，正月，丙辰，公會齊侯、紀侯盟于黃。

二月，丙午，公及邾婁儀父盟于趯。本

失爵在名例，中朝桓公稱人。今此不名者，蓋以爲儀父最先與隱公盟，明元功之臣，有誅而無絕。○趙，翠癸反。【疏】注「本失」至「在名例」。○解云：正以隱元年得褒，乃書字故也。○注「中朝」至「名者」。○解云：即上十五年「邾婁人、牟人、葛人來朝」是。○注「蓋以」至「之臣」。○解云：隱元年「公及邾婁儀父盟于昧」是也。○注「有誅而無絕」。○解云：有誅者，十五年稱人，是責之。無絕者，今還其字，無絕其功故也。

五月，丙午，及齊師戰于奚。②夏者，陽也。

月者，陰也。去夏者，明夫人不繫於公也。此戰蓋由桓公曰「同非吾子」云爾。○去，起吕反，下同。【疏】注「此戰」至「云爾」。○解云：莊元年傳云「公曰『同非吾子』」

①「止」，原作「正」，今據余本、閣本改。

②「奚」，阮校引惠棟云：「《左氏》亦作『奚』，《穀梁》作『郎』。」

是。然則夫人姜氏三年至魯，六年九月莊公乃生，桓公何云「同非吾子」？蓋夫人譖之也。或云：蓋在齊之日已共私通，魯侯知之，悼恨之言耳。

六月，丁丑，蔡侯封人卒。

秋，八月，蔡季自陳歸于蔡。稱字者，蔡侯封人無子，季次當立，封人欲立獻舞，而疾害季，季辟之陳。封人死，歸反奔喪，思慕三年，卒無怨心，故賢而字之。出奔不書者，方以起季奔喪歸，故使若非出奔歸。不稱弟者，見季不受父兄之尊，起宜為天子大夫。天子大夫不得與諸侯親通，故魯季子、紀季皆去其氏，唯卒以恩錄親，季友、叔肸卒是也。【疏】注「魯季」至「其氏」。○解云：即閔元年「季子來歸」，莊三年「紀季以酈入于齊」是也。○「唯卒」至「是也」。^①○解云：即僖十六年「公子季友卒」、宣十七年「公弟叔肸卒」是也。

癸巳，葬蔡桓侯。稱侯者，亦奪臣子辭也。

有賢弟而不能任用，反疾害之，而立獻舞，國幾并於蠻荆，故賢季抑桓稱侯，所以起其事。○幾，音祁。并，必政反，又如字。【疏】注「稱侯」至「其事」。○解云：正以諸侯之葬皆稱公，故決之。

及宋人、衛人伐邾婁。

冬，十月，朔，日有食之。是後夫人譖公，為齊侯所誘殺。去日者，著桓行惡，故深為內懼其將見殺無日。○行，下孟反。為，于僞反。【疏】注「去日」至「無日」。○解云：若以隱三年傳言之，即某月某日朔日有食之者，食正朔。若言某月某日日有食之者，謂二日食也。若言某月日有食之者，謂食在晦也。今此言朔而不書日，故此解之。

十有八年，春，王正月，公會齊侯于

濼。○濼，郎沃反，又音洛。《說文》云「匹沃反」。公、夫人姜氏遂如齊。^②公何以不言「及夫人」？據公及夫人會齊侯于陽穀。【疏】注「據公」至「陽穀」。○解云：在僖十一年。夫人外也。若言夫人已為公所絕外也。【疏】注「若言」至「外也」。○解

^①「唯卒至是也」，杉浦校：「單疏鈔本、單疏殘本作「注唯卒云云」。按：「唯」上當有「注」字，此誤脫。」

^②「公夫人姜氏遂如齊」，阮校：「鄂本「公」下有「與」字是也。《左》、《穀》皆有「與」。」

云：欲言不假言及，是外之意。「夫人外」者何？
內辭也。內爲公諱辭。○爲，于僞反。其實夫人
外公也。時夫人淫於齊侯而譖公，故云爾。言遂者，
起夫人本與公出會齊侯于濼，故得并言「遂如齊」。不書
夫人會，書夫人遂者，明遂在夫人。齊侯誘公使遂如齊，
以夫人譖公故。○譖公，側鳩反，下同。

夏，四月，丙子，公薨于齊。不書齊誘殺公
者，深諱恥也。地者，在外爲大國所殺，於國此危。^①國
重，故不暇隱也。【疏】注「不書」至「恥也」。○解云：如
此注者，正決昭十一年「楚子虔誘蔡侯般殺之于申」之文
也。○注「地者」至「隱也」。○解云：魯侯被殺，例不舉
地，故隱公、閔公直言薨而已。今此言齊，故如此解。

丁酉，公之喪至自齊。凡公薨外致日者，危
痛之。外多窮厄伐喪，內多乘便而起，不可不戒慎。加
「之」者，喪者死之通辭也，本以別生死，^②不以明貴賤，非
配公之稱，故加「之」以絕。○便，婢面反。別，彼列反。
稱，尺證反。【疏】注「凡公」至「痛之」。○即此及定元年
「夏，六月，癸亥，公之喪至自乾侯」之屬是也。

秋，七月。

冬，十有二月，己丑，葬我君桓公。賊
未討，何以書葬？據隱公也。讎在外也。讎
在外，則何以書葬？據俱讎也。君子辭也。

時齊強魯弱，不可立得報，故君子量力，且假使書葬。於
可復讎而不復，乃責之，諱與齊狩是也。桓者，諡。禮，
生有爵，死有諡，所以勸善懲惡也。禮，諸侯薨，天子諡
之。卿大夫受諡於君，唯天子稱天以諡之。蓋以爲祖祭
乃諡，「丁酉，公之喪至自齊」，「丁巳，葬我君定公，雨不
克葬，戊午，日下昃乃克葬」是也。以公配諡者，終有臣
子之辭。上葬日者，起生者之事也，且明王者當遣使者
與諸侯共會之。加「我君」者，錄內也，猶君薨地也。○
懲，直升反。使，所吏反。【疏】注「諱與齊狩是也」。○
解云：莊四年「冬，公及齊人狩于郕。公曷爲與微者狩？
齊侯也。齊侯則其稱人何？諱與讎狩」是也。○注「禮
諸」至「諡之」。○解云：即《曾子問》曰：「賤不誄貴，幼
不誄長，禮也。」鄭注云「誄，累也。累列生時行迹，讀之

① 「此」，阮校：「鄂本『此』作『尤』，當訂正。」
② 「生死」，阮校：「鄂本、閩、監、毛本皆作『死生』，是也。」

以作謚。謚當由尊者成」。又云「唯天子稱天以誅之」，注云「以其無尊焉」。又云「諸侯相累，^①非禮也」是也。○「蓋以」至「是也」。○解云：所以知祖祭乃謚者，正以「公之喪至自齊」，未有謚。「丁巳，葬我君定公」，欲葬遇雨，不得葬。經書定公，故知宜是作祖祭時爲之也。《禮記·檀弓下》篇云：「公叔文子卒，其子成請謚於君云：『日月有時，葬矣。』^②請所以易其名者。」義亦通於此。○注「上葬」至「地也」。○解云：考諸古本，皆無「上」字，衍文。隱三年傳「過時而日，隱之」，注云「隱痛賢君不得以時葬，『丁亥，葬齊桓公』是也」。然則此君四月薨，至于今十二月，亦是過時而日者，亦是痛其賢君不得以時葬，非其辭貞，故曰起生者之事，言其非爲臣子矣。或者上葬爲此上文之葬，若昭三年「葬滕成公」之下，注云「月者，襄公上葬，諸侯莫肯加禮，獨滕子來會葬，故恩錄之」之類也。

監本附音春秋公羊注疏桓公卷第五

① 「諸侯相累」，《禮記·曾子問》今作「諸侯相誅」，孔穎達疏引同。

② 「葬」上，《檀弓》今有「將」字。

監本附音春秋公羊注疏莊公卷第六

起元年，盡七年^①

何休學

元年，春，王正月。公何以不言即

位？《春秋》君弑，^②子不言即位。君弑，

則子何以不言即位？據繼君不絕也。○君弑，

申志反，下皆同。【疏】「公何以不言即位」。○解云：隱

元年傳云「公何以不言即位」，注云「據文公言即位」。然

則彼已注解，是以此處不復注之。○「春秋」至「即位」。

○解云：而言《春秋》者，^③欲道孔子意。《春秋》之內皆

爾，非止此處，故舉其大號言之。是以僖元年傳云：「公

何以不言即位？繼弑君，子不言即位。此非子也，其稱

子何？臣子一例也。」然則宣公之傳不言子，直以其無

臣子之道，不念其君父，亦不由宣公非子赤之子，故不言

子。隱之也。孰隱？隱子也。隱痛是子之禍，

不忍言即位。【疏】「孰隱」至「子也」。○解云：莊公既踰

年即位之後，合稱成君，而言子者，凡諸侯於其封內三年

稱子故也。若表臣子之心，不可曠年無君，乃稱公耳。

三月，夫人孫于齊。孫者何？孫猶

孫也，孫猶遁也。○孫，音遜，下及注皆同。孫猶遁也。

遁，徒困反。^④【疏】「孫者何」。○解云：欲言初出，實先

在齊，欲言非初出，而與公孫文同，故執不知問。○「孫

猶孫也」。○解云：凡言孫者，孫遁自去之辭。今此言

孫，與《尚書序》云「將孫於位，讓於虞舜」義同，故言孫猶

孫也，猶彼文也。而注云「孫猶遁也」者，欲解彼此之孫，

皆為孫遁自去之義，故曰遁也。內諱奔，謂之孫。

言「于齊」者，盈諱文。【疏】「內諱奔謂之孫」。○解云：

據百二十國寶書以為《春秋》，非獨魯也。而言內者，託

王於魯，故言內，猶言內其國，外諸夏之義也。然則內魯

① 「起元年盡七年」，單疏殘本起元年，盡六年。

② 「君弑」，阮校：「《釋文》作『君殺』，云『申志反，下皆

同』。」

③ 「而」，阮校：「疑衍。」

④ 「困」，原作「曰」，今據京都本，再造善本、中華本改。

爲王，王者無出奔之義，故謂之孫矣。而僖二十四年「冬，天王出居于鄭」言出者，彼傳云「王者無外，此其言出何？不能於母也」，^①注云「不能事母，罪莫大於不孝，故絕之言出也」者是。○注「言于」至「諱文」。○解云：凡言于某者，從此往彼之辭。今此夫人實非始往而言于齊，與昭二十五年「公孫于齊」文同者，盈滿其諱文，若今始然，故云「言于齊者，盈諱文」耳。夫人固在齊矣，其言「孫于齊」何？據公、夫人遂如齊，未有來文。【疏】注「據公」至「來文」。○解云：公、夫人遂如齊，在桓十八年。言未有來文者，欲決文九年春「夫人姜氏如齊」，「夫人姜氏至自齊」之文耳。若然，案下二年注云「不致者，本無出道，有出道乃致，奔喪致是也」。若然，則何氏指文九年「夫人姜氏如齊」，亦無出道，而責未有來文者，夫人如齊之時，得公之命，非無出道，故如此解。念母也。固在齊而書孫者，所以起念母也。正月以存君，念母以首事。禮，練祭取法存君，夫人當首祭事。時莊公練祭，念母而迎之，當書迎，反書孫者，明不宜也。【疏】注「禮練」至「宜也」。○解云：存君者，即襄二十九年注云：「正月歲終而復始，臣子喜其君父與歲

終而復始，執贄存之。」然則今此練祭者，亦是臣子閔君父往年此日沒，今年復此日，存而禮祭之，取法存君矣。言「夫人當首祭事」者，謂夫人當爲首而營其祭事也。言「時莊公練祭」者，謂桓公去年四月薨，今年三月方爲練祭，而欲迎母，非謂此時已爲練矣。夫人何以不稱姜氏？據夫人姜氏孫于邾婁。【疏】注「據夫」至「邾婁」者。^②○解云：閔二年經文。貶。曷爲貶？據俱以孫爲文。與弑公也。其與弑公奈何？夫人譖公於齊侯：如其事曰訴，加誣曰譖。○與殺，音預，下同。譖，側鳩反，加誣曰譖。「公曰：『同非吾子，齊侯之子也。』」以淫於齊侯所生。【疏】「公曰」至「子也」。○解云：夫人加誣此言，非謂桓公實有此言，何者？正以夫人之至在桓三年秋，子同之生乃在六年九月故也。齊侯怒，與之飲酒。欲醉而殺之。禮，飲酒不過三爵。【疏】注「禮飲不過三爵」。^③○

① 「於」，阮校：「案：僖二十四年傳作「乎」。」

② 「者」，阮校：「閔、監、毛本作「○」。」

③ 「注禮飲不過三爵」，據上注文，「飲」下當脫「酒」字。

解云：《玉藻》云「君子之飲酒也，受一爵而色灑如也」，注云：「灑如，肅敬貌也。」「二爵而言言斯」，注云：「言言和敬貌。」^①「禮已，三爵而油油」，注云：「油油，悅敬貌。」「以退」，注云「禮，飲酒過三爵則敬殺，可以去矣也」者是也。^②於其出焉，使公子彭生送之。於其乘焉，於其將上車時。○將上，時掌反，下同。擗幹而殺之。^③擗，折聲也。^④扶上車，以手擗折其幹。○擗幹，路合反，本又作「協」，亦作「拉」，皆同，折聲也。幹，音古旦反，脇也。【疏】「於其」至「送之」。○解云：與下句絕讀。○「於其乘焉擗幹而殺之」。○解云：二句連讀之。○注「扶上」至「幹」。○解云：折音如字。念母者，所善也。則曷爲於其念母焉貶？據貶必於其重。【疏】「念母者所善也」。○解云：謂念母者，宜《春秋》之所善也。○注「據貶必於其重」。○解云：即傳元年傳云：「夫人何以不稱姜氏？貶。曷爲貶？與弑公也。然則曷爲不於弑焉貶？貶必於其重者，莫重乎其以喪至也。」注云「刑人于市，與衆棄之，故必於其臣子集迎之時貶之，所以明誅得其罪」是也。不與念母也。念母則忘父，背本之道也，故絕文姜不爲不孝，距

崩殯不爲不順，脅靈社不爲不敬，蓋重本尊統，使尊行於卑，上行於下。貶者，見王法所當誅。至此乃貶者，并不與念母也。又欲以孫爲內見義，^⑤明但當推逐去之，亦不可加誅，誅不加上之義。非實孫，月者，起練祭左右。○背，音佩。崩殯，苦怪反，下五怪反。見王，賢徧反，下同。爲內，于僞反，下「爲卑」、「爲營」同。去，起呂反。【疏】注「故絕」至「不順」。○解云：謂貶氏是也。「距崩殯不爲不順」者，哀三年傳云「曼姑受命乎靈公而立輒，

① 「和敬貌」，阮校云：「何校本此下有『斯猶耳也』四字，與《玉藻》注合。」

② 「去矣也者是也」，阮校：「上『也』當衍。」今按：《玉藻》注無此「也」字。

③ 「擗幹而殺之」，阮校：「按：《詩·南山》正義引作『拉幹而殺之』，《玉篇》引作『拉公幹而殺之』，皆作『拉』字。段玉裁云：依《說文》，當作『協』，許云『摺也，從手，𠂔聲』。作『擗』者，或體也；作『拉』者，假借字也。」

④ 「擗折聲也」，阮校：「《詩》正義引何休云：『幹脇拉折聲。』今本脫『幹脇』二字。」

⑤ 「又欲以孫爲內見義」，阮校：「定四年疏引此下有『言孫者』三字。」

以曼姑之義，爲固可以距之也，注云「曼姑無惡文者，起曼姑得拒之。曼姑，臣也。距之者，上爲靈公命，下爲輒故」者是也。○注「脅靈」至「不敬」。○解云：即莊二十五年傳云：「日食則曷爲鼓用牲于社？求乎陰之道也。」注云：「求，責求也。」以朱絲營社，或曰脅之，注云：「脅之，與責求同義。社者，土地之主也。月者，土地之精也，上繫于天而犯日，故鳴鼓而攻之，脅其本也。朱絲營之，助陽抑陰也。」是脅靈社，不爲不敬之道也。○注「蓋重」至「當誅」。○解云：此「蓋」詁爲「皆」也。謂脅社以重陽，距父以尊祖，皆是尊行於卑，上行於下之義。○注「至此」至「之義」。○解云：注言此者，欲道桓十八年公始如齊之時不貶意也。言又欲以孫爲內見義者，正言道魯臣子不合誅夫人之意。○注「非實」至「左右」。○解云：閔二年「九月，夫人姜氏孫于邾婁」，彼注云「凡公夫人奔例日，此月者，有罪」。然則此書月者，正是其例。而言「月者，起練祭左右」者，謂此夫人非孫，今乃書孫，書三月，起其練祭在左右故也。若直言春，無以起其練祭矣。

夏，單伯逆王姬。單伯者何？吾大夫之命乎天子者也。以稱字也。禮，諸侯三年一

貢士於天子，天子命與諸侯輔助爲政，所以通賢共治，示不獨專，重民之至。大國舉三人，次國舉二人，小國舉一人。○單伯，音善，後放此。逆王姬，《左氏》作「送王姬」。治，直吏反。【疏】「單伯者何」。○解云：若言內臣，而逆王女，若言王臣，文無王使，故執不知問。○注「以稱字也」。○解云：諸侯之大夫例合稱名，若貢于天子，理宜尊異，是以見其稱字，知其貢于天子。○注「諸」至「一人」。○解云：皆《書傳》文。《射義》云：「古者天子之制，諸侯歲獻貢士于天子，天子試之於射宮。」鄭注云：「歲獻，獻國事之書，及計偕物也，三歲而貢士。」舊說云「大國三人，次國二人，小國一人」者，是與此同。何以不稱使？據公子遂如京師，言如者，內稱使之文。

【疏】注「據公子遂如京師言如者內稱使之文」。○解云：公子遂如京師者，僖三十年經文也。「言如者，內稱使之文」者，欲道傳云「何以不稱使」者，問經不道單伯如京師之意。天子召而使之也。逆之者何？使我主之也。逆者，魯自往之文。方使魯爲父母主嫁之，故與魯使自逆之。不言于京師者，使魯主之，故使若自魯女，無使受之。【疏】「逆之者何」。○解云：天子

之臣，其數非一，而魯大夫使逆其女，故執不知問。曷

爲使我主之？據諸侯非之。①天子嫁女乎諸

侯，必使諸侯同姓者主之。諸侯與天子同姓者。

諸侯嫁女于大夫，必使大夫同姓者主之。

大夫與諸侯同姓者。不自爲主者，尊卑不敵，其行婚姻

之禮，則傷君臣之義；行君臣之禮，則廢婚姻之好。故必

使同姓有血脉之屬，宜爲父道，與所適敵體者主之。禮，

尊者嫁女于卑者，必持風旨，②爲卑者不敢先求，亦不可

斥與之者，申陽倡陰和之道。天子嫁女於諸侯，備姪娣

如諸侯之禮，義不可以天子之尊，絕人繼嗣之路。○主

書者，③惡天子也。禮，齊衰不接弁冕，仇讎不交婚姻。

○好，呼報反。風，如字，又方鳳反。倡，昌亮反。和，戶

卧反。惡，烏路反。齊衰，音咨，下七雷反。【疏】注「其

行婚姻之禮」。○解云：謂敵偶行事。○注「行君臣之

禮」。○解云：謂君坐于上，而臣立于下。○注「必使」至

「主之」。○解云：謂於女有血脉之親屬。○注「禮尊」至

「之道」。○解云：風猶放也。言使卑者待己放其命，云

道有女可嫁，然後卑者乃敢求婚也。云「亦不可斥與之」

者，亦不可斥言嫁於某國，所以然者，正以申陽倡陰和之

道故也。○注「天子」至「之禮」。○解云：知者，見十九

年傳：「諸侯娶一國，則二國往媵之，以姪娣從。」若其禮

異，當有別文。○注「義不」至「之路」。○解云：注知如

此者，正見十九年傳下文云：「諸侯壹聘九女，諸侯不再

娶。」然則既不得再娶，適夫人沒，無姪娣，即是絕嗣之

義，故云此。○注「禮齊」至「婚姻」。○解云：義取《穀

梁》之文「仇讎之人非所以接婚姻，衰麻非所以接弁冕」

之言也。所以然者，正由吉凶不相求矣。今莊公主婚于

齊，相犯二事，是以《春秋》主書惡天子耳。

秋，築王姬之館于外。何以書？譏。

何譏爾？築之，禮也，于外，非禮也。以言

外，知有築內之道也，于外，非禮也。禮，同姓本有主嫁

女之道，必闕地于夫人之下，群公子之上也。時魯以將

嫁女于讎國，故築于外。【疏】注「以言」至「道也」。○解

①「之」，阮校：「鄂本、宋本「之」作「一」，當據正。」

②「持」，阮校：「鄂本「持」作「待」，當據正。」

③「主書者」，余本無「○」，依例，「○」不當有。阮

校：「監、毛本上有「我」字。有「我」字是也，「我主書」謂以我主之書法書之也。「我主」見上文。」

云：正以經言于外，以爲非禮，則知于內是禮明矣。○注「必闕」至「上也」。○解云：取下傳文爲義。于外何以非禮？據非內也。^①築于外，非禮也。于，遠辭也，爲營衛不固。不以將嫁于讎國除讎者，魯本自得以讎爲解，無爲受命而外之，故曰非禮。○解，古賈反。其築之何以禮？據禮當豫設。主王姬者，必爲之改築。主王姬者，則曷爲必爲之改築？據諸侯宮非一。○必爲，于僞反，下「必爲」，爲襄公」并注同。【疏】注「據諸」至「非一」。○解云：即下云路寢、小寢之屬是也。於路寢則不可者，謂外內無別。於路寢則不可，小寢則嫌。皆所以遠別也。○別，彼列反。【疏】「小寢則嫌」。○解云：嫌褻瀆。注「築例時」者，即此年「秋，築王姬之館」，二十八年「冬，築微」，三十一年「春，築臺于郎」、「秋，築臺于秦」之屬是也。^②群公子之舍，謂女公子也。則以卑矣。以爲大卑。○大，音泰，一音他賀反。其道必爲之改築者也。以上傳言爾，知當築夫人之下，群公子之上。築例時。

冬，十月，乙亥，陳侯林卒。

王使榮叔來錫桓公命。錫者何？賜

也。上與下之辭。○錫，星歷反。【疏】「錫者何」。○

解云：正以變賜言錫，與禮九賜之文異，故執不知問。

命者何？加我服也。增加其衣服，令有異於諸

侯。禮有九錫：一曰車馬，二曰衣服，三曰樂則，四曰朱

戶，五曰納陛，六曰虎賁，七曰弓矢，八曰鈇鉞，九曰柎

鬯，皆所以勸善扶不能。言命不言服者，重命，不重其財

物。禮，百里不過九命，七十里不過七命，五十里不過五

命。○令，力呈反。賁，音奔。鈇鉞，音甫，又方于反，下

音越。柎，音巨，黑黍也。鬯，敕亮反，香酒。【疏】「命者

何」。○解云：正以生時有功而受褒賜，今死乃賜命，故

執不知問。○注「禮有」至「不能」。○解云：此《禮緯》含

文嘉《文》也。彼注云「諸侯有德，當益其地，不過百里。

後有功，加以九賜。進退有節，行步有度，賜以車馬，以

^①「也」，阮校：「鄂本、宋本『也』作『女』，當據正。」

^②「注築例時者」至「秋築臺于秦之屬是也」，阮校引何

煌云：「此當在注末『築例時』之下。」

代其步。其言成文章，行成法則，賜以衣服，以表其德。其長於教誨，內懷至仁，賜以樂則，以化其民。其居處修理，房內不泄，賜以朱戶，以明其別。其動作有禮，賜以納陛，以安其體。其勇猛勁疾，執義堅強，賜以虎賁，以備非常。其內懷至仁，執義不傾，賜以弓矢，使得專征。其亢陽威武，志在宿衛，賜以斧鉞，使得專殺。其孝慈父母，賜以鉅鬯，使之祭祀。皆如有德，^①則陰陽和，風雨時，四方所瞻，臣子所望，則有鉅鬯之草，景星之應」是也。○注「禮百里」至「五命」。○解云：案《周禮·典命》曰「上公九命，^②侯伯七命，子男五命」者是也。其言桓公何？據錫文公命不言謚。【疏】注「據錫」至「言謚」。○解云：即文元年夏四月，「天王使毛伯來錫公命」，不言謚是也。追命也。舉謚明知追命死者。禮，生有善行，死當加善謚，不當復加錫。不言天王者，桓行實惡，而乃追錫之，尤悖天道，故云爾。○善行，下孟反，下同。復，扶又反。悖，補內反。【疏】注「不言」至「云爾」。○解云：如此注者，欲決文元年稱天王也。

王姬歸于齊。何以書？我主之也。

魯主女爲父母道，故恩錄而書之。內女歸例月，外女不

月者，聖人探人情以制恩，實不如魯女。【疏】注「內女」至「之也」。^③○解云：即隱二年「冬，十月，伯姬歸于紀」，^④隱七年「春，王三月，叔姬歸于紀」，成九年「二月，伯姬歸于宋」之屬是也。然則此事亦在月下，而言不月者，何氏以意斟酌，故如此解。而莊十一年「冬，王姬歸于齊」，而不書月者，彼則魯不主婚，自著天子有恩于王姬故也。

齊師遷紀邢、鄆、郚。遷之者何？取

之也。以稱師，知取之。○邢，步丁反。鄆，子斯反，又音晉。郚，音吾。【疏】「遷之者何」。○解云：欲言實遷，

①「如」，阮校：「何校本作『加』。」

②「曰」，京都本、再造善本作「云」。

③「注內女至之也」，阮校：「閩、監本同，毛本『之也』改『魯女』。按：疏本如二年秋七月注，蓋作『實不如魯女也』，『之也』爲『女也』之誤。」杉浦校：「單疏鈔本、單疏殘本作『注內女云云』。按：單疏本標注句尾多作『云云』，注疏翻刻者因致此誤。」

④「隱二年」，原作「隱三年」。杉浦校：「單疏鈔本、單疏殘本作『隱二年』。」「冬，十月，伯姬歸于紀」在隱公二年，今據改。

不言處所，欲言取之，而經書遷，故執不知問。取之，則曷爲不言取之也？據莒人伐杞取牟婁。【疏】注「據莒」至「牟婁」。○解云：即隱四年經文。爲襄公諱也。襄公將復讎於紀，故先孤弱取其邑，本不爲利舉，故爲諱。不舉伐，順諱文也。外取邑不書，此何以書？大之也。何大爾？自是始滅也。將大滅紀從此始，故重而書之。

二年，春，王二月，葬陳莊公。

夏，公子慶父帥師伐餘丘。^①於餘丘

者何？邾婁之邑也。曷爲不繫乎邾婁？

國之也。曷爲國之？君存焉爾。慶父幼少

將兵，不識者，從不言弟，意亦起之。○少，詩照反。

【疏】「於餘丘者何」。○解云：欲言是國，天下未聞，欲言是邑，而不繫國，故執不知問。○「曷爲」至「焉爾」。○

解云：桓七年傳云：「咸丘者何？邾婁之邑也。曷爲不繫乎邾婁？國之也。曷爲國之？君存焉爾。」然則彼已有傳，而復發之者，正以邑不繫國，凡有二種，故須解之。即昭三十二年「取闕」，傳云「闕者何？邾婁之邑

也。曷爲不繫乎邾婁？諱亟也」，注云「與受濫爲亟」是。○注「慶父」至「起之」。○解云：正以桓六年「九月，丁卯，子同生」，則莊公年十五矣，慶父之年宜十二三，故云幼少將兵矣。所以不書月以譏之者，正以不言弟意亦起之，何者？文元年注云：「不稱王子者，時天子諸侯不務求賢，而專貴親親，故尤其在位子弟，刺其早任以權也。魯得言公子者，方錄異辭，故獨不言弟也。諸侯得言子弟者，一國失賢輕。」然則魯不言在位之弟者，刺其專貴親親而早任以權。今慶父實是公之母弟，若於凡平諸侯之國，則合言弟，但是魯公之弟，故于例不得言之。既不言弟，刺其專貴親親，早任以權，則於幼少將兵之義，亦自見矣，故云從不言弟，意亦起之也。杜氏云「慶父者，莊公異母兄」，何氏知其幼者，正見稱仲，非兄明矣。

秋，七月，齊王姬卒。外夫人不卒，此何以卒？錄焉爾。曷爲錄焉爾？據王后崩猶不錄。我主之也。魯主女爲父母道，故卒錄之，明

① 「伐」下，阮校：「唐石經及諸本有『於』字，此本誤脫。」

當有恩禮。內女卒例日，外女卒不日者，實不如魯女也。【疏】注「內女」至「女也」。○解云：即僖十六年「四月，丙申，鄭季姬卒」、^①成八年「冬，十月，癸卯，杞叔姬卒」、襄三十年夏「五月，甲午，宋災，伯姬卒」之屬是也。而莊四年「三月，紀伯姬卒」、莊二十九年十二月「紀叔姬卒」之屬皆不日，莊四年下文注云「卒不日葬日者，魯本宜葬之，故移恩錄文於葬」是也。

冬，十有二月，夫人姜氏會齊侯于郕。

書者，婦人無外事，外則近淫。不致者，本無出道，有出道乃致，奔喪致是也。○郕，古報反。二傳作「禚」，四年亦爾。近，附近之近，亦如字。【疏】注「不致」至「是也」。○解云：即文九年春，「夫人姜氏如齊」，「三月，夫人姜氏至自齊」，注云「奔父母之喪也。不言奔喪者，尊內也」，「出獨致者，得禮，故與臣子辭」是也。

乙酉，宋公馮卒。

三年，春，王正月，朔會齊師伐衛。朔者何？吾大夫之未命者也。所伐大夫不卒者，莊公薄於臣子之恩，故不卒大夫，與桓同義。月者，衛朔背叛出奔，天子新立衛公子留，齊、魯無憚天子之心

而伐之，故明惡重於伐，故月也。○朔，乃歷反。【疏】

「朔者何」。○解云：欲言內臣，經不書氏，欲言外臣，復不繫國，故執不知問。○「吾大」至「者也」。○解云：隱九年傳云：「俠者何？吾大夫之未命者也。」桓十一年「柔會宋公」以下「于折」，傳曰：「柔者何？吾大夫之未命者。」注云：「輒發傳者，無氏嫌貶也。」然則今復發傳者，嫌會讎人而致貶故也。○注「所伐」至「大夫」。○解云：稱名為將大夫不書卒者，正以莊公薄於臣子之恩故也。知未命大夫得書卒者，正見隱九年經書「俠卒」也，彼注云「未命所以卒之者，賞宜從重。無氏者，少略也」者，即其義。○注「與桓同義」。○解云：桓十一年「柔會宋公」已下「于折」，傳曰：「柔者何？吾大夫之未命者也。」彼注云：「所以不卒柔者，深薄桓公不與有恩禮於大夫也。」今朔亦然，故言與桓同義。○注「月者」至「出奔」。○解云：正以侵伐例時，即上二年「夏，公子慶父伐於餘丘」之屬是也。今此月者，背叛出奔，罪重故也。其背叛出奔之事者，即桓十六年「衛侯朔出奔齊」是也。○注「天子新立衛公子留」。○解云：《世本》及《史記》並有

① 「卒」，京都本、再造善本作「事」。

其事。

夏，四月，葬宋莊公。莊公馮篡不見，書葬

者，篡以計除，非以起他事不見也。○不見，賢徧反，下

皆同。【疏】注「莊公馮篡不見，書葬者，篡以計除，非以

起」至「見也」。○解云：《春秋》之例，篡不明者，皆貶去

其葬以見篡，即僖二十四年「晉侯夷吾卒」，注云「篡，故

不書葬，明當絕也」。又宣九年秋，「晉侯黑臀卒于扈」，

彼注云「不書葬者，篡也」之屬是也。其篡明者，不嫌非

篡，故不去葬以見篡，即隱四年「衛人立晉」，桓十二年冬

「衛侯晉卒」，十三年春「葬衛宣公」。又莊九年「齊小白

入于齊」，至僖十七年冬「齊侯小白卒」，十八年「秋，葬齊

桓公」。又哀六年秋「齊陽生入于齊」，至哀十年春「齊侯

陽生卒」，夏「葬齊悼公」。此等皆由其初有立、入之文，

不嫌非篡，故書其葬。今宋公馮初篡不明，所以亦書其

葬者，正以其父繆公有讓國之善，故計其父功而除其篡

罪，故云篡以計除也。襄十四年夏「衛侯衎出奔齊」，至

二十六年春「甯喜弑其君剽」，「衛侯衎復歸于衛」，傳

云：「然則曷為不言剽之立？不言剽之立者，以惡衛侯

也。」注云：「起衛侯失衆出奔，故不書剽立。剽立無惡，

則衛侯惡明矣。」又宣六年傳言「而立成公黑臀」，彼注云

「不書者，以惡夷獯」也。然則剽與成公之篡皆不惡者，

以惡衎與夷獯矣，是為以起他事不見。今宋莊公之立不

書惡之者，自以計除之不見義，故云非以起他事不見也。

既以計除，則迥然無罪，故得書葬，何則？晉侯重耳亦

篡不明，而僖公三十三年得書「葬晉文公」者，《春秋》為

賢者諱也。

五月，葬桓王。此未有言崩者，何以

書葬？蓋改葬也。改，更也。改葬服輕，不當月，

月者，時無非常之變，榮奢改葬爾，故惡錄之。書者，諸

侯當有恩禮。【疏】此未有言崩者。○解云：桓十五年

經書「三月，己未，^①天王崩」，何言未有言崩者？正以此

年事不相接故也。○「蓋改葬也」。○解云：案宣三年

「郊牛之口傷，改卜牛」，經即書其改卜。此若改葬，經宜

書改，而不書改者，蓋以天王之崩去此七年，是改可知，

何勞書改乎？其改卜牛須書改者，若直言卜牛，嫌卜前

口傷之牛，故須言改以明之。傳必知改葬者，正見《春秋

說》云「恒星不見，周人榮奢，改葬桓王冢，死尸復擾，終

①「己」，阮校：「浦鏜云：『乙』誤『己』。按：浦云是也。」

作「乙」字，與十五年經合。」

不覺」之文故也。○注「改葬」至「錄之」。○解云：言「改葬服輕」者，即《喪服》云「改葬總」是也。言「不當月，月者」，欲決昭二十二年「六月，叔鞅如京師。葬景王」之文也。言「時無非常之變」者，即決禮有非常之變者，將亡失尸柩之時改葬也。言「榮奢改葬」者，即《春秋說》云「恒星不見夜明，周人榮奢，改葬恒王冢，死尸復擾，終不覺」之文也。若然，案《春秋說》，改葬在恒星不見之後，即宜在七年之末，而在三年者，宋氏云「由三年改葬，故七年恒星不見夜明者，正由今日榮奢改葬故也」。云「故惡錄之」者，謂由此之故，惡而深錄之也。○注「書者」至「恩禮」。○解云：文九年傳云「王者不書葬」，此何以書？不及時書，過時書，注云「重錄失時」。「我有往者則書」，注云「謂使大夫往也，惡文公不自往，故書葬以起大夫會之」。然則此改葬桓王，非彼之類，而得書者，欲見諸侯當有恩禮故也。

秋，紀季以酈入于齊。紀季者何？

紀侯之弟也。何以不名？賢也。何賢乎

紀季？據叛也。○酈，戶圭反。【疏】「紀季者何」。

○解云：欲言其君，經不書爵，欲言大夫，又不言氏，故執

不知問。服罪也。其服罪奈何？魯子

曰：「請後五廟以存姑姊妹。」紀與齊爲讎，不

直齊大紀小，季知必亡，故以酈首服，先祖有罪於齊，請

爲五廟後，以酈共祭祀，存姑姊妹。稱字賢之者，以存先

祖之功，則除出奔之罪，明其知權。言人者，難辭，賢季

有難去兄入齊之心，故見之。男謂女先生爲姊，後生爲

妹，父之姊妹爲姑。○共，音恭。難辭，乃旦反，下皆同。

【疏】「魯子曰」至「姊妹」。○解云：傳所以記魯子者，欲

言孔氏之門徒受《春秋》，非唯子夏，故有他師矣。其隱

十一年傳記「子沈子」者，欲明子夏所傳，非獨公羊氏矣，

故輒記其人以廣義也。季爲附庸而得有五廟者，舊說云

「比諸侯之禮故也」。直言以存姑姊妹，不言兄弟子姪

者，謙不敢言之。欲言兄弟子姪亦隨國亡，但外出之女

有所歸趣而已。○注「故以」至「於齊」。○解云：凡言首

者，先服之辭。紀國未滅，今以往服，故謂之首服也。先

祖有罪於齊者，即四年傳云「哀公亨乎周，紀侯譖之」是

也。○注「言人」至「見之」。○解云：正以襄二十六年二

月，「衛孫林父入于戚」，定十三年「晉荀寅、士吉射入于

朝歌」之屬，皆是不獲已，故以爲難辭也。○注「男謂」至

「爲姑」。○解云：皆《釋親》文。

冬，公次于郎。次者，兵舍止之名。【疏】注

「次者」至「之名」。○解云：正以僖元年「齊師、宋師、曹師次于聶北，救邢」之文故也。其言「次于郎」何？

國內兵而當書，①公斂處父帥師而至，雖有事而猶不書是也。【疏】注「國內」至「是也」。○解云：「公斂處父帥師而至」者，定八年傳文。案昭十三年「春，叔弓帥師圍費」，定十二年冬「公圍成」之屬是也。刺欲救紀而後不能也。惡公既救人，辟難道還，故書其止次以起之。諸侯本有相救之道，所以抑強消亂也。次例時。○

惡，烏路反。【疏】注「諸侯」至「亂也」。○解云：言此者，欲道《春秋》善齊襄復讎，不書其滅，而刺魯侯不救紀者，以諸侯本有相救之道，所以抑強消亂，是以刺不相救也。而善齊襄復讎者，所以申仁孝之恩，各自為義，豈相妨奪乎？○注「次例時」。○解云：即此及三十年「夏，師次于成」之屬是也。而八年「春，王正月，師次于郎」云云，書月者，自為下文「甲午，祠兵」出之，次仍不蒙月也。十年「夏，六月，齊師、宋師次于郎。公敗宋師于乘丘」，書月者，自為下文「敗宋師」出之，次仍不蒙月也。

四年，春，王二月，夫人姜氏饗齊侯于

祝丘。書者，與會部同義。牛酒曰犒，加飯羹曰饗。月者，再出重也。三出不月者，省文從可知例。○犒，苦報反，勞也。【疏】注「書者」至「同義」。○解云：即二年「冬，十有二月，夫人姜氏會齊侯于郕」，彼注云：「書者，婦人無外事，外事則近淫。」今此亦然，故云同義。○注「牛酒」至「曰饗」。○解云：時王之禮也。○注「月者」至「知例」。○解云：案上二年經云「冬，十有二月，夫人姜氏會齊侯于郕」，一出亦書月，而言「再出重」者，正以下文三出、四出皆無月故也。而上二年月者，自為下經「乙酉，宋公馮卒」，其會仍自不蒙月矣。言「三出不月」者，即下五年「夏，夫人姜氏如齊師」是也。

三月，紀伯姬卒。禮，天子諸侯絕期，大夫絕

總。天子唯女之適二王後者，諸侯唯女之為諸侯夫人者，恩得申，故卒之。○期，音基。總，音絲。【疏】注「禮天」至「絕期」。○解云：正見「不杖期」章無天子諸侯服故也。○注「大夫絕總」。○解云：正見總麻章無大夫服故也。

①「而」，阮校：「鄂本『而』作『不』，當據正，此誤。」

四年，春，王二月，夫人姜氏饗齊侯于

夏，齊侯、陳侯、鄭伯遇于垂。

紀侯大去其國。大去者何？滅也。

孰滅之？齊滅之。曷爲不言齊滅之？

爲襄公諱也。《春秋》爲賢者諱，何賢乎襄

公？據楚莊王亦賢，滅蕭不爲諱。○爲襄，于僞反，下

「爲賢」，注「爲諱」及下注「爲諱」、「爲襄」同。【疏】「大去

者何」。○解云：欲言其奔，而經言「大去」，欲言其滅，又

無滅文，故執不知問。○「爲襄公」至「者諱」。○解云：

言所以爲襄公諱者，正由《春秋》爲賢者諱故也。○注

「據楚莊王亦賢滅蕭不爲諱」者，即宣十二年「冬，十有二

月，戊寅，楚子滅蕭」，彼注云「日者，屬上有王言，今反滅

人，故深責之」是也。若然，莊十年「齊師滅譚」，莊十三

年「齊人滅遂」之屬，不爲賢者諱滅而不據之者，「滅遂」

之下注云：「不諱者，桓公行霸，不任文德，而尚武力，又

功未足以除惡。」然則桓公是時賢德未著，不爲諱，適是

其宜，寧得據之乎？楚莊是時已有王言，賢德已著，宜

爲之諱，而書其滅，故據之也。復讎也。何讎爾？

遠祖也。哀公亨乎周，亨，烹而殺之。○亨，普庚

反，注同，烹殺也。【疏】「哀公亨乎周」。①○解云：鄭氏

云：懿始受譖，而亨齊哀公」是也。《周語》亦有其事。②

紀侯譖之。以襄公之爲於此焉者，事祖禰

之心盡矣。盡者何？襄公將復讎乎紀，

卜之曰：「師喪分焉。」龜曰卜，著曰筮。分，半

也。師喪亡其半。○禰，乃禮反。師喪，息浪反，注同。

著，音尸。筮，市制反。【疏】「盡者何」。○解云：以襄公

淫佚，行同鳥獸，而言事祖禰之心盡，故執不知問。

○「卜之」至「分焉」。○解云：卜之者，謂襄公之辭。○

注「龜曰卜，著曰筮」。○解云：《曲禮》文。「寡人死

之，襄公答卜者之辭。不爲不吉也。」遠祖者，

幾世乎？九世矣。九世猶可以復讎乎？

雖百世，可也。百世，大言之爾。猶《詩》云：「嵩高

①「哀公亨乎周」，原作「注公亨乎周」。杉浦校：「單疏

鈔本，單疏殘本作「哀公亨乎周云云」。按：「注公」

當作「哀公」。此一節疏，依單疏本，則當在傳「紀侯

譖之」下。今據改「注」字。

②「周語」，阮校：「按嚴杰云：當作《齊世家》。」

維嶽，^①峻極于天，君子萬年。」○幾，居豈反。嵩高，息忠反，本亦作「崧」。【疏】「寡人死之不爲不吉也」。○解云：皆齊侯之語，故注云「答卜者之辭」。所以謂死爲吉事者，以復讎以死敗爲榮故也。○注「百世」至「萬年」。○解云：蓋以百十者，數之終。施之於彼則無罪，施之於己則無義，故謂之大言耳。家亦可乎？家，謂大夫家。曰：不可。國何以可？據家不可。國君一體也。先君之恥，猶今君之恥也，今君之恥，猶先君之恥也。先君謂哀公，今君謂襄公，言其恥同也。國君何以爲一體？據非一世。國君以國爲體，諸侯世，故國君爲一體也。雖百世，號猶稱齊侯。今紀無罪，今紀侯也。此非怒與？怒，遷怒，齊人語也。此非怒其先祖，遷之于子孫與？○怒與，音餘。曰：非也。古者有明天子，則紀侯必誅，必無紀者。^②紀侯之不誅，至今有紀者，猶無明天子也。古者諸侯必有會聚之事，相朝聘之道，號辭必稱先君以相接。然則齊、紀無說焉，不可以

並立乎天下。無說，無說懌也。○無說，音悅，注同。懌，音亦。【疏】「古者」至「天子也」。○解云：從康王已下歷宣王之世，而言「無明天子」者，蓋以宣王之德，駁而不純故也。○「號辭」至「相接」。○解云：正以號辭必稱先君之故，是以齊、紀不得並立于天下。古若有明天子，則須去其不直，是以上文云「古者有明天子，則紀侯必誅」也。故將去紀侯者，不得不去紀也。有明天子，則襄公得爲若行乎？若，如也。猶曰「得爲如此行乎」？○將去，起呂反，下及注同。若行，下孟反，注同。【疏】「故將」至「紀也」。○解云：若不去紀，則有紀侯故也。○「襄公」至「行乎」。○解云：行，讀如「有子行之」之「行」。曰：不得也。不得，則

① 「嵩高維嶽」，阮校：「《釋文》作『崧高』，云『本亦作嵩』。按：『維』當作『惟』。」下《釋文》「嵩高」不另出校。

② 「必無紀者」，王引之《經義述聞》：「『必無紀』下不當有『者』字，蓋涉下文『至今有紀者』而衍。唐石本闕『無紀者』三字，而字數與今本同，則原刻已衍『者』字矣。」

襄公曷爲爲之？上無天子，下無方伯，有

而無益於治曰「無」，猶《易》曰「闕其無人」。○治，直吏

反。闕，苦鵠反。【疏】注「猶易」至「無人」。○解云：《豐

卦》上六爻辭也。緣恩疾者可也。疾，痛也。賢襄

公爲諱者，以復讎之義，除滅人之惡。言大去者，爲襄公

明義，但當遷徙去之，不當取而有，^①明亂義也。不爲文

實者，方諱，不得貶。【疏】緣恩疾者可也。○解云：時

無明王賢伯以誅無道，緣其有恩痛於先祖者，可以許其

復讎矣，故曰緣恩疾者可也。○注「賢襄」至「之惡」。○

解云：擅滅同姓，合書而絕之。今不書者，以復讎除罪故

也。○注「不當」至「義也」。○解云：謂但當推逐而已，

不當取而有之，明其亂正義矣。然則襄公亂義而不惡

者，王以復讎除之。^②○注「不爲」至「得貶」。○解云：

凡爲文實者，皆初以常事爲罪而貶之，然後計功除過，是

以僖元年經云「齊師、宋師、曹師次于聶北，救邢」，傳云

「曷爲先言次後言救？君也。君則其稱師何？不與諸

侯專封也。曷爲不與？實與而文不與。文曷爲不與？

諸侯之義不得專封也。諸侯之義不得專封，則其曰實與

之何？上無天子，下無方伯，天下諸侯有相滅亡者，力

能救之，則救之可也」者，是文實之義耳。今此若作文

實，經宜言「齊師滅紀」，或言「齊人滅紀」，傳曰「孰滅之？襄公滅之。曷爲不言襄公滅之？不與諸侯擅滅。

曷爲不與？實與而文不與。文曷爲不與？諸侯之義

不得擅滅。諸侯之義不得擅滅，則其曰實與之何？上

無天子，下無方伯，緣恩疾者可」。若其如此，即經不免

貶惡襄公。若貶惡襄公，則不名爲之諱，是以不得作文

實之義矣。而後桓公得作文實者，桓公非滅人，其罪惡

輕也。

六月，乙丑，齊侯葬紀伯姬。外夫人不

書葬，此何以書？據鄫季姬也。【疏】注「據鄫季

姬也」。○解云：即僖公十六年「鄫季姬卒」，卒無葬文

是。隱之也。何隱爾？其國亡矣，徒葬於

齊爾。徒者，無臣子辭也。國滅無臣子，徒爲齊侯所

①「而」，原作「有」。阮校：「鄂本、宋本「而」作「有」，疑

誤。按解云：「不當取而有之，明其亂正義矣。」今

據京都本、再造善本改。

②「王」，中華本、閩本作「正」，義爲長。「以」，原作

「已」，今據單疏殘本、京都本、再造善本改。

殺，^①故痛而書之，明魯宜當閔傷臨之。卒不日葬日者，魯本宜葬之，故移恩錄文於葬。【疏】注「徒者」至「臨之」。○解云：正以「徒」詰爲「空」。○注「卒不」至「於葬」。○解云：卒不日者，即上經書「三月，紀伯姬卒」是也。《春秋》之義，內女卒例日，而紀伯姬卒不日，故如此解。其隱三年傳云「不及時而日者，渴葬也。不及時而不日，慢葬也」者，自施於諸侯，非夫人之例，故此文雖不及五月，不得以渴隱解之。^②此復讎也，曷爲葬之？據恩怨不兩行。滅其可滅，葬其可葬。此其爲可葬奈何？復讎者，非將殺之，逐之也。以爲雖遇紀侯之殯，亦將葬之也。「以爲」者，設事辭而言之。以大斂而徙棺曰殯。夏后氏殯於阼階之上，若存。殷人殯於兩楹之間，賓主夾之。周人殯於西階之上，賓之也。稱齊侯者，善葬伯姬，得其宜也。○斂，力驗反。夾，古洽反。【疏】注「夏后」至「賓之也」。○解云：《檀弓上》篇文。

秋，七月。

冬，公及齊人狩于郕。公曷爲與微者

狩？據與高侯盟諱，此競逐恥同。【疏】注「據與高侯

盟諱」。○解云：即莊二十二年秋，「及齊高侯盟于防」，^③傳云「公則曷爲不言公？諱與大夫盟也」是也。○注「此競逐恥同」。○解云：謂與微者競逐禽獸，與大夫盟不異矣。齊侯也。以不沒公，知爲齊侯也。【疏】注「以不」至「侯也」。○解云：正以大夫盟即沒公，此不沒公者，齊侯故也。齊侯則其稱人何？諱與讎狩也。禮，父母之讎不同戴天，兄弟之讎不同國，九族之讎不同鄉黨，朋友之讎不同市朝。稱人者，使若微者，不沒公。言齊人者，公可以見齊微者，至於魯人皆當復讎，義不可以見齊侯也。○以見，賢徧反，下同。【疏】注「禮父」至「市朝」。○解云：皆出《曲禮上》篇與《檀弓上》篇，何氏差約而爲此言也。《檀弓》云「從父昆弟之讎」，故此何氏以九族言之。《曲禮》云「交遊之讎」，故此何氏

①「殺」，阮校：「鄂本『殺』作『葬』，當據正。」

②「渴隱」，中華本作「渴慢」。《公羊義疏》釋舊疏曰：

「此雖不及五月，不得以渴葬解之，爲渴葬、慢葬自施于諸侯，非夫人例。」則「渴慢」者，「渴葬」、「慢葬」也，中華本當是。

③「○」，此當衍。

以朋友言之。定四年傳云「朋友相衛，古之道也」，義亦通於此。鄭氏云「交遊或爲朋友」是也。前此者有事矣，溺會齊師伐衛是也。【疏】注「溺會」至「是也」。○解云：在上三年春。後此者有事矣，師及齊師圍盛是也。①【疏】注「師及」至「是也」。○解云：在莊八年夏。則曷爲獨於此焉譏？於讎者，將壹譏而已，故擇其重者而譏焉，莫重乎其與讎狩也。狩者，上所以共承宗廟，下所以教習兵行義。○共，音恭。於讎者則曷爲將壹譏而已？讎者無時焉可與通，通則爲大譏，不可勝譏，故將壹譏而已，其餘從同同。②其餘輕者從義與重者同，不復譏，都與無讎同文論之，所以省文，達其異義矣。凡二同，故言「同同」。○勝，音升。復，扶又反。【疏】注「其餘」至「者同」。○解云：謂皆是與讎交接矣。○注「不復」至「論之」。○解云：謂更無貶文矣。○注「所以」至「義矣」。○解云：一則省文，二則達其異義矣。其異義者，圍盛不稱公者，諱其滅同姓，溺會齊師伐衛不稱氏者，見未命大夫故也。若不省文，無以見此義，

故曰所以省文，達其異義矣。○注「凡二同故言同同」。○解云：輕者不譏，見與重者同，一同也。都與無讎同文論之，一同也。③故曰凡二同矣。考諸古本，傳及此注「同」字之下皆無重語，有者衍文，且理亦宜然。

五年，春，王正月。

夏，夫人姜氏如齊師。

秋，倪黎來來朝。倪者何？小邾婁

也。小邾婁國。○倪，五兮反，二傳皆作「邾」。黎來，

力兮反。小邾婁，力居反，二傳亦無「婁」字。【疏】「邾者

何」。○解云：欲言是國，而言名，欲言非國，經言來朝，

故執不知問。小邾婁則曷爲謂之倪？未能

以其名通也。邾者，小邾婁之都邑。時未能爲附庸，

①「盛」，阮校：「浦鏜云：『成』誤『盛』。非。按八年傳云：『成者何？盛也。』」注據此。

②「其餘從同同」，阮校：「注：『凡二同，故言同同。』」解云：「考諸古本，傳及此注「同」字之下皆無重語，有者衍文。」按：疏中標注亦作「凡二同，故言同同」，衍

一「同」字。」

③「一」，杉浦校：「單疏鈔本、單疏殘本作「一」。」

不足以小邾婁名通，故略謂之倪。「黎來」者何？

名也。其名何？據僖七年稱子。【疏】注「據七年

稱子」。○解云：即僖七年「夏，小邾婁子來朝」是也。

微國也。此最微，得見者，其後附從齊桓，為僖七年張

本文。○見，賢徧反。為僖，于偽反，下文注同。【疏】注

「此最」至「本文」。○解云：時未能為附庸，故謂之最微

矣。言為僖七年張本文者，即彼注云「至是所以稱爵者，

時附從霸者朝天子，旁朝罷，行進，齊桓公白天子進之，

固因其得禮，著其能以爵通」是也。

冬，公會齊人、宋人、陳人、蔡人伐衛。

此伐衛何？納朔也。曷為不言納衛侯

朔？據納頓子于頓言納，下朔人、公人致伐，齊人來歸

衛寶，知為納朔伐之。【疏】注「據納頓子于頓言納」。○

解云：即僖二十五年「秋，楚人圍陳，納頓子于頓」是也。

○注「下朔人公人致伐」。○解云：即下六年「衛侯朔入

于衛」，公至自伐衛」是也。然則「衛侯朔入于衛」之下，

即言「公至自伐衛」，亦一隅也。○注「齊人來歸衛寶」。

○解云：即下六年「冬，齊人來歸衛寶」是也。辟王

也。辟王者兵也，王人子突是也。使若伐而去，不留納朔者，所以正其義，因為內諱。

六年，春，王三月，^①王人子突救衛。

王人者何？微者也。子突者何？別「何」之

者，稱人序上。又僖八年王人不稱字，嫌二人。【疏】「王

人者何」。○解云：欲言微者，書其美字，欲言其貴，連人

言之，故執不知問。○「子突者何」。○解云：稱字尊卑

未分，^②故執不知問。○注「別何」至「二人」。○解云：

所以不言「王人子突者何」，而別「何」之者，正以稱人，序

在子突之上。又僖八年「公會王人」以下「于洮」，單稱王

人，不稱字，問者之意，嫌此王人與子突別人，故別「何」

之。然則言嫌二人者，猶言疑二人矣。貴也。貴子之

稱。○稱，尺證反。貴則其稱人何？據王子瑕不

稱人。本當言王子突，示諸侯親親，以貴之也。【疏】注

「據王子瑕不稱人」。○解云：即襄三十年夏，「王子瑕奔

①「王三月」，阮校引孫志祖云：「《左氏》作「正月」，《穀

梁》作「二月」。」

②「卑」，單疏殘本作「平」。

晉」是也。○注「本當」至「之也」。○解云：言王子則是王之親親，所以責諸侯違王命之深。繫諸人也。曷爲繫諸人？據不以微及大。【疏】注「據不以微及大」。○解云：即定二年傳云「然則曷爲不言雉門災及兩觀？主災者，兩觀也。主災者兩觀，則曷爲後言之？不以微及大也」是也。然則彼不以微及大，而此以子突繫諸人，故難之。王人耳。刺王者，朔在岱陰齊時，一使可致，一夫可誅，而緩，令交連五國之兵，伐天子所立，還以自納。王遣貴子突，卒不能救，遂爲天下笑。故爲王者諱，使若遣微者弱愈，因爲內殺惡。救例時，此月者，嫌實微者，故加錄之，以起實貴子突。○使，所吏反。令，力陳反。爲王，于僞反，下「因爲」、「不爲危錄」皆同。【疏】「王人耳」。○解云：欲道子突但是微者矣。○注「刺王」至「可誅」。○解云：即桓十六年冬，「衛侯朔出奔齊」，傳曰「衛侯朔何以名？絕。曷爲絕之？得罪于天子也。其得罪于天子奈何？見使守衛朔，而不能使衛小衆，越在岱陰齊，屬負茲舍，不即罪爾」者，是其朔在岱陰齊時之事也。言當爾之時，微弱至甚，一使可攝取，一夫可就誅，故曰「一使可致，一夫可誅」耳。○注「而緩」

至「自納」。○解云：即上五年「冬，公會齊人、宋人、陳人、蔡人伐衛」者，是其交通五國之兵矣。言伐天子所立者，在上三年耳。彼注云「天子新立衛公子留」是也。○注「王遣」至「能救」。○解云：王遣貴子突者，此文是也。卒不能救者，下文朔入衛是也。○注「因爲內殺惡」。○解云：謂犯微人之命惡淺，犯貴者之命惡深故也。○注「救例時」。○解云：即僖六年秋，「諸侯遂救許」，僖十八年「夏，師救齊」之屬是。

夏，六月，衛侯朔入于衛。衛侯朔何以名？據衛侯人于陳儀不名。【疏】注「據衛」至「不名」。

○解云：在襄二十五年秋。絕。曷爲絕之？據俱人也。犯命也。犯天子命尤重。其言人何？據頓子不復書人。○不復，扶又反，下皆同。【疏】注「據頓」至「書人」。○解云：即僖二十五年「秋，楚人圍陳，納頓子于頓」是。而言不復書人者，謂彼經直連圍陳而言納，不復別書人也。今此衛朔之事，去年已書伐衛訖，今復別言人，故如此注。篡辭也。上辟王不得言納，故

復從纂辭書入也。^①不直言纂者，事各有本也。殺而立者，不以當國之辭言之。非殺而立者，以當國之辭言之。國人立之曰立，他國立之曰納，從外曰入。諸侯有屬託力，加自文也。不書公子留出奔者，天子本當絕衛，不當復立公子留，因為天子諱微弱。○殺而，申志反，下皆同。屬，音燭。【疏】注「上辟」至「言納」。○解云：即上五年傳云「此伐衛納朔也，曷為不言納衛侯朔？」辟王也者是。○注「故從」至「入也」。○解云：正以《公羊》之例，立、納、入皆為纂辭故也。○注「不直」至「本也」。○解云：欲道《春秋》上下，所以不直言衛晉纂，齊小白纂，衛世子纂，而書其立、入、納者，事各有本故也。○注「殺而」至「言之」。○解云：即文十四年秋，「齊公子商人弑其君舍」，不去公子是也。所以然者，正以其弑君取國，不嫌非纂故也。○注「非殺」至「言之」。○解云：衛晉言立，蒯聵言納，小白言入是也。所以然者，以其非殺而立，恐不成纂故也。○注「國人立之曰立」。○解云：隱四年「衛人立晉」是也。○注「他國立之曰納」。○解云：即哀二年夏，「晉趙鞅納衛世子于戚」是也。○注「從外曰入」。○解云：即莊九年夏，「齊小白入于齊」是也。○注「諸侯」至「文也」。○解云：即昭元年「秋，莒去疾自

齊入于莒」，昭十三年夏「楚公子比自晉歸于楚」之屬是也。○注「因為」至「微弱」。○解云：公子留本天子所立故也。其立公子留之事，說在上三年也。

秋，公至自伐衛。曷為或言致會，或言致伐？得意致會，所伐國服，兵解國安，故不復錄兵所從來，獨重其本會之時。【疏】「曷為」至「致會」。○解云：即襄十一年「公至自會」是也。○注「所伐」至「之時」。○解云：即襄十一年秋，「公會晉侯、宋公、衛侯、曹伯、齊世子光」以下「伐鄭，會于蕭魚。公至自會」是也。

不得意致伐。所伐國不服，兵將復用，國家有危，故重錄所從來，此謂公與二國以上也。公與一國及獨出用兵，得意不致，不得意致伐。公與二國以上出會盟，得意致會，不得意不致。公與一國出會盟，得意致地，不得意不致，皆例時。【疏】注「所伐」至「從來」。○解云：即襄十一年夏，「公會晉侯、宋公、衛侯、曹伯、齊世子光」已下「伐鄭。秋，七月，己未，同盟于京城北。公

世子光」已下「伐鄭。秋，七月，己未，同盟于京城北。公

①「故復從纂辭書入也」，單疏鈔本、單疏殘本標起訖作「注故從纂辭書入也」，「故」下無「復」字。杉浦校：「依單疏本，有『復』字當為衍文。」

至自伐鄭」是也。又僖四年春，「公會齊侯、宋公」以下「侵蔡、蔡潰」，「遂伐楚，次于陘」，秋「八月，公至自伐楚」，傳云「楚已服矣，何以致伐？楚叛盟」之屬是也。若然，成十六年秋，「公會尹子、晉侯、齊國佐、邾婁人伐鄭」，冬十二月，「公至自會」。又成十七年「夏，公會尹子、單子、晉侯、齊侯、宋公、衛侯、曹伯、邾婁人伐鄭」。六月，乙酉，同盟于柯陵。秋，公至自會」。又成十七年「冬，公會單子、晉侯、宋公、衛侯、曹伯、齊人、邾婁人伐鄭」。十一月，公至自伐鄭」。以此言之，則十六年秋伐鄭，十七年夏伐鄭，皆是鄭人不服而致會者，正以十六年時鄭人始叛，晉帥諸侯伐而討之，當是時寔服，明年乃叛，是以致會也。其十七年夏公會單子已下伐鄭者，正以比年用兵不能服，故以「得意」爲文。其十七年冬公會單子已下伐鄭，以伐致者至於三，伐事寔當見，故言公至自伐鄭矣。若然，桓十六年「夏，四月，公會宋公、衛侯、陳侯、蔡侯伐鄭」。秋，七月，公至自伐鄭」，從此之後，鄭不背叛，何故不致，^①而致伐者？桓元年「三月，公會鄭伯于垂」，彼注云「不致之者，桓弑賢君，篡慈兄」，「與人交接則有危」，「故奪臣子辭，成誅文」。然則桓是惡人，本不合致，而桓十六年注云「致者，善桓公能疾惡同類，

比與諸侯行義兵伐鄭」也者，是其得致之由。而致伐者，諸侯本意正欲助忽以誅突，突終得國，忽死不還，以其不得伐力，故致伐。○注「公與」至「致伐」。○解云：其獨出用兵得意不致者，即隱七年「秋，公伐邾婁」，僖三十三年夏「公伐邾婁」，哀七年「秋，公伐邾婁」之屬，皆不致是也。其與一國用兵不得意致伐者，即僖二十六年冬，「公以楚師伐齊，取穀。公至自伐齊」，傳云「此已取穀矣，何以致伐？未得乎取穀也」，「曰患之起，必自此始也」是也。其公獨出用兵不得意致伐者，即下二十六年「春，公伐戎。夏，公至自伐戎」是也。其公與一國用兵得意不致，《春秋》之內，偶爾無之。《春秋》既無，而知然者，正以用兵得意，兵不復用，何勞致伐乎？不致會者，離不成會故也。其不得意所以致伐者，兵將復用，重錄兵所從來故也。○注「公與二國」至「不致」。○解云：其二國以上出會盟得意致會者，即哀十三年夏，「公會晉侯及吳子于黃池」，「秋，公至自會」是也。其不得意不致者，即宣七年「冬，公會晉侯、宋公、衛侯、鄭伯、曹伯于黑壤」之

① 「不致」下，杉浦校：「單疏鈔本、單疏殘本有『會』字。按：此脫，當據正。」

屬是也。其得意致會者，以其成會也。其不得意不致者，無功可言故也。○注「公與一國」至「不致」。○解云：其得意致地者，即桓二年秋，「公及戎盟于唐。冬，公至自唐」之屬是也。其不得意不致之者，即隱二年「秋，八月，庚辰，公及戎盟于唐」之屬是也。其得意所以致地者，離不成會故也。其不得意所以不致者，無功可致矣。

○注「皆例時」。○解云：謂鄉來諸例皆書時，即桓二年「冬，公至自唐」，僖二十六年冬「公至自伐齊」，哀十三年「秋，公至自會」之屬是也。其僖四年「八月，公至自伐楚」，彼注云：「月者，凡公出滿二時，月，危公之久。」然則彼以公正月出會齊侯伐楚，至八月乃反，故云滿二時矣。成六年「春，王正月，公至自會」，何氏云「月者，前魯大夫獲齊侯，今親相見，故危之」是也。而襄十一年「公至自伐鄭」，「公至自會」，不滿二時而皆在日月下，何氏不注，蓋以爲不蒙月故也。成十六年「公至自會」，亦不滿二時而在日月下，是不蒙月明矣。成十七年十一月「公至自伐鄭」，彼注云「月者，方正下壬申，故月之」，然則公至亦不蒙月矣。衛侯朔入于衛，何以致伐？據得意。不敢勝天子也。與上辟王同義。久不月者，不與伐天子也，故不爲危錄之。【疏】注「與上辟王同義」。

○解云：上五年五國伐衛之時，寔納衛侯朔，所以不言納衛侯朔者，辟王者兵，使若伐而去，不留納朔者，所以正其義，因爲內諱也。今此寔得意，所以不致會而致伐者，不敢勝天子，使若更以他事伐衛，不爲納朔然，所以正其義，因爲內諱，故曰同義。○注「不月」至「錄之」。○解云：僖四年「八月，公至自伐楚」，彼注云「月者，凡公出滿二時，月，危公之久」。然則今此兵歷四時而不月者，不與伐天子，故不爲危錄故也。

螟。先是伐衛納朔，兵歷四時，及反民煩擾之所生。○螟，亡丁反。【疏】注「兵歷四時」。○解云：謂從五年冬訖于此年之秋故也。

冬，齊人來歸衛寶。^①此衛寶也，則齊人曷爲來歸之？衛人歸之也。以稱人共國

辭。○衛寶，《左氏》經作「衛俘」。【疏】注「以稱人共國辭」。○解云：注言此者，欲決三十一年「齊侯來獻戎捷」不言人也。言以稱人共國辭者，謂稱齊人，可以兼得兩

①「衛寶」，阮校：「《釋文》：『衛寶，《左氏》經作「衛俘」。』按：缶聲、孚聲，古音同第三部。」

國人之辭也。衛人歸之，則其稱齊人何？讓乎我也。其讓乎我奈何？齊侯曰：「此非寡人之力，魯侯之力也。」時朔得國，後遣人賂齊，齊侯推功歸魯，使衛人持寶來，雖本非義賂，齊當以讓除惡，故善起其事。主書者，極惡魯犯命復貪利也。不爲大惡者，納朔本不以賂行，事畢而見謝爾。寶者，玉物之凡名。○惡，烏路反。【疏】注「故善起其事」。○解云：言《春秋》善齊侯之讓，是以不言衛人而稱齊人，所以起其讓事矣。○注「不爲」至「謝爾」。○解云：所傳聞之世，內大惡諱之。今此書見，故知不爲大惡矣。○注「寶者」至「凡名」。○解云：猶言玉物之總名耳。定八年傳云「寶者何？璋判白，弓繡質，龜青純」是也。

七年，春，夫人姜氏會齊侯于防。

夏，四月，辛卯，夜，^①恒星不見。夜

中，星實如雨。恒星者何？列星也。恒，常

也。常以時列見。○辛卯夜，一本無「夜」字，《穀梁》作

「昔」。不見，賢徧反，注及傳皆同。【疏】「恒者何？」^②○

解云：欲道星稱，宿無恒星，欲言非星，而連星言之，故執不知問。○「恒常也」至「列見」。○解云：恒者，常也，天

之常宿，故經謂之恒星矣。言以時列見於天，故傳謂之列星矣。列星不見，何以知夜之中？^③星反也。反者，星復其位。【疏】「列星」至「之中」。○解云：謂無所准度故也。○注「反者星復其位」。○解云：謂星反附在半夜之後，則知鄉者不見之時，是夜中矣。「如雨」者何？「如雨」者，非雨也。非雨，則曷爲謂之「如雨」？不修《春秋》曰：「雨星不及地尺而復。」不修《春秋》，謂史記也。古者謂史記爲「春秋」。○雨星，于付反，一音如字，下注「雨星」同。【疏】「如雨者何」。○解云：欲言是雨，不應言如，其實非雨，而文言雨，故執不知問。○注「不修春

①「辛卯夜」，阮校：「《釋文》：『辛卯夜，一本無「夜」字，《穀梁》作「昔」。』按段玉裁云：古多假「昔」爲「夕」，《左傳》爲「一昔之期」，《列子》「昔者夢爲君」，皆是也。」

②「恒者何」，單疏殘本作「恒星者何」。據傳言「恒星者何」，此當脫「星」字。

③「何以」，阮校：「唐石經、鄂本「何」上有「則」字，當據補。」

秋」。○解云：據此傳及注言，則孔子未修之時，已謂之《春秋》矣。而舊解云「孔子修之，春作秋成，謂之《春秋》者，失之遠矣。云云之說，在首卷。君子修之曰：「星實如雨。」明其狀似雨爾，不當言雨星。不言尺者，實則為異，不以尺寸錄之。何以書？記異也。列星者，天之常宿，分守度，諸侯之象。周之四月，夏之二月，昏，參伐狼注之宿當見，參伐主斬艾立義，狼注主持衡平也。皆滅者，法度廢絕，威信陵遲之象。時天子微弱，不能誅衛侯朔，是後遂失其正，諸侯背叛，王室日卑，星實未墜而夜中星反者，房心見其虛危斗。房心，天子明堂布政之宮也。虛危，齊分，其後齊桓行霸，陽穀之會有王事。○常宿，音秀，下同。參伐，所林反，下同。狼注，張又反，與味同，^①朱鳥口星也，一音之住反。艾，魚廢反。墜，有類反。^②分，扶問反。【疏】注「分守」至「之象」。○解云：言分者，謂十二分野矣。言守度者，守三十度為一次矣。言諸侯之象者，謂星度有多少，若諸侯之國有大小耳。○注「昏參」至「當見」。○解云：正以參伐狼注，為西南之維候故也。○注「參伐」至「立義」。○解云：以其在西方，金主斷割之義故也。○

注「狼注」至「平也」。○解云：正以其在南方，南方主禮故也。○注「而夜」至「危斗」。○解云：火見於周為五月者，謂昏時。今在周之四月，是以半夜之後，乃房星見。其虛危斗者，謂在夜半時明矣。○注「房心」至「宮也」。○解云：即《上備》云房為天子明堂，^③《文耀鉤》云：「房心為中央火星，^④天王位。」若相對言之，則房為明堂，心為天王矣。既有天王，復有明堂布政之象也。○注「其後」至「王事」。○解云：齊桓行霸者，虛危斗也。有王事者，房心見也。

秋，大水。

- ①「味」，余本作「味」。今按：「味」當為「味」字之訛。《史記·律書》：「西至於注。」《索隱》：「注，味也。」《天官書》云：「柳為鳥味。」則注，柳星也。」
- ②「墜有類反」，宋本《釋文》「有」作「直」。《公羊義疏》云：「《釋文》當本作『未墜，直類反』，文三年、定八年皆作『而墜，直類反』可證。《釋文》凡音直類反者，字皆作『隊』。」
- ③「上備」，阮校：「按：『上備』為『星備』之誤。『星備』亦見《周禮·大宗伯》疏。」
- ④「火」，阮校引盧文弨曰：「『火』乃『大』之誤。」

無麥苗。無苗，則曷爲先言無麥，而

後言無苗？苗者，禾也。生曰苗，秀曰禾。據是時

苗微麥彊，俱遇水災，苗當先亡。一災不書，待無

麥，然後書無苗。明君子不以一過責人。水、旱、

螟、螻，皆以傷二穀乃書。然不書穀名，至麥苗獨書者，民

食最重。○①螟螻，音終。【疏】「一災不書」。○解云：

一穀之災，不書于經也。○注「明君」至「責人」。○解

云：謂災傷五穀者，皆人行致之故也。○注「水旱」至「穀

名」。○解云：大水傷二穀書於經者，即桓元年「秋，大

水」，傳云「何以書？記災也」，彼注云「災傷二穀以上，

書災也」。其旱傷二穀以上書者，即僖二十一年「夏，大

旱」是也。其螟螻書者，即隱五年經書「螟」，傳云「何以

書？記災也」，文八年經書「螽」之類是也。②○注「至

麥」至「最重」。○解云：災傷麥苗常書，即此及莊二十八

年「大無麥禾」之屬皆是也。麥禾比於餘穀最重，故言民

食最重矣。何以書？記災也。先是莊公伐衛納

朔，用兵踰年，夫人數出淫泆，民怨之所生。○數，所角

反。泆，音逸。【疏】注「先是」至「踰年」。○解云：即五

年「冬，公會齊人、宋人、陳人、蔡人伐衛」，六年「秋，公至

自伐衛」是也。○注「夫人數出淫泆」。○解云：即五年

「夏，夫人姜氏如齊師」，七年「春，夫人姜氏會齊侯於

防」，「冬，夫人姜氏會齊侯于穀」之屬，故言數出耳。

冬，夫人姜氏會齊侯于穀。

監本附音春秋公羊注疏莊公卷第六

①「○」，原無，據閣本、宋本《釋文》，下「螟螻音終」四字

爲《釋文》之語，今依例補「○」。

②「螽」，阮校：「浦鏜云：經作『螻』。按：浦說是也。」

監本附音春秋公羊注疏莊公卷第七

起八年，盡十七年

何休學

八年，春，王正月，師次于郎，以俟陳人、蔡人。次不言俟，此其言俟何？據次于

陘俟屈完不書俟。○屈，居勿反。【疏】注「據次」至「書

俟」。○解云：即僖四年經云「遂伐楚，次于陘」，傳云「其

言次于陘何？有俟也。孰俟？俟屈完也」是也。然則

彼但錄其次而不書俟，與此異，故據之。託不得已

也。師出本為下滅盛興，陳、蔡屬與魯伐衛，同心又國

遠，^①故因假以諱滅同姓，託待二國為留辭主，所以辟下

言及也。加「以」者，辟實俟。陳、蔡稱人者，略以外國辭

稱人微之。^②○本為，于僞反，傳及注「為久」皆同。屬

與，音燭。【疏】注「陳蔡」至「伐衛」。○解云：即其經云

「公會齊人、宋人、陳人、蔡人伐衛」是也。○注「同心又

國遠」。^③○解云：欲對齊、宋，雖亦同心而近魯，是以不得託待齊、宋。○注「所以辟下言及也」。○解云：即經下云「夏，師及齊師圍成」是也。凡言及者，汲汲之辭。若此時已出師，其間更無所待，即下文言及乃至汲汲之甚者，便是魯人欲得滅同姓，孜孜之深，是以託待陳、蔡以辟之。○注「加以者辟實俟」。○解云：若其實俟，宜但云「師次于郎，俟陳人、蔡人」而已，何須言「以」乎？今言「以俟陳人、蔡人」，明更有由以乃始俟之，故言「加以者，辟實俟」也。

①「又」，原作「人」。阮校：「宋本、閩、監、毛本作『又』，疏中諸本同。」杉浦校：「單疏鈔本、單疏殘本『人』作『又』。」今據改。

②「略以外國辭稱人微之」，阮校：「鄂本『人』作『知』，此誤。當讀『知微之』三字為句。」

③「又」，原作「人」，今據京都本、再造善本改。

甲午，祠兵。^①祠兵者何？出曰祠兵，

禮，兵不徒使，故將出兵，^②必祠於近郊，陳兵習戰，殺牲饗士卒。○祠兵，音辭，祭也。《左氏》作「治兵」，下文注

同。卒，子忽反。【疏】祠兵者何。○解云：凡出師之

禮，皆有祠兵之事，而此特書，故執不知問。○「出曰祠

兵」。○解云：何氏之意，以為祠兵有二義也：一則祠其

兵器，二則殺牲享士卒，故曰祠兵矣。○注「禮兵」至「近

郊」。^③○解云：時王之禮也。人曰振旅，五百人曰

旅。【疏】注「五百人曰旅」。○解云：《大司馬》敘官文。

其禮一也，皆習戰也。言與祠兵禮如一，將出不

嫌不習，故以祠兵言之。將人嫌於廢之，故以振訊士衆

言之，互相見也。祠兵，壯者在，難在前。振旅，壯者

在後，復長幼，且衛後也。○訊，音信，又音峻，本亦作

「迅」。相見，賢徧反，下同。難，乃旦反。長，丁丈反。

何言乎祠兵？據不書。【疏】注「據不書」。○解

云：今此書之，而言「據不書」者，正謂他處皆不書，即例

不書矣。而此書之者，是以致難。爲久也。爲久稽留

之辭。【疏】注「爲久稽留之辭」。○解云：爲猶作，言作

久稽留之辭矣。曷爲爲久？據取長葛久之。【疏】

注「據取長葛久之」。○解云：隱五年冬「宋人伐鄭，圍長

葛」，六年「冬，宋人取長葛」，傳云「外取邑不書，此何以

書？久也」是。然則彼所以書者，譏其久。今以祠兵者

爲久稽留之辭，似於義反，故難之。吾將以甲午之

日，然後祠兵於是。諱爲久留辭，使若無欲滅同姓

之意，因見出竟，明盛非內邑也。【疏】注「因見」至「邑

也」。○解云：「出曰祠兵」，即《爾雅》「出曰治兵」之文

也。今書祠兵，即是出竟之義，則知下言圍成者，非內邑

明矣。

①「甲午祠兵」，阮校引《經義雜記》曰：「《禮記·曲禮》

注引《春秋傳》「甲午祠兵」，正義引《異義》《公羊》

說「以爲甲午祠兵」，《左氏》說「甲午治兵，鄭駁之

云：「《公羊》字誤也。以治爲祠，因爲作說。」案：

《周禮》、《左傳》、《穀梁》、《爾雅》皆爲「治兵」，知《公

羊》是聲近之誤，故《詩》箋、《周禮》注用《公羊》，徑改

作「治」。《詩》正義所言是也。」

②「兵」，杉浦校：「單疏鈔本，單疏殘本標起止無此

字。」

③「注禮兵至近郊」，單疏鈔本、單疏殘本標起訖作「注

禮兵不徒使故將出必祠於近郊者」，下無「○解云」。

夏，師及齊師圍成，成降于齊師。成者何？盛也。以上有祠兵，下有盛伯來奔。○成，

如字，二傳作「邲」。降于，戶江反，傳及下注皆同。【疏】

「成者何」。○解云：成爲內邑，孟氏所有，而與齊圍之，故執不知問。○注「以上」至「來奔」。○解云：文十二年

「春，王正月，盛伯來奔」，傳云「盛伯者何？失地之君也。何以不名？兄弟辭也」是也。盛則曷爲謂之

成？諱滅同姓也。因魯有成邑，同聲相似，故云

爾。【疏】注「因魯」至「云爾」。○解云：定十二年「十有

二月，公圍成」者，是魯有成邑之文。曷爲不言降吾

師？據戰於宋，不言歸鄭。【疏】注「據戰」至「歸鄭」。

○解云：桓十二年「十有二月，及鄭師伐宋。丁未，戰于

宋」是也。彼則不言宋歸于鄭，此言「成降于齊師」，故難

之。其「歸」字有作「敗」字者，^①誤也。辟之也。辟滅

同姓。言圍者，使若魯圍之而去，成自從後降於齊師也。

降者，自伏之文，所以醇歸於齊。言及者，起魯實欲滅

之。不月者，順諱文。不書盛伯出奔，深諱之。【疏】注

「言及者」至「滅之」。○解云：以及者，汲汲之文故也。

○注「不月者順諱文」。○解云：凡滅例月，即莊十年

「冬，十月，齊師滅譚」，莊十三年「夏，六月，齊人滅遂」之屬是也。今此亦滅而不書月者，順諱文，使若不滅矣。○注「不書」至「諱之」。○解云：如此注者，正欲決莊十年「冬，十月，齊師滅譚，譚子奔莒」之屬，書其出奔也。今成被滅，至文十二年春乃書「盛伯來奔」。於所傳聞世不言所奔者，深諱故也。

秋，師還。還者何？善辭也。此滅

同姓，何善爾？病之也。慰勞其罷病。○慰

勞，力報反，下同。其罷，音皮，下同。【疏】「還者何」。

○解云：欲言其惡，還是善辭，欲言其善，實滅同姓，故執

不知問。曰：師病矣。曷爲病之？據師出皆

罷病，曷爲獨勞此病也？非師之罪也。明君之使，

重在君，因解非師自汲汲。【疏】注「明君」至「在君」。○

解云：所以慰勞師之罷病者，明君之滅同姓，非師之罪，

其重在于君也。○注「因解非師自汲汲」。○解云：正以

及者，汲汲之辭故也。

①「敗」，杉浦校：「單疏鈔本、單疏殘本作「敗」。

按：「敗」當作「敗」，蓋形近之訛。」

冬，十有一月，癸未，齊無知弑其君諸兒。諸兒，襄公也。無知，公子夷仲年之子，襄公從弟。

○兒，如字，一音五兮反。從，才用反。

九年，春，齊人殺無知。

公及齊大夫盟于暨。公曷爲與大夫

盟？據與高傒盟，諱不言公。○暨，其器反，《左氏》作

「蒞」。【疏】注「據與」至「言公」。○解云：莊二十二年

「秋，七月，丙申，及齊高傒盟于防」，傳云「齊高傒者何？

貴大夫也。曷爲就吾微者而盟？公也。公則曷爲不言

公？諱與大夫盟也」者是。齊無君也。然則何

以不名？據高傒名。爲其諱與大夫盟也，使

若衆然。鄰國之臣，猶吾臣也。君之於臣，當告從命

行，而反歃血約誓，故諱使若悉得齊諸大夫約束之者愈

也。不月者，是時齊以無知之難，小白奔莒，子糾奔魯，

齊迎子糾欲立之，魯不與而與之盟，齊爲是更迎小白，然

後乃伐齊，欲納子糾，不能納，故深諱使若信者也。不致

者，魯地也。子糾出奔不書者，本末命爲嗣，賤，故不錄

之。○爲其，于僞反，注「爲是」及下注「寔爲」、「魯爲」

同。歃，所洽反，又所甲反。難，乃旦反。【疏】注「不月」

至「信者也」。○解云：《公羊》之例，大信時，小信月，不

信日。經今不月，使若信者，謂若大信也，不謂月非信辭

也。○注「不致者魯地也」。○解云：正決桓二年秋，「公

及戎盟于唐。冬，公至自唐」之文也。若然，定十二年十

有二月，「公至自圍成」，然則成是內邑而書致者，彼注云

「成，仲孫氏邑。圍成月又致者，天子不親征下土，諸侯

不親征叛邑，公親圍成，不能服，不能以一國爲家，甚危，

若從他國來，故危錄之」是也。○注「子糾」至「錄之」。

○解云：如此注者，正決桓十一年「鄭忽出奔衛」書之故

也。子糾出奔魯，宜言來奔，而言出奔者，據齊言之，亦

無傷矣。

夏，公伐齊，納糾。② 納者何？入辭

也。其言伐之何？據晉人納捷菑于邾婁，不言

① 「土」，原作「士」，今據京都本、再造善本改。

② 「納糾」，阮校：「《釋文》：『《納糾》，《左氏》經亦作『納

子糾』。』解云：「無『子』字者，與《左氏》經異。」按：

疏本所據《左氏》作「納子糾」，《釋文》本所據《左氏》

伐。○納糾，《左氏》經亦作「納子糾」。【疏】「夏公伐齊納糾」。○解云：無「子」字者，與《左氏》經異。○「納者何」。○解云：欲言得國，下有齊人取殺之文，欲言不得國，納者入辭，故執不知問。○「其言伐之何」。○解云：案隱七年冬，「戎伐凡伯于楚丘，以歸」，傳云「此聘也，其言伐之何」，彼注云「加之者，辟問輕重兩舉之」。然則此傳非問輕重兩舉而亦言之。下十年傳云「桡者曰侵，精者曰伐。戰不言伐，圍不言戰，人不言圍，滅不言入，書其重者也」，然則侵伐戰圍入滅，數者相對，是其輕重之名。今以納問伐，直據納接菑不言伐而已，實非輕重兩舉，故得言之矣。○注「據晉」至「言伐」。○解云：即文十四年經云「晉人納接菑于邾婁」是也。伐而
言納者，猶不能納也。伐者，非入國辭，故云爾。
【疏】注「伐者」至「云爾」。○解云：下十年傳云「桡者曰侵，精者曰伐」。然則伐者，雖重於侵，仍非入國之義，是以此經兼舉其伐，見不能納矣。糾者何？公子糾也。何以不稱公子？據下言子糾，知非當國，本當去國見挈言公子糾。○去國，起呂反，下「故去」同。
【疏】「糾者何」。○解云：欲言己臣，納於他國，欲言齊

臣，文不繼齊，故執不知問。○注「據下」至「子糾」。○解云：下經云「九月，齊人取子糾殺之」，傳云：「其稱子糾何？貴也。其貴奈何？宜為君者也。」彼注云：「故以君薨稱子某言之者，^①著其宜為君。」則下經言子見其貴，則知此經單言糾者，非當國之辭。既不作當國之辭，故今宜但去國言公子糾，見挈於魯侯而已，是以問其名不稱公子。君前臣名也。《春秋》別嫌明疑，嫌當為齊君，在魯君前不為臣。禮，公子無去國道，臣異國義，故去公子，見臣於魯也。納不致者，言伐，得意，不得意可知，猶遇，弗遇例也。不月者，非納篡辭。○別，彼列反。見，賢徧反。【疏】注「禮公」至「國義」。○解云：然則禮有三諫不從待放去者，其異姓之臣乎？公子者，同姓之臣，本無去國之義矣。○注「納不」至「可知」。○解云：上六年注云：「公與一國及獨出用兵，得意不致，不得意致伐。」今此納糾而不入，亦是不得意，而不言「公至自伐齊」者，謂此經既言「公伐齊，納糾」，言伐者，不得意明矣，何勞致伐見不得意乎？故云「納不致者，言伐，得

①「某」，原作「其」，下傳注文作「子某」，則「其」字誤。今據下傳注文及單疏殘本改。

意、不得意可知」矣。○注「猶遇、弗遇例也」。○解云：上六年注云：「公與一國出會盟，得意致地，不得意不致。」然則《春秋》之內，亦有遇禮所以不致地以見得意者，正以經書亦有遇、弗遇之文，則知書遇得意明矣，何勞致地以見之乎？則知隱四年「夏，公及宋公遇於清」，言遇，得意可知；桓十年「秋，公會衛侯于桃丘，不遇」，不得意明矣，故云「猶遇、弗遇例也」。○注「不月」至「篡辭」。○解云：隱四年「冬，十有二月，衛人立晉」，注云：「月者，大國篡例月，小國時，立、納、入皆爲篡。」然則莊六年「夏，六月，衛侯朔入于衛」，哀六年「秋七月，齊陽生入于齊」之屬皆是也。今此亦書納而不月者，子糾次正宜立，非篡故也。非篡而言納者，納者入辭，子糾不得國，魯公之由，是以書伐納，見其伐而不能納，以刺魯侯矣。

齊小白入于齊。曷爲以國氏？據宋公

子池自陳入于蕭，^①氏公子也。【疏】注「據宋」至「子也」。○解云：即定十一年「春，宋公之弟辰及仲佗、石彊、公子池自陳入于蕭，以叛」是也。當國也。當國，故先氏國也。不月者，移惡于魯也。【疏】注「不月」至「魯也」。○解云：正以大國篡例月，故言此矣。而言移惡于魯者，正

以小白成篡，實由魯人不早送子糾故也。其言入何？篡辭也。

秋，七月，丁酉，葬齊襄公。

八月，庚申，及齊師戰于乾時，我師敗績。內不言敗，此其言敗何？據郎之戰。

【疏】「其言入何」。^②○解云：據桓十七年「秋，八月，蔡季自陳歸于蔡」，不言入。今言入，故難之。不注言者，文不悉也。○「秋七月」至「襄公」。○解云：隱三年傳曰「過時而日，隱之也」，彼注云「隱，痛也。痛賢君不得以時葬」。則襄公去年十一月見殺，至今年秋七月，整九月也，而書日葬之，明是痛賢君不得以時葬故也。而注不言之者，從可知省文也。其襄公之賢，見於上四年。○

^①「池」，原作「地」。阮校引何焯云：「『地』當作『池』」。今據余本改。下疏「公子地」據單疏鈔本、單疏殘本亦改作「公子池」。

^②「其言入何」，阮校：「此本此二節疏在何注『據郎之戰』下，閩、監、毛本移此節於傳文『其言入何』節下，移『秋七月至襄公』節於經文『秋七月丁酉葬齊襄公』下。」

注「據郎之戰」。○解云：桓十年「冬，十有二月，丙午，齊侯、衛侯、鄭伯來戰于郎」，傳云：「此偏戰也。何以不言師敗績？」內不言戰，言戰乃敗矣。然則彼文師有成解，故此弟子據而難之。

伐敗也。

自誇大其伐而取敗。

○自誇，苦瓜反，本又作「夸」，下同。**曷爲伐敗？**據

內不言敗績，曷爲自誇大其伐而取敗？**復讎也。**復

讎以死敗爲榮，故錄之。高齊襄，賢仇牧是也。【疏】注

「高齊襄」。○解云：即上四年夏，「紀侯大去其國」，傳云

「曷爲不言齊滅之？爲襄公諱也。《春秋》爲賢者諱。

何賢乎襄公？復讎也」，「襄公將復讎乎紀，卜之曰「師

喪分焉」，「寡人死之，不爲不吉也」者，是高齊侯復讎以

死敗爲榮之事矣。注「賢仇牧是也」者，即下十二年秋，

「宋萬弑其君接及其大夫仇牧」，傳云「何以書？賢也。

何賢乎仇牧？仇牧可謂不畏強禦矣。其不畏強禦奈

何」云云，「萬怒，搏閔公，絕其脰。仇牧聞君弑，趨而至，

遇之於門，手劍而叱之，萬臂擲仇牧，碎其首，齒著乎門

闔。仇牧可謂不畏強禦矣」，是賢仇牧復讎以死敗爲榮

之義。**此復讎乎大國，曷爲使微者？**據納子

糾公猶自行，即大夫當有名氏。【疏】注「即大夫當有名

氏」。○解云：《公羊》之義，以大夫得見名氏，謂士爲微，故言此。**公也。**如上據知爲公。**公則曷爲不言公？不與公復讎也。**曷爲不與公復讎？

據諱與讎狩。【疏】注「據諱與讎狩」。○解云：即上四年

「冬，公及齊人狩于郕」，傳云：「公曷爲與微者狩？齊侯

也。齊侯則其稱人何？諱與讎狩也。」然則公與讎人

狩，則以爲不書而諱之。①今乃復讎于齊，宜以爲善，而

反不與，故難之。**復讎者，在下也。**時實爲不能納

子糾伐齊，諸大夫以爲不如以復讎伐之，於是以復讎伐

之，非誠心至意，故不與也。書敗者，起託義。戰不致

者，有敗文，得意、不得意可知例。【疏】注「書敗者起託

義」。○解云：《春秋》之例，內不言戰，言戰乃敗。今乃

經上文云「戰于乾時」，即內敗明矣。而又言「我師敗績」

者，起託以敗爲榮故也。○注「戰不」至「知例」。○解

云：六年「不得意致伐」之下，注云：「公與一國及獨出用

兵，得意不致，不得意致伐。」今此亦不得意，合致伐，而

①「不書」，杉浦校：「單疏鈔本、單疏殘本「書」作「善」。

按：當作「不善」。

不致伐者，既有我師敗績之文，不得意明矣，故言「可知例」。

九月，齊人取子糾殺之。其取之

何？^①據楚人殺陳夏徵舒不言取，執齊慶封殺之言執

也。○夏，戶雅反。【疏】注「據楚」至「言取」。○解云：

宣十一年「冬，十月，楚人殺陳夏徵舒」是也。○注「執

齊」至「執也」。○解云：即昭四年「秋，七月，楚子、蔡侯、

陳侯」以下「伐吳，執齊慶封殺之」是也。內辭也。脅

我，使我殺之也。以下浚洙，知其脅也。以稱人共

國辭，知使魯殺之。時小白得國，與鮑叔牙圖國政，故鮑

叔薦管仲、召忽曰：「使彼國得賢，己國之患也。」乃脅魯

使殺子糾，求管仲、召忽。魯惶恐，殺子糾，歸管仲，召忽

死之，故深諱，使若齊自取殺之。○邵忽，本又作「召」，^②

上照反。恐，丘勇反。【疏】注「以稱」至「殺之」。○解

云：謂不言齊鮑叔取子糾殺之，而言齊人，則知一人之

號，二國共有。一人之號既二國共有，則知齊、魯皆有殺

子糾之惡明矣，是以注者約之。○注「時小白」至「取殺

之」。○解云：皆《世家》及《齊語》之事。其稱子糾

何？據不立也。【疏】注「據不立也」。○解云：正以

下三十二年「冬，十月，乙未，子般卒」，傳云「君存稱世子，君薨稱子某」。然則子糾者，嗣君之稱，今竟不立，得言「子糾」，故難之。貴也。其貴奈何？宜為君者也。故以君薨稱子某言之者，著其宜為君，明魯

為齊殺之，皆當坐弑君，因解上納言糾，皆不為篡，所以理嫌疑也。月者，從未踰年君例。主書者從齊取也。○

當坐，才卧反，後「當坐」之類皆放此。【疏】注「故以君」至「言之」。○解云：取三十二年傳文。○注「明魯」至

「弑君」。○解云：魯所以當坐弑君，即《穀梁傳》云「十室

之邑可以逃難，百室之邑可以隱死，以千乘之魯而不能存子糾，以公病矣」是。^③○注「因解」至「嫌疑」。○解

云：此經若不言子糾，上納言糾，有當國之嫌，後人疑其篡矣。今作嗣君之稱，則知上經單言糾，作君前臣名之

故也，故言所以理嫌疑也。○注「月者從未踰年君例」。

^①「其取之何」，阮校：「唐石經作『其言取之何』，諸本誤脫『言』字。」

^②「又」，原作「文」，今據余本、閣本、宋本《釋文》改。

^③「以公」，阮校：「浦鏜云：『以』下脫『為』。按：浦說是也，有『為』字與《穀梁傳》合。」

○解云：隱公四年春王二月，^①「戊申，衛州吁弑其君完」，注云：「日者，從外赴辭，以賊聞例。」然則弑成君者，例皆書日，即宣二年「秋，九月，乙丑，晉趙盾弑其君夷獯」，宣四年「夏，六月，乙酉，鄭公子歸生弑其君夷」之屬是也。今此子糾見弑而書月，故知從未踰年君例。若然，僖九年「冬，晉里克弑其君之子奚齊」，傳云：「其言弑其君之子奚齊何？」弑未踰年君之號也。」所以不月者，彼注云「弑未踰年君例當月，不月者，不正遇禍，終始惡明，故略之」是也。若然，僖十年春正月，「晉里克弑其君卓子，及其大夫荀息」，其踰年而不日者，彼注云「不日者，不正遇禍，終始惡明，故略之」是也。鄉來所述，皆是外諸侯之例，若其內例，則異於此，是以莊三十二年「冬，十月，乙未，子般卒」，文十八年「十月，子卒」，皆是未踰年之君，而日或月者，彼自作三世之義。云云之說，已寫于上。○注「主書者從齊取也」。○解云：言主書此事者，正欲從而罪齊，但因見魯之惡耳。

冬，浚洙。洙者何？水也。以言浚也。

○浚，思俊反，深也。洙，音珠，水名。【疏】「洙者何」。○解云：欲言城邑，而無營築之文，欲言小水，更無比例，故執不知問。○注「以言浚也」。○解云：正以與《尚書》

「浚畎澮」之文同，故知水名。浚之者何？深之也。曷為深之？據本非人功所為。【疏】「浚之者何」。○解云：正以洙是舊水，今始言浚，故執不知問。

○注「據本非人功所為」。○解云：正言畎澮之屬，是人功為之故也。畏齊也。洙在魯北，齊所由來。曷為

畏齊也？據伐敗也。【疏】注「據伐敗也」。○解云：

即上傳云「內不言敗，此其言敗何？伐敗也」，注云「自誇大其伐而取敗」是也。辭役子糾也。^②時魯新見

脅，畏齊浚之，微弱恥甚，故諱使若辭不肯殺子糾也，齊自取殺之，畏齊怒，為備，亦所以起上脅也。【疏】注「亦所以起上脅也」。○解云：言今此畏齊者，由前被脅而殺

子糾，因茲失操，遂深洙水矣。

十年，春，王正月，公敗齊師于長勺。

○勺，時灼反。

二月，公侵宋。曷為或言侵，或言

殺，當據正。

①「王」，京都本、再造善本作「下」。

②「役」，余本作「殺」。阮校：「唐石經、鄂本、宋本作「殺」，當據正。」

伐？**脩者曰侵**，**脩**，羸也。將兵至竟，以過侵責之，服則引兵而去，用意尚羸。○**脩者**，七奴反，又才古反。【疏】「曷爲或言侵或言伐」。○解云：即此文「公侵宋」，及上九年「夏，公伐齊，納糾」之屬是。○注「以過侵責之」。○解云：以其犯過而侵責之。**精者曰伐**。精猶精密也。侵責之不服，推兵入竟，伐擊之益深，用意稍精密。【疏】注「侵責」至「益深」。○解云：推猶舉也。言淺侵不服，則更舉兵深入其竟，而伐擊之，益深於前。**戰不言伐**，舉戰爲重，黎戰是也。^①合兵血刃曰戰。**圍不言戰**，舉圍爲重，「楚子圍鄭」是也。以兵守城曰圍。**人不言圍**，舉人爲重，「晉侯入曹，執曹伯」是也。得而不居曰人。**滅不言人**，舉滅爲重，「齊滅萊」是也。取其國曰滅。**書其重者也**。明當以重者罪之，猶律一人有數罪，以重者論之。月者，屬北敗彊齊之兵，南侵彊宋，南北有難，復連禍於大國，故危之。○數，所主反。屬，音燭。【疏】注「月者」至「危之」。○解云：正以侵伐例時，即上九年「夏，公伐齊」之屬是也。今書月，故如此解。是以《穀梁傳》曰「侵例時，此其月何也？」乃深其怨於齊，又退侵宋以衆其敵，惡之，故謹而月之「是也」。

三月，宋人遷宿。遷之者何？不通也。以其不道所遷之地。【疏】「遷之者何」。○解云：

欲言其遷，不言于某，欲言不遷，經書遷宿，故執不知問。○注「以其不道所遷之地」。○解云：正以不言于某，知非實遷矣。**以地還之也**。還，繞也。解上不通也。

不通反爲遷者，宋本欲遷宿君取其國，不知宿之不肯邪？宋逆詐邪？先繞取其地，使不得通四方，宿窮，從宋求遷，故得言遷。【疏】注「宋逆詐邪」。○解云：謂宋人逆慮其不服，預詐而還之。^②○「宿窮從宋求遷」。○

解云：謂宿君服去矣。**子沈子曰：「不通者，蓋因而臣之也。」**以宋稱人也，宿不得通四方，宿君遷，

宋因臣有之，不復以兵攻取，故從國辭稱人也。月者，遷取王封，當與滅人同罪。書者，宋當坐滅人，宿不能死社稷，當絕也。主書者從宋也。○不復，扶又反。【疏】注

^①「黎戰」，余本、鄂本作「犂戰」。齊召南《考證》曰：

「疑『黎戰』當是『來戰』之訛，即桓十年冬，齊、衛、鄭「來戰于郎」是也。」

^②「還」，京都本作「遷」。

「故從國辭稱人也」。○解云：端拱取宿，不煩兵武，人人皆欲，故以國辭稱人矣。○注「月者」至「絕也」。○解云：《春秋》之例，大國之遷例月，即僖三十一年「十有二月，衛遷于帝丘」。小國時者，即昭九年春「許遷于夷」之屬是也。今此宿是小國，宋人遷之而反書月，故云「月者，遷取王封，當與滅人同罪」也。其滅國書月，即下「冬，十月，齊師滅譚」，十三年「夏，六月，齊人滅遂」之屬是也。若然，案僖元年「夏，六月，邢遷於陳儀」，邢是小國而書月者，彼注云「遷例大國月，重煩勞也，小國時。此小國月者，霸者所助城，故與大國同」是也。○注「主書者從宋也」。○解云：言主書此事者，正欲從而罪宋遷取王封，但因見宿君不死社稷之惡耳。

夏，六月，齊師、宋師次于郎。公敗宋

師于乘丘。其言「次于郎」何？據齊國書伐我

不言次，敗不言乘丘。○乘，繩證反。【疏】注「據齊」至

「言次」。○解云：即哀十一年「春，齊國書帥師伐我」是

也。①○注「敗不言乘丘」。②○解云：正以敗言乘丘，

反次在郎，於義似乖，故難之。伐也。時伐魯，故書

次。郎，魯地。伐則其言次何？據齊國書伐我不

言次。齊與伐而不與戰，故言伐也。此道本所以當言伐意也。齊與伐而不與戰，伐兵得成，敗當言伐也。③○齊與，音預，下及注同。【疏】「齊與伐」至「言伐也」。○解云：若齊本與宋共伐，而但不與戰，故有書其伐耳。④我能敗之，故言次也。此解本所以不言伐，言次意也。二國纔止次，未成於伐魯，即能敗宋師，齊師罷去，故不言伐言次也。明國君當彊，折衝當遠，魯微弱，深見犯，至於近邑，賴能速勝之，故云爾。所以彊內，且明臣子當將順其美，匡救其惡。○折衝，之設反，下昌容反。【疏】注「折衝當遠」。○解云：謂折衝禦禦之心當遠也。○注「至於近邑」。○解云：即桓十年傳云

①「師」，原作「帥」，今據哀公十一年經改。

②「敗不言乘丘」，原作「敗言乘丘」。阮校：「此本脫

「不」。今據上注文改。

③「敗」，余本作「故」。阮校：「鄂本、宋本「敗」作「故」，當訂正。」

④「有」，杉浦校：「單疏鈔本、單疏殘本作「直」。」按：「有」當「直」字訛。」

「郎者何？吾近邑」是也。○注「且明」至「其惡」。^①《孝經》及襄十四年《左氏傳》文也。言為臣子之法，宜行君父之義，順君父之美，即此上注云「賴能速勝之」是也。若見君父之惡，當正而救之，即上注云「魯微弱，深見犯，至於近邑」是也。

秋，九月，荆敗蔡師于莘，以蔡侯獻舞歸。荆者何？州名也。州謂九州：冀、兗、青、

徐、楊、荆、豫、梁、雍。○莘，所巾反。雍，於用反。【疏】

「荆者何」。○解云：欲言是國，由來未有，欲言非國，而敗蔡師，故執不知問。○注「州謂」至「梁雍」。○解云：

案《禹貢》冀州既載，鄭注云：「載之言事，事謂作徒役

也。」^②兩河間曰冀州，不書其界者，時帝都之，使若廣大然。「濟河惟兗州」，鄭注云：「兗州之界在此兩河間。」^③

「海岱惟青州」，鄭注云：「今青州界自海至岱。東岳曰岱山。」「海岱及淮惟徐州」，鄭注云：「徐州界又南至淮水。」

「淮海惟揚州」，鄭注云：「揚州界自淮而南，至海以東也。」「荆及衡陽惟荊州」，鄭注云：「荊州界自荊山南，至

衡山之南。」「荊河惟豫州」，鄭注云：「豫州界自荊山而北至河。」「華陽黑水惟梁州」，鄭注云：「梁州界自華山之南，至于黑水也。」「黑水西河惟雍州」，鄭注云：「雍州界

至黑水而東至西河也。」^④然則何氏此注九州之名及次第皆依《禹貢》之州界，不敢依《職方》與《爾雅》，何者？正以《禹貢》為正典故也。案《爾雅·釋地》云「兩河間曰冀州」，李巡云：「兩河間其氣性相近，故曰冀州。冀，近也。」河南曰豫州，孫氏、郭氏皆云：「自東河至西河之南曰豫州。」李巡曰：「河南其氣著密，厥性安舒，故曰豫。豫，舒也。」河西曰隴州，李氏云：「其氣蔽壅，受性急凶，故曰隴。隴，壅塞也。」漢南曰荊州，「其氣慘剛」，^⑤稟性强梁，故曰荊。荊，強也。「江南曰楊州」，李氏

① 「其惡」下，杉浦校：「單疏鈔本、單疏殘本有『者』字，是也。」

② 「役」，原作「設」，《尚書注疏》作「役」。阮校：「浦鏗云：『設』當『役』字誤。是也。」杉浦校：「單疏鈔本、單疏殘本『設』作『役』。」今據改。

③ 「在此兩河間」，阮校：「按：《史記·夏本紀》集解引作『在此兩水之間』，謂在沛水、河水之間。」

④ 「雍州界至黑水而東至西河」，阮校：「按：上『至』字當作『自』。《詩·韓奕》正義引作『自』。」

⑤ 「其氣」上，依文例，當有「某氏曰」，疑脫。齊召南《考證》云：「應有『李氏曰漢南』五字。此疏引《爾雅·釋地》，各州皆然，此不當脫也。」

云：「江南其氣慘勁，厥性輕楊，故曰楊州也。」孫氏、郭氏曰：「自江至南海也。」濟河間曰兗州，李氏云：「濟河間其氣專質，厥性信謹，故曰兗州。」^①兗，信也。「燕曰幽州」，李氏云：「燕其意氣惡，^②厥性僂疾，故曰幽。」幽，惡也。」^③孫氏、郭氏曰：「自易水至北狄也。」齊曰營州，李氏曰：「齊其氣清舒，受性平均，故曰營。營，平也。今為青州。」孫氏、郭氏曰：「自岱東至海。」濟東曰徐州，李氏曰：「濟東至海，其氣寬舒，稟性安徐。徐，舒也。」孫氏、郭氏曰：「濟東至海也。」然則《爾雅》九州有幽、營、無梁、青，蓋是殷制，故與《禹貢》不同。案今《禹貢》則有梁、青，無幽、營，蓋是夏之法矣。其舜改九州而置十二者，則幽、并及益是。^④案《周禮·職方氏》云：東南曰楊州，正南曰荊州，河南曰豫州，正東曰青州，河東曰兗州，正西曰雍州，東北曰幽州，河內曰冀州，正北曰并州。然則《周禮》有青、幽、并也，若對《爾雅》，則長青、并，無徐、營；若對《禹貢》，則長幽、并，無徐、梁矣。但《職方》周法，何氏不取，故此注不依之耳。州不若國，國不若氏，氏不若人，人不若名，名不若字，皆取精詳錄也。【疏】「州不若國」。○解云：言荆不如言楚。○「國不若氏」。○解云：言楚不如言潞氏、甲氏。○「氏

不若人」。○解云：言潞氏不如言楚人。○「人不若名」。○解云：言楚人不如言介葛盧。○「名不若字」。○解云：言介葛盧不如言邾婁儀父。○注「皆取精詳錄也」。○解云：正以貴重為詳錄，輕賤為略之也。字不若子。爵最尊，《春秋》假行事以見王法，聖人為文辭孫順，善善惡惡，不可正言其罪，因周本有尊爵稱國氏人名字之科，故加州文，備七等，以進退之，若自記事者書人姓名，主人習其讀而問其傳，則未知己之有罪焉爾，猶此類也。○見，賢偏反。孫，音遜。惡惡，並如字，一讀上烏路反。傳，有專反。【疏】「字不若子」。○解云：言邾婁儀父不如言楚子、吳子。○注「春秋」至「王法」。○解云：即孔子曰「我欲託諸空言，不如載諸行事」是也。○注「善善」至「其罪」。○解云：若其善善可正言其美，但以惡惡不可正言其罪，若正言其罪，則非孫順之義，故此何氏偏以其罪言之。若其備文，宜云不可正言其善惡

①「兗州」，杉浦校：「單疏鈔本、單疏殘本無『州』字。」

②「惡」，阮校：「《爾雅·釋地》疏作『要』，此誤。」

③「惡」，阮校：「何校本『惡』皆作『要』。」

④「益」，阮校：「按：『益』當作『營』。」

矣。○注「因周」至「之科」。○解云：即隱元年注邾婁儀父云「稱字所以得爲褒者，春秋前失爵，在名例」之屬是也。○注「故加州」至「姓名」。○解云：所以必備七等之法者，正以北斗七星主賞罰示法，《春秋》者賞罰之書，故則之。故《說題辭》曰「北斗七星有政，《春秋》亦以七等宣化」，《運斗樞》曰「《春秋》設七等之文，以貶絕錄行，應斗屈伸」是也。○注「主人」至「焉爾」。○解云：定元年傳文。彼注云「此假設而言之，主人謂定、哀也。習其經而讀之，問其傳解詁，則未知己之有罪於是」是也。蔡侯獻舞何以名？據獲晉侯不名。【疏】注「據獲晉侯不名」。○解云：僖十五年「晉侯及秦伯戰于韓，獲晉侯」是也。絕。曷爲絕之？據晉侯不名絕。【疏】「絕」。○解云：禮，諸侯不生名，則書名者絕之，不以爲諸侯也。獲也。獲，得也，戰而爲敵所得。獻舞不言獲，故名以起之。曷爲不言其獲？據晉侯言獲也。不與夷狄之獲中國也。與凡伯同義。夷狄謂楚。不言楚言荆者，楚疆而近中國，卒暴責之，則恐爲害深，故進之以漸，從此七等之極始也。①○近，附近之近。卒，七忽反。【疏】「不與」至「中國也」。○解云：秦

亦夷狄而得獲晉侯者，非真故也。是以爵得稱伯，居舊土耳。○注「與凡伯同義」。○解云：即隱七年注云「中國者，禮義之國也。執者，治文也。君子不使無禮義制治有禮義，故絕不言執，正之言伐也」，「所以降夷狄，尊天子，爲順辭」。然則此亦獲者治文，君子不使無禮義制治有禮義，故絕不言獲，正之，所以降夷狄，尊中國爲順辭矣，故云「與凡伯同義」。然則彼已有傳，此復發之者，彼是天子大夫，此則諸侯，嫌其異，故同之。○注「夷狄」至「極始也」。○解云：注言此者，欲道楚屬荊州，吳屬楊州，所以抑楚言荆，不抑吳言楊者，正以楚近中國，恐爲中國之害，故欲進之以漸，先從卑稱進之。若先得貴名而後退之，則恐害於諸夏故也。《運斗樞》曰「抑楚言荆，不使夷狄主中國」者，義亦通於此。戴氏云「荆楚一物，義能相發。吳楊異訓，故不得州名也」者，與何氏異。《穀梁傳》曰：「荆者，楚也。何爲謂之荆？狄之也。何爲狄之？聖人立，必後至，天子弱，必先叛，故曰荆，狄之也。」與此異，不得合也。

①「始」，原作「治」，余本、閣本作「始」，與成公七年疏引合。疏標起訖亦云「極始」。今據改。

冬，十月，齊師滅譚，譚子奔莒。何以

不言出？據衛侯出奔也。○譚，徒南反。【疏】注「據

衛侯出奔也」。○解云：即僖二十八年「衛侯出奔楚」、襄

十四年「衛侯衍出奔齊」之屬是也。注者欲據二人，故不

道所奔國也。國已滅矣，無所出也。別於有國出

奔者。孔子曰：「君子於其言，無所苟而已矣。」月者，惡

不死位也。○別，彼列反。惡，烏路反。

十有一年，春，王正月。

夏，五月，戊寅，公敗宋師于鄆。○鄆，子

斯反。

秋，宋大水。何以書？記災也。外

災不書，此何以書？據鄆移不書。①○鄆，火號

反，又音郭。【疏】注「據鄆移不書」。②○解云：即襄十

九年「取邾婁田自鄆水」，傳云「其言自鄆水何？」以鄆為

竟也。何言乎以鄆為竟？鄆移也」，注云「魯本與邾婁

以鄆為竟，鄆移入邾婁界，魯隨而有之」者是也。及我

也。時魯亦有水災，書魯則宋災不見，兩舉則煩文不

省，故詭例書外以見內也。先是二國比興兵相敗，百姓

同怨而俱災，故明天人相與報應之際，甚可畏之。○不

見，賢徧反，下同。省，所景反。應，應對之應。【疏】注

「時魯」至「見內也」。○解云：案襄九年「春，宋火」，傳

云：「外災不書，此何以書？為王者之後記災。」與此異

者，正以比年大水，③水者，流通之道，可以及兩國，故得

書外以明內矣。彼是火災，無及內之理，而得書見，明為

王者之後記災故也。若然，襄十九年傳云「鄆移也」，亦

是水災，何不書邾婁大水，以見及內者？彼直移入邾婁

竟內，故魯隨而侵之，實不及魯，寧得類此？○注「先是

二國比興兵相敗」。○解云：即上所云「公敗宋師于鄆」，

十年夏「公敗宋師于乘丘」之屬是也。

冬，王姬歸于齊。何以書？過我也。

時王者嫁女於齊，塗過魯，明當有送迎之禮。在塗不稱

婦者，王者無外，故從在國辭。○過，古禾反。【疏】注

①「鄆」，余本作「郭」。

②「注據鄆移不書」，此「郭」當作「鄆」，單疏殘本作「注據鄆移不書也者」。

③「比年」，單疏殘本、京都本、再造善本、杉浦校毛本作「比言」，單疏鈔本作「此言」。

「在塗不稱」至「在國辭」。○解云：正以隱二年傳云：「女在其國稱女，在塗稱婦，入國稱夫人。」今此在塗而不稱婦，故如此注也。云「王者無外」者，桓八年傳云「女在其國稱女，此其稱王后何？王者無外，其辭成矣」是也。

十有二年，春，王三月，紀叔姬歸于

鄆。其言「歸于鄆」何？據國滅來歸不書，鄆非

紀國而言歸。【疏】注「據國」至「不書」。○解云：即上四

年「紀侯大去其國」，^①不書叔姬來歸是也。叔姬來歸所

以不書者，江熙云「叔姬來歸不書，非歸寧，且非大歸」是

也。然則紀國之滅在莊四年，至此乃歸鄆者，江熙云：

「叔姬守節，積有年矣。季雖有鄆入于齊，不敢懷二，然

襄公豺狼，未可闇信，桓公既立，德行方宣於天下，是以

叔姬歸于鄆，魯喜其女得申其志也。」○注「鄆非紀國而

言歸」。○解云：謂非國都，今又屬齊，如此注者，意決隱

七年「叔姬歸于紀」之經矣。隱之也。何隱爾？

其國亡矣，徒歸于叔爾也。叔者，紀季也。婦人

謂夫之弟爲叔。來歸不書，書歸鄆者，痛其國滅無所歸

也。鄆不繫齊者，時齊聽後五廟，故國之，起有五廟存

也。月者，恩錄之。【疏】注「婦人」至「爲叔」。○解云：

《爾雅》文。即《曲禮上》篇云「嫂叔不通問」是也。○注「鄆不」至「廟存也」。○解云：如此注者，正欲決昭二十一年宋華亥等「自陳入于宋南里以畔」之文矣。○注「月者恩錄之」。○解云：即上元年注云：「內女歸例月，外女不月者，聖人探人情以制恩，實不如魯女。」然則內女之歸皆書月者，悉爲恩錄故也，是以此注云「月者，恩錄之」。

夏，四月。

秋，八月，甲午，宋萬弑其君接及其大

夫仇牧。「及」者何？累也。弑君多矣，

舍此無累者乎？孔父、荀息皆累也。舍

孔父、荀息無累者乎？^②曰：有。復反覆發

傳者，樂道人之善也。孔子曰：「益者三樂，損者三樂。

樂節禮樂，樂道人之善，樂多賢友，益矣。樂驕樂，樂佚

遊，樂宴樂，損矣。」○接，《左氏》作「捷」。仇牧，音求，下

①「去」，原作「夫」，今據京都本、再造善本、中華本改。

②「無累者乎」，阮校：「鄂本無「者」，唐石經有「者」，此

行十一字。」

音木。舍，音捨，下「舍孔父」同。復，扶又反，年末同。^①覆，芳服反。驕樂，音洛，下「宴樂」同。【疏】宋萬弑其君接。○解云：正本皆作「接」字，故賈氏云《公羊》、《穀梁》曰「接」是也。^②○「及者何」。○解云：尊卑灼然，而言「及」以殊之，故執不知問。○「孔父荀息皆累也」。○解云：孔父之累在桓二年，荀息之累在僖十年。○「曰有」。○解云：欲指文公十八年叔仲惠伯被殺之事。○注「復反」至「之善也」。○解云：謂桓二年已有此傳矣。○注「孔子曰」至「損矣」。○解云：樂皆是發心之樂，唯有「禮」下一樂，是禮樂之樂耳。言樂節禮樂者，言樂得禮樂之節。言「樂道人之善」者，謂口道之道。言「樂佚遊」者，樂欲遊從。言「樂宴樂」者，樂欲安樂而好內矣。有則此何以書？賢也。何賢乎仇牧？據與孔父同也。【疏】注「據與孔父同」。○解云：案桓二年傳云「何賢乎孔父」，彼注云「據叔仲惠伯不賢」。今此傳云「何賢乎仇牧」者，亦與孔父同據，故言據與孔父同。仇牧可謂不畏彊禦矣。以下錄萬出奔月也。禦，禁也，言力彊不可禁也。○禦，魚呂反。【疏】注「以下」至「月也」。○解云：即下文「冬，十月，宋萬出奔陳」，注

云「月者，使與大國君奔同例，明彊禦也」是。其不畏彊禦奈何？萬嘗與莊公戰，莊公，即魯莊公。戰者，乘丘時。【疏】注「戰者乘丘時」。○解云：即上十年「公敗宋師于乘丘」是也。獲乎莊公。莊公歸，散舍諸宮中，散，放也。舍，止也。獲不書者，士也。【疏】注「獲不書者士也」者。○解云：《公羊》之例，大夫見經故也。數月然後歸之。歸，反為大夫於宋，^④與閔公博，傳本道此者，極其禍生於博戲，相慢易也。○數，所主反。公博，如字，戲名也。字書作「薄」。易，以豉反。【疏】「歸反」至「於宋」。○解云：歸而反國，乃為大夫於宋矣。婦人皆在側，萬曰：「甚矣！魯侯之淑，淑，善。魯侯之美

① 「未」，原作「末」，今據宋本《釋文》改。

② 「接」，阮校：「按：今《穀梁》自唐石經以下本皆作「捷」，與賈氏所據不同。」

③ 「注據與孔父同」○解云，杉浦校：「單疏鈔本，單疏殘本作「注據與孔父同也者」，無「解云」。」

④ 「反」，阮校引惠棟云：「《漢書》注「反」作「又」。」

也！美，好。天下諸侯宜爲君者，唯魯侯

爾！」萬見婦人皆在側，故許閔公以此言。言閔公不如

魯侯美好。○訐，九列反，九謁反，一音九刈反。又一本

作「揭」，其例，去列二反。閔公矜此婦人，色自美大

於此婦人。妒其言，顧曰：「此虜也！」顧謂側

婦人曰：此，萬也。虜，執虜也。○妒，丁故反。爾虜

焉故，爾，女也，謂萬也。更向萬曰：女嘗執虜於魯侯，

故稱譽爾。○爾女，音汝，下同。稱譽，音餘，又音預。

魯侯之美惡乎至？」^①惡乎至，猶何所至。○惡，

音烏，注同。萬怒，搏閔公，絕其脰。脰，頸也。

齊人語。○搏，音博。脰，音豆，脰也。^②仇牧聞君

弑，趨而至，遇之于門，手劍而叱之。手劍，

持技劍。^③叱，罵之。○叱，昌實反。萬臂掇仇

牧，^④碎其首，側手曰掇。首，頭。○萬臂，必賜反，

本又作「辟」，婢亦反。掇，素葛反，又素結反，側手繫

也。^⑤齒著乎門闔。^⑥闔，扇。○著，直略反。門

闔，戶臘反，門扇也。仇牧可謂不畏彊禦矣。猶

乳犬攫虎，^⑦伏雞搏狸，精誠之至也。爭搏弑君而以當國

^①「此虜也爾虜焉故魯侯之美惡乎至」，阮校：「《九經

古義》云：『《春秋繁露》曰：「此虜也，爾虜焉知魯侯

之美惡乎至？」萬怒，搏閔公，絕脰。』《韓詩外傳》

云：「閔公矜此婦人，妒其言，顧曰：爾虜焉知魯侯

之美惡乎？」何本「知」作「故」，以「爾虜焉故」句，

「魯侯之美惡乎至」句，意反迂曲。」

^②「脰」，當誤，宋本《釋文》作「頸」。

^③「技」，阮校：「鄂本、宋本作「拔」。」

「萬臂掇仇牧」，王引之《經義述聞》：「何注曰：「側

手曰掇。《釋文》：「臂，必賜反，本又作「辟」，婢亦

反。」引之謹案：臂短不可以擊人，作「辟」者是也。

辟，椎擊也。「掇」當爲「殺」，「辟殺仇牧」者，批殺仇

牧也。」

^④「繫」，宋本《釋文》作「擊」，是。

^⑤「齒著乎門闔」，阮校：「唐石經「闔」字磨改重刻。

按：《爾雅·釋宮》郭注引《公羊傳》曰「齒著于門

闔」，今本「于」作「乎」，非。」

^⑥「攫」，阮校：「鄂本同，閔、監、毛本「攫」作「攫」，是

也。《釋文》：「攫，一本作搏。」今按：下此本《釋文》

「攫」，宋本《釋文》作「攫」，不另出校。

言之者，^①重錄彊禦之賊，禍不可測，明當防其重者，急誅之。○乳，如住反。獲，俱縛反，又九碧反，一本作「搏」，又音付。伏，扶又反。狸，力之反。【疏】注「猶乳」至「之至也」。○解云：言仇牧知力不敵而有討心，亦有精誠之至也。似若產乳之犬，不憚猛虎，伏雞愛子，投命敵狸之類，故比之。○注「爭搏弑」至「急誅之」。○解云：當國者，即言宋萬是也。故隱四年「衛州吁弑其君完」，傳云「曷為以國氏？當國也」者是也。

冬，十月，宋萬出奔陳。萬弑君所以復見

者，重錄彊禦之賊，明當急誅之也。月者，使與大國君奔同例，明彊禦也。○見，賢徧反。【疏】注「萬弑君」至「誅之也」。○解云：欲道《春秋》上下皆是弑君之賊，^②皆不重見，即宋督、鄭歸生、齊崔杼之屬是也。而宋萬、趙盾之屬復見者，當文皆有注，更不勞重說。○注「月者」至「禦也」。○解云：《春秋》之例云，大國君奔皆悉書月，即桓十六年「十有一月，衛侯朔出奔齊」之屬是也。今此大夫而書月者，明彊禦之甚故也。若然，昭二十年「冬，十月，宋華亥、向甯、華定出奔陳」，亦是大夫而書月，彼注云「月者，危三大夫同時出奔，將為國家患，明當防之」是也。而范氏此處注云「宋久不討賊，致令得奔，故謹而月

之也」者，與何氏別。

十有三年，春，齊侯、宋人、陳人、蔡人、邾婁人會于北杏。齊桓行霸，約束諸侯尊天子，故為此會也。桓公時未為諸侯所信鄉，故使微者會也。桓公不辭微者，欲以卑下諸侯，遂成霸功也。○鄉，許亮反。^③下，遐嫁反。【疏】注「桓公時」至「會也」。○解云：言未為諸侯所信任而歸鄉之，是以諸侯皆使微者會，即宋人、陳人之屬是也。

夏，六月，齊人滅遂。不會北杏故也。不諱

者，桓公行霸，不任文德而尚武力，又功未足以除惡。【疏】注「不諱者」至「武力」。○解云：《春秋》為賢者諱，而不諱者，正以不任文德而尚武力故也。其武力者，即此滅遂是也。《繁露》云「論功則桓兄文弟，論德則文兄桓弟」是也。而《論語》云「齊桓公九合諸侯，不以兵車之力」，謂自此以後。○注「又功未足以除惡」。○解云：《春秋》褒貶，皆以功過相除計。桓公之立，雖有北杏之

① 「搏」，阮校：「鄂本、閩本「搏」作「搏」，當據正。」

② 「皆是」，杉浦校：「單疏鈔本、單疏殘本作「但是」。」

③ 「許亮反」，宋本《釋文》此下有「年末同」三字。

「會，前有篡逆滅譚之非，論其功不足而惡有餘，故不爲諱也。而言未者，欲道其九合之後，功足以除惡也。」

秋，七月。

冬，公會齊侯盟于柯。何以不日？據

唐之盟日。○柯，音歌。【疏】注「據唐之盟日」。○解

云：即隱二年「秋，八月，庚辰，公及戎盟于唐」是也。易

也。易猶倂易也。相親信，無後患之辭。○易也，以豉

反，注及下同。倂，古卯反。其易奈何？桓之盟

不日，其會不致，信之也。其不日何以始

乎此？莊公將會乎桓，曹子進曰：「君之

意何如？」進，前也。曹子見莊將會，有慙色，故問之。

【疏】「桓之」至「信之也」。○解云：謂桓公諸會皆如是

也。以不日爲信者，《公羊》之例，不信者日故也。以不

致爲信者，凡致者，臣子喜其君父脫危而至，其會無危，

故以不致爲信也。○注「曹子」至「慙色」。○解云：注者

之意也。莊公曰：「寡人之生，則不若死

矣。」自傷與齊爲讎不能復也。伐齊納糾不能納，反復

爲齊所脅而殺之。○能復，扶又反，下同。【疏】注「自

傷」至「復也」。○解云：桓十八年「公薨于齊」，莊九年

「及齊師戰于乾時，我師敗績」是也。○注「伐齊納糾不

能納」。○解云：即上九年「夏，公伐齊，納糾」，傳曰「伐

而言納者，猶不能納也」是也。○注「反復」至「殺之」。

○解云：即上九年「齊人取子糾殺之」是也。曹子

曰：「然則君請當其君，臣請當其臣。」當猶

敵也。將劫之辭。莊公曰：「諾。」於是會乎

桓。莊公升壇，土基三尺，土階三等曰壇。會必有

壇者，爲升降揖讓，稱先君以相接，所以長其敬。○壇，

大丹反。以長，丁丈反。【疏】注「土基」至「曰壇」。○解

云：時王之禮也。必爲三等者，正以公爲上等，侯爲次

等，伯、子、男爲下等故也。○注「稱先君以相接」。○解

云：即四年傳云「古者，諸侯必有會聚之事，相朝聘之道，

號辭必稱先君以相接」是也。曹子手劍而從之。

從，隨也。隨莊公上壇，造桓公前而脅之。曹子本謀當

其臣，更當其君者，見莊有不能之色。○上，時掌反。造

桓，七報反，下同。【疏】注「曹子」至「見莊有不能之色」。

○解云：亦注者之意也。管子進曰：「君何求

乎？」管子，管仲也。君，謂莊公也。桓公卒愕不能應，

故管子進爲此言。○卒，七忽反。愕，五各反。應，應對之應。爲此言，于僞反，下「爲殺」同。【疏】注「桓公」至「此言」。○解云：正以劫桓公而管子對故也。曹子曰：莊公亦造次不知所言，故任曹子。【疏】注「莊公」至「曹子」。○解云：正以問莊公而曹子對，故言此。「城壞壓竟」，齊數侵魯取邑，以喻侵深也。○壓，於甲反，又於輒反。數，所角反。【疏】「城壞壓竟」。○解云：謂齊比來攻魯城，令至壞敗，抑壓魯竟，以爲己物也。君不圖與？「君，謂齊桓公。圖，計也。猶曰「君不當計侵魯太甚」。○與，音餘。管子曰：「然則君將何求？」所侵邑非一，欲求何者。【疏】「管子曰」至「何求」。○解云：意欲少還而已。曹子曰：「願請汶陽之田。」欲復魯竟。【疏】「曹子曰」至「之田」。○解云：舉其大畔言之，欲盡取之，故注云「欲復魯竟」矣。管子顧曰：「君許諾。」諸侯死國不死邑，故可許諾。【疏】注「諸侯」至「許諾」。○解云：即《曲禮下》篇云：「國君去其國，止之曰：『若之何去社稷矣？』」是無去國之文。不言若之何去田邑，故知不死邑也。桓公

曰：「諾。」曹子請盟，桓公下，與之盟。下壇與曹子定約盟誓莊公也。必下壇者，爲殺性不潔，又盟本非禮，故不于壇上也。【疏】注「下壇」至「莊公也」。○解云：猶言定約束其盟誓莊公也。○注「必下」至「不潔」。○解云：「不」字亦作「清」字者。○注「又盟本非禮」。○解云：即桓三年傳云「古者不盟，結言而退」是也。已盟，曹子標劍而去之。標，辟也。時曹子端劍守桓公，已盟，乃標劍置地，與桓公相去離，故云爾。○標劍，普交反，辟也，辟劍置地。劉兆云：「辟，捐也。」辟也，婢亦反，下同。去離，力智反。【疏】注「時曹子端」至「故云爾」。○解云：端猶始也。言曹子從始持劍而守桓公矣，及其盟訖，乃標劍而置于地，乃與桓公相去離者，釋傳云「而去之」之文。要盟可犯，臣約其君曰要，^①彊見要脅而盟爾，故云可犯。○要，一遙反。而桓公不欺；曹子可讎，以臣劫君，罪可讎。而桓公不怨，桓公之信著乎天下，自柯之盟始焉。諸侯猶是翕然信鄉服從，再會于鄆，同盟于幽，遂

①「其」，阮校：「鄂本、宋本『其』作『束』，當據正。」

成霸功，故云爾。劫桓公取汶陽田不書者，諱行詐劫人也。【疏】注「再會于鄆」。○解云：即下十四年冬及十五年春比會于鄆是也。○注「同盟于幽」。○解云：即下十六年冬，「同盟于幽」是也。○注「劫桓」至「劫人也」。○解云：正以成二年書取汶陽之田故也。

十有四年，春，齊人、陳人、曹人伐宋。

夏，單伯會伐宋。其言「會伐宋」何？

據伐國不殊會，曹伯襄言會諸侯。【疏】注「據伐國不殊」。①○解云：與上諸侯俱是伐宋，事不殊異，何勞別

生會文乎？故難之。○注「曹伯」至「諸侯」。○解云：

即僖二十八年冬，「曹伯襄復歸于曹。遂會諸侯圍許」是也。後會也。本期而後，故但舉會。書者，刺其不信，

因以分別功惡有深淺也。從義兵而後者，功薄。從不義兵而後者，惡淺。○別，彼列反。【疏】注「本期」至「舉

會」。○解云：若其不後，宜言單伯會齊人、陳人、曹人伐宋，如下文「單伯會齊侯、宋公、衛侯、鄭伯于鄆」之文。

○注「從義兵」至「功薄」。○解云：即此是。○注「從不義」至「惡淺」。○解云：無經可據，但言理當然也。

秋，七月，荆人蔡。

冬，單伯會齊侯、宋公、衛侯、鄭伯于鄆。○鄆，本亦作「甄」，規因反。②

十有五年，春，齊侯、宋公、陳侯、衛侯、鄭伯會于鄆。

夏，夫人姜氏如齊。

秋，宋人、齊人、邾婁人伐兒。○兒，音郕。

【疏】「夫人姜氏如齊」。○解云：復與桓通也。○「秋宋人」至「伐兒」。○解云：范氏云「宋主兵，故序齊上也。

班序上下，以國大小爲次」，「征伐則以主兵爲先，《春秋》之常也」。

鄭人侵宋。

冬，十月。

十有六年，春，王正月。

夏，宋人、齊人、衛人伐鄭。

秋，荆伐鄭。

① 「據伐國不殊」，阮校：「下脫『會』。」
② 「因」，京都本、宋本《釋文》作「面」。

冬，十有二月，公會齊侯、宋公、陳侯、

衛侯、鄭伯、許男、曹伯、滑伯、滕子同盟于

幽。^①同盟者何？同欲也。同心欲盟也。同

心爲善，善必成；同心爲惡，惡必成，故重而言同心也。^②

○滑，于八反。【疏】「同盟者何」。○解云：欲言同善，不見褒賞之文，欲言同惡，復無刺譏之處，故執不知問。

邾婁子克卒。小國未嘗卒，而卒者，爲慕霸者

有尊天子之心，行進也。不日，始與霸者，未如瑣。瑣卒

在二十八年。○爲慕，于僞反。如瑣，息果反。【疏】注

「小國」至「進也」。○解云：正以所傳聞之世，未錄小國

卒葬故也。○注「不日者」至「二十八年」。^③○解云：即

二十八年經云「夏，四月，丁未，邾婁子瑣卒」，注云「日

者，附從霸者，朝天子行進」是也。然則此亦行進而

不日者，但始與霸者有尊天子之心，未朝天子故也。其始與

霸者之事，即上十三年「春，齊侯、宋人、陳人、邾婁人會

于北杏」是也。

十有七年，春，齊人執鄭瞻。鄭瞻者

何？鄭之微者也。以無氏也。【疏】「鄭瞻者何」。

○解云：欲言尊卿，名氏不具，欲言微者，書名見經，故執

不知問。此鄭之微者，何言乎齊人執之？據

獲宋萬不書者，不坐獲微者，今書齊稱人，坐執文。○鄭

瞻，二傳作「詹」。【疏】注「據獲」至「執文」。○解云：上

十二年傳云「萬嘗與莊公戰，獲乎莊公」，注云：「獲不書

者，士也。」然則以獲微者不罪坐，故不書。今書齊稱人，

作坐執之文，故難之。書甚佞也。爲甚佞，故書惡

之，所以輕坐執人也。然不得爲伯討者，事未得行，罪未

^①「公會」至「同盟于幽」，阮校：「諸本同，唐石經損缺。

以字數計之，有「公會」二字。惠棟云：「《左氏》、《穀

梁》無「公」字，故《穀梁傳》云「不言公」。按：「公會」

二字當爲衍文，《左氏》、《穀梁》無「公」字，猶剩「會」

字。據十九年何注云：「先是鄆、幽之會，公比不至，

公子結出竟，遭齊、宋欲深謀伐魯，故專矯君命而與

之盟。」然則幽之盟，非特魯君不至，即士大夫亦未有

來會者，猶十五年齊侯、宋公、陳侯、衛侯、鄭伯會于

鄆，不曰公、公會齊侯及會齊侯云云也。《春秋繁

露·滅國下》篇云：幽之會，莊公不往。」

^②「心」，阮校引惠棟曰：「「心」字衍。」

^③「注不日者至二十八年」，阮校：「閩、監、毛本「者」作

成也。孔子曰：「放鄭聲，遠佞人。」罪未成者，伯當遠之而已。^①○爲甚，^②于僞反。惡之，烏路反，下「惡之」皆同。遠佞，于萬反，下同。【疏】注「不得爲」至「未成也」。○解云：僖四年傳云：「執者，曷爲或稱侯，或稱人？稱侯而執者，伯討也，稱人而執者，非伯討也。」今稱人而執，故云不得爲伯討矣。○注「孔子曰」至「佞人」。○解云：《論語》文。案《樂記》魏文侯問子夏曰：「敢問溺音何從出也？」子夏對曰：「鄭音好濫淫志，宋音燕女溺志，衛音趨數煩志，齊音敖辟喬志，此四者，皆淫於色而害於德，是以祭祀弗用也。」然則四國皆有淫聲，蓋逐甚者言之，故許氏云《鄭詩》二十一篇，說婦人者十九，^③此之謂也。或何氏云「鄭聲淫」，與服君同，皆謂鄭重其手而音淫過，非鄭國之鄭也。

夏，齊人濊于遂。濊者何？濊積也。

衆殺戍者也。濊者，死文。濊之爲死，積死非一之辭，故曰濊積。衆，多也。以兵守之曰戍。齊人滅遂，遂民不安，欲去，齊強戍之。遂人共以藥投其所飲食水中，多殺之。古者有分土，無分民，齊戍之非也，遂不當坐也，故使齊爲自積死文也。稱人者，衆辭也。不書戍將帥者，封內之兵，故不書。○濊，子廉反，二傳作「殲」。

積，本又作「漬」。強，其丈反。將帥，子匠反，下所類反。【疏】「濊者何」。○解云：正以異於常例，故執不知問。○注「濊者」至「衆多也」。○解云：即《曲禮下》篇云「羽鳥曰降，四足曰漬」，鄭注云「異於人也。降，落也。漬，謂相濊汗而死」是也。○注「齊人滅遂」。○解云：在上十三年。○「古者有分土無分民」。○解云：^④說在桓元年注文也。

秋，鄭瞻自齊逃來。何以書？書甚

佞也，曰：「佞人來矣！佞人來矣！」重言來者，道經主書者，若傳云爾，蓋痛魯知而受之，信其計策，以取齊淫女，丹楨刻桷，卒爲後敗也。加逃者，抑之也。所以抑之者，上執稱人，嫌惡未明。繫鄭者，明行當

①「伯」，阮校：「鄂本、宋本『伯』作『但』，當據正。」

②「甚」，原作「其」，今據上注文及宋本《釋文》改。

③「說婦人者十九」，阮校：「孫志祖云：『此許叔重《五經異義》語。《禮·樂記》正義云《鄭詩》說婦人者唯九，《五經異義》云『十九』，誤也。』」

④「古者有分土無分民」○解云：「杉浦校：『單疏鈔本上有『注』字，下又有『者』字，無『○解云』。當據。』」

本於鄉里也。子貢問曰：「鄉人皆好之，何如？」子曰：「未可。」鄉人皆惡之，何如？子曰：「未可。不若鄉人之善者善之，鄉人之惡者惡之。」○重，直用反。明行，下孟反。【疏】注「重言」至「云爾」。○解云：經所以主書此事者，正惡佞人之來，恐其作禍矣。○注「蓋痛魯知而受之」。○解云：《春秋》痛傷魯人知其佞人，惡而受之。○注「信其計」至「淫女」。○解云：即下二十四年「夏，公如齊逆女」，秋，「夫人姜氏人」是也。知取齊淫女是鄭瞻之計者，《春秋說》文云。○注「丹楹刻桷」。○即下二十三年「秋，丹桓宮楹」，二十四年春「刻桓宮桷」是也。○注「卒爲後敗也」。○解云：即淫二叔殺二嗣子是也。○注「加逃者抑之也」。○解云：謂逃是碎事，不應見經，而見逃于經者，抑之故也。或者子哀、慶封之屬皆言奔，今此加逃，故決之。○注「上執」至「未明」。○解云：謂稱人爲坐執文，非伯討之義故也。○注「子貢」至「惡之」。○解云：一鄉之人皆好此人，此人何如？子曰：未可即以爲善。何者？此人或者行與衆同，或朋黨矣。子貢又曰：若一鄉之人皆惡此人，此人何如？子曰：未可即以爲惡也。何者？此人或者行與衆異，或孤特矣。不若鄉人之善行者善之，惡行者惡之，與善人同，復與惡人

異，道理勝於前，故知是實善。云云之說，備于鄭注。

冬，多麋。何以書？記異也。麋之爲

言，猶迷也。象魯爲鄭瞻所迷惑也。言多者，以多爲異也。○麋，亡悲反。【疏】注「象魯」至「惑也」。○解云：

《感精符》文。○注「言多」至「異也」。○解云：魯舊有麋，但今乃多耳。

監本附音春秋公羊注疏莊公卷第七

監本附音春秋公羊注疏莊公卷第八

起十八年，盡二十七年

何休學

十有八年，春，王三月，日有食之。^①是

後戎犯中國，魯蔽鄭瞻，夫人如莒，淫泆不制所致。【疏】

注「是後戎犯中國」。○解云：即下文「夏，公追戎于濟

西」是也。○注「魯蔽鄭瞻」。○解云：下文「秋，有蜚」

是。○注「夫人」至「所致」。○解云：即下十九年秋，「夫

人姜氏如莒」之屬是也。是陰勝陽之象，是以日爲之食。

夏，公追戎于濟西。以兵逐之曰追。○濟，

子禮反。此未有言伐者，^②其言追何？據公追

齊師至鄆，^③舉齊侵也。【疏】注「據公」至「侵也」。○解

云：即僖二十六年「齊人侵我西鄙，公追齊師至禚，弗及」

是也。大其爲中國追也。以其不限所至，知爲中

國追也。○爲中，于僞反，注及下皆同。【疏】注「以其」

至「追也」。○解云：「公追齊師至禚」，限其所至，乃是自

爲己追，故知如此。此未有伐中國者，則其言

「爲中國追」何？大其未至而豫禦之也。

其言「于濟西」何？據公追齊師至鄆，弗及，不言

于也。大之也。大公除害，恩及濟西也。言大者，當

有功賞也。追例時。【疏】注「言大者」至「賞也」。○解

云：「公追齊師至鄆，弗及」，不言于，今言于者，謂公有大

功，於王法當賞矣。○注「追例時」。○解云：即此文是。

而僖二十六年「公追齊師」，雖在正月己未下，不蒙日月。

秋，有蜚。何以書？記異也。蜚之猶言

^①「日有食之」，阮校引《經義雜記》曰：「《五行

志》：「嚴公十八年三月，日有食之。《公羊傳》曰日

晦。」今《公羊》無傳，何注無食晦之文。蓋董仲舒等

所見《公羊》有之，或漢初《公羊》家說也。劉歆說：

《左氏》亦以爲食晦。」

^②「此未有言伐者」，王引之《經義述聞》：「「言」字後人

所加，唐石經無。」

^③「鄆」，阮校：「閩、監、毛本同，鄂本「鄆」作「禚」，下

同。此本疏中凡「鄆」皆作「禚」，當據正。」

惑也。其毒害傷人，形體不可見，象魯為鄭瞻所惑，其毒害傷人，將以大亂而不能見也。言有者，以有為異也。○蠱，音或，短狐也。或謂之射工，音食。【疏】注「蠱之猶言惑也」。○解云：即《五行志》云「蠱猶惑也」者是。○注「其毒害傷人」。○解云：即《五行志》云「能射人，甚者至死」是也。○注「形體不可見」。○解云：即《草木志》云「在水中射人影即死」是也。○注「言有者，以有為異也」。○解云：謂魯先無蠱，今乃有之。案昭二十五年經書「有鸛鵒來巢」，今此不書來者，亂氣所生，不從外來故也。

冬，十月。

十有九年，春，王正月。

夏，四月。

秋，公子結媵陳人之婦于鄆，遂及齊侯、宋公盟。媵者何？諸侯娶一國，則二國往媵之，以姪娣從。言往媵之者，禮，君不求媵，二國自往媵夫人，所以一夫人之尊。○媵陳，以證反，又繩證反。娣從，才用反，下注同。【疏】「媵者何」。○解云：媵是碎事，例不見經，今而書之，故執不知問。

姪者何？兄之子也。娣者何？弟也。^①

諸侯壹聘九女，諸侯不再娶。必以姪娣從之者，欲使一人有子，二人喜也。所以防嫉妒，令重繼嗣也。因以備尊尊、親親也。九者，極陽數也。不再娶者，所以節人情，開媵路。○嫉，音疾，又音自。【疏】「姪者何」。○解云：昭穆異等，而與嫡俱行，故執不知問。○「娣者何」。○解云：與姪同倫而在姪下，^②故執不知問。○「諸侯」至「再娶」。○解云：傳言此者，解所以有

^①「弟也」，王引之《經義述聞》：「家大人曰：『弟也』，本作『女弟也』。『女弟也』者，別乎弟而言之也。《左

傳》：「隱元年，成八年、十一年，昭二十八年正義引此皆作『弟也』，則唐初本已有脫『女』字者，不始于唐石經矣。然《白虎通義·嫁娶篇》及《召南·鵲巢》、《江有汜》、《齊·南山》、《大雅·韓奕》正義、《士昏禮》疏引此皆作『女弟也』。又《說文》及《士昏禮》注並云『娣，女弟也』，即本於此傳，則傳文原有『女』字明矣。」

^②「與姪同倫而在姪下」，杉浦校：「單疏鈔本上『姪』字作『嫡』，『倫』下無『而』字。按：古之嫁女者，以姪娣從，自嫡而下，皆謂之娣，然則此本『姪』作『嫡』是也。」

媵之意。言諸侯娶女非一者，正由不得再娶故也。○注「必以」至「人喜也」。○解云：即《穀梁傳》云「一人有子，三人緩帶」，范氏云「欲共享其祿」是也。^①○注「所以防嫉妒」。○解云：謂三人不相疾也。○注「令重繼嗣也」。○解云：謂三人不相疾，共保其子。○注「因以備」至「親也」。○解云：謂備姪所以尊尊，備娣所以親親。其上尊下親，皆指嫡也。○注「九者極陽數也」。○解云：謂對一三五七以爲極矣也。○注「開媵路」。○解云：謂亦有一三五七以爲極矣也。○注「開媵路」。○解云：謂亦有爲嫡之望也。媵不書，此何以書？據伯姬歸于紀，不書媵也。【疏】注「據姬歸于紀」者。^②○解云：在隱二年冬。爲其有遂事書。爲下有遂事善也，故書所以不當書，^③以起將有所詳錄，猶伯姬書媵也。不媵，則當取。得書者張本文。言公子結如陳，遂及齊侯、宋公盟于鄆。○爲其于僞反，注及下注同。【疏】注「爲下有遂事善也」。○解云：即「遂及齊侯、宋公盟」是也。○注「故書所至不當書」。○解云：謂書媵是也。○注「以起將有所詳錄」。○解云：正欲見盟事之善，合詳而錄之。○注「猶伯姬書媵也」。○解云：即成八年「衛人來媵」，傳曰：「媵不書，此何以書？錄伯姬也。」九年「晉人來媵」，傳曰：「媵不書，此何以書？錄伯姬也。」十年「齊

人來媵」，傳云「媵不書，此何以書？錄伯姬也」。三國來媵，非禮也。曷爲皆以「錄伯姬」之辭言之？婦人以衆多爲侈也」者是也。○注「言公」至「盟于鄆」。○解云：是其得書之文也。大夫無遂事，此其言遂何？聘禮，大夫受命不受辭。以外事不素制，不豫設，故云爾。出竟有可以安社稷利國家者，則專之可也。先是鄆、幽之會，公比不至，^④公子結出竟，

遭齊、宋欲深謀伐魯，故專矯君命而與之盟，除國家之難，全百姓之命，故善而詳錄之。先書地，後書盟者，明出竟乃得專之也。盟不地者，方使上爲出竟地，即更出地，嫌上地自爲媵出地也。陳稱人者，爲內書，故略以外國辭言之。此陳侯夫人，言婦者，在塗也。加之者，禮未成也。冬，齊人、宋人、陳人伐我西鄙，而盟不日者，起國家後背結之約，非結不信也。○矯，居表反。難，乃旦

①「享」，《穀梁傳》今作「望」。

②「姬」上，此引注文，當脫「伯」字。

③「以」，阮校：「『以』字衍，當刪正。」

④「比」，原作「此」。阮校：「鄂本、宋本作『公比不至』。今據改。」

反。背，音佩。【疏】注「先是」至「不至」。○解云：即上十五年「春，齊侯、宋公、陳侯、衛侯、鄭伯會于鄆」、十六年冬「會齊侯、宋公」以下「同盟于幽」是也。正以彼二經皆不言公會，故知魯侯不至矣。○注「欲深謀伐魯」。○解云：正以善而詳錄之，故知欲伐矣。○注「先書地」。○解云：謂書鄆是也。○注「明出竟乃得專之也」。○解云：正以鄆爲衛地故也。○注「此陳」至「在塗也」。○解云：即隱二年傳云「在塗稱婦」是。○注「加之者禮未成也」。○解云：正以此婦未成爲夫人，故加之絕之。若其已配，禮宜言媵陳夫人，不假言之以絕也。○注「冬齊」至「西鄙」。○解云：即下經也。①○注「而盟不」至「不信也」。○解云：以《公羊》之例，不信者書日，故如此解。

夫人姜氏如莒。

冬，齊人、宋人、陳人伐我西鄙。鄙者，

邊垂之辭，榮見遠也。②

二十年，春，王二月，夫人姜氏如莒。

月者，再出也。不從四年已月者，異國。【疏】注「月者再出也」。○解云：欲對上十九年秋「夫人姜氏如莒」之文也。○注「不從」至「異國」。○解云：即上四年經云「春，

王二月，夫人姜氏饗齊侯于祝丘」，彼注云：「月者，再出重也。三出不月者，省文從可知例。」然則此經不從四年之例，而復出月者，正爲齊、莒異國，不得相因故也。

夏，齊大災。大災者何？大瘠也。③

瘠，病也，齊人語也。以加大，知非火災也。○大瘠，在亦反，病也。本或作「瘠」，④才細反。一本作「漬」，才賜反，鄭注《曲禮》引此同。【疏】「大災者何」。○解云：欲

①「也」上，杉浦校：「單疏鈔本有『是』字。」

②「榮見遠也」，阮校：「諸本同，句當有誤。」

③「大瘠也」，阮校：「唐石經、諸本同。《經義雜記》

曰：《禮記·曲禮下》「四足死曰漬」校者按：阮刻本作「四足曰漬」，無「死」字。」注：「漬謂相灑汗而死也。《春秋傳》曰：『大災者何？大漬也。』」《呂氏

春秋·貴公篇》仲父之疾病矣，漬甚」，高誘注：「漬

亦病也，《公羊傳》曰：『大災者，大漬也。』」然則鄭、

高所據《公羊》，皆作「大漬」，按此當是嚴、顏之異。」

今按：孔穎達《禮記正義》釋《禮記·曲禮下》鄭注

「《春秋傳》曰『大災者何？大漬也』」，曰：「《公羊》

莊二十年，「夏，齊大災。大災者何？大瘠也」。然

此云漬，彼云瘠，字異而意同也者。」

④「瘠」，宋本《釋文》作「瘠」。

言大疾疫，而經書災，故執不知問。○注「以加大知非火災也」。○解云：正以襄三十年「宋災」，昭九年「陳火」之屬，皆不言大故也。案襄九年傳云「大者曰災，小者曰火」，注云：「大者，謂正寢、社稷、宗廟、朝廷也，下此則小矣。」然彼是兩火自對，故以災火別之。此則非火，故更言大耳。大瘠者何？痢也。痢者，民疾疫也。○痢，力二反，①疾疫也。疫，音役。何以書？記災也。外災不書，此何以書？及我也。與宋大水同義。痢者，邪亂之氣所生，是時魯任鄭瞻，夫人如莒淫泆，齊侯亦淫諸姑姊妹，不嫁者七人。○邪，似嗟反。【疏】注「與宋大水同義」。○解云：即上十一年「宋大水」，傳云「何以書？記災也。外災不書，此何以書？及我也」，注云「時魯亦有水災，書魯則宋災不見，兩舉則煩文不省，故詭例書外以見內也」是也。○注「齊侯」至「七人」。○解云：《晏子春秋》文。案彼齊景公問於晏子曰：「吾先君桓公，淫女公子，不嫁者九人，而得為賢君何？」又此解言七人者，彼此其有誤矣。然則襄公霸諸侯，唯淫妹而已，齊人猶作「南山崔崔」以刺之。桓公小白相淫九人，而齊人不刺之者，蓋以功多足以除惡故也。

或者遇爾不作，②或采之不得，寧可問乎？

秋，七月。

冬，齊人伐戎。

二十有一年，春，王正月。

夏，五月，辛酉，鄭伯突卒。○鄭伯突，徒

沒反，厲公也。

秋，七月，戊戌，夫人姜氏薨。

冬，十有二月，葬鄭厲公。《春秋》纂明者

書葬。【疏】注「春秋」至「書葬」。○解云：言《春秋》者，欲見通例如此矣。纂明者，謂有立、人之文，即隱四年冬「衛人立晉」、桓十三年春「葬衛宣公」、上九年夏「齊小白入于齊」、僖十八年秋「葬齊桓公」之屬是也。今此鄭突入于鄭，桓十五年秋亦有入櫟之文，即是纂明，書其葬耳。若纂不明者，則去其葬，以見其纂，不合為諸侯，是以僖十年里克弑卓子之時，惠公無入文，至僖二十四年「晉侯夷吾卒」下，不書葬晉惠公矣。若有立、人之文者，

①「力二反」，宋本《釋文》作「力世反」。

②「遇」，中華本、閣本作「偶」。

不嫌非篡，何勞去葬以見篡？若然，案文公重耳亦無篡文，而僖三十年經書「葬晉文公」者，^①正以文公功蓋天下，《春秋》為賢者諱，故書其葬，若其不篡然也。若然，齊侯小白是賢者而書其人，又錄其葬，見其篡明，不為之諱者，僖十年傳云「桓公之享國也長，美見乎天下，故不為之諱本惡也。文公之享國也短，美未見乎天下，故為之諱本惡也」是也。

二十有二年，春，王正月，肆大省。肆者何？跌也。跌，過度。○肆，音四，本或作「佚」。

大省，所景反，除「自省」皆同，二傳作「省」。跌，大結反，過度也。【疏】「肆大省」。○解云：肆，讀如字，放肆也。

省，讀如「減省」之「省」也。○「肆者何大省者何」。○解云：皆以異於常例，故執不知問。大省者何？災

省也。謂子卯日也。夏以卯日亡，殷以子日亡，先王常

以此日省吉事，不忍舉，又大自省敕，得無獨有此行乎？常若聞災自省，故曰「災省」也。○行，下孟反。【疏】注

「先王」至「忍舉」。○解云：此先王，謂夏、殷之後成禮者，以是夏、殷亡日，故省吉事而已，不忍舉而行之。○注「又大」至「此行乎」。○解云：又若似見不賢而內自省

之義矣。○注「常若」至「災省也」者，釋傳云「災省」之文也。言聞有災輒自省察，若為行而致之乎。肆大省，何以書？譏。何譏爾，譏始忌省也。時魯

有夫人喪，忌省日不哭。省日本以忌吉事，不以忌凶事，故禮哭不辟子卯日，所以專孝子之思也。^②不與念母，而譏忌省者，本不事母則已，不當忌省，猶為商人責不討賊。○思，息嗣反。為，于偽反。【疏】肆大省何以書。

○解云：不但言「何以書」者，恐人以為但問大省，云大自省敕何以書，故復舉句而問之。○注「故禮」至「卯日」。

○解云：案《士喪禮》既殯之後，云「朝夕哭，不辟子卯」是也。引之者，證不以忌凶事也。○注「不與」至「忌省」。

○解云：不與念母者，即上元年「三月，夫人孫于齊」，傳曰「夫人固在齊矣，其言孫于齊何？念母也」，「念母者，所善也。則曷為於其念母焉貶？不與念母也」。彼注云「念母則忘父，背本之道也」是也。○注「猶為」至「討賊」。○解云：文十四年九月，「齊公子商人弑其君舍」。

①「僖三十年」，「葬晉文公」在僖公三十三年，此作「僖三十年」當誤。

②「思」，阮校：「鄂本、宋本作『恩』」。

然則商人者，是篡弑之賊也，齊之臣子理宜討之，而反臣事，失其所也。及文十八年夏，「齊人弑其君商人」，而不書其葬者，以責臣子不討賊也。似文姜罪實宜絕之，公既不絕，宜盡子道，而反忌省，故得責之。

癸丑，葬我小君文姜。文姜者何？

莊公之母也。輒發傳者，起仇母，錄子恩。凡母在子年，無適庶，皆繫子也。不在子年，適母繫夫，庶母繫子。言小君者，比於君爲小，俱臣子辭也。文者，謚也。夫人以姓配謚，欲使終不忘本也。○無適，丁歷反，下同。【疏】「葬我小君文姜」。○解云：《穀梁傳》曰「小君非君，其曰君何也？以其爲公配，可以言小君也」者是。○「文姜者何」。○解云：欲言莊母，謚異其父，欲言非母，備禮葬之，故執不知問。○注「輒發」至「子恩」。○解云：隱元年傳云：「仲子者何？桓之母也。」今假令不發，亦是桓之夫人，莊公之母可知，而云「文姜者何？莊公之母」，故言「輒」矣。今此經云「葬我小君文姜」，傳云「文姜者何？莊公之母也」者，正欲錄子之恩，故備禮而葬之。○注「凡母」至「繫子也」。○解云：即此傳云「文姜者何？莊公之母」，是適母繫子也。宣八年傳云「頃熊者何？宣公之母也」，襄四年傳云「定弋者何？」^①襄

公之母也」，皆是庶母繫子也。而僖二年傳云「哀姜者何？莊公之夫人也」，在子年而繫夫者，蓋以僖公非所生，爲其非子故也。○注「不在」至「繫夫」。○解云：即僖二年哀姜是也。○注「庶母繫子也」。○解云：即文五年傳云「成風者何？僖公之母也」是也。定十五年秋「嬖氏卒」，傳曰「嬖氏者何？哀公之母也」者，亦是庶母不在子年而繫于子。然則鄉來所言，傳皆葬上乃言某公之母，而嬖氏特于卒上發傳者，正以嬖氏之葬，直云「葬定嬖」，不得稱小君，是以傳家亦於葬略之矣。定嬖所以葬不得稱小君，《公羊》之義，母以子貴，哀公爾時未得爲君，是以定嬖未得全同夫人矣。○注「欲使終不忘本也」。○解云：本即姓是也。

陳人殺其公子禦寇。書者，殺君之子，重也。【疏】注「書者，殺君之子，重也」。○解云：正以不言大夫而得書殺，則知由是君之子故也。

夏，五月。以五月首時者，譏。莊公取仇國女，^②不可以事先祖，奉四時祭祀，猶五月不宜以首時。

① 「弋」，原作「戈」，今據襄公四年傳及閏本改。

② 「取仇」，阮校：「鄂本作『娶讎』，《穀梁》疏引同。」

秋，七月，丙申，及齊高傒盟于防。防，魯地。○傒，音兮。齊高傒者何？貴大夫也。

曷爲就吾微者而盟？據暨與公盟也。【疏】齊

高傒者何？○解云：欲言其貴，魯侯恥之，欲言微者，名氏見經，故執不知問。○注「據暨與公盟也」。○解云：即上九年春，「公及齊大夫盟于暨」是也。公也。以其

日，微者不得日，大夫盟當出名氏。①【疏】注「以其日」至

「得日」。○解云：即隱元年「九月，及宋人盟于宿」，傳

曰：「孰及之？」內之微者也。○彼注云「宋稱人者，亦微者

也」，「微者盟例時，不能專正，故責略之。此月者，隱公

賢君，雖使微者，有可采取，故錄也」。是其微者不得日

矣。其微者盟例時者，即僖十九年「冬，會陳人、蔡人、楚

人、鄭人盟于齊」之屬是也。○注「大夫」至「名氏」。②○

解云：即成元年「臧孫許及晉侯盟于赤棘」之屬是也。

公則曷爲不言公？諱與大夫盟也。

冬，公如齊納幣。納幣即納徵。納徵，《禮》

曰「主人受幣，③士受儷皮」是也。《禮》言納徵，《春秋》言

納幣者，《春秋》質也。凡婚禮皆用鴈，取其知時候。唯

納徵用玄纁束帛、儷皮。玄纁，取其順天地也。儷皮者，

鹿皮，所以重古也。○纁，許云反。儷，力計反，本又作

「麗」。【疏】注「納徵」至「天地也」。○解云：即隱元年注

云「束帛，謂玄三纁二。玄三法天，纁二法地」是也。何

者？玄纁者，是天地之色故也。○注「儷皮者鹿皮所以

重古也」。○解云：正以古者食肉衣服捕禽獸故也。

儷者，兩也。兩皮者，二儀之數。納幣不書，此何

以書？據桓三年公子翬如齊逆女，不書納幣。譏。

何譏爾？親納幣，非禮也。時莊公實以淫佚大

惡不可言，故因其有事於納幣，以無廉恥爲譏。不譏喪

娶者，舉淫爲重也。凡公之齊，所以起淫者，皆以危致

也。【疏】注「凡公」至「致也」。○解云：即下二十三年

「春，公至自齊」，夏，公如齊觀社，「公至自齊」，二十四

年「夏，公如齊逆女」，「秋，公至自齊」之屬是也。凡書至

①「出」，京都本、再造善本作「書」。

②「大夫」，原作「夫人」。此疏引起訖，釋上注「大夫盟

當出名氏」，「夫人」當爲「大夫」之誤。今據單疏鈔

本、京都本、再造善本改。

③「納幣即納徵納徵禮曰」，阮校：「鄂本「納徵」不重，此衍。」

者，臣子喜其君父脫危而至故也。

二十有三年，春，公至自齊。桓之盟

不日，其會不致，信之也。據柯之盟不日，柯之

會不致。【疏】注「據柯」至「不致」。○解云：即上十三年

「冬，公會齊侯于柯」，不書日，不致是也。此之桓國，

何以致？危之也。何危爾？公一陳佗

也。公如齊淫，與陳佗相似如一也。○佗，大何反。

【疏】注「公如」至「如一也」。○解云：即桓六年「蔡人殺

陳佗」，傳云「陳佗者何？陳君也。陳君則曷爲謂之陳

佗？絕也。曷爲絕之？賤也。其賤奈何？外淫也。

惡乎淫？淫于蔡，蔡人殺之」是也。

祭叔來聘。不稱使者，公一陳佗，故絕使，若我

無君，以起其當絕，因不與天子下聘小人。○祭，側界

反。【疏】注「不稱使」至「小人」。○解云：如此注者，正

欲決隱七年「天王使凡伯來聘」，九年「天王使南季來

聘」，等是王使，而皆稱使，今此獨不稱使，故決之。何氏

知不稱使，是我無君之文者，正見閔二年「高子來盟」，傳

云「何以不言使？我無君」是也。若然，案桓四年「夏，

天天使宰渠伯糾來聘」，桓五年夏「天王使仍叔之子來

聘」，桓八年春「天王使家父來聘」，然則桓公篡逆，經猶

稱使而不絕之，莊公時淫，①絕之者，桓四年「伯糾」之下，

何氏云：「下去二時者，桓公無王而行，天子不能誅，反下

聘之，故爲貶，見其罪，明不宜也。」然則桓公惡甚，故去

二時以明不宜。莊公罪輕，故不言使以見絕，因不與天

子下聘小人而已。《春秋》見義，非唯一種，未可然怪也。

夏，公如齊觀社。何以書？譏。何譏

爾？諸侯越竟觀社，非禮也。觀社者，觀祭

社。諱淫言觀社者，與親納幣同義。社者，土地之主。

祭者，報德也。生萬物，居人民，德至厚，功至大，故感春

秋而祭之。天子用三牲，諸侯用羊豕。【疏】注「諱淫」至

「同義」。○解云：謂實以淫泆大惡不可言，因其有事于

觀社，故以觀社譏耳。○注「天子」至「羊豕」者。②○解

云：時王之禮。

公至自齊。

荆人來聘。荆何以稱人？據上稱州。

①「時」，阮校：「蓋『特』之誤。」

②「者」，阮校：「閩、監、毛本改『○』。」

【疏】注「據上稱州」。○解云：即上十六年「秋，荆伐鄭」之屬是也。始能聘也。《春秋》王魯，因其始來聘，明夷狄能慕王化，修聘禮，受正朔者，當進之，故使稱人也。稱人當繫國，而繫荆者，許夷狄者不一而足。①【疏】注「稱人」至「而足」。○解云：正以十年傳云「州不若國，知進稱人宜繫國矣」。文九年「楚子使椒來聘」，傳云：「椒者何？楚大夫也。楚無大夫，此何以書？始有大夫也。始有大夫則何以不氏？許夷狄者不一而足也。」又襄二十九年傳云：「札者何？吳季子之名。《春秋》賢者不名，此何以名？許夷狄者不壹而足也。」是以此注引之耳。

公及齊侯遇于穀。

蕭叔朝公。其言「朝公」何？據公在內不言朝公，在外言會。【疏】注「據公」至「朝公」。○解云：即隱十一年「春，滕侯、薛侯來朝」之屬是也。○注「在外言會」。○解云：定十四年「邾婁子來會公」，及公會某侯之屬皆是也。公在外也。時公受朝於外，故言朝公，惡公不受於廟。○惡公，烏路反，下同。【疏】注「時公」至「於廟」。○解云：隱七年注云：「不言聘公者，

禮，聘受之於大廟，孝子謙不敢以己當之，歸美於先君，且重賓也。」隱十一年注云：「不言朝公者，禮，朝受之於大廟，與聘同義。」今此言公，故如此解。

秋，丹桓宮楹。何以書？譏。何譏

爾？丹桓宮楹，非禮也。楹，柱也。丹之者，為將娶齊女，欲以誇大示之。傳言「丹桓宮」者，欲道天子諸侯各有制也。禮，天子斲而榦之，加密石焉。諸侯斲而榦之，不加密石。大夫斲之，士首本。失禮宗廟例時。○宮楹，音盈，柱也，下傳及注同。為將，于僞反。斲，丁角反，下同。榦，力工反。【疏】注「禮天子」至「首本」。○解云：皆外傳《晉語》張老謂趙文子椽之制。《穀梁傳》曰：「天子之榦，斲之榦之，加密石焉。諸侯之榦，斲之榦之。大夫斲之，士斲本。」今此何氏於丹楹之下總言之矣。斲本者，正謂全以樹本而行斤斲之。○注「失禮宗廟例時」。○解云：正謂此文是也。下經二十四年「三月，刻桓宮楹」而書月者，以其功重故也。此謂失禮修營

①「一」，阮校：「《六經正誤》云：『一』當作『壹』。」

按：此本疏引襄廿九年傳作「不壹而足」。閩、監、毛本亦改為「一」。

之例也，若其祭祀失禮者則書日，是以隱五年「初獻六羽」之下，何氏云「失禮鬼神例日」是也。若始造宗廟而失禮者，亦書日，即成六年春，王二月，「辛巳，立武宮」是也。而定元年九月，「立煬宮」，亦為非禮，而不書日者，所見之世，其恩尤厚，故不為書日，使若得禮然。

冬，十有一月，曹伯射姑卒。曹達《春秋》

常卒月葬時也。始卒日葬月，嫌與大國同，後卒而不日，入所聞世，^①可日不復日。○射姑，音亦。復，扶又反。【疏】注「曹達」至「時也」。○解云：即文九年「秋，八月，曹伯襄卒」，冬，「葬曹共公」，昭十八年「春，王三月，曹伯須卒」，「秋，葬曹平公」之屬是也。其有卒葬在日月下者，不蒙日月矣。其文各自有解。○注「始卒日葬月」。○解云：即桓十年「春，王正月，庚申，曹伯終生卒。夏，五月，葬曹桓公」是也。所以然者，敬老重恩故也。○注「後卒而不日」。○解云：正以對桓十年「曹伯終生卒」，以為後矣。○注「入所聞世可日不復日」。○解云：即文九年「秋，八月，曹伯襄卒」是。案曹為小國，入所聞之世，正合卒月，而言可日者，正以傳聞之世，已得錄之，故所聞世可以書日，但以嫌同大國，故不日矣。

十有二月，甲寅，公會齊侯盟于扈。

桓之盟不日，此何以日？危之也。何

危爾？我貳也。莊公有淫泆污貳之行。^②○

扈，音戶。有汗，汙辱之汙，一音烏卧反，後放此。行，

下孟反。【疏】注「污貳之行」。○解云：謂莊公之行，

既不清潔，又不專一，故謂之污矣。^③魯子曰：

「我貳者，非彼然，我然也。」嫌上說以齊惡我

貳，^④相疑而盟，故日也。解言非齊惡我也，我行污

貳，動作有危，故日之也。

二十有四年，春，王三月，刻桓宮桷。

何以書？譏。何譏爾？刻桓宮桷，非禮

①「世」，原作「出」，今據余本及下疏引起訖改。

②「莊公有淫泆污貳之行」，阮校：「諸本同，鄂本

「污」作「汙」。按：「淫泆」二字當衍。《釋文》出

「有汙」二字，疏標注「污貳之行」四字，解云：「莊

公之行，既不清潔，又不專壹，故謂之污貳矣。」是

本無「淫泆」可知。」

③「污」，杉浦校：「單疏鈔本「污」下有「貳」字。毛

本無。阮氏校勘記云：「「污」下當脫「貳」字。」

④「說」，阮校：「鄂本「說」作「託」，此誤。」

也。與丹楹同義。月者，功重於丹楹。○桷，音角，椽也。【疏】注「與丹楹同義」。○解云：即上注云「丹之者，為將娶齊女，欲以誇大示之」是也。○注「月者功重於丹楹」。○解云：正以失禮宗廟例時，故如此注。

葬曹莊公。

夏，公如齊逆女。何以書？親迎，禮也。諱淫，故使若以得禮書也。禮，諸侯既娶三月，然後夫人見宗廟。見宗廟，然後成婦禮。○迎，魚命反。

見宗，賢偏反，下傳文「見也」、「見用幣」及注同。【疏】「葬曹莊公」。○解云：雖在月下，不蒙上月也。○「何以書親迎禮也」。○解云：魯侯如齊，本實淫通，非為親迎而往。但《春秋》之意，以其大惡不可言之，要以言其逆女，使若得禮，善而書日矣。^①是以注云「諱淫，故使若以得禮書也」。○注「禮諸侯」至「婦禮」。○解云：注言此者，欲道莊公夫人未至于國而行婦事，既非正禮明矣。^②

秋，公至自齊。八月，丁丑，夫人姜氏

入。其言入何？據夫人姜氏言至不言入。【疏】注「據夫人」至「言入」。○解云：即桓三年九月，「夫人姜氏至自齊」是。難也。其言日何？據夫人姜氏至，

不日。○難也，乃旦反，下及注同。難也。其難奈何？夫人不偯，不可使人，與公有所約，然後入。^③偯，疾也，齊人語。約，約遠媵妾也。夫人稽留，不肯疾順公，不可使即入。公至後，與公約定，八月丁丑乃入，故為難辭也。夫人要公不為大惡者，妻事夫有四義：雞鳴縱筭而朝，君臣之禮也；三年惻隱，父子之恩也；圖安危可否，兄弟之義也；樞機之內，寢席之上，朋友之道，不可純以君臣之義責之。○不偯，力主反，疾也。注同。遠，于萬反。要，一遙反。縱筭，所買反，又所綺反。惻隱，初力反。【疏】注「夫人要公」至「責之」。○解云：正以所傳聞之世，內之大惡皆諱不書。今而書之，故知然也。

戊寅，大夫宗婦覲，用幣。宗婦者何？大夫之妻也。覲者何？見也。用

① 「日」，杉浦校：「此誤，單疏鈔本作『見』」。
 ② 「既」，阮校引浦鏜云：「疑『即』字誤」。
 ③ 「入」，原作「人」，今據余本、京都本、再造善本、中華本、閩本改。

者何？用者不宜用也。不宜用幣爲贊也。○

覲，大歷反，見也。贊，音至。【疏】「宗婦者何」。○解

云：欲言大夫之妻，文不言及，欲言非妻，相與俱見，故執

不知問。○「覲者何」。○解云：欲言是禮，男女無別，欲

言非禮，而在用上，故執不知問。○「用者何」。○解

云：初至之覲，禮則有之，而經書「用」，乃是不宜之稱，故

執不知問。見用幣，非禮也。以文在覲下，不使齋

見，知非禮也。【疏】「見用幣非禮也」。○解云：言其見

夫人之法，卿大夫宜用羔鴈，宗婦宜用棗栗，殿修，而皆用

幣，是爲非禮也。○注「以」至「非禮也」。①○解云：若

其是禮，宜言大夫宗婦用幣覲也。然則曷用？棗

栗云乎？殿修云乎？殿修者，脯也。禮，婦人

見舅姑，以棗栗爲贊。見女姑，以殿修爲贊。見夫人，至

尊，兼而用之。云乎，辭也。棗栗取其早自謹敬，殿修取

其斷斷自修正。執此者，若其辭云爾，所以敘情配志也。

凡贊，天子用鬯，諸侯用玉，卿用羔，大夫用鴈，士用雉。②

雉取其耿介。鴈取其在上，有先後行列。羔取其執之

不鳴，殺之不號，乳必跪而受之，類死義知禮者也。玉取

其至清，而不自蔽其惡，潔白而不受污，內堅剛而外溫

潤，有似乎備德之君子。鬯取其芬芳在上，臭達於天，而

醇粹無擇，有似乎聖人。故視其所執，而知其所任矣。

日者，禮，夫人至，大夫皆郊迎，明日大夫宗婦皆見，故著

其明日也。大夫妻言宗婦者，大夫爲宗子者也。族所以

有宗者，爲調族理親疏，令昭穆親疏各得其序也，③故始

統世世繼重者爲大宗，旁統者爲小宗，小宗無子則絕，大

宗無子則不絕，重本也。天子諸侯世以三牲養，禮有代

宗之義，大夫不世，不得專宗。著言宗婦者，重教化，自

本始也。○斷修，丁亂反，注同，本又作「殿」，音同。鍛

脯加薑桂曰修。耿介，古幸反，下音界。行，戶郎反。

號，戶刀反。跪，其委反。醇，音純。粹，雖遂反。爲調，

于僞反，下「仕爲」同。令，力呈反。昭穆，上遙反，凡昭

穆之例皆同。【疏】注「殿修者脯也」。○解云：正以《穀

梁傳》云「束修之肉，不行竟內」，以肉言之，故知修爲脯

①「注以至非禮也」，此疏釋上注「以文在覲下，不使齋

見，知非禮也」，「以」下當有「文」字。

②「雉」，原作「雞」，今據中華本、閣本改。

③「親疏」，阮校：「鄂本無『疏』」，此涉上「理親疏」誤

矣。又《下曲禮》：「婦人之贊，脯修棗栗」，謂之脯修，其義益顯。○注「禮婦人」至「志也」。○解云：時王之禮。且以其文先言棗栗故也。○注「凡贊」至「用雉」。○解云：皆《下曲禮》文。彼言諸侯用圭，此言玉者，蓋所見異也。○注「大夫不世不得專宗」。○解云：欲道大夫之妻所以謂之婦人之義。○注「重教化自本始也」。○解云：正以宗子者，宗族之本故也。

大水。夫人不制，遂淫二叔，陰氣盛，故明年復水也。○復，扶又反。【疏】注「夫人」至「二叔」。○解云：即下二十七年傳云「公子慶父、公子牙通乎夫人以脅公」是也。○注「明年復水也」。○解云：即二十五年「秋，大水」云云是也。

冬，戎侵曹，曹羈出奔陳。曹羈者何？曹大夫也。以小國，知無氏爲大夫。○曹羈，居宜反，下同。【疏】「曹羈者何」。○解云：欲言曹君，經不稱伯，欲言大夫，單名無氏，故執不知問。○注「以小」至「大夫」。○解云：即襄二十三年「邾婁來奔」之屬是也。若其大國大夫不書名氏者，或有未命，或有罪見貶矣。曹無大夫，此何

以書？據羈無氏。【疏】注「據羈無氏」。○解云：曹無大夫之文也。言問者見羈無氏，知曹無大夫。既無大夫，何以特書曹羈？故難之。賢也。何賢乎曹羈？據國見侵，出奔以辟難。戎將侵曹，曹羈諫曰：「戎衆以無義，戎師多，又常以無義爲事。君請勿自敵也。」禮，兵敵則戰，不敵則守。君師少，不如守，且使臣下往。○則守，手又反，又如字，下同。曹伯曰：「不可。」臣下不可獨往。三諫不從，遂去之。故君子以爲得君臣之義也。孔子曰：「所謂大臣者，以道事君，不可則止。」此之謂也。諫必三者，取月生三日而成魄，臣道就也。不從得去者，仕爲行道，道不行，義不可以素餐，所以申賢者之志，孤惡君也。諫有五：一曰諷諫，孔子曰「家不藏甲，邑無百雉之城」，季氏自墮之是也；二曰順諫，曹羈是也；三曰直諫，子家駒是也；四曰爭諫，子反請歸是也；五曰贛諫，百里子蹇叔子是也。○魄，普白反。餐，七干反。①諷，方鳳反。

①「千」，原作「千」，今據余本、京都本，再造善本改。

墮，許規反。爭，爭鬪之爭。贛，諫，陟降反，又呼弄反，又丑用反。【疏】「三諫不從」至「義也」。○解云：然則下二十七年傳云「君子辟內難，而不辟外難者，謂三諫不從」之屬是也。而《曲禮下》篇云「三諫不聽，則逃之」，蓋士不待放，故言逃之。○注「諫必三者」至「君也」。○解云：即此及《鄉飲酒義》云「讓之三也，象月之三日而成魄」是也。○注「諫有五」至「墮之是也」。○解云：即定十二年傳云「孔子行乎季孫，三月不違，曰：『家不藏甲，邑無百雉之城。』於是帥師墮費」是也。○注「二曰順諫」。○解云：即此文是也。○注「三曰」至「駒是也」。○解云：昭二十五年傳云「昭公將弑季氏，告子家駒曰：『季氏爲無道，僭於公室久矣。吾欲弑之，何如？』子家駒曰：『諸侯僭於天子，大夫僭於諸侯，久矣。』昭公曰：『吾何僭矣哉？』子家駒曰：『設兩觀，乘大路，朱干玉戚以舞《大夏》』，^①八佾以舞《大武》，^②皆天子之禮也」是也。○注「四曰」至「歸是也」。○解云：即宣十五年傳云「外平不書，此何以書？大其平乎己也。何大其平乎己？莊王圍宋軍，有七日之糧，爾盡此不勝，將去而歸爾。於是使司馬子反乘堙而闚宋城，宋華元亦乘堙而出見之。子反曰：『子之國何如？』華元曰：『憊矣。』曰：

「何如？」曰：「易子而食之，析骸而炊之。」司馬子反曰：「嘻！甚矣憊。」雖然，吾聞之也：圍者柑馬而秣之，^③使肥者應客，是何子之情也？」華元曰：「吾聞之，君子見人之厄則矜之，小人見人之厄則幸之。吾見子之君子也。是以告情於子也。」司馬子反曰：「諾！勉之矣。吾軍亦有七日之糧，爾盡此不勝，將去而歸爾。」揖而去之，反于莊王。莊王曰：「何如？」司馬子反曰：「憊矣。」曰：「何如？」曰：「易子而食之，析骸而炊之。」莊王曰：「嘻！甚矣憊！」雖然，吾今取此，然後而歸爾。」司馬子反曰：「不可。臣已告之矣，軍有七日之糧。」莊王怒曰：「吾使往視之，子曷爲告之？」司馬子反曰：「以區區之宋，猶有不欺人之臣，可以楚而無乎？是以告之也。」莊王曰：「諾！舍而止。雖然，吾猶取此，然後歸爾。」司馬子

①「夏」，京都本、再造善本作「武」。
②「武」，京都本、再造善本作「夏」。
③「柑」，原作「相」。杉浦校：「單疏鈔本作「柑」。按：宣十五年傳「柑馬而秣之」，注云：「柑者，以木銜其口，不欲令食粟，示有畜積。」陸氏《釋文》作「柑馬」，云：「其廉反，以木銜馬口。」正合何氏說。此處當從單疏、《釋文》本作「柑」。今據改。

反曰：「然則君請處于此，臣請歸爾。」莊王曰：「子去我而歸，吾孰與處于此？吾亦從子而歸爾。」引師而去之。故君子大其平乎已也。者，是也。○注「五曰」至「子是也」。○解云：僖三十三年傳云「秦伯將襲鄭，百里子與蹇叔子諫曰：『千里而襲人，未有不亡者也。』秦伯怒曰：『若爾之年者，宰上之木拱矣，爾曷知？』師出，百里子與蹇叔子送其子而戒之曰：『爾即死，必於穀之嶽巖，是文王之所辟風雨者也。吾將尸爾焉。』子揖師而行，百里子與蹇叔子從其子而哭之。秦伯怒曰：『爾曷爲哭吾師？』對曰：『臣非敢哭君師，哭臣之子也。』者是也。

赤歸于曹郭公。赤者何？曹無赤

者，蓋郭公也。以郭公在赤下。○赤歸于曹郭公，此連爲句。郭，音號，亦如字。連讀「郭公」爲一句。【疏】「赤者何」。○解云：欲言曹伯，經不書爵，欲言微者，復有郭公之號，故執不知問。○「曹無」至「公也」。○解云：謂此郭公實非曹人故也。言蓋郭公者，蓋郭之公矣。郭公者何？失地之君也。失地者，出奔也。名言歸，倒郭公置赤下者，欲起曹伯爲戎所殺，故使若曹伯死，謚之爲郭公。而赤微者，自歸曹也。不言赤

奔者，從微者例，不得錄出奔。【疏】「郭公者何」。○解云：欲言郭君，經無其事，欲言曹伯，而文言郭公，故執不知問。○注「不言」至「出奔」。○解云：謂不言郭公亦奔曹者，假作微人之文，即從微者例，寧得錄其奔，正得言道赤歸于曹。①

二十有五年，春，陳侯使女叔來聘。稱

字者，敬老也。禮，七十，雖庶人，主孝而禮之。②《孝經》曰「昔者明王之以孝治天下也，不敢遺小國之臣」是也。○女，音汝。【疏】注「稱字敬老也」。○解云：正以稱字異於諸侯大夫之例，故知其老也。○注「孝經」至「是也」。○解云：注言此者，欲道《春秋》假魯以爲明王，謂女叔爲小國之臣矣。

夏，五月，癸丑，衛侯朔卒。《春秋》纂明者

當書葬，朔不書葬，嫌與篡同例，身絕國不絕，故去葬，明犯天子命重，不得書葬，與盜國同。○故去，起呂反，年末同。【疏】注「春秋」至「國同」。○解云：纂明者，謂經有立、人之文也。不嫌非篡，則書其葬，隱四年冬「衛人

① 「正」，阮校：「閩、監、毛本作『止』。」

② 「孝」，阮校：「鄂本、宋本『孝』作『字』，當據正。」

立晉」，桓十三年春「葬衛宣公」，莊九年夏「齊小白入于齊」，僖十八年秋「葬齊桓公」之屬是也。若篡不明者，則去其葬，以見其篡，不合爲諸侯，即晉惠公之屬是也。今此衛朔於上六年經云「夏，六月，衛侯朔入于衛」，既有人文，即是篡明，當合書葬，而不書葬者，若其書葬，則嫌與篡明者同例，但身合絕而已，其國不合絕，故亦去其葬，明其犯天子之命罪重，不得書葬，與盜國同。盜國即篡是也。朔犯天子命在上六年。

六月，辛未，朔，日有食之。鼓用牲于社。日食則曷爲鼓用牲于社？據日食在天。

【疏】注「據日食在天」。○解云：謂日食在天上，何由于地而鼓用牲乎？求乎陰之道也。求，責求也。以

朱絲營社，或曰脅之，或曰爲闇，恐人犯之，故營之。「或曰」者，或人辭，其義各異也。或曰脅之，與責求同義。社者，土地之主也。月者，土地之精也。上繫于天而犯日，故鳴鼓而攻之，脅其本也。朱絲營之，助陽抑陰也。或曰爲闇者。社者，土地之主，尊也，爲日光盡，天闇冥，恐人犯歷之，故營之。然此說非也。記或傳者，示不欲絕異說爾。先言鼓，後言用牲者，

明先以尊命責之，^①後以臣子禮接之，所以爲順也。不言鼓于社用牲者，與禘于大廟，用致夫人同，嫌起用牲爲非禮。書者，善內恐懼天災，應變得禮也。是後夫人遂不制，通於二叔，殺二嗣子也。○營社，一傾反，又如字，本亦作「縈」，同。爲闇，于僞反，注「爲闇」、「爲日光」同。大廟，音泰。應變，應對之應。【疏】注「或曰」至「說非也」。○解云：知其非者，正以日食者，陰氣侵陽，社官五土之神，理宜抑之，而反營衛，失抑陰之義故也。○注「不言」至「非禮」。○解云：《公羊》之義，救日食而有牲者，以臣子之道接之故也，與《左氏》天災有幣無牲異矣。僖八年「秋，七月，禘于大廟，用致夫人」，彼注云：「以致文在廟下，不使人廟，知非禮也。」然則此經若鼓用牲之文，在于社之下，不使在社上，則用牲爲非禮。若然，上二十四年傳云「用者不宜用也」，而此注復以用牲爲得禮者，《公羊》之義，以用爲時事，不必著不宜也。○注「書者」至「嗣子也」。○解云：謂經書日食，善內之得禮矣。夫人遂不制以下，是其日食之義。言通於二叔者，下二

① 「明先以尊命責之」，阮校曰：「《續漢志》注引作『尊者命』，此脫『者』」。

十七年傳云「公子慶父、公子牙通乎夫人以脅公」是也。言殺二嗣子者，子般、閔公是也。

伯姬歸于杞。

秋，大水。鼓用牲于社、于門。其言

「于社、于門」何？據一鼓用牲耳。于社，禮也。于門，非禮也。于門非禮，故略不復舉鼓用

牲。不舉非禮爲重者，如去于社，嫌于門禮也。大水與

日食同禮者，水亦土地所爲，雲實出于地，而施于上乃雨，歸功于天，猶臣歸美于君。○復，扶又反。【疏】注

「大水」至「于君」。○解云：同禮，謂同鼓用牲矣。

冬，公子友如陳。如陳者，聘也。內朝聘言

如者，尊內也。書者，錄內所交接也。朝京師大國，善有

加錄文，如楚有危文。聘無月者，此於朝輕也。【疏】注

「朝京」至「錄文」。○解云：凡朝聘例時，加錄，謂書月是

也。即成十三年「三月，公如京師」，彼注云「月者，善公

尊天子者」者，^①是其朝京師有加錄之文矣。襄二十一年

「春，王正月，公如晉」，彼注云「月者，溷梁之盟後，中國

方乖離，善公獨能與大國」者，是朝大國有加錄之文矣。

○注「如楚有危文」。○解云：即襄二十八年冬，「十有一

月，公如楚」，彼注云「如楚皆月者，危公朝夷狄也」是也。○注「聘無月」至「輕也」。○解云：即《春秋》上下內聘京師及大國悉書時是也。而襄三十年「春，王正月，楚子使薳頗來聘」書月者，彼注云「月者，公數如晉，希見答，今見聘，故喜錄之」是也。然則此云聘無月者，據內言之矣。

二十有六年，公伐戎。^②

夏，公至自伐戎。

曹殺其大夫。何以不名？據莒小於曹，

殺公子意恢名。【疏】「春公伐戎夏公至自伐戎」。○解

云：即上六年注云「公獨出用兵，不得意致伐」者，即此是

也。○注「據莒」至「恢名」。○解云：知莒小於曹者，正

以《春秋》上下，曹伯恒敘於莒上故也。其莒殺公子意恢

名者，即昭十四年「冬，莒殺其公子意恢」是也。衆也。

曷爲衆殺之？據殺三郤名。【疏】注「據殺三郤

曷爲衆殺之？據殺三郤名。【疏】注「據殺三郤

^①「者者」，阮校：「閔、監、毛本『者』字不疊，此誤衍。」

^②「公伐戎」，阮校引盧文弨曰：「疏標經文云『春公伐戎』，是疏本有『春』，自石經始脫耳。」

名」。○解云：即成十七年「晉殺其大夫卻錡、卻州、卻至」是也。言晉殺三卻，亦是衆殺之，而皆書名，此曷爲衆殺而復不稱其名乎？**不死于曹君者也。**曹諸

大夫與君皆敵戎戰，曹伯爲戎所殺，諸大夫不伏節死義，獨退求生，後嗣子立而誅之。《春秋》以爲得其罪，故衆略之不名。凡書君殺大夫，大夫有罪，^①以專殺書，他皆以罪舉。【疏】注「凡書」至「罪舉」。○解云：《春秋》之

義，諸侯之君不得專殺大夫，若殺有罪大夫，《春秋》書之者，責君專殺矣。其他無罪，君枉殺之，而書之者，欲以罪君之故而舉之。其罪君者，即去其君之葬是也。君

死乎位曰滅，曷爲不言其滅？據胡子髡滅。

○髡，苦門反。【疏】注「據胡子髡滅」。○解云：即昭二十三年云「胡子髡、沈子楹滅」云云是也。此注不言沈子楹者，省文故也。**爲曹羈諱也。此蓋戰也。何以不言戰？**如上語知爲戰。○爲曹，于僞反，下同。

【疏】注「如上語知爲戰」。○解云：即上謂「不死于曹君」是也。**爲曹羈諱也。**諱者，上出奔，嫌辟難，欲起其賢，又所諫者戰也，故爲去戰、滅之文，所以致其意也。曹無大夫，書殺大夫者，起當誅也。○避難，乃旦反。爲

去，于僞反，下起呂反。【疏】注「故爲」至「意也」。○解云：謂曹羈之意，唯恐其滅，欲其不戰，是故諱其戰、滅之文，所以使若諫得其君然也。○注「曹無大夫」。○解云：上二十四年傳文。○注「起當誅也」。○解云：言大夫之義，理合死於君。今不死君，當合誅討，是以經書「殺其大夫」，欲起其合誅矣。

秋，公會宋人、齊人伐徐。

冬，十有二月，癸亥，朔，日有食之。異與上日食略同。【疏】注「異與上日食略同」。○解云：上二十五年日食之下，注云「是後夫人遂不制，通于二叔，殺二嗣子也」。今此日食之異，亦爲此事，故云異與上日食之說相似，是以不復指解之。

二十有七年，春，公會杞伯姬于洮。書者，惡公教內女以非禮也。洮，內也。凡公出，在外致，在內不致。其與婦人會，不別得意，雖在外猶不致。伯姬不卒者，蓋不與卒于無服。女會來例皆時。○洮，他刀反。惡公，烏路反，下「惡莊」同。別，彼列反。【疏】注

① 「罪」，原作「非」，今據余本、鄂本改。

「凡公出在外致」。○解云：即哀十三年夏，「公會晉侯及吳子于黃池」，「秋，公至自會」，是其公與二國以上得意致會也。桓二年秋，「公及戎盟于唐。冬，公至自唐」，是其公與一國出會盟，得意致地也。其不得意皆不致矣。○注「在內不致」。○解云：即隱五年「公觀魚于棠」，不書公至自棠之屬是也。○注「其與」至「不致」。○解云：《春秋》上下，無公會婦人于外之經，而注言雖在外，猶有不致者，但偶爾無之。○注「伯姬」至「無服」。○解云：凡諸侯之女嫁於諸侯者，爲之期。若嫁於大夫者，則不服矣。其有服者，《春秋》皆書其卒以錄恩，即紀伯姬、宋伯姬之屬是。若無服者則略之。今此伯姬《春秋》不記其卒者，蓋以其嫁於大夫，故云「不與卒于無服」矣。○注「女會來例皆時」。○解云：即此經書「春，公會杞伯姬于洮」，下文云「冬，杞伯姬來」之屬是也。

夏，六月，公會齊侯、宋公、陳侯、鄭伯，同盟于幽。

秋，公子友如陳，葬原仲。原仲者何？陳大夫也。大夫不書葬，此何以書？據益師等皆不書葬。稱字者，葬從主人也。【疏】

「原仲者何」。○解云：欲言陳君，其稱異常，欲言大夫，不合錄葬，故執不知問。○注「據益」至「書葬」。○解云：即隱元年冬十二月，「公子益師卒」之屬，皆無葬文是也。○注「稱字」至「人也」。○解云：若五等諸侯之卒，例書本爵，及其葬時，悉皆稱公，亦是葬從主人之稱，故取尊名矣。通乎季子之私行也。①不以公事行曰私行。私行，不言葬原仲于陳，若告糴者，告糴上有「無麥禾」，知以國事起，此上下無起文，而不言如陳，嫌不辟國事，實私行也。不嫌使乎大夫者，有國文也。○告糴，音狄，下同。使，所吏反。【疏】注「私行」至「告糴」。○解云：即下「二十八年經云「冬，築微。大無麥禾」，「臧孫辰告糴于齊」，傳云「何以不稱使？以爲臧孫辰之私行」是也。○注「不嫌」至「國文也」。○解云：成二年傳云「君不使于大夫」，②此其行使乎大夫何者，是其文也。又

①「乎」，阮校：「鄂本以下同，唐石經無「乎」字。」

②「君不使于大夫」，成公二年傳作「君不使乎大夫」，宣公十七年疏引同。隱公六年疏兩引皆作「君不行使乎大夫」，閔公二年疏引同。參見阮元成公二年校記。

閔二年傳云「高子者何？齊大夫也。何以不稱使？我無君也」者，^①亦是也。今此葬原仲，不嫌使乎大夫者，正以上有如陳之文故也。無國事，言如陳者，文九年注云「大夫繫國」是也。何通乎季子之私行？據大夫私行不書。辟內難也。欲起其辟內難。○內難，乃旦反，注及與下同。^②君子辟內難，而不辟外難。《禮記》曰：「門內之治恩揜義，門外之治義揜恩。」^③○之治，直吏反，下「之治」同。【疏】注「禮記曰」至「揜恩」。○解云：《喪服四制》文也。案彼文「事」作「治」字，下「揜」字作「斷」字，蓋以所見異。^④內難者何？公子慶父、公子牙、公子友，皆莊公之母弟也，公子慶父、公子牙通乎夫人，通者，淫通。【疏】「內難者何」。○解云：正以弑君之事，乃在莊三十二年冬，今已辟之，故執不知問。以脅公。語在三十二年。【疏】注「語在三十二年」。○解云：即「公曰：『牙謂我曰：『魯一生一及，君已知之矣。慶父也存。』』」是也。季子起而治之，則不得與于國政。坐而視之，則親親，親，至親也。○與，音預。因不

忍見也。因緣己心不忍見親親之亂。故於是復請至于陳，而葬原仲也。書者，惡莊公不能任用，使辟難而出。【疏】「故於是復請至於陳」。○解云：案上二十五年「冬，公子友如陳」，今又請往，故言復也。

冬，杞伯姬來。其言來何？據有來歸。

【疏】「冬杞伯姬來」。○解云：即上二十五年夏，「伯姬歸于杞」者是也。非謂此年「春，公會杞伯姬于洮」者，杞伯

^① 下「者」字，杉浦校：「按：『者』字當衍文，單疏鈔本無『者』字。」

^② 「與」，疑衍，宋本《釋文》無此字。

^③ 「門內之治恩揜義，門外之治義斷恩」，《禮記》今作「門內之治恩揜義，門外之治義斷恩」。阮校：「解云：

『《喪服四制》文也。彼文「事」作「治」字，下「揜」字作「斷」。《經義雜記》曰：『《釋文》：「之治，直吏反，下「之治」同。』誤同《禮記》，但不為「斷」字作音，知下句亦作「揜」。若疏本，則二「治」皆為「事」，古「治」、

「事」聲相近。何據《禮記》不與鄭本同。」

^④ 「揜」字作「斷」字蓋以所見異，杉浦校：「單疏鈔本「揜」下無「字」字，「異」下有「也」字。」

^⑤ 「牙」，原作「不」，今據中華本、閩本改。

姬自是大夫之妻。然則此伯姬是其女，洮之伯姬是其姊妹，故今得並稱伯矣。○注「據有來歸」。○解云：即宣十六年「秋，郊伯姬來歸」是也。直來曰「來」，直來，無事而來也。諸侯夫人尊重，既嫁，非有大故不得反。唯自大夫妻，雖無事，歲一歸宗。【疏】注「諸侯」至「得反」。○解云：即此文「直來曰來」是也。其大故者，奔喪之謂。文九年「夫人姜氏如齊」，彼注云「奔父母之喪也」是也。○注「唯自大夫」至「一歸宗」。○解云：自，從也。言從大夫妻以下，即《詩》云「歸寧父母」是也。案《詩》是后妃之事，而云大夫妻者，何氏不信毛敘故也。大歸曰「來歸」。大歸者，廢棄來歸也。婦人有七棄，五不娶，三不去：嘗更三年喪不去，不忘恩也。賤取貴不去，^①不肯德也。有所受，無所歸不去，不窮窮也。喪婦長女不娶，無教戒也。世有惡疾不娶，棄於天也。世有刑人不娶，棄於人也。亂家女不娶，類不正也。逆家女不娶，廢人倫也。無子棄，絕世也。淫佚棄，亂類也。不事舅姑棄，悖德也。口舌棄，離親也。^②盜竊棄，反義也。嫉妒棄，亂家也。惡疾棄，不可奉宗廟也。○更，音庚。背，音佩。喪婦，息浪反。長女，丁丈反。悖，補內反。

【疏】注「不肯德也」。○解云：言己賤時，彼已事己，是其恩德也。若貴而棄之，即是背德而不報，非禮也。○注「逆家」至「人倫也」。^③○解云：謂仍見其家不行正直，而行頑慝，廢其尊卑之倫次，故不可娶。

莒慶來逆叔姬。莒慶者何？莒大夫

也。莒無大夫，此何以書？譏。何譏

爾？大夫越竟逆女，非禮也。禮，大夫任重，

爲越竟逆女，於政事有所損曠，故竟內乃得親迎，所以屈

私赴公也。言叔姬者，婦人以字通。言叔姬，賤，故略與

歸同文，重乖離也。【疏】「莒慶者何」。○解云：欲言莒

君，經不稱子，欲言大夫，莒無大夫，故執不知問。○「大

夫」至「非禮也」。○解云：大夫所以不得越竟逆女者，正

以大夫任重，於政事有所損曠故也。若士則得越竟娶

妻，正以其任輕故也。是以《士昏禮》云「若異邦，則贈丈

①「取」，阮校：「當作『娶』，上下皆作『娶』。」

②「親」，原作「視」，今據京都本、再造善本、中華本、閣本改。

③「逆」，原作「之」，今據京都本、再造善本、中華本、閣本改。

夫送者以束錦」是也。○注「言叔」至「乖離也」。○解云：若不與歸同文，宜言莒慶來逆女，叔姬歸于莒矣。然則言叔姬者，是其歸文也。又云「重乖離」者，謂書其逆女與歸文同也，何者？嫁于大夫，賤不合錄，而書其「逆叔姬」者，重其乖離矣。

杞伯來朝。杞，夏后，^①不稱公者，《春秋》黜杞，

新周而故宋，以《春秋》當新王。黜而不稱侯者，方以子貶起伯爲黜。^②說在僖二十三年。○夏，戶雅反。【疏】注「杞夏后不稱公」。○解云：隱五年傳云「王者之後稱公」，今而稱伯，故怪之。○注「黜而」至「三年」。○解云：僖二十三年「十有一月，杞子卒」，注云「始見稱伯，卒獨稱子者，微弱爲徐、莒所脅，不能死位」。《春秋》伯、子、男一也，辭無所貶。貶稱子者，《春秋》黜杞不明，故以其一等貶之，明本非伯乃公也。又因以見聖人子孫，有誅無絕，故貶不失爵」是也。言「方以子貶」者，方以僖二十三年貶之稱子，令與伯共爲一等，故於此處不得稱侯耳。

公會齊侯于城濮。○濮，音卜。

監本附音春秋公羊注疏莊公卷第八

① 「后」，余本、鄂本、宋本《釋文》均作「後」。阮校：「此誤，疏同。」

② 「起」，阮校：「鄂本『起』作『杞』，此誤。」

監本附音春秋公羊注疏莊公卷第九

起二十八年，盡閔公二年

何休學

二十有八年，春，王三月，甲寅，齊人伐衛。衛人及齊人戰，衛人敗績。伐不日，此何以日？據鄭人伐衛不日。【疏】注「據鄭人伐衛不日」。○解云：在隱二年冬。按彼文雖在十二月「乙卯，夫人子氏薨」之下，不蒙其日月，故得據之。至之日也。用兵之道，當先至竟侵責之，不服乃伐之。今日至，便以今日伐之，故日以起其暴也。戰不言伐，此其言伐何？至之日也。至日便伐，明暴，故舉伐。【疏】「戰不」至「伐何」。○解云：正以上十年傳云「戰不言伐」云云，書其重者，故此弟子據而難之。《春秋》伐者爲客，伐人者爲客，讀伐長言之，齊人語也。○伐者爲客，何云「讀伐長言之」，伐人者也。

【疏】「春秋伐者爲客」。○解云：謂伐人者，必理直而兵強，故引聲唱伐，長言之，喻其無畏矣。伐者爲主。見伐者爲主，讀伐短言之，齊人語也。○伐者爲主，何云「讀伐短之」，^①見伐者也。【疏】「伐者爲主」。○解云：謂被伐主，必理曲而寡援，恐得罪於鄰國，故促聲短言之，喻其恐懼也。公羊子齊人，因其俗可以見長短，故言此。故使衛主之也。戰序上言及者爲主。曷爲使衛主之？據宋襄公伐齊，宋主齊。【疏】注「據宋」至「主齊」。○解云：即僖十八年「春，王正月，宋公會曹伯、衛人、邾婁人伐齊」，夏，「五月，戊寅，宋師及齊師戰于甌，齊師敗績」，傳云「戰不言伐，此其言伐何？」宋公與伐而不與戰，故言伐。《春秋》伐者爲客，伐者爲主。曷爲不使齊主之？與襄公之征齊也。曷爲與襄公之征齊？桓公死，豎刀、易牙爭權不葬，爲是故伐之也是也。衛未有罪爾。蓋爲幽之會，服父喪未終而不至故。○蓋爲，于僞反。【疏】注「蓋爲」至「至故」。○解

①「短之」，阮校：「毛本作「短言之」，與疏合。」宋本《釋文》作「讀伐短言之」，則此當脫「言」字。

云：上二十七年「夏，公會齊侯、宋公、陳侯、鄭伯，同盟于幽」是也。按上二十五年「夏，五月，癸丑，衛侯朔卒」，至二十七年六月幽之會時，始二十六月未盡。今傳復以為無罪，故知正為父喪未終，是以不至，則幽之會不至之衛侯，惠公朔之子，蓋懿公也。敗者稱師，衛何以不稱師？據桓十三年己巳，燕人戰敗績稱師也。【疏】注「據桓」至「稱師也」。○解云：即彼經云十三年「春，二月，公會紀侯、鄭伯。己巳，及齊侯、宋公、衛侯、燕人戰，齊師、宋師、衛師、燕師敗績」是。未得乎師也。未得成列為師也。詐戰不言戰，言戰者，衛未有罪，方欲使衛主齊，見直文也。不地者，因都主國也。○見直，賢徧反。【疏】注「詐戰不言戰」。○解云：通例如此。

夏，四月，丁未，邾婁子瑱卒。日者，附從霸者朝天子，行進。○瑱，素果反。【疏】注「日者」至「行進」。○解云：欲決上十六年冬十二月，「邾婁子克卒」不書日故也。正以行進而書日，故知附從霸者朝天子，賢於會霸者於北杏而已。但外相如例所不書，故無其文，何氏以理知之，故如此解。

秋，荊伐鄭。公會齊人、宋人、邾婁人

救鄭。①書者，善中國能相救。

冬，築微。○築微，《左氏》作「麋」。

大無麥禾。冬既見無麥禾矣，曷為先言築微，而後言無麥禾？諱以凶年造邑也。諱使若造邑而後無麥禾者，惡愈也。此蓋秋水所傷，就「築微」下俱舉水，則嫌冬水，推秋無麥禾，使若冬水所傷者，但言「無麥禾」，則嫌秋自不成，不能起秋水，因疾莊公行類同，故加大，明有秋水也。此夫人淫佚之所致。【疏】注「此蓋」至「秋水」。○解云：既言無麥，是建未之前事，故知秋水所傷也。若其經云「冬，築微。大水。無麥禾」，即大水在冬下，嫌是冬水矣，則嫌推尋此秋無麥禾之事，若使冬水傷殺之者矣。若不言「大」而但言「無麥禾」，則嫌此秋但地氣不養而麥禾不成，不能起見此秋實有水矣。因欲疾莊公之行，不制夫人，令其陰盛，類同於水，故加「大」以見之。

臧孫辰告糴于齊。告糴者何？請糴

①「邾婁人」，阮校：「唐石經、諸本同。按：《左氏》、《穀梁》無「邾婁人」。」

也。買穀曰糴。【疏】「告糴者何」。○解云：欲言買穀，不見將物之文，欲言非買穀，而經書糴者，故執不知問。何以不稱使？據上「大無麥禾」，知以國事行，當言如也。【疏】注「當言如也」。○解云：正以如者，內稱使文故也。以爲臧孫辰之私行也。曷爲以臧孫辰之私行？據國事也。君子之爲國也，必有三年之委。一年不熟告糴，譏也。古者三年耕，必餘一年之儲。九年耕，必有三年之積。雖遇凶災，民不饑乏。莊公享國二十八年，而無一年之畜，危亡切近，故諱使若國家不匱，大夫自私行糴也。○委，於鬼反。儲，①直魚反。畜，敕六反。匱，其位反。【疏】注「危亡切近故諱」。○解云：謂危亡之事，切於國家，理應不遠矣。

二十有九年，春，新延廡。新延廡者何？修舊也。舊，故也。繕故曰新，有所增益曰作，始造曰築。○廡，九又反。【疏】「新延廡者何」。○解云：欲言新造，不見作名，欲言修舊，修舊不書，故執不知問。○注「繕故曰新」。○解云：即此是也。○注「有所增益曰作」。○解云：即僖二十年「新作南門」是也。

○注「造曰築」。②○解云：即上「築微」，傳云「凶年不造邑也」之屬是也。修舊不書，此何以書？據新宮災後修不書。【疏】注「據新」至「不書」。○解云：即成三年二月，「甲子，新宮災。三日哭」。於此以後，不見修作之文是也。譏。何譏爾？凶年不修。不諱者，繕故功費差輕於造邑。延廡，馬廡也。○費，芳味反。差，初賣反。【疏】注「不諱」至「造邑」。○解云：上二十年「築微」之事，實在「大無麥禾」後，而在前言之者，諱以凶年造邑故也。然則去年無麥禾，今茲凶歲而修廡，不諱者，正以功費輕也。

夏，鄭人侵許。

秋，有蜚。何以書？記異也。蜚者，臭

惡之蟲也，象夫人有臭惡之行。言有者，南越盛暑所生，非中國之所有。○蜚，扶味反，臭蟲也。行，下孟反。

冬，十有二月，紀叔姬卒。國滅卒者，從夫

①「儲」，原作「諸」，今據上傳文及宋本《釋文》改。

②「注造曰築」，阮校：「毛本「造」上有「始」字，與注合。」杉浦校：「單疏鈔本作「注始造曰築者」。」

人行，待之以初也。【疏】注「國滅」至「以初也」。○解云：桓七年「夏，穀伯綏來朝，鄧侯吾離來朝」，^①傳云：「皆何以名？失地之君也。其稱侯朝何？貴者無後，待之以初也。」然則今此叔姬，其國已滅而書卒，正以本貴爲夫人，今雖國滅，猶以夫人之禮待之而書其卒，故云「待之以初也」。案隱七年，則此叔姬乃是伯姬之媵，而言從夫人行者，正以十二年春「叔姬歸于鄆」，傳云：「其言歸于鄆何？隱之也。何隱爾？其國亡矣，徒歸于叔爾也。」然則初去之時，雖爲媵妾，至莊四年三月「伯姬卒」之後，紀國未滅之前，紀侯立之爲夫人，其言夏「紀侯大去其國」，^②叔姬乃歸于魯，至十二年春歸于鄆之時爲夫人，故曰「從夫人行」也。

城諸及防。諸，君邑。防，臣邑。言及，別君臣

之義。君臣之義正，則天下定矣。○別，彼列反。【疏】注「諸君」至「臣邑」。○解云：知如此者，正以昭五年「夏，莒牟夷以牟婁及防茲來奔」，傳云「其言及防茲來奔」，傳云：「其言及防茲來奔何？」^③不以私邑累公邑也。彼注云：「公邑，君邑也。私邑，臣邑也。累，次也。義不可使臣邑與君邑相次序，故言及以絕之。」然則都邑言及別公私，故知此言「城諸及防」者，是君臣邑故也。

○注「言及」至「定矣」。○解云：所以君臣之義正，則天下定，可以爲王者之法矣。

三十年，春，王正月。

夏，師次于成。

秋，七月，齊人降鄆。鄆者何？紀之遺邑也。降之者何？取之也。取之則曷爲不言取之？爲桓公諱也。時霸功足以除惡，故爲諱。言降者，能以德見歸，自來服者可也。○降鄆，戶江反，下注同。鄆，音章。爲桓，于僞反，注同。【疏】鄆者何？○解云：欲言是國，《春秋》未有，欲言非國，復無所繫，故執不知問。○「降之者何」。○解云：欲言自服，文道齊人，欲言兵加，而文又言降，故執不知問。外取邑不書，此何以書？盡也。襄公服紀以

①「離」，杉浦校：「單疏鈔本作『離』，毛本亦然，與桓十七年經合。」

②「言」，京都本、再造善本作「年」。杉浦校：「單疏鈔本作『年』，毛本亦然。按：『言』當『年』字誤。」

③「傳云其言及防茲來奔」，杉浦校：「九字，單疏鈔本不重，毛本亦然。此當衍。」

過，而復盡取其邑，惡其不仁之甚也。月者，重於取邑。○復，扶又反。惡其，烏路反，下同。【疏】注「月者重於取邑」。○解云：以取邑例時，即隱六年「冬，宋人取長葛」之屬是。

八月，癸亥，葬紀叔姬。外夫人不書葬，此何以書？隱之也。何隱爾？其國亡矣，徒葬乎叔爾。

九月，庚午，朔，日有食之。鼓用牲于社。是後魯比弑二君，狄滅邢、衛。○比殺，^①申志反。

【疏】「徒葬乎叔爾」。○解云：謂不得與夫合葬，故言徒。徒者，空也。案上四年「齊侯葬紀伯姬」，傳云：「外夫人不書葬，此何以書？隱之也。何隱爾？徒葬于齊爾。」而此重發之者，正以彼則于齊，此則于叔，故重言之。○注「是後魯比弑二君」。○解云：謂下三十二年「子般卒」，閔二年「公薨」是也。○注「狄滅邢、衛」。○解云：謂僖元年「次鼐北，救邢」，僖二年「春，王正月，城楚丘」之屬是也。

冬，公及齊侯遇于魯濟。○濟，子禮反。

齊人伐山戎。此齊侯也，其稱人何？

據下言齊侯來獻戎捷。【疏】注「據下」至「戎捷」。○解云：即下三十一年「夏，六月，齊侯來獻戎捷」是也。貶。曷爲貶？據齊侯伐北戎不貶。【疏】注「據齊」至「不貶」。○解云：即僖十年「夏，齊侯、許男伐北戎」是也。若然，而此注不道許男者，正以其解齊人伐山戎之故，省文。子司馬子曰：「蓋以操之爲已蹙矣。」^②操，迫也。已，甚也。蹙，痛也。迫殺之甚痛。

○以操，七刀反，迫也，注同。蹙，子六反。此蓋戰也，何以不言戰？據得捷也。《春秋》敵者言戰，桓公之與戎狄，驅之爾。時桓公力但可驅逐之而已，戎亦天地之所生，而乃迫殺之甚痛，故去戰貶見其事，惡不仁也。山戎者，戎中之別名，行進故錄之。○

^①「殺」，京都本、再造善本作「弑」。

^②「蓋以操之爲已蹙矣」，阮校：「唐石經、諸本同。武億云：『操，古本作「躁」，《詩·江漢》正義引此「躁」，迫也。按：「蹙」當本作「戚」，何訓爲「痛也」，是傷戚之意。《考工記》「不微不至無以爲戚速也」，注引《春秋傳》曰：「蓋以操之爲已戚矣。」可證鄭本作「戚」。按：《說文》有「戚」無「蹙」。」

去，起呂反。見，賢偏反。【疏】「春秋敵者言戰」。○解云：謂軍人衆寡相敵者，不謂將之尊卑等，是以僖二十八年「晉侯」已下，「及楚人戰于城濮」，宣十二年「晉荀林父帥師及楚子戰于邲」之屬，雖君與大夫，亦言戰矣。○注「故去」至「不仁也」。○解云：謂貶去其戰，以見力不得等，惡齊侯之不仁也。○注「行進故錄之」。○解云：謂言「山」，詳錄之耳。

三十有一年，春，築臺于郎。何以書？譏。何譏爾？臨民之所漱浣也。②

無垢加功曰漱，去垢曰浣，齊人語也。譏者，爲瀆下也。禮，天子外屏，諸侯內屏，大夫帷，士簾，所以防泄慢之漸也。禮，天子有靈臺，以候天地；諸侯有時臺，以候四時。登高遠望，人情所樂，動而無益於民者，雖樂不爲也。四方而高曰臺。○漱，素口反。浣，戶管反。垢，古口反。去，起呂反。爲瀆，于僞反，下「爲威」同。【疏】「臨民之所漱浣也」。○解云：謂郎臺近泉臺，故知如此。是以文十六年傳云：「泉臺者何？郎臺也。郎臺則曷爲謂之泉臺？未成爲郎臺，既成爲泉臺。」彼注云「既成更以所置名之」者，即其近泉之證也。○注「無垢加功曰漱」。○解云：謂但用手矣。既無垢而加功者，蓋亦少有，但無多

垢，故謂之無，非全無也。又取其斗漱耳，若以里語曰斗漱也。注「去垢曰浣」者，蓋用足物，是以舊說云「用足曰浣」是也。故《內則》云「冠帶垢，和灰請漱，衣裳垢，和灰請澣」，鄭注云「手曰漱，足曰澣。和，瀆也」是也。○注「禮天」至「士簾」。○解云：《禮說》文也。○注「天子」至「四時」。○解云：皆是《禮說》文也。文王受命之後，乃築靈臺，亦是天子曰靈臺之義，正以候天地，故以靈言之，諸侯候四時，故謂之時臺。○注「四方而高曰臺」。○解云：《爾雅·釋宮》文。

夏，四月，薛伯卒。卒者，薛與滕俱朝隱公，桓弑隱而立，滕朝桓公，薛獨不朝，知去就也。○桓殺，申志反。【疏】「卒者」至「去就也」。○解云：所傳聞之世，小國卒例不合書，而今書之，故解之耳。言薛與滕俱朝隱公者，即隱十一年「滕侯、薛侯來朝」是也。言滕朝桓公者，即桓二年「滕子來朝」是也。言知去就者，謂知去惡就善矣。

① 「山」下，疑脫「戎」字。

② 「漱」，阮校：「唐石經、鄂本、閩本『漱』作『漱』，此誤。《釋文》及注、疏同。」杉浦校：「單疏鈔本作『漱』。」

築臺于薛。何以書？譏。何譏爾？

遠也。禮，諸侯之觀不過郊。○觀，工喚反。【疏】注

「禮諸」至「過郊」。○解云：正以郎爲近邑而在郊內，鄉者上傳不譏其遠，今此云薛，傳云「遠也」，故知禮法不得過郊矣。

六月，齊侯來獻戎捷。戰所獲物曰捷。

齊，大國也，曷爲親來獻戎捷？據齊未嘗朝魯。威我也。以威恐怖魯也。如上難知爲威魯書之。

○恐怖，丘勇反，下普故反。其威我奈何？旗獲

而過我也。旗，軍幟名，各有色，與金鼓俱舉，使士卒

望而爲陳者。旗獲，建旗縣所獲得以過魯也。不書威魯

者，恥不能爲齊所忌難，見輕侮也。言獻捷繫戎者，《春

秋》王魯，因見王義，古者方伯征伐不道，諸侯交格而戰者，誅絕其國，獻捷於王者。楚獻捷時，此月者，刺齊桓

僇慢恃盈，^①非所以就霸功也。○幟，音志，又申志反，又

尺志反，本又作「織」，同。難，乃旦反。因見，賢徧反。

【疏】注「旗軍」至「有色」。○解云：即禮「大帛以即戎」之屬是也。○注「與金鼓俱舉」。○解云：謂以金鐃和鼓，

金鐃通鼓之時而建之。○注「旗獲」至「過魯也」。○解

云：凡言過者，謂道所經過之稱。今齊侯伐山戎而得過魯，則此山戎不在齊北可知。蓋戎之別種，居于諸夏之山，故謂之山戎耳。○注「言獻捷繫戎」至「不道」。○解云：正決僖二十一年冬，「楚人使宜申來獻捷」，無所繫矣。○注「諸侯交」至「於王者」。○解云：格猶距也，謂與交戰而距王。今人謂不順之處爲「格化」之類。○注「楚獻」至「此月」。○解云：即僖二十一年冬，「楚人使宜申來獻捷」是也。而云「持盈」者，謂自持盈滿之道，^②而侮諸侯，失謙虛之義，故月之。

秋，築臺于秦。何以書？譏。何譏

爾？臨國也。言國者，社稷、宗廟、朝廷皆爲國，明

皆不當臨也。臨社稷、宗廟則不敬，臨朝廷則泄慢也。

冬，不雨。何以書？記異也。京房《易

傳》曰：「旱異者，旱久而不害物也。斯祿去公室，福由下

作，故陽雖不施，而陰道獨行，以成萬物也。」先是比築三

臺，慶牙專政之應。○施，申豉反。【疏】注「先是比築三

①「僇慢恃盈」，京都本、再造善本作「驕慢恃盈」。

②「而云持盈者謂自持盈滿之道」，杉浦校：「單疏鈔本

「持」字並作「特」。

臺」。○解云：即上文于郎、于薛、于秦之屬是也。○注「慶牙專政」。○解云：即上二十七年傳云「公子慶父、公子牙、公子友皆莊公之母弟也。公子慶父、公子牙通乎夫人以脅公，季子起而治之，則不得與于國政，坐而視之，則親親，因不忍見也。故於是復請至于陳，而葬原仲也」，下三十二年傳云「季子至而授之以國政」，然則上既言二子脅公，季友不得爲政，下文始言授季子國政，即於是時慶牙爲政明矣。

三十有二年，春，城小穀。^①

夏，宋公、齊侯遇于梁丘。

秋，七月，癸巳，公子牙卒。何以不稱

弟？據公弟叔肸卒。○肸，許乙反。【疏】「城小穀」。

○解云：二傳作「小」字，與《左氏》異。○「夏宋公」至「梁丘」。

○解云：隱八年注云：「宋公序上者，時衛侯要宋公，使不虞者爲主，明當戒慎之。」然則今宋公序上，亦爲齊侯所要故也。○注「據公弟叔肸卒」。○解云：即宣十

七年「冬，十有一月，壬午，公弟叔肸」是也。^②殺也。

殺則曷爲不言刺？^③據公子買有罪殺之，言刺不

言卒。【疏】注「據公」至「言卒」。○解云：即僖二十八年

「公子買戍衛，不卒戍，刺之」，傳云「不卒戍者何？不卒戍者，內辭也，不可使往也。不可使往，則其言戍衛何？遂公意也」是也。爲季子諱殺也。曷爲爲季子諱殺？據叔孫得臣卒不日者，惡不發揚公子遂弑也。

○爲季，于僞反，下「爲季」、「而爲」，注「故爲」同。【疏】注「據叔」至「遂弑也」。○解云：即宣五年九月，「叔孫得臣卒」，注云「不日者，知公子遂欲弑君，爲人臣知賊而不言，明當誅」是也。然則季子若其發揚牙之罪惡誅之，正是臣人之道。今而諱殺，故難之云。^④季子之遏惡也，遏，止。○遏，於葛反，止也。不以爲國獄，不

①「城小穀」，阮校：「據疏，蓋二傳作『城小穀』，《左氏》作『城穀』也。」

②「叔肸」下，杉浦校：「單疏鈔本有『卒』字。」今按：當有「卒」字。據疏標起訖，此釋「公弟叔肸卒」。宣公十七年經亦作「公弟叔肸卒」。

③「殺則曷爲不言刺」，阮校：「鄂本下有『之』，此脫。唐石經『之』字刊滅，以字數計之本有。下疏引傳云：『曷爲不言刺之？』」

④「云」，杉浦校：「單疏鈔本無。按：『云』字當衍。」

就致獄其刑，^①故言卒。緣季子之心而爲之諱。

季子過在親親，疑於非正，故爲之諱，所以別嫌明疑。○

別，彼列反。【疏】注「季子」至「明疑」。○解云：季子仁

者，不忍用刑其兄，是失事君之道。然則季子之過，在於

親其親者，故曰「過在親親」。《春秋》以掩遏牙之惡，與

周公行誅于兄異，是以疑其非正禮耳，故爲之諱刺文。

所以別嫌者，謂諱刺別於親親，失臣道之嫌。明疑者，明

於掩惡，非正禮之疑耳。季子之遏惡奈何？莊

公病，將死，以病召季子。召之於陳。【疏】注

「召之於陳」。○解云：正以上二十七年傳云「因不忍見

也，故於是復請至于陳，而葬原仲也」之文故也。季子

至，而授之以國政。至不書者，內大夫出與歸，不

兩書。【疏】注「至不」至「兩書」。○解云：謂通例如此。

宣八年「夏，公子遂如齊，至黃乃復」，書其乃復者。彼傳

云：「何言乎有疾乃復？譏。何譏爾？大夫以君命出，

聞喪徐行而不反。」彼注云「喪尚不當反，況於疾乎」是

也。宣十八年秋，「公孫歸父如晉」，冬，「歸父還自晉，至

檉，遂奔齊」，書其還者。彼傳云「還者何？善辭也。何

善爾？歸父使於晉，還自晉，至檉，聞君薨家遣，墀帷」，

「反命乎介，自是走之齊」。彼注云「主書者，善其不以家

見逐怨懟，^②成踊哭君，終臣子之道，起時莫能然也。言

至檉者，善其得禮于檉」是也。昭十四年「春，隱如至自

晉」，又昭二十四年春「叔孫舍至自晉」，皆書至者，正由

被執而得歸，是以重而書至，猶非正歸當書之例也。閔

二年秋，「季子來歸」書者，初出亦不書，不得難此也。

曰：「寡人即不起此病，吾將焉致乎魯

國？」致，與也。○焉，於虔反。季子曰：「般也

存，君何憂焉？」公曰：「庸得若是乎？庸

猶備備無節目之辭。○般，^③音班。牙謂我曰：

「魯一生一及，^④君已知之矣。」父死子繼曰生，

①「致獄」，阮校：「鄂本作『獄致』，此誤倒。」

②「逐」，原作「遂」，今據宣公十八年注及京都本、再造

善本、閣本改。

③「之辭」般，原作「○辭之般」，今據余本、中華本、閣

本、宋本《釋文》改。

④「一生一及」，阮校：「唐石經、諸本同。盧文弨曰：

『《史記·魯世家》作「一繼一及」，裴解引何休云：

「父死子繼，兄死弟及。」疑此傳本作「一世一及」。』

兄死弟繼曰及。言隱公生，桓公及，今君生，慶父亦當及，是魯國之常也。慶父也存。」時莊公以爲牙欲立

慶父。【疏】慶父也存者。○解云：莊公辭。季子

曰：「夫何敢？是將爲亂乎？夫何敢！」

再言「夫何敢」者，反覆思惟，且欲以安病人也。孔子

曰：「君子有九思：視思明，聽思聰，色思溫，貌思恭，言

思忠，事思敬，疑思問，忿思難，見得思義。」○夫何，音

扶，下及注同。覆，芳服反。思難，乃旦反。【疏】注「再

言」至「病人也」。○解云：謂反覆思惟踟躕之間，故再

告此。【疏】言「夫何敢」，使病者意安耳。○注「孔子曰」至

「思義」。○解云：引之者，欲言季子反覆思惟，合於君子

之道。言「見得思義」者，得謂利祿也。俄而牙弑械

成，^①是時牙實欲自弑君，兵械已成，但事未行爾。有攻

守之器曰械。○俄，五多反。牙殺，申志反，注及下「親

弑」同。械，戶戒反。季子和藥而飲之，藥者，酖毒

也，傳曰「酖之」是也。時季子亦有械，故能飲之。傳不

道者，從可知。○飲，於鳩反，注同。酖毒，本亦作「鳩」，

直蔭反，下文同。【疏】注「藥者」至「是也」。○解云：即

下云「然則曷爲不直誅而酖之」云云者是。曰：「公

子從吾言而飲此，則必可以無爲天下戮笑，必有後乎魯國。時世大夫，誅不宜揚，子當繼

體如故。【疏】則必可以無爲天下戮笑」。○解云：言不

爲天下所共戮，不爲天下所共笑矣。○注「時世大夫」。

○解云：欲道古禮大夫不世矣。不從吾言而不飲

此，則必爲天下戮笑，必無後乎魯國。」於

是從其言而飲之，飲之無僇氏，至乎王堤

而死。公子牙今將爾，今將欲殺無僇。○無，本

又作「巫」。^⑤僇，音力委反，又力追反。堤，丁兮反。

【疏】飲之無僇氏」。○解云：或是大夫家，或是地名。

【疏】飲之無僇氏」。○解云：或是大夫家，或是地名。

①「反」下，原衍「也」字，今據中華本、閩本、宋本《釋文》

刪。

②「謂」，杉浦校：「單疏鈔本作「諸」。」

③「告」，阮校：「閩、監、毛本作「言」。」

④「弑」，阮校：《釋文》「弑」作「殺」，云：「申志反，注

及下「親弑」同。」按：今本注作「弑君」，下作「親弑」，

皆後人所改，陸本則皆作「殺」也。」

⑤「今將欲殺無僇」○無本又作巫，余本作「今將欲殺」○

無僇無本又作巫，宋本《釋文》同。

言飲酖毒之藥于無僂氏矣。舊云「飲之無僂氏者，言飲此毒不累其子孫，謂當立其氏族也」者，非也。○「至乎王堤而死」。○解云：王堤，蓋地名。辭曷爲與親

弑者同？辭，傳序經辭。親，躬親也。【疏】注「辭傳

序經辭」。○解云：知如此者，正以經書「公子牙卒」，無誅殺之文。傳云「曷爲不言刺之」，云「是將爲亂乎」，故知此辭與親弑者同，但是傳序經辭，非爲經也。君親

無將，將而誅焉。親，謂父母。○無將，如字，閔公

「本將不誅」、「將而」皆同。或子匠反，非也。然則善

之與？曰：然。殺世子母弟直稱君者，甚

之也。季子殺母兄，何善爾？誅不得辟

兄，君臣之義也。以臣事君之義也。唯人君然後得

申親親之恩。○與，音餘。【疏】「殺世子母弟」至「之

也」。○解云：即僖五年「春，晉侯殺其世子申生」，襄二

十六年「秋，宋公殺其世子痤」之屬者，是殺世子直稱君

之經也。隱元年「夏，五月，鄭伯克段于鄆」，襄三十年夏

「天王殺其弟年夫」之屬者，是殺母弟直稱君之經也。○

注「唯人」至「之恩」。○解云：欲道殺世子母弟，所以直

稱君甚之之義。言得申親親之恩而不申之，故甚其惡耳。然則曷爲不直誅而酖之？行誅乎兄，隱而逃之，使託若以疾死然，親親之道也。

明當以親親原而與之，於治亂當賞疑從重，於平世當罰疑從輕。莊不卒大夫而卒牙者，本以當國將弑君。①書

日者，錄季子遏惡也。行誅親親，雖酖之猶有恩也。

【疏】「隱而逃之」。○解云：言隱匿辟殺，是以不直誅而酖之矣。○注「明當」至「與之」。○解云：明《春秋》之道

當親其親，而原季子之心而與之，故善之耳。○注「於治」至「從輕」。○解云：注言此者，欲道《春秋》者，撥亂

之書，是以原其親親而賞季氏，即賞疑從重也。當所傳

聞之世，天下未平，是以升平疑獄，不得不誅，故云於平

世乃可罰疑從輕矣。○注「莊不」至「弑君」。○解云：上

三年「春，王正月，朔，會齊師伐衛」，傳云「朔者何？吾大

夫之未命者也」，彼注云「所伐大夫不卒者，莊公薄於臣

子之恩，故不卒大夫，與桓同義」是也。今牙書卒者，本

以當國將弑君故也。○注「書日」至「遏惡也」。○解

①「當國」，原作「書國」。余本作「當國」，本疏亦云「今

牙書卒者，本以當國將弑君故也」，今據改。

云：正以《春秋》之義，於所傳聞之世，大夫之卒，不問有罪無罪，皆不書日以略之，因示其恩淺，即隱元年冬十二月「公子益師卒」、隱八年「冬，十有二月，無駭卒」之屬是也。今而書日，故解之。言錄季子遏惡也者，正以爲季子遏其惡之故，是以詳錄之耳。

八月，癸亥，公薨于路寢。路寢者

何？正寢也。公之正居也。天子諸侯皆有三寢：

一曰高寢，二曰路寢，三曰小寢。父居高寢，子居路寢，孫從王父母，妻從夫寢，夫人居小寢。在寢地，^①加錄內也。夫人不地者，外夫人不卒，內書薨已錄之矣，故出乃地。【疏】路寢者何？○解云：欲言正寢，公存之時，經文無路寢之名，欲言非正寢，而公薨於內，故執不知問。○注「天子諸侯」至「人居小寢」。○解云：皆時王之禮矣。若《春秋》定十五年夏五月「壬申，公薨於高寢」、僖三十三年冬十二月「乙巳，公薨于小寢」之屬是也。然則諸侯有三寢，而薨其內者是正矣。而文十八年二月，丁丑，公薨于臺下，襄三十一年「夏，六月，辛巳，公薨于楚宮」之屬，皆爲失處，而無譏文者，蓋以不在三寢，非禮自見故也。而云「父居高寢」者，蓋以寢中最尊，若父子並薨之時，父殯于高寢矣。其嗣君亦薨，乃居於路寢。若

其孫又薨，則從王父母小寢。所以不再言母者，妻從夫寢故也。其夫人若存，定居于寢內之三宮矣。若非有並喪，則從寢之中科薨其一。^②而謂路寢爲公之正居者，以其始正之常處也。^③○注「在寢地加錄內也」。○解云：正決外諸侯之卒不地故也。○注「故出乃地」。○解云：即僖元年「秋，七月，戊辰，夫人姜氏薨于夷」是也。

冬，十月，乙未，子般卒。「子卒」云「子卒」，此其稱「子般卒」何？據子赤不言子赤卒。

【疏】據子赤不言子赤卒。○解云：文十八年「冬，十月，子卒」，傳云「子卒者孰謂？謂子赤也」是也。君存

稱世子，明當世父位爲君。【疏】君存稱世子。○解

云：內外同矣。而桓六年「九月，丁卯，子同生」，不言世子者，彼注云「而不以世子正稱書者，明欲以正見無正，疾惡桓公」是也。君薨稱子某，緣民臣之心，不可一

①「在寢地」，余本、鄂本作「在寢地者」，此當脫「者」字。

②「從」，杉浦校：「單疏鈔本作「三」，毛本亦然。

按：當作「三」。

③「始」，杉浦校：「單疏鈔本作「治」。按：「始」當作「治」。

日無君，故稱子某，明繼父也。名者，尸柩尚存，猶以君前臣名也。【疏】注「緣民臣」至「名也」。○解云：子者，嗣君之稱，是以稱子某，明其嗣父也。既不可無君，令之繼父而書名者，正以尸柩尚存，猶君前臣名故也。其緣民臣之心，不可一日無君者，文九年傳文。既葬稱子，不名者，無所屈也。緣終始之義，一年不二君，故稱子也。【疏】注「不名」至「子也」。○解云：正以先君既葬，更無所屈，所以不稱爵而言子者，一年不二君矣。其「緣終始之義，一年不二君」者，文九年傳文。踰年稱公。不可曠年無君。【疏】注「不可曠年無君」。○解云：文九年傳文。子般卒，何以不書葬？據定姒俱稱卒書葬。【疏】注「據定」至「書葬」。○解云：即定十五年「秋，七月，壬申，姒氏卒」，九月，「辛巳，葬定姒」。然則定姒稱卒而書葬，今子般稱卒不書葬，故難之。未踰年之君也，有子則廟，則立廟也。廟則書葬。錄子恩也。無子不廟，不廟則不書葬。未踰年之君，禮，臣下無服，故無子不廟，不廟則不書葬，示一年不二君也。稱卒不地者，降成君也。日者，為臣子

恩錄之也。殺不去日見隱者，降子赤也。○去，起呂反。見，賢徧反。【疏】注「未踰」至「二君也」。○解云：案《喪服》「不杖期」章之內，有為君之長子，臣下猶服之，況為嗣君而言無服者？正以為長子之時，其臣下從君而服之，若其為嗣君，則無從服之義，是以知其無服矣。不但如此，作君長子之時，其臣皆吉，故得為之服期，若作未踰年之君，臣下皆為前君服斬，寧得更為之服乎？若還服期，即是廢重服輕，若為斬衰三年，即違一年不二君之義故也。○注「稱卒不」至「之也」。○解云：案隱公、閔公，皆是成君而亦不地，故隱十一年傳云：「公薨何以不地？不忍言也。」故彼注云：「不忍言其僵尸之處。」今子般亦殺死，正合不書地，而言降成君者，欲道好死者亦不書地，所以降成君故也。其好死者，即襄三十一年「秋，九月，癸巳，子野卒」是也。○注「殺不」至「子赤也」。○解云：即文十八年「冬，十月，子卒」，傳云：「子卒者孰謂？」子赤也。何以不日？隱之也。何隱爾？弑也。弑則何以不日？不忍言也。彼注云「所聞世臣子恩痛

①「謂」，杉浦校：「單疏鈔本重『謂』字。」今按：文公十八年傳重「謂」字，單疏鈔本是。

王父深厚，故不忍言其日，與子般異」是也。然則子般猶是所傳聞之世，恩降于子赤，是以忍言日也。

公子慶父如齊。如齊者，奔也。是時季子新

酖牙，慶父雖歸獄鄧扈樂，猶不自信於季子，故出也。不言奔者，起季子不探其情，不暴其罪。○樂，音洛。暴，步卜反。【疏】注「慶父」至「扈樂」。○解云：其歸獄鄧扈樂之事，在閔元年傳也。

狄伐邢。

閔公起元年，盡二年

元年，春，王正月。公何以不言即

位？繼弑君不言即位。復發傳者，嫌繼未踰年

君義異故也。明當隱之如一。○弑，申志反。【疏】注

「復發」至「如一」。○解云：則莊元年傳云：「公何以不

言即位？《春秋》君子不言即位。」①君弑則子何以不言

即位？隱之也。孰隱？隱子也。」然則莊元年已有此

傳，今復發之者，正嫌此繼未踰年之君，異于成君故也。

其異一成一未而不異之者，②明臣子隱痛之當如一矣。

若然，案莊公繼弑，弑是齊侯；今閔公繼弑，弑是慶父。

何氏寧知不嫌此異，而知爲所繼之君成與不成者，正以解即位之義，欲道後君痛其見弑，不忍即其位處，明據恩之深淺，無弑者內外之義故也。孰繼？據子般弑不見。○見，賢徧反。繼子般也。孰弑子般？

慶父也。殺公子牙，今將爾，季子不免，慶父弑君何以不誅？將而不免，遏惡也。

既而不可及，因獄有所歸，不探其情而誅焉，親親之道也。論季子當從議親之辟，猶律親親

得相首匿，當與叔孫得臣有差。○探，他南反。辟，婢亦

反。匿，女亦反。③【疏】注「論季子」至「首匿」。○解

云：謂季子緩縱慶父之事，當從《周禮·小司徒》議親之

法，④非其罪也。○注「當與」至「有差」。○解云：即宣

五年「叔孫得臣卒」，注云：「不日者，知公子遂欲弑君，爲

①「君」下，杉浦校：「單疏鈔本有「弑」字。毛本無。阮氏校勘記云：「「君」下脫「弑」字。」阮說是。」

②「其異」，阮校：「當作「其義」。」

③「亦」，宋本《釋文》作「力」。

④「徒」，孫校：當爲「寇」。

人臣知賊而不言，明當誅。」則得臣與遂不宜相隱，是以罪之。今慶父、季友親則親矣，得相首匿，是以舍之，故言當與叔孫得臣有差矣。惡乎歸獄？歸獄僕人

鄧扈樂。曷為歸獄僕人鄧扈樂？據師還也。

○惡，音烏。扈樂，音洛，或如字。【疏】注「據師還也」。

○解云：即莊八年「秋，師還」，傳云：「還者何？善辭也。此滅同姓，何善爾？非師之罪也。」注云：「明君之

使，重在君。」然則莊八年尊者使師滅同姓，而歸善於師，

今則尊者使樂殺子般，而反歸惡於樂，故難之。莊公

存之時，樂曾淫于宮中，子般執而鞭之。

莊公死，慶父謂樂曰：「般之辱爾，國人莫

不知，盍弑之矣？」^①使弑子般，然後誅鄧

扈樂而歸獄焉。殺鄧扈樂不書者，微也。○曾，才

能反。盍，戶臘反。【疏】「樂曾淫于宮中」。○解云：即

《左氏傳》云「雩，講於梁氏，女公子觀之，圉人犖自牆外與之戲」也者，得與此合。季子至而不變也。至

者，聞君弑，從家至朝。季子知樂勢不能獨弑，而不變正

其真偽。

齊人救邢。

夏，六月，辛酉，葬我君莊公。

秋，八月，公及齊侯盟于洛姑。時慶父內

則素得權重，外則出奔彊齊，恐為國家禍亂，故季子如齊聞之，奉閔公託齊桓為此盟。下書歸者，使與君致同。

主書者，起託君也。【疏】注「故季子如齊聞之」。○解

云：正以下經云「季子來歸」，故知時如齊矣。○注「書

歸」至「致同」。○解云：正以大夫歸例不書，而下經書

歸，故如此解也。○注「主書者起託君也」。○解云：謂

主書此盟，又下文即書「季子來歸」者，欲起季子託君于齊侯矣。所以不書公至自洛者，^②桓之會不致故也。

季子來歸。其稱季子何？據如陳名不稱

季，卒不稱子。【疏】注「據如陳名不稱季」。○解云：即

莊二十七年「公子友如陳，葬原仲」是也。○注「不稱

①「盍弑」，阮校：「《釋文》作『盍殺』，唐石經此『弑』字

磨改，亦本作『殺』。按：此作『殺』是也。」

②「洛」下，單疏鈔本、毛本有「姑」字。今按：經文作

「公及齊侯盟于洛姑」，則作「洛姑」是。

子」。^①○解云：即僖十六年「三月，壬申，公子季友卒」是也。賢也。嫌季子不探誅慶父有甚惡，故復於託君

安國賢之。所以輕歸獄，顯所當任，達其功。不稱季友者，明齊繼魯，本感洛姑之託，故令與高子俱稱子，起其事。○令，力呈反。【疏】注「嫌季」至「賢之」。○解云：

嫌有趙盾不誅趙穿而獲弑君之惡，故曰「甚惡」也。○注「所以」至「其功」。○解云：所以輕歸獄者，欲輕季子往前縱慶父歸獄之過矣。言顯所當任者，謂書曰「季子來歸」，明託君而還，欲顯當存國之任矣。言達其功者，欲達其存國之功矣。○注「不稱」至「其事」。○解云：以僖十六年卒時稱季友，故決之。但當稱季，足得起其賢，而稱子者，見義故也。何者？案下二年「冬，齊高子來盟」，傳云「高子者何？齊大夫也」。「何以不名？喜之也。何喜爾？正我也。其正我奈何？莊公死，子般弑，閔公弑，比三君死，曠年無君，設以齊取魯，^②不興師，徒以言而已矣。桓公使高子將南陽之甲，立僖公而城魯」，「魯人至今以爲美談，曰：尤望高子也」。^③然則齊侯所以遣高子存魯而立君繼之者，由此洛姑之託，故令季子與高子同稱子，起見其事矣。其言「來歸」

何？據召歸不書，隱如言至。【疏】注「據召歸不書」。

○解云：即莊二十七年「公子友如陳，葬原仲」，莊三十二年傳云「莊公召季子，季子至而授之以國政」，彼注云「至不書者，內大夫出與歸不兩書」是也。○注「隱如言至」。

○解云：即昭十四年「隱如至自晉」是也。喜之也。

季子來歸則國安，故喜之而變至加錄云爾，蓋與賢相起。言歸者，主爲喜出。言來者，起從齊自外來。盟不日，公不致者，桓之盟不日，其會不致，信之也。○主爲，于僞反，下文注皆同。【疏】注「蓋與賢相起」。○解云：謂稱字所以賢之，亦見其喜矣。變至言歸，所以喜之，亦起其賢，故云「與賢相起」耳。○注「桓之盟不日」至「之也」。○解云：莊十三年傳文。

冬，齊仲孫來。齊仲孫者何？公子慶父也。公子慶父則曷爲謂之齊仲孫？繫之齊也。曷爲繫之齊？據樂盈出奔楚，還不

①「注」下，杉浦校：「單疏鈔本有『卒』字，與注合。」

②「取魯」下，阮校：「傳有『曾』字。」

③「尤」，杉浦校：「單疏鈔本作『猶』，毛本亦然。」

繫楚。【疏】「齊仲孫者何」。○解云：欲道齊人，經不言使，欲言己臣，而繼于齊，^①故執不知問。○注「據樂」至「不繫楚」。○解云：即襄二十一年「秋，晉欒盈出奔楚」，至襄二十三年夏，^②欒盈復入于晉，入于曲沃「是也」。^③外之也。曷爲外之？據俱出奔遠也。^④《春秋》爲尊者諱，爲閔公諱受賊人也。爲親者諱，爲季子親親而受之，故諱也。【疏】注「爲季」至「諱也」。○解云：謂季子是閔公之親親，而反受其賊，故爲諱耳。爲賢者諱。以季子有遏牙不殺慶父之賢，故爲諱之。子女子曰：「以『春秋』爲『春秋』」，以史記氏族爲《春秋》，言古謂史記爲「春秋」。【疏】注「以史記氏族爲春秋」。○解云：謂以史記人之氏族而爲《春秋》。○注「言古」至「春秋」。○解云：夫子修史記爲《春秋》，今言以「春秋」爲《春秋》，則史記舊有「春秋」之名，是言古者謂史記爲「春秋」矣。齊無仲孫，其諸吾仲孫與？「齊有高、國、崔，魯有仲孫氏，亦足以知魯仲孫言仲孫者，以後所氏起其事明。主書者，賊不宜來，因以起上如齊，實殺君出奔。○子女子，音汝。【疏】注「齊有高國崔」。○解云：即國夏、高固、高張、崔杼之屬是矣。

○注「魯有仲孫氏」。○解云：即仲孫蔑、仲孫羯之屬是也。○注「主書」至「出奔」。○解云：正以經書其來，見不宜來，則知上如齊者，是其犯罪而去矣。莊三十二年冬，「公子慶父如齊」者，即上如齊之經矣。

二年，春，王正月，齊人遷陽。不爲桓公

諱者，功未足以覆比滅人之惡也。【疏】「春王正月齊人遷陽」。○解云：莊十年「三月，宋人遷宿」，彼注云：「月者，遷取王封，當與滅人同罪。」然則《春秋》之例，大國之遷例月，小國書時，即僖三十一年「十有二月，衛遷于帝丘」，昭九年春「許遷于夷」之屬是也。^⑤而今陽爲小國，齊人遷之，亦是遷取王封，當與滅人同罪，故云月矣。云云之說，在莊十年。○注「不爲」至「惡也」。○解云：莊十年「冬，十月，齊師滅譚」，莊十三年「夏，六月，齊人滅

①「繼」，阮校引盧文弨曰：「即『繫』」，《後漢書》多如此。

②「夏」下，杉浦校：「單疏鈔本有『晉』字。」今按：襄公二十三年經有「晉」字。

③「入」，原作「夫」，今據京都本、再造善本、中華本改。

④「遠」，阮校：「鄂本『遠』作『還』，諸本皆誤，當訂正。」

⑤「于」，原作「千」，今據京都本、再造善本改。

遂」。今遷取王封，因而臣之，雖當時未滅，終不得在，故云比滅人之惡矣。如此注者，正決僖十七年「夏，滅項」，傳云「孰滅之？」齊滅之。曷爲不言齊滅之？爲桓公諱也。《春秋》爲賢者諱，「桓公嘗有繼絕存亡之功，故君子爲之諱」。然則彼經不言齊，而此言齊人，故決之。

夏，五月，乙酉，吉禘于莊公。其言吉

何？據禘于大廟不言吉。○吉禘，大計反。大廟，音

泰，下同。【疏】注「據禘」至「言吉」。○解云：即僖八年

「七月，禘于大廟，用致夫人」是也。言吉者，未可以

吉也。都未可以吉祭。經舉重，不書「禘于大廟」，嫌獨

莊公不當禘，于大廟可禘者，故加吉，明大廟皆不當。

【疏】注「都未可以吉祭」。○解云：在三年之內，莊公及

始祖之廟，皆未可以吉祭，故言「都」爾。○注「經舉重不

書」。○解云：《春秋》之義，常事不書，有善惡者，乃始錄

而美刺之。今既已舉重，特書「于莊公」，不書「于大廟」，

則嫌莊公一廟獨不當禘，大廟便可禘矣。然莊公卑于始

祖，而言舉重者，言三年之內作吉祭之時，莊公最不宜

吉，故言「舉重」，不謂莊公尊于始祖也。曷爲未可以

吉？據三年也。【疏】注「據三年也」。○解云：莊三

十二年八月公薨，至今年五月，已入三年之竟，故言據三年也。未三年也。禮，禘祫從先君數，朝聘從今君

數，三年喪畢，遭禘則禘，遭祫則祫。○君數，所主反，下

同。祫，音洽。【疏】「未三年也」。○解云：謂未滿二十

五月也。○注「禮禘祫從先君數」。○解云：謂爲禘祫之

祭，合從先君死時日月而數之，若滿三年已后，遭禘則

禘，①遭祫即祫耳。○注「朝聘從今君數」。○解云：謂

從今君即位以后，數其年歲，制爲朝聘之數。三年矣，

曷爲謂之未三年？三年之喪，實以二十

五月。時莊公薨至是適二十二月。所以必二十五

月者，取期再期，恩倍，漸三年也。孔子曰：「子生三年，然

後免于父母之懷。夫三年之喪，天下之通喪。」《禮·士

虞·記》曰：「期而小祥，曰薦此常事。又期而大祥，曰薦

此常事。」②中月而禫，是月也，吉祭，尤未配。」是月者，二

①「若滿三年已后遭禘則禘」，阮校：「閩、監、毛本『則』作『即』，與下句同。按：『后』當作『後』。」

②「常」，阮校：「宋本、閩、監、毛本『常』作『祥』。按：疏標起訖云『注又期至祥事』，與今《儀禮》同，此作『常』，蓋涉上文而誤。」

十七月也。傳言二十五月者，在二十五月外可不議。○取期，音基，下同。禫，大感反。【疏】注「所以」至「三年也」。○解云：二十五月，是再期矣，故曰「取期再期矣」。父母之喪，倍於期者之恩，正當其禮數，故曰其恩倍矣。言「漸三年也」者，謂二十五月漸得三年之竟，故云「漸三年也」。議如得漸二君之遺教。①○注「禮士」至「常事」。○解云：彼注云「小祥，祭名。祥，吉也」，「古文期皆作基」，「常者，期而祭，禮」。②古文常爲祥。○注「又期」至「祥事」。○解云：亦彼文。○注「中月而禫，是月也，吉祭，尤未配」者，亦彼文。彼注云「中尤間也。禫，祭名也。與大祥間一月，自喪至此凡二十七月。禫之爲言澹，澹然平安意也」，③是月，是禫月。④當四時之祭月則祭，尤未以某妃配某氏，哀未忘也」。其言「于莊公」何？據禫于大廟不言周公，祫僖公不言僖宮。⑤

【疏】注「據禫」至「周公」。○解云：即僖八年「秋，七月，禫于大廟，用致夫人」是也。○注「祫僖」至「僖宮」。○解云：祫僖公不言僖宮，定八年「從祀先公」，傳云：「從祀者何？順祀也。文公逆祀，去者三人。定公順祀，叛者五人。」彼注云「諫不以禮而去曰叛」。云「不書禫者，后祫亦順，非獨禫也」，「不言僖公者，閔公亦得其順」。

是其祫僖公不言僖公者，⑥即文二年「八月，丁卯，大事于大廟，躋僖公」，傳云「大事者何？大祫也」者是也。未可以稱宮廟也。時閔公以莊公在三年之中，未可入大廟，禫之于新宮，故不稱宮廟，明皆非也。曷爲未可以稱宮廟？據言禫也。【疏】注「據言禫也」。○解云：正以禫是吉祭之稱，既得言禫，何故不得稱宮廟？故難之。在三年之中矣。當思慕悲哀，未可以鬼神事之。【疏】注「未可以鬼神事之」。○解云：正言以宮廟者，鬼神居之之稱故也。吉禫于莊公何以書？譏。何譏爾？譏始不三年也。與託始同義。【疏】注「與託始同義」。○解云：案隱二年：「九月，紀履」

①「議」，阮校：「當作『義』」。

②「禮」下，《儀禮》注今有「也」字。

③「爲」，《儀禮》注無此字。

④「月」下，《儀禮》注有「也」字。

⑤「僖宮」，阮校：「段玉裁校本：『宮』乃『公』誤。」

按：疏引定八年注作「僖公」，彼疏云「不言從祀僖公」。

⑥「不言僖公」，杉浦校：「單疏鈔本『公』作『宮』」。

綸來逆女。不書，^①此何以書？譏。何譏爾？譏始不親迎也。始不親迎昉於此乎？前此矣。前此則曷爲始乎此？託始焉爾。曷爲託始焉爾？《春秋》之始也。」然則此亦宜云：始不三年昉於此乎？前此矣。前此則曷爲始乎此？託始焉爾。曷爲託始焉爾？《春秋》之始也，故云與託始同義矣。而傳不言託始，蓋省文，從可知也。

秋，八月，辛丑，公薨。公薨何以不地？隱之也。何隱爾？弑也。^②孰弑之？慶父也。殺公子牙，令將爾，季子不免，慶父弑二君，何以不誅？將而不免，遏惡也。既而不可及，緩追逸賊，親親之道也。與不探其情同義。不書葬者，賊未討。○弑，音試，下及注同。【疏】「公薨何以不地」。○解云：隱十一年傳云「公薨何以不地」，注云：「據莊公薨于路寢。」然則此傳云「公薨何以不地」者，亦據莊公，但從彼注省文故也。○注「與不」至「同義」。○解云：即上元年傳云：「孰弑子般？慶父也。殺公子牙，令將爾，季子不免，慶父弑君何以不誅？將而不免，遏惡也。既而不可及，因

獄有所歸，不探其情而誅焉，親親之道也。」○注「不書葬賊未討」。○解云：即隱十一年「冬，十有一月，壬辰，公薨」，傳云「何以不書葬？隱之也。何隱爾？弑也。弑則何以不書葬？《春秋》君弑賊不討，不書葬，以爲无臣子也」是也。而言未者，欲道於後討得之。即僖元年傳「於是抗輶經而死」者是也。

九月，夫人姜氏孫于邾婁。爲淫二叔，殺二嗣子出奔。不如文姜于出奔貶之者，爲內臣子明其義，不得以子絕母。凡公夫人奔例日，此月者，有罪。【疏】注「不如文姜」至「絕母」。○解云：莊元年「三月，夫人孫于齊」，傳云：「夫人何以不稱姜氏？貶。曷爲貶？與弑公也。」是於出時貶之之文也。「爲內臣子明其義，不得以子絕母」者，正謂此處見其義而已。不謂此夫人卒，

① 「來逆女不書」，阮校：「何校本『女』下有『外逆女』三字是也，與隱二年傳合。」杉浦校：「單疏鈔本『女』下有『傳云外逆女』五字。」

② 「弑」，阮校：「唐石經、諸本同。《釋文》作『殺』，云『音試，下及注同』。」今按：宋本《釋文》亦作「弑」，與阮校所據本不同。

竟不絕也。故僖元年「夫人氏之喪」，傳云「夫人何以不稱姜氏？貶。曷爲貶？與弑公也。然則曷爲不於弑焉貶？貶必以其重者，①莫重乎以其喪至也」者，②是其亦貶之矣。○注「凡公」至「有罪」。○解云：正以昭二十五年「九月，己亥，公孫于齊」而書日，則知夫人之孫亦宜然。而此及文姜之孫皆書月，案此二人皆有罪，故如此注之耳。

公子慶父出奔莒。慶父弑二君，不當復見。

所以復見者，起季子緩追逸賊也。不日者，內大夫奔例，無罪者日，有罪者月，外大夫奔例皆時。○當復，扶又反，下同。見，賢徧反，③下文「復見」同。④【疏】注「慶父」至「逸賊也」。○解云：知弑父之人不合復見者，⑤正見宣六年「春，晉趙盾、衛孫免侵陳」，傳云「趙盾弑君，此其復見何」，復注云「據宋督、⑥鄭歸生、齊崔杼弑其君，後不復見」。傳又曰「親弑君者，趙穿也」，彼注云「復見趙盾者，欲起親弑者趙穿，非盾」是。○注「不日者」至「皆時」。○解云：襄二十三年「冬，十月，乙亥，臧孫紇出奔邾婁」，是無罪書日也。其有罪書月者，即昭十二年「冬，十月，公子整出奔齊」之屬，及此文皆是。而文八年「公孫敖如京師，不至復。丙戌，奔莒」。案傳云「不可使往

也」，則是有罪，而書「丙戌」者，彼注云「日者，嫌赦罪明，則起君弱，故諱使若無罪」者是也。其外大夫奔例皆時者，不問有罪與無罪，即襄二十七年夏，「衛侯之弟縶出奔晉」，⑦二十八年「夏，衛石惡出奔晉」，「冬，齊慶封來奔」之屬是也。

冬，齊高子來盟。高子者何？齊大夫也。

以有高僂也。【疏】「高子者何」。○解云：欲言

①「以」，阮校：「何校本作「於」，與僖元年注合。」

②「以其」，阮校：「傳作「其以」，此處誤倒。」杉浦校：「單疏鈔本作「其以」。」

③「徧」，原作「徧」，今據余本、再造善本、宋本《釋文》改。

④「復見」，原作「後見」。京都本、宋本《釋文》作「復見」。下文有「復見」，無「後見」，則作「復見」是，今據改。

⑤「父」，閣本作「君」。注言「慶父弑二君，不當復見」，「父」當「君」之訛。

⑥「復」，當誤，閣本作「彼」是。

⑦「縛」，京都本、再造善本作「縛」。阮校：「此本「縛」誤「縛」。」

齊侯，而經稱子，欲言大夫，名不書見經，故執不知問。

○注「以有高僂也」。○解云：即莊二十二年「秋，七月，

丙申，及齊高僂盟于防」是也。何以不稱使？據鄭

伯使其弟語來盟。【疏】注「據鄭」至「來盟」。○解云：在

桓十四年夏。我無君也。時閔公弑，僖公未立，故正

其義，明君臣無相適之道也。《春秋》謹於別尊卑，理嫌

疑，故絕去使文，以起事張例，則所謂君不使乎大夫也。

○別，彼列反。故絕去，起呂反，下「欲去」同。【疏】注

「所謂君不使乎大夫也」。○解云：成二年「齊侯使國佐

如師」之下，傳云「君不行使乎大夫」，^①此其行使乎大夫

何？佚獲「是也」。然則何以不名？據國佐盟名。

【疏】注「據國佐盟名」。○解云：即成二年「及國佐盟于

袁婁」者是也。喜之也。何喜爾？正我也。

其正我奈何？莊公死，子般弑，閔公弑，

比三君死，曠年無君。與曠年無君無異。【疏】注

「與曠年無君無異」。○解云：正以莊公死時子般即位，

子般弑後閔公即位，閔公弑後僖公即位，君常不絕。而

傳言「曠年無君」者，正以三年之內，三君比死，與曠年無

君無異，非實無君也。設以齊取魯，曾不興師，

徒以言而已矣。設時勢然。桓公使高子將南

陽之甲，南陽，齊下邑。甲，革，皆鎧冑也。○革，更百

反。鎧，苦愛反。冑，直又反。立僖公而城魯。或

曰：自鹿門至于爭門者是也。^②或曰：自

爭門至于吏門者是也。魯人至今以為美

談，曰：猶望高子也。久闊思相見者，引此為喻，

美談至今不絕也。立僖公城魯不書者，諱微弱。喜而加

高子者，美大齊桓繼絕于魯，故尊其使，起其功，明得子

續父之道。○鹿門，魯南城東門也。○其使，^③所吏反。

①「行」，阮校：「今本傳脫，疏引皆有。」

②「自鹿門至於爭門者是也」，阮校：「唐石經、諸本同。

《說文》：「淨，魯北城門池也。從水，爭聲。」士耕切，

又才性切。許據《公羊》當作「淨門」，以水名其門也。

何注本省作「爭」。「自鹿門至於爭門者」，自南門至

於北門也。今按：段玉裁《說文解字注》曰：「淨者，

北城門之池，其門曰爭門，則其池曰淨，從爭旁水

也。」

③「○」，據宋本《釋文》，「鹿門魯南城東門也其使所吏

反」皆《釋文》文，不當以「○」分割。

【疏】注「明得」至「之道」。○解云：凡人子之道，宜繼祖禰之功不絕之。今桓公繼于魯，正得續父功德之義，故尊其使而稱子耳，言明其得人子續其人父功德之道也。

十有二月，狄入衛。

鄭棄其師。鄭棄其師者何？連國者，并

問稱國。【疏】「鄭棄其師者何」。○解云：正以言異常例，故執不知問。惡其將也。以言棄師。○惡其，烏

路反，下及注同。將也，子匠反，下同。鄭伯惡高

克，使之將，逐而不納，棄師之道也。鄭伯素

惡高克，欲去之無由，使將師救衛，隨後逐之，因將師而去。其本雖逐高克，實棄師之道，故不書逐高克，舉棄師

為重，猶趙盾加弑也。①不解國者，重衆從國體錄可知。

繫閔公篇于莊公下者，②子未三年，無改於父之道。傳

曰：「則曷為於其封內三年稱子」，「錄孝子之心」，③則三年不忍當也。○盾，徒本反。【疏】注「猶趙盾加弑」。

○解云：謂實逐克，但舉棄師為重，實趙穿弑君，但舉加弑為重相似。趙盾加弑在宣二年。○注「子未三年」。

○解云：謂莊三十二年八月薨，至閔二年八月薨時，始二十五月，故曰未三年也。○注「傳曰」至「忍當也」。○解

云：文九年傳文也。

監本附音春秋公羊注疏閔公卷第九

①「殺」，余本作「弑」。

②「繫閔公篇于莊公下者」，阮校：「《漢書·藝文志》

《公羊》、《穀梁》二家經及傳各十一卷者，繫閔公篇於莊公下故也。宋王儉《七志》、梁阮孝緒《七錄》皆云

何注十一卷，皆以閔附莊也。唐石經於閔公傳末題「春秋公羊卷第三」，於僖公第五之下附注卷四，蓋據晉宋古本，皆十一卷。」

③「錄」，余本作「緣」，與文公九年傳合。

監本附音春秋公羊注疏僖公卷第十

起元年，盡七年

何休學

元年，春，王正月。公何以不言即位？據文公言即位。繼弑君，子不言即位。

此非子也，其稱子何？僖公者，閔公庶兄。據閔公繼子般，傳不言子。○弑，申志反。臣子一例也。僖公繼成君，閔公繼未踰年君。禮，諸侯臣諸父兄弟，以臣之繼君，猶子之繼父也，其服皆斬衰，故傳稱臣子一例。○衰，七雷反。

齊師、宋師、曹師次于聶北，救邢。救邢，^①救不言次，此其言次何？據夏師救齊不言次。○聶，女涉反。【疏】注「據夏」至「言次」。○解云：即下十八年「夏，師救齊」是也。不及事也。不及事者何？邢已亡矣。刺其救急舒緩，使至於

亡，故錄之止次以起之。【疏】「不及事者何」。○解云：

正以次者，閒暇之名，而言不及事，似於義違，故執不知問。孰亡之？蓋狄滅之。以上有狄伐邢。【疏】

注「以上有狄伐邢」者。○解云：即莊三十二年冬，「狄伐邢」者是。曷為不言狄滅之？據狄滅溫言滅。

【疏】注「據狄滅溫言滅」者。○解云：即下十年春，「狄滅溫。溫子奔衛」者是。為桓公諱也。曷為為桓

公諱？據徐人取舒、晉滅夏陽、楚滅黃皆不諱。○為

桓，于僞反，下「為桓」、「曷為」，并下注「為諱」、「為桓」，

「為內」，^②「為僖」皆同。夏，戶雅反。【疏】注「據徐人取舒」。○解云：即下三年夏，「徐人取舒」者是也。○注

「晉滅夏陽」。^③○解云：即下二年「虞師、晉師滅夏陽」是也。○注「楚滅黃」。○解云：即下十二年「夏，楚人滅

^①「救邢救邢」，阮校：「唐石經、鄂本『救邢』字不疊，此本誤衍。」

^②「內」，原作「肉」，今據余本、京都本、再造善本、中華本、閣本改。

^③「陽」下，原有「云」字，乃單疏本之格式遺存者，今據京都本、再造善本、中華本刪。

黃」是也。然即彼三事，^①皆不為桓公諱者，「取舒」之下，何氏云「不為桓諱者，刺其不救也」是也。今此實救，故為之諱耳。上無天子，下無方伯，天下諸侯有相滅亡者，桓公不能救，則桓公恥之。故以為諱，所以醇其能以治世自任而厚責之。【疏】「上無」至「方伯」。○解云：「上無天子，下無方伯」，莊四年何氏云「有而無益于治曰無，猶《易》曰『闕其無人』者是也」。○注「以治世自任」者，^②猶言以天子治世為己任矣。曷

為先言次，而後言救？據叔孫豹先言救。【疏】

注「據叔」至「言救」。○解云：即襄二十三年「秋，齊侯伐衛，遂伐晉。八月，叔孫豹帥師救晉，次于雍榆」是也。^③君也。叔孫豹，臣也。當先通君命，故先言救。今此先

言次，知實諸侯。君則其稱師何？不與諸侯專封也。故沒君文，但舉師而已。曷為不與？

據狄滅之，為桓公諱。實與，不書所封歸是也。【疏】

注「不書」至「是也」。○解云：昭十三年秋，「蔡侯廬歸于蔡。陳侯吳歸于陳」，傳云：「此皆滅國也，其言歸何？不與諸侯專封也。」彼注云：「故使若有國自歸者也。名

者，專受其封當誅。」然則彼經書所封歸，是不與楚專封，則知此經不書所封歸者，與齊桓專封明矣。若書所封歸，宜言邢侯歸于邢矣。而文不與。文曷為不與？據「實與」也。【疏】「而文不與」。○解云：連上句讀之。諸侯之義，不得專封也。此道大平制。

○大，音泰。【疏】注「此道大平制」。○解云：正以《春秋》作義，實與齊桓專封，而言諸侯之義不得專封，故知是大平制也。諸侯之義不得專封，則其曰「實與」之何？上無天子，下無方伯，天下諸侯有相滅亡者，力能救之，則救之可也。主書者，起文從實也。【疏】注「主書」至「實也」。○解云：謂雖文不與，其義實與，故言起文從實也。

^①「即」，阮校：「何校本作『則』。」

^②「世」，原作「出」。杉浦校：「單疏鈔本作『世』。」據上何注作「以治世自任」，則「出」當「世」之訛，今據改。

^③「榆」，阮校：「浦鍾云：『榆，《左傳》字，此當作『渝』。』按：浦云是也。襄廿三年《釋文》亦云：『渝，《左傳》作『榆』。』今按：《公羊傳》襄公二十三年作「次于雍榆」，《左傳》作「次于雍榆」，則作「渝」是。

夏，六月，邢遷于陳儀。遷者何？其

意也。其意自欲遷，時邢創畏狄兵，更欲依險阻。○陳

儀，《左氏》作「夷儀」。【疏】「遷者何」。○解云：欲言自

遷，實齊遷之，欲言齊遷，而作自遷之文，故執不知問。

遷之者何？非其意也。謂宋人遷宿也。書者，

譏之也。王者封諸侯，必居土中，所以教化者平，貢賦者

均，在德不在險，其後爲衛所滅是也。遷例大國月，重煩

勞也，小國時。此小國月者，霸者所助城，故與大國同。

【疏】注「謂宋人遷宿也」。○解云：即莊十年「三月，宋人

遷宿」是也。案彼傳云：「遷之者何？不通也。以地還

之也。」今又發之者，正以此有自遷之文，故取此對之也。

○注「王者」至「土中」。○解云：謂各處其土中，不謂據

天下。○注「其後」至「是也」。○解云：即二十五年「春，

王正月，丙午，^①衛侯燬滅邢」是也。○注「遷例大國月」。

○解云：即下三十一年「十有二月，衛遷于帝丘」之屬是

也。○注「小國時」。○解云：即昭九年春，「許遷于夷」

之屬是也。

齊師、宋師、曹師城邢。此一事也，曷

爲復言齊師、宋師、曹師？據首戴前目而後凡。

○復言，扶又反，下同。【疏】注「據首」至「後凡」。○解

云：即下五年夏「公及齊侯、宋公、陳侯、衛侯、鄭伯、許

男、曹伯會王世子于首戴」，「秋，八月，諸侯盟于首戴」是

也。不復言師，則無以知其爲一事也。言諸

師，則嫌與首戴同，嫌實師。言諸侯，則嫌與緣陵同。嫌

歸聞其遷，更與諸侯來城之，未必反故人也，^②故順上文，

則知桓公宿留城之爲一事也。【疏】注「言諸師」至「實

師」。○解云：首戴之會，歷序齊師、宋公之屬，^③下文總

道諸侯，更是實諸侯。^④今此亦上歷序齊師之屬，若下文

直總言諸師，則與首戴同，嫌是實師，非必齊侯、宋公等，

^①「午」，原作「年」，今據僖公二十五年經及京都本、閩
本改。

^②「入」，阮校：「鄂本元年「入」作「人」，此本疏中同，當
據正。按：「故人」者，仍是齊、宋、曹也，「反故人」言

仍是救邢之三國。」

^③「師」，杉浦校：「單疏鈔本作「侯」，是。」

^④「更」，杉浦校：「單疏鈔本作「便」。」

是以得序之，^①以順上文也。○注「言諸侯」至「人也」。○解云：即下十三年「公會齊侯、宋公、陳侯、衛侯、鄭伯、許男、曹伯于鹹」，十四年「春，諸侯城緣陵」是。時會諸侯，各自還國，至十四年春更來城之，故此復注云：「言諸侯，則嫌與緣陵同。嫌歸聞其遷，更與諸侯來城之，未必反故人也。」○注「故順」至「事也」。○解云：宿，音須就反。留，音盧胄反。^②案十四年《穀梁傳》曰：「其曰諸侯，散辭也。」范氏云：「直曰諸侯，無大小之序，是各自欲城，無總一之者，非伯者所制，故曰散辭。」傳又曰：「聚而曰散，何也？」范氏云：「據言諸侯城，則是聚。」傳又云：「諸侯城，有散辭也，桓德衰矣。」范氏云：「言諸侯城，則非伯者之為可知也。齊桓德衰，所以散也。」何休曰：「案先是盟亦言諸侯，非散也。又《穀梁》美九年諸侯盟于葵丘，即散，何以美之？於義《穀梁》為短。」然則何氏彼處廢《穀梁》不聽為散辭，而此所引似作散辭者，何氏之意，直以言諸侯者，見桓德衰，待諸侯然後能城之，故嫌《穀梁》以為散辭耳。今此注正道緣陵之諸侯，十三年鹹之會各自歸國，十四年復來城之，仍自不道十四年諸侯為散辭矣。

秋，七月，戊辰，夫人姜氏薨于夷，齊

人以歸。夷者何？齊地也。齊地，則其

言「齊人以歸」何？據從國中歸不當書，邾婁人執

鄫子，不書以歸是也。○鄫，似陵反。【疏】「夷者何」。

○解云：夫人之薨，例不言地，今言「于夷」，故執不知問。

○注「邾婁」至「是也」。○解云：即下十九年「夏，六月，

宋人、曹人、邾婁人盟于曹南。鄫子會盟于邾婁」，「己

酉，邾婁人執鄫子用之」是。夫人薨于夷，則齊人

以歸。夫人所以薨于夷者，齊人以歸至夷。夫人薨

于夷，則齊人曷為以歸？據上說夫人薨于夷

者，齊人以歸至夷也。齊人曷為故以歸至于夷。桓公

召而縊殺之。先言薨，後言以歸，而不言喪者，起桓

公召夫人于邾婁，歸殺之于夷，因為內諱恥，使若夫人自

薨于夷，然後齊人以歸者也。主書者，從內不絕錄，因見

桓公行霸王，誅不阿親親，疾夫人淫泆二叔，殺二嗣子而

①「得」，阮校引浦鏜云：「當『復』字誤。」

②「宿音須就反留音盧胄反」，阮校：「此本十字略，旁注。」杉浦校：「單疏鈔本『音須就反』四字，『音盧胄反』四字並夾注。」

殺之。○縊，一賜反，一本作「搯」，於革反。見，賢徧反。洪，音逸。【疏】注「主書」至「殺之」。^①○解云：即閔二年「九月，夫人姜氏孫于邾婁」，注云「不如文姜于出奔貶之者，爲內臣子明其義，不得以子絕母」者是。

楚人伐鄭。楚稱人者，爲僖公諱與夷狄交婚，

故進使若中國，又明嫁娶當慕賢者。^②【疏】注「楚稱人者」。○解云：欲對莊二十八年「秋，荆伐鄭」之經也。○注「爲僖」至「交婚」。○解云：即下八年「秋，七月，禘于大廟，用致夫人」，傳云「夫人何以不稱姜氏」，「譏以妾爲妻也。其言以妾爲妻奈何？蓋脅于齊媵女之先至者也」。彼注云「僖公本聘楚女爲嫡，齊女爲媵。齊先致其女，脅僖公使用爲嫡，故從父母辭言致。不書夫人及楚女至者，起齊先致其女，然後脅魯使立也。楚女未至而豫廢，故皆不得以夫人至書也」者，是其與夷狄交婚之事。○注「故進使若中國」。○解云：正以稱人爲楚進稱故也。

八月，公會齊侯、宋公、鄭伯、曹伯、邾

婁人于朐。月者，危公會霸者而與邾婁有辨也。不從有夫人喪出會惡之者，不如危重也。○朐，敕貞反，又

他丁反，《左氏》作「檉」。惡之，烏路反，下同。【疏】「八月」至「于朐」。○解云：「朐」字，《左氏》作「檉」，亦有作「朐」字。○注「月者」至「辨也」。○解云：正以月非大信辭故也。知與邾婁有辨者，即下文「公敗邾婁師于纓」是也。既出尊者之側，而有私爭，故危之。

九月，公敗邾婁師于纓。有夫人喪，不惡

親用兵者，時怨邾婁人以夫人與齊，於喪事無薄故也。○于纓，《左氏》作「偃」。【疏】「九月公敗」至「于纓」。○解云：《左氏》作「偃」字。○注「有夫」至「故也」。○解云：正以僖三十三年「晉人及姜戎敗秦于殽」下，傳云：「襄公親至，^③則其稱人何？貶。曷爲貶？君在乎殯而用師，危不得葬也。」然則彼背殯用兵，貶而危之，今此經云「九月，公敗邾婁師于纓」，與莊十年「春，王正月，公敗齊師于長勺」，夏六月「公敗宋師于乘丘」之屬無異者，時

①「注主書至殺之」，杉浦校：「單疏鈔本作「注主書者從內不絕錄者」。」

②「娶」，原作「聚」，今據余本改。

③「至」，阮校：「浦鏜云：『之』誤『至』。按：浦說是。」杉浦校：「單疏鈔本『至』作『之』。」

於喪事無薄故也。然則公敗邾婁者，爲哀姜復讎也。若然，案莊九年「及齊師戰于乾時」，亦是爲桓公復讎于齊，經不言公，此言公者，彼傳云：「此復讎于大國，^①曷爲使微者？」公也。公則曷爲不言公？不與公復讎也。曷爲不與公復讎？復讎者在下也。」注云：「時實爲不能納子糾伐齊，諸大夫以爲不如以復讎伐之，於是以復讎伐之，非誠心至意，故不與也。」然則此言公者，本出公意故也。

冬，十月，壬午，公子友帥師敗莒師于犁，獲莒挈。莒挈者何？莒大夫也。莒無大夫，此何以書？大季子之獲也。何大乎季子之獲？據獲人當坐。○于犁，力知反，又力兮反，《左氏》作「酈」。莒挈，女居反，一音女加反。一本作「茹」，音同。【疏】「莒挈者何」。○解云：欲言莒君，經不稱子，欲言大夫，莒無大夫，故執不知問。季子治內難以正，謂拒慶父。^②○內難，乃旦反，下同。禦外難以正。其禦外難以正奈何？公子慶父弑閔公，走而之莒，莒人逐之，將由乎

齊，齊人不納。却，反舍于汶水之上，使公子奚斯入請。季子曰：「公子不可以人，人則殺矣。」義不可見賊而不殺。【疏】「將由乎齊」。○解云：欲從齊而自安矣。○「舍于汶水之上」。○解云：舊本皆作「洛」，誤也。何者？今齊魯之間有汶無洛也。奚斯不忍反命于慶父，自南涖，涖，水涯。○^③涖音侯。北面而哭。時慶父自汶水之北。^④慶父聞之曰：「嘻！嘻，發痛語首之聲。○嘻，許其反。【疏】注「嘻發」至「之聲」。○解云：謂發心自痛傷，而以嘻爲語之首也。此奚斯之聲也。諾已。」諾已，皆自畢語。【疏】注「諾已，皆自畢語」。○解云：猶似今人云休，一生罷去已，自畢竟之辭，故云「自畢語」矣。「畢」作「卑」字，誤耳。曰：「吾不得人矣。」於是

- ① 「于」，阮校：「傳作『乎』」。
 ② 「拒」，阮校：「鄂本『拒』作『距』」。
 ③ 「○」，原無，「涖音侯」爲《釋文》語，依例補「○」。
 ④ 「自」，阮校：「鄂本作『在』，此誤。」

抗軻經而死。^①軻，小車轅，冀州以北名之云爾。○

軻，音竹由反，^②車轅也。【疏】於是「至」而死」。○解

云：鄭氏云「慶父軻死」者，正取此文。莒人聞之

曰：「吾已得子之賊矣。」以求賂乎魯。魯時

雖緩追，猶外購求之。○購，古豆反。魯人不與，爲

是興師而伐魯。故與季子獲之。季子待之以

偏戰。傳云爾者，善季子忿不加暴，得君子之道。【疏】

注「傳云」至「之道」。○解云：此待之以偏戰者，即經書

敗文是也。敗者，內戰文耳。莒人可忿，而能結日偏戰。

偏戰，是其不加暴之義，故得君子之道。

十有二月，丁巳，夫人氏之喪至自齊。

夫人何以不稱姜氏？據薨于夷稱姜氏。經有

氏，不但問不稱姜，并言氏者，嫌據夫人婦姜，欲使去氏。

○去，起呂反。【疏】注「經有」至「去氏」。○解云：夫人

婦姜之文，即宣元年「三月，遂以夫人婦姜至自齊」是也。

貶，曷爲貶？據薨于夷不貶。與弑公也。與慶

父共弑閔公。○與殺，音預，又如字，下申志反。【疏】注

「與慶」至「閔公」。○解云：不言子般者，據成君言之，省

文。然則曷爲不於弑焉貶？據酈牙於卒時貶。

【疏】注「據酈」至「時貶」。○解云：即莊三十二年「公子

牙卒」，傳云「何以不稱弟？殺也」是。傳言殺者，言由

其見殺貶之矣。貶必於重者，^③莫重乎其以喪

至也。刑人於市，與衆棄之，故必於臣子集迎之時貶

之。所以明誅得其罪，因正王法所加，臣子不得以夫人

禮治其喪也。貶置氏者，殺子差輕於殺夫，別逆順也。

致者，從書薨，以常文錄之。言自齊者，順上「以歸」文。

○差，初賣反，又初佳反。別，彼列反。【疏】注「刑人」至

「棄之」。○解云：《禮記》文。○注「所以」至「喪也」。○

解云：季子之逸慶父，齊桓之討哀姜，二義相違，而皆善

之者，誅不辟親，王者之道，親親相隱，古今通式。然則

齊桓之討哀姜，得伯者之義，季子之縱慶父，因獄有所

①「抗」，宋本《釋文》作「扼」。「死」，原作「苑」，今據余

本、中華本、閩本改。

②「音」，宋本《釋文》無此字。

③「於重」，阮校：「唐石經、鄂本『於』下有『其』字，此脫。按：閔二年疏引此傳云『貶必於其重者』，亦有

『其』字。」

歸，遂申親親之恩，義各有途，不可為難矣。○注「貶置氏者」。○解云：謂貶而留置其氏矣。○「殺子」至「順也」。^①○解云：言殺子差輕於殺夫者，欲道莊元年「夫人孫于齊」，「姜」、「氏」並去者，正猶殺夫罪重故也。^②言別逆順者，言殺夫之逆，甚於殺子。二事相對而言之，不謂哀姜殺子得為順，是以晉侯、宋公殺世子，皆直稱君而甚之。○注「致者」至「錄之」。○解云：謂不書殺而書薨作常文，是以於歸亦作常文錄之。若公之喪至自齊，至自乾侯之屬。○注「言自」至「歸文」。○解云：其實從夷來，而言「至自齊」，正以上文云「薨於夷，齊人以歸」，故言「至自齊」順之。

二年，春，王正月，城楚丘。孰城？^③

據內城不月，故問之。【疏】注「據內」至「問之」。○解云：內城不月者，即隱七年「夏，城中丘」，襄十九年冬「城西郭」之屬是也。其內城有在日月下者，皆不蒙日月，城衛也。曷為不言城衛？^④據無還文以言城，故當言城衛。^⑤【疏】注「據無」至「城衛」。○解云：舊本「曷為」之下有「不言」二字，今無者，脫也。言以前之經，未有還衛于楚丘之文，今此城之，固當言城衛，不應言城楚丘，故難之。「固」字亦有作「故」字者，言由是之故，當

言城衛。滅也。孰滅之？蓋狄滅之。以上有狄入衛。【疏】滅也。○解云：言正由是時衛國已滅，故不得言衛矣。○注「以上有狄入衛」。○解云：即閏二年冬，「狄入衛」是也。曷為不言狄滅之？為桓公諱也。曷為為桓公諱？上無天子，下無方伯，天下諸侯有相滅亡者，桓公不能

①「殺子至順也」，杉浦校：「單疏鈔本作『注殺子云云』。按：此本上有『注』字，是也。」

②「猶」，阮校：「浦鏜云：疑『由』字誤。」

③「孰城」，阮校：「十四年傳曰『孰城之』，疏引此傳亦有『之』字。唐石經以下本皆脫。」

④「曷為不言城衛」，阮校：「解云：『舊本『曷為』之下有『不言』二字，今無者，脫也。』按：唐石經『曷為』下原刻作『城』，後磨改為『不』，則本作『曷為城衛』，『不言』二字係磨改補入，故此行及次行皆十一字，其迹可覆也。疏本亦無『不言』二字。十四年傳云：『曷為城齊？』亦無『不言』。」

⑤「故」，阮校：「疏本作『固』。按：何氏當本用『固』字，七年注云：『固因其得禮，著其能以爵通。』此注今本作『故』，非。」

救，則桓公恥之也。然則孰城之？據不出主名，見桓公德優不待之，又不獨書齊，實諸侯也。○爲桓，于僞反，下「爲桓」、「曷爲」，注「深爲」同。見桓，賢徧反，下傳「荀息見」并注同。桓公城之。曷爲不言桓公城之？不與諸侯專封也。曷爲不與？實與而文不與。文曷爲不與？諸侯之義，不得專封。諸侯之義，不得專封，則其曰實與之何？上無天子，下無方伯，天下諸侯有相滅亡者，力能救之，則救之可也。復發傳者，君子樂道人之善也。不繫衛者，明去衛而國楚丘，起其遷也。不書遷與救次者，深爲桓公諱。使若始時尚倉卒有所救，其後晏然無干戈之患，所以重其任而厚責之。主書者，起文從實也。○復，扶又反。卒，寸忽反。【疏】注「不繫」至「遷也」。○解云：欲決襄十年冬「戍鄭虎牢」，繫鄭矣。○注「不書」至「責之」。○解云：正決元年經「次于聶北，救邢」，「邢遷于陳儀」之文。○注「主書」至「實也」。○解云：謂經文雖不與，當從其實理而與之。

夏，五月，辛巳，葬我小君哀姜。哀姜

者何？莊公之夫人也。誅當絕，不當以夫人禮

書葬。書葬者，正齊桓討賊，辟責內讎齊。【疏】哀姜者

何？○解云：欲言其妾，經書小君，欲言適妻，與夫別

謚，故執不知問。○注「誅當」至「讎齊」。○解云：即元

年「夫人氏之喪」不言姜者，是其誅文也。上既誅之，即

當合絕，不以夫人之禮書葬，而書葬者，欲正齊桓討得其

賊故也。而言「辟責內讎齊」者，《公羊》之例，君弑賊不

討，不書其君葬，責臣子不討賊，令君喪無所繫矣。今若

不書葬，即似責魯臣子不討齊桓，故言「正齊桓討賊，辟

責內讎齊」耳。

虞師、晉師滅夏陽。虞，微國也，曷爲

序乎大國之上？據稱師有加文，知不主會。○夏

陽，《左氏》作「下陽」。【疏】注「據稱」至「主會」。○解

云：即隱五年秋，「邾婁人、鄭人伐宋」，注云：「邾婁小

國，序上者，主會也。」然則邾婁小國，稱人無加文，而得

序于鄭上者，正由主會故也。今虞爲小國而得稱師，是

有加文，則知序于晉上者，不爲主會。既不爲主會，而在

大國之上，故難之。知稱師爲加文者，正以小國例不得

稱師。其稱師者，乃是大國將卑師衆之稱故也。使虞

首惡也。曷爲使虞首惡？據楚人、巴人滅庸不

使巴首惡。^①【疏】注「據楚人」至「首惡」。○解云：即文

十六年秋，「楚人、秦人、巴人滅庸」是。案彼經有秦人而

不言之者，直取巴爲小國，不序在上之意，故省文。虞

受賂，假滅國者道，以取亡焉。其受賂奈

何？獻公朝諸大夫而問焉，曰：「寡人夜

者寢而不寐，其意也何？」諸大夫有進對

者曰：「寢不安與？其諸侍御有不在側者

與？」獻公不應。荀息進曰：「虞、郭見

與？」猶曰「虞、郭豈見於君之心乎？」荀息素知獻公

欲伐此二國，故云爾。○安與，音餘，下「者與」、「見與」

同。應，應對之應。郭，音號，又如字，注及下同。【疏】

「寢不」至「者與」。○解云：言直置寢自不安與？爲侍

御之人有不在側者與？其諸，蓋爲辭矣。故桓六年傳

云：「公羊子曰：『其諸以病桓與？』」彼注云：「其諸，辭

也。」則知《論語》云「其諸異乎人之求之歟」者，「其諸」亦

爲辭矣。獻公揖而進之，以手通指曰揖。【疏】注

「以手通指曰揖」。○解云：蓋謂揖而招之，言用拱揖，并

招引近己，若文七年傳云「使與公盟」，^②彼注云

「以目通指曰眈」。眈，大結反，又丑乙反。^③遂與之

人而謀曰：「吾欲攻郭，則虞救之。攻虞，

則郭救之，如之何？願與子慮之。」荀息

對曰：「君若用臣之謀，則今日取郭，而明

日取虞爾，君何憂焉？」獻公曰：「然則奈

何？」荀息曰：「請以屈產之乘，^④屈產，出名

馬之地。乘，備駟也。○屈，具物反。^⑤之乘，繩證反，注

及下同。【疏】注「屈產」至「駟也」。^⑥○解云：謂屈產爲

①「巴」字，原作「邑」，今據余本改。

②「眈」，阮校：「當作「眈」，從矢，下同。」

③「眈眈大結反又丑乙反」，杉浦校：「單疏鈔本不重

「眈」字，下雙行注「大結反」、「丑乙反」。

④「曰請」，京都本、再造善本作「請曰」。

⑤「具」，原作「貝」，今據中華本、閣本、宋本《釋文》改。

⑥「注屈產至駟也」，杉浦校：「單疏鈔本作「注屈產出

名馬之地者」，下無「○解云」。今注疏本標起止，作

「至駟也」，誤也，此當據以訂。

地名，不似服氏謂產爲產生也。與垂棘之白璧，垂

棘，出美玉之地。玉以尚白爲美。○棘，一本作「棘」，音

同。往，必可得也。則寶出之內藏，藏之外

府，如虞可得，猶外府藏也。○內藏，才浪反，注同。

【疏】注「如虞」至「藏也」。○解云：本「藏」下有「之」字。

馬出之內廄，繫之外廄爾，君何喪焉？」獻

公曰：「諾。雖然，宮之奇存焉，如之何？」

荀息曰：「宮之奇知則知矣，君欲言其知，實知

也。○廄，九又反。喪，息浪反。知則，音智，下及注同。

雖然，虞公貪而好寶，見寶，必不從其言。

請終以往。」於是終以往。虞公見寶，許

諾。宮之奇果諫：「《記》曰：『脣亡則齒

寒。』記，史記也。○好，呼報反。【疏】「虞公貪而好

寶」。○解云：謂立性貪賄，於寶甚也。○「請終以往」。

○解云：請君終竟齋寶馬以往，不欲令其難之。虞、郭

之相救，非相爲賜。賜猶惠也。則晉今日取

郭，而明日虞從而亡爾，君請勿許也。」虞

公不從其言，終假之道以取郭。明郭非虞不

滅，虞當坐滅人。【疏】注「明郭」至「滅人」。○解云：欲

道序虞于晉上，令其首惡之義也。還，四年，反取

虞。還復往，故言反。【疏】「還四年反取虞」。○解

云：言晉人滅郭還歸，其四年反往滅虞矣。虞公抱寶

牽馬而至，荀息見曰：「臣之謀何如？」獻

公曰：「子之謀則已行矣，寶則吾寶也，雖

然，吾馬之齒亦已長矣。」蓋戲之也。以馬齒

長戲之，喻荀息之年老。傳極道此者，以終荀息、宮之奇

言，且以爲戒，又惡獻公不仁，以滅人爲戲謔也。晉至此

乃見者，著晉、楚俱大國，後治同姓也。以滅人見義者，

比楚先治大惡，親疏之別。○牽馬，本又作「擊」，音同。

已長，丁丈反，注同。惡，烏路反。謔，許略反。別，彼列

反。【疏】注「以馬」至「謔也」。○解云：言雖有謀，年老

必昏耄不任使，故言，蓋戲之。○注「晉至」至「姓也」。

○解云：即莊十年「秋，九月，荆敗蔡師于莘，以蔡侯獻舞

歸」，是先書楚小惡而治之也。以前不見晉之小惡者，後

治同姓故也。○注「以滅」至「之別」。○解云：以前楚滅

穀，鄧不書之，而先書此晉滅夏陽者，先治同姓之大惡，

欲見骨肉之親，大則誅，小則隱，故言親疏之別耳。夏陽者何？郭之邑也。曷爲不繫于郭？國之也。曷爲國之？君存焉爾。【疏】「夏陽者。」①○解云：欲言是國，天下未有，欲言是邑，而不繫國，故執不知問。

秋，九月，齊侯、宋公、江人、黃人盟于貫澤。江人、黃人者何？遠國之辭也。桓

公德盛，不嫌使微者，知以遠國辭稱人。○貫澤，古亂反，二傳無「澤」字。【疏】「江人黃人者何。」○解云：欲

言是君，經不稱子，欲言微者，得敵齊侯，故執不知問。遠國至矣，則中國曷爲獨言齊、宋至爾？

大國言齊、宋，遠國言江、黃，則以其餘爲莫敢不至也。晉大于宋，不序晉而序宋者，②時實

晉、楚之君不至，君子成人之美，故褒益以爲偏至之辭，所以獎夫霸功而勉盛德也。③江、黃附從霸者當進，不進

者，方爲偏至之辭。○偏至，音遍，下同。【疏】注「江黃」至「進者」。○解云：怪其不稱爵矣。○注「方爲偏至之

辭」。○解云：言方爲偏至之辭，故直以遠國辭稱人，若

進而稱爵，無以見偏至之義。

冬，十月，不雨。何以書？記異也。

說與前同。【疏】注「說與前同」。○解云：即莊三十一年「冬，不雨」，傳云：「何以書？記異也。」彼注云：「京房《易傳》曰：『旱異者，旱久而不害物也。斯祿去公室，福由下作，故陽雖不施，而陰道獨行，以成萬物也。』先是比築三臺，慶牙專政之應。」今此亦是僖公喜於得立，委任陪臣，不恤政事，故有此罰耳，故言說與前同。

楚人侵鄭。

三年，春，王正月。不雨。

夏，四月，不雨。何以書？記異也。

太平一月不雨即書，《春秋》亂世一月不雨，未害物，未足爲異，當滿一時乃書。一月書者，時僖公得立，欣喜不恤

①「者」下，杉浦校：「單疏鈔本有『何』字，與傳文合。」

②「晉大于宋不序晉而序宋者」，阮校：「孫志祖云：

『《穀梁》疏引二「晉」字下皆有「楚」字，乃與下文合。』各本脫也。」

③「夫」，阮校：「鄂本作『大』，此誤。按：《穀梁》疏正作『大』。」

庶衆，比致三旱，^①即能退辟正殿，飭過求己，循省百官，放佞臣郭都等，理冤獄四百餘人，精誠感天，不雩而得澍雨，故一月即書，善其應變改政。旱不從上發傳者，著人事之備積於是。○太平，音泰。飭過，音敕，下同。冤，於元反。澍，之樹反。其應，應對之應，後災祥之應皆放此。【疏】注「太平」至「即書」。○解云：正以太平之時，陰陽和調，若一月不雨，^②足以爲異，故知然也。○注「當滿」至「即書」。^③○解云：即莊三十一年冬不雨，^④傳云「何以書？記異」是也。○注「比致三旱」。^⑤○解云：即上二年「冬，十月，不雨」，三年「春，王正月，不雨。夏，四月，不雨」是也。○注「即能」至「澍雨」。○解云：皆《感精符》文。○注「故一月即書」。○解云：即去年「十月，不雨」，今年「正月，不雨。夏，四月，不雨」是也。○注「不從上發傳」。○解云：即上二年「十月，不雨」之下，已發云「何以書？記異也」，今不從其例，而又發之者，欲著人事之備積于是故也。

徐人取舒。其言取之何？據國言滅。

【疏】注「據國言滅」。○解云：即莊十年「齊師滅譚」、十三年「齊人滅遂」之屬是也。易也。易者，猶無守禦之備。不爲桓諱者，刺其不救也。○易，以豉反，注同。

爲，于僞反。【疏】注「不爲」至「救也」。○解云：決上元年、二年狄滅邢、衛，皆爲桓公諱，下書其滅也。

六月，雨。其言「六月，雨」何？據上得

雨不書。【疏】注「據上得雨不書」。○解云：即十二年十一月、^⑥十二月，三年二月、三月、五月之屬，皆不書不雨，是其得雨故也。上雨而不甚也。所以詳錄賢君精誠之應也。僖公飭過求己，六月澍雨，宣公復古行中，其

^①「比致三旱」，原作「比致三年」。余本、京都本、再造善本作「比致三旱」，杉浦校云單疏鈔本標起訖亦作「比致三旱」。今按：下疏云：「即上二年冬十月不

雨，三年春王正月不雨，夏四月不雨是也。」二年冬至三年夏乃兩年三旱，據改。

^②「月」，原作「用」，今據京都本、再造善本、中華本、閣本改。

^③「即書」，何注作「乃書」，指「當滿一時乃書」六字。

^④「冬」，原作「多」，今據京都本、再造善本、中華本、閣本改。

^⑤「旱」，原作「年」，今據京都本、再造善本、閣本改。

^⑥上「十」字，阮校引浦鏜云：「上二年」，「上」字誤作「十」。

年穀大豐，明天人相與報應之際，不可不察其意。【疏】注「宣公」至「大豐」。○解云：謂宣十五年「初稅畝」，其冬螽生，宣公受過變痛，明年復古行中，十六年「冬，大有年」是也。○注「明天」至「其意」。○解云：謂人行德，天報之福；人行惡，天報之禍。兩令相及，故言之際矣。此大會也。^①

秋，齊侯、宋公、江人、黃人會于陽穀。

此大會也，曷爲末言爾？末者，淺耳，但言會，

不言盟。據貫澤言盟。【疏】「曷爲末言爾」。○解云：上

二年「齊侯、宋公、江人、黃人盟于貫澤」，傳云「大國言齊、宋，遠國言江、黃，則以其餘爲莫敢不至也」。此經亦書「齊侯、宋公、江人、黃人」，故弟子言「此大會也」以難之。○注「據貫澤言盟」者。○解云：謂貫澤亦大會言

盟，故據之。桓公曰：「無障谷，無障斷川谷，專水

利也。水注川曰溪，注溪曰谷。○障，之亮反，一音章，

注同。斷，丁管反。溪，口兮反。【疏】注「水注」至「曰

谷」。○解云：《釋水》文。李巡云「水出于山人於川爲

谿，^②水相屬曰谷」是。無貯粟，有無當相通。○貯，

中吕反。無易樹子，樹立本正，辭無易本正當立之

子。無以妾爲妻。」此四者，皆時人所患。時桓公功德隆盛，諸侯咸曰：「無言不從，曷爲用盟哉？」故告誓而已。

冬，公子友如齊莅盟。莅盟者何？

往盟乎彼也。猶曰「往盟於齊」。莅，臨也。時國齊

都盟，^③主國主名不出者，《春秋》王魯，故言莅以見王義，使若王者遣使臨諸侯盟，飭以法度。○莅，音利，又音

類，注同。以見，賢徧反，下同。遣使，所吏反。【疏】「莅

盟者何」。○解云：欲言誓盟，例不言莅，欲言非盟，而書

盟見經，故執不知問。其言來盟者何？來盟于

我也。此亦因魯都以見王義，使若來之京師盟，白事于

王，不加莅者，來就魯，魯已尊矣。【疏】「來盟者何」。○

①「此大會也」，阮校：「末四字當在下節疏「曷爲末言爾」之上，割裂疏文誤屬此。」

②「水出于山人於川爲谿」，阮校：「按：「于」當作「於」。毛本「於」改「于」，誤甚。」

③「國」，阮校：「鄂本作「因」，當據正。」

解云：即文十五年春「宋司馬華孫來盟」、宣七年「春，衛侯使孫良夫來盟」之屬是也。但此經既有莅盟之文，故引來盟以對之。○注「不加」至「尊矣」。○解云：正以上經言莅者，見尊魯爲王之義。今此來盟者，已是就魯之文，足見尊魯矣，何勞言莅以見之乎？若其加莅，宜直云莅孫良夫盟也。

楚人伐鄭。

四年，春，王正月。公會齊侯、宋公、陳侯、衛侯、鄭伯、許男、曹伯侵蔡，蔡潰。潰者何？下叛上也。國曰潰，邑曰叛。不與諸侯潰之爲文，重出蔡者，侵爲加蔡舉，潰爲惡蔡錄，義各異也。月者，善義兵也。潰例月，叛例時。○蔡潰，戶內反，下及注同。重，直用反。惡蔡，烏路反，下「惡其專」并六年注同。【疏】「潰者何」。○解云：侵若淺辭，^②潰者深辭，二者並書，故執不知問。○「國曰潰」。○解云：即此及文三年春正月「沈潰」之屬是也。○「邑曰叛」。○解云：即襄二十六年「衛孫林父入于戚以叛」、定十三年「秋，晉趙鞅入于晉陽以叛」、冬，晉荀寅等「入于朝歌以叛」之屬是也。○注「月者善義兵」。○解云：正

以侵伐例時故也。○注「潰例月」。○解云：即此經書正月，文三年「沈潰」書正月是也。成九年經云「庚申，莒潰」，彼注云「日者，錄責中國無信，同盟不能相救，至爲夷狄所潰」是也。○注「叛例時」。○解云：即晉趙鞅書秋，荀寅書冬之屬是也。遂伐楚，次于陘。其言

「次于陘」何？據召陵侵楚不言次，來盟不言陘。

○陘，音刑。召陵，上照反，下文同。【疏】注「據召」至

「言次」。○解云：即定四年「三月，公會劉子、晉侯」已下

「于召陵，侵楚」是也。○注「來盟不言陘」。○解云：即

下文夏「楚屈完來盟于召陵」是也。有俟也。孰

俟？俟屈完也。時楚強大，卒暴征之，則多傷士

衆。桓公先犯其與國，臨蔡，蔡潰，兵精威行，乃推以伐

楚，楚懼，然後使屈完來受盟，^③修臣子之職，不頓兵血

①「宣七年」，原作「宣十年」，今據宣公七年經及單疏鈔本、京都本改。

②「侵若」，不辭，下言「潰者」、「二者」，則此當作「侵者」。「侵者」、「潰者」對文。

③「屈完」，原作「厲完」，今據余本、京都本、再造善本、中華本、閣本改。

刃，以文德優柔服之，故詳錄其止次待之，善其重愛民命，生事有漸，故敏則有功。○屈，居勿反。卒，寸忽反。【疏】注「善其」至「有功」。○解云：言上事有漸者，^①即先犯于蔡，乃遂伐楚是也。言敏則有功者，敏，審也，言舉事敏審則有成功矣。

夏，許男新臣卒。不言卒於師者，桓公師無危。不月者，為下盟，去月方見大信。○為，于偽反，下「為桓公」同。去，起呂反。見，賢徧反。【疏】注「不言」至「無危」。○解云：決成十三年「曹伯廬卒于師」之屬，皆以其有危，故言于師矣。○注「不月」至「大信」。○解云：正以莊二十三年「冬，十有一月，曹伯射姑卒」。然則許與曹等，而不月者，若會盟之例，大信者時，若不去月，恐其盟不為大信故也。

楚屈完來盟于師，盟于召陵。屈完者何？楚大夫也。何以不稱使？據陳侯使袁僑如會。○僑，其驕反，一本作「驕」，音同。【疏】「屈完者何」。○解云：欲言楚子，經不書爵，欲言大夫，文不言使，故執不知問。○注「據陳」至「如會」。○解云：即襄三年「六月，公會單子、晉侯」已下「同盟于雞澤。陳侯使

袁僑如會」是也。尊屈完也。曷為尊屈完？據陳侯使袁僑如會，不尊之。以當桓公也。增倍使若得其君，以醇霸德，成王事也。【疏】注「增倍」至「其君」。○解云：倍，讀如陪益之陪矣。○注「以醇」至「事也」。○解云：即下傳云「桓公救中國而攘夷狄，卒怙荊，以此為王者之事也」。其言「盟于師，盟于召陵」何？據戊寅叔孫豹及諸侯之大夫，及陳袁僑盟，不舉會與地。【疏】注「據戊寅」至「與地」。○解云：在襄三年夏也。彼經不言陳袁僑來盟于會，盟于雞澤，與此異，故難之。師在召陵也。時喜得屈完來服於經，即退次召陵，與之盟，故言盟于師，盟于召陵。師在召陵，則曷為再言盟？據齊侯使國佐如師，己酉，及國佐盟于袁婁，俱從地，不再言盟。【疏】注「據齊」至「言盟」。○解云：在成二年秋。言俱從地者，謂國佐從晉于袁婁也。喜服楚也。孔子曰：「書之重，辭之復，嗚呼！不可不察，其中必有美者焉。」○重，直用反，又直容反。

①「上」，閩本作「生」，與注文合，當是。

之復，扶又反，年末「乃復」同，又音福。【疏】注「孔子曰」至「美者焉」。○解云：《春秋說》文。何言乎喜服

楚？據服蔡無喜文。【疏】注「據服蔡無喜文」。○解

云：即上「侵蔡，蔡潰」是也。楚有王者則後服，桓

公行霸，至是乃服楚。無王者則先叛。桓公不修其

師，先叛盟是也。【疏】注「桓公」至「是也」。○解云：即

下經云「八月，公至自伐楚」，傳云：「楚已服矣，何以致

伐？楚叛盟也。」彼注云「爲桓公不修其師，而執濤塗故

也」者是。夷狄也，而亟病中國。數侵滅中國。

○亟，去冀反。數，音朔。【疏】注「數侵滅中國」。○解

云：即莊二十八年「秋，荆伐鄭」者，是其數侵中國之

文。^①其數滅中國者，即滅鄧、穀之屬是也。而經不書

者，後治夷狄故也。南夷與北狄交，^②南夷，謂楚滅

鄧、穀，伐蔡、鄭。北夷，謂狄滅邢、^③衛，至于溫，交亂中

國。【疏】注「南夷」至「蔡鄭」。○解云：楚滅鄧、穀不書，

而此言者，正以上桓七年「夏，穀伯綏來朝。鄧侯吾離來

朝」，傳云「皆何以名？失地之君也」，故知之。伐蔡、鄭

者，謂蔡、鄭服從楚，即上經齊侯「侵蔡，蔡潰」，遂伐楚

「鄭人侵宋」，十六年「夏，宋人、齊人、衛人伐鄭」之文也。何者？莊十五年時，正是桓公爲霸，宋爲齊屬而鄭侵

之，豈不從楚故也？莊十六年齊人助宋伐之，豈不怒乎

其從楚而侵宋也？蓋于時鄭人又服于齊，是以十六年

「秋，荆伐鄭」，故此作注云蔡、鄭矣。○注「北夷」至「中

國」。○解云：狄滅邢、衛，在閔元年、二年。狄滅溫，在

僖十年。溫言「至于」者，以其在後，故言「至于」，僖十年

文滅溫也。或者溫是圻內之國，去京師近，故言「至于」

矣。中國不絕若綫。綫，縫帛縷。以喻微也。○

綫，思賤反。桓公救中國，存邢、衛是也。而攘夷

狄，攘，却也。北伐山戎是也。○攘，如羊反，却也。

卒怙荆，卒，盡也。怙，服也。荆，楚也。○怙，他協

反，一本作「貼」，服也。劉兆同。《廣雅》云「靜也」，《玉

①「其」，杉浦校：「單疏鈔本無。」

②「南夷與北狄交」，阮校：「唐石經、鄂本作「北夷」，當據正。注同。此本疏標起訖云「注北夷至中國」，閩、

監、毛本亦改作「北狄」矣。」

③「邢」，原作「那」，今據京都本、再造善本、中華本、閣本改。

篇》又丁簞反，一本作「拈」，或音章貶反。以此爲王者之事也。言桓公先治其國以及諸夏，治諸夏以及夷狄，如王者爲之，故云爾。其言來何？據陳袁僑如會不言來。與桓爲主也。^①以從內文，知與桓公爲天下霸主。前此者有事矣，謂城邢、衛是也。

【疏】注「謂城邢衛是也」。○解云：即上元年夏六月，^②齊師、宋師、曹師城邢，二年「春，王正月，城楚丘。孰城？城衛也」是。後此者有事矣。謂城緣陵是也。

【疏】注「謂城緣陵是也」。○解云：即下十四年「春，諸侯城緣陵」是也。則曷爲獨於此焉與桓公爲主？序績也。^③序，次也。績，功也。累次桓公之功德，莫大於服楚，明德及強夷最爲盛。

齊人執陳袁濤塗。濤塗之罪何？辟軍之道也。其辟軍之道奈何？濤塗謂桓公曰：「君既服南夷矣，何不還師濱海而東，服東夷且歸？」濱，涯也。順海涯而東也。東夷，吳也。從召陵東歸，不經陳，而趨近海道，多廣澤水草，軍所便也。○濤，徒刀反。辟，匹亦反，又音避，下

同。濱，音賓。涯，五佳反。近，附近之近。便，婢面反。【疏】注「而趨近海道」。○解云：趨猶鄉也，謂鄉近海之道也。桓公曰：「諾。」於是還師濱海而東，大陷于沛澤之中。草棘曰沛，漸洳曰澤。○沛澤，音貝，又普貝反。草棘曰沛，漸洳曰澤。^④漸，子廉反。洳，人庶反。【疏】注「草棘」至「曰澤」者。○解云：《爾雅》無文也。顧而執濤塗。時濤塗與桓公俱行。執者曷爲或稱侯，或稱人？稱侯而執者，伯討也。言有罪，方伯所宜討。【疏】「執者曷爲或稱侯」。○解云：即下二十八年「晉侯執曹伯畀宋人」，成十

① 「主」，原作「王」，今據余本、京都本、再造善本、中華本、閣本改。

② 「元」，原作「九」。阮校：「浦鏜云：『元』誤『九』。按：浦說是。」今據京都本及阮校改。

③ 「序績也」，阮校：「按：《鹽鐵論·執務篇》引傳曰『予積也』，下云『故土積而成山阜，水積而成江海，行積而成君子』。與何本異，蓋是嚴、顏之別。」

④ 「漸」，原作「斬」，今據余本、中華本、閣本、宋本《釋文》改。下「漸子廉反」之「漸」字同。

五年「晉侯執曹伯歸之于京師」之屬是也。稱人而執

者，非伯討也。此執有罪，何以不得爲伯討？古者周公，東征則西國怨，西征則東國怨。此道黜陟之時也。《詩》云：「周公東征，四國是

皇。」【疏】注「此道」至「時也」。○解云：正以諸典不見周公西討之文故也。桓公假塗于陳而伐楚，則陳

人不欲其反由己者，師不正故也。故令濤塗有此言。○令，力呈反。不修其師而執濤塗，古

人之討，則不然也。以己所招而反執人，古人所不爲也。凡書執者，惡其專執。【疏】注「凡書」至「專執」。○解云：言雖有罪，方伯所宜討，要須白天子，乃可執之。

秋，及江人、黃人伐陳。

八月，公至自伐楚。楚已服矣，何以致伐？楚叛盟也。爲桓公不修其師，而執濤塗故

也。月者，凡公出滿三時，^①月，危公之久。【疏】「秋及」

至「伐陳」。○解云：內之微者矣。○「楚已」至「致伐」。

○解云：莊六年傳云：「得意致會，不得意致伐。」今此楚已服而致伐，故難之。○注「凡公」至「之久」。○解云：

即此僖公春去秋乃還，而云「八月，公至自伐楚」，又襄二十八年冬「公如楚」、二十九年「夏，五月，公至自楚」之屬，皆是危而久之。「久」字亦有作「之」字者。案莊五年「冬，公會齊人」已下「伐衛」，至六年「秋，公至自伐衛」，兵歷四時而不月者，彼注云「久不月者，不與伐天子也，故不爲危錄之」者是。

葬許繆公。得卒葬於所傳聞世者，許大小次曹，

故卒少在曹後。○傳，丈專反。【疏】注「得卒」至「曹

後」。○解云：所傳聞之世，微國卒葬例不錄之，今許得書葬，故須注解也。何者？正以曹、許雖非大國，亦非

微，故得錄見也。知許大小次曹後者，案僖五年夏，「公及齊侯、宋公、陳侯、衛侯、鄭伯、許男、曹伯會王世子于首戴」，許在曹上者，正是會盟之序，皆是主會次之，非孔子之意，未必得其正，^②故何氏不以爲妨矣。若然，案昭

十二年傳云《春秋》之信史也，其序則齊桓、晉文」，彼注

^①「三」，阮校：「鄂本『三』作『二』，當據正。」

^②「未」，原作「本」，京都本、再造善本作殘「未」字，閣本作「未」。下疏文引此云「未必得其正」，則作「未」是。今據改。

云：「唯齊桓、晉文，會能以德優劣、國大小相次序。」傳文云「其會則主會者爲之也」，^①彼注云：「非齊桓、晉文，則如主會者爲之，雖優劣大小相越，不改更信史也。」又云「其詞則丘有罪焉爾」，彼注云：「丘，孔子名。其貶絕譏刺之辭有所失者，是丘之罪。」然則首戴之會，正是齊桓爲伯之時，而云「許在曹上，皆是主會者次之，未必得其正」者，案下五年之會注云：「世子所以會者，時桓公德衰，諸侯背叛，故上假王世子，示以公義。」然則桓公德衰，故曹在許下，仍自不妨小于曹，則知昭十二年傳云「其序則齊桓、晉文」者，據其盛時大判言耳。

冬，十有二月，公孫慈帥師會齊人、宋人、衛人、鄭人、許人、曹人侵陳。月者，刺桓公不修其師，因見患誑，不內自責，乃復加人以罪。○慈，《左氏》作「茲」。誑，九況反。【疏】注「月者」至「以罪」。○稱云：正以侵伐例時，今此書月，故須注解也。言「因見患誑」者，言因是不修其師之故，而爲陳之所苦患，遂爲所調誑矣。

五年，春，晉侯殺其世子申生。曷爲直稱晉侯以殺？據鄭殺其大夫申侯稱國也。續問

以殺者，問殺所稱例爾，非謂晉侯不當稱國爵也。【疏】注「據鄭」至「例爾」。○解云：即下七年夏，^②「鄭殺其大夫申侯」是也。○注「非謂」至「爵也」。○解云：若直問曷爲直稱晉侯，即嫌時不合稱晉侯，傳須云以殺，明其但怪何故稱晉侯以殺耳。殺世子、母弟直稱君者，甚之也。甚之者，甚惡殺親親也。《春秋》公子貫於先君，唯世子與母弟以今君錄，親親也。今舍國體直稱君，知以親親責之。○舍，音捨。【疏】注「今舍國體」。○解云：謂不直言「晉殺申生」也。

杞伯姬來朝其子。其言「來朝其子」何？據微者不當書朝。連「來」者，內辭也。與其子來者，問爲直來乎？爲下朝出？○爲下，于僞反。【疏】注「據微」至「書朝」。○解云：即隱十一年傳云「諸侯來曰朝，大夫來曰聘」是也。○注「連來」至「朝出」。○解

① 「文」，杉浦校：「單疏鈔本作『又』，義爲長。」
② 「下」，原作「不」，今據京都本、再造善本、中華本、閣本改。

云：直來者，即莊二十七年「冬，紀伯姬來」，^①傳云「其言來何？直來曰來」，注云「直來，無事而來」是也。今此傳又何故不云「其言朝其子何」，^②而連「來」問之者，欲問伯姬來者，爲是無事而來，爲是有事言來者，爲是朝其子而出之。**內辭也。與其子俱來朝也。**因其與子俱來。禮，外孫初冠，有朝外祖之道，故使若來朝其子，以殺直來之恥，所以辟教戒之不明也。微，無君命，言朝者，服非實。^③○冠，古亂反。【疏】注「禮外」至「之道」。○解云：正以《士冠禮》冠訖，見于母，見于兄弟，入見于姑妹，「乃易服，玄冠玄端爵韠，奠摯，見于君，遂以摯見于鄉大夫、鄉先生」。鄭氏云：「易服，不朝服者，非朝事也。摯，雉也。鄉先生，鄉中老人，爲卿大夫致仕者。」然先生猶尚見之，況其外祖乎？故言外孫初冠有朝外祖之道。○注「微無」至「非實」。○解云：正見桓九年「曹伯使其世子射姑來朝」，彼言使來朝，則有君命，今既是微人，復不言使，而經書來朝，明其非實也。

夏，公孫慈如牟。○牟，莫侯反。

公及齊侯、宋公、陳侯、衛侯、鄭伯、許男、曹伯會王世子于首戴。曷爲殊會王世

子？據宰周公不殊別也。○首戴，《左氏》作「首止」。

別，彼列反。【疏】注「據宰」至「別也」。○解云：即傳九年「公會宰周公、齊侯、宋子」已下「于葵丘」是也。世子

貴也。世子，猶世世子也。解貴意也。言當世

父位，儲君副主，不可以諸侯會之爲文，故殊之，使若諸侯爲世子所會也。自王者言之，以屈遠世子在三公下，

《禮·喪服·斬衰》曰「公上大夫之衆臣」是也。^④自諸侯言之，世子尊於三公。此禮之威儀，各有所施。言及者，

因其文可得見汲汲也。世子所以會者，時桓公德衰，諸侯背叛，故上假王世子，示以公義。【疏】注「使若諸」至

「會也」。○解云：使若世子爲會主，致諸侯於此而會之，

故言使，若諸侯爲世子所會也。○注「自王」至「是也」。

○解云：何氏引《喪服》者，欲言三公，臣有爲之斬衰，世

①「紀」，阮校：「浦鏜云：『杞』誤『紀』。按：浦說是也。」

②「又」，杉浦校：「單疏鈔本作『文』，是。」

③「服」，阮校：「鄂本『服』作『明』，此誤。疏亦云『經書來朝，明其非實』。」

④「上」，阮校：「鄂本『上』作『士』，此誤。」

子則無，是卑於三公之義。○注「自諸」至「所施」。○解云：即殊與不殊是也，何者？世子於諸侯，將有君臣之義故也。○注「言及」至「會者」。○解云：及，汲汲之文。故隱元年傳云「及猶汲汲，及我欲之」。然則此言及者，因會王世子之經，得見魯侯汲汲于齊桓矣。○注「時桓」至「公義」。○解云：即上四年傳文，桓公「不修其師」，「楚叛盟」，下文「鄭伯逃歸不盟」，九年葵丘之盟，書日以見危之屬，皆是也。

秋，八月，諸侯盟于首戴。諸侯何以不序？據上會序。一事而再見者，前目而後凡也。省文從可知，間無事不省諸侯。會盟一事，不舉盟者，^①時世子不與盟。○見，賢徧反。省文，所景反，下同。與，音預。【疏】注「間無」至「諸侯」。○解云：昭十三年「秋，公會劉子、晉侯」已下「于平丘」。八月，甲戌，同盟于平丘。然則彼經以其間無事，不重言諸侯，今重言諸侯盟于首戴，故解之。○注「會盟」至「與盟」。○解云：文十四年，公「會宋公、陳侯、衛侯」已下「同盟于新城」。然則彼是會盟一事，舉盟以爲重，不言會于某，今此會，盟並舉，故須解之也。言時世子不與盟者，若不言

諸侯，則恐世子亦與之盟，故須言「諸侯盟于首戴」，則世子不與可知。

鄭伯逃歸不盟。其言「逃歸不盟」者何？據上言諸侯，鄭伯在其中，弟子疑，故執不知問。

【疏】注「據上」至「其中」。○解云：亦有無「據」字者，非正本。不可使盟也。時鄭伯內欲與楚，外依古不盟爲解，安居會上，不肯從桓公盟，故後言不盟。○解，古賣反。【疏】注「時鄭伯」至「不盟」。○解云：知古不盟者，正見桓三年「夏，齊侯、衛侯胥命于蒲」，傳云「胥命者何？相命也。何言乎相命？近正也。此其爲近正奈何？古者不盟，結言而退」是也。不可使盟，則其言「逃歸」何？據後言不盟，居會上辭。魯子曰：「蓋不以寡犯衆也。」諸侯以義相約，而鄭伯懷二心，依古不肯盟，故言逃歸，所以抑一人之惡，申衆人之善，故云爾。

楚人滅弦，弦子奔黃。

①「盟」，余本、京都本、再造善本、閣本作「重」。

九月，戊申，朔，日有食之。此象齊桓德

衰，是後楚遂背叛，狄伐晉滅溫，晉里克比弑其二君。○
比弑，^①申志反。【疏】注「楚遂背叛」。○解云：即下六
年「秋，楚人圍許」之屬是也。○注「狄伐晉滅溫」。○解
云：即下八年「夏，狄伐晉」，十年春「狄滅溫」之屬是
也。^②○注「晉里克比弑其二君」。○解云：即下九年
「晉里克弑其君之子奚齊」，十年春「晉里克弑其君卓子」
是也。

冬，晉人執虞公。虞已滅矣，其言執

之何？據滅言「以歸」。上傳云「四年反取虞」，知去
滅，變「以歸」言「執」。○去，起呂反，下同。【疏】注「據
滅言以歸」。○解云：即定六年「鄭游邀帥師滅許，以許
男斯歸」之屬是也。○「上傳」至「取虞」。○解云：在上
二年。○注「知去」至「言執」。○解云：注言此者，欲解
傳家得知虞已滅矣之義耳。不與滅也。曷為不
與滅？滅者，亡國之善辭也。言滅者，王者起
當存之，故為善辭。滅者，上下之同力者也。言
滅者，臣子與君戮力一心，共死之辭也。不但去滅，復去
以歸，言執者，明虞公滅人以自亡，當絕，不得責不死位

也。晉稱人者，本滅而執之，不以王法執治之，故從執無
罪辭也。虞稱公者，奪正爵，起從滅也。不從滅例月者，
略之。○戮，音六，又作「勅」，力彫反。

六年，春，王正月。

夏，公會齊侯、宋公、陳侯、衛侯、曹伯
伐鄭，圍新城。邑不言圍，此其言圍何？

彊也。惡桓公行霸，彊而無義也。鄭背叛，本由桓公過
陳不以道理，當先修文德以來之，而便伐之，彊非所以附
疏。○彊也，其良反。

秋，楚人圍許，諸侯遂救許。

冬，公至自伐鄭。事遷於救許，以伐鄭致者，

舉不得意。【疏】注「事遷」至「得意」。○解云：莊六年傳
云：「得意致會，不得意致伐。」今此以伐致，故云「舉不得
意」。然伐鄭救許，皆不得意，故以伐致，或者但伐鄭不
得意，兵將復用於鄭，故舉其不得意者言之，即下七年

^①「弑」，宋本《釋文》作「殺」。

^②「狄」，原作「秋」，今據京都本、再造善本、中華本、閣
本改。

「春，齊人伐鄭」是也。

七年，春，齊人伐鄭。

夏，小邾婁子來朝。至是所以進稱爵者，時

附從霸者，朝天子，旁朝罷，行進，齊桓公白天子進之，固因其得禮，著其能以爵通。【疏】注「至是」至「爵者」。○

解云：如此注者，欲決莊五年「秋，倪黎來來朝」之文。○注「時附」至「爵通」。○解云：正以得進而稱爵，故如此

解。小邾婁子朝天子不書者，例所不錄也。今朝魯而謂之旁朝者，正以諸侯之法，五年一朝天子，但是常事，故

不書之。欲對朝王為正朝，故謂之旁朝。案隱十一年「滕侯、薛侯來朝」，皆以其來朝新王，故進稱侯。今此知

不由朝新王而得進者，正以僖公非受命之王故也。

鄭殺其大夫申侯。其稱國以殺何？

據晉侯殺其世子申生稱侯。【疏】注「據晉」至「稱侯」。

○解云：在上五年春。稱國以殺者，君殺大夫

之辭也。諸侯國體，以大夫為股肱，^①士民為肌膚，故

以國體錄。

秋，七月，公會齊侯、宋公、陳世子款、

鄭世子華盟于甯母。^②○款，苦管反。母，音無，

或音某。

曹伯般卒。

公子友如齊。

冬，葬曹昭公。

監本附音春秋公羊注疏僖公卷第十

^①「肱」，原作「肱」，今據余本、京都本、再造善本、閩本改。

^②「甯母」，阮校：「閩本『母』作『母』。《釋文》：『甯母，音無，或音某。』葉鈔本及唐石經作『甯母』。」今按：《穀梁傳》作「寧母」，《釋文》：「上音如字，又音甯。下音無，又茂后反。《左氏》作『甯』。《左傳》作『甯母』。趙坦《春秋異文箋》曰：「甯、寧音義通。」陳立《公羊義疏》曰：「杜云：高平方與縣東有泥母亭，音如甯。《一統志》：泥母亭在兗州府魚台縣東二十里。《大事表》云：在今兗州府魚台縣東二十里。《水經注》：荷水又東逕泥母亭北，《春秋左傳》盟于甯母謀伐鄭也。」

監本附音春秋公羊注疏僖公卷第十一

起八年，盡二十一年

何休學

八年，春，王正月，公會王人、齊侯、宋公、衛侯、許男、曹伯、陳世子款、鄭世子華盟于洮。^①王人者何？微者也。曷爲序乎諸侯之上？先王命也。衛王命會諸侯，諸侯當北面受之，故尊序於上。時桓公德衰，甯毋之盟常會者不至，而陳、鄭又遣世子，故上假王人之重以自助。○洮，他刀反。【疏】注「甯毋」至「不至」。○解云：在上七年傳也。其常會者不至，正以衛侯、許男已下不至也。○注「而陳」至「世子」。○解云：即世子款、世子華之屬是也。鄭伯乞盟。乞盟者何？處其所而請與也。以不序也。【疏】「乞盟者何」。○解云：正以盟是常事，自應得與今而言乞，故執不知問。其處其所

而請與奈何？蓋酌之也。酌，挹也。時鄭伯欲

與楚，不肯自來盟，處其國，遣使挹取其血而請與之約束，無汲汲慕中國之心，故抑之使若叩頭乞盟者也。不錄使者，方抑鄭伯，使若自來也。不盟不爲大惡者，古者不盟也。○遣使，所吏反，下「錄使」同。【疏】注「不盟不爲大惡」。○解云：知非大惡者，正以鄭伯不貶不絕故也。若其是大惡，宜如陳佗之貶爵而書名也。知古者不盟者，桓三年傳云「古者不盟，結言而退」是也。

夏，狄伐晉。

秋，七月，禘于太廟，用致夫人。用者何？用者不宜用也。致者何？致者不宜致也。禘用致夫人，非禮也。以致文在廟下，不使人廟，知非禮也。禮，夫人始見廟，當特祭。而因禘諸公廟見，欲以省煩勞，不謹敬，故譏之。不日者，下用失禮明。○大，音泰。始見，賢徧反，下同。省，所

①「鄭世子華」，阮校：「唐石經、諸本同。按：《左氏》、《穀梁》無「鄭世子華」，故下「鄭伯乞盟」。此蓋因注言甯毋之盟陳、鄭遣世子而誤衍。」

景反。【疏】「用者何」。○解云：欲言失禮，而經不明，欲言得禮，而文言用，故執不知問。○「致者何」。○解云：見夫見廟禮當特祭，^①禘而言致，故執不知問。○注「禮夫」至「特祭」。○解云：正以三月見廟，見廟期限，明其不得因事爲之，故知然也。○注「不日」至「禮明」。○解云：正以隱五年「考仲子之宮」下，注云「失禮鬼神例日」。然則此亦失禮，而不書日，故知用在廟下，失禮已明，不勞舉日也。夫人何以不稱姜氏？貶，曷爲貶？據夫人姜氏人不貶。【疏】注「據夫」至「不貶」。○解云：即莊二十四年「八月，丁丑，夫人姜氏入」是也。譏以妾爲妻也。以逆不書。入廟當稱婦姜，而稱夫人者，夫人當坐篡嫡也。妾之事嫡，猶臣之事君同。○篡嫡，初患反，下音的，下同。【疏】「以逆」至「不書」。^②○解云：欲道傳家知以妾爲妻者，正以初逆不書，與桓、莊之屬夫人文異故也。○「入廟當」至「嫡也」。○解云：言入廟當稱婦者，正以婦者，服也，對舅姑服從之辭也。今而稱夫人，作不服之稱，明其有篡嫡之心，欲得爲夫人，是以稱之曰夫人，見其當有篡嫡之罪矣。猶如桓、宣篡弑得即位，是以《春秋》亦如其意，書其即位，

明其本意耳。○注「妾之事嫡猶臣之事君同」。^③○解云：注言此者，欲道妾之篡嫡欲得爲夫人，而《春秋》書之曰夫人，猶如臣子篡君欲得即位，而《春秋》亦書其即位之義矣。^④其言「以妾爲妻」奈何？蓋脅于齊媵女之先至者也。以不致楚女，及夫人至皆不書也。僖公本聘楚女爲嫡，齊女爲媵，齊先致其女，脅僖公使用爲嫡，故從父母辭言致。^⑤不書夫人及楚女至者，起齊先致其女，然後脅魯立也。^⑥楚女未至而豫廢，故皆不得以夫人至書也。【疏】注「僖公」至「爲媵」。○解

^①「見夫」，阮校引浦鏜云：「『見夫』當『夫人』之誤。」杉浦校：「單疏鈔本『夫』下有『人』字。」

^②「以逆至不書」，杉浦校：「單疏鈔本作『注以逆不書者』。按：『以』字上有『注』字，是也。下標起止『入廟當至嫡也』，『入』上注疏本脫『注』字，此本有，當據。」

^③「事君」，原作「與君」，今據中華本、閣本改。

^④「其」，阮校：「此本剝擠、閩、監、毛本遂排入，當衍。」

^⑤「從」，原作「致」，今據余本、中華本、閣本改。

^⑥「脅魯立也」，阮校：「元年疏引作『脅魯使立也』，此脫『使』字。」

云：《春秋說》文。○注「故從」至「言致」。○解云：即成九年「夏，季孫行父如宋致女」是也。○注「起齊」至「書也」。○解云：皆欲道若齊女未至，而已脅魯之時，可以書其至。今先致其女，乃後脅魯爲夫人，其初至之時乃爲媵妾，是以不得書其至矣。

冬，十有二月，丁未，天王崩。惠王也。

九年，春，王三月，丁丑，宋公禦說卒。

何以不書葬？爲襄公諱也。襄公背殯出會宰

周公，有不子之惡，後有征齊憂中國尊周室之心，功足以除惡，故諱不書葬，使若非背殯也。○說，音悅。爲襄，于僞反，下注「爲天」、「爲桓」皆同。【疏】「何以不書葬」。○解云：正以隱十一年「公薨」之下，傳云「何以不書葬」，彼注云「據莊公書葬」。然則彼已有解，故不重釋。○注「襄公」至「周公」。○解云：在下經文。○注「後有」至「殯也」。○解云：即下十八年傳云「曷爲不使齊主之？與襄公之征齊也」，「桓公死，豎刀、易牙爭權不葬，爲是故伐之也」。是爲齊之文也。①

夏，公會宰周公、齊侯、宋子、衛侯、鄭伯、許男、曹伯于葵丘。宰周公者何？天

子之爲政者也。宰猶治也，三公之職號尊名也。以

加宰，知其職大尊重，當與天子參聽萬機，而下爲諸侯所會，惡不勝其任也。宋未葬不稱子某者，出會諸侯，非尸柩之前，故不名。○惡不，烏路反。勝，音升。【疏】「宰周公者何」。○解云：欲言三公，而文加宰，欲言卿士，經書周公，故執不知問。○注「宰猶治也」。○解云：正以宰者，和治之名，得爲治事之義。○注「而下」至「其任也」。○解云：如此注者，欲決上五年首戴之會，總序諸侯，乃言會王世子，若以世子爲會主，致諸侯于此會而會之然也。今此宰周公，文與彼異，故知下爲諸侯所會。○注「宋未葬」至「不名」。○解云：莊三十二年傳云：「君存稱世子，君薨稱子某，既葬稱子，踰年稱公。」然則宋未葬，宜稱子某，而單稱子者，②非尸柩之前，無父前子名，君前臣名之義。知宋未葬者，正以宋公之卒在上三月，下有七月之文，當此之時未滿五月，是以知其未葬。若然，案桓公十一年「鄭忽出奔」，傳云「忽何以名」，注云

① 「爲」，閩本作「征」，當是。

② 「單」，原作「章」，今據京都本，再造善本、中華本、閩本改。

「據宋子既葬稱子」者，正以其非居尸柩前，故作既葬之稱，非謂葬訖。其說在彼。

秋，七月，乙酉，伯姬卒。此未適人，

何以卒？據杞叔姬不卒。【疏】「此未適人何以卒」。

○解云：正以文無所繫，知其未適人。○注「據杞叔姬不

卒」。○解云：宜作「伯姬」字，即莊二十七年「春，公會杞

伯姬于洮」，注云：「伯姬不卒者，蓋不與卒于無服。」此未

適人，何以卒乎？故難之也。案《春秋》之內，唯有「杞

叔姬來歸」，成八年冬，「杞叔姬卒」，更無叔姬不卒之事，

故如此解。許嫁矣。婦人許嫁，字而笄之。

字者，尊而不泄，所以遠別也。笄者，簪也，所以繫持髮，

象男子飾也。服此者，明繫屬於人，所以養貞一也。《昏

禮》曰：「女子許嫁，笄而禮之，稱字。」○笄，古今反。泄，

息列反。別，彼列反。①簪，莊林反。【疏】注「字者」至

「遠別也」。○解云：正以字尊於名，故言尊而不泄。所

以遠別者，正以內之公子爲大夫者，卒皆稱名，而內女許

嫁，卒而稱字者，所以遠別之故也。○注「婚禮曰」至「稱

字」。○解云：《士昏禮·記》文。彼注云「許嫁，已受納

徵禮也。笄女之禮，猶冠男也，使主婦女賓執其禮」是

也。死則以成人之喪治之。不以殤禮降也。許

嫁卒者，當爲諸侯夫人，有即貴之漸，猶「俠卒」也。日

者，恩尤重於未命大夫，故從諸侯夫人例。○俠，音協。

【疏】注「許嫁卒者」至「夫人」。○解云：則知許嫁於大夫

者不卒之，何者？爲大夫妻者賤，雖至其家，卒猶不書，

況其許嫁乎？○注「猶俠卒也」。○解云：在隱九年春

三月，「俠卒」，彼傳云：「俠者何？吾大夫之未命者也。」

彼注云：「未命所以卒之者，賞疑從重。然則未命大夫所

以卒之，以其將爲大夫，有即貴之漸，賞疑從重，故錄

之。」今此許嫁之女，亦有將爲諸侯夫人之漸，故得書之。

○注「日者」至「夫人例」。○解云：以俠卒不日，故言「日

者，恩尤重於未命大夫」，②故從諸侯夫人之卒例，皆書

日，成八年「冬，十月，癸卯，杞叔姬卒」之屬是也，故言從

諸侯夫人例。

九月，戊辰，諸侯盟于葵丘。桓之盟

不日，此何以日？危之也。何危爾？貫

①「彼」，原作「被」，今據余本、京都本、再造善本、中華

本、閣本、宋本《釋文》改。

②「未」，原作「末」，今據中華本、閣本改。

澤之會，桓公有憂中國之心，不召而至者，江人、黃人也。葵丘之會，桓公震而矜之，叛者九國。下伐厲善義兵是也。會不書者，叛也。叛不書者，爲天子親遣三公會之而見叛，故上爲天子，下爲桓公諱也。會盟一事不舉重者，時宰周公不與盟。○不預，音豫。【疏】「貫澤之會」。○解云：即上二年「秋，九月，齊侯、宋公、江人、黃人盟于貫」是也。而此言于貫澤者，蓋地有二名。然則案彼經盟，此言會者，舉其初會而言也。彼直書盟者，舉重故也。○注「下伐」至「是也」。○解云：即下十五年「秋，七月，齊師、曹師伐厲」，注云「月者，善錄義兵，厲，葵丘之會叛天子之命也」者是也。○注「會不」至「叛也」。○解云：言厲等九國，亦在于會，而葵丘之會不書之者，以其叛天子之命，故不錄之，但書曹伯以上于會。○注「會盟」至「不與盟」。○解云：正以文十四年「公會宋公」已下，「同盟于新城」。然則彼是會盟一事，舉盟以爲重，不言會于某，今此會盟並舉，故須兩解之。言解周公是時實不與盟，^①若言公會宰周公、齊侯已下盟于葵丘，則是文害其義。不舉盟，直書上會，會輕於盟，失舉重之例矣。以此之故，必須兩舉，

書云「諸侯盟于葵丘」，則知周公不與盟矣。震之者何？猶曰振振然。亢陽之貌。【疏】「震之者何」。

○解云：欲言是善，而盟書曰，欲言其惡，賢伯所爲，故執不知問。矜之者何？猶曰莫若我也。色自美大之貌。【疏】「矜之者何」。○解云：既名賢伯，美見天下，而取夸矜，^②異于本行，故執不知問。○注「色自美大之貌」。○解云：謂其顏色自有美大之勢。^③

甲戌，^④晉侯詭諸卒。不書葬者，殺世子也。

○詭，九委反。【疏】注「不書葬者殺世子也」。○解云：在上五年春。凡君殺無罪大夫，例去其葬以絕之。

^①「解」，阮校：「當作「宰」」。杉浦校：「單疏鈔本「解」作「宰」。」

^②「取」，杉浦校：「單疏鈔本作「反」。」

^③「自有」，阮校：「何校本作「有自」，此誤倒。」杉浦校：「單疏鈔本與何校合。」

^④「甲戌」，阮校：「《左氏》、《穀梁》「戌」作「子」。趙坦《春秋異文箋》曰：「獻公之卒，實在盟後，《公羊》作「甲戌」，爲九月二十一日，似得其實。《左》、《穀》經作「甲子」，或訛一字。」

冬，晉里克弑其君之子奚齊。此未踰

年之君，其言「弑其君之子奚齊」何？據弑

其君舍，不連先君。連名者，上不書葬子某，弑君名未明也。○殺其，音試，^①下及注放此。【疏】注「據弑」至「先

君」。○解云：即文十四年「齊公子商人弑其君舍」是也。

○注「連名」至「未明也」。○解云：言名未明者，弟子本

意，正欲問弑其君之子，而連奚齊何之者，恐人不知奚齊之名。爲是先君未葬稱子某，似若子般、子野之屬是

也；爲是被弑之故稱名，似若諸兒、卓子之屬是也。是以將名連弑問之，^②欲使後人知其稱名之義。殺未踰年

君之號也。^③欲言弑其子奚齊，^④嫌無君文，與殺大

夫同。欲言弑其君，又嫌與弑成君同。故引先君冠子之

上，則弑未踰年君之號定，而坐之輕重見矣。加「之」者，

起先君之子。不解名者，解言殺，從弑名可知也。弑未

踰年君例當月，不月者，不正遇禍，終始惡明，故略之。

○冠，古亂反。見，賢徧反。【疏】注「則弑」至「見矣」。

○解云：言罪差於成君，與殺大夫異矣。○注「加之」至

「之子」。○解云：若不加「之」，嫌是君、子爲一人故。○

注「不解名」至「知也」。○解云：正以傳云「弑未踰年君

之號」，止答上云「其言弑其君之子何」之文，故云不解名

矣。既解言弑，則書奚齊之名，由弑之故明矣，是以不復

答之。○注「弑未踰」至「略之」。○解云：正以隱四年

春，「戊申，衛州吁弑其君完」，注云「日者，從外赴辭，以

賊聞例」。然則弑成君者，例書日，即莊八年冬十一月

「癸未，齊無知弑其君諸兒」之屬是。弑成君者例既書

日，知弑未踰年君當月明矣。今此不月，故須解之。

十年，春，王正月，公如齊。書「如」者，錄

內所與外交接也，故如京師，善則月榮之。如齊、晉，善

則月安之。如楚，則月危之。明當尊賢慕大，無友不如

己者。月者，僖公本齊所立，桓公德衰見叛，獨能念恩朝

①「弑」，原作「弑」，今據余本、中華本、閣本、宋本《釋文》改。

②「弑」，杉浦校：「單疏鈔本作『殺』。按：陸氏《釋文》作『殺其，音試，下及注放此』。『弑』作『殺』，是。」

③「殺」，阮校：「唐石經、鄂本、宋本『殺』作『弑』。按《釋文》，則此經『弑』多作『殺』，或讀爲弑，以意求之。唐石經以下本皆作『弑』，此作『殺』爲歧出，然『殺』可讀『弑』，『弑』不可讀『殺』也。」

④「弑」，阮校引段玉裁云：「當作『殺』。」

事之，故善錄之。【疏】注「故如京」至「榮之」。○解云：即成十三年春，三月，公如京師，彼注云「月者，善公尊天子」是。○注「如齊」至「安之」。○解云：即襄二十一年「春，王正月，公如晉」，彼注云「月者，湟梁之盟，後中國方乖離，善公獨能與大國」是也。○注「如楚則月危之」。○解云：即襄二十八年十一月，「公如楚」，彼注云：「如楚皆月者，危公朝夷狄也。」必如此注者，正以朝聘例時，而書月，故須解矣。○注「明當尊賢慕大」。○解云：正覆如齊、晉則月安之。○注「無友不如己」。○解云：覆如楚則月危之。

狄滅溫。

溫子奔衛。

晉里克弑其君卓子及其大夫荀息。
「及」者何？累也。弑君多矣，舍此無累者乎？曰有，孔父、仇牧皆累也。舍孔父、仇牧無累者乎？曰有。有則此何以書？賢也。何賢乎荀息？據與孔父同。○君卓子，敕角反，又丁角反，《左氏》經無「子」字。舍，音捨，下同。【疏】「及者何」。○解云：君之與臣，尊卑異等，今

而言及，故執不知問。○「累也」。○解云：桓二年注

云：「累，累從君而死，齊人語也。」則彼已有解，故此處不復注之。○「曰有」。○解云：桓二年注云「叔仲惠伯是也」。○「何賢乎注據與孔父同」。①○解云：桓二年傳

云「何賢乎孔父」，注云：「據叔仲惠伯不賢。」然則此言據

與孔父同者，謂與孔父同據叔仲惠伯矣。荀息可謂

不食其言矣。不食言者，不如食受之而消亡之，以奚

齊、卓子皆立。【疏】注「以奚」至「皆立」。○解云：欲指

不食其言之事狀矣。其不食其言奈何？奚齊、

卓子者，驪姬之子也，荀息傳焉。②禮，諸侯之

子八歲受之少傅，教之以小學，業小道焉，履小節焉。十

五受大傅，教之以大學，業大道焉，履大節焉。○驪，力

知反。少，詩照反。大傅，音泰。【疏】注「禮諸侯」至「節

焉」。○解云：皆《藝文志》文也。注云「小道」、「小節」，

①「何賢乎注據與孔父同」，此與疏標起訖例不符，疑有訛誤。

②

「傳」，原作「傳」，今據余本、中華本、閣本改。

正謂始甲典覓師受業。^①大道大節，謂博習盡誠也。^②驪姬者，國色也。其顏色一國之選。○選，息戀反。獻公愛之甚，欲立其子，於是殺世子申生。申生者，里克傳之。獻公病將死，謂荀息曰：「士何如，則可謂之信矣？」獻公自知廢正當有後患，欲託二子於荀息，故動之云爾。荀息對曰：「使死者反生，生者不愧乎其言，則可謂信矣。」荀息察言觀色，知獻公欲為奚齊、卓子來動己，故答之云爾。○欲為，于偽反，下文「為文公」、「不為」、「故為」皆同。獻公死，奚齊立。里克謂荀息曰：「君殺正而立不正，廢長而立幼，長謂重耳。○長，丁丈反，注同。如之何？」願與子慮之。」荀息曰：「君嘗訊臣矣，上問下曰訊。言臣者，明君臣相與言不可負。○訊，音信，上問下曰訊。^③臣對曰：『使死者反生，生者不愧乎其言，則可謂信矣。』」里克知其不可與謀，退，弑奚齊。荀息立卓子，里克弑卓子，荀息死。

之。荀息可謂不食其言矣。起時莫不背死鄉生，去敗與成。荀息一受君命，終身死之，故言「及」，與孔父同義。不日者，不正遇禍，終始惡明，故略之。○背，音佩。鄉，許亮反。【疏】注「故言」至「同義」。○解云：桓二年「宋督弑其君與夷，及其大夫孔父」，彼注云「言及者，使上及其君，若附大國以名通，明當封為附庸，不絕其祀，所以重社稷之臣」也。今荀息一受君命，終身死之，故言及。亦使上及其君，若附大國以名通，明當封為附庸，不絕其祀，所以重社稷之臣，故云與孔父同義。○注「不日者」至「故略之」。○解云：正以成君見弑者例書日，今此不日，故解之。

夏，齊侯、許男伐北戎。

晉殺其大夫里克。里克弑二君，則曷為不以討賊之辭言之？據衛人殺州吁。【疏】注

「據衛人殺州吁」。○解云：即隱四年「九月，衛人殺州吁

①「甲」，阮校：「毛本作『申』。」

②「博」，京都本、再造善本作「傳」。

③「下曰」，原作「曰下」，今據余本、中華本、閩本、宋本《釋文》改。

于濮」是也。惠公之大夫也。惠公篡立已定，晉國君臣合爲一體，無所復責，故曰此乃惠公之大夫，安得以討賊之辭言之？○所復，扶又反，下同。然則孰立惠公？欲難殺之意。○難，乃旦反。里克也。里克弑奚齊、卓子，逆惠公而入。里克立惠公，則惠公曷爲殺之？惠公曰：「爾既殺夫二孺子矣，孺子，小子也。奚齊、卓子時皆幼小。○夫，音扶。孺，如注反。又將圖寡人。如我有不可，將復圖我如二孺子。爲爾君者，不亦病乎？」於是殺之。然則曷爲不言惠公之人？據「齊小白入于齊」。晉之不言出入者，踊爲文公諱也。踊，豫也，齊人語。若關西言渾矣。獻公殺申生，文公與惠公恐見及，出奔，不子當絕，還入爲篡，文公功足以并掩前人之惡，故惠公入、懷公出、文公入渾皆不書，悉爲文公諱故也。爲文公諱者，欲明文公之功大也。語在下。懷公者，惠公子也。惠公卒，懷公立，而秦納文公，故出奔。惠公、文公出奔不書者，非命嗣也。○踊，音勇，豫也。言渾，戶昆反，又戶本反，下

同。【疏】注「文公與惠公」至「嗣也」。○解云：正以同姓之臣尚無去義，況於兄子乎？且惠公、文公庶子，假令不去，亦不殺之，故知去父宜當絕矣。齊小白入于齊，則曷爲不爲桓公諱？桓公之享國也長，享，食。美見乎天下，故不爲之諱本惡也。文公之享國也短，美未見乎天下，故爲之諱本惡也。桓公功大，善惡相除，足封有餘，較然爲天下所知。文公功少，嫌未足除身篡而有封功，故爲之諱。并不言惠公、懷公出入者，明非徒足以除身篡而已，有足封之明較也，美不如桓公之功大。○美見，賢徧反，下同。較然，音角，下同。

秋，七月。

冬，大雨雹。何以書？記異也。夫人

專愛之所生也。○雨，于付反。雹，步角反。【疏】「冬大雨雹」。○解云：《左氏》作「雪」。○注「夫人專愛之所生也」。○解云：蔽障楚女而專取君愛，故生此雹灾。

十有一年，春，晉殺其大夫平鄭父。○平，^①普悲反。【疏】「平鄭父」。○解云：《左氏》經無「父」字。

夏，公及夫人姜氏會齊侯于陽穀。

秋，八月，大雩。公與夫人出會，不恤民之應。

冬，楚人伐黃。

十有二年，春，王三月，庚午，日有食之。是後楚滅黃，狄侵衛。【疏】注「是後楚滅黃」。○

解云：在今年夏。○注「狄侵衛」。○解云：在十三年春。

夏，楚人滅黃。

秋，七月。

冬，十有二月，丁丑，陳侯處臼卒。○處

白，《左氏》作「杵臼」。【疏】「夏楚人滅黃」。○解云：莊十年「冬，十月，齊師滅譚」，十三年「夏，六月，齊人滅遂」。然則滅例月，而此不月者，所傳聞之世，始錄夷狄滅小國也。

十有三年，春，狄侵衛。

夏，四月，葬陳宣公。

公會齊侯、宋公、陳侯、衛侯、鄭伯、許男、曹伯于鹹。桓公自貫澤，陽穀之會後，所以不復舉小國者，從一法之後，小國言從令行，大國唯曹、許以上乃會。○鹹，音咸。不復，扶又反，下同。

秋，九月，大雩。由陽穀之會不恤民，復會于鹹，城緣陵，煩擾之應。【疏】注「由陽」至「之應」。○解

云：謂上十一年「夏，公及夫人姜氏會齊侯于陽穀」是。

冬，公子友如齊。

十有四年，春，諸侯城緣陵。孰城之？諸侯不序，故問誰城。【疏】注「諸侯」至「誰城」。

○解云：案上二年「春，王正月，城楚丘」，傳云「孰城之」，彼注云：「據內城不月，故問之。」然彼經書月，故得此解，此經不月，傳云「孰城之」，漫道諸侯無所指據，緣陵之號由來未有，故怪而問之。城杞也。曷為城杞？恠滅也。孰滅之，蓋徐、莒脅之。以下皆狄徐

①「平」，中華本、宋本《釋文》作「丕」。

也。言脅者，杞，王者之後，尤微，是見恐曷而亡。○恐，丘勇反。曷，火葛反。【疏】注「以下」至「曷而亡」。○解云：即下十五年冬，「楚人敗徐于婁林」，注云：「謂之徐者，爲滅杞，不知尊先聖法度，惡重，故狄之也。」文七年「冬，徐伐莒」，彼注云：「謂之徐者，前共滅王者後，不知尊先聖法度。」今自先犯，文對事連，可以起同惡，莒在下不得狄，故復狄徐也。一罪再狄者，明爲莒狄之爾是也。

曷爲不言徐、莒脅之？爲桓公諱也。曷爲爲桓公諱？上無天子，下無方伯，天下諸侯有相滅亡者，桓公不能救，則桓公恥之也。然則孰城之？桓公城之。曷爲不言桓公城之？不與諸侯專封也。曷爲不與？實與而文不與。文曷爲不與？諸侯之義，不得專封也。諸侯之義不得專封，則其曰實與之何？上無天子，下無方伯，天下諸侯有相滅亡者，力能救之，則救之可也。輒發傳者，與城衛同義。言諸侯者，時桓公德衰，待諸侯然後乃能存之。外城不月者，文言諸侯，非

內城明矣。○爲桓，于僞反，下「爲桓」、「爲天下」并注「臣爲」同。【疏】注「外城」至「明矣」。○解云：正以隱七年「夏，城中丘」，襄十九年冬「城西郭」、「城武城」之屬，是內城不月。外城月者，即上元年夏六月「城邢」、二年春「王正月，城楚丘」之屬是也。今外不月，正以文言諸侯，非內城可知，故省文。而昭三十二年冬「城成周」不月，蓋以城天子與內同。

夏，六月，季姬及鄆子遇于防，使鄆子來朝。鄆子曷爲使乎季姬來朝？據「使者，臣爲君銜命文也。內辭也。非使來朝，使來請己也。使來請娶己以爲夫人，下書歸是也。禮，男不親求，女不親許。魯不防正其女，乃使要遮鄆子淫泆，使來請己，與禽獸無異，故卑鄆子使乎季姬，以絕賤之也。月者，甚惡內也。○要，一遙反。遮，諸奢反。泆，音逸。惡，烏路反。【疏】注「下書歸是也」。○解云：即下十五年「季姬歸于鄆」是也。○注「禮男不親求」。○解云：即《昏禮》「不稱主人之屬是也」。○「女不親許」。^①○解云：

① 「女」上，杉浦校：「單疏鈔本有『注』字，是。此脫。」

即致女之禮是也。○注「以絕賤之也」。○解云：謂絕而賤之，不以爲諸侯也。○注「月者甚惡也」。○解云：正以遇例時，即隱四年「夏，公及宋公遇于清」、八年「春，宋公、衛侯遇于垂」、莊三十年「冬，公及齊侯遇于魯濟」之屬是也。今此月者，甚惡內也。范氏云「魯女無故遠會諸侯，遂得淫通」，此亦事之不然。《左傳》曰「鄆季姬來寧，公怒之」，^①以鄆子不朝。遇于防，而使來朝，此近合人情。何氏以爲鄆、魯相近，信使洪通，男女之情，風流應合，末世無禮，^②容或有之，若姜氏如莒之流，寧可然問也。

秋，八月，辛卯，沙鹿崩。沙鹿者何？

河上之邑也。此邑也，其言崩何？據梁山言

崩。【疏】「沙鹿者何」。○解云：欲言是邑，邑無崩道，欲

言其山，文無山稱，故執不知問。○注「據梁山言崩」。

○解云：即成五年夏，「梁山崩」是也。襲邑也。襲

者，嘿陷入于地中。言崩者，以在河上也。河崩有高

下，^③如山有地矣，故得言崩也。【疏】注「襲者」至「地

中」。○解云：謂嘿然而陷矣。沙鹿崩，何以書？

記異也。外異不書，此何以書？據長狄之

齊、晉不書。【疏】注「據長」至「不書」。○解云：即文十一年傳云「狄者何？長狄也。兄弟三人，一者之齊，一者之魯，一者之晉。其之齊者，王子成父殺之。其之魯者，叔孫得臣殺之。則未知其之晉者也」，「何以書？記異也」。然則長狄之齊、晉皆不書之，是外異不書也。爲天下記異也。土地者，民之主，霸者之象也。河者，陰之精。爲下所襲者，此象天下異，齊桓將卒，霸道毀，夷狄動，宋襄承其業，爲楚所敗之應。而不繫國者，起天下異。【疏】注「宋襄」至「天下異」。○解云：即下十二年冬十一月，「己巳，朔，宋公及楚人戰于泓，宋師敗績」是也。

狄侵鄭。

冬，蔡侯盼卒。不書葬者，潰當絕也。不月

①「怒」下，阮校：「浦鏜云：脫「止」。按：《左傳》有「止」字。」

②「未」，原作「末」，今據京都本、中華本、閩本改。

③「崩」，阮校：「鄂本、宋本「崩」作「岸」，當據正。」

者，賤其背中國而附父讎，^①故略之甚也。盼立不書者，父獻舞見獲，留卒於楚，盼以次立，非篡也。○盼，許乙反，注同。背，音佩。【疏】注「不月」至「篡也」。○解云：正以大國之卒，例合書日，即隱八年「夏，六月，己亥，蔡侯考父卒」之屬是也。今此反不月者，故言略之甚也。其父者，即蔡侯獻舞，莊公十年為楚所獲，而卒於楚，故謂楚為父讎。上四年齊侯已下「侵蔡，蔡潰，遂伐楚」，是其背中國附父讎之事。

十有五年，春，王正月，公如齊。月者，

善公既能念恩，尊事齊桓，又合古五年一朝之義，故錄之。【疏】注「月者」至「齊桓」。○解云：即上十年「春，王正月，公如齊」，彼注云「月者，僖公本齊所立，桓公德衰見叛，獨能念恩朝事之，故善錄之」故也。^②○注「又合」至「錄之」。○解云：何氏以為古者天子五年一巡守，諸侯亦五年一朝，天子分天子諸侯為五部，^③部朝一年，五年而徧，其小國事大國亦然，故以十年朝齊，今又往朝，是為合古。桓元年傳云：「諸侯時朝乎天子，天子之郊，諸侯皆有朝宿之邑焉。」注云「緣臣子之心，莫不欲朝朝莫夕，王者與諸侯別治，勢不得自專朝，故即位比年使大夫小聘，三年使上卿大聘，四年又使大夫小聘，五年一

朝。王者亦貴得天下之歡心，以事其先王，因助祭以述其職，故分四方諸侯為五部，部有四輩，輩主一時。《孝經》曰「四海之內，各以其職來助祭」，《尚書》云「群后四朝，敷奏以言，明試以功，車服以庸」是也。

楚人伐徐。

三月，公會齊侯、宋公、陳侯、衛侯、鄭伯、許男、曹伯盟于牡丘，遂次于匡。

公孫敖率師及諸侯之大夫救徐。言次

者，刺諸侯緩於人恩，既約救徐而生事止次不自往，遣大夫往，卒不能解也。大夫不序者，起會上大夫，君已目，故臣凡也。內獨出名氏者，臣不得因君殊尊省文，別尊卑也。○別，彼列反。【疏】注「臣不」至「省文」。○解云：正以上言公會齊侯以下，是殊尊魯之文。今若不舉

①「中」，原作「小」，今據京都本、再造善本、中華本、閣本改。

②「故善錄之故也」，阮校：「浦鏜云：下「故」當作「是」。按：浦說是也。」杉浦校：「單疏鈔本「故也」作「是也」。」

③下「子」字，當「下」字之訛，閣本作「下」是。

內大夫名氏，即因君鄉者殊尊之經而省文。

夏，五月，日有食之。是後秦獲晉侯，齊桓

公卒，楚執宋公，霸道衰，中國微弱之應。

秋，七月，齊師、曹師伐厲。月者，善錄義

兵。厲，葵丘之會叛天子之命也。曹稱師者，桓公霸道

衰，曹獨能從之，征伐不義，故褒之，所以勸勉不能，扶助

霸功，激揚解惰也。○厲，如字，舊音賴。激，古歷反。

解，古賣反。惰也，徒卧反。【疏】注「月者善錄義兵」。

○解云：正以侵伐例時故也。其例時者，即上十一年

「冬，楚人伐黃」之屬是也。

八月，蠆。公久出，煩擾之所生。○蠆，之戎反。

九月，公至自會。桓公之會不致，此

何以致？據柯之會不致。久也。久暴師衆過三

時。○暴，步卜反。

季姬歸于鄆。

己卯，晦，震夷伯之廟。晦者何？冥

也。書日而冥。①○冥，亡丁反，又亡定反，注同。【疏】

「晦者何」。○解云：欲言月晦，例所不書，欲言晝冥，亦

非常錄，故執不知問。震之者何？雷電擊夷伯

之廟者也。夷伯者，曷爲者也？季氏之

孚也。孚，信也。季氏所信任臣。【疏】「震之者何」。

○解云：欲言天震，文不言天，欲言地震，又無地稱，故執

不知問。加之者，以震有二種故也，且避問輕重兩舉。

云云之說，在隱九年。季氏之孚則微者，其稱夷

伯何？大之也。曷爲大之？據陽虎稱盜。

【疏】注「據陽虎稱盜」。○解云：即是八年「盜竊寶玉大

弓」是也。②天戒之，故大之也。明此非但爲微者

異，乃公家之至戒，故尊大之使稱字，過于大夫以起之，

所以畏天命。孔子曰：「君子有三畏：畏天命，畏大人，

畏聖人之言。」何以書？記異也。此象桓公德衰，

彊楚以邪勝正，僖公蔽於季氏，季氏蔽於陪臣，陪臣見信

①「書」，鄂本、閣本作「畫」。阮校：「諸本皆誤「書」字。」

②「是八年」，杉浦校：「單疏鈔本『是』作『定』。」今

按：「盜竊寶玉大弓」爲定公八年經文，「是八年」當

「定八年」之誤。

得權，僭立大夫廟，天意若曰蔽公室者，是人也，當去之。
○去，起呂反。

冬，宋人伐曹。

楚人敗徐于婁林。謂之徐者，爲滅杞，不知

尊先聖法度，惡重，故狄之也。不月者，略兩夷狄也。○爲，于僞反。【疏】注「不月」至「狄也」。○解云：正以敗例書月，即莊十年「春，王正月，公敗齊師于長勺」，「秋，九月，荆敗蔡師于莘」是也。以其非兩夷，故書月。

十有一月，壬戌，晉侯及秦伯戰于韓，

獲晉侯。此偏戰也，何以不言師敗績？據

泓之戰言宋師敗績。○泓，烏宏反。君獲不言師敗

績也。舉君獲爲重也。釋不書者，以獲君爲惡，書者，

以惡見獲，與獲人君者，皆當絕也。主書者，從獲人例。

○惡，烏路反。【疏】注「釋不書」至「人例」。○解云：正

決二十一年「釋宋公」之經矣。①然莊十年「荆敗蔡師于

莘，以蔡侯獻舞歸」，傳云：「曷爲不言其獲？」不與夷狄

之獲中國也。」然則秦、楚同類，得獲晉侯者，正以爵稱

伯，非真夷狄，故與楚異。

十有六年，春，王正月，戊申，朔，賁石

于宋五。是月，六鷁退飛，^②過宋都。曷爲

先言賁而後言石？據星賁後言賁。○十六年，本

或從此下別爲卷。案《七志》、《七錄》何注止十一卷，^③

《公羊》以閔附莊故也，後人以僖卷大，輒分之爾。賁，于

敏反。是月，如字，或一音徒兮反。六鷁，五歷反，水鳥。

【疏】注「據星賁後言賁」。○解云：即莊七年「夜中，星賁

①「決」下，杉浦校：「單疏鈔本有「下」字，是也。」

②「六鷁」，阮校：「《釋文》作「六鷁，五歷反」。《經義雜

記》曰：「《說文》：「鷁，鳥也，從鳥，兒聲。《春秋傳》

曰：六鷁退飛。」不收從「益」字。《左氏》正義曰「鷁

字或作鷁」。《釋文》：「六鷁，本或作鷁。」《公》、《穀》

釋文皆云「六鷁，五歷反」，可證三傳本皆作「鷁」，與

《說文》同。今《公羊》注疏皆作「鷁」，《穀梁》注疏皆

作「鷁」，惟經文「六鷁退飛」此一字從「益」。蓋因唐

時《左傳》已有作「鷁」者，故後人據以易二傳也。《穀

梁》疏引賈逵云：「鷁，水鳥，陽中之陰，象君臣之訟

鬭也。」以「鬭」解「鷁」，取同聲爲詁，可證《左傳》字本

從兒。」

③「止」，原作「此」，宋本《釋文》作「上」，余本作「止」，當

作「止」。今據余本改。

如雨」是也。賁石記聞，聞其碩然，視之則石，察之則五。是月者何？僅逮是月也。是月邊也。魯人語也。在正月之幾盡，故曰劣及是月也。○碩然，之人反，又大年反，聲響也。一音芳君反。本或作「辟」，^①八耕反。僅，其靳反，劣也。逮，音代，又大計反，及也。幾，音祈。【疏】「是月者何」。○解云：正以言異常例，故執不知問。○注「是月」至「語也」。○解云：案上十年傳云「踊爲文公諱」，何氏云：「踊，豫也，齊人語。若闕西言渾矣。」是以《春秋》之內，於此乎悉解爲齊人語，而此一文獨爲魯人語者，以是經文孔子作之，孔子魯人，故知魯人語。彼皆是諸傳文，乃胡毋生、公羊氏皆爲齊人，故解爲齊人語。^②注在正月之幾盡者，謂晦日乃在正月之欲盡矣。何以不日？據五石言日。【疏】注「據五石言日」。○解云：等是災異，何故五石書言「戊申朔」，而六鷁不書日乎？^③故難之。晦日也。凡災異，晦日不日，日食是也。日食嘗於晦朔，^④不日，晦可知也。六鷁無常，^⑤故言是月以起晦也。【疏】注「凡災」至「不日」。○解云：即莊十八年「三月，日有食之」之屬是也。今此亦晦，故不書日。○注「日食」至「起晦也」。○

解云：案隱三年「王二月，己巳，日有食之」，傳云：「日食，則曷爲或日或不日？或言朔或不言朔？曰某月某日朔，日有食之者，食正朔也。」注云「桓三年「秋，七月，壬辰，朔，日有食之」是也」。傳又云：「其或日或不日，或失之前，或失之後。失之前者，朔在前也。」注云「謂二日食，己巳，日有食之」是也」。傳又云：「失之後者，朔在後也。」注又云「謂晦日食，莊十八年「三月，日有食之」是也」。然則日食，亦有二日食，此注何言日食常於晦朔乎？二日食者，雖非正朔，若欲比晦言之，亦得謂之朔矣。言若正朔食，朔日並言，若二日食，則言日，則知日、朔並不言，是晦日明矣。故云「不日，晦可知」也。晦則

① 「辟」，原作「碑」，今據余本、中華本、閩本、宋本《釋文》改。

② 「故」，京都本作「欲」。

③ 「鷁」，單疏鈔本、閩本、監本、毛本作「鷁」。杉浦校：「按：陸氏《釋文》作「六鷁」，與單疏本合。」

④ 「嘗」，余本作「常」。據疏引，則作「常」是。

⑤ 「鷁」，阮校：「鄂本、宋本同，閩、監、毛本「鷁」作「鷁」，爲錯見字。今本《公羊》經、注及疏皆作「鷁」也。」

何以不言晦？據上言朔。《春秋》不書晦也。

事當日者日，平居無他卓偉，無所求取，言晦朔也，趙盟奚戰是也。○偉，尤委反。^①趙，翠軌反。【疏】注「平居無他卓偉」。○解云：謂無他卓異偉戾，平常之事也。○

注「無所」至「戰是也」。○解云：即桓十七年「二月，丙

午，及邾婁儀父盟于趙」，《春秋說》以爲二月晦矣。「五

月，丙午，及齊侯戰于奚」，^②《春秋說》以爲五月之朔也。

然則此傳云「《春秋》不書晦」，謂平常之事，下文「朔有事

則書，晦雖有事不書」者，謂卓偉之事，合書晦朔矣。朔

有事則書，重始，故書以錄事，若泓之戰及此皆是也。

【疏】注「若泓」至「是也」。○解云：即下二十二年「冬，十

有一月，己巳，朔，宋公及楚人戰于泓」，及此經皆書朔，

是其卓偉之事書朔也。晦雖有事不書。重始而終

自正，故不復書以錄事。○不復，扶又反，下同。曷爲

先言六而後言鷁？據賈石後言五。六鷁退

飛，記見也。視之則六，察之則鷁，徐而察

之則退飛。鷁小而飛高，故視之如此，事勢然也。宋

都者，宋國所治也。人所聚曰都。言過宋都者，時獨過

宋都退飛。○所治，直吏反。五石六鷁何以書？

記異也。外異不書，此何以書？爲王者

之後記異也。王者之後有亡徵，非親王安存之象，^③

故重錄爲戒，記災異也。石者，陰德之專者也，鷁者，鳥

中之耿介者，皆有似宋襄公之行。^④襄欲行霸事，不納公

子目夷之謀，事事耿介自用，卒以五年見執，六年終敗，

如五石六鷁之數。天之與人，昭昭著明，甚可畏也。於

晦朔者，示其立功善甫始而敗，將不克終，故詳錄天意

也。○爲王，于僞反，注同。耿介，音戒。之行，下孟反。

【疏】注「卒以五年見執」。○解云：即下二十一年「執宋

公以伐宋」是。計有六年而言五年者，據實日月言之，以

合五石之數故也。又六年終敗者，即下二十二年「戰于

泓，宋師敗績」是也。計有七年而言六年者，如上說。○

注「天之與人」至「畏也」者。○解云：《春秋說》文也。

①「尤」，宋本《釋文》作「九」。

②「侯」，阮校：「按：桓十七年經作『師』。」杉浦校：「單

疏鈔本『侯』作『師』，當據以訂正。」

③「親」，阮校：「鄂本作『新』，當據正。」

④「似」，京都本、再造善本作「以」。

三月，壬申，公季友卒。其稱季友

何？據犂戰名，不稱季，來歸不稱友。【疏】注「據犂」

至「稱季」。○解云：即上元年「冬，十月，壬午，公子友帥

師敗莒師于犂」是也。○注「來歸不稱友」。○解云：閔

二年「季子來歸」是也。①賢也。閔公不書葬，故復於

卒賢之，明季子當蒙討慶父之功，遏牙存國，終當錄也。

不稱子者，上歸本當稱字，起事言子。【疏】注「閔公」至

「錄也」。○解云：正以君弑賊不討，惡臣子不討賊，君喪

無所繫注，②前閔公不書葬，恐季子有甚惡，故書字見其

賢。○注「不稱子」至「言子」。○解云：即閔元年「歸」之

下，注云「不稱季友者，明齊繼魯，本感落姑之託，③故令

與高子俱稱子起其事」是也。

夏，四月，丙申，鄆季姬卒。

秋，七月，甲子，公孫慈卒。日者，僖公賢

君，宜有恩禮於大夫，故皆日也。一年喪骨肉三人，故曰

痛之。④【疏】注「日者」至「皆日也」。○解云：以所傳聞

之世，大夫之卒，不問有罪以否，⑤例不日，隱元年十二月

「公子益師卒」是也。今此季友、公孫慈之卒皆書日者，

正以賢君宜有恩禮於大夫故也。然則言皆者，皆季友與

公孫慈也。其鄆季姬之卒，例自合日，即上九年「秋，七月，乙酉，伯姬卒」之屬是也。○注「一年」至「痛之」。○解云：言由其是賢君，故宜痛骨肉之卒，若直見是賢君，宜有禮于大夫，但當見季一人書日，⑥故知宜痛其頻死故也。

冬，十有二月，公會齊侯、宋公、陳侯、

衛侯、鄭伯、許男、邢侯、曹伯于淮。月者，危

桓公德衰，任豎刀、易牙，墮功滅項自此始也。○墮，許

規反。【疏】注「月者」至「此始也」。○解云：正以盟會之

例，大信書時，今而書月，故如此解。知任豎刀、易牙者，

下十八年傳文。言墮功滅項者，謂墮毀霸功而滅項，即

下十七年「夏，滅項」是也。

①「二」，阮校：「浦鏜云：『元』誤『二』。是也。」

②「注」，原作「往」，今據京都本、再造善本、閣本改。

③「落」，阮校引盧文弨曰：「當依《公羊》本字作『落姑』。」

④「日」，閣本作「日」。今按：上文云「日者，僖公賢君，宜有恩禮於大夫，故皆日也」，則此當作「日」。

⑤「以」，阮校：「何校本同，閩、監、毛本『以』作『與』。」

⑥「見」，杉浦校：「單疏鈔本作『是』。」

十有七年，春，齊人、徐人伐英氏。稱氏

者，《春秋》前黜稱氏也。伐國而舍氏言之者，非主名，故伐之得從國舉。【疏】注「伐國」至「主名」。○解云：若其主名，即爵等是也。

夏，滅項。孰滅之？齊滅之。以言滅，

知非內也。以不諱知齊滅。○項，戶講反，國名。【疏】

注「以言滅知非內也」。○解云：案經直言滅，不載主名，

何知非內滅之？正以《春秋》之例，內大惡諱，今言滅，

知非內矣。○「以不諱知齊滅」。①○解云：《春秋》之

例，為賢者諱，故上十二年「楚人滅黃」不為諱，今諱不言

齊人，故知齊滅之。曷為不言齊滅之？據齊師滅

譚。【疏】注「據齊師滅譚」。○解云：在莊十年冬也。

為桓公諱也。《春秋》為賢者諱，此滅人之

國，何賢爾？君子之惡惡也疾始，絕其始，則

不得終其惡。○為桓，于僞反，下及注同。惡惡，並如

字，一讀上烏路反。善善也樂終。樂賢者終其行。

○行，下孟反。桓公嘗有繼絕、立僖公也。【疏】注

「立僖公也」。○解云：即元年是也。存亡之功，存

邢、衛、杞。【疏】注「存邢衛杞」。②○解云：存邢，上元

年「城邢」是也。存衛，上二年「城楚丘」是也。存杞，上

十四年「城緣陵」是也。故君子為之諱也。言「嘗」

者，時桓公德衰功廢而滅人，嫌當坐，故上述所嘗盛美而

為之諱，③所以尊其德，彰其功。傳不言服楚，獨舉繼絕

存亡者，明繼絕存亡，足以除殺子糾，滅譚、遂、項，覆終

身之惡。服楚功在覆篡惡之表，所以封桓公，名當如其

事也。④不月者，桓公不坐滅，略小國。【疏】注「傳不言

服楚」至「亡者」。○解云：其服楚在上四年，傳云「曷為

再言盟？喜服楚也」是也。○注「明繼」至「身之惡」。

○解云：殺子糾者，即莊九年九月「取子糾殺之」是也。

滅譚，即莊十年「冬，十月，齊師滅譚」是也。其滅遂者，

即莊十三年「夏，六月，齊人滅遂」是也。以繼絕除殺子

糾，以存三亡國除其三滅，故云「覆終身之惡」。○注「服

楚」至「事也」。○解云：即莊九年「齊小白入于齊」，是其

①「以」上，單疏鈔本有「注」字。

②「杞」，原作「祀」，今據中華本改。

③「嘗」，京都本、再造善本作「當」。

④「名」，阮校：「鄂本『名』作『各』，是也。」

纂文也。而言「之表」者，取以蓋藏之。○注「不月」至「小國」。○解云：言滅國例書月者，惡其纂而罪之。今桓公功足除其滅，是以不月，故云「不坐滅」也。而滅譚滅遂皆月者，是時未足以覆之也。「略小國」者，欲道既諱不言齊，^①知是誰滅？而不書月，又以略小國故也。

秋，夫人姜氏會齊于卞。○卞，皮彥反。

九月，公至自會。

十有二月，^②乙亥，齊侯小白卒。

十有八年，春，王正月，宋公會曹伯、

衛人、邾婁人伐齊。月者，與襄公之征齊，善錄義

兵。【疏】注「月者」至「征齊」。○解云：正以侵伐例時故也。戰不言伐者，莊十年師解，故難之。^③

夏，師救齊。

五月，戊寅，宋師及齊師戰于甗，齊師敗績。戰不言伐，此其言伐何？宋公與

伐而不與戰，故言伐。《春秋》伐者爲客，

伐者爲主。曷爲不使齊主之？據甲寅衛人及

齊人戰。○甗，魚輦反，又音言。與伐，音預，下「不與」

同。【疏】「宋公」至「故言伐」。○解云：謂宋公但與伐而不與戰，故不得舉重，是以兩舉之。○注「據甲」至「人戰」。○解云：即莊二十八年「春，王三月，甲寅，齊人伐衛。衛人及齊人戰，衛人敗績」，傳云：「《春秋》伐者爲客，伐者爲主，故使衛主之也。」彼注云「戰序上言及者，爲主」是也。與襄公之征齊也。曷爲與襄公之征齊？據齊桓公霸者，猶不與征衛。【疏】「與襄公之征齊」也。○解云：謂使征而正之。征是上討下之辭。○注「據齊」至「征衛」。○解云：即莊二十八年春，「衛人及齊人戰」是也。桓公死，豎刁、易牙爭權不葬，^④爲是故伐之也。不爲文實者，保伍連率，本有用兵征伐不義之道。○刀，音彫。爲是，于僞反，注

①「不言齊」下，阮校引浦鏜云：「疑脫「不」字。」

②「十有二月」，阮校：「唐石經「十」上有「冬」字，諸本誤脫。」

③「戰不言伐者莊十年師解故難之」，阮校：「何校本云：此十三字當在下疏「宋公至故言伐」之前。」

④「豎刁」，阮校：「《釋文》、唐石經作「豎刁」，閩、監、毛本同。」

同。【疏】注「不爲文」至「之道」。○解云：其爲文實者，即上元年春，「齊師、宋師、曹師次于聶北，救邢」，傳云：「曷爲先言次，而後言救？」君也。君則其稱師何？不與諸侯專封也。曷爲不與？實與而文不與。文曷爲不與？諸侯之義不得專封也。諸侯之義不得專封，則其曰實與之何？上無天子，下無方伯，天下諸侯有相滅亡者，力能救之，則救之可也。其二年「城楚丘」之下，亦復發文實之傳矣。今此經何以不言宋師伐齊，傳云此公也。其稱師何？不與諸侯專征。曷爲不與？實與而文不與。文曷爲不與？諸侯之義不得專征。諸侯之義不得專征，則其曰實與之何？上無天子，下無方伯，天下諸侯有不道者，力能征之，則征之可也。正以諸侯本無專封之道，是以元年、二年之經，皆爲文實，以保伍連率，本有用兵征不義之道，是以不貶宋公稱師矣。

狄救齊。

秋，八月，丁亥，葬齊桓公。

冬，邢人、狄人伐衛。

狄稱人者，善能救齊，雖拒義兵，猶有憂中國之心，故進之。不於救時進之者，辟襄公，不使義兵壅塞。【疏】注「狄稱人」至「兵壅塞」。○解

云：案《穀梁傳》「狄救齊」，傳云：「善救齊也。」又云「邢人、狄人伐衛」，傳云：「其稱人何也？善累而後進之。伐衛，所以救齊也。」何氏廢之曰：①「即伐衛救齊當兩舉，如伐楚救江矣。又傳以爲江遠楚近，故伐楚救江。今狄亦近衛而遠齊，其事一也，於義《穀梁》爲短。」以此言之，則何氏之意適自伐衛，不爲救齊之故。而此注又以「狄稱人者，善能救齊」者，謂以其上能救齊，是以於此進之，不謂此時伐衛爲救齊也。所以不於救時進者，不使義兵壅塞也。

十有九年，春，王三月，宋人執滕子嬰

齊。名者，著葵丘之會，叛天子命者也。不得爲伯討者，不以其罪執之，妄執之。所以著有罪者，爲襄公殺恥也。襄公有善志，欲承齊桓之業，執一惡人，不能得其過，故爲見其罪。所以助賢者，養善意也。月者，錄責之。○爲襄，于僞反，下「故爲」、「起爲」、「爲襄公」、「深爲」、「若不爲」皆同。見，賢徧反。【疏】注「名者」至「命者」。○解云：即上九年「夏，公會宰周公、齊侯、宋子、衛侯、鄭伯、許男、曹伯于葵丘」，「九月，戊辰，諸侯盟于葵

①「之」，阮校：「按：『之』字乃『疾』字之誤。」

丘」，傳云「桓公震而矜之，叛者九國」是也。○注「不得爲伯討」。○解云：上四年傳云：「稱侯而執者，伯討也。稱人而執者，非伯討也。」今此不稱侯，故解之。○注「月者錄責之」。○解云：正以執例書時，即上四年夏，「齊人執陳袁濤塗」，五年「冬，晉人執虞公」之類是也。今此書月者，錄責之也。

夏，六月，宋人、曹人、邾婁人盟于曹南。^①因本會于曹南，盟故以地，實邾婁。說在下。

【疏】注「因本」至「在下」。○解云：言此盟之前，相與于曹南矣。其實此盟在邾婁，故言「實邾婁」矣。

鄫子會于邾婁。^②其言會盟何？據言

諸侯會盟不錄，^③及曹伯襄言會諸侯。【疏】注「據外」至「會諸侯」。○解云：舊本皆無「及」字。言外諸侯會盟不錄者，正以竟《春秋》上下，無外諸侯會盟之文。若存

「及」，宜下句讀之。後會也。說與會伐宋同義。君不

會大夫，刺後會者，起實君也。地以邾婁者，起爲邾婁事也。不言君者，爲襄公諱也。魯本許嫁季姬於邾婁，季姬淫佚，使鄫子請已而許之，二國交忿，襄公爲此盟，欲和解之。既在會間，^④反爲邾婁所欺，執用鄫子，恥辱加

於宋無異，故沒襄公，使若微者也。不於上地以邾婁者，深爲襄公諱，使若不爲邾婁事盟，而鄫子自就邾婁，爲所執者也。上盟不日者，深順諱文，從微者例，使若下執，不以上盟爲辨也。會盟不日者，言會盟不信已明，無取於日，自其正文也。【疏】注「說與會伐宋同義」。○解云：即莊十四年「春，齊人、陳人、曹人伐宋。夏，單伯會伐宋」，傳云：「其言會伐宋何？後會也。」彼注云：「本期而後，故但舉會。書者，刺其不信。」○注「君不會大夫」。○解云：案莊九年春，「公及齊大夫盟于暨」，傳云「公曷爲與大夫盟？齊無君也。然則何以不名？爲其諱與大夫盟也，使若衆然」。又莊二十二年秋，「及齊高偃盟于防」，傳云：「曷爲不言公？諱與大夫盟也。」皆是君不會大夫之辭。○注「起實君也」。○解云：言起上宋人、曹人之屬，實是宋公、曹伯耳。○注「地以邾婁」。○

①「宋人」，阮校：「《左氏》、《穀梁》作『宋公』。」

②「鄫子會」下，阮校：「唐石經、宋本有『盟』字，此脫。」

③「據外」，原作「據言」。余本、宋本《釋文》作「據外」，疏標起訖亦作「據外」，徐彥疏曰「言外諸侯會盟不錄者」，則作「據外」是。今據改。

④「會」，余本、鄂本作「人」。

解云：正以二十八年夏，「公會晉侯」以下「盟于踐土」。陳侯如會，傳云：「其言如會何？後會也。」然則彼言陳侯如會，此亦宜言鄫子如會，而言「于邾婁」，起爲邾婁事也。○注「不言君者」。○解云：上曹南之盟，不言宋公等是也。○注「季姬淫泆」至「微者也」。○解云：即上十四年「夏，六月，季姬及鄫子遇于防，使鄫子來朝」，傳云：「鄫子曷爲使乎季姬來朝？內辭也。非使來朝，^①使來請己也。」○注「不於上」至「執者也」。○解云：上經云「盟于曹南」者，實是盟于邾婁，故以此解之。所以不於上經地以邾婁者，深爲襄公諱，使若不爲邾婁事盟，而鄫子自就邾婁所見執者也。^②○注「上盟不」至「日者」。^③○解云：《春秋》上下，微者之盟，例皆書時，而下文冬「會陳人、蔡人、楚人、鄭人盟于齊」之屬是。^④今此乃以不日爲微者例者，正以宋襄賢君，雖使微者，有可采取，故宜書月。隱元年注云「微者盟例時，不能專正，故責略之。此月者，隱公賢君，雖使微者，有可采取，故錄也」是也。○注「會盟」至「正文也」。○解云：正以《春秋》之例，不信者日故也。言自其正文也者，謂既言會盟，即是不信之正文，不勞書日以見。

己酉，邾婁人執鄫子用之。惡乎用

之？用之社也。其用之社奈何？蓋叩其鼻以血社也。^⑤惡無道也。不言社者，本無用人之道，言用之已重矣，故絕其所用處也。日者，魯不能防正其女，以至於此，明當痛其女禍而自責之。○惡乎，音烏。惡無，烏路反。用處，昌慮反。【疏】注「日者魯」至「自責之」。○解云：正以凡執例時，即上四年夏，「齊人執陳袁濤塗」之屬是也。今日，故解之。

秋，宋人圍曹。

- ① 「來」，原作「外」，今據僖公十四年傳及閩本改。
- ② 「而鄫子自就邾婁」，阮校引齊召南云：「下疑脫一『爲』字。」
- ③ 「注上盟不至日者」，阮校：「閩、監、毛本作『上盟不至者例』是也。」
- ④ 「而」，阮校引浦鏜云：「當『即』字誤。」
- ⑤ 「血社」，阮校：「《周禮·肆師》注引《春秋》僖十九年夏邾人執鄫子用之，傳曰：『用之者何？』蓋叩其鼻以衄社也。」惠士奇云：「《山海經·東山經》『祠，毛用一犬，祈神』，注云：『神音餌，以血塗祭爲神也。』《公羊傳》『蓋叩其鼻以衄社』。今本《公羊》作『血』，訛。《穀梁》作『衄社』，與鄭注合。」

衛人伐邢。

冬，公會陳人、蔡人、楚人、鄭人盟于

齊。因宋征齊有隙，爲此盟也。是後楚遂得中國，霍之

會，執宋公。【疏】注「因宋征」至「執宋公」。○解云：謂

上十八年襄公征齊，齊與宋有間隙，齊遂構會諸侯之人而

爲此盟，以謀宋矣。「霍之會，執宋公」，即下二十一年

「秋，宋公、楚子、陳侯、蔡侯、鄭伯、許男、曹伯會于霍，執

宋公以伐宋」是也。

梁亡。此未有伐者，其言「梁亡」何？

據蔡潰以自潰爲文，舉侵也。【疏】注「據蔡」至「侵也」。

○解云：即上四年春，「公會齊侯」云云，「侵蔡，蔡潰」是

也。自亡也。其自亡奈何？魚爛而亡也。

梁君隆刑峻法，一家犯罪，四家坐之。一國之中，無不被

刑者，百姓一旦相率俱去，狀若魚爛。魚爛從內發，故云

爾。者其「自亡」者，^①明百姓得去之，君當絕者。【疏】

「魚爛而亡也」。^②○注「梁君」至「絕者」。○《史記》、《春

秋說》有此文也。

二十年，春，新作南門。何以書？

譏。何譏爾？門有古常也。惡奢泰，不奉古

制常法。○惡，烏路反。【疏】注「惡奢」至「常法」。○解

云：言其直是奢泰，不依古法，非僭天子也。隱五年傳

云：「始僭諸侯昉於此乎？」^③前此矣。前此，則曷爲始

於此？^④僭諸公猶可言也，僭天子不可言也。」定二年

「雉門及兩觀災」之下，何氏云：「立雉門兩觀不書者，僭

天子不可言，雖在《春秋》中猶不書。」然則此新作南門書

之，知不僭天子也。

夏，郕子來朝。郕子者何？未有存文，

嫌不名，故執不知問。○郕，古報反，姬姓之國，下同。

【疏】注「未有存」至「知問」。○解云：桓二年「夏，四月，

取郕大鼎于宋」。隱二年傳云：「始滅昉於此乎？」前此

矣。何氏云：「前此者，在春秋前，謂宋滅郕是也。」然則

宋人滅郕在春秋之前，是以桓二年「取郕大鼎于宋」，自

爾以來，不見存在之文。若然，則是失地之君，例合書

①「者其自亡者」，阮校：「鄂本、宋本作「著其自亡者」，此本誤。」

②「魚爛而亡也」，此疏與疏例不合，疑有訛誤。

③「諸侯」，隱公五年傳作「諸公」。

④「於」，阮校：「案：隱五年傳「於」作「乎」。」

名，而來朝不名，故執不知問。失地之君也，何以不名？據鄧、穀名。【疏】注「據鄧穀名」。○解云：即桓七年「夏，穀伯綏來朝。鄧侯吾離來朝」，傳云「皆何以名？失地之君」是也。兄弟辭也。郕，魯之同姓，故不忍言其絕賤，明當尊遇之，異於鄧、穀也。書者，喜內見歸。【疏】注「不忍」至「絕賤」。○解云：即不書其名是也。何者？若非兄弟，宜書其名，絕而賤之。○注「明當」至「見歸」。○解云：正以穀、鄧書名，而此不名也。

五月，乙巳，西宮災。西宮者何？小寢也。小寢則曷爲謂之西宮？有西宮則有東宮矣。魯子曰：「以有西宮，亦知諸侯之有三宮也。」西宮者，小寢內室，楚女所居也。禮，諸侯娶三國女，以楚女居西宮，知二國女於小寢內各有一宮也，故云爾。禮，夫人居中宮，少在前，右媵居西宮，左媵居東宮，少在後。【疏】「西宮者何」。○解云：欲言是廟，不書其謚，欲言居寢，而書宮舉災，故執不知問。○注「西宮者」至「云爾」。○解云：案襄九年「春，宋火」，傳云：「曷言或言災，^①或言火？大者曰災，小者曰火。」何氏云：「大者，謂正寢、社稷、宗廟、朝廷也。」此西宮者，小寢內室，楚

女所居也，何故不言火而書災？彼傳又云：「內何以不言火？內不言火者，甚之也。」彼注云：「《春秋》以內爲天下法，動作當先自克責，故小有火如大有災。」是以雖小言災耳。○「禮夫人居中宮」。○解云：王者之制也。西宮災，何以書？記異也。^②是時僖公爲齊所脅，以齊媵爲嫡，^③楚女廢在西宮而不見恤，悲愁怨曠之所生也。言西宮不繫小寢者，小寢夫人所統，妾之所繫也。天意若曰楚女本當爲夫人，不當繫於齊女，故經亦云爾。○爲適，丁歷反，又作「嫡」。

鄭人入滑。

秋，齊人、狄人盟于邢。狄稱人者，能常與中國也。

冬，楚人伐隨。叛楚故也。

^①「曷云」，杉浦校：「單疏鈔本作『曷爲』，毛本亦然。按：作『曷爲』與襄九年傳合。」

^②「異」，阮校：「唐石經、鄂本作『記災也』，諸本作『異』，誤。」

^③「嫡」，阮校：「宋本同，鄂本、閩、監、毛本作『適』。《釋文》：適，又作嫡。」

二十有一年，春，狄侵衛。貶狄者，爲犯中國諱。○爲，于僞反，下「不爲襄」，下文「爲執」皆同。

宋人、齊人、楚人盟于鹿上。

夏，大旱。何以書？記災也。新作南門之所生。

秋，宋公、楚子、陳侯、蔡侯、鄭伯、許男、曹伯會于霍，執宋公以伐宋。孰執之？楚子執之。以下獻捷貶。○霍，《左氏》作「孟」。

【疏】「會于霍」。○解云：《左氏》作「孟」，《穀梁》作「零」，蓋誤，或所見異。○注「以下獻捷貶」。○解

云：即下文「冬，楚人使宜申來獻捷」，傳云「此楚子也，其稱人何？貶。曷爲貶？爲執宋公貶」是也。曷爲不

言楚子執之？據溴梁盟下執莒子、邾婁子，復出晉人也。○溴，古閼反。【疏】注「據溴梁盟」。○解云：即

襄十六年春，「公會晉侯、宋公」以下「于溴梁」，「晉人執莒子、邾婁子以歸」是也。不與夷狄之執中國也。

不與執爲重，復舉伐者，劫質諸侯，求其國，事當起也。不爲襄公諱者，守信見執，無恥。說在下也。【疏】注「劫

質諸侯」。○解云：言劫諸侯以爲質，而求其國，事當起也，是以執伐兩舉，見其外貪利也。下云「楚人謂宋人曰『子不與我國，吾將殺子君矣』」是也。

冬，公伐邾婁。

楚人使宜申來獻捷。此楚子也，其稱

人何？據稱使知楚子。貶。曷爲貶？據齊侯

獻戎捷不貶。爲執宋公貶。曷爲爲執宋公

貶？據上已沒不與執中國。宋公與楚子期以

乘車之會，蓋鹿上之盟。【疏】注「蓋鹿上之盟」。○

解云：即上文春「宋人、齊人、楚人盟于鹿上」是也。言鹿

上盟爲此約。公子目夷諫曰：「楚，夷國也，

彊而無義，請君以兵車之會往。」宋公曰：

「不可。吾與之約以乘車之會，自我爲之，

自我墮之，曰不可。」終以乘車之會往。楚

人果伏兵車，執宋公以伐宋。詐讓劫質諸侯，^①

①「詐讓」，阮校：「《釋文》作『誰讓』，云：誰，本亦作詐。」

求其國，當絕，故貶。○墮，許規反。謏，音許援反，詐也，又音援。^①宋公謂公子目夷曰：「子歸守國矣。國，子之國也。吾不從子之言，以至乎此。」公子目夷復曰：「君雖不言國，國固臣之國也。」^②所以堅宋公意，絕彊楚之望。【疏】「君雖不言國」。○解云：即言君假令不道是臣之國，今國當是爲臣之國矣。所以堅宋公意，欲使宋公乃心在楚，不急求還。○注「絕彊楚之望」。○解云：欲絕楚人，使知宋難取，不復望之。於是歸，設守械而守國。楚人謂宋人曰：「子不與我國，吾將殺子君矣。」宋人應之曰：「吾賴社稷之神靈，吾國已有君矣。」楚人知雖殺宋公，猶不得宋國，於是釋宋公。宋公釋乎執，走之衛。襄公本謂公子目夷曰「國，子之國也」，宋公愧前語，故慙不忍反，走之衛。不書者，執解而往，非出奔也。○守，手又反，又如字。應，應對之應。【疏】注「走之衛」至「奔也」。○解云：正決襄十四年夏，「衛侯衍出奔齊」也。公子目夷復曰：「國爲君守之，君曷爲不

入？」然後逆襄公歸。凡出奔歸書，執獲歸不書

者，出奔已失國，故錄還，應盜國，與執獲者異，臣下尚隨君事之，未失國，不應盜國，無爲錄也。○國爲，于僞反，

下「爲襄」、「爲公子」，注「爲沒」、「故爲」皆同。【疏】注

「凡出奔」至「爲錄也」。○解云：正以桓十五年夏，鄭伯

突云云，彼傳云：「曷爲或言歸，或言復歸？」復歸者，出

惡，歸無惡。復入者，出無惡，人有惡。入者出入惡，歸

者出入無惡。不應盜國，盜國即入與復入是也，《春秋》

皆錄其歸以別之。其執獲而歸不書者，本未失國，無義

可著，何錄之有？案下二十八年「三月，丙午，晉侯入

曹，執曹伯畀宋人」，冬，「曹伯襄復歸于曹」。晉人執衛

侯歸之于京師，三十年「衛侯鄭歸于衛」。哀七年「秋，

公伐邾婁。八月，己酉，入邾婁，以邾婁子益來」，八年

①「墮許規反謏音許援反」，宋本《釋文》作「墮之，許規反。誰謏，誰，本亦作詐。謏音許元反」。

②「君雖不言國國固臣之國也」，阮校：「唐石經原刻『言』下不疊『國』字，後磨改同今本。此行及前一行皆本九字，此行後磨改，故亦十字。讀『君雖不言』句，『國固臣之國也』句。」

夏，「歸邾婁子益于邾婁」。然則三者皆執獲而歸，所以書之者，曹伯之下注云「執歸不書，書者名惡當見」，其曹伯名者，刺天子歸有罪也。衛侯歸下注：「爲殺叔武，^①惡天子歸有罪也。執歸不書，主書者，名惡當見也。」邾婁子益之下注云：「善魯能悔過歸之。」惡乎捷？捷乎宋。以上言伐宋。○惡，音烏。曷爲不言「捷乎宋」？據戎捷也。爲襄公諱也。襄公本會楚，欲行霸，憂中國也。不用目夷之言，而見詐執伐宋，幾亡其國，故諱爲沒國文，所以申善志。不月者，因起其事。○幾，音祁。【疏】注「不月者因起其事」。○解云：正以獻戎捷書六月也。起事者，正以《春秋》之義，滅國例月，莊十年「冬，十月，齊師滅譚」，十三年「夏，六月，齊人滅遂」之類是也。今此宋公幾亡國，是以爲諱之，去其月以起其賢。「曷爲不言其圍」者，^②案：舊本傳注三者皆作「圍」字，唯有「守」下「知」上一「國」字，以其有皆作「圍」字者，誤。守國，即上傳「設守械而守」是也。此圍辭也，曷爲不言其圍？據上言守國，知圍也。爲公子目夷諱也。目夷遭難，設權救君，有解圍存國免主之功，故爲諱圍，起其事，所以彰目夷之賢也。歸捷

書者，刺魯受惡人物也。○遭難，乃旦反。【疏】注「設權」至「人物也」。○解云：救君者，即上傳「宋公釋乎執，走之衛」是也。解圍者，楚人釋宋公，去而不復圍也。

十有二月，癸丑，公會諸侯盟于薄。言諸侯者，起霍之會諸侯也。不序者，起公從旁以議釋宋公，會盟一事也。言會者，因以殊諸侯也。【疏】注「起霍之會諸侯也」。○解云：即上文「秋，宋公、楚子、陳侯、蔡侯、鄭伯、許男、曹伯會于霍，執宋公以伐宋」是。上文序之，下文總之，故得起其上會諸侯也。不序者，若其序之，云公會某侯某侯，即無以見公從旁別來。今諸侯不序，并作一文，別言公會，則知魯公從旁而來，是以不序諸侯，以起其義。○注「會盟一事」至「侯也」。○解云：上言會于霍，下言盟於薄，明其但是一出之行，而更言公會諸侯者，因以殊諸侯矣。

釋宋公。執未有言釋之者，此其言釋

① 「注」下，阮校：「當脫『云』字。」

② 「曷爲不言其圍者」，阮校：「此下疏文當屬下節。『者』字，今本多改作『○』，此其改之未盡者。」

之何？據執滕子不言釋。^①【疏】「釋宋公」。○解云：不言楚子釋宋公者，何氏《廢疾》：「《公羊》以爲公會諸侯釋之，故不復出楚耳。」○注「據執」至「言釋」。○解云：即上十九年「春，王二月，^②宋人執滕子嬰齊」是也。公與爲爾也。公與爲爾奈何？公與議爾也。善僖公能與楚議釋賢者之厄。不言公釋之者，諸侯亦有力也。【疏】「公與議爾」。○解云：言魯公與爲釋宋公之事也。

監本附音春秋公羊注疏卷第十一

① 「不」，原作「至」，今據中華本、閩本改。
② 「二」，阮校：「浦鏜云：『三』誤『二』。按：浦說是也。」

監本附音春秋公羊注疏僖公卷第十二

起二十二年，盡三十三年

何休學

二十有二年，春，公伐邾婁，取須胸。

○胸，其俱反，《左氏》作「句」。

夏，宋公、衛侯、許男、滕子伐鄭。

秋，八月，丁未，及邾婁人戰于升陘。

○陘，音刑。

冬，十有一月，己巳，朔，宋公及楚人

戰于泓，宋師敗績。偏戰者日爾，此其言

朔何？據奚之戰不言朔。【疏】注「據奚之戰不言

朔」。○解云：即桓十七年「五月，丙午，及齊師戰于奚」，

《春秋說》以爲五月朔日也。《春秋》辭繁而不殺

者，正也。繁，多也。殺，省也。正，得正道尤美。○

不殺，所戒反，注同。省，所景反。何正爾？宋公

與楚人期戰于泓之陽。泓，水名。水北曰陽。

楚人濟泓而來。濟，渡。有司復曰：「請迨

其未畢濟而擊之。」迨，及。宋公曰：「不可。

吾聞之也，君子不厄人。吾雖喪國之餘，我

雖前幾爲楚所喪，所以得其餘民以爲國，喻懦弱。○喪

國，息浪反，注同。幾，音祁。寡人不忍行也。」既

濟，未畢陳。有司復曰：「請迨其未畢陳而

擊之。」宋公曰：「不可。吾聞之也，君子不

鼓不成列。」軍法以鼓戰，以金止，不鼓不戰。不成

列，未成陳也。君子不戰未成陳之師。○畢陳，直覲

反，①下及注同。已陳，然後襄公鼓之。宋師

大敗。故君子大其不鼓不成列，臨大事而

不忘大禮，有君而無臣。言朔亦所以起有君而無

臣，惜其有王德而無王佐也。若襄公所行，帝王之兵也。

有帝王之君，宜有帝王之臣，有帝王之臣，宜有帝王之

民。未能醇粹而守其禮，所以敗也。○王德，于況反，又

①「覲」，宋本《釋文》作「近」。

如字，下「王佐」同。醇粹，音純，下雖遂反。以爲雖文王之戰，亦不過此也。有似文王伐崇。陸戰當舉地，舉水者，大其不以水厄人也。

二十有三年，春，齊侯伐宋，圍緡。邑不言圍，此其言圍何？疾重故也。疾，痛也。

重故，喻若重故創矣。襄公欲行霸，守正履信，屬爲楚所敗，諸夏之君宜雜然助之，反因其困而伐之，痛與重故創無異，故言圍以惡其不仁也。○緡，亡巾反。重故，直用反，又直龍反，注同。故創，初良反，下同。屬，音燭。雜，七合反，父如字。❶惡，烏路反。

夏，五月，庚寅，宋公慈父卒。何以不

書葬？盈乎諱也。盈，滿也。相接足之辭也。襄

公本以背殯，不書其父葬，至襄公身書葬，則嫌霸業不成，所覆者薄，故復使身不書葬，明當以前諱除背殯，以後諱加微封。內娶不去日略之者，功覆之也。○慈父，《左氏》作「茲父」。復，扶又反。去，起吕反。【疏】注「襄公」至「背殯」。○解云：即九年「春，王三月，丁丑，宋公禦說卒」，傳云：「何以不書葬？爲襄公諱也。」彼注云「襄公背殯出會宰周公，有不子之惡，後有征齊憂中國尊

周室之心，功足以除惡，故諱不書葬」是也。○注「以後諱加微封」。○解云：謂以至功薄微，故加而爲之諱而封之。其「封」字亦有下句讀之，非也。○注「內娶」至「覆之也」。○解云：即下二十五年夏，「宋殺其大夫」，傳云：「何以不名？」宋三世無大夫，三世內娶也。」彼注云：「三世謂慈父、王臣、處白也。」內娶而責其去日者，正以文七年「夏，四月，宋公王臣卒」，注云「不日者，內娶略文」，十六年冬十一月「宋人弑其君處白」，彼注云「不日者，內娶略賤之」。然則三世內娶，二人皆略，此獨書日者，明是覆之。

秋，楚人伐陳。

冬，十有一月，杞子卒。卒者，桓公存王者

後，功尤美，故爲表異卒錄之。始見稱伯，卒獨稱子者，微弱爲徐、莒所脅，不能死位。《春秋》伯、子、男一也，辭無所貶。貶稱子者，《春秋》黜杞不明，故以其一等貶之，明本非伯，乃公也。又因以見聖人子孫有誅無絕，故貶不失爵也。不名不日不書葬者，從小國例也。○始見，

❶「父」，宋本《釋文》作「又」，當是。

賢徧反。【疏】注「桓公存」至「錄之」。○解云：正所以傳聞之世，^①小國之卒未合書見，故解之。○注「始見稱伯」。○解云：即莊二十七年冬，「杞伯來朝」是也。○注「爲徐莒所脅」。○解云：即十四年傳云「曷爲城杞？滅也。孰滅之？蓋徐、莒脅之」是也。○注「貶稱」至「不明」。○解云：正以春秋之前，周王舊有黜陟之法，隱元年儀父稱字，上十七年春英氏稱氏之類。今杞公之爵雖爲伯，仍恐春秋之前周王黜之，非爲新周，故曰「不明」。○注「故以其一等貶之」。○解云：謂伯之與子，《春秋》合以爲一而已。杞君從伯至子，乃是同事之內，故云「一等」。○注「明本非伯乃公也」。○解云：正以一等貶之，明是王者之後，本非伯爾。莊二十七年「杞伯來朝」之時，所以不稱侯，正欲此處以一等貶之，故彼不稱侯也。聖人子孫有誅無絕者，若其有過，但當誅責，不合絕去其爵，是以雖微弱見貶，仍但從伯至子，不失其爵矣。○注「不名不日」至「例也」。○解云：謂所傳聞之世，尤小國如此。若其曹、許之屬，仍自書名書葬，即上四年「許男新臣卒」，「秋，葬許繆公」，彼注云「得卒葬於所傳聞世者，許大小次曹，故卒少在曹後」也。

二十有四年，春，王正月。

夏，狄伐鄭。

秋，七月。

冬，天王出居于鄭。王者無外，此其

言出何？據王子瑕奔晉不言出。【疏】「王者無外」。

○解云：桓八年傳云「女在其國稱女，此其稱王后何？王者無外，其辭成矣」是也。○注「據王」至「言出」者。

○解云：即襄三十年「王子瑕奔晉」是也。不能乎母

也。不能事母。罪莫大於不孝，故絕之言出也。下無

廢上之義，得絕之者，明母得廢之，臣下得從母命。【疏】

注「明母」至「母命」。○解云：正以襄王之母於今仍在，

亦非繼母，與《左氏》異也。鄭氏《發墨守》云「聖人制法，

必因其事，非虛之」。^②《孟子》曰：「夫人自侮，而後人侮

之」。^③家必自毀，而後人毀之。國必自伐，而後人伐之。」

① 「所以」，阮校引浦鏗云：「『以所』字誤倒。」杉浦校：「單疏鈔本『所以』作『以所』。」

② 「虛」下，杉浦校：「單疏鈔本有『加』字，義爲長。」

③ 「夫人自侮」，阮校：「毛本作『夫人必自侮』，不誤。」

今襄王實不能孝道，稱惠后之心，今其寵專於子，^①失教而亂作，出居于鄭，自絕于周，故孔子因其自絕而書之，《公羊》以母得廢之，則《左氏》已死矣」是也。襄王正是惠后所生，非繼母。又云「失教而亂作，自絕於周」，從《左氏》。鄭氏雜用三家，不苟從一。魯子曰：「是王也，不能乎母者，其諸此之謂與？」猶曰：是王也，無絕義，不能事母而見絕外者，其諸謂此灼然異居，不復供養者與？主書者，錄王者所居也。○與，音餘。復，扶又反。供養，九用反，下餘亮反。【疏】注「灼然異」至「居也」。○解云：《公羊》以爲此天王出居于鄭，不事其母，而自出居于鄭，《春秋》惡其所爲，是以書出以絕之，實非出奔，故云「灼然異居，不復供養者與」。^②

晉侯夷吾卒。寡故不書葬，明當絕也。不日

月者，失衆身死，子見篡逐，故略之，猶薛伯定也。【疏】注「寡故不書明當絕也」。○解云：正以惠公無立、人之文，於例去葬以絕之。○注「不日月」至「略之」。○解云：大國之卒，例書日月，上十七年冬，「十有二月，乙亥，齊侯小白卒」之類是也。○注「猶薛伯定也」。○解云：即定十二年「春，薛伯定卒」，彼注云：「不日月者，子無道

當廢之，而以爲後，未至三年，失衆見弑，危社稷宗廟，禍端在定，故略之。」然則惠公之子，亦是不肖而以爲後，末期之間，文公奪之，是以不書日月。

二十有五年，春，王正月，丙午，衛侯燬滅邢。衛侯燬何以名？據楚子滅蕭不名。○燬，況委反。絕。曷爲絕之？據俱滅人。滅同姓也。絕先祖之體尤重，故名，甚之也。日者，爲魯憂而錄之。○爲魯，于僞反，下同。【疏】「滅同姓也」。○解云：《曲禮下》篇云「滅同姓名」是也。以此言之，則知《公羊》、何氏以爲齊人滅萊、楚滅隗、晉滅下陽之屬皆非同姓，是以不名耳。○注「日者」至「錄之」。○解云：凡滅例月，即莊十年「冬，十月，齊師滅譚」之屬是，而此書日也。

夏，四月，癸酉，衛侯燬卒。

①「今」，阮校引浦鏜云：「疑『令』字誤。」杉浦校：「單疏鈔本『今』作『令』，與浦說合。」

②「養」，原重文，阮校：「『養』字誤重。」杉浦校：「單疏鈔本『養』字不疊。」今據上注文及單疏鈔本刪。

宋蕩伯姬來逆婦。宋蕩伯姬者何？

蕩氏之母也。蕩氏，宋世大夫。【疏】「宋蕩伯姬者何？」

○解云：欲言婦人，而來逆婦，欲言大夫，而言伯姬，故執不知問。○注「蕩氏宋世大夫」。○解云：正以稱蕩氏，若崔氏、尹氏之屬，文同也。其言「來逆婦」何？

據莒慶言逆叔姬。連「來」者，嫌內女，為殺直來也。【疏】注「連來者」。○解云：弟子本意，據莒慶逆叔姬，難此逆婦之文，宜云「其言逆婦何」。而連「來」言之者，正以伯姬是內女，嫌經言「來逆婦」，為殺直來之恥，非實逆婦，是以連「來」問之。似若上五年「杞伯姬來朝其子」，傳云「其言來朝其子何」，彼注云「連來者」，「問為直來乎，為下朝出」之類。其直來者，即莊二十七年「冬，杞伯姬來」，^①傳云「其言來何？直來曰來」，彼注云「直來，無事而來也」是也。

兄弟辭也。其稱婦何？有姑之辭也。宋、魯之間，名結婚姻為兄弟。稱婦者，見姑之辭，以逆實文，知不殺直來也。主書者，無出道也。○見「賢徧反」。【疏】「其稱婦何」。○解云：隱二年傳云「在塗稱婦」，今此非在塗而稱婦，故難之。不注者，從省文可知也。○注「宋魯」至「兄弟」。○解云：蓋

時猶然。公羊子，齊人，而取宋、魯間語者，正以蕩伯姬來逆婦，宋、魯之事，故取解之亦何傷？^②○注「主書者無出道也」。○解云：言伯姬無逆婦之道，是以書而譏之。

宋殺其大夫。何以不名？據宋殺其大夫

山名。宋三世無大夫，三世內娶也。三世謂慈父、王臣、處白也。內娶大夫女也。言無大夫者，禮，不臣妻之父母，國內皆臣，無娶道，故絕去大夫名，正其義也。外小惡正之者，宋以內娶，故公族以弱，妃黨益彊，威權下流，政分三門，卒生篡弑，親親出奔，疾其末，故正其本。○去，起呂反。【疏】注「三世」至「白也」。○解云：即上二十三年夏「宋公慈父卒」、文七年夏「宋公王臣卒」、文十六年冬「宋人弑其君處白」是也。○注「外小惡正之者」。所傳聞之世，外小惡不書故也。○注「威權下流」。○解云：謂君之威權下流于臣，而臣下用之也。

①「莊二十七年」，原作「莊二十年」。阮校：「浦鏜云：『十』下脫『七』字。按：浦說是也。」杉浦校：「單疏鈔本『十』下有『七』字。」今據單疏鈔本改。

②「取」，原作「使」，今據中華本、閩本改。

秋，楚人圍陳，納頓子于頓。何以不

言遂？據楚子、鄭人侵陳，遂侵宋。兩之也。微者

不別遂，但別兩耳別兩耳。^①別之者，惡國家不重民命，

一出兵爲兩事也。納頓子書者，前出奔當絕，還入爲盜

國當誅，書楚納之，與之同罪也。主書者，從楚納之。頓

子出奔不書者，小國例也。不見挈者，故君不可見挈於

臣。○惡，烏路反。【疏】注「頓子」至「例也」。○解

云：正以《春秋》之例，小國出人不兩書，桓十五年夏，「許

叔入于許」，注云「不書出時者，略小國」，^②是例也。○注

「不見挈者」。○解云：故君不可見挈於臣者，案桓十一

年「九月，宋人執鄭祭仲」，「突歸于鄭」，傳云：「突何以

名？挈乎祭仲也。」彼注云：「挈猶提挈也。突當國，本

當言鄭突，欲明祭仲從宋人命提挈而納之，故上繫於祭

仲，不繫國者，使與外納同也。」案莊九年「夏，公伐齊，納

糾」，傳曰「何以不稱公子」，彼注云：「據下言子糾，知非

當國，本當去國見挈言公子糾。」此若作挈文，宜言楚人

納某甲于頓，去其國爵，以見挈于楚矣，故君不可以見挈

於臣。

葬衛文公。不月者，滅同姓，故奪臣子恩也。

【疏】主「不月者」至「恩也」。^③○解云：卒日葬月，大國之常。案桓十二年冬十一月「丙戌，衛侯晉卒」，十三年「三月，葬衛宣公」之類是也。

冬，十有二月，癸亥，公會衛子、莒慶

盟于洮。莒無大夫，書莒慶者，尊敬婿之義也。洮，內

地。公與未踰年君、大夫盟，不別得意，雖在外猶不致

也。○別，彼列反。【疏】注「書莒」至「之義也」。○解

云：即莊二十七年冬，「莒慶來逆叔姬」，傳云：「大夫越

竟逆女，非禮也。」^④○注「公與未」至「致也」。○解云：

案莊六年注云「公與二國以上出會盟，得意致會，不得意

不致」，謂與諸侯會時然也。今此衛子、莒慶皆是卑者，

得意不得意亦可知，故言不別得意耳。今洮是內地，位

①「別兩耳別兩耳」，閩本作「別兩稱耳」，與僖公二十八年引注合，當是。

②「略」，原脫。阮校：「浦鏜云：『者』下脫『略』字。按：浦說是也。」杉浦校：「單疏鈔本『者』下有『略』字。」今據桓公十五年何注及單疏鈔本補。

③「主」，此釋何注「不月者」，「主」蓋「注」之訛。

④「也」下，杉浦校：「單疏鈔本有『是』字，是。」

不合致，^①假令在外，亦不致之，何者？正以其與卑者會盟，得意不假別之，如定十二年冬，「公至自圍成」，成是孟氏之邑而書致，彼注云「天子不親征下土，諸侯不親征叛邑，公親圍成不能服，不能以一國爲家，甚危，若從他國來，故危錄之」是也。

二十有六年，春，王正月，己未，公會莒子、衛甯遯盟于向。○遯，音速。向，舒亮反。

齊人侵我西鄙。公追齊師至薳，弗及。其言「至薳，弗及」何？據公追戎于濟西，不言所至，又不言「弗及」。○薳，戶圭反，又似充反。

侈也。侈猶大也。大公能却強齊之兵。弗者，不之深者也。言齊人畏公士卒精猛，引師而去之，深遠不可得及，故曰侈。不直言大之者，自爲追，唯臣子得褒之耳，不得與追戎同也。言師者，侈大公所追也。國內兵不書而舉地者，善公齊師去則止，不遠勞百姓，過復取勝，得用兵之節，故錄詳之。^②

○侈，昌爾反，^③又昌者反，大也。卒，子忽反。自爲，于僞反，下「深爲」同。【疏】主「不直言」至「錄詳之」。^④○解云：案莊十八年「公追戎于濟西」，傳云：「此未有言伐者，其言追何？大其爲中

國追也。此未有伐中國者，則其言爲中國追何？大其未至而豫禦之也。其言于濟西何？大之也。」彼注云：「大公除害，恩及濟西也。言大者，當有公賞也。」^⑤然則彼爲諸侯追，於王法當有功賞，故得云「大」。此則自爲己追，但臣子得褒之，故傳不言「大」以見義。云言「師」者，侈大公所追也者，正以上言「齊人侵我西鄙」，下言「公追齊師」，與上文異故也。

夏，齊人伐我北鄙。

衛人伐齊。

公子遂如楚乞師。乞師者何？卑辭

①「位」，杉浦校：「單疏鈔本作「但」。阮氏校勘記云：「位」當作「但」。按：阮說是也。」

②「錄詳」，阮校：「鄂本作「詳錄」，此誤倒。」

③「爾」，宋本《釋文》作「鬲」。

④「主」，此釋何注「不直言」，「主」蓋「注」之訛。

⑤「公」，阮校：「浦鏜云：「功」誤「公」。是也。」

也。^①曷爲以外內同若辭？據《春秋》尊魯。

【疏】「乞者」至「若辭」。○解云：案成十六年夏「晉侯使欒黶來乞師」，十七年秋「晉侯使荀息來乞師」，外亦言乞師也。重師也。外內皆同，卑其辭者，深爲與人者重之。

曷爲重師？據泓之戰不重師。【疏】注「據泓之戰不重師」。○解云：上二十二年「十有一月，己巳朔，宋公及楚人戰于泓，宋師敗績」，傳云：「宋公與楚人期戰于泓之陽，楚人濟泓而來。有司復曰：『請迨其未畢濟而擊之。』宋公曰：『不可。吾聞之也，君子不厄人。吾雖喪國之餘，寡人不忍行也。』既濟，未畢陳，有司復曰：『請迨其未畢陳而擊之。』宋公曰：『不可。吾聞之也，君子不鼓不成列。』已陳，然後襄公鼓之，宋師大敗。故君子大其不鼓不成列，臨大事而不忘大禮，有君而無臣。以爲雖文王之戰，亦不過此也。」然則宋公守古敗師，而《春秋》善之也，是其不重之文。

師出不正反，戰不正勝也。不正者，不正自謂出當復反，戰當必勝。兵，凶器，戰，危事，不得已而用之爾，乃以假人，故重而不暇別外內也。稱師者，正所乞名也。乞師例時。○當復，扶又反，下同。別外，彼列反，下同。【疏】注「戰必當勝」。

○解云：以義言之，此句亦宜云「戰不正勝者，不正自謂戰當必勝」，但何氏省文，不復備言。○注「乞師例時」。○解云：正以據文承「夏」下文，^④成十三年「春，晉侯使欒黶來乞師」之屬，皆書時故也。

秋，楚人滅隗，以隗子歸。不月者，略夷狄滅微國也。不言獲者，舉滅爲重。書以歸者，惡不死位。不名者，所傳聞世，見治始起，責小國略，但絕不誅之。○隗，五罪反，二傳作「夔」。惡不，烏路反，下同。傳，直專反。見治，賢偏反，下直吏反。【疏】注「不月者略夷狄」。○解云：正以莊十年「冬，十月，齊師滅譚」，十三年「夏，六月，齊人滅遂」之類，皆書月故也。○注「不名者」至「不誅之」。○解云：案上二十三年「杞子卒」之下，注

「乞師者何卑辭也」，阮校：「唐石經、鄂本無『師』字，此誤衍。按：疏標起訖云『乞者至若辭』，亦無『師』字。」

①「有」，原作「直」，今據中華本、閩本改。

②「注戰必當勝」，阮校：「毛本『必當』作『當必』，宜據正。」

③「下文」，杉浦校：「單疏鈔本作『下又』。」今按：如作「又」，則當屬下。

云：「又因以見聖人子孫，有誅無絕，故貶不失爵也。」以此言之，似誅輕絕重。此注云「但絕不誅」，自相違者，凡誅有二種：一是誅責之誅，若「齒路馬有誅」、「於子與何誅」之類，一是誅絕之誅，似「武王誅紂」、「誅君之子不立」之類。然則上言有誅無絕，聖人子孫但當誅責而已，不合絕去。此言但絕不誅者，謂所傳聞之世，責小國略。今此不書其名，但欲絕去一身，不聽爲君，不合誅滅其國。哀七年「八月，己酉，入邾婁，以邾婁子益來」，傳云「邾婁子益何以名？絕之」。^①又莊十年「以蔡侯獻舞歸」，傳曰：「蔡侯獻舞何以名？絕之。」以此二文言絕之，則似書名爲絕之。此注云「不名者，但絕而不誅」，又以不名爲絕者，蓋以絕亦有二種：一是絕去其身，一是絕滅其國。蔡侯獻舞，大國之君，不能死難，爲楚所獲。《春秋》之義，不與夷狄得志于諸夏，是以不得書獲，故名蔡侯，起其當合絕滅矣。邾婁正當所見之世爲魯所獲，《春秋》之義，內獲人皆諱不書，故名邾婁子，以起不死難，當絕滅矣。今此隗子既是微國，復當傳聞之世，若其書名，恐如二君，亦合絕滅，故不名，見責之略也，但合一身絕去而已。

冬，楚人伐宋，圍緡。邑不言圍，此其

言圍何？刺道用師也。時以師與魯，未至，又道

用之，於是惡其視百姓之命若草木，不仁之甚也。稱人者，楚未有大夫，未聞稱師，^②楚自道用之，故從楚文。

【疏】「邑不」至「用師也」。○解云：案隱五年「宋人伐鄭，圍長葛」之下，傳云：「邑不言圍，此其言圍何？」彼已注

云：「據伐於餘丘不言圍。」然則彼已有注，故此不復解耳。○注「稱人」至「從楚文」。^③○解云：以文九年「冬，

楚子使椒來聘」，彼傳云：「椒者何？楚大夫也。楚無大夫，此何以書？始有大夫也。始有大夫，則何以不氏？

許夷狄者，不一而足也。」然則文九年始有大夫，則知今時未有。然上四年夏「楚屈完來盟于師」，下二十八年夏

「楚殺其大夫得臣」，在椒來聘之前，而有大夫者，屈完之下傳云：「屈完者何？楚大夫也。何以不稱使？尊屈

①「絕之」，阮校：「哀七年傳「絕」字下有「曷爲絕」三字，下「蔡侯獻舞何以名絕」字下亦宜依莊十年傳補

「曷爲絕」三字。」

②「聞」，阮校：「鄂本「聞」作「得」，當據正。」

③「注稱人至從楚文」，杉浦校：「單疏鈔本作「注稱人者，楚未有大夫，知楚是時未能有大夫者」。按：依此本，則標注起訖當作「稱人者楚未有大夫」八字。」

完也。曷爲尊屈完？以當桓公也。」注云：「增倍使若得其君，以醇霸德，成王事也。」然則欲尊屈完，使當桓公，以醇霸德，非常事。子玉之下注云：「楚無大夫，言其大夫者，^①欲起上楚人本當言子玉得臣，所以詳錄霸事。」○注「楚自道」至「楚文」。○解云：欲道下文公以楚師得稱楚師，而此不得者，以楚自道用之，故從楚文也。

公以楚師伐齊，取穀。言以者，行公意，別魯兵也。稱師者，順上文。【疏】注「言以者行公意」。○解云：桓十四年冬，「宋人以齊人、衛人、蔡人、陳人伐鄭」，傳云：「以者何？行其意也。」彼注云：「以己從人曰行，言四國行宋意也。」

公至自伐齊。此已取穀矣，何以致伐？據伐邾婁取叢不致。未得乎取穀也。未可謂得意於取穀。曷爲未得乎取穀？據俱取邑。曰：患之起，必自此始也。魯內虛而外乞師，以犯強齊，會齊侯昭卒，晉文行霸，幸而得免。孔子曰：「人之生也直，罔之生也幸而免。」故雖得意，猶致伐也。【疏】注「魯內虛而外乞師」。○解云：言內虛者，謂自無師。○「會齊侯昭卒」。^②○解云：即下二十七年「齊侯

昭卒」是也。○注「晉文行霸」。○解云：即二十八年侵曹伐衛，敗楚師于城濮，盟于踐土是也。○注「故雖」至「伐也」。○解云：莊六年注云：「公與一國及獨出用兵，得意不致，不得意致伐。」然則此文公以楚師伐齊取穀，是得意，宜合不致。今致伐，作不得意之文，以解之。^③

二十七年，^④春，杞子來朝。貶稱子者，起其無禮不備，故魯人之。【疏】注「貶稱子」至「人之」。○解云：杞本公爵，但《春秋》欲新周故宋而黜之稱伯，即莊二十七年冬，「杞伯來朝」是也。至二十三年經書「杞子卒」者，但以微弱，爲徐、莒所脅，不能死位，故以其一等貶之，見聖人子孫有誅無絕而已。至於此經復稱子者，起其無禮，故《左氏》皆有魯人之文也。

①「言其」，下二十八年何注作「其言」。阮校引浦鏜云：「其言」字誤倒。」

②「會」上，杉浦校：「單疏鈔本有「注」字。當有「注」字。」

③「以」，阮校引浦鏜云：「以」當「故」字誤。」杉浦校：「單疏鈔本「以」作「故」。」

④「二十七年」，阮校：「唐石經作「廿有七年」，鄂本「二十」下有「有」字，此脫。」

夏，六月，庚寅，齊侯昭卒。

秋，八月，乙未，葬齊孝公。

乙巳，公子遂帥師入杞。日者，杞屬修禮

朝魯，雖無禮，君子躬自厚而薄責於人，不當乃人之，故錄責之。○屬，音燭。

冬，楚人、陳侯、蔡侯、鄭伯、許男圍宋。此楚子也，其稱人何？據序諸侯之上。

貶。曷爲貶？據圍鄭不貶。爲執宋公貶，故

終僖之篇貶也。古者諸侯有難，王者若方伯和平

之，後相犯，復故罪，楚前執宋公，僖公與共議釋之。今

復圍犯宋，故貶，因以見義。終僖之篇貶者，言君子和平

人，^①當終身保也。○爲，于僞反。難，乃旦反。今復，扶

又反。見，賢徧反。【疏】注「楚前執宋公」。○解云：即

二十一年秋「執宋公以伐宋」，十二月「公會諸侯盟于薄，

釋宋公」，傳云：「執未有言釋之者，此其釋之何？」^②公

與議爾也。」彼注云：「善僖公能與楚議，釋賢者之厄。」

十有二月，甲戌，公會諸侯盟于宋。地

以宋者，起公解宋圍，爲此盟也。宋得與盟，則宋解可知

也，而公釋之見矣。○與，音預。

二十有八年，春，晉侯侵曹。晉侯伐

衛。曷爲再言晉侯？據楚人圍陳、納頓子于頓，

亦兩事，不再出楚人。【疏】注「據楚」至「出楚人」。○解

云：在上二十五年秋也。非兩之也。然則何以

不言遂？據侵蔡遂伐楚言遂。【疏】非兩之也。○

解云：上二十五年頓子之下，傳云：「何以不言遂？兩

之也。」注云：「微者不別遂，但別兩稱耳。別之者，惡國

家不重民命，一出兵爲兩事也。」以此言之，初發國，即有

兩伐之意。○注「據侵蔡伐楚言遂」。○解云：即上四年

「春，王正月，公會齊侯」以下「侵蔡，蔡潰，遂伐楚」是也。

未侵曹也。未侵曹，則其言侵曹何？致

其意也。其意侵曹，則曷爲伐衛？晉侯

將侵曹，假塗于衛，衛曰不可得，則固將伐

之也。曹有罪，晉文行霸征之，^③衛壅遏，不得使義兵

①「和」，余本作「知」。

②「其」下，杉浦校：「單疏鈔本有「言」字。」

③「晉文」，阮校：「鄂本「文」下有「公」字，此脫。」

以時追，^①故著言侵曹，以致其意，所以通賢者之心，不使壅塞也。宋襄公伐齊月，此不月者，晉文公功信未著，且當修文德，未當深求於諸侯，故不美也。○衛雍，於勇反，下同。又作「壅」，同。過，於葛反。【疏】「衛曰不」至「伐之也」。○解云：言衛不可得塗，則固將先伐之，其意猶自欲得侵曹矣。○注「曹有」至「征之」。○解云：言征之者，謂伐而正之，上討下之辭，如上十八年傳云「與襄公之征齊也」。

公子買戍衛，不卒戍，刺之。不卒戍者何？不卒戍者，內辭也。不可使往也。

即注，^②當言戍衛不卒。【疏】「不卒戍者何」。○解云：欲言實戍，乃有不卒戍之文，欲言不成，而經書戍衛，故執不知問。不可使往，則其言「戍衛」何？據言戍衛行文。遂公意也。使臣子不可使，恥深，故諱使若往不卒戍事者，明臣不得壅塞君命。刺之者何？殺之也。殺之，則曷爲謂之刺之？內諱殺大夫，謂之刺之也。有罪無罪，皆不得專殺，故諱殺言刺之。不言「刺公子買」，但言「不卒戍，刺之」者，起爲上事刺之也。內殺大夫例，有罪不日，無罪

日。外殺大夫皆時。○起爲，于僞反，下「爲下卒」、「爲晉」、「深爲」、「不爲」同。【疏】「刺之者何」。○解云：欲言不殺，文言刺之，欲言實殺，文不言殺，故執不知問。○注「有罪」至「刺之也」。○解云：《孟子》言，大夫者，天子命之，輔助其政，諸侯不得專殺大夫也。然則《孟子》之文論有罪，故此何氏云：「有罪無罪，皆不得專殺也。」○注「內殺大」至「無罪日」。○解云：其有罪不日，即此文是。而不月者，與上同月故也。無罪日者，成十六年冬十二月，「乙酉，刺公子偃」是也。○注「外殺大夫皆時」。○解云：即上七年夏「鄭殺其大夫申侯」，下三十年「秋，衛殺其大夫元咺」之類是也。

楚人救衛。

三月，丙午，晉侯入曹，執曹伯，畀宋人。畀者何？與也。其言「畀宋人」何？

據下執衛侯，言歸之于京師。○畀宋，必二反，與也，下同。【疏】「畀者何」。○解云：欲言是與，文不言歸，欲言

①「追」，阮校：「此本『進』誤『追』。」

②「注」，余本、閣本作「往」，當是。

非與，界者與義，故執不知問。○注「據下」至「京師」。○解云：即下經云：冬，「晉人執衛侯歸之于京師」是也。然則彼言歸于京師，此言以界宋人，故難之。與使聽之也。與使聽其獄也。時天王居于鄭，晉文欲討楚師，以宋王者之後，法度所存，故因假使治之。宋稱人者，明聽訟必師斷，與其師衆共之。○斷，丁亂反，下「當斷」同。曹伯之罪何？甚惡也。其甚惡奈何？不可以一罪言也。曹伯數侵伐諸侯，以自廣大，傳曰「晉侯執曹伯，班其所取侵地于諸侯」是也。齊桓既沒，諸侯背叛，無道者非一。晉與曹同姓，恩惠當先施，刑罰當後加，起而征之，嫌其失義，故著其甚惡者可知也。以兵得不言獲者，晉文伯討，不坐獲者，故亦不責曹不死義兵。日者，喜義兵得時人。○數，所角反，下「數道」同。【疏】注「傳曰晉侯」至「是也」。○解云：即下三十一年「春，取濟西田」之下，傳云「惡乎取之？取之曹也。此未有伐曹者，則其言取之曹何？晉侯執曹伯，班其所取侵地于諸侯」是也。○注「恩惠當先施」。○解云：即《堯典》云「九族既睦，平章百姓」是也。○注「刑罰當後加」。○解云：即《小司寇》「議親議賢之辟」是也。①

○注「故著其甚惡」。○解云：即執而言界宋人，使治其罪是也。○注「晉文伯討」。○解云：即稱侯以執是也。○注「不坐獲者」。○解云：謂諸侯言獲者，皆是惡其擅獲，是以上十五年「獲晉侯」之下，傳云：「君獲，不言師敗績也。」注云：「舉君獲爲重也。釋不書者，以獲君爲惡。書者，以惡見獲，與獲人君者，皆當絕也。主書者，從獲人例。」是其坐獲之文。今晉侯伯討，故不坐獲。

夏，四月，己巳，晉侯、齊師、宋師、秦師及楚人戰于城濮，楚師敗績。此大戰也，曷爲使微者？據秦稱師錄功，知大戰必不使微者，楚雖無大夫，齊桓行霸書屈完也。○濮，音卜。

【疏】注「據秦稱師」。○解云：案文十二年秋，「秦伯使遂來聘」，傳云：「秦無大夫，此何以書？賢繆公也。」然則至文十二年秦始有大夫，則知此時未合稱師。今乃稱師錄功，故知大戰。既是大戰，則明知必不應使微者。云「楚雖無大夫」者，文九年「冬，楚子使椒來聘」，傳云：「楚

①「議親議賢之辟」，杉浦校：「今《周禮》作『議親之辟，議賢之辟』。」

無大夫，此何以書？始有大夫也。」以此言之，則知此時未有大夫，故曰「楚雖無大夫」矣。云「齊桓行霸書屈完也」者，即上四年夏，「楚屈完來盟于師」，傳云：「屈完者何？楚大夫也。何以不稱使？尊屈完也。曷爲尊屈完？以當桓公也。」注云「增倍使若得其君，以醇霸德，成王事」是也。^①

子玉得臣也。以上敗績，下殺得臣。【疏】「子玉得臣也」。○解云：傳及注意，似子玉爲得臣之氏。子玉得臣，則其稱人何？據屈完當桓公稱名氏。貶。曷爲貶？據邲之戰，林父不貶。

○邲，皮必反。大夫不敵君也。臣無敵君戰之義，故絕正也。秦稱師者，助霸者征伐，克勝有功，故褒進之。齊桓先朝天子，晉文先討夷狄者，晉文之時，楚與爭彊，所遭遇異。【疏】注「齊桓先朝天子」。○解云：正以莊十三年冬「柯之盟」，桓公之信著于天下，豈不朝天子而得然乎？但以外朝不書，是以無經可指耳，但何氏以理知之，故言先朝天子。言先者，欲道至僖四年乃始服楚之意。云所遭遇異者，謂齊桓初霸之時，楚未強大，雖侵諸夏，未能爲伯者之害，是以桓公養成其晦，至僖四年乃往討而服之。至晉文之時，楚人孔熾，圍宋救衛，與之

爭盛，是以未暇朝王，先討子玉矣，時事不同，故云所遭遇異矣。

楚殺其大夫得臣。楚無大夫，其言大夫者，欲起上楚人本當言子玉得臣。所以詳錄霸事不氏者，子玉得臣，楚之驕蹇臣，數道其君侵中國，故貶，明當與君俱昭也。^②○道，音導。

衛侯出奔楚。晉文逐之。不書逐之者，以王事逐之，擇立其次，無絕衛之心，惡不如出奔重。【疏】注「擇立」至「奔重」。^③○解云：立叔武是也。叔武，衛侯之弟，故曰其次耳。惡不如出奔重者，言文公逐人之惡，少於衛侯出奔之罪。

五月，癸丑，公會晉侯、齊侯、宋公、蔡侯、鄭伯、衛子、莒子盟于踐土。陳侯如

①「是也」，杉浦校：「單疏鈔本作「也者是」三字。按：「事」下有「也」字，與上四年注合。」

②「昭也」，余本作「治也」。阮校：「鄂本「昭」作「治」，無「也」。」

③「擇立」，原作「釋立」，杉浦校：「單疏鈔本、毛本作「擇立」。當據鈔本以改。」今據改。

會。其言「如會」何？據曹伯襄言會諸侯。【疏】

注「據曹伯襄」。○解云：即下文「曹伯襄復歸于曹，遂會

諸侯圍許」是也。後會也。說與會伐宋同，刺諸侯不

慕霸者，^①反歧意于楚，失信後會。會不致者，安信與晉

文也。盟日者，譎也。衛稱子者，起叔武本無即位之意。

陳歧意于楚，在二十七年。○譎，古穴反。【疏】注「盟日

者譎也」。○解云：正以《春秋》之例，不信者日，今而書

日，故解之。而言譎者，正以孔子謂之「譎而不正」，故取

其文。○注「衛稱子」至「之意」。○解云：衛侯為王伯所

逐而立叔武，叔武即是成君，何不稱侯而作未踰年之君

號？欲起其本無即位之心故也。無即位之心者，即下

云「文公逐衛侯而立叔武，叔武辭立而他人立，則恐衛侯

之不得反也，故於是已立，然後為踐土之會，治反衛侯」

是也。

公朝于王所。曷為不言公如京師？

據三月公如京師。天子在是也。天子在是，則

曷為不言天子在是？據狩于河陽。不與致

天子也。時晉文公年老，恐霸功不成，故上白天子

曰：「諸侯不可卒致，願王居踐土。」下謂諸侯曰：「天子

在是，不可不朝！」迫使正君臣，明王法。雖非正，起時

可與，故書朝，因正其義。不書諸侯朝者，外小惡不書，

獨錄內也。不書如，不言天王者，從外正君臣，所以見文

公之功。○卒，七忽反，下「倉卒」同。見，賢徧反，下「不

見」，「當見」，「見其」同。【疏】注「時晉」至「錄內也」。○

解云：皆《春秋說》文及《史記》文。《檀弓》下篇云「晉獻

公之喪，秦穆公使人弔公子重耳」，且曰：「喪亦不可久

也，時亦不可失也，孺子其圖之！」鄭玄注云：「孺，稚

也。」孺子猶稚子，則於僖九年獻公卒時，仍謂之稚子，今

得稱云年老者，正以《禮記》非正典，何氏不醇取之。云

「明王法，雖非正，起時可與」者，言明王之法，雖以為非

正，欲見當時事勢不得不然，是故遂書其朝。云「公朝于

王所」，言「因正其義」者，欲道臣無召君之義，故不言王

之所在。云不書至不書者，^②正以諸侯朝王，不在京師，

亦是其惡，但非大惡，當所傳聞之世，見在不錄之限，是

以特書公朝，故隱元年「公子益師卒」之下，何氏云「於所

① 「諸」，阮校：「宋本『諸』作『陳』，此誤。」

② 「云不書至不書者」，阮校：「當作『云不書諸侯朝者』。」

傳聞世，見治起於衰亂之中，用心尚粗穢，故內其國而外諸夏，先詳內而後治外，內小惡書，外小惡不書」是也。

○注「不書如不言」至「之功」。○解云：《春秋》之例，內朝言如，外來言朝。今此魯侯不言如，反言朝，故云「從外正君臣，所以見文公之功」也。不言天王，所以得正君臣。見文公之功者，以隱元年「秋，七月，天王使宰咺來歸惠公仲子之賵」下，何氏云：「天王者，^①時吳、楚上僭稱王，王者不能正，而上自繫于天也。《春秋》不正者，因以廣是非。」然則稱王為正稱，於天則非禮。^②今此經書不言天王者，亦是正君臣，以見文公之功也。

六月，衛侯鄭自楚復歸于衛。言復歸者，

天子有命歸之。名者，刺天子歸有罪也。言自楚者，為天子諱也。^③天子所以陵遲者，為善不賞，為惡不誅。衛侯出奔當絕，叔武讓國，不當復廢，而反衛侯，令殺叔武，故使若從楚歸者。復歸例皆時，此月者，為下卒出也。○當復，扶又反。令，力呈反，下「令自」同。【疏】注「言復歸」至「歸之」。○解云：《春秋》文。^④是以傳云「然後為踐土之會，治反衛侯」，何氏云：「叔武訟治於晉，文公令白王者反衛侯，使還國也。」天子有命歸而言復歸者，正以衛侯出惡歸無惡故也，何者？正以衛侯初出之時，

晉文以王事逐之，是其出惡，及其歸國，得天子之命，是其歸無惡矣。桓十五年傳曰「復歸者，出惡歸無惡」是也。○注「名者」至「罪也」。○解云：諸侯不生名，若其生名，皆欲絕之，不以為諸侯，是以莊十年「蔡侯獻舞」之下，傳云：「蔡侯獻舞何以名？絕也。」今此衛侯王事不供，而為伯者所逐，故當合絕，但天子歸之，失誅臣之義，是以書名刺天子也。○注「自楚者為天子之諱也」。^⑤○解云：正以自者有力之文，故言自楚，得為天子諱者，若似自得楚力而歸然。云「復歸」至「出也」者，案：桓十七年秋「蔡季自陳歸于蔡」，下三十年秋「衛侯鄭歸于衛」之屬，是歸書時也。其復歸書時者，即下冬「衛元咺自晉復歸于衛」之類，是例合時，而此月，故知為他事出也。

衛元咺出奔晉。○咺，況元反。

①「天王」，阮校：「浦鏜云：『天』上脫『言』。是也。」

②「於」，杉浦校：「單疏鈔本作『加』，是也。」

③「諱」上，余本有「之」字。

④「春秋」，閣本作「春秋說」，當是。

⑤「注自楚者為天子之諱也」，單疏鈔本「也」下有「者」字。阮校：「閩、監本同，毛本作『言自楚者為天子諱也』。」

陳侯歿卒。不書葬者，爲晉文諱，行霸不務教人以孝。陳有大喪，而姜會其孤，^①故深爲恥之。宋襄亦背殯，獨不爲齊桓諱者，時宋襄自會之。卒不日者，賤其歧意于楚。【疏】注「卒不日者」。○解云：以大國之卒例書日，已說於上。

秋，杞伯姬來。

公子遂如齊。

冬，公會晉侯、齊侯、宋公、蔡侯、鄭伯、陳子、莒子、邾婁子、秦人于溫。

天王狩于河陽。狩不書，此何以書？

據常事也。不與再致天子也。一失禮尚愈，再失禮重，故深正其義，使若天子自狩，非致也。魯子曰：「溫近而踐土遠也。」此魯子一說也。溫近狩地，故可言狩。踐土遠狩地，故不言狩也。公以再朝而日言之，上說是。【疏】「溫近而踐土遠也」。○解云：近，讀如附近之近。遠，爲遠外之遠。○注「公以」至「上說是」。○解云：正以上朝不日，而下朝始日，危錄內再失禮，則知此書狩者，不與再致天子也，故言上說是。

壬申，公朝于王所。其日何？據上朝不日。錄乎內也。危錄內再失禮，將爲有義者所惡。不月而日者，自是諸侯不繫天子，若自不繫於月。^②○惡，鳥路反，下「惡衛」同。

晉人執衛侯歸之于京師。歸之于者何？歸于者何？歸之于者，罪已定矣。歸于者，罪未定也。罪未定，則何以得爲伯討？^③此難成十五年「晉侯執曹伯歸于京師」。^④○難，乃旦反，下「方難」同。【疏】「歸之于者何」。○解云：欲言伯執，晉不稱侯，欲言非伯，而云歸之于京師，似得伯執之義，故執不知問。歸之于者，執之于天子之側者也。罪未定，已可知矣。歸之

①「姜」，余本作「疆」，當是。

②「自」，余本作「日」，當是。

③「討」，阮校：「唐石經原刻作『執』，後磨改作『討』。按：下云『歸于者，非執之于天子之側者也』，則此當從原刻作『執』。」

④「成十五年」，阮校：「鄂本『成』下有『公』字。」

者，次絕之辭。^①執于天子之側，已白天子，罪定不定，自在天子，故言已可知。歸于者，非執之于天子之側者也，罪定不定，未可知也。未得白天子分別之者，但欲明諸侯尊貴，不得自相治，當斷之于天子爾。大惡雖未可知，執有罪，當為伯討矣。無罪而執人，當貶稱人。○別，彼列反。衛侯之罪何？殺叔武也。何以不書？據殺大夫書。為叔武諱也。《春秋》為賢者諱，何賢乎叔武？據失兄意。○為叔，于偽反，下「為賢」、「為叔武」及注「為」、「深為」皆同。讓國也。其讓國奈何？文公逐衛侯而立叔武，叔武辭立而他人立，則恐衛侯之不得反也，故於是已立。故上稱子。然後為踐土之會，治反衛侯。叔武訟治於晉，文公令白王者反衛侯，使還國也。叔武讓國見殺，而為叔武諱殺者，明叔武治反衛侯，欲兄饗國，故為去殺己之罪，所以起其功，而重衛侯之無道。○為去，起呂反。衛侯得反，曰：「叔武篡我。」元咺爭之曰：「叔武無罪。」終殺叔武，元咺走而出。

此晉侯也，其稱人何？此以伯討而何貶

者，言歸之于伯討，明知坐他事，故更問之。○篡，初患反。【疏】注「此以伯討而何貶者」。○解云：上四年「齊人執陳袁濤塗」之下，傳云：「此執有罪，何以不得為伯討？」然則此傳宜云「此執有罪，何以不稱侯」，而云「此晉侯也，其稱人何」，問其貶者，正以言歸之于者，罪定已可知，即是伯討明矣。知稱人更有所為，故問其稱人之義。貶。曷為貶？據他罪不見。衛之禍，文公為之也。文公為之奈何？文公逐衛侯而立叔武，使人兄弟相疑。《春秋》許人臣者必使臣，許人子者必使子。文公惡衛侯大深，愛叔武大甚，故使兄弟相疑。○大深，音泰，下同。放乎殺母弟者，文公為之也。文公本逐之非，故致此禍也。逐之文不見，故貶。主書者，以起文公逐之。○放乎，甫往反。【疏】注「文公本逐之非」。○解云：上注文公以王事逐之，而言非者，雖王事不供，罪不至逐，而文公逐之，疾惡大甚，故以為非也。案《論語》云：「人而不仁，疾之已

①「次」，阮校：「鄂本「次」作「決」，此誤。」

甚，亂也。」○注「以起文公逐之」。○解云：其主書者，即文公執衛侯之事是也。今執衛侯，貶文公稱人，見其失所，是故貶以起文公逐之。

衛元咺自晉復歸于衛。自者何？有

力焉者也。有力焉者，有力于晉也。言恃晉有屬己力以歸，方難下意，故於是發問。○屬，音燭。【疏】「自者何」。○解云：文公賢伯，而有力於惡人，似非其義，故執不知問。此執其君，其言「自」何？上元咺出奔晉，而文公執衛侯，知以元咺訴執之，怪訴其君而助之。為叔武爭也。解文公助之意，以元咺為叔武爭訴，以為忠於己而助之。雖然，臣無訴君之義，復於衛非也，悖君臣之義，故著言「自」，明不當有力於惡人也。言復歸者，深為霸者恥之，使若無罪。○爭，爭鬪之爭，下注同。悖，必內反。

諸侯遂圍許。曹伯襄復歸于曹。遂

會諸侯圍許。曹伯言復歸者，^①天子歸之也。名者，與衛侯鄭同義。執歸不書，書者，名惡當見。本無事，不當言遂，又不更舉曹伯者，見其能悔過，即時從霸者征伐也。霸兵不月者，刺文公不偃武修文以附疏，倉卒欲服

許，卒不能降，威信自是衰，故不成其善。○降，戶江反。

【疏】「曹伯襄復歸于曹」。○解云：天子歸之，以得天子

之命，其罪可以除，故言復歸，作人無惡之文矣。^②上衛

侯之下，注云「言復者」，^③天子有命歸之，不言衛侯。而

此處著言曹伯者，正以文承元咺復歸之下，辨嫌也。○

注「執歸」至「言遂」。○解云：正以上二十一年宋公被執

而歸，經不書之，故知執歸不書。今書者，其名之惡當須

見之。○注「又不更舉曹伯者」。○解云：謂何以不言曹

伯遂會諸侯圍許，正以言遂，又不更舉曹伯，皆是風疾之

義，故可以見悔過，即時從霸者征伐也。○注「欲服許」

至「其善」。○解云：正以上文溫之會，許男不至，是不慕

霸者而從于楚，故因而服之。云「卒不能降」者，正以二

十九年春經書「公至自圍許」，作不得意之文。莊六年

「秋，公至自伐衛」之下，傳云「得意致會，不得意致伐」，

^①「曹伯言復歸者」，阮校：「浦鏜云：自此下二十九字

當在上文「曹伯襄復歸于曹」之下。按：廿一年疏引

此曰「曹伯之下注云」，則此注本在上經下也。」

^②「入」，原作「人」，今據京都本、再造善本、中華本、閣

本改。
^③「復」下，阮校：「浦鏜云：脫「歸」字。是也。」

今此不致會，知卒不能降也。

二十有九年，春，介葛盧來。介葛盧者何？夷狄之君也。何以不言朝？據諸

侯來曰朝。○介葛，音介，^①國名。【疏】「介葛盧者何」。

○解云：欲言諸侯，文不言朝，欲言大夫，文不書聘，故執不知問。不能乎朝也。不能升降揖讓也。介者，國

也。葛盧者，名也。進稱名者，能慕中國，朝賢君，明當扶勉以禮義。【疏】注「進稱名者」。○解云：正以下三十年秋，「介人侵蕭」不名，故知此稱名是其進。

公至自圍許。

夏，六月，公會王人、晉人、宋人、齊人、陳人、蔡人、秦人盟于狄泉。^②文公圍許不能服，自知威信不行，故復上假王人以會諸侯，年老志衰，不能自致，故諸侯亦使微者會之。月者，惡霸功之廢

於是。○故復，扶又反，年末同。^③惡，烏路反。【疏】注「月者」至「廢於是」。○解云：正以月非大信之辭也。

秋，大雨雹。夫人專愛之所生。○雨，于付反。

雹，步角反。

冬，介葛盧來。前公圍許不在，故更來朝。不

稱字者，一年再朝不中禮，故不復進也。○中，丁仲反。

三十年，春，王正月。

夏，狄侵齊。

秋，衛殺其大夫元咺及公子瑕。衛侯未至，其稱國以殺何？據歸在下。道殺也。

時已得天子命還國，於道路遇而殺之，坐之與至國同，故但稱國，不復別也。言「及公子瑕」者，下大夫別尊卑。○復，扶又反。別尊，彼列反。

衛侯鄭歸于衛。此殺其大夫，其言歸何？據未至而有專殺之惡，與人惡同。【疏】「其言歸

何」。○解云：正以歸者，是出入無惡也。○注「與人惡同」。○解云：正以復人者，出無惡，人有惡。今此衛侯未至而殺，故宜與人惡同，不合言歸，故難之。歸惡乎

元咺也。衛侯歸殺無惡，則元咺之惡明矣。曷爲歸

①「介」，宋本《釋文》作「戒」，當是。

②「狄泉」，阮校：「《左氏》做「翟泉」。」

③「未」，原作「未」，今據京都本、再造善本、閣本改。

惡乎元咺？據師還。【疏】注「據師還」。○解云：

即莊八年「秋，師還」，傳云：「還者何？善辭也。此滅同姓，何善爾？非師之罪也。」彼注云：「明君之使重在君。」然則彼魯公遣師滅同姓，歸善于師，而歸惡于公，此衛侯即歸惡于元咺，與彼義違。元咺之事君也，君

出則己入，^①晉人執衛侯歸之于京師，元咺自晉復歸于衛，恃晉力以歸是也。【疏】注「恃晉」至「是也」。○解

云：即彼傳云：「自者何？有力焉者也。」注云「有力焉者，有力于晉也。言恃晉有屬己力以歸」是。君入則

己出，衛侯鄭自楚復歸于衛，元咺出奔晉是也。以爲

不臣也。故不從犯伯執，爲天子所還，言復歸，從出入

無惡言歸，以見元咺有出入罪，衛侯得殺之，所以專臣事

君之義。名者，爲殺叔武之惡天子歸有罪也。^②執歸不

書，主書者，名惡當見。○以見，賢徧反，下同。爲，于僞

反。惡天，^③烏路反。

晉人、秦人圍鄭。介人侵蕭。稱人者，侵

中國，故退之。【疏】注「稱人者」至「退之」。○解云：正

以上二十九年來朝稱名，今不名，故知此稱人者，退之也。

冬，天王使宰周公來聘。與葵丘會同義。

【疏】注「與葵丘會同義」。○解云：葵丘之會在上九年，「公會宰周公」以下「于葵丘」，彼注云：「宰猶治也，三公之職號尊名也。以加宰，知其職大尊重，當與天子參聽萬機，^④而下爲諸侯所會，惡不勝任也。」此宰周公亦職大尊重，當與天子參聽萬機，而下聘諸侯，惡不勝任，故云與葵丘同義。

公子遂如京師，遂如晉。大夫無遂

事，此其言「遂」何？公不得爲政爾。不從

公政令也。時見使如京師，而橫生事，矯君命聘晉，故疾

其驕蹇自專，當絕之。不舉重者，遂當有本。○攝君，居

^①「君出則己入」，阮校：「唐石經、諸本同。《隸釋》載

《公羊》殘碑後云：「三十年言君出則己入。」然則熹平石經不與何本同，故舉其異者言之。」

^②「之」，阮校：「鄂本無「之」字，此衍。按：廿一年疏

引此注亦無「之」字。」

^③「惡天」，「惡」原脫，「天」原作「夫」，今據中華本、宋本

《釋文》補改。

^④「機」，阮校：「閩、監、毛本改「幾」，下同。」

表反，本又作「矯」。【疏】「大夫無遂事」。○解云：正以臣無自專之道也。

三十有一年，春，取濟西田。惡乎取之？以不月，與取運異，知非內叛邑。○惡，音烏。

【疏】注「以不月至叛邑」。○解云：昭元年「三月，取運」，傳云：「運者何？內之邑也。其言取之何？不聽也。」注云「不聽者，叛也。不言叛者，為內諱，故書取以起之」，「月者，為內喜得之」，故書月也。此不書月，與彼異，知非內之邑，是以傳云「惡乎取之」，猶言何處取之。取之曹也。曷為不言「取之曹」？據取叢言邾婁田也。諱取同姓之田也。同姓相貪利，惡差重，恥差深。○惡差，初賣反，下同。此未有伐曹者，則其言「取之曹」何？據伐同姓不諱。即有兵，當舉伐曹，下日，若甲戌取須胸。【疏】注「即有兵」至「須胸」。○解云：即文七年「春，公伐邾婁。三月，甲戌，取須胸」，傳云：「取邑不日，此何以日？內辭也，使若他人然。」注云：「使若公春伐邾婁而去，他人自以甲戌日取之。」晉侯執曹伯，班其所取侵地于諸侯也。

班者，布徧還之辭。^①○布徧，音遍，下文同。晉侯執曹伯，班其所取侵地于諸侯，則何諱乎取同姓之田？據晉還之得為伯。【疏】注「據晉還之得為伯」。○解云：即上二十八年「三月，丙午，晉侯入曹，執曹伯，界宋人」是也。何者？^②稱侯以執，伯討之文。然此傳云「晉侯執曹伯，班其所取侵地于諸侯」，正指上二十八年執曹伯以界宋人之文。言「晉還之」者，謂執曹伯而還諸侯之田矣。久也。魯本為霸者所還，當時不取，久後有悔，更緣前語取之，不應以得，^③故當坐取邑。

公子遂如晉。

夏，四月，四卜郊，不從，乃免牲，猶三望。曷為或言三卜，或言四卜？三卜禮也，四卜非禮也。三卜何以禮？四卜何

①「布徧還之辭」，阮校：「鄂本『徧』字空缺。按《釋文》作『布徧』，經、注本蓋作『布還』，此合併為一。」

②「何」，阮校引盧文弨曰：「『何』疑『向』。」

③「以」，阮校：「鄂本『以』作『復』，此誤。宣元年疏引此注，此本、閩本皆作『復』。」

以非禮？據俱卜也。【疏】「曷爲或言三卜」。○解

云：即襄七年「夏，四月，三卜郊，不從，乃免牲」是也。

○「三卜禮也」。○解云：案《曲禮上》篇云「卜筮不過

三」，是其舊典之遺存，鄭玄云「求吉不過三，魯四卜郊，

《春秋》譏之」是也。三卜禮，謂是魯禮。若天子之郊則

不卜，以其常事，但以魯郊非常，是以卜之，吉則爲之，凶

則已之。求吉之道三。三卜，吉凶必有相奇者，可

以決疑，故求吉必三卜。○奇，居丑反。①【疏】「求吉之

道三」。○解云：《周禮》大卜掌三王之龜易，義亦通于

此。然三卜是禮，理應不書，襄七年「三卜郊」何以書？

正以魯人之郊，博卜三正，襄七年乃在周之四月，以其不

時，是以書也。禘、嘗不卜，郊何以卜？禘比禘

爲大，嘗比四時祭爲大，故據之。【疏】「禘嘗不卜」。○

解云：即僖八年「秋，七月，禘于太廟」，桓十四年八月「乙

亥，嘗」之類，皆不見卜筮之文，故言此。○「禘比禘爲

大」。②○解云：禘之與禘雖皆大祭，但禘及功臣，於禘

則否，故以禘爲大，是以文二年「大事於大廟」之下，傳云

「五年而再殷祭」，彼注云：「謂三年禘，五年禘。禘所以

異於禘者，功臣皆祭也。禘猶合也。禘猶諦也，審諦無

所遺失。《盤庚》曰：「茲予大享于先王，爾祖其從與享

之。」義亦通于此也。○注「嘗比四時祭爲大」。○解

云：以此傳配禘，禘既大於禘，則知嘗大于四時，且嘗是

秋成萬物薦馨，故以爲盛也。卜郊，非禮也。禮，天

子不卜郊。【疏】注「禮天」至「卜郊」。○解云：欲道天子

之郊，以其常事，故不須卜。魯郊非禮，是以卜之，異於

禘嘗耳。卜郊何以非禮？據上言三卜禮。【疏】

「卜郊何以非禮」。○解云：弟子之意，以爲上言三卜是

禮，何言卜郊非禮乎？答者以爲由魯郊非正，故須卜，

何妨天子之郊不卜乎？魯郊非禮也。以魯郊非

禮，故卜爾。昔武王既沒，成王幼少，周公居攝，行天子

事，制禮作樂，致太平，有王功。周公薨，成王以王禮葬

之，命魯使郊，以彰周公之德，非正故卜。三卜，吉則用

之，不吉則免牲。謂之郊者，天人相與交接之意也。不

言郊天者，謙不敢斥尊。○少，詩照反。太平，音泰。王

功，于況反。【疏】注「謂之郊」至「意也」。○解云：何氏

①「丑」，宋本《釋文》作「宜」，當是。

②「禘」上，杉浦校：「單疏鈔本有「注」字，是也。」

以爲《郊特牲》云「於郊故謂之郊」，《禮記》非正典，故不從之。○注「不言郊天者」至「尊者」。○解云：欲道禘于大廟，于莊公武宮之屬，^①皆斥尊言之。若然，「乙亥，嘗」、「己卯，烝」之屬，文不斥言者，^②以是時祭于大廟，小於禘故也。魯郊何以非禮？據成公乃不郊惡之。○惡之，烏路反，下皆同。天子祭天，郊者，所以祭天也。天子所祭，莫重於郊。於南郊者，^③就陽位也。稷席玄酒，器用陶匏，大圭不瑑，大羹不和，爲天至尊，物不可悉備，故推質以事之。○稷，古老反。匏，白交反。瑑，大轉反。和，戶卧反。爲天，于僞反，下「則爲」、「本爲」、「主爲」皆同。【疏】注「居南郊」至「以事之」。○解云：皆出《禮記·郊特牲》。彼文云「郊之祭也，大報天而主日也，兆於南郊，就陽位也」。又云「莞簟之安，而蒲越稷韎之尚」，「酒醴之美，玄酒明水之尚」，「器用陶匏，以象天地之性也」，「大圭不瑑，美其質也」，「大羹不和，貴其質也」。鄭氏云：「明水，司烜以陰鑑所取於月之水也。蒲越稷韎，藉神席也。」而彼文又云「祭天掃地而祭焉，於其質而已矣」，而云稷韎神席者，正謂對不爲壇，故言掃地，不全無席。諸侯祭土。土，謂社也。諸侯所祭，莫重

於社。卿大夫祭五祀，士祭其先祖。【疏】「諸侯祭土」。○解云：欲道魯郊爲非禮之意也。天子有方望之事，方望，謂郊時所望祭四方群神、日月星辰、風伯雨師、五嶽四瀆及餘山川，凡三十六所。【疏】注「方望」至「三十六所」。○解云：舊說云四方群臣是爲四也，^①通日與月爲六，星是五星，爲十一也，辰是十二辰，爲二十三，風伯雨師爲二十五，五岳爲三十，四瀆爲三十四，餘小山川爲二，是爲三十六所。無所不通。盡八極之內，天之所覆，地之所載，無所不至，故得郊也。諸侯山川有不在其封內者，則不祭也。故魯郊非禮也。【疏】注「故魯」至「禮也」。○解云：正以其所主狹，是以不得祭天地也。曷爲或言免牲，或言免

① 「武」上，杉浦校：「單疏鈔本有「于」字。」

② 「文」，杉浦校：「單疏鈔本作「又」，毛本亦然，是也。」

③ 「於」，阮校：「鄂本「於」作「居」，此本疏標起訖同，當據正。」

④ 「臣」，阮校：「閩本同，監本剗改「臣」作「神」，是也。毛本從之。」今按：上注文作「四方群神」，則作「神」是。

牛？免牲，禮也。魯卜郊不吉，免之。禮，卜郊不

吉，則爲牲作玄纁裳，使有司玄端，放之於南郊，明本爲天，不敢留天牲。【疏】「或言免牛」。○解云：即成七

年「王正月，騶鼠食郊牛角，改卜牛。騶鼠又食其角，乃免牛」是也。免牛，非禮也。免牛何以非禮？

傷者曰牛。養牲不謹敬，有災傷，^①天不饗用，不得復爲天牲，故以本牛名之。非禮者，非大牲不當復見免，^②但當內自省責而已。○復爲，扶又反，下同。見免，賢徧

反，下「以見」同。三望者何？望祭也。然則曷祭？祭泰山河海。曷爲祭泰山河海？

據郊者主爲祭天。○大山，音泰，本亦作「泰」，下同。

【疏】「三望者何」。○解云：欲言祭名，文在免牲之下，欲言非祭，因郊天爲之，故執不知問。山川有能潤于

百里者，天子秩而祭之。此皆助天宣氣布功，故

祭天及之。秩者，隨其大小尊卑高下所宜。禮，祭天牲

角繭栗，社稷宗廟角握，六宗五嶽四瀆角尺，其餘山川視

卿大夫。天燎地瘞，日月星辰布，山縣水沉，風磔雨升。

燎者，取俎上七體，與其珪寶，在辨中，置於柴上燒之。

○繭，古典反。燎，力召反。瘞，於例反。縣，音玄。磔，

陟百反。【疏】注「禮祭天」至「大夫」。○解云：皆《王制》

與《禮說》文耳。「其餘山川視卿大夫」者，小山川之屬，

但牽牛而已。○注「天燎」至「雨升」。○解云：《爾雅》

「祭天曰燔柴」者，蓋以燎柴而燔之，故謂祭爲燔柴。^③云

「地瘞」者，即《爾雅》云「祭地曰瘞埋」，李巡曰「祭地以玉

埋地中」。瘞亦埋也。云「日月星辰布」者，即《爾雅》云

「祭星曰布」，孫氏云：「既祭布散於地位，^④似星辰布

列。」郭氏曰：「布散祭於地。」然則《爾雅》雖不言日月，日

月之義宜附於星，故何氏連日月言之。云「山縣」者，《爾

雅》云「祭山曰瘞縣」，郭氏云：「或瘞或縣，置之於山。」李

氏曰：「祭山以黃玉及璧，以瘞置几上，遙遙而眡之若縣，

故曰瘞縣。」孫氏曰「瘞縣，埋於山足曰瘞，埋於山上曰

縣」是也。云「水沉」者，即《爾雅》「祭川曰浮沈」，孫氏曰

①「有」，阮校：「鄂本、宋本、閩本同，監本剗改作「致」，毛本從之。」

②「大」，阮校：「鄂本同，閩、監、毛本作「天」，是也。上文兩言「天牲」。」

③「祭」下，杉浦校：「單疏鈔本有「天」字，是也。」

④「位」，阮校：「浦鏗云：「位」衍。按：《爾雅音義》無「位」。」

「置祭於水中，或浮或沉，故曰浮沉」是也。言「風磔」者，即《爾雅》云「祭風曰磔」，孫氏云：「既祭披磔其牲，以風散之。」李氏曰：「祭風以牲頭蹄及皮，破之以祭，故曰磔。」郭氏曰：「今俗當大道中磔狗，云以止風，此其象。」

云「雨升」者，無文，何氏更有所見，蓋患其雨多，祭使上升，故祭雨曰升，明上「水沉」是祭川也。○注「燎者取」至「燎之」。^①○解云：上天燎之文。^②其七體者，即《少

牢》之肩、臂、臑、肫、^③胙、正脊、脰脊、橫脊、短脅、長脅、^④代脅之屬也。觸石而出，膚寸而合，側手爲

膚，案指爲寸，言其觸石理而出，無有膚寸而不合。○膚寸，方于反。側手爲膚，按指爲寸。不崇朝而徧雨

乎天下者，唯泰山爾。崇，重也。不重朝，言一朝

也。○崇朝，如字，注同。雨，于付反，又如字。崇重，直

龍反，下同。河海潤于千里。亦能通氣致雨，潤澤

及于千里。《韓詩傳》曰「湯時大旱，使人禱于山川」是也。郊望非一，獨祭三者，魯郊非禮，故獨祭其大者。

猶者何？通可以已也。已，止。何以書？

譏不郊而望祭也。譏尊者不食，而卑者獨食。書者，惡失禮也。魯至是郊者，僖公賢君，欲尊明其先祖之

功德，不就廢之。譏者，《春秋》不見事不書，皆從事舉可知也。不告言不從者，明己意汲汲欲郊，而上不從爾。^⑤所以見事鬼神，當加精誠。

秋，七月。

冬，杞伯姬來求婦。其言「來求婦」

何？兄弟辭也。其稱婦何？有姑之辭

也。書者，無出道也。

狄圍衛。

十有二月，衛遷于帝丘。月者，惡大國遷

至小國，城郭堅固，人衆彊，遷徙畏人，故惡之也。

三十有二年，春，王正月。

①「燎之」，阮校：「按注，當作『燒之』。」

②「上天燎之文」，阮校：「浦鏜云：疑衍。盧文弨

曰：疑作「上釋天之文」。」

③「臑」，阮校：「何校本作『膊』，與《少牢饋食禮》合。」

④「長脅」，阮校：「何校本作『正脅』，與《少牢禮》合。」

⑤「上」，阮校：「鄂本『上』作『卜』，此誤。」

夏，四月，己丑，鄭伯接卒。不書葬者，殺大

夫申侯也。君殺大夫，皆就葬別有罪無罪，唯內無貶公之道，不可去葬，故從殺時別之。○接，二傳作「捷」。別有，彼列反，下同。去，起呂反。【疏】注「君殺」至「無罪」。○解云：正謂大夫有罪，則書其君葬，若其大夫無罪，則去其君葬以見惡。○注「唯內」至「別之」。○解云：正其別之者，即有罪不日，上二十八年春，「公子買戍衛，不卒戍，刺之」是也。若其無罪則書日，即成十六年十有二月，「乙酉，刺公子偃」是也。

衛人侵狄。

秋，衛人及狄盟。不地者，起因上侵就狄盟也。復出衛人者，嫌與內微者同也。言「及」者，時出不得狄君也。稱人而言「及」，則知狄盟者卑。○復，扶又反。

冬，十有二月，己卯，晉侯重耳卒。○

重，直龍反。

三十有三年，春，王二月，秦人入滑。
齊侯使國歸父來聘。

夏，四月，辛巳，晉人及姜戎敗秦于

殽。①其謂之秦何？據敗者稱師，未得師稱人。

○殽，本又作「肴」，戶爻反，或戶高反。【疏】注「據敗」至「稱人」。○解云：即莊二十八年「春，王三月，甲寅，齊人伐衛。衛人及齊人戰，衛人敗績」，傳云：「敗者稱師，衛何以不稱師？」何氏云：「據桓十三年，己巳，燕人戰敗績稱師。」傳云「未得乎師也」，何氏云：「未得成列爲師也。」然則燕人敗績稱師，衛人未得師稱人，今此稱國，故難之。夷狄之也。曷爲夷狄之？據俱見敗。秦伯將襲鄭，輕行疾至，不戒以人曰襲。○輕，遣政反。百里子與蹇叔子諫曰：「千里而襲人，未有不亡者也。」行疾不假塗，變必生。道遠多險阻，遭變必亡。○蹇，居輦反。秦伯怒曰：「若爾之年者，宰上之木拱矣，宰，冢也。拱，可以手對抱。○拱，九勇反，以手對抱。【疏】注「宰冢也」。○解云：正以《穀梁傳》云「子之冢木已拱矣」，范氏云「拱，合抱」，未知同異如何也。爾曷知！」師出，百里子與蹇叔

①「敗秦」，阮校引惠棟云：「二傳皆作『敗秦師』。」

子送其子而戒之曰：「爾即死，必於殺之嶽巖，是文王之所辟風雨者也，其處險阻隘，勢一人可要百，故文王過之驅馳，常若辟風雨，襲鄭所當由也。」○嶽，苦銜反，鄭深生、褚詮之音《上林賦》並同，徐音欽，韋昭《漢書音義》去瞻反。又本或作「廠」，同。岩，五銜反，韋音嚴。處，昌慮反。隘，於賣反。要，一遙反，傳「要之」同。吾將尸爾焉。」在牀曰尸，在棺曰柩。

子揖師而行。揖其父於師中，介胄不拜，爲其拜如蹲。^①○胄，直又反。爲，于僞反。蹲，音存。【疏】注「介胄不拜」。○解云：出《曲禮上》篇，彼文「蹲」作「菱」字。《少儀》亦云「介者不拜」，鄭注云「軍中之拜，肅拜」是也。百里子與蹇叔子從其子而哭之，秦伯怒曰：「爾曷爲哭吾師？」對曰：「臣非敢哭君師，哭臣之子也。」言恐臣先死，子不見臣，故先哭之。弦高者，鄭商也。鄭商，賈人。○賈，音古。遇之殺，矯以鄭伯之命而犒師焉。詐稱曰矯。犒，勞也。見其軍行非常，不似君子，恐見虜掠，^②故生意矯君命勞之。○矯以，居表反。犒，苦報反，勞也。勞，

力報反，下同。掠，音亮。或曰往矣，或曰反矣。^③軍中語也。時以爲鄭實使弦高犒之，或以爲鄭伯已知將見襲，必設備，不如還，或曰緒出，^④當遂往之。然而晉人與姜戎，要之殺而擊之，匹馬隻

①「介胄不拜爲其拜如蹲」，阮校：「解云：『出《曲禮上》篇，彼文「蹲」作「菱」。』《經義雜記》曰：『今《禮記》作「介者不拜，爲其拜而菱拜」。《釋文》「菱拜」，盧本作「蹲」，與何邵公合。』「菱」乃俗字。「介者」作「介胄」，蓋何氏以義言之。」「而」、「如」古通，此當從《公羊》注「而」讀爲「如」。』」

②「掠」，阮校：「鄂本作「略」。按：《釋文》作「虜掠」。」「或曰往矣或曰反矣」，王引之《經義述聞》：「「往」、「反」當上下互易。何注曰「或以爲鄭伯已知將見襲，必設備，不如還。或曰既出，當遂往之」，注先釋「反」，後釋「往」，則傳之先言「反」後言「往」可知，寫者錯亂耳。唐石經已誤。」

③「緒」，閩本作「既」。阮校：「此本「緒」字剗改，當本作「既」也。」

輪無反者。^①然，然上議，猶豫留往之頃也。^②匹馬，

一馬也。隻，踦也。皆喻盡。○隻輪，如字，一本又作

「易輪」。董仲舒云：「車皆不還，故不得易輪轍。」隻踦，

居宜反，一本作「易踦」。其言「及姜戎」何？據秦

人，白狄不言及，吳子主會也。^③【疏】注「及吳子主會

也」。^④○解云：即「黃池」傳云：「吳何以稱子？吳主

會。吳主會，即曷為先言晉侯？」^⑤不與夷狄之主中國

也。姜戎，微也。故絕言及。稱人，亦微者也，

何言乎姜戎之微？據邢人、狄人伐衛不言及。

先軫也。先軫，晉大夫也。言姜戎微，則知稱人者尊。

或曰襄公親之。以既貶，又危文公葬。【疏】注「以

既」至「公葬」。○解云：即下經云「癸巳，葬晉文公」是

也，何者？隱三年傳云「當時而不日，正也。當時而日，

危不得葬也」。今此文公去年十二月薨，至今年四月正

宜合葬，而書其日，故云「危文公葬」。襄公親之，則

其稱人何？據桓十三年衛侯背殯用兵不稱人。

【疏】注「據桓十三年」至「稱人」。○解云：即桓十三年

「二月，公會紀侯、鄭伯。己巳，及齊侯、宋公、衛侯、燕人

戰」云云是也。知彼衛侯背殯用兵者，即以桓十二年十

一月，「丙戌，衛侯晉卒」，至十三年「三月，葬衛宣公」。

①「匹馬隻輪無反者」，阮校：「《經義雜記》曰：『何注：「匹馬，一馬也。隻，踦也。』《穀梁傳》作「匹馬倚輪無反者」，范解：「踦輪，一隻之輪。』《漢書·五行志》載劉向說，謂晉敗秦師，「匹馬踦輪無反者」。服虔曰：「踦音奇偶之奇。師古曰：「踦，隻也。』凡作「踦」，作「踦」，作「倚」，皆「奇」字之通借。疑《公羊傳》本作「匹馬踦輪」，與《穀梁》及《漢志》同，何注作「踦，隻也」，與范解及顏注同，今本及《釋文》皆誤倒。若傳本作「隻」，文義已明，反訓為「踦」，義轉晦矣。』」

②「往」，阮校：「鄂本「往」作「住」，當據正。」

③「據秦人白狄不言及吳子主會也」，阮校：「閩、監、毛本同，鄂本疊「吳子」二字。盧文弨曰：「秦人，白狄伐晉，在成九年。『及吳子』，在哀十三年。舊本「吳子」重，但脫一「及」字。按：書中標注云「及吳子主會也」，如今本，依疏疊「及」字，義可通矣。』○按：此注當「據秦人，白狄不言及」句絕，下云「及吳子，吳子主會也」，謂如哀十三年言「及吳子」者，因吳子主會，今姜戎非主會者，何以言及？」

④「及」，疑衍，闕本無此字。

⑤「即」，阮校引浦鏜云：「『則』誤「即」。」

然則三月乃葬先君，二月而已出戰，故知背殯明矣。

貶。曷爲貶？據俱背殯用兵。君在乎殯而用

師，危不得葬也。與衛迫齊，宋異，故惡不子也。○

惡不，烏路反，下同。【疏】注「與衛」至「宋異」。○解

云：即彼注云「背殯用兵而月，不危之者，衛弱於齊，宋，

不從亦有危，故量力不責」是也。①詐戰不日，此何

以日？據不言敗績，外詐戰文也。詐，卒也。齊人語

也。○卒，七忽反。盡也。惡者不仁。②

癸巳，葬晉文公。

狄侵齊。

公伐邾婁，取叢。取邑不致者，得意可知例。

○取叢，才工反，二傳作「取訾樓」。【疏】「取叢」。○解

云：有作「鄒」字者。○「取邑」至「知例」。③○解云：公

與二國以上用兵之時，得意致會，不得意致伐。若與一

國及獨出用兵之時，得意不致，不得意致伐。今此取邑

例皆不致，不別得意者，既言取邑，得意明矣，何勞

別之？

秋，公子遂率師伐邾婁。

晉人敗狄于箕。不月者，略微者與夷狄也。

【疏】注「不月」至「狄也」。○解云：以隱六年注云「戰例時，偏戰日，詐戰月」，今此不月，故解之。

冬，十月，公如齊。月者，善公念齊恩及子

孫。【疏】注「月者」至「子孫」。○解云：正以朝聘例時，

故如此解。而言「念齊恩及子孫」者，正以十年春「公如

齊」之下，注云：「月者，僖公本齊所立，桓公德衰見叛，獨

能念恩朝事之，故善錄云。」④十五年「公如齊」之下，注

云：「月者，善公既能念恩，尊事齊桓，又合古五年一朝之

義，故錄之。」今桓公既卒，能復朝齊，書月，故以念恩及

子孫解之。

十有二月，公至自齊。

乙巳，公薨于小寢。

①「責」下，杉浦校：「單疏鈔本有「也」字。」

②「者」，阮校：「鄂本「者」作「晉」，此誤。」

③「取」上，杉浦校：「單疏鈔本有「注」字，是也。」

④「云」，杉浦校：「單疏鈔本作「之」。阮氏校勘記

云：「浦鏜云：「之」誤「云」。按：浦說是也，「云」當

賁霜不殺草，李梅實。何以書？記

異也。何異爾？不時也。周之十二月，夏之十

月也。《易中孚記》曰：「陰假陽威之應也。早賁霜而不

殺萬物，至當賁霜之時，根生之物復榮不死，斯陽假與陰

威，陰威列索，故陽自賁霜而反不能殺也。」此祿去公室，

政在公子遂之應也。○復，扶又反。索，息各反。【疏】

注「陰威列索」。○解云：正謂陰威列見而散萬物矣。

晉人、陳人、鄭人伐許。

監本附音春秋公羊注疏僖公卷第十二

監本附音春秋公羊注疏文公卷第十三

起元年，盡九年

何休學

元年，春，王正月，公即位。

二月，^①癸亥，朔，^②日有食之。是後楚世

子商臣弑其君，楚滅江、六，狄比侵中國。【疏】注「是後」至「其君」。○解云：即下經云「冬，十月，丁未，楚世子商臣殺其君甯」是也。^③○注「楚滅江六」。○解云：即下四年「秋，^④楚人滅六」是也。○注「狄比侵中國」。○解云：即下四年夏「狄侵齊」、七年夏「狄侵我西鄙」之屬是也。

天王使叔服來會葬。其言「來會葬」

何？據奔喪以非禮書，歸含且贈不言來。○歸含，本又作「含」，戶暗反，五年經同。贈，芳鳳反。【疏】注「據奔喪以非禮書」。○解云：即定十五年夏五月，「壬申，公

薨于高寢」，下云「邾婁子來奔喪」。傳云「其言來奔喪，

非禮也」是。○注「歸含」至「言來」。○解云：下五年

「春，王正月，王使榮叔歸含且贈」是也。會葬，禮也。

但解會葬者，明言來者常文，不為早晚施也。常事書者，

文公不肖，諸侯莫肯會之，故書天子之厚，以起諸侯之

薄，蓋以長補短也。叔服者，王子虎也。服者，字也。叔

者，長幼稱也。不繫王者，不以親疏錄也。不稱王子者，

時天子諸侯，不務求賢而專貴親親，故尤其在位子弟，刺

①「二」，原作「三」，今據余本、京都本、再造善本、中華本、閣本改。

②「朔」，阮校：「《左氏》、《穀梁》無「朔」字。」王引之《經

義述聞》：「朔，衍字也。《漢書·五行志》載此經無

「朔」字，而引董仲舒、劉向之說於下。仲舒傳《公

羊》，向傳《穀梁》，其皆無「朔」字可知也……自顏師

古注《漢書·劉向傳》「日食三十六」引《春秋》文元年

二月癸亥朔，則唐初已衍「朔」字，不始于開成石經

矣。當據《五行志》刪正。」

③「殺」，下經文作「弑」。

④「下四年秋」，阮校引浦鏜云：「下脫「楚人滅江五年秋」七字。」

其早任以權也。魯得言公子者，方錄異辭，故獨不言弟也。諸侯得言子弟者，一國失賢輕。○不爲，于僞反，下「不爲」同。長幼，丁丈反。稱也，尺證反。【疏】注「但解」至「施也」。○解云：在隱元年也。○注「常事書者」。○解云：僖公之卒在去年十二月，至今年四月葬之，是爲五月而葬。叔服來會附在葬前，適得其所，故謂之常事。常事不書，今書之，故須注解。○注「文公」至「會之」。○解云：正以下七年「秋，八月，公會諸侯，晉大夫盟于扈」，傳云：「諸侯何以不序？大夫何以不名？公失序也。公失序奈何？諸侯不可使與公盟，眅晉大夫使與公盟也。」注云：文公「爲諸侯所薄賤，不見序，故深諱爲不可知之辭」。是其不肖，諸侯莫肯會之之義也。○注「故書」至「之薄」。○解云：言天子恩厚於文公，而經書其會葬，起諸侯之薄，無恩於文公，故經不書矣。而襄三十二年「冬，十月，滕子來會葬」，亦是常事而書之者，亦起當時更無人會，故彼注云「此書者，與叔服同義」是也。○注「蓋以長補短也」。○解云：謂書天子得禮，欲以補諸侯之短，令其非禮見矣。其非禮者，不相會葬是也。○注「叔服」至「稱也」。○解云：知叔服爲王子虎者，正以下三年「夏，五月，王子虎卒」，傳云：「王子虎者何？」

天子之大夫也。外大夫不卒，此何以卒？新使乎我也。」注云「王子虎，即叔服也。新爲王者使來會葬，在葬後三年中卒，君子恩降於親親，^①則加報之，故卒，明當有恩禮也」是也。○注「不繫」至「錄也」。○解云：若繫王，宜云「王使王服子來會葬」，似若宣十五年王札子矣。今不如此者，《春秋》主見天子之厚，使來會葬而已，何須錄其使人之親疏乎？是以不言王服子矣。宣十五年「王札子殺召伯、毛伯」，傳云：「王札子者何？長庶之號。」注云：「子者，王子也。天子不言子弟，故變文上札繫先王以明之。」是其類也。○注「不稱」至「權也」。○解云：言尤其在位子弟，則知聘使與會盟之時，不得稱子弟，若其卒與奔猶得稱之。何者？卒與出奔不復在位，何須刺其早任以權乎？即下三年「夏，五月，王子虎卒」，襄三十年夏「王子瑕奔晉」之屬是也。○注「魯得」至「弟也」。○解云：魯君在位，公子得言之者，即桓五年

①「降」，阮校：「浦鏜云：『隆』誤『降』。按：浦說是也。」

「公子翬如齊逆女」、^①莊二年「公子慶父伐於餘丘」之屬是也。言方錄異辭者，謂上異於天子，下異於諸侯，見其爲新王之義，故曰方錄異辭矣。故獨不言弟也者，謂尤其在位之弟，若其卒與出奔，不妨有之，即宣十七年冬，「公弟叔肸卒」之屬是也。○注「諸侯」至「賢輕」。○解云：諸侯在位，公子得見經者，即宣二年春，「及鄭公子歸生戰于大棘」之屬是也。其諸侯在位之弟得見經者，即隱七年夏「齊侯使其弟年來聘」、桓十四年夏「鄭伯使其弟語來盟」之屬是也。一國失賢輕者，雖是不務求賢，而專貴親親，要其一國失賢，其罪輕故也。

夏，四月，丁巳，葬我君僖公。

天王使毛伯來錫公命。錫者何？賜

也。命者何？加我服也。復發傳者，嫌禮與桓

公同，死生異也。主書者，惡天子也。古者三載考績，三

考黜陟幽明。文公新即位，功未足施而錫之，非禮也。

○錫，思歷反。^②復，扶又反。惡，烏路反。【疏】「錫者

何」。○解云：明始即位未有功美，天子加錫，異於常典，

故執不知問。○注「復發」至「禮也」。○解云：莊元年

「王使榮叔來錫桓公命」，傳云：「錫者何？賜也。」注

云：「上與下之辭。」傳又云：「命者何？加我服也。」注云：「增加其衣服，令有異於諸侯。」然則若不重發，即嫌悉與桓公同，故復言之，明有異矣。彼是贈死之衣，此是朝祭之服，故言死生異也。云云之說，在莊元年。

晉侯伐衛。

叔孫得臣如京師。書者，與莊二十五年同。

知不爲喪聘書者，聘爲貢職天子，當得異方之物以事宗廟，又欲以知君父無恙，不以喪廢，故不譏也。如他國，就不三年一譏而已。○恙，餘亮反。【疏】注「書者」至

「譏也」。○解云：即莊二十五年冬「公子友如陳」，彼注

云：「如陳者，聘也。內朝聘言如者，尊內也。書者，錄內

所交接也。」今此亦然，故曰同也。○注「如他」至「而

已」。○解云：如他國所以合譏者，正以聘是吉禮，又非

君父之國，於喪宜廢故也。言「就不三年一譏而已」者，

即下二年冬，「公子遂如齊納幣」，傳云「納幣不書，此何

以書？譏。何譏爾？譏喪娶也。娶在三年之外，則何

① 「五」，阮校：「浦鏜云：『三』誤『五』。按：浦說是也。」杉浦校：「單疏鈔本『五』作『三』。」

② 「思」，原作「恩」，今據京都本、宋本《釋文》改。

譏乎喪娶？三年之內不圖婚」是也。言就其重者，一譏而已，其餘不譏從可知。

衛人伐晉。

秋，公孫敖會晉侯于戚。○戚，于寂反。^①

冬，十月，丁未，楚世子商臣弑其君

髡。楚無大夫，言世子者，甚惡世子弑父之禍也。不言其父，言其君者，君之於世子，有父之親，有君之尊。言世子者，所以明有父之親，言君者，所以明有君之尊，又責臣子當討賊也。日者，夷狄子弑父，忍言其日。○髡，苦門反，《左氏》作「顛」。【疏】注「楚無」至「賊也」。○解云：下九年「冬，楚子使椒來聘」，傳云：「椒者何？楚大夫也。楚無大夫，此何以書？始有大夫也。始有大夫，則何以不氏？許夷狄者，不一而足也。」然則至下九年，楚始有大夫，則知此處未有大夫矣。既無大夫，其世子亦未當見，故解之。○注「日者」至「其日」。○解云：如此注者，正決襄三十年「夏，四月，蔡世子般弑其君固」，何氏云「不日者，深為中國隱痛有子弑父之禍，故不忍言其日」是也。

公孫敖如齊。書者，譏喪娶。吉凶不相干。

二年，春，王二月，甲子，晉侯及秦師戰于彭衙，秦師敗績。稱秦師者，愍其衆，惡其將。前以不用賢者之言，匹馬隻輪無反者，今復重師敗績。師敵君不正者，賤之，不嫌得敵君。○衙，音牙，本或作「牙」。惡，烏路反。將，子匠反。復，扶反反，^②下「不復」皆同。重，直用反。【疏】注「稱秦」至「其將」。○解云：正以秦于是時未有大夫，則不合稱師，今而稱師，故解之。○注「前以」至「敗績」。○解云：在僖三十三年矣。○注「師敵」至「敵君」。○解云：僖二十八年夏，晉侯以下「及楚人戰于城濮」，傳云：「此大戰也，曷為使微者？子玉得臣也。子玉得臣則其稱人何？故大夫不敵君也。」^③然則彼是大夫，嫌其與君敵，故正之稱人。此師者，乃是秦之衆人，是以不勞正之耳。

① 「于」，宋本《釋文》作「午」。《抱經堂叢書》本《釋文》作「千」，當是。

② 「扶反反」，宋本《釋文》作「扶又反」，當是。

③ 「故大夫不敵君也」，杉浦校：「單疏鈔本『故』作『貶』」，是。今按：僖公二十八年傳作「貶曷為貶大夫不敵君也」十字。

丁丑，作僖公主。作僖公主者何？

爲僖公作主也。爲僖公廟作主也。主狀正方，穿中

央，達四方。天子長尺二寸，^①諸侯長一尺。○爲僖公

廟，于僞反，下「蓋爲」，「以爲」，下「欲爲」同。【疏】「作僖

公主者何」。○解云：欲言是禮，書而譏之，欲言非禮，禮

有作主之事，故執不知問。○「爲僖公作主也」。○解

云：爲，于僞反。○注「主狀」至「一尺」。○解云：皆《孝

經說》文也。卿大夫以下，正禮無主，故不言之。云云之

說，備在《左氏》。主者曷用？虞主用桑，禮，平

明而葬，日中而反虞。以陽求陰，謂之虞者，親喪以下

壙，皇皇無所親，^②求而虞事之。虞猶安神也。^③用桑

者，取其名與其羸犢，所以副孝子之心。禮，虞祭，天子

九，諸侯七，卿大夫五，士三，其莫處猶吉祭。○壙，苦晃

反，又音曠。羸，才古反，又七奴反。【疏】注「禮平」至

「反虞」。○解云：出《檀弓》與《士虞·記》也。言以陽求

陰者，謂以日中求神是也。而鄭注《士虞·記》云「朝葬

而日中虞，^④君子舉事必用辰正也」者，兩相須也。彼鄭

氏又云「再虞三虞皆質明」，則日中而反虞者，指葬日言

之。○注「禮虞」至「吉祭」。○解云：自「諸侯七」以下，

《雜記》文。其天子九虞者，何氏差之耳。《異義》《左氏》說亦有成文。云云之說，具《左氏傳》疏。練主用

栗。謂期年練祭也，埋虞主於兩階之間，^⑤易用栗也。

夏后氏以松，殷人以柏，周人以栗。松猶容也，想見其容

貌而事之，主人正之意也。柏猶迫也，親而不遠，主地正

之意也。栗猶戰栗，謹敬貌，主天正之意也。《禮·士

虞·記》曰：「桑主不文，吉主皆刻而謚之，蓋爲禘祫時別

昭穆也。」虞主三代同者，用意尚羸犢，未暇別也。○期

年，音基，三年同。人正，音征，下同。別，彼列反，下同。

【疏】注「謂期」至「栗也」。○解云：出《禮記》文。○注

「夏后」至「以栗」。○解云：出《論語》也。而鄭氏注云

「謂社主，正以古文《論語》『哀公問社於宰我』故也」，今

① 「二」，原作「三」，今據余本、京都本、再造善本、中華本、閩本改。

② 「親喪以下壙皇皇無所親」，阮校：「《穀梁》疏引作『親喪已入壙，皇皇無所見』。」

③ 「虞猶安神也」，阮校：「《穀梁》疏引作『虞猶安也』，無『神』字，此衍。」

④ 「而日中虞」，阮校：「注作『日中而虞』。」
⑤ 「埋」，原作「理」，今據余本、閩本、監本改。

文《論語》無「社」字，是以何氏以爲廟主耳。用栗者，

藏主也。藏于廟室中當所當奉事也。^①質家藏于

堂。^②作僖公主，何以書？據作餘公主不書。

譏。何譏爾？不時也。其不時奈何？

欲久喪而後不能也。禮，作練主當以十三月。文

公亂聖人制，欲服喪三十六月，十九月作練主，又不能卒

竟，故以二十五月也。日者，重失禮鬼神。^③【疏】注「禮

作」至「三月」。○解云：即《禮記》云「十三月而練」是也。

○注「日者」至「鬼神」。○解云：即隱五年注云「失禮鬼

神例日」是也。

三月，乙巳，及晉處父盟。此晉陽處

父也，何以不氏？據晉陽處父伐楚救江。^④【疏】注

「據晉」至「救江」。○解云：即下三年冬，「晉陽處父帥師

伐楚救江」是也。諱與大夫盟也。諱去氏者，使若

得其君，如經言邾婁儀父矣。不地者，起公就於晉也。

日者，起公盟也。俱没公，齊高傒不使若君，^⑤處父使若

君者，親就其國，恥不得其君，故使若得其君也。如晉不

書不致者，深諱之。○去，起呂反。【疏】注「諱去」至「晉

也」。○解云：儀父之事，在隱元年。凡五等諸侯失爵在

名字之例者，但直書其名字，不言其氏，即倪黎來，^④蔡

叔，邾婁儀父之類是也。今此處父無氏，故云使若得其

君矣。○注「日者起公盟也」。○解云：正以微者盟例不

日故也。○注「俱没」至「君也」。○解云：高傒之事，在

莊二十二年。彼經云「秋，七月，丙申，及齊高傒盟于防」

是也。○注「如晉」至「諱之」。○解云：正決下三年「冬，

公如晉。十有二月，己巳，公及晉侯盟」，四年「春，公至

自晉」之文也。

夏，六月，公孫敖會宋公、陳侯、鄭伯、

晉士穀，盟于垂斂。盟不日者，欲共盟誅商臣，雖

①「當所當奉事也」，阮校：「鄂本下「當」作「常」。孫

校：「此當從鄂本，謂藏於廟室當常奉事，以別于桑主不藏而埋之也。」

②「堂」，阮校：「《儀禮經傳通解》「堂」作「室」，宜據以

訂正。文家尊尊，故藏於堂，質家親親，故藏於室。」

③「傒」，原作「僖」，今據莊公二十二年經改。

④「倪黎來」，原作「倪黎求」。杉浦校：「單疏鈔本「求」

作「來」。莊公五年云：「秋，倪黎來來朝。倪者何？

小邾婁也。」今據改。

不能誅，猶爲疾惡故也，褒與信辭也。不如平丘兩舉會盟詳錄之者，時至即盟，會禮不成。○穀，戶木反。垂斂，《左氏》作「垂隴」。【疏】「盟于垂斂」者，《左氏》作「垂隴」。○注「雖不能誅」。○解云：正以共討惡逆，乃是義之高者，若能誅之，理應書見，似若昭四年經書「執齊慶封，殺之」。然今無其經，故知不能誅也。○注「不如平」至「不成」。○解云：即昭十三年「公會劉子、晉侯」以下「于平丘。八月，甲戌，同盟於平丘」是也。

自十有二月不雨，至于秋七月。何以書？記異也。以不言旱。大旱以災書，此亦旱也，曷爲以異書？大旱之日短而云災，云，言也，言有災。【疏】「大旱以災書」。○解云：即僖二十一年經書「夏，大旱」，傳云「何以書？記災也」是也。故以災書。此不雨之日長而無災，故以異書也。此祿去公室，政在公子遂之所致也。不就莊三十一年發傳者，此最甚事著。【疏】注「不就」至「事著」。○解云：莊三十一年「冬，不雨」，傳云：「何以書？記異也。」^①然則彼一時不雨，是以不得發傳云「不雨之日長」，此則歷四時，故言最甚事著也。

八月，丁卯，大事于太廟，躋僖公。大事者何？大禘也。以言大，與有事異。又從僖八

年禘數之，知爲大禘。○大廟，音太，下「太祖」皆同。躋僖，子今反，升也，本又作「躋」，同。^②禘，音治，大祭。禘數，大帝反，下所主反。【疏】「大事者何」。○解云：欲言

大祭，無禘禘之文，欲言時祭，而經書大，故執不知問。

○注「以言」至「事異」。○解云：宣八年夏六月，「辛巳，有事于太廟」，彼是時祭，不言「大」，則知此言「大」者，是大祭明矣。○注「又從僖」至「大禘」。○解云：《春秋說》

文云：「三年一禘，五年一禘。」《爾雅》云：「禘，大祭也。」

孫氏云：「禘，五年大祭也。」然則三年一禘，五年一禘，禮如然也。案僖八年「秋，七月，禘於太廟」，從此以後三年一禘數，則十一年禘，十四年禘，十七年禘，二十年禘，二十三年禘，二十六年禘，二十九年禘，三十二年禘，文二

^①「異」，原作「災」。阮校引浦鏜云：「『異』誤『災』。」杉

浦校：「單疏鈔本『災』作『異』，是。」今據莊公三十一年傳及單疏鈔本改。

^②「躋僖」，宋本《釋文》作「躋僖」。「躋」，宋本《釋文》作「躋」。

年禘也。若作五年一禘數，則從僖公八年禘，十三年禘，十八年禘，二十三年禘，二十八年禘，三十三年禘，文五年禘，則文二年非禘年，正當合禘，故知此年大事爲禘矣，是以注云：「又從僖八年禘數之，知爲大禘也。」若然，從僖八年禘數之，則十一年禘，十三年禘，隨次而下，至僖二十三年并爲禘禘，何得下傳云「五年而再殷祭」者，蓋爲其初時三年作禘，五年作禘，大判言之，得言五年而再殷祭，其間三五參差，隨次而下，何妨或有同年時乎？知非禘與禘相因而數爲三年五年者，若從僖八年禘，十一年禘，十六年禘，十九年禘數之，至僖三十二年禘，文公二年禘亦相當，但於五年而再殷祭之言不合，故不得然。①大禘者何？合祭也。其合祭奈何？毀廟之主，陳于大祖。毀廟，謂親過高祖，毀其廟，藏其主于大祖廟中。禮，取其廟室筓以爲死者炊沐。大祖，周公之廟。陳者，就陳列大祖前，大祖東鄉，昭南鄉，穆北鄉，其餘孫從王父。父曰昭，子曰穆。昭取其鄉明，穆取其北面尚敬。○筓，側白反。炊沐，昌垂反，下音木。東鄉，許亮反，下同。【疏】「大禘者何」。○解云：正以禘小于禘，而文加大，故執不知問。○注「禮取」

至「炊沐」。○解云：出《禮記》文。未毀廟之主，皆升，合食于大祖，自外來曰升。五年而再殷祭。殷，盛也。謂三年禘五年禘。禘所以異於禘者，功臣皆祭也。禘猶合也，禘猶諦也。審諦無所遺失。禮，天子特禘特禘，諸侯禘則不約，禘則不嘗，大夫有賜於君，然後禘其高祖。○諦，音帝。約，羊略反。【疏】注「禘所以至皆祭也」。○解云：出《禮記》與《春秋說》文。○注「禮天至特禘」。○解云：《禮記》及《春秋說》文，即「不主禘禘」是也。②○注「諸侯至不嘗」。○解云：即《禮記·王制》所云「夏禘則不約，秋禘則不嘗」是也。○注「大夫至高祖」。○解云：正以於禮不得故也。躋者何？升也。何言乎「升僖公」？據禘于大廟不道所升。【疏】「躋者何」。○解云：先君昭穆自有常次，今而言躋，故執不知問。○注「據禘至所升」。○解云：即僖八年「秋，七月，禘于大廟，用致夫人」

①「不得然」，阮校引浦鏜云：「《儀禮經傳通解續》下有「解」字。」

②「不主禘禘」，阮校引盧文弨曰：「疑「不王不禘」之誤。」

是也。譏。何譏爾？逆祀也。其逆祀奈何？先禰而後祖也。升謂西上。禮，昭穆指父子，近取法《春秋》，惠公與莊公當同南面西上，隱、桓與閔、僖亦當同北面西上，繼閔者在下。文公緣僖公於閔公爲庶兄，置僖公於閔公上，失先後之義，故譏之。傳曰「後祖」者，僖公以臣繼閔公，猶子繼父，故閔公於文公，亦猶祖也。自先君言之，隱、桓及閔、僖各當爲兄弟，顧有貴賤耳。自繼代言之，有父子君臣之道，此恩義逆順各有所施也。不言吉祿者，就不三年不復譏，^①略爲下張本。○禰，乃禮反。【疏】注「不言」至「張本」。○解云：閔二年「夏，五月，乙酉，吉禘于莊公」，傳云：「其言吉何？言吉者，未可以吉也。曷爲未可以吉？未三年也。」然則吉禘于莊公在三年之內，今此大事亦在三年之內，是不須更言吉祿以譏之，但略言大事于太廟，爲下躋僖公張本而已。

冬，晉人、宋人、陳人、鄭人伐秦。

公子遂如齊納幣。納幣不書，此何以書？譏。何譏爾？譏喪娶也。娶在三年之外，則何譏乎喪娶？據逆在四年。○喪

取，七住反，本亦作「娶」，同。【疏】「納幣不書」。○解云：正以桓三年秋，「公子翬如齊逆女」，不書納幣，故難之。三年之內不圖婚。僖公以十二月薨，至此未滿二十五月，又禮先納采、問名、納吉，乃納幣，此四者皆在三年之內，故云爾。吉禘于莊公，譏。然則曷爲不於祭焉譏？據吉禘于莊公，譏始不三年，大事圖婚，俱不三年。大事猶從吉禘，不復譏。三年之恩疾矣。疾，痛。非虛加之也，非虛加責之。以人心爲皆有之。以人心爲皆有疾痛，不忍娶。以人心爲皆有之，則曷爲獨於娶焉譏？據孝子疾痛，吉事皆不當爲，非獨娶也。娶者，大吉也。合二姓之好，傳之於無窮，故爲大吉。○好，呼報反。傳，直專反。非常吉也。與大事異。其爲吉者，主於己。主於己身，不如祭祀尚有念先人之心。以爲有人心焉者，則宜於此焉變矣。變者，變慟哭泣也。有人心念親者，聞有欲爲己圖婚，則當變慟哭泣矣，

①「復」，阮校：「鄂本「復」作「獨」。」

況乃至於納幣成婚哉？○慟，杜賁反。

三年，春，王正月，叔孫得臣會晉人、宋人、陳人、衛人、鄭人伐沈，沈潰。○伐沈，音審，國名。潰，戶內反。

夏，五月，王子虎卒。王子虎者何？

天子之大夫也。外大夫不卒，此何以卒？

據原仲也。【疏】「王子虎者何」。○解云：欲言大夫，例

不書卒，欲言諸侯，而經書王子，故執不知問。○注「據

原仲也」。○解云：即莊二十七年「秋，公子友如陳，葬原

仲」是也。新使乎我也。王子虎即叔服也。新爲王

者使來會葬，在葬後三年中卒，君子恩隆於親親，則加報

之，故卒，明當有恩禮也。尹氏卒日，此不日者，在期外

也。名者，卒從正。○新使，所吏反。【疏】注「尹氏」至

「外也」。○解云：隱三年「夏，四月，辛卯，尹氏卒」下，傳

云：「外大夫不卒，此何以卒？天王崩，諸侯之主也。」何

氏云：「時天王崩，魯隱往奔喪，尹氏主饋贊諸侯，與隱交

接，而卒恩隆於王者，則加禮錄之，故爲隱恩痛之。」^①日

者，恩錄之，明當有恩禮。」然則彼天王崩，尹氏四月卒，

仍在期內，其恩近，故書日。此則已經三年，其恩殺，故

不日，是以注云「在期外」。○注「名者卒從正」。○解云：隱八年「夏，六月，己亥，蔡侯考父卒」，「八月，葬蔡宣公」，傳云「卒從正」，何氏云：「卒當赴告天子，君前臣名，故從君臣之正義言也。」傳云「而葬從主人」，何氏云：「至葬者，有常月可知。不赴告天子，故自從蔡臣子辭稱公。」然則此亦從君臣之正義言之，故云「名者，卒從正」也。

秦人伐晉。

秋，楚人圍江。

雨螽于宋。雨螽者何？死而墜也。^②

以先言雨也。墜，墮地也。不言「如雨」，言「雨螽」者，本飛從地上，而下至地，似雨尤醇。○雨螽，于付反，下及注同，一音如字。螽，音終。而隊，直類反，注同。隋，大果反。上，時掌反。醇，音純。【疏】「雨螽者何」。○解云：欲言是雨，而特施于螽，欲言非雨，而文言雨螽，故執

①「隱恩」，阮校：「浦鏗云：『恩』下脫『錄』。按：何校本有，與隱三年注合。」

②「墜」，阮校：「諸本同。《釋文》『墜』作『隊』，唐石經『墜』字後加『土』。」

不知問。○注「以先言雨也」。○解云：正以先言雨，後言螽，則知死而墜者也。○注「不言」至「尤醇」。○解云：欲道莊七年「星實如雨」者，本從天來，又不及地，如雨不醇，故云如雨。此則初從地上，而還至地，故不言如，言其真似雨也。何以書？記異也。外異不書，此何以書？爲王者之後記異也。螽猶衆也。衆死而墜者，群臣將爭彊相殘賊之象，是後大臣比爭鬪相殺，司城驚逃，子哀奔亡，國家廓然無人，朝廷久空，蓋由三世內娶，貴近妃族，禍自上下，故異之云爾。○爲王，于僞反。近，附近之近。【疏】注「是後」至「相殺」。○解云：即七年夏「宋人殺其大夫」，八年冬「宋人殺其大夫」是也。○注「司城驚逃」。○解云：即八年冬，「宋司城來奔」是也。○注「子哀奔亡」。○解云：十四年秋，「宋子哀來奔」是也。○注「蓋由三世內娶」。○解云：僖二十五年及十七年傳皆云「宋三世無大夫」，^①三世內娶也」之屬是也。

冬，公如晉。

十有二月，己巳，公及晉侯盟。

晉陽處父帥師伐楚救江。此伐楚也。

其言「救江」何？據兩之，當先言救也，非兩之，當

重出處父也，生事當言遂，三者皆違例，知後言救江，起伐楚意，故問之。○重，直用反。【疏】注「據兩」至「救也」。○解云：即僖二十五年「秋，楚人圍陳，納頓子于頓」，傳云「何以不言遂？兩之也」是也。必知先言救者，正以以江近楚遠故也。^②○注「非兩」至「父也」。○解云：即僖二十八年「春，晉侯侵曹。晉侯伐衛」，傳云「曷爲再言晉侯？非兩之也」是也。○注「生事當言遂」。○解云：即宣元年秋，「楚子、鄭人侵陳，遂侵宋」是也。爲諼也。諼，詐。○諼，許元反。其爲諼奈何？伐楚爲救江也。救人之道，當指其所之，實欲救江而反伐楚，以爲其勢必當引圍江兵當還自救也，故云爾。孔子曰：「自古皆有死，民無信不立。」

四年，春，公至自晉。

夏，逆婦姜于齊。其謂之「逆婦姜于

① 「十七年」，阮校：「浦鏜云：『下』誤『十』。是也。」杉浦校：「單疏鈔本『十』作『下』。」

② 「以以」，阮校：「閩、監、毛本下『以』作『其』。」

齊」何？據不書逆者主名，不言如齊，不稱女。【疏】

「夏逆歸姜于齊」。^①○解云：隱二年注云「不親迎例月，

重錄之」。今此書時者，蓋以娶于大夫，^②賤不可以奉宗

廟，故略之。○注「據不」至「稱女」。○解云：決宣元年

「公子遂如齊逆女」之經也。略之也。稱婦姜，至文

也。逆與至共文，故爲略。【疏】注「稱婦」至「爲略」。○

解云：欲道「遂以夫人婦姜至自齊」之經，還至始言婦姜。

今此始逆，已言婦姜，故云逆與至共文耳。高子曰：

「娶乎大夫者，略之也。」賤，非所以奉宗廟，故略

之。不書逆者主名，卑不爲錄使也。不言如齊者，大夫

無國也。不稱女者，方以婦姜見，與至共文，重至也。不

稱夫人爲致文者，賤不可奉宗廟也。不言氏者，本當稱

女。女者，父母辭，君子不奪人之親，故使從父母辭不言

氏。○爲，于僞反。使，所吏反。見與，賢徧反。【疏】注

「不言」至「言氏」。○解云：莊二十七年「秋，公子友如

陳，葬原仲」，案彼亦是大夫無國而得言如陳者，何氏云

「不言如陳，嫌不辟國事，實私行也」是也。

狄侵齊。

秋，楚人滅江。

晉侯伐秦。

衛侯使甯俞來聘。^③

冬，十有一月，壬寅，夫人風氏薨。○甯

俞，乃定反，下音餘。【疏】「衛侯使甯俞來聘」。○解

云：正本作「速」字，故賈氏云《公羊》曰甯速「是也」。

五年，春，王正月，王使榮叔歸含且

賵。含者何？口實也。孝子所以實親口也。緣

生以事死，不忍虛其口。天子以珠，諸侯以玉，大夫以

碧，^④士以貝，春秋之制也。文家加飯以稻米。○飯，扶

晚反。【疏】「含者何」。○解云：欲言實口，上下無例，欲

①「歸」，經言「婦姜」，則當作「婦」。

②「娶」，原作「聚」，今據閩本、毛本、閩本改。

③「甯俞」，阮校：「唐石經、諸本同。解云：『正本作

「速」字，故賈氏云《公羊》曰甯速。』《經義雜記》

曰：「賈氏所據《公羊》作「甯速」，即徐所謂正本是

也。後人依《左》、《穀》改之。《釋文》「甯俞音餘」，已

同今本矣。」

④「碧」，阮校：「《檀弓下》正義作「璧」。」

言佗物，而經書含，故執不知問。○注「天子」至「貝」者。^①○解云：皆《春秋說》文，故云春秋之制也。○注「文家加飯以稻米」。○解云：即《禮記·檀弓下》篇云：「飯用米貝，弗忍虛也。」其言「歸含且贈」何？據宰咺歸兩贈不言且也。連贈何之者，嫌據贈言歸。○咺，況阮反。【疏】注「據宰」至「且也」。○解云：即隱元年「秋，七月，天王使宰咺來歸惠公仲子之贈」是也。○注「連贈」至「言歸」。○解云：若傳直言「其言且何」，即嫌責此贈事亦當言歸，故連言贈以辯嫌。兼之。兼之非禮也。且，兼辭。以言且，知幾兼之也。^②含言歸者，時主持含來也。去天者，含者臣子職，以至尊行至卑事，失尊之義也。不從含晚言來者，本不當含也。主書者，從含也。○去，起呂反，下同。【疏】注「含者臣子職」。○解云：正以大宰掌之故也。○注「不從」至「含也」。○解云：正以含者殯前之禮，遙始行之，故知晚。然則宜言來以見晚，而不言來者，正以本不當含，寧得責其晚乎？○注「主書」至「含也」。○解云：言《春秋》主書此事者，正欲譏其含，而并言「且贈」者，因譏之。

三月，辛亥，葬我小君成風。成風者

何？僖公之母也。風，氏也，任、宿、顓臾之姓。

○任，音壬。顓臾，音專，下音榆。【疏】「成風者何」。○解云：欲言其妾，經書小君，欲言夫人，不同夫謚，故執不知問。○注「風氏」至「之姓」。○解云：風氏謂此成風，即上文風氏薨者矣。知任、宿等之姓者，《左傳》文。

王使召伯來會葬。去天者，不及事，刺比失喪禮也。

夏，公孫敖如晉。

秦人入都。○都，音弱。

秋，楚人滅六。

冬，十月，甲申，許男業卒。【疏】「秋楚人滅六」。○解云：不月者，略夷狄滅小國也。說在僖二十六年。○「許男業卒」。○解云：正本作「辛」字。

^①「注天子至貝者」，「貝」字原作「具」，今據京都本、再造善本改。杉浦校：「按：『貝』下有『者』字，義疏之遺也。閩、監、毛本皆刪之。其疏中標注作『注天子至貝者』，亦後人所改也。」

^②「幾」，余本、鄂本作「譏」，當是。

六年，春，葬許僖公。

夏，季孫行父如陳。

秋，季孫行父如晉。

八月，乙亥，晉侯謹卒。○謹，好官反。

冬，十月，公子遂如晉。葬晉襄公。書

遂者，刺公生時數如晉，葬不自行，非禮也。禮，諸侯薨，使大夫吊，自會葬。○數，所角反。【疏】注「書遂」至「會葬」。○解云：晉侯生時公數如晉者，即上二年「三月，乙巳，及晉處父盟」，彼下注云「如晉不書不致者深諱之」，三年「冬，公如晉」之屬是也。言葬不自行，非禮云云者，《異義》《公羊》說「云」襄三十年「叔弓如宋，葬宋共姬」，譏公不自行也者，與此注合。

晉殺其大夫陽處父。

晉狐射姑出奔狄。晉殺其大夫陽處

父，則狐射姑曷爲出奔？據蔡殺其大夫公子

燮，蔡公子履出奔楚。此非同姓恐見及。○射姑，音亦，

又音夜，《穀梁》作「夜」。【疏】注「據蔡」至「見及」。○解

云：事在襄二十年秋。彼則履是燮之同姓，言恐禍及己

而出奔。此非同姓而亦奔，故難之。射姑殺也。以

非恐見及，知其殺。射姑殺，則其稱國以殺

何？君漏言也。自上言泄，下曰漏。○君漏，力豆

反，泄也。言泄，息列反，又以制反。其漏言奈何？

君將使射姑將，謂作中軍大夫。○姑將，子匠反，下

同。陽處父諫曰：「射姑，民衆不說，不可

使將。」於是廢將。陽處父出，射姑入，君

謂射姑曰：「陽處父言曰：『射姑，民衆不

說，不可使將。』」射姑怒，出，刺陽處父於

朝而走。明君漏言殺之，當坐殺也。《易》曰：「君不

密則失臣，臣不密則失身，幾事不密則害成。」○不說，音

悅，下同。刺，七亦反，又一音七賜反。【疏】注「明君」至

「坐殺也」。○解云：襄公當坐，則例去其葬，而上文經書

「冬，十月，公子遂如晉，葬襄公」者，蓋謂葬訖乃相殺，不

得追去葬，是以《穀梁傳》曰「襄公死，處父主竟上之事，

夜姑使人殺之」是也。然則此傳雖連言之，仍不妨殺之

在葬後，是以經書葬在殺前矣。○注「易曰」至「害成」。

○解云：《上繫辭》文也。鄭氏云：「幾，微也。密，靜也。」

言不慎于微而以動作，則禍變必成。」

閏月不告月，猶朝于廟。不告月者

何？不告朔也。禮，諸侯受十二月朔政於天子，藏

于大祖廟，每月朔朝廟，使大夫南面奉天子命，君北面而受之。比時使有司先告朔，謹之至也。^①受於廟者，孝子

歸美先君，不敢自專也。言朝者，緣生以事死，親在，朝

朝莫夕，已死，不敢渫鬼神。故事必于朔者，感月始生而

朝。○大祖，音泰。比，必利反。朝朝，上如字，下直遙

反。渫，息列反。【疏】「不告月者何」。○解云：欲言朔

日，文不言朔，欲言非朔，刺其不告，故執不知問。○注

「禮諸侯」至「受之」。○解云：出《玉藻》。但謂禮法然，

非謂禮有成文。○注「比時」至「告朔」。○解云：比時

者，言比至月初之時也。○注「親在朝朝莫夕」。○解

云：據禮有朝玄端夕深衣之文故也。而《文王世子》云

「文王之爲世子，朝於王季日三」者，蓋謂越禮之高矣。

曷爲不告朔？據具月也。^②天無是月也。閏

月矣，何以謂之天無是月？^③非常月也。

所在常，故無政也。猶者何？通可以已也。朝

者，因視朔政爾。無政而朝，故加「猶」。不言朔者，^④閏

月無告朔禮也。不言公者，內事可知。【疏】「猶者何」。

○解云：欲言非禮，禮則有之，欲言是禮，而經書「猶」，故

執不知問。○注「不言」至「可知」。○解云：欲道下十六

年「夏，五月，公四不視朔」言公矣，故解之。

七年，春，公伐邾婁。

三月，甲戌，取須胸。取邑不日，此何

以日？據取叢也。^⑤○胸，其俱反。【疏】注「據取叢

也」。○解云：考諸舊本，「叢」皆作「闕」字，是以昭三十

二年春王正月，「取闕」，傳云：「闕者何？邾婁之邑也。」

若作「叢」字，即僖三十三年「夏，四月，辛巳，晉人及姜戎

敗秦于殽」，「癸巳，葬晉文公。狄侵齊。公伐邾婁，取

①「謹」，余本、鄂本作「慎」。阮校：「此當是避宋諱所

改，猶「許慎」作「許謹」也。」

②「具」，余本、鄂本作「俱」。

③「是月」，阮校：「唐石經、鄂本皆疊「是月」二字，此

脫。」

④「朔」，京都本、再造善本作「朝」。

⑤「叢」，阮校：「解云：『考諸舊本，「叢」皆作「闕」。若

作「叢」，非其義。且彼「叢」字多作「鄒」。按：此當

叢」。文承日月之下，而將取邑不日據之，非其義也。且案彼「叢」字多作「鄒」字耳。^①內辭也。使若他人然。使若公春伐邾婁而去，他人自以甲戌日取之，內再取邑，然後甚而日也。今此一取而日，故使若他人然。所以深諱者，扈之盟不見序，并爲取邑故。○并爲，于僞反，年末注同。【疏】注「內再」至「日也」。○解云：即隱十年夏六月，「辛未，取郕」。辛巳，取防，傳云「取邑不日，此何以日？」一月而再取也。何言乎一月而再取？甚之也」是也。若然，哀二年「春，王二月，季孫斯、叔孫州仇、仲孫何忌帥師伐邾婁，取鄒東田及沂西田」，亦是再取邑而不日者，隱公之時，新王始起，當先自正，而比取人邑，小惡之甚者，書日以甚之。至定、哀之時，久致太平，內之小惡亦諱而不書，是以不書其日矣。所以不全諱之者，如彼注云。○注「今此」至「人然」。○解云：舊本「故」下有「知」字。○注「扈之」至「邑故」。○解云：扈之盟，在下文秋八月。

遂城郕。主書者，甚其生事，困極師衆。○郕，音吾。

夏，四月，宋公王臣卒。不書葬者，坐殺大

夫也。不日者，內娶略。【疏】注「不書」至「夫也」。○解云：正以僖二十四年宋公王臣即位，至二十五年夏「宋殺其大夫」，而不書葬，明其坐此故也。○注「不日」至「娶略」。○解云：正決僖九年「春，王三月，丁丑，宋公禦說卒」，書丁丑故也。

宋人殺其大夫。何以不名？據宋殺其

大夫山名。【疏】注「據宋」至「山名」。○解云：即成十五年秋，「宋殺其大夫山」是也。宋三世無大夫，三

世內娶也。故使無大夫。【疏】「宋三」至「娶也」。○

解云：僖二十五年傳云：「宋三世無大夫，三世內娶也。」

注云「三世謂慈父、王臣、處白也，內娶大夫女也。言無大夫者，禮，不臣妻之父母，國內皆臣，無娶道，故絕去其大夫名，正其義也」是也。然則彼已有傳，今復發之者，恐大夫不書名，更有佗義，故明之。其有佗義者，即莊二十六年夏，「曹殺其大夫」，傳云「何以不名？衆殺之」之類是耳。

①「多」上，杉浦校：「單疏鈔本有「文」字，左旁添圈點。」

戊子，晉人及秦人戰于令狐。○令，力丁反。

晉先昧以師奔秦。此偏戰也，何以不言師敗績？據秦師敗績。○昧，音蔑，《左氏》作「蔑」。

【疏】「晉先昧」。○解云：《左氏》、《穀梁》作「先蔑」。○注「據秦師敗績」。○解云：即上二年「春，王二月，甲子，晉侯及秦師戰于彭衙，秦師敗績」是也。

敵也。俱無勝負。此晉先昧也，其稱人何？據奔無出文，知先昧也。貶。曷爲貶？據新築之戰，衛孫良夫敗績不貶。

【疏】注「據新築」至「不貶」。○解云：即成二年夏，「衛孫良夫帥師及齊師敗于新築，^①衛師敗績」是也。

外也。其外奈何？以師外也。懷持二心，有功欲還，無功便持師出奔，故於戰貶之，起其以師外也。

本所以懷持二心者，其咎亦由晉侯要以無功當誅也。不起者，敵而外事可知也。○咎，其九反。

【疏】注「不起」至「知也」。○解云：言所以不申作文，起見晉侯要無功當誅之義者，^②以其可知故也。

何以不言出？據楚囊瓦俱戰而奔言出。【疏】注「據

楚」至「言出」。○解云：即定四年冬，「蔡侯以吳子及楚人戰于柏莒，楚師敗績」，「楚囊瓦出奔鄭」也。以此言之，則令狐非晉地，伯莒爲楚地亦明矣。遂在外也。起其生事成於竟外，從竟外去。

狄侵我西鄙。

秋，八月，公會諸侯，晉大夫盟于扈。諸侯何以不序？大夫何以不名？序，次也。

據新城盟，諸侯序，趙盾名。【疏】注「據新城」至「盾名」。

○解云：即下十四年夏，「六月，公會宋公、陳侯」以下「晉趙盾，癸酉，同盟于新城」是。公失序也。公失序奈何？諸侯不可使與公盟，眅晉大夫使與公盟也。^③以目通指曰眅。文公內則欲久喪而後

① 「敗」，成公二年經作「戰」。

② 「要」下，杉浦校：「單疏鈔本有『以』字，與注合。」

③ 「眅」，阮校：「諸本同，唐石經『眅』字缺。段玉裁云：成二年作『卻克眅魯衛之使』，字從目從失。《釋文》眅音舜，本又作眅，丑乙反。本又作眅，音同。」今《釋文》眅亦誤眅，眅誤眅同。」

不能，喪娶逆祀，外則貪利取邑，爲諸侯所薄賤，不見序，故深諱爲不可知之辭。不日者，順諱爲善文也。○眖，音舜，本又作「眖」，尹乙反，^①又大結反，以目通指曰眖。本又作「眖」，音同。字書云：「眖，瞋也，以忍反。」【疏】注「以目通指曰眖」。○解云：言其用目眖之，而并指向魯，若今時瞬眼矣。○注「文公」至「不能」。○解云：即上二年二月，「丁丑，作僖公主」，傳云「何以書？譏。何譏爾？不時也。其不時奈何？欲久喪而後不能」是也。○注「喪娶逆祀」。○解云：其喪娶，^②即二年冬，「公子遂如齊納幣」，傳云「何以書？譏喪娶」是也。其逆禮，^③即二年秋，「大事于大廟，躋僖公」，傳云「何譏爾？逆祀也」者是也。而先引喪娶者，正以納幣之前，仍有數禮，不妨在大事之前，故見之。○注「外則貪利取邑」。○解云：即上「春，公伐邾婁」，「取須朐」是也。○注「不日」至「善文」。○解云：正以日爲不信辭故也。

冬，徐伐莒。謂之徐者，前共滅王者後，不知尊

先聖法度。今自先犯，文對事連，可以起同惡，莒在下不得狄，故復狄徐也。一罪再狄者，明爲莒狄之爾。徐先狄，在僖十五年。○復，扶又反。【疏】注「謂之」至「同惡」。○解云：即僖十四年「春，諸侯城緣陵」，傳曰「孰城

之？城杞也。曷爲城杞？滅也。孰滅之？蓋徐、莒脅之」是也。言不知尊先聖法度者，謂杞有禹法度也。○注「莒在」至「徐也」。○解云：謂莒時被伐，例不得出主名，是以無由狄之。○注「徐先」至「五年」。○解云：即僖十五年冬，「楚人敗徐于婁林」，彼注云「謂之徐者，爲滅杞，不知尊先聖法度，惡重，故狄之也」是也。

公孫敖如莒莅盟。

八年，春，王正月。

夏，四月。

秋，八月，戊申，天王崩。

冬，十月，壬午，公子遂會晉趙盾，盟

于衡雍。○雍，於用反。

乙酉，公子遂會伊維戎，盟于暴。四日

不能再出，不卒名者，非一事再見也。○雒，音洛。暴，

① 「尹乙反」，宋本《釋文》作「丑乙反」。

② 「娶」下，杉浦校：「單疏鈔本有『者』字。」

③ 「禮」，阮校：「浦鏗云：『祀』誤『禮』。是也。」杉浦

校：「單疏鈔本『禮』作『祀者』二字。」

步報反，本又作「曝」，一音甫沃反。見，賢遍反。【疏】注「四日」至「見也」。○解云：欲道宣元年「公子遂如齊」三月，遂以夫人婦姜至自齊，傳云：「遂何以不稱公子？一事而再見者，卒名也。」注云：「卒，竟也。竟但舉名者，省文耳。」①言彼是一事再見，故得省文，與此異也。

公孫敖如京師，不至復。丙戌，奔莒。

不至復者何？不至復者，內辭也。不可使往也。安居不肯行，故諱使若已行，但不至還爾。

即已行，當道所至乃言復，如至黃矣。【疏】「不至復者何」。○解云：欲言不到，經有如文，欲言實到，復有不至之稱，故執不知問。○注「即已」至「黃矣」。○解云：即宣八年「夏，六月，公子遂如齊，至黃乃復」是也。不可使往，則其言「如京師」何？遂公意也。正其義，不使君命壅塞。○壅，於勇反。何以不言出？據慶父言出奔。【疏】注「據慶」至「出奔」。○解云：即上閔二年九月，「公子慶父出奔莒」是也。遂在外也。諱使若從外來，②不敢復還者也。日者，嫌敖罪明，則起君弱，故諱使若無罪。○復，扶又反。【疏】注

「日者」至「無罪」。○解云：閔二年九月，「公子慶父出奔莒」，彼注云「不日者，內大夫奔例，無罪者日，有罪者月」是也，故此作注云「日者，使若無罪矣」。內大夫奔例日者，襄二十三年「冬，十月，乙亥，臧孫紇出奔邾婁」之屬是也。

蝶。先是公如晉，公子遂、公孫敖比出不可使，勢奪

於大夫，煩擾之應。○蝶，音終。【疏】注「先是」至「之應」。○解云：公子遂不可使者，即僖三十年冬，「公子遂如京師，遂如晉」，傳云：「大夫無遂事，此其言遂何？公不得為政爾。」注云「不從公政令也。時見使如京師而橫生事，矯君命聘晉，故疾其驕塞自專，當絕之者」是。

宋人殺其大夫司馬。宋司城來奔。

司馬者何？司城者何？皆官舉也。皆以

官名舉言之。天子有大司徒、大司馬、大司空，皆三公官名也。諸侯有司徒、司馬、司空，皆卿官也。宋變司空為司城者，辟先君武公名也。【疏】「司馬者何」。○解云：

①「耳」，杉浦校：「單疏鈔本作『者』。」

②「來」，阮校：「鄂本『來』作『奔』，當據正。」

欲言大夫，例不官舉，欲言非大夫，而經有大夫之文，故執不知問。○「司城者何」。○解云：欲言大夫，例不官舉，欲言非大夫，司城者宋大夫之號，故執不知問。○注「宋變」至「武公名也」。○解云：桓六年《左氏傳》文。

曷爲皆官舉？據宋殺其大夫山，不官舉。【疏】注

「據宋殺」至「官舉」。○解云：即在成十五年秋。宋三

世無大夫，三世內娶也。宋以內娶，故威勢下流，

三世妃黨爭權相殺，司城驚逃，子哀奔之，^①主或不知所任，朝廷久空，故但舉官起其事也。大夫相殺，例皆時。

【疏】注「子哀奔亡」。○解云：即下十四年「宋子哀來奔」

是也。○注「大夫相殺例皆時」。○解云：正以此經及下

九年「晉人殺其大夫先都」、「晉人殺其大夫士穀」之屬，^②

皆不別書日月故也。知彼此是大夫相殺之經者，正以下

十六年傳云「大夫相殺稱人」矣。

九年，春，毛伯來求金。毛伯者何？

天子之大夫也。何以不稱使？據南季稱使。

【疏】「毛伯者何」。○解云：欲言諸侯，經不書朝，欲言大

夫，又不言使，故執不知問。○注「據南季稱使」。○解

云：即隱九年「春，天王使南季來聘」是。當喪未君

也。時王新有三年喪。【疏】注「時王新有三年喪」。○

解云：即去年八月「天王崩」是也。踰年矣，何以謂

之未君？據崩在八年，踰年當即位。即位矣，而

未稱王也。未稱王，何以知其即位？以

諸侯之踰年即位，亦知天子之踰年即位

也。俱繼體，其禮不得異。以天子三年然後稱

王，亦知諸侯於其封內三年稱子也。各信恩

於其下。○信，音申。踰年稱公矣，則曷爲於其

封內三年稱子？緣民臣之心，不可一日

無君，緣終始之義，一年不二君，故君薨稱子

某，既葬稱子，明繼體以繫民臣之心。【疏】「踰年稱公」。

○解云：莊二十年師解云爾，^③故據難之。不可曠年

①「之」，據疏標起訖，當作「亡」。

②「穀」，原作「穀」，今據下九年經及單疏鈔本、閩本、監本、毛本改。

③「莊二十年師解云爾」，阮校：「按：當作『莊三十二年傳云爾』。」杉浦校：「阮氏云『當作莊三十二年』，是也，其云『傳云爾』，則非。」

無君。故踰年稱公。緣孝子之心，則三年不忍當也。孝子三年志在思慕，不忍當父位，故雖即位，猶於其封內三年稱子。子張曰：「《書》云：『高宗涼闇，^①三年不言。』何謂也？」孔子曰：「何必高宗？古之人皆然。君薨，百官總己以聽冢宰三年。」○涼，音亮，又音良。闇，如字，又音陰。毛伯來求金何以書？譏。何譏爾？王者無求，求金非禮也。然則是王者與？據未稱王。○與，音餘。曰：非也。非王者，則曷爲謂之王者？王者無求。曰：是子也，雖名爲三年稱子者，其實非唯繼父之位。繼文王之體，守文王之法度，文王之法無求，而求，故譏之也。引文王者，文王始受命，制法度。

夫人姜氏如齊。奔父母之喪也。不言奔喪者，尊內，猶不言朝聘也，故以致起得禮也。書者，大夫家，危重。言如齊者，大夫繫國。【疏】注「奔父母之喪也」。○解云：知者，正以諸侯夫人尊重，既在夫家，終身不反，唯三年之喪，乃可越竟而奔之。今此夫人如齊，直

書不諱，故知其奔父母之喪也。○注「故以致起得禮也」。○解云：正以《春秋》之例，夫人違禮而出會者，皆不致之，唯此文而書至，故莊元年注云「有出道乃致」，^②奔喪致是也。○注「書者」至「危重」。○解云：欲道夫人如齊奔父母之喪，禮既許之，則是常事，而書之者，但此夫人所適，乃是大夫之家，卑于夫人，有不制之義，而危重之，是以書也。○注「言如齊」至「繫國」。○解云：案上四年「逆婦姜」之下，注云：「不言如齊者，大夫無國也。」與此違者，正以四年經云「夏，逆婦姜于齊」，逆，至共文，又不書如齊，見其娶于大夫矣，故不言如齊，正由大夫無國故也。今此夫人，仍彼婦姜一也，經書如齊，明知正由大夫繫國故也，何者？今既尊內不言奔喪，若去如齊，即文不可施，是以將大夫繫國，書如齊矣。

二月，叔孫得臣如京師。

辛丑，葬襄王。王者不書葬，此何以書？不及時書，過時書，重錄失時。【疏】「王者

①「涼」，阮校：「鄂本『涼』作『諒』。」

②「莊元年」，當爲「莊二年」之訛。「有出道乃致」云云，乃莊公二年注。

不「至」以書」。○解云：正以隱三年「天王崩」之下，師作解云「天子記崩不記葬，必其時也」，故此弟子據而難之。○「不及時書過時書」。○解云：其不及時書者，即宣二年十月「天王崩」，三年正月「葬匡王」，昭二十二年「夏四月，乙丑，天王崩」。六月，叔鞅如京師。葬景王之屬是也，以其不及七月，故書之也。其過時書者，上下無文，唯桓十五年「三月，乙未，天王崩」，至莊三年夏，「五月，葬桓王」，蓋以當之。○注「重錄失時」。○解云：以天下共葬一人而不如禮，故重錄之，刺其失時矣。我有往者則書。謂使大夫往也，惡文公不自往，故書葬，以起大夫會之。日者，僖公成風之喪，襄王比加禮，故恩錄之，所以甚責內。○惡，烏路反。【疏】注「日者」至「責內」。○解云：如此注者，正以昭二十二年「六月，叔鞅如京師。葬景王」之屬不日故也。言襄王比加禮者，即元年「叔服來會葬」，五年「榮叔歸含且贈」，「召伯來會葬」之屬是也。

晉人殺其大夫先都。

三月，夫人姜氏至自齊。出獨致者，得禮，故與臣子辭。月者，婦人危重，從始至例。【疏】注「出

獨」至「子辭」。○解云：書致者，臣子喜其脫危而致，故曰與臣子辭耳。○注「月者」至「始至例」。○解云：獨行無制，恐有非禮之惡，故曰危重也。言從始至例者，即宣元年「三月，遂以夫人婦姜至自齊」，成十四年「九月，僑如以夫人婦姜氏至自齊」之屬是也。

晉人殺其大夫士穀及箕鄭父。

楚人伐鄭。

公子遂會晉人、宋人、衛人、許人

救鄭。

夏，狄侵齊。

秋，八月，曹伯襄卒。

九月，癸酉，地震。地震者何？動地

也。動者，震之故。傳先言動者，喻若物之動地以曉人也。【疏】「地震者何」。○解云：大陰沈重，本無動性，而書震，故執不知問。何以書？記異也。天動地靜者，常也。地動者，象陰為陽行。是時魯文公制於公子遂，齊、晉失道，四方叛德，星孛之萌，自此而作，故下與北斗之變所感同也。不傳天下異者，從王內錄可知。○

行，下孟反。字，音佩。【疏】注「字星」至「同也」。①○解云：即十四年「秋，七月，有星孛入于北斗」是也。言與北斗之變所感同者，即十四年注云「齊、晉並爭，吳、楚更謀，競行天子之事。齊、宋、莒、魯弑其君而立之應」是也。○注「不傳」至「可知」。○解云：僖十四年「秋，八月，辛卯，沙鹿崩」，傳云：「何以書？記異也。外異不書，此何以書？爲天下記異也。」今此地震爲內錄之，內爲新王天下明矣，故言不傳天下異者，從王內錄可知。

冬，楚子使椒來聘。椒者何？楚大夫也。

楚無大夫，此何以書？始有大夫也。人文公所聞世，見升平，②法內諸夏以外夷狄也。

屈完、子玉得臣者，以起霸事，此其正也。聘而與大夫者，本大國。○椒，子遙反，一本作「荻」，子小反。見，賢偏反。【疏】「椒者何」。○解云：欲言大夫，不言其氏，欲言微者，書名見經，故執不知問。○注「人文」至「升平」。○解云：知文公爲所聞之世者，《春秋說》云「文、宣、成、襄，所聞之世」是也。言見治升平者，升，進也，欲見其治稍稍上進而至于平也。○注「內諸夏外夷狄」。③○解云：即成十五年冬，「叔孫僑如會晉士燮」以下「會吳于鍾

離」，傳云「曷爲殊會吳？外吳也。曷爲外也？《春秋》內其國而外諸夏，內諸夏而外夷狄」是也。○注「屈完」至「霸事」。○解云：僖四年夏，「楚屈完來盟于師，盟于召陵」，傳曰：「屈完者何？楚大夫也。何以不稱使？尊屈完也。曷爲尊屈完？以當桓公也。」何氏云「增倍使若得其君，以醇霸德，成王事也」是也。其子玉得臣者，即僖二十八年夏，「楚殺其大夫得臣」，何氏云「楚無大夫，其言大夫者，欲起上楚人本當言子玉得臣，所以詳錄霸事」是也。然則彼二人皆是傳聞之世，未合書之而書之者，欲起齊桓、晉文霸事故也。○注「此其正」至「大國」。○解云：等是夷狄，而舒越之屬皆無大夫，而楚得有大夫者，正以本是「大國」，故人所聞之世，於是見法矣。始有大夫，則何以不氏？據屈完氏。許夷狄者，不一而足也。許，與也。足其氏，則當純以中國

①「字星」，阮校：「閩、監、毛本作『星孛』，是也。」

②「見升平」，阮校：「諸本同。解云：『言見治升平者，升，進也。』」見「下」當有「治」字。《釋文》出「見升」二字，則陸本與此同。

③「外夷狄」，上注文「外」上有「以」字。

禮貴之，^①嫌夷狄質薄，不可卒備，故且以漸。○卒，七忽反。

秦人來歸僖公成風之榧。其言「僖公

成風」何？兼之。兼之非禮也。禮主于敬

當各使一使，所以別尊卑。○榧，音遂，贈喪之衣服。一

使，所更反。別，彼列反，下同。【疏】「其言僖成風之榧

何」。^②○解云：欲言非禮，禮有榧文，欲言是禮，而二人

并致，故執不知問。曷爲不言「及成風」？據

「及」者，別公、夫人尊卑文也。連成風者，但問尊卑體當

絕，非欲上成風使及僖公。○上，時掌反，又如字。【疏】

注「據及」至「卑文也」。○解云：即僖十一年「夏，公及夫

人姜氏會齊侯于陽穀」是也。成風尊也。不可使卑

及尊也。母尊序在下者，明婦人有三從之義：少繫父，既

嫁繫夫，夫死繫子。○少，詩召反。

葬曹共公。○共，音恭。

監本附音春秋公羊注疏卷第十三

①「貴」，阮校：「鄂本『貴』作『貴』，此誤。」

②「其言僖成風之榧何」，阮校：「閩、監、毛本『僖』下有

「公」字，此脫。何校本無「之榧」。」杉浦校：「單疏鈔

本『僖』下有「公」字。」

監本附音春秋公羊注疏文公卷第十四

起十年，盡十八年

何休學

十年，春，王三月，辛卯，臧孫辰卒。

夏，秦伐晉。謂之秦者，起令狐之戰，敵均不

敗，晉先昧以師奔秦，^①可以足矣，而猶不知止，故夷狄之。

楚殺其大夫宜申。

自正月不雨，至于秋七月。公子遂之

所招。

及蘇子盟于女栗。○女，音汝，本亦作「汝」。

冬，狄侵宋。

楚子、蔡侯次于屈貉。魯恐，故書，刺微弱

也。○屈貉，居勿反，又音厥。下麥，^②又戶各反。二傳作「厥貉」。

十有一年，春，楚子伐圈。○圈，求阮反，

一音卷，《說文》作「圈」，《字林》白萬反，二傳作「麋」。

夏，叔彭生會晉卻缺于承匡。

秋，曹伯來朝。

公子遂如宋。

狄侵齊。

冬，十月，甲午，叔孫得臣敗狄于鹹。

狄者何？以日，嫌夷狄不能偏戰，故問也。○鹹，音

咸。【疏】注「以日」至「問也」。○解云：正以《春秋》之

例，偏戰日，詐戰月，夷狄不能偏戰，今而書日，故執不知

問。長狄也。蓋長百尺。【疏】注「蓋長百尺」。○解

云：何氏蓋取《關中記》云「秦始皇二十六年，有長人十

二，見於臨洮，身長百尺，皆夷狄服。天誠若曰：^③勿大

為夷狄行，將滅其國。始皇不知，反喜。是時初併六國，

^①「昧」，原作「昧」，據文公七年經及余本，再造善本改。

^②「下麥」，宋本《釋文》作「下音麥」，此當脫「音」字。

^③「誠」，原作「誠」，今據京都本、再造善本、中華本、閣本改。

以爲瑞，乃收天下兵器，鑄作銅人十二象之」是也。其文《穀梁》、《左氏》與此長短不同者，不可強合。兄弟三人，言相類如兄弟。【疏】注「言相類如兄弟」。○解云：正以別之三國，不相援助，是以知其非親兄弟。

者之齊，一者之魯，一者之晉。不書者，外異也。【疏】注「不書者外異也」。○解云：案上文「狄侵齊」，而云不書者，蓋以爲侵齊之狄，非此等也。其之齊者，王子成父殺之。其之魯者，叔孫得臣殺之。經言敗，殺不明，故復云爾。○復，扶又反。

則未知其之晉者也。其言敗何？據敗者，內戰文，非殺一人也。【疏】注「敗者」至「人也」。①○解云：以《春秋》之義，內魯爲王，王於諸侯無敵之義，②但當言戰，③戰則是內敗之文，言敗某師，則是內戰之文。今敵其一人而言「敗狄于鹹」，作內戰之經，故難之。大

之也。長狄之三國，皆欲爲君。長大非一人所能討，興師動衆，然後殺之，如大戰，故就其事言敗。【疏】注「長狄」至「爲君」。○解云：正以各之一國故也。何者？雖非兄弟，若不爲君，群行亦得，即「長人十二，見於臨洮」

是也。其日何？據日而言敗，與公子友敗莒師于犁

同，非殺一人文。○犁，力知反，又力兮反。【疏】注「據日」至「人文」。○解云：即僖元年「冬，十月，壬午，公子友帥師敗莒師于犁，獲莒挈」，傳云「莒人聞之曰：『吾已得子之賊矣。』以求賂于魯，④魯人不與。爲是興師而伐魯，季子待之以偏戰」是也。大之也。如結日大戰。

其地何？大之也。如大戰，故地。何以書？

記異也。魯成就周道之封，齊、晉霸尊周室之後，長狄之操，無羽翮之助，別之三國，皆欲爲君，此象周室衰，⑤禮義廢，大人無輔佐，有夷狄行，事以三成，不可苟指一，故自宣、成以往，弑君二十八，亡國四十。○行，下孟反。

【疏】注「魯成就周道之封」。○解云：正以周公相成王而

①「注」下，杉浦校：「單疏鈔本有『據』字，與何注合。」

②「王」，原重文，今據京都本刪。

③「言」，原脫，京都本、再造善本有「言」字。杉浦校：「單疏鈔本、毛本有『言』字。此脫，下云『言敗某師則是內戰之文。』」今據補。

④「于」，阮校：「案：僖元年傳作『乎』。」

⑤「此」，原作「比」，今據余本、京都本、再造善本改。

致太平意，封于魯，故云爾。○注「齊晉」至「之後」。○解云：正以晉文、齊桓皆率諸侯尊事天子，此是齊、晉之君子孫，故云爾。○注「長狄」至「之助」。○解云：謂執持此意也。○注「事以三成」。○解云：即長狄之三國，共成其異是也。言「不可苟指一」者，明知其異，亦不苟指一事而已。○注「故自宣成」至「四十」。○解云：案今《春秋》之經，自宣、成以下，訖于哀十四年，止有弑君二十，亡國二十四，則知此注誤也。宜云「弑君二十」也，「八」是衍字。亡國二十四也，作「四十」者錯也。其殺君二十：①即宣二年「趙盾弑其君夷獯」，四年「歸生弑其君夷」，十年「夏徵舒弑其君平國」，襄二十五年「崔杼弑其君光」，「吳子謁伐楚，門于巢卒」，為巢人所弑，二十六年「衛甯喜弑其君剽」，二十九年「閭弑吳子餘祭」，三十年「蔡世子般弑其君固」，三十一年「莒人弑其君密州」，昭八年陳招殺偃師，十一年「楚子虔誘蔡侯般殺之」，十三年公子比殺其君虔，棄疾殺比，十九年「許世子止弑其君買」，二十三年吳殺胡子髡、沈子楹，二十七年「吳弑其君僚」，定四年蔡殺沈子嘉，十三年「薛弑其君比」，哀六年「齊陳乞弑其君舍」之屬是也。其滅國二十四者：宣八年楚滅舒蓼，十二年楚滅蕭，十五年晉滅潞氏，十六年滅甲

氏及留吁，成十七年楚滅舒庸，襄六年莒人滅鄆、齊滅萊，十年遂滅偃陽，十三年取詩，二十五年楚滅舒鳩，昭四年遂滅厲，八年楚滅陳，十一年楚滅蔡，十七年晉滅賁渾戎，二十三年胡子髡、沈子楹滅，二十四年吳滅巢，三十年吳滅徐，定四年蔡滅沈，六年鄭滅許，十四年楚滅頓，十五年楚滅胡，哀八年宋滅曹之屬，是其二十四也。然則三國變異，起自今年，而注者所以不言「自今以後」，而言「自宣、成以往」者，蓋以文公之年，已過半以後，既不得其初，故遺去，其實楚人滅庸，宋弑處白，莒弑庶其之屬，皆由此禍耳。或者弑君二十八，亡國四十者，《春秋說文》。其間亦有經不書者，故不同耳。

十有二年，春，王正月，盛伯來奔。盛伯者何？失地之君也。何以不名？兄弟辭也。與郕子同義。月者，前為魯所滅，今來見歸，尤當加意厚遇之。【疏】「盛伯者何」。○解云：欲言諸侯，不見存文，欲言大夫，而經書伯，故執不知問。○「何以不名」。○解云：桓七年夏穀伯綏，鄧侯吾離來朝之

①「殺」，單疏鈔本、閩本、監本、毛本作「弑」。

下，傳云「皆何以名？失地之君也」，是以此處見道失地之君，即責云「何以不名」。^①然則何氏此處不言據穀、鄧名者，正以僖公二十年「鄫子來朝」之下，已注訖故也。

○注「與鄫子同義」。○解云：即僖二十年「鄫子來朝」，傳云：「鄫子者何？失地之君也。何以不名？兄弟辭也。」何氏云「鄫，魯之同姓，故不忍言其絕賤，明當尊遇之，異於穀、鄧也。書者，喜內見歸」是也。然則言同義者，謂尊遇兄弟異於他姓，是以不忍言其名，不謂朝奔之文相似。○注「月者」至「遇之」。○解云：正以穀、鄧、鄫子之屬皆書時，此特書月，故須解也。言前爲魯所滅者，即莊八年「夏，師及齊師圍成，成降于齊師」，傳云「成者何？盛也。盛則曷爲謂之成？諱滅同姓也」是也。

杞伯來朝。

二月，庚子，子叔姬卒。卒者，許嫁。【疏】

注「卒者許嫁」。○解云：舊本皆無此注，且理亦不須，疑衍字。此未適人，何以卒？許嫁矣。婦人許嫁，字而笄之，死則以成人之喪治之。其稱子何？據伯姬卒，亦許嫁不稱子。【疏】「此未」至「以卒」。○解云：正以叔姬無所繫，故知未適人也。

○注「據伯」至「稱子」。○解云：即僖九年「秋，七月，乙酉，伯姬卒」是也。貴也。其貴奈何？母弟也。不稱母妹而繫先君言子者，遠別也。禮，男子不絕婦人之手，婦人不絕男子之手。【疏】注「禮男」至「之手」。○解云：《既夕禮》及《喪大記》皆有此文。

夏，楚人圍巢。

秋，滕子來朝。

秦伯使遂來聘。遂者何？秦大夫

也。秦無大夫，此何以書？賢繆公也。

何賢乎繆公？據聘不足與大夫，荆人來聘是也。

○使遂，二傳作「術」。繆，音木。^②【疏】「秦伯使遂來

聘」。○解云：《左氏》、《穀梁》皆作「術」字，經亦有作

「術」字者，疑「遂」字誤。○「遂者何」。○解云：欲言微

者，書名見經，欲言大夫，不錄其氏，故執不知問。○注

「荆人來聘是也」。○解云：莊二十三年夏，「荆人來聘」，

^①「貴」，原作「貴」，今據京都本，再造善本、中華本、閣本改。

^②「木」，閣本、宋本《釋文》作「穆」。

傳云「荆何以稱人？始能聘也」是也。以爲能變

也。其爲能變奈何？惟譏諍善諍言。譏

諍，淺薄之貌。諍猶撰也。○譏諍，徐在淺反，又子淺

反，又音賤，《尚書》「截截」，^①淺薄貌也。賈逵注《外傳》

云「巧言也」。善諍，在井反，撰也。本或作「諱」，皮勉

反，又必淺反。本作「譏」，七全反，又仕勉反。【疏】「惟

譏諍善諍言」。○解云：謂其念有淺薄之善而撰其言

也。^②俾君子易怠，^③俾，使也。易怠，猶輕惰也。

○俾，必爾反，注同，使也。易，以豉反，注同。惰，^④大卧

反。【疏】「俾君子易怠」。○解云：能撰善言，故謂之君

子。言使此君子易爲輕惰，何者？自恃其善，而欲慢人

以自尊矣。而況乎我多有之，^⑤惟一介斷斷

焉，^⑥無他技。一介，猶一概。斷斷，猶專一也。他

技，奇巧異端也。孔子曰：「攻乎異端，斯害也已。」○一

介，古拜反，一介猶一概也，《尚書》音古貨反。^⑦斷斷，丁

亂反，專一也，注同。技，其綺反。概，古愛反。奇，其宜

反，本又作「琦」，同。【疏】「而況」至「有之」。○解云：

我，謂秦伯也。言況於秦伯之懷，其善言無算，故曰「多

有之」。○「惟」至「他技」。○解云：秦伯之善，雖曰無

算，若思念之，皆是一概專一之事，更無奇巧異端之術。

言其醇粹其善無擇矣。○注「斷斷」至「異端」。○解

云：即鄭注《大學》云「斷斷，誠一之貌也。他技，異端之

技也」，是與此合。其心休休，休休，美大貌。○休

①「截截」，閩本、宋本《釋文》作「作截」。

②「謂其」，杉浦校：「單疏鈔本作「謂自」，爲長。」

③「俾君子易怠」，阮校引《九經古義》云：「《尚書》「怠」

作「辭」。簡文「辭」從「台」。《史記·三王世家》齊王

策云「俾君子怠」，與《公羊傳》合。」

④「惰」，宋本《釋文》作「隋」。

⑤「而況乎我多有之」，阮校：「唐石經「況」字缺。《九

經古義》云：「《尚書》「況」作「皇」，依字當作「兄」。

兄，滋也。《無逸》云「無皇曰」，又云「則皇自敬德」，

漢石經《無佚》皆作「兄」。《詩》「倉兄填兮」，義作

「況」。」

⑥「惟一介斷斷焉」，阮校：「唐石經、諸本同。《釋

文》：「一介，古拜反，《尚書》音古貨反。」惠棟云：

「古無「个」字，作「一介」爲是。」《九經古義》云：

「「焉」與「夷」同，見《周禮·行夫》注。「夷」聲近

休，許虬反，美大貌。能有容，^①能含容賢者逆耳之言。是難也。是難行也。秦繆公自傷前不能用百里子、蹇叔子之言，感而自變悔，遂霸西戎，故因其能聘中國，善而與之，使有大夫。子貢曰：「君子之過也，如日月之食焉。過也，人皆見之；更也，人皆仰之。」此之謂也。

【疏】注「秦繆」至「言之」。○解云：事在僖三十三年。

冬，十有二月，戊午，晉人、秦人戰于河曲。此偏戰也，何以不言師敗績？敵

也。曷爲以水地？以水地者，謂以水曲折，起地

遠近所在也。據戰于泓不言曲。○折，之設反。【疏】

「此偏戰」。○解云：以其書日，故知之。○注「據戰于泓」

不言曲」。○解云：即僖二十二年冬，「宋公及楚人戰于泓，宋師敗績」是也。

河曲疏矣，河千里而一曲

也。河曲流，^②以據地明，故可以曲地，因以起二國之

君，數興兵相伐，戰無已時，故不言及。不別曲直，而地

以河曲，明兩曲也。○數，所角反。不別，彼列反，下同。

季孫行父帥師城諸及運。書帥師者，^③刺

魯微弱，臣下不可使，邑久不修，不敢徒行，興師厲衆，然

後敢城之。言及者，別君邑臣邑也。^④○運，二傳作

「鄆」，後皆爾。【疏】注「書帥」至「城之」。○解云：如此

注者，正見隱七年「夏，城中丘」之屬，皆不言帥師故也。

言臣下不可使者，即上八年「公孫敖如京師，不至復。丙

戌，奔莒」，傳云「不至復者何？不至復也」，^⑤內辭也，不

可使往也之屬是也。○注「言及」至「邑也」。○解云：

正見昭五年「莒牟夷以牟婁及防茲來奔」，彼傳云：「其言

及防茲來奔何？不以私邑累公邑也。」何氏云「公邑，君

^①「能有容」，阮校：「唐石經、諸本同。《九經古義》

云：『《尚書》曰「如有容」，古「如」字作「而」，「而」讀

爲「能」，「能」讀曰「如」。《詩·民勞》『柔遠能邇』，箋

云：「能猶仰也。」「仰」當作「如」。此述《秦誓》之辭，

而字多異，然與《尚書》無大抵牾，蓋古今文之殊

也。」

^②「流」，余本、鄂本作「疏」。

^③「書帥師者」，原作「帥帥師者」。此本疏標起訖作「書

帥至城之」，單疏鈔本標起訖作「注書帥師云云」，則

作「書帥師者」是也。今據單疏鈔本、余本、鄂本改。

^④「君邑」下，單疏鈔本標起訖有「與」字。

^⑤「復也」，阮校：「浦鏜云：『者』誤『也』。是也。」杉浦

校：「單疏鈔本作『復者』。」

邑也。私邑，臣邑也。累，次也。義不可使臣邑與公邑相次序，故言及以絕之」是也。

十有三年，春，王正月。

夏，五月，壬午，陳侯朔卒。不書葬者，盈

爲晉文諱也。晉文雖霸，會人孤以尊天子，^①自補有餘，故復盈爲諱。○盈爲，于僞反，下文「盈爲」、「爲周公」皆同。復，扶又反。【疏】注「不書」至「盈爲諱」。○解云：

盈者，相接足之辭。晉文於僖二十八年之時，此朔之父陳侯款夏六月卒，至冬未葬，而晉文會諸侯於溫，經有陳子，是強會人孤，令失子行，亦是文公恥之，是以《春秋》遂卒，竟不書款葬，深爲文公諱也。今若款之子陳侯朔書葬，則文公之惡還見，是以此處須去朔葬，使若陳國之君例不書葬然，故言「盈爲晉文諱」。故僖二十八年夏，「陳侯款卒」之下，注云「不書葬者，爲晉文諱，行霸不務教人以孝，陳有大喪而彊會其孤，故深爲恥之」是也。

邾婁子遽籛卒。○遽籛，其居反，下直居反。

自正月不雨，至秋七月。^②公子遂所致。

世室屋壞。^③世室者何？魯公之廟

也。魯公，周公子伯禽。○世室，二傳作「太室」。【疏】

「世室者何」。○解云：欲言君寢，於例不書，欲言宗廟，

未有世室之名，故執不知問。周公稱太廟，魯公

稱世室，群公稱宮。少差異其下者，所以上尊周

公。^④○大廟，音泰，下同。【疏】「周公稱大廟」。○解

云：即僖八年「禘于大廟」，文二年「大事于大廟」是也。

○「魯公稱世室」。○解云：即此經是也。○「群公稱

宮」。○解云：即武宮、煬宮之屬是也。○注「少差」至

「周公」。○解云：正以廟者，尊卑達名，鬼神所居之稱。

^①「會」，阮校：「鄂本『會』字上有『彊』字，此脫。

按：僖廿八年注云：陳有大喪，而彊會其孤。」

^②「至秋」，唐石經、鄂本、余本作「至于秋」。

^③「世室」，阮校：「唐石經、諸本同。《釋文》：『世室，

二傳作『太室』。《九經古義》云：『《公羊》皆以『世』爲『大』，如衛大叔儀爲世叔齊，宋樂大心爲樂世心。

推而廣之，如鄭大夫子大叔，《論語》作世叔。天子之

子稱大子，《春秋傳》云「會世子于首止」。諸侯之子

稱世子，而晉有大子申生，鄭有大子華。《春秋》經

「齊世子光」，《左傳》云「大子光」，是古「世」與「大」

通。』按：「世」與「大」聲相近，故文異。」

^④「上」，阮校：「鄂本同，閩、監、毛本作『尚』。」

今此稱異其名，知上尊周公故也。此魯公之廟也，

曷爲謂之世室？世室猶世室也，世世不

毀也。魯公始封之君，故不毀也。【疏】「世室猶世室

也」。○解云：言謂之世室者，猶世世室也。① 周公何

以稱大廟于魯？據魯公始封也。封魯公以爲

周公也。爲周公故，語在下。周公拜乎前，魯拜

乎後。② 始受封時，拜于文王廟也。《尚書》曰「用命賞

于祖」是也。父子俱拜者，明以周公之功封魯公也。

【疏】注「尚書」至「於祖」。○解云：《甘誓》文也。曰：

生以養周公，生以魯國供養周公。○以養，餘亮反，

注皆同。供養，九用反，下同。死以爲周公主。如

周公死，當以魯公爲祭祀主。加「曰」者，成王始受其茅

土之辭。③ 《禮記·明堂位》曰：「封周公於曲阜，地方七

百里，革車千乘，蓋以爲有王功，故半天子也。」○死以

爲，如字，注「死以爲周公主」同。乘，繩證反。王，于況

反。【疏】注「加曰」至「之辭」。○解云：即《周書·作洛》

篇曰：「封人社壇，諸侯受命于周，乃建大社于國中，其壇

諸侯，鑿取其一面之土，包以黃土，④ 苴以白茅，以爲社之
封。孔氏云「王者封五色土爲社」，⑤ 建諸侯則各割其方土
與之，使立社，燾以黃土，苴以白茅。茅取其絮，黃取其
王者覆四方者，是其茅土之文耳。○注「蓋以」至「子
也」。○解云：正以天子千里，方百里者百，周公七百里，
方百里者四十九，大判言之，故得言半天子矣。然則
周公之魯乎？曰：不之魯也。封魯公以

① 「猶」下，杉浦校：「單疏鈔本有「言」字。」

② 「魯拜乎後」，阮校：「唐石經、鄂本作「魯公拜乎後」，此脫。《禮記·明堂位》正義引有。」

③ 「受」，阮校引浦鏜云：「當「授」字誤。」

④ 「包」，阮校：「盧文弨曰：《周書》「包」作「苞」。按：「苞」、「苴」字當從艸。」

⑤ 「孔氏云」，孫校：「孔氏」以下，《禹貢》「徐州厥貢土五色」孔傳文，與上引《周書》不相蒙也。盧文弨、朱右曾並以爲孔晁《周書》注，大誤。今《作雒》孔注與此迥異。」

爲周公主。^①然則周公曷爲不之魯？據爲

周公者，謂生以養周公，死以爲周公主。周公不之魯，則不得供養爲主。欲天下之一乎周也。周公聖人，

德至重，功至大，東征則西國怨，西征則東國怨。嫌之

魯，恐天下迴心趣鄉之，故封伯禽，命使遙供養，死則奔

喪爲主，所以一天下之心于周室。○鄉，許亮反。【疏】

注「東征」至「東國怨」。○解云：僖四年傳文。魯祭

周公，何以爲牲？據廟異也。周公用白牲，^②

白牡，殷牲也。周公死有王禮，謙不敢與文、武同也。不

以夏黑牡者，謙改周之文，^③當以夏辟嫌也。【疏】注「不

以」至「嫌也」。○解云：知黑牡爲夏牲者，出《明堂位》

文。正朔三而改，改天正十一月者，當以十三月爲正，故

言當以夏矣。魯公用騂犗，騂犗，赤脊，周牲也。魯

公以諸侯不嫌，故從周制，以脊爲差。○騂，息營反。

犗，音對。《詩》作剛，騂犗，赤脊也。【疏】注「騂犗」至「牲

也」。○解云：正以山脊曰剛，故知騂犗爲赤脊矣。群

公不毛。不毛，不純色，所以降于尊祖。^④【疏】注「不

毛」至「尊祖」。○解云：正以牲用純色，祭祀之禮而言不

毛，故以降于尊祖解之。魯祭周公，何以爲盛？

據牲異也。○盛，成政反，又音成，粢盛也，在器曰盛。

周公盛，盛者，新穀。魯公燾，燾者，冒也，故上以

新也。^⑤○燾，徒報反，一本作「濤」，音同，冒也。冒，亡

^①「封魯公以爲周公主」，王引之《經義述聞》：「家大人

曰：「主」字涉上文「爲周公主」而衍。「封魯公以爲

周公也。周公拜乎前，魯公拜乎後。曰：生以養周

公，死以爲周公主」，封魯公以爲周公，兼生養死祭言

之，非專指爲祭主一事也。且「爲周公主」，「爲」字讀

平聲。「封魯公以爲周公」，「爲」字讀去聲。此文「封

魯公以爲周公」是復述上文之詞，若於「爲周公」下加

一「主」字，則謬以千里矣。自唐石經始衍「主」字，而

各本遂沿其誤。定四年《左傳》正義引此無「主」字。

^②「白牲」，余本作「白牡」。阮校：「唐石經、鄂本作「白

牡」，當據正。此本注中亦作「牡」，不誤。」

^③「謙改」，阮校：「鄂本「謙」作「嫌」，此誤。」杉浦

^④校：「單疏鈔本標注作「嫌改」。」

^⑤按：此本疏中作「降于尊祖」。

報反。【疏】注「燾者」至「新也」。○解云：正以「燾」詁爲

「覆」故也，若似《周書》「燾以黃土」之類也。然則言周公

盛者，謂新穀滿其器。言「魯公燾」者，謂下故上新，裁可

半平。群公廩。①廩者，連新於陳上，財令半相連爾。

此謂方禘祭之時，序昭穆之差。○廩，力甚反。財令，力

呈反，下同。【疏】「群公廩」。○解云：廩，謂全是故穀，

但在上少有新穀，財得相連而已，故謂之廩。廩者，希少

之名，是以鄭注云「廩讀如『群公廩』之廩」者是也。②○

注「謂方」至「之差」。○解云：正以若其時祭，粢食精鑿，

群公之饌一何至此？故知正是禘祭之時，序昭穆之差，

所以降子尊祖故也。世室屋壞何以書？譏。

何譏爾？久不修也。簡忽，久不以時修治，至令

壞敗，故譏之。言屋者，重宗廟，詳錄之。以不務公室不

月者，知久不修，當蒙上月。【疏】注「以不務」至「上月」。

○解云：當蒙上月者，謂蒙上「秋七月」也。不務公室月

者，即定二年「冬，十月，新作雉門及兩觀」，傳云：「其言

新作之何？修大也。修舊不書，此何以書？譏。何

譏？不務乎公室。」③何氏云，務，勉也。不務公室，亦可

施於久不修，亦可施于不務如公室之禮，微辭也。月者，

久也，當即修之如諸侯禮」是也。然則彼久不修，是以書月。此亦久不修，故知當蒙上月爾。

冬，公如晉。

衛侯會于沓。○沓，徒合反。

狄侵衛。

十有二月，己丑，公及晉侯盟。還

自晉。

鄭伯會公于斐。還者何？善辭也。

何善爾？往黨，衛侯會公于沓，至得與晉

侯盟。反黨，鄭伯會公于斐，故善之也。

黨，所也。所猶時，齊人語也。文公前扈之盟不見序，後

①「群公廩」，阮校：「《詩·采芣》正義引鄭《易》注作

「群公謙」，謙、廩聲相近。此疏引鄭注云「廩讀如群

公廩之廩」，當是後人改竄。」

②「云」上，阮校：「當有『周易』二字。」

③「何譏不務乎公室」，阮校：「何校本『譏』下有『爾』

字，『公室』下有『也』字。」今按：定公二年傳作「何譏

爾不務乎公室也」。

能救鄭之難，不逆王者之求，上得尊尊之義，下得解患之恩，一出三爲諸侯所榮，故加錄，於其還時皆深善之。○斐，本又作「斐」，芳尾反。難，乃旦反。【疏】「還者何」。

○解云：正以不言至而言還，異於常例，故執不知問。○注「文公」至「見序」。○解云：即上七年「秋，公會諸侯，晉大夫盟于扈」，傳云「諸侯何以不序？大夫何以不名？公失序也」是也。○注「後能」至「之難」。○解云：即上九年春，「楚人伐鄭。公子遂會晉人、宋人、衛人、許人救鄭」是也。○注「不逆王者之求」。○解云：即上九年「春，毛伯來求金」，經無不與之文是也。○注「上得」至「之義」。○解云：即「不逆王者之求」是也。○注「下得」至「之恩」。○解云：即公子遂救鄭是也。

十有四年，春，王正月，公至自晉。月者，爲臣子喜錄上事。○爲臣，于僞反，下「爲後」，「當爲」同。【疏】注「月者」至「上事」。○解云：出上文也。

邾婁人伐我南鄙。

叔彭生帥師伐邾婁。

夏，五月，乙亥，齊侯潘卒。不書葬者，潘立儲嗣不明，乍欲立舍，乍欲立商人，至使臨葬更相篡弑，

故絕其身，明當更立其先君之次。○潘，普干反。更相，音庚，下「吳楚更」同。篡弑，申志反，下同。【疏】注「至使」至「篡弑」。○解云：即下九月「齊公子商人弑其君舍」，是其臨葬相篡弑之文。

六月，公會宋公、陳侯、衛侯、鄭伯、許男、曹伯、晉趙盾，癸酉，同盟于新城。盟下日者，刺諸侯微弱，信在趙盾。○盾，徒本反。【疏】注「盟下」至「趙盾」。○解云：言信任在於趙盾，若如盟日定否趙盾制之然，是以下日以近之。

秋，七月，有星孛入于北斗。孛者何？彗星也。狀如簪。○孛，步內反，徐扶憤反。

【疏】「孛者何」。○解云：欲言是星，星名未有，欲言非星，錄爲星稱，故執不知問。其言「入于北斗」何？據大辰不言人，又不言孛名。【疏】注「據大」至「言人」。○解云：即昭十七年「冬，有星孛于大辰」是也。

○注「又不言孛名」。○解云：謂昭十七年直言于大辰，不言所孛之星名。今此言「有星孛入于北斗」，故難之。何者？大辰非星名故也，是以昭十七年傳云「其言于大辰何」，彼注云「據北斗言入于大辰，非常名」是也。北

斗有中也。中者，魁中。何以書？記異也。

字者，邪亂之氣。簪者，掃故置新之象也。北斗，天之樞機玉衡，七政所出，是時桓文迹息，正都不能統政，①自是之後，齊、晉並爭，吳、楚更謀，競行天子之事，齊、宋、莒、魯弑其君而立之應。○爭，爭鬪之爭。【疏】注「北斗」至「所出」。○解云：即《堯典》云：「在璿璣玉衡，以齊七政。」七政，謂日月五星也。○注「齊宋」至「之應」。○解云：即下文九月「齊公子商人弑其君舍」，十八年夏五月，「齊人弑其君商人」，是齊弑君事也。十六年冬，「宋人弑其君處白」，是宋弑其君事也。十八年冬，「莒弑其君庶其」，是莒弑其君事。②十八年「冬，十月，子卒」，傳云「子卒者孰謂？謂子赤也。何以不日，隱之也。何隱爾？弑也。弑則何以不日，不忍言也」者，是魯弑其君事也。

公至自會。

晉人納接菑于邾婁，弗克納。納者

何？入辭也。其言「弗克納」何？據言「于

邾婁」，與「納頓子于頓」同，俱入國得立辭。○捷菑，④在妾反，又如字，下側其反。二傳作「捷菑」。【疏】「納者何」。○解云：欲言得國，下有「不克」之文，欲言不得國，納

者入辭，⑤故執不知問。○注「據言」至「立辭」。○解云：即僖二十五年「秋，楚人圍陳，納頓子于頓」是也。此上言于邾婁，是其得國，下云弗克納，自相違，故難之。大其弗克納也。克，勝也。鄭伯以勝為惡，此弗勝，故為大。【疏】注「鄭伯以勝為惡」。○解云：即隱元年「夏，五月，鄭伯克段于鄆」，傳云：「克之者何？殺之也。」

①「正都」，余本、鄂本、閩本作「王者」，京都本、再造善本作「王都」。

②「事」下，阮校：「閩、監、毛本下有『也』。」今按：準上文「是齊弑君事也」、「是宋弑其君事也」，下文「是魯弑其君事也」，此當有「也」字。

③「接菑」，阮校：「唐石經、諸本同。《釋文》：『接菑，二傳作『捷菑』。』《經義雜記》曰：『莊十二年宋萬弑其君接，今《左氏》、《穀梁》作『捷』，賈景伯所見《公羊》、《穀梁》皆作『接』。傳三十二年鄭伯接卒，《左氏》、《穀梁》作『鄭伯捷』。『接』、『捷』二字，古多通用。』」

④「捷」，經文並閩本作「接」。今按：「捷」當「接」之訛，否則下文云「二傳作『捷菑』」則為贅語。

⑤「入」，原作「人」，今據京都本、再造善本、中華本、閩本改。

殺之，則曷爲謂之克？大鄭伯之惡也。曷爲大鄭伯之惡？母欲立之，已殺之，如弗與而已矣。」注云「克者詰爲殺，亦爲能，惡其能忍戾母而親殺之」是也。何大乎其弗克納？據伐齊納子糾，恥不能納。【疏】注「據

伐」至「能納」。○解云：即莊九年「夏，公伐齊，納糾」，傳云「納者何？入辭也。其言伐之何？伐而言納者，猶不能納也」是也。晉卻缺帥師，革車八百乘，以

納接菑于邾婁，力沛若有餘，沛，有餘貌。○乘，繩證反。沛若，普貝反，有餘貌。而納之。邾婁

人言曰：「接菑，晉出也。纘且，齊出也。

出，外孫也。○纘且，俱縛反，下子餘反。子以其指，

指，手指。【疏】「子以其指指手指」。^①○解云：子謂

卻缺，言子以手指，指麾于邾婁，令使納接菑也。則接

菑也四，纘且也六。言俱不得天之正性。【疏】注

「言俱」至「正性」。○解云：地四生金于西方，地六成水

于北方，皆非天數也。言此者，喻皆庶子矣，貴則皆貴

矣。子以大國壓之，壓，服也。服邾婁使從命。○

壓，於甲反，又於輒反，服也。則未知齊、晉孰有

之也。設齊復興兵來納纘且，亦欲服邾婁使從命，未知

齊、晉誰能使外孫有邾婁者。○齊復，扶又反，下同。

貴則皆貴矣。時邾婁再娶，二子母尊同體敵。【疏】

注「時邾」至「體敵」。○解云：蓋皆是右媵之子，或是左

媵之子，言非姪娣所生也。舊云「子以其指」者，言凡立

子之法，以其手指相似，則接菑猶人之四指，纘且猶人之

六指，皆異於人，故曰「俱不得天之正性」也。「雖然」者，

雖皆不得正性，^②但四不如六，故長者宜立矣。雖然，

纘且也長。」既兩不得正性，又皆貴，唯當以年長故立

之。○長，丁丈反，注同。卻缺曰：「非吾力不能

納也，義實不爾克也。」如邾婁人言，義不可奪也，

故云爾。引師而去之，故君子大其弗克納

之也。

①「注指手指」，阮校：「何校本此四字在『解云子謂卻缺』下。」

②「俱不得天之正性也雖然者雖皆不得正性」，阮校：「閩、監、毛本移『雖然者』以下分配下節，又刪

『雖然者』三字，增『雖然至長』○解云『六字一〇』，大

失疏文舊式矣。」

也。大其不以己非奪人之是。此晉卻缺也，其稱人何？貶。曷爲貶？據趙鞅納蒯聵不貶。

【疏】注「據趙」至「不貶」。○解云：即哀二年夏，「晉趙鞅帥師納衛世子蒯聵于戚」是也。不與大夫專廢置君也。曷爲不與？據大其弗克納。實與，弗克納是。而文不與。文曷爲不與？大夫之義，不得專廢置君也。不復發「上無天子，下無方伯」傳者，諸侯本有錫命征伐憂天下之道故，明有亂義，大夫不得專也。接菑不繫邾婁者，見挈于卻缺也。不氏者，本當言卻婁接菑，見當國也。○見挈，賢徧反，下音苦結反。【疏】注「不復」至「之道」。○解云：欲道僖元年「救邢」、「城楚丘」之經，悉是實與而文不與，文與此同。

其傳皆云：「上無天子，下無方伯，天下諸侯有相滅亡者，力能救之，則救之可也。」今此不復言之，故云爾。言「諸侯本有錫命征伐憂天下之道故」者，正謂保伍連帥，^①本有共相存恤之義，是以上無天子，下無方伯之時，容有存恤之道，是故異於大夫耳。○注「明有」至「專也」。○解云：言大夫若有專廢置君者，即是亂義，故曰「明有亂義，大夫不得專也」，正由大夫不得專廢置故也。○注「接

菑」至「缺也」。○解云：據僖二十五年納頓子繫頓也。○注「不氏者」。○解云：據宣十一年「納公孫甯、儀行父于陳」皆言氏也。○注「本當」至「當國也」。○解云：即隱元年傳云：「段者何？鄭伯之弟也。何以不稱弟？當國也。」注云：欲當國爲之君，故如其意，使如國君，氏上鄭，所以見段之逆」是也。

九月，甲申，公孫敖卒于齊。已絕，卒之

者，爲後齊魯歸其喪有恥，故爲內諱，使若尚爲大夫。

【疏】注「已絕」至「大夫」。○解云：言已絕者，即上八年公孫敖奔莒是也。《春秋》之例，大夫出奔之後，即絕於大夫之位，不復書其卒，即公子慶父、臧孫紇之屬是，是以於此怪其書卒矣。言「爲後齊魯歸其喪有恥」者，即下十五年夏，「齊人歸公孫敖之喪」，傳云「何以不言來？內辭也，魯我而歸之」是也。

齊公子商人弑其君舍。此未踰年之君也，其言「弑其君舍」何？據弑其君之子奚齊

①「伍」，原作「五」，今據京都本、再造善本、中華本、閣本改。

也。連名何之者，弑成君未成君俱名，問例所從也。

【疏】注「據弑」至「齊也」。○解云：即僖九年「冬，晉里克弑其君之子奚齊」，傳云「弑未踰年君之號」是也。己立

之，己殺之，商人本正當立，恐舍緣潘意爲害，故先立

而弑之。【疏】注「商人本正當立」。○解云：正以弑舍不

書日，見不正遇禍，則知商人本正明矣。成死者而賤

生者也。惡商人懷詐無道，故成舍之君號，以賤商人

之所爲。不解名者，言成君可知。從成君不日者，與卓

子同。○惡，烏路反。卓，敕角反。【疏】注「從成君」至

「子同」。○解云：即僖十年春，「晉里克弑其君卓子」，彼

下注云「不日者，不正遇禍，終始惡明，故略之」是也。

宋子哀來奔。宋子哀者何？無聞

焉爾。

冬，單伯如齊。齊人執單伯。齊人執

子叔姬。執者曷爲或稱行人，或不稱行

人？此問諸侯相執大夫所稱例。【疏】「宋子哀者

何」。^①○解云：欲言宋君，經書子哀，欲言大夫，文不言

氏，故執不知問。○「無聞焉爾」。○解云：即隱二年注

云「言無聞者，《春秋》有改周受命之制，孔子畏時遠害，

又知秦將燔《詩》、《書》，其說口授相傳，至漢公羊氏及弟

子胡毋生等，乃始記於竹帛，故有所失也」是也。稱行

人而執者，以其事執也。以其所銜奉國事執之，

「晉人執我行人叔孫舍」是也。【疏】注「晉人」至「是也」。

○解云：即昭二十三年，「晉人執我行人叔孫舍」是。不

稱行人而執者，以己執也。己者，己大夫，自以

大夫之罪執之。分別之者，罪惡各當歸其本。^②○別，彼

列反。單伯之罪何？道淫也。惡乎淫？

淫乎子叔姬。時子叔姬嫁，當爲齊夫人，使單伯送

之。○惡，音烏。然則曷爲不言「齊人執單伯

及子叔姬」？據夫人婦姜繫公子遂。【疏】注「據夫」

至「子遂」。○解云：即宣元年「三月，遂以夫人婦姜至自

齊」是也。內辭也，使若異罪然。深諱使若各自

^①「宋子哀者何」，阮校：「此下二節疏，閩、監、毛本移

于「宋子哀來奔」傳下。」

^②「各當」，阮校引浦鏜云：「字誤倒。」

以他事見執者。不書叔姬歸于齊者，深諱以起道淫。書單伯如齊者，起送叔姬也。齊稱人者，順諱文，使若非伯討。【疏】注「不書」至「姬也」。○解云：言此者，欲決隱二年「冬，十月，伯姬歸于紀」之屬書歸也。言深諱者，正以子叔姬有罪故也。言「以起道淫」者，謂深諱不言其歸，即是以起道淫之義。何者？若更爲小事而見執，何須諱其歸于齊？今不言歸于齊，而與單伯俱見執，明其在道與單伯淫，于歸事不醒醒矣。或曰不書歸于齊者，深諱其起道淫故也。何者？若言叔姬歸于齊，齊人執單伯，齊人執子叔姬，即有道淫之理也。○注「齊稱人」至「伯討」。①○解云：即僖四年夏，「齊人執袁濤塗」之下，傳云「稱侯而執者，伯討也。稱人而執者，非伯討也」是也。

十有五年，春，季孫行父如晉。

三月，宋司馬華孫來盟。月者，文公微弱，

大夫秉政，宋亦蔽於三世之黨，三亂結盟，②故不與信辭。不稱使者，宋無大夫。官舉者，見宋亂也。錄華孫者，明惡二國，非以月惡華孫也。○華孫，戶化反。見，賢偏反。惡二，烏路反，下皆同。【疏】注「月者」至「秉政」。○解云：即公子遂是也。○注「宋亦」至「之黨」。○解

云：即上九年傳云「曷爲皆官舉？」③宋三世無大夫，三世內娶也」是也。言爲三世內娶之故，三世妃黨皆強，而爲君之所蔽，故云「蔽于三世之黨」矣。○注「故不與信辭」。○解云：正以《春秋》之例，凡莅盟、來盟例皆書時，所以然者，欲見王者當以至信先于天下故也，是以桓十四年夏，「鄭伯使其弟語來盟」，注云「時者，從內爲王義，明王者當以至信先天下」是也。今而書月，故言不與信辭耳。○「不稱使」至「大夫」。○解云：正決「鄭伯使其弟語來盟」之文也。○注「官舉」至「孫也」。○解云：大夫之義，例不官舉，而此言司馬者，正以見宋之亂，是以詳錄華孫，明其書月不與信辭者，不由華孫之故也。

夏，曹伯來朝。

齊人歸公孫敖之喪。何以不言來？

據齊人來歸子叔姬。【疏】注「據齊」至「叔姬」。○解

①「注齊稱人至伯討」，杉浦校：「單疏鈔本作『注齊稱人者，順諱文，使若非伯討也者』，仍此本，何注『討』下當有『也』字。」

②「三」，阮校：「鄂本『三』作『二』，當據正。」

③「九」，阮校：「浦鍾云：『八』誤『九』。是也。」

云：在此年十二月。內辭也，脅我而歸之，筍將而來也。筍者，竹篴，一名編輿，齊、魯以此名之曰筍。^①將，送也。爲叔姬淫，惡魯類，故取其尸置編輿中，傳送而來，脅魯令受之，故諱不言來，起其來有恥，不可言來也。不月者，不以恩錄，與子叔姬異。○筍將，音峻，竹篴也。將，送也。竹篴，婢緜反，一音步賢反，服虔音編，韋昭音如頻反。^②編，必緜反，一音篇，郭璞音步典反。輿，音餘。爲叔，于僞反，下「父爲」、「子爲」、「若爲」、「實爲」同。傳，直專反。令受，力呈反，下同。【疏】注「故取其尸」。○解云：謂取其死尸矣。○注「不月」至「姬異」。○解云：正以下「十有二月，齊人來歸子叔姬」，書月故也。

六月，辛丑朔，日有食之。鼓用牲于社。

是後楚人滅庸，宋人弑其君處白，齊人弑其君商人，宣公弑子赤，莒弑其君庶其。【疏】注「是後楚人滅庸」。○解云：即下十六年秋，「楚人、秦人、巴人滅庸」是也。○注「宋人弑處白」。○解云：在十六年冬。○注「齊人弑商人」。○解云：在十八年夏五月。○注「宣公弑子赤」。○解云：即十八年冬「子卒」，傳云「子卒者孰

謂？謂子赤也。何以不日？隱之也。何隱爾？弑也」者是也。○「莒弑其君庶其」。^③○解云：在十八年冬。

單伯至自齊。大夫不致，此致者，喜患禍解也。不省去氏者，淫當絕，使若他單伯至也。○解，戶買反。省，所景反。【疏】注「大夫不」至「禍解也」。○解云：正以內大夫出聘，例不書至故也。○注「不省」至「伯至也」。○解云：正以昭十四年「春，隱如至自晉」，彼是被執而歸，省去其氏，今單伯存氏，故解之。

晉卻缺帥師伐蔡。戊申，入蔡。人不言伐，此其言伐何？至之日也。其日何？據「甲寅，齊人伐衛」日伐也。【疏】「人不言伐」。

○解云：莊十年師解云爾，故此弟子據而難之。○注「據

①「此」，阮校：「鄂本、蜀大字本『此』作『北』，《漢制考》同，當據正。」

②「類」，原作「類」，今據余本、中華本、閩本、宋本《釋文》改。

③「莒」上，杉浦校：「單疏鈔本有『注』字，是也。此脫。」

甲「至「伐也」。○解云：即莊二十八年「春，王三月，甲寅，齊人伐衛。衛人及齊人戰，衛人敗績」是也。至之日也。嫌至日伐，不至日人，故曰人也。」主書，與甲寅同義。【疏】注「主書」至「同義」。○解云：即彼云「伐不日，此何以日？」至之日也。」何氏云「用兵之道，當先至竟侵責之，不服，乃伐之。今日至，便以今日伐之，故曰以起其暴也」是也。然則今此卻缺亦今日至便以今日伐之，故書以日起其暴也。」

秋，齊人侵我西鄙。

季孫行父如晉。

冬，十有一月，諸侯盟于扈。不序不日者，順上諱文，使若扈之盟，都不可得而知。【疏】注「不序」至「而知」。○解云：上七年「秋，八月，公會諸侯，晉大夫盟于扈」，傳云「諸侯何以不序？大夫何以不名？公失序也。公失序奈何？諸侯不可使與公盟」云云，何氏云：「文公內則欲久喪而後不能，喪娶逆祀，外則貪利取邑，為諸侯所薄賤，不見序，故深諱為不可知之辭。不日者，順諱為善文也。」然則此不序者，為不可知之辭。不日者，順諱為善文也，何者？盟不日，善文故也。

十有二月，齊人來歸子叔姬。其言來何？據齊人歸公孫敖之喪不言來。閔之也。閔傷其棄絕來歸。此有罪，何閔爾？父母之於子，雖有罪，猶若其不欲服罪然。孔子曰：「父為子隱，子為父隱，直在其中矣。」所以崇父子之親也。言齊人不以棄歸為文者，令與敖同文相發明。叔姬于文公為姊妹，言父母者，時文公母在，明孝子當申母恩也。月者，閔錄之，從無罪例。【疏】注「所以」至「親也」。○解云：即言「來」以閔之是也。○注「言齊人」至「母者」。○解云：若以棄歸為文，即言「子叔姬來歸」，不言「齊人」，即宣十六年「郊伯姬來歸」之文是。今言「齊人來歸」，故謂之同文也。言「相發明」者，言敖為齊所惡而來歸之，今此亦為齊人所歸之，故曰相發明耳。○注「時

① 「日」，阮校：「鄂本同，蓋誤。閩、監、毛本作「日」。」
 ② 「今此」，原作「令此」，今據京都本、再造善本、閩本改。

③ 「以日」，杉浦校：「單疏鈔本互倒，當作「日以」。」
 ④ 「令」，阮校：「鄂本、宋本、閩本同，監、毛本作「今」。」

文「至」恩也」。○解云：①正以下十六年「秋，八月，辛未，夫人姜氏薨」，十七年夏「葬我小君聖姜」，傳云「聖姜者何？文公之母也」是。○注「月者閏」至「例」。○解云：正以棄歸之例，有罪者時，無罪者月故也。其有罪者時，即宣十六年「秋，剡伯姬來歸」是也。②其無罪者月，成五年「春，王正月，杞叔姬來歸」之屬是也。

齊侯侵我西鄙，遂伐曹，入其郛。郛

者何？恢郭也。恢，大也。郭，城外大郭。○郛，

芳夫反，郭也。恢廓，③苦回反，大也。【疏】「郛者何」。

○解云：欲言城郭，經無城郭之文，欲言非城郭，上文言人，故執不知問。人郛書乎？曰：不書。圍不

言人，人郛是也。④【疏】「人郛」至「不書」。○解云：案

諸舊本，此傳之下悉皆無注。有注云「圍不言人，人郛是也」者，衍字耳。人郛不書，此何以書？動我

也。諱使若為同姓見入郛故，動懼我也。動我者

何？內辭也。其實我動焉爾。齊侵魯，魯實

為子叔姬故，動懼失操云爾。鄉者不去，幾亦入我郛，故舉入郛以起魯恥，且明兵之所鄉，苟得其罪，則莫敢不懼。○鄉者，許亮反，下同。幾，音祈。

十有六年，春，季孫行父會齊侯于陽

穀，齊侯弗及盟。其言「弗及盟」何？據序

上會也。連盟何者，嫌據盟。【疏】注「據序」至「據盟」。

○解云：據序上會，何得弗及盟乎？是以問之。云嫌據

盟者，嫌直據盟問之。不見與盟也。與齊期盟，為

叔姬故，中見簡賤，不見與盟，侮辱有恥，故諱使若行父

會而去。齊侯不及得與盟，故言「齊侯弗及」，亦所以起

齊侯不肯。○為，于偽反。【疏】注「使若」至「與盟」。

○解云：使若行父會齊侯于陽穀訖即棄之而去，齊侯不及

盟。○注「亦所以起齊侯不肯」。○解云：若直言不及

盟，文體已具，足見不得盟矣。而更言齊侯「不及」者，欲

①「注時文至恩也」○解云：，杉浦校：「單疏鈔本作「注時文公母在者」，下無「○解云」。按：依此疏語，單疏本標起止是。」

②「剡」，宣公十六年經作「郛」。阮校：「閩、監、毛本

「剡」作「郛」，不誤。」

③「恢廓」，宋本《釋文》作「恢郭」。傳言「恢郭也」，則作

「恢郭」者是。

④「是」，原作「吳」，今據余本、中華本、閩本改。

道是時不肯盟者是齊侯也。若直言季孫行父會齊侯于陽穀不及盟，不妨行父不及，無以見齊侯不肯矣。

夏，五月，公四不視朔。視朔說在六年。不

舉不朝廟者，禮，月終于廟先受朝政，^①乃朝，明王教尊也。朝廟，禮也，^②故以不視朔爲重。^③常以朔者，始重

也。^④【疏】注「視朔說在六年」。○解云：即上六年注云

「禮，諸侯受十二月朔政於天子，藏于大祖廟，每月朔朝廟，使大夫南面奉天子命，君北面而受之」是也。○注

「不舉」至「爲重」。○解云：正以視朔之時，必有朝廟之

禮，故上六年經云「閏月不告月，猶朝于廟」是也。今此

經直言「四不視朔」，不道不朝廟，故解之。○注「常以」

至「始也」。○解云：言十二月之政令，所以不在年初一

受之而已，必以月之朔日受之者，重月之始故也。公曷

爲四不視朔？據無事也。公有疾也。以不諱

舉公如有疾，^⑤公有疾乃復舉公是也。○乃復，扶又反，

下同。【疏】注「公有」至「是也」。○解云：即昭二十三年

「冬，公如晉，至河，公有疾，乃復」是也。^⑥何言乎公

有疾不視朔？據有疾無惡也。【疏】注「據有疾無

惡也」。○解云：即昭二十三年傳云「何言乎公有疾乃

復？殺恥也」者是。自是公無疾不視朔也。有

疾無惡不當書。又不言有疾者，欲起公自是無疾不視朔

也。^⑦【疏】注「公自」至「朔也」。○解云：即鄭氏云「魯

自文公四不視朔，視朔之禮已後遂廢」者，正取此書也。^⑧

然則曷爲不言公無疾不視朔？有疾，猶

可言也，無疾，不可言也。言無疾，大惡不可言

也。是後公不復視朔，政事委任公子遂。

六月，戊辰，公子遂及齊侯盟于犀丘。

①「朝」，阮校：「鄂本『朝』作『朔』，此誤。」

②「禮」，余本、鄂本作「私」，當是。

③「故以不」，阮校：「鄂本作『故不以』。」

④「始重」，阮校：「諸本同，誤倒。鄂本作『重始』，當據正。此本疏標起訖云『注常以至始也』，則本作『重始』。」

⑤「如」，阮校：「鄂本『如』作『知』，此誤。」

⑥「是」，原作「至」，今據中華本、閩本改。

⑦「視」下，杉浦校：「單疏鈔本標起止有『朝』字。」

⑧「書」，單疏鈔本作「文」。阮校引浦鏜云：「『文』誤

『書』，從《儀禮經傳通解》校。」

○犀丘，彥西，^①《左氏》作「鄒丘」，《穀梁》作「師丘」。
【疏】「盟于犀丘」。○解云：^②正本作「菑丘」，^③故賈氏
《公羊》曰「菑丘」，《穀梁》曰「師丘」是也。今《左氏》經作
「鄒」字。

秋，八月，辛未，夫人姜氏薨。

毀泉臺。泉臺者何？郎臺也。莊公所

築臺于郎，以郎譏臨民之湫浣。○湫，素侯反。浣，戶管
反。【疏】「泉臺者何」。○解云：泉臺之名，自前未有，今
而言毀，故執不知問。○注「莊公」至「湫浣」。○解云：
即莊三十一年「春，^④築臺于郎」，傳云「何以書？譏。何
譏爾？臨民之所湫浣也」是也。然則何以知泉臺爲郎
臺？正以彼傳云「譏臨民之所湫浣」，書與此泉臺之義
合故也。郎臺則曷爲謂之泉臺？未成爲郎
臺，未成時，但以地名之。既成爲泉臺。既成，更
以所置名之。毀泉臺何以書？譏。何譏
爾？築之譏，毀之譏。先祖爲之，已毀
之，不如勿居而已矣。但當勿居，令自毀壞，不當
故毀，暴揚先祖之惡也。築毀譏同，知例皆時。○令，力
呈反。暴，步卜反。【疏】注「築毀」至「皆時」。○解云：

言「築毀譏同」者，即上傳云「築之譏，毀之譏」是也。言
「知例皆時」者，正以此經文承月下，恐蒙月，故如此解。
「賤者窮諸人」首，^⑤言士先自稱人，今弑君亦稱人，故曰
「窮諸人」矣。云「賤者窮諸盜」者，言士之賤名不過于盜
故也。^⑥

①「彥」，宋本《釋文》作「音」，當是。

②「盟于犀丘」○解云：，杉浦校：「單疏鈔本作「盟于犀
丘也者」，下無「○解云」。」

③「菑丘」，阮校引《經義雜記》曰：「《釋文》作「犀丘」，
《穀梁音義》亦云《公羊》作「犀丘」，則唐以來本不作
「菑」字矣。《公羊》疏唐以前人爲之，所據皆晉宋古
書，故猶見正本，與賈景伯合也。」

④「莊三十一年」，原作「莊二十一年」。阮校：「浦鏜
云：「三」誤「二」。是也。」今據莊公三十一年經及單
疏鈔本改。

⑤「首」，阮校引浦鏜云：「「首」爲「者」之誤。」杉浦
校：「單疏鈔本「首」作「者」。」

⑥「賤者窮諸人首」至「不過于盜故也」四十二字，阮
校：「閩、監、毛本移「賤者」以下四十二字作「賤者窮
諸盜」之注，在「降大夫使稱人」之上。鄂本注無之。
元年疏與此同，不誤。」

楚人、秦人、巴人滅庸。○巴，布加反。

冬，十有一月，宋人弑其君處臼。弑

君者曷爲或稱名氏？或不稱名氏？大

夫弑君稱名氏，賤者窮諸人。賤者，謂士也。

士正自當稱人。○處臼，二傳作「杵臼」。大夫相殺

稱人，賤者窮諸盜。降大夫使稱人，降士使稱盜

者，所以別死刑有輕重也。無尊上，非聖人，不孝者，斬

首梟之。無營上，犯軍法者，斬要。殺人者，刎脰。故重

者錄，輕者略也。不日者，內娶略賤之。○別，彼列反。

梟，古堯反。要，一遙反。刎，亡粉反。頭，如字，本又作

「脰」，音豆。【疏】注「故重」至「略也」。○解云：謂大夫

弑君罪重，故稱名氏責之深。若大夫相殺，罪輕於犯君，

故降稱盜者，義之輕然也。①○注「不日」至「賤之」者，既

說于上。②

伐宋。

十有七年，春，晉人、衛人、陳人、鄭人

伐宋。夏，四月，癸亥，葬我小君聖姜。聖姜

者何？文公之母也。○聖姜，二傳作「聲姜」。

【疏】「聖姜者何」③。○解云：欲言夫人，謚異其夫號，欲言爲妾，而卒葬並不見，④故執不知問。

齊侯伐我西鄙。

六月，癸未，公及齊侯盟于穀。

諸侯會于扈。

秋，公至自穀。

公子遂如齊。⑤

十有八年，春，王二月，丁丑，公薨于

臺下。

秦伯罃卒。秦穆公也。至此卒者，因其賢。○

①「輕」下，阮校引浦鏜云：「脫『重』。」

②「既」，京都本、再造善本、閣本作「已」。

③「聖姜者何」，杉浦校：「單疏鈔本『聖』上有『葬我小』

君聖姜也者，左氏、穀梁作聲姜」十五字，當據補正。」

④「並不見」，阮校：「閩、監、毛本『不見』作『書見』，是

也。」杉浦校：「單疏鈔本無『不』字。按：單疏本作

「並見」，當據。」

⑤「公子遂如齊」上，阮校：「唐石經、鄂本有『冬』字，此脫。」

伯嚭，乙耕反，何云「穆公也」。《左氏》：「穆公子康公。」
【疏】注「秦穆」至「其賢」。○解云：正以秦是戎狄，《春秋》外之，往前以來未錄其卒，今乃始書，故以賢解之。而《左氏》爲康公者，與此別。《穀梁》無解。

夏，五月，戊戌，齊人弑其君商人。商人

弑君賊，復見者，與大夫異。齊人已君事之，殺之且當坐弑君。○復見，扶又反，下同，下賢徧反。【疏】注「商人」至「弑君」。○解云：《春秋》之義，諸是弑君之賊，皆不復見，所以賤之。是以宣六年書「晉趙盾、衛孫免侵陳」，傳云：「趙盾弑君，此其復見何？」注云：「據宋督、鄭歸生、齊崔杼弑其君，後不復見。」傳又云：「親弑君者，趙穿也。」注云「復見趙盾者，欲起親弑者趙穿，非盾」是也。今此商人於上十四年「弑其君舍」而復見者，正以其爲君故也。與大夫異者，齊人以君事之，殺之宜當坐弑君。然則商人弑其君舍而存之，欲責臣子不討賊故也，是以莊二十二年注云：「不與念母而譏忌省者，本不事母則已，不當忌省，猶爲商人責不討賊。」義亦通於此。

六月，癸酉，葬我君文公。

秋，公子遂、叔孫得臣如齊。不舉重者，

譏魯猥使二大夫出，虛國家，廢政事，重錄內也。【疏】注「不舉」至「內也」。○解云：書事舉重，《春秋》之常，今而悉舉，故解之。《穀梁傳》云「使舉上客而不稱介，不正其同倫而相爲介，故列而數之也」者，亦是直舉重之義也。而言重錄內者，正以外大夫未有並見者，於內唯有此經，及定六年「夏，季孫斯、仲孫何忌如晉」之文，故知正是重錄內也。

冬，十月，子卒。「子卒」者孰謂？謂

子赤也。何以不日？據子般卒日。隱之也。

何隱爾？弑也。弑則何以不日？據子般卒

日。○弑也，音試，下及注同。【疏】注「據子般卒日」。

○解云：即莊三十二年「冬，十月，乙未，子般卒」是也。

不忍言也。所聞世，臣子恩痛王父深厚，故不忍言其

日，與子般異。【疏】注「故不忍」至「般異」。○解云：正

以子般爲所傳聞之世故也，②是以莊三十二年「子般卒」

①「且」，阮校：「閩、監、毛本同，鄂本作『宜』，當據正。」

②「子般」，原作「般般」，今據注文及京都本，再造善本、

中華本、閣本改。

之下，^①何氏云「殺不去日見隱者，降子赤也」是。

夫人姜氏歸于齊。歸者，大歸也。夫死子殺

賊人立，無所歸留，故去也。有去道書者，重絕不復反。

【疏】注「歸者」至「歸也」。^②○解云：凡言大歸，一出不

反之辭，若「紀侯大去其國」之類，故言「歸者，大歸也」。

○注「有去」至「不復」。^③○解云：正以常事不書

故也。^④

季孫行父如齊。

莒弑其君庶其。稱國以弑何？據莒人

弑其君密州。【疏】注「據莒」至「密州」。○解云：即襄三

十三年「十有二月」，^⑤莒人弑其君密州」是也。稱國以

弑者，衆弑君之辭。一人弑君，國中人人盡喜，故

舉國以明失衆，當坐絕也。例皆時者，略之也。【疏】注

「例皆」至「之也」。○解云：謂是失衆而稱國以弑者，皆

書時以略之，即定十三年冬，「薛弑其君比」之屬是也。

若然，昭二十七年「夏，四月，吳弑其君僚」，亦是稱國而

書月者，彼非失衆，但以見弑之義，故不書時賤之，是以

何氏云「不書閭閻弑其君者，爲季子諱，明季子不忍父子

兄弟自相弑，讓國閭閻，欲其享之，故爲沒其罪也」，「月

者，非失衆見弑，故不略之」者是也。

監本附音春秋公羊注疏文公卷第十四

①「莊三十二年」，原作「莊三十三年」。阮校：「閩、監本同，誤也。當從毛本作『三十二』。」莊公無三十三年，今據單疏鈔本、毛本改。

②「歸者至歸也」，中華本、閩本作「歸者大歸也」。

③「不復」，阮校：「閩、監、毛本作『有去至復反』，按注當有『反』字。」杉浦校：「單疏鈔本作『注有去道書者重絕不復反者』。」

④「常事」，原脫，今據京都本、再造善本、中華本、閩本補。

⑤「襄三十三年十有二月」，阮校：「浦鏗云『一年』誤『三年』，浦說是也。『十有二月』，何校本『二』作『一』，是也。」杉浦校：「單疏鈔本作『三十一年十有一月』。」

監本附音春秋公羊注疏宣公卷第十五

起元年，盡九年

何休學

元年，春，王正月，公即位。繼弑君不言即位，此其言即位何？其意也。^①桓公篡

成君，宣公篡未踰年君，^②嫌其義異，故復發傳。【疏】注

「桓公」至「發傳」。○解云：即桓元年傳云「繼弑君不言

即位，此言即位何」，注云「據莊公不言即位」。彼傳云

「如其意也」，注云：「弑君欲即位，故如其意也。」^③注云

「弑君欲即位，故如其意，以著其惡」是也。若然，案禮未

踰年之君，臣下爲之無服，臣爲君斬衰三年，誠實自異，

何言「嫌其義異」者？正以惻隱者相似故也。是以閔元

年何氏云「復發傳者，嫌繼未踰年君義異故也，明當隱之

如一」是也。

公子遂如齊逆女。譏喪娶。復書不親迎者，

嫌觸諱不成其文也。有母言「如」者，緣內諱無貶公文。

【疏】注「譏喪」至「其文」。○解云：何氏以爲人君喪娶

者，宜有貶刺之文。若其吉逆使卿者，宜書譏之，見不親

迎而已，即叔孫僑如之徒是也。今公子遂爲君喪娶，宜

去「公子」以見譏。而存「公子」，復作不親迎之經書之

者，正以公子遂本是弑君之賊，若去「公子」，即嫌爲觸弑

君大惡之故諱去「公子」，即似隱四年、十年公子翬之

類，^④是以不得成其貶文。若然，文公二年「公子遂如齊

納幣」，^⑤亦譏喪娶之經而不去公子者。彼是喪未畢納

幣，爲失禮猶淺，此乃初喪逆女，固當合貶，即下八年而

^①「其意也」，王引之《經義述聞》：「『其意』上當有『如』

字。桓元年傳：『繼弑君不言即位，此其言即位何？

如其意也。』何注曰：『弑君欲即位，故如其意，以著

其惡。』是也。若無「如」字，則文義不明。蓋寫者脫

去耳，唐石經已然。」

^②「公」，原作「君」，今據余本、中華本、閩本改。

^③「注云弑君欲即位故如其意也」，阮校：「浦鏜云：十

二字衍。是也。」

^④「似」，京都本、再造善本作「以」。

^⑤「幣」，原作「弊」，文公二年經作「幣」。阮校：「閩、

注云「元年逆女，^①嫌爲喪娶貶也」者，義亦通於此。云云之說，八年注備。○注「有母」至「公文」。○解云：下八年夏六月，「戊子，夫人熊氏薨」，「冬，十月，己丑，葬我小君頃熊」。「頃熊者何？宣公之母也」，是其今日「有母」。母不命使者，婦人之命，不通四方，何得言「如」作內使之文者？正以緣內無貶公之文故也。何者？若其去「如」，則嫌宣公喪娶爲絕賤，不成爲諸侯然也。正緣此事，不得去「如」也。若然，莊二十八年「臧孫辰告糴于齊」，不言「如」，所以不嫌莊公不能貯蓄絕而賤之者，彼告糴之事，可以通臧孫之私行。此大夫不外娶，無通私行之義，^②故如是。

三月，遂以夫人婦姜至自齊。遂何以不稱公子？一事而再見者，卒名也。卒，竟也。竟但舉名者，省文。夫人何以不稱「姜氏」？據「僑如以夫人婦姜氏至自齊」也，經有「姜」不但問不稱氏者，嫌據「夫人氏」欲使去「姜」。【疏】注「據僑」至「齊也」。○解云：在成十四年九月。○注「嫌據」至「去姜」。○解云：即僖元年「夫人氏之喪至自齊」是也。貶。曷爲貶？據俱至也。譏喪娶也。

喪娶者公也，則曷爲貶夫人？據師還也。

【疏】注「據師還也」。○解云：即莊八年「秋，師還」，傳曰「還者何？善辭也。如滅同姓，^③何善爾？病之也」。「曷爲病之？非師之罪也」。彼公自滅同姓，非師之罪，是以歸惡于公，書還以善師。此公自喪娶，非夫人之罪而貶夫人，與彼義違，故據而難之。內無貶于公之道也。明下無貶上之義。內無貶于公之道，則曷爲貶夫人？據俱有諱義。【疏】注「據俱有諱義」。○解云：《春秋》之道，多爲內諱，何故此經不爲夫人諱而貶之乎？夫人與公一體也。恥辱與公共之。夫人貶，則公惡明矣。去氏比於去姜，差輕可言，^④故不諱貶夫人。○差，初買反。【疏】「夫人與公一體」。○解云：初則判合，終成一體，是以寡妻之號稱「未亡人」。言其事體先亡，^⑤遺餘半在爾，故傳以「一體」言之。

①「而注云」，阮校引浦鏜云：「而，衍字。」

②「通」，京都本，再造善本作「道」。

③「如」，阮校：「浦鏜云：『此誤如』。是也。」

④「輕」，阮校：「閩、監、毛本同，鄂本下疊『輕』字。」

⑤「事」，阮校引浦鏜云：「疑『半』之誤。」

○「恥辱」至「明矣」。○解云：正以夫人與公共謚，知榮辱同矣。○注「去氏」至「夫人」。○解云：去「姜」，即僖

元年「夫人氏之喪至自齊」是也。然此不諱者以其輕，而僖元年去「姜」者則重矣，而亦不諱者，何氏云「因正王法所加，臣子不得以夫人禮治其喪也」是也。其稱婦

何？據桓公夫人至，不稱婦。【疏】注「據桓」至「稱

婦」。○解云：即桓三年九月，「夫人姜氏至自齊」是也。

有姑之辭也。有姑當以婦禮至，無姑當以夫人禮至，

故分別言之。言「以」者，見行遂意也。見繼重在遂，^①因

遠別也。月者，公不親迎，危錄之例也。【疏】「有姑之辭

也」。○解云：隱二年傳云「在塗稱婦」，與此違者，兼二

義也。言在塗見夫而服從夫，故謂之婦，至國對姑而服

從姑，是以亦謂之婦矣。○注「有姑」至「禮至」。○解

云：當以婦禮至，而稱夫人者，臣下錄之故也。○注「言

以」至「別也」。○解云：桓十四年傳云：「以者何？行

其意也。」何氏云：「以己從人曰行。」然則此經云「遂以夫

人」者，欲見夫人是時進止由遂，故言見繫重在遂。若不

言「以」，直云「遂夫人」，則嫌怪夫人男女無別，故云「因

遠別」也。○注「月者」至「例也」。○解云：即桓三年九

月，「夫人姜氏至自齊」之屬是也。言公不親迎，故書月，危錄之例也。

夏，季孫行父如齊。

晉放其大夫胥甲父于衛。放之者

何？猶曰無去是云爾。是，是衛。【疏】放之者

何。○解云：大夫去國，於例言「出奔」，此經言「放」，故

執不知問。然則何言爾？近正也。此其為

近正奈何？古者大夫已去，三年待放。古

者刑不上大夫，蓋以為摘巢毀卵，則鳳凰不翔，刳胎焚

天，則麒麟不至。刑之則恐誤刑賢者，死者不可復生，刑

者不可復屬，故有罪放之而已。所以尊賢者之類也。三

年者，古者疑獄三年而後斷。《易》曰「繫用徽墨」，^②實於

叢棘，三歲不得，凶」是也。自嫌有罪當誅，故三年不敢

^①「繼」，阮校：「閩、監、毛本同。按：『繼』當讀為「繫」。解云：故言見繫重在遂。」

^②「墨」，阮校：「鄂本、閩本同，監、毛本『墨』改『纆』，疏並同。」

去。○摘，吐狄反。剝，口狐反。^①屬，音蜀。^②叢棘，才工反。【疏】「近正也」。○解云：用古放臣而言近正者，正以古者放臣任其所去，今此晉又處之於衛，故言近耳。○「古者刑不上大夫」。^③○解云：《曲禮上》篇文。鄭注云：「不與賢者犯法，其犯法則在八議，輕重不在刑書」是也。○注「蓋以爲」至「不至」。○解云：皆《家語》文。是時孔子之晉，聞趙簡子殺舜華之屬，故爲此言而遂還耳。○注「易曰」至「是也」。○解云：此《坎》卦上六爻辭也。鄭氏云「繫，拘也。爻辰在巳，巳爲蛇，蛇之蟠屈以徽墨也」。^④三五互體，艮文與震同體，^⑤艮爲門闕，於木爲多節。震之所爲，有叢拘之類。門闕之內有叢木多節之木，是天子外朝左右九棘之象也。外朝者，所以詢事之處也。左嘉石平罷民焉，右肺石達窮民焉。罷民，邪惡之民也。上六乘陽，有邪惡之罪，故縛約徽墨，^⑥置于叢棘，而後公卿以下議之。其害人者，置之圜土而施職事焉，以明刑恥之。能復者，上罪三年而赦，中罪二年而赦，下罪一年而赦。不得者，不自思以得正道，終不自改而出圜土者殺，故凶「是也」。○注「自嫌」至「不敢去」。○解云：莊二十四年曹羈之下，傳云：「三諫不從，遂去之，故君子以爲得君臣之義也。」何氏云：「孔子曰：『所

謂大臣者，以道事君，不可則止。」此之謂也。諫必三者，取月生三日成魄，臣道就也。」以此言之，則知待放之臣三年乃去者，亦取月生三日成魄，臣道就之義故也。君放之，非也。曰無去是，非也。大夫待放，正也。聽君不去衛正也。^⑦【疏】「君放之，非也。大夫待放，正也。」○解云：此二句皆是今事，非古法。古者臣有大喪，則君三年不呼其門。重奪孝子之恩也。禮，父母之喪三年不從政，齊衰大功

①「狐」，宋本《釋文》作「孤」。

②「蜀」，宋本《釋文》作「燭」。

③「古者」上，閩本有「注」字，當是。

④「巳爲蛇蛇之蟠屈以徽墨也」，阮校：「閩本同，監、毛本『蛇』作『蛇』，『墨』改『纏』。浦鏜云：『似』誤『以』。」

⑤從《玉海》校。孫校：《詩》疏十二引鄭《易》注「墨」作「纏」。

⑥「文」，阮校：「浦鏜云：『又』誤『文』。從李氏《集解》校。」

⑦「縛」，孫校：「《詩》疏十二之一引作『縛』，以此『縛』作『縛』誤。」

⑧「衛」，阮校：「按：『衛』蓋『是』字誤，或當作『爲』。」

之喪三月不從政，故孔子曰：「夏后氏三年之喪，既殯而致事，殷人既葬而致事，周人卒哭而致事。」^①君子不奪人之親，亦不可奪親也。【疏】注「禮父」至「不從政」。○解云：《禮記·王制》文也。此政，謂稅矣。○注「故孔子」至「卒哭而致事」。○解云：《曾子問》文。鄭云「致事者，還其職位於君」是也。○注「君子」至「親也」。○解云：亦《曾子問》文。彼云：「君子不奪人之親，亦不可奪親也，此之謂乎？」鄭云「二者恕也，孝也」者是。已練可以弁冕，此說時衰正失，^②非謂禮當然。弁，禮所謂皮弁、爵弁也。皮弁，武冠。爵弁，文冠。夏曰收，殷曰尋，周曰弁。加旒曰冕，主所以入宗廟。○尋，況甫反。【疏】注「夏曰」至「曰弁」。○解云：即《郊特牲》云「周弁，殷尋，夏收」是也。○注「加旒曰冕」。○解云：何氏以爲弁冕之形制一耳，但加旒爲異矣。○注「主所以入宗廟」。○解云：以其文冠故也。服金革之事。謂以兵事使之。君使之，非也。非古道也。臣行之，禮也。臣順爲命，^③亦禮也。此與君放之非，臣待君放正同，故引同類相發明。閔子閔子騫，以孝聞。【疏】注「閔子騫以孝聞」。○解云：出《論語》也。要絰而服

事。禮，已練，男子除乎首，婦人除乎帶。○要，一遙反。【疏】注「禮已」至「乎帶」。○解云：《問傳》文。「孔子蓋善之也」者，「蓋」猶「是」也。^④言於此三事，孔子皆善之。其三事者，初則要絰而服事，次則謂君爲古者，後則退而致事是也。^⑤既而曰：「若此乎，古之道不即人心？」既，事畢。言古者，不敢斥君。即，近也。退而致仕。退，退身也。致仕，還祿位于君。孔子蓋善之也。善其服事，外得事君之義，致仕，內不失親親之恩。言古者，又孫順不訕其君也。不言君子者，時賢者多以爲非，唯孔子以爲是。○孫，音遜。

①「周人卒哭而致事」，阮校：「今本《曾子問》無此文。此與岳珂《九經三傳沿革例》引興國本合。段玉裁說。」

②「時」，原作「詩」，據余本、京都本、閣本改。

③「爲」，余本、鄂本作「君」。

④「是」，杉浦校：「單疏鈔本作『皆』。按：下文云『言於此三事孔子皆善之』，則此作『皆』義爲長。」

⑤「事」，京都本、再造善本作「仕」。杉浦校：「單疏鈔本、毛本作『仕』。按：當作『仕』。」

公會齊侯于平州。

公子遂如齊。

六月，齊人取濟西田。外取邑不書，

此何以書？據曹取之不書。○濟，子禮反。【疏】注

「據曹取之不書」。○解云：即僖三十一年「取濟西田」，傳云：「惡乎取之？取之曹也。曷為不言取之曹？諱

取同姓之田也。此未有伐曹者，則其言取之曹何？晉

侯執曹伯，班其所取侵地于諸侯也。晉侯執曹伯，班其

所取侵地于諸侯，則何諱乎取同姓之田？久也。何氏

云：「魯本為霸者所還，當時不取，久後有悔，更緣前語取

之，不應復將，^①故當坐取邑。」其濟西田本魯物而曹取

之，不書之矣。所以賂齊也。魯所以賂遺齊，故稱

人，共國辭。○遺，唯季反。【疏】注「魯所」至「國辭」。

○解云：謂「人」字，齊、魯共有，何者？魯人篡弑，以

地賂人，齊人失所，取篡者之賂，皆合稱人故也。曷為

賂齊？據上無戰伐，無所謝。【疏】注「據上」至「所

謝」。○解云：正決哀七年「秋，公伐邾婁。八月，己酉，

人邾婁，以邾婁子益來」。^②八年「夏，齊人取讎及僎」，^③

傳云：「外取邑不書，此何以書？所以賂齊也。曷為賂

齊？為以邾婁子益來也。」然則此文之上，不見戰伐之文，應無所謝，曷為以地賂齊乎？^④故難之。為弑子

赤之賂也。子赤，齊外孫，宣公篡弑之，恐為齊所誅，

為是賂之，故諱使若齊自取之者，亦因惡齊取篡者賂，當

坐取邑。未之齊坐者，由律行言許受賂也。^⑤月者，惡內

甚于邾婁子益。【疏】注「子赤齊外孫」。○解云：文公四

年經書「娶于齊」而生也。○注「未之」至「受賂也」。○

解云：十年「齊人歸我濟西田」，傳云：「齊已取之矣，其

言我何？言我者，未絕于我也。曷為未絕于我？齊已

言取之矣，其實未之齊也。」何氏云：「齊已言語許取之，

^①「不應復將」，阮校：「『將』字，監、毛本作『得』，此誤。按：僖三十一年注作『不應復得』。」

^②「以邾婁」，原脫。杉浦校：「單疏鈔本、毛本有『以邾婁』三字。」今按：有「以邾婁」三字與哀公七年經合，據補。

^③「僎」，原作「禪」，今據哀公八年經及單疏鈔本、京都本、再造善本改。

^④「地」，原作「也」，今據京都本、再造善本、中華本、閣本改。

^⑤「受賂」，阮校：「十年疏引『受賂』作『受財』。」

其人民貢賦尚屬於魯，實未歸於齊。不言來者，明不從齊來，不當坐取邑。」是以知其未之齊矣。○注「月者」至「子益」。○解云：哀八年「夏，齊人取譚及鄆」，傳云：「外取邑不書，此何以書？」所以賂齊也。曷為賂齊？為以邾婁子益來也。」彼注云：「邾婁，齊與國，畏為齊所怒而賂之，恥甚，故諱使若齊自取。」然則彼為侵奪小國而賂齊，此為篡適而賂齊，罪重於彼，是以書月以諱其惡，故云「月者，惡內甚於邾婁子益」矣。

秋，邾婁子來朝。

楚子、^①鄭人侵陳，遂侵宋。微者不得言「遂」。遂者，楚子之遂也。不從鄭人去遂者，兵尊者兼將。○將，子匠反。【疏】注「微者」至「之遂也」。○解云：正以「遂」者，專事之文也，是以僖二十五年注云「微者不別遂，但別兩耳」是也。^②其若大例不合遂，^③若其竟外有利國家之事，亦權許之，即莊十九年「秋，公子結媵陳人之婦于鄆，遂及齊侯、宋公盟」下，傳云「大夫無遂事，此其言遂何？」聘禮，大夫受命不受辭。出竟，有可以安社稷利國家者，則專之可也」是。

晉趙盾帥師救陳。宋公、陳侯、衛侯、

曹伯會晉師于斐林，伐鄭。此晉趙盾之師也，據上趙盾救陳，微者不能會諸侯。○斐，芳尾反。

【疏】注「微者」至「諸侯」。○解云：謂若是微者，即不能為會主，以致諸侯于斐林而會之。曷為不言趙盾之師？據公子遂會晉趙盾于衡雍，伊維戎盟再出名氏。【疏】注「據公子」至「名氏」。○解云：即文八年「冬，十月，壬午，公子遂會晉趙盾盟于衡雍。乙酉，公子遂會伊維戎盟于暴」是。君不會大夫之辭也。時諸侯為趙盾所會，不與卑致尊，故正之。去大夫名氏，使若更有師也。殊會地之者，起諸侯為盾所會。【疏】注「殊會」至「所會」。○解云：言殊會者，正謂先序諸侯訖，乃言會晉師是也。所以不言宋公、陳侯、衛侯、曹伯帥師伐鄭，而先言會晉師于斐林，乃言伐鄭者，若以趙盾之師先在是，致諸侯來會之然也，故曰「起諸侯為盾所會」耳。

①「楚子」，阮校：「鄂本作『楚人』。」

②「兩」下，阮校：「浦鏜云脫『稱』，是也。」

③「其若大例」，閣本作「其大夫例」。今按：「大」下當脫「夫」字。

冬，晉趙穿帥師侵柳。^①柳者何？天

子之邑也。天子之閒田也，有大夫守之，晉與大夫忿

侵之。○閒，音閑。【疏】「柳者何」。○解云：欲言是國，

又復未聞，欲言是邑，文無所繫，故執不知問。曷爲不

繫乎周？據王師敗績于貿戎繫王。○貿，音茂。

【疏】注「據王」至「繫王」。○解云：即成元年「秋，王師敗

績于貿戎」是也。^②不與伐天子也。絕正其義，使

若兩國自相伐。【疏】注「絕正其義」。○解云：謂絕柳不

使繫之於王，所以正君臣之義也。

晉人、宋人伐鄭。

二年，春，王二月，壬子，宋華元帥師

及鄭公子歸生帥師戰于大棘。宋師敗績，

獲宋華元。復出宋者，非獨惡華元，明恥辱及宋國。

○華，戶化反。【疏】「宋華」至「華元」。○解云：宋、鄭皆

言帥師者，其將皆尊，其師皆衆故也。

秦師伐晉。秦稱師者，閔其衆，惡其將。本秦

之忿，^③起穀之戰，今襄公、繆公已死，可以止矣，而復伐

晉，惡其構怨結禍無已。【疏】注「秦稱」至「其將」。○解

云：正以文十二年「秦伯使遂來聘」，始有大夫，宜見將之名氏。若其貶之，宜稱人。稱國而言師者，正以閔其衆，惡其將故也。○注「本秦」至「之戰」。○解云：在僖三十三年夏。○注「今襄」至「已死」。○解云：即文六年「晉侯謹卒」，文十八年「秦伯罃卒」是也。

夏，晉人、宋人、衛人、陳人侵鄭。

秋，九月，乙丑，晉趙盾弑其君夷獯。

○夷獯，戶刀反，又古刀反，二傳作「夷臯」。

冬，十月，乙亥，天王崩。匡王。【疏】注

「匡王」。○解云：即三年春，「葬匡王」是也。

三年，春，王正月，郊牛之口傷，改卜

牛。牛死，乃不郊，猶三望。其言「之」

何？據食角不言「之」。【疏】注「據食角不言之」。○

解云：即成七年「春，王正月，饾鼠食郊牛角。改卜牛，饾

①「侵柳」，阮校：「《左氏》、《穀梁》作「侵崇」。」

②「成」，原作「戎」，今據閣本改。

③「本」，原作「木」，今據余本、京都本、再造善本、中華本、閣本改。

鼠又食其角，乃免牛」是也。緩也。辭間容之，故爲

緩，不若食角急也，別天牲主以角。書者，譏宣公養牲不謹敬，不繫清而災。重事至尊，故詳錄其簡甚。【疏】注

「不若食角急也」。○解云：言食角之時，正以有不順之處，爲天所災，不敬簡慢，故不言之耳。○注「別天牲主

以角」。○解云：即《王制》云「祭天地之牛角繭栗，宗廟之牛角握，賓客之牛角尺」是。○注「重事」至「簡甚」。

○解云：正謂言「之」是也。何者？「之」爲緩辭，故以簡慢之甚言矣。言「簡」者，欲取《五行傳》云「簡宗廟之言」

耳。曷爲不復卜？據定十五年牛死改卜牛。【疏】

注「據定」至「卜牛」。○解云：據彼經云：十五年春，王

正月，「饌鼠食郊牛，牛死，改卜牛」是也。養牲養二

卜。二卜語在下。帝牲不吉，帝，皇天大帝，在北辰

之中，主總領天地五帝群神也。不吉者，有災。【疏】注

「帝皇」至「有災」。○解云：在北辰之中者，言其北辰之

處，^①紫微宮內也。云總領天地五帝群神也者，^②總領天

地之內五帝群臣也。^③其五方之帝，東方青帝靈威仰之

屬，是其五帝之名，《春秋緯·文耀鉤》具有其文。則扳

稷牲而卜之。先卜帝牲養之，有災，更引稷牲卜之，

以爲天牲養之，凡當二卜爾。復不吉，不復郊。○扳，普

顏反，又甫姦反。【疏】注「更引」至「天牲」。○解云：即

定十五年「牛死，改卜牛」者，正謂此。帝牲在于滌

三月。滌，宮名，養帝牲三牢之處也。謂之滌者，取其

蕩滌潔清。三牢者，各主一月，取三月一時，足以充其天

牲。○于滌，大歷反，養牲宮名。【疏】注「養帝」至「之

處」。○解云：其三牢之文，出《春秋說》文。於稷者，

唯具是視。視其身體具無災害而已，不特養于滌宮，

所以降稷尊帝。郊則曷爲必祭稷？據郊者主爲

祭天。王者必以其祖配。祖謂后稷，周之始祖，姜

嫫履大人迹所生。配，配食也。【疏】注「姜嫫」至「所

生」。○解云：即《詩》云「履帝武敏歆」文。《周本紀》云

「有邰氏女曰姜嫫，爲帝譽元妃。出野，見巨人迹，心忻

^①「其」，單疏鈔本、京都本、再造善本、閣本作「在」。杉

浦校：「當作『在』」。

^②「天地」，原重文，此述何注，「天地」不當重，今據單疏

鈔本刪。

^③「臣」，阮校：「閩、監、毛本『臣』作『神』，是也。」

然說，欲踐之。踐之身動，如孕者，居期而生子，以爲不祥，棄之隘巷，或棄山林寒冰之上」云云，「姜嫄以爲神，遂收養長之。初欲棄之，因名曰棄」是也。王者則曷

爲必以其祖配？據方父事天。【疏】注「據方父事

天」。○解云：言既以爲父，特祭何嫌而要須以祖配祭之乎？故難之。自內出者，無匹不行。匹，合也。

無所與會合則不行。自外至者，無主不止。必得

主人乃止者，天道闇昧，故推人道以接之。不以文王配

者，重本尊始之義也。故《孝經》曰：「郊祀后稷以配天，

宗祀文王於明堂以配上帝。」上帝，五帝，在太微之中，迭

生子孫，更王天下。書改卜者，善其應變得禮也。○迭，

大結反。更王，音庚，下于況反。【疏】注「必得」至「接

之」。①○解云：正謂天之精神靈不明察矣。②○注「上

帝」至「禮也」。○解云：此五帝者，即靈威仰之屬。言在

太微宮內迭王天下，即《感精符》云「蒼帝之始，二十八

世，滅蒼者翼也」，彼注云：「堯，翼之星精，在南方，其色

赤。」「滅翼者斗」，注云：「舜，斗之星精，在中央，其色

黃。」「滅斗者參」，注云：「禹，參之星精，在西方，其色

白。」「滅參者虛」，注云：「湯，虛之星精，在北方，其色

黑。」「滅虛者房」，注云：「文王，房星之精，在東方，其色青。」「五星之謀」，③是其義。

葬匡王。

楚子伐賁渾戎。④○賁渾，舊音六，或音奔，

下戶門反。二傳作「陸渾」。【疏】「葬匡王」。○解云：天

子記崩不記葬，今而書者，正以去年「十月天王崩」，至今

年春未滿七月，即文九年傳曰：「王者不書葬，此何以

書？不及時書，過時書，我有往者書。」然則此未滿七

月，所謂不及時書也。

夏，楚人侵鄭。

秋，赤狄侵齊。

宋師圍曹。

冬，十月，丙戌，鄭伯蘭卒。葬鄭繆

①「接」，原作「主」，何注作「接之」，今據中華本、閩本改。

②「不」，阮校：「疑衍。」

③「謀」，阮校：「按：『謀』當『精』字之誤。」

④「楚子伐賁渾戎」，阮校：「案：毛本此句別分一節，以『葬匡王』疏係『葬匡王』下。」

公。葬不月者，子未三年而弑，故略之也。^①○繆，音穆。【疏】注「葬不月」至「之也」。○解云：即下四年「夏，六月，乙酉，鄭公子歸生弑其君夷」是也。然則《春秋》之內，卒日葬月，大國之常。今而不月，故爲此解，似若定公十三年「春，^②薛伯定卒」，何氏云「不日月者，子無道當廢之，而以爲後，未至三年，失衆見弑，危社稷宗廟，禍端在定，故略之」之類也。考諸舊本皆無注，然則有者，衍字耳。而不月者，與卒同月故也，即隱三年傳云「不及時而不日，慢葬」，何氏云「慢薄，不能以禮葬」是也。然則薛伯定之子是失衆見弑者，即定十三年「薛弑其君比」，稱國以弑是也。今此繆公之子，爲公子歸生弑之，非失衆之文，是以經書「冬，十月，丙戌，鄭伯蘭卒」，而不略之。以此言之，有注者非也。

四年，春，王正月，公及齊侯平莒及邾。莒人不肯，公伐莒，取向。此平莒也，其言「不肯」何？據取汶陽田不言棘不肯。【疏】注「據取汶」至「不肯」。○解云：即成二年秋「取汶陽田」，至三年「秋，叔孫僑如率師圍棘」，傳云「棘者何？汶陽之不服邑也。其言圍之何？不聽也。何不聽也」，^③何

氏云「不聽者，叛也。不言叛者，爲內諱，故書圍以起之」是也。辭取向也。爲公取向作辭也。恥行義爲利，故諱使若莒不肯起其平也，^④聽公平，伐取其邑，以弱之者，愈也。莒言「及」者，明非莒不肯起其平也。書「齊侯」者，公不能獨平也。月者，惡錄之。○公爲，于僞反。【疏】注「莒言及」至「其平也」。○解云：正以「及」是汲汲之意，亦見直之義，故如此解。○注「月者惡錄之」。○解云：正以定十一年「冬，及鄭平」，知平例不月。今而書月，故以爲惡錄之。若然，定十年「春，王三月，及齊平」而書月，何氏云「月者，賴谷之會，齊侯欲執定公，故不易」是也。又昭七年「春，王正月，暨齊平」而書月，何氏云「月者，刺內暨暨也。時魯方結婚于吳，外慕強楚，故不汲汲于齊」是也。

- ① 「故略之也」，阮校：「鄂本無『也』，此衍。」
- ② 「三」，杉浦校：「單疏鈔本作『二』，與定十二年經合。」
- ③ 「何不聽也何不聽也」，阮校：「浦鏜云：下衍『何不聽也』四字。是也。」
- ④ 「起其平也」，阮校：「鄂本無，諸本皆涉下誤衍，當刪正，讀『故諱使若莒不肯聽公平』爲一句。」

秦伯稻卒。

夏，六月，乙酉，鄭公子歸生弑其

君夷。

赤狄侵齊。

秋，公如齊。公至自齊。

冬，楚子伐鄭。

五年，春，公如齊。

夏，公至自齊。

秋，九月，齊高固來逆子叔姬。

叔孫得臣卒。不日者，知公子遂欲弑君，為人

臣知賊而不言，明當誅。【疏】「秋九月」至「叔姬」。○解

云：「隱二年注云『親逆例時』，知此月爲下卒出，高固不蒙

月也。○注「不日」至「當誅」。○解云：「正以所聞之世，

大夫之卒，無罪者日，有罪者月，今此不日，故解之。但

推尋上下，更不見得臣有罪之文，惟有文十八年「秋，公

子遂，叔孫得臣如齊」，冬十月公子遂弑子赤，是以何氏

消量作如此解。

之來？據當舉叔姬爲重，大夫私事不當書。○爲重，

直用反，下同。【疏】注「據當」至「爲重」。○解云：「正以

《春秋》尊內故也。○注「大夫」至「當書」。○解云：「正以

內之大夫，直錄其如，不書其大夫私事故也。今書高固，

是以難之。言叔姬之來，而不言高固之來，則

不可。禮，大夫妻歲一歸宗。叔姬屬嫁而與高固來，如

但言叔姬來，而不言高固來，則魯負教戒重，不可言，故

書高固，明失教戒重在固。言「及」者，猶公及夫人。

【疏】注「故書」至「在固」。○解云：「婦人之道，既嫁從夫

故也。○注「言及」至「夫人」。○解云：「即僖十一年「夏，

公及夫人姜氏會齊侯于陽穀」是也。然則《公羊》之義，

以爲夫妻言「及」者，遠別之稱，刺其無別，是以下注云

「言其雙行匹至，似於鳥獸」是也。故桓十八年春，「公夫

人姜氏遂如齊」，傳云「公何以不及夫人」，^①注云：「據公

及夫人會齊侯于陽穀。」「夫人外也」，注云：「若言夫人已

爲公所絕外也。」傳云「夫人外者何？」^②內辭也」，注云：

^① 「不」下，阮校：「浦鏜云：脫「言」字。是也。」

^② 「傳云」，阮校：「二字當衍，何校本無。」

「內爲公諱辭。」其實夫人外公也，注云：「時夫人淫於齊侯而譖公，故云爾。」然則桓公十八年而不言及者，若言夫人爲公所絕外，是以不得言及以遠之。子公羊

子曰：「其諸爲其雙雙而俱至者與？」言其雙行匹至，似於鳥獸。【疏】注「言其」至「鳥獸」。○解云：言其無別，如「雄狐綏綏」，故曰「雙行」。游匹而來，鵲鵲不異，故言「匹至，似於鳥獸」矣。而舊說云「雙雙之鳥，一身二首，尾有雌雄，隨便而偶，常不離散，故以喻焉」，非何氏意也。

楚人伐鄭。

六年，春，晉趙盾、衛孫免侵陳。趙盾

弑君，此其復見何？據宋督、鄭歸生、齊崔杼弑其君，後不復見。○見何，賢偏反。【疏】注「據宋督」至「不復見」。○解云：其宋督之事，即桓二年「春，王正月，戊申，宋督弑其君與夷，及其大夫孔父」者是也。歸生之事，上四年「夏，六月，乙酉，鄭公子歸生弑其君夷」是也。崔杼之事，即襄二十五年「夏，五月，齊崔杼弑其君光」是也。然則《春秋》之內，書名弑君，後不復見者，唯此三人耳。餘見者，皆著義焉，即桓三年「公子翬如齊逆女」，宣

元年「公子遂如齊逆女」之屬，欲見罪在桓、宣，故翬，遂得見。閔二年「公子慶父出奔莒」書者，彼注云「慶父弑二君，不當復見。所以復見者，起季子緩追逸賊」是也。隱四年「衛人殺州吁于濮」，彼注云「書者，善之也」。然則善其臣子討得其賊，是以書見，則知莊九年「齊人殺無知」書之者，亦是討得其賊，善而書之。莊十二年「宋萬出奔陳」得書之者，彼注云「萬弑君，所以復見者，重錄彊禦之賊，明當急誅之也」是也。僖十年夏「晉殺其大夫里克得書之者，亦翬、遂之類也。故彼傳云：「里克弑二君，則曷爲不以討賊之辭言之？」惠公之大夫也。」何氏云：「惠公篡立已定，晉國君臣合爲一體，無所復責，故曰此乃惠公之大夫，安得以討賊之辭言之？」然則欲歸惡於惠公，尚不作討賊之辭，何得怪其見于經矣。襄二十七年「衛殺其大夫甯喜」得書之，亦翬、遂之類也，是見其與獻公同謀而弑剽，是以二十六年弑剽之下，何氏云「甯喜爲衛侯弑剽，不舉弑剽者，諛成於喜」是也。其二十六年「晉人執甯喜」之下，傳云「不以其罪執之也」，何氏云「明不得以爲功，當坐執人」，亦是其得書之義。文十八年「齊人弑其君商人」，昭十一年「楚子虔誘蔡侯般，殺之于申」，皆書者，商人之下，何氏云「商人弑君賊，復

見者，與大夫異。齊人已君事之，殺之宜當坐弑君」是也。昭十三年「楚公子棄疾弑公子比」得書者，亦是加弑故也，如趙盾之類矣。親弑君者，趙穿也。復見趙盾者，欲起親弑者趙穿，非盾。親弑君者趙穿，則曷爲加之趙盾？不討賊也。何以謂之不討賊？據皆去葬不加弑。^①【疏】注「據皆去葬不加弑」。^②○解云：《春秋》之義，君弑賊不討，則不書葬，所以責臣子不討賊。若其加弑者，雖不討賊，亦書其葬，以其不親弑，不責臣子之討賊，是以昭十九年夏「許世子止弑其君買」，「冬，葬許悼公」，傳云「賊未討，何以書葬？不成于弑也。曷爲不成于弑？止進藥而藥殺也。止進藥而藥殺，則曷爲加弑焉爾？譏子道之不盡也。是以君子加弑焉爾。葬許悼公，是君子之赦止也。赦止者，免止之罪辭也」是也。然則此趙盾之弑君，與他親弑者同文，皆去其葬，則趙盾不加弑，趙盾既不加弑，即其身是賊，何得謂之不討賊乎？故難之。晉史書賊曰：「晉趙盾弑其君夷獯。」趙盾曰：「天乎！無辜！辜，罪也。呼天告冤。」【疏】注「呼天告

冤」。○解云：冤，謂冤枉之冤也。吾不弑君！誰謂吾弑君者乎？」史曰：「爾爲仁爲義，人弑爾君，而復國不討賊，此非弑君如何？」復，反也。趙盾不能復應者，明義之所責，不可辭。

趙盾之復國奈何？靈公爲無道，使

諸大夫皆內朝。禮，公族朝於內朝，親親也。雖有富貴者，^③以齒，明父子也。外朝以官，體異姓也。宗廟之中，以爵爲位，崇德也。宗人授事以官，尊賢也。升餒受爵以上嗣，^④尊祖之道也。喪紀以服之精粗爲序，不奪人之親也。○餒，音俊。【疏】注「禮公族」至「之親也」。○解云：此皆《文王世子》文。彼注云：「內朝，路寢廷

①「葬」下，阮校：「鄂本有「日」字。」

②「注」上，杉浦校：「單疏鈔本有「何以謂之不討賊」七字，下空一格。蓋標明傳文也。」

③「富」，阮校：「鄂本無「富」字，此衍。按：《禮記·文王世子》無「富」字。」

④「升」，阮校：「按：《文王世子》「升」作「登」。「餒」，原作「酸」，余本、閩本、監本、毛本、閩本、宋本《釋文》作「餒」，本疏引亦作「餒」，今據改。」

也。」云「雖有貴者，以齒，明父子也」，彼注云：「謂以宗族事會也。」云「外朝以官，體異姓也」者，彼鄭氏云：「外朝，路寢門之外廷。體猶連結也。」云「宗廟之中，以爵爲位，崇德也」者，鄭氏云：「崇，高也。以爵貴賤異位。」云「宗人授事以官，尊賢也」者，鄭氏云：「宗人掌禮及宗廟也。以官，官各有所掌也。若司徒奉牛，司馬奉羊，司空奉豕。」云「升餽受爵以上嗣，尊祖之道也」者，彼文云：「其登餽獻爵，^①則以上嗣，尊祖之道也。」注云：「上嗣，祖之正統。爵謂上嗣舉奠也。」今此何氏以「登」爲「升」，復無「獻」字，蓋所見異也。云「喪紀以服之精粗爲序，不奪人之親也」者，彼文作「輕重」字，此作「精粗」者，亦所見異也。其上文云「其公大事」，^②則以其喪服之精粗爲序，注云「大事，謂死喪也。其爲君雖皆斬衰，序之必以本親也」是也。然後處乎臺上，引彈而彈之，已趨而辟丸。己，己諸大夫也。○己，音紀。是樂而已矣。以是爲笑樂。○是樂，音洛。趙盾已朝而出，與諸大夫立於朝。有人荷畚荷，負也。^③畚，草器，若今市所量穀者是也，齊人謂之鍾。○有人何，本又作「荷」，胡可反，又音何。^④畚，音本。【疏】注「齊人謂之

鍾」。○解云：即昭三年《左傳》云「齊舊四量：豆、區、釜、鍾」是也。自閨而出者，宮中之門謂之閨，其小者謂之閨。從內朝出立于外朝，見出閨者，知外朝在閨外，內朝在閨內可知。【疏】注「宮中」至「之閨」。○解云：《釋宮》文。孫氏曰「閨者，宮中相通小門也。其小者謂之閨，小閨謂之閨」，李氏曰「皆門戶大小之異」是也。趙盾曰：「彼何也？夫畚曷爲出乎閨？」彼何者，始怪何等物之辭，熟視知其爲畚。乃言夫畚者賤器，何故乃出尊者之閨乎？^⑤呼之不至，怪而呼，欲問之。曰：「子，大夫也，欲視之，則就而

① 「爵」，阮校：「惠校本『爵』上增『受』字，下『爵謂上嗣舉奠』之上亦增『受』字。」杉浦校：「單疏鈔本『爵』上有『受』字，下『爵謂』之上亦有『受』。按：今《禮記》作『受爵』。」

② 「上」，阮校：「當作『下』。」

③ 「也」，原作「何」，今據余本、京都本、再造善本、中華本、閣本改。

④ 「何」，閣本、宋本《釋文》作「河」。

⑤ 「乃」，余本作「而」。

視之。」顧君責己以視人，欲以見就爲解也。古者士大夫通曰子。○解，佳賣反，又如字。趙盾就而視之，則赫然死人也。赫然，已支解之貌。趙盾曰：「是何也？」曰：「膳宰也。主宰割殺膳者，若今大官宰人。熊蹯不熟，蹯，掌。公怒，以斗擎而殺之，擎，猶擎也。擎，謂旁擊頭項。○擎，五羔反，又苦交反，猶擎也。擎，口弔反，擊也。支解，將使我棄之。」趙盾曰：「嘻！」趨而入。靈公望見趙盾，愬而再拜。愬者，驚貌。禮，臣拜然後君答拜。靈公先拜者，奮出盾入，知其欲諫，欲以敬拒之，使不復言也。禮，天子爲三公下階，卿前席，大夫興席，士式几。○愬，所革反，又訴路反。【疏】注「禮天」至「式几」。①○解云：《春秋說》文。亦時王禮也。趙盾逡巡北面再拜稽首，頭至地曰稽首，頭至手曰拜手。【疏】注「頭至地」至「拜手」。○解云：出《大祝》文。趨而出。本欲諫君，君以拜謝知己意，冀當覺悟，②故出。靈公心忤焉，忤，慙貌。慙盾知己過。○忤，在洛反。

欲殺之。於是使勇士某者往殺之。某者，本有姓字，記傳者失之。勇士入其大門，則無人門焉者。③人其閨，則無人閨焉者。焉者，於也。是無人於閨、門守視者也。上其堂，則無人焉。但言焉，絕語辭。堂不設守視人，故不言堂焉者。④俯而闚其戶，俯，挽頭。⑤戶，室戶。方食魚殮。勇士曰：「嘻！子誠仁人也。吾入子之大門，則無人焉。人子之閨，則無人焉。上

①「式」，原作「士」，何注作「士式几」，今據中華本、閩本改。

②「悟」，阮校：「鄂本作「寤」。蓋「覺寤」字當作「寤」，猶人寐而覺寤也。」

③「無人門焉者」，阮校：「唐石經、諸本同。段玉裁云：此當作「焉門者」，下當作「焉閨者」，故注云：「焉者，於也，是無人於閨門守視者也。」今本誤倒。」

④「堂焉者」，阮校：「鄂本無「焉」，段玉裁云：當作「焉堂者」。」

⑤「挽」，阮校：「鄂本「挽」作「俛」，當據正。」

子之堂，則無人焉。是子之易也。易猶省也。

○殮，音孫。子爲晉國重卿，而食魚殮，是子

之儉也。君將使我殺子，吾不忍殺子也。

雖然，吾亦不可復見吾君矣。」負君命也。遂

刎頸而死。勇士自斷頭也。傳極道此者，明約儉之

衛也，^①甚於重門擊柝。^②孔子曰：「禮與其奢也，寧

儉。」此而謂也。^③○頸，居郢反。斷，音短。重，直容反。

柝，他洛反。【疏】注「傳極」至「謂也」。○解云：《易·下

繫辭》云「重門擊柝，以待暴客」是也。靈公聞之，

怒，滋欲殺之甚，滋猶益也。衆莫可使往者。

於是伏甲于宮中，召趙盾而食之。趙盾之

車右祁彌明者，國之力士也。禮，大夫驂乘，有

車右，有御者。○而食，音嗣，下同。祁，工支反。屹然

從乎趙盾而入，^④屹然，壯勇貌。○屹，魚乙反。

放乎堂下而立。嫌靈公復欲殺盾，故人以爲意。

《禮器·記》曰：天子堂高九尺，諸侯七尺，大夫五尺，士

三尺。趙盾已食，靈公謂盾曰：「吾聞子之

劍，蓋利劍也。子以示我，吾將觀焉。」授君

劍，當拔而進其首，靈公因欲以推殺之。趙盾起，將

進劍，祁彌明自下呼之曰：「盾！食飽則

出，何故拔劍於君所？」趙盾知之，由人曰「知

之」，自己知曰「覺」焉。【疏】注「由人」至「覺焉」。○解

云：「由人曰知之」，此文是也。「自己知曰覺」者，即昭三

十一年傳云「夏父曰：『以來，人未足，而盱有餘。』」叔術覺

焉，曰：「嘻！此誠爾國也夫。」起而致國于夏父」是也。

①「也」，阮校：「鄂本無，此誤衍。」

②「甚」，原作「其」，今據余本、中華本、閩本改。

③「而」，阮校：「鄂本『而』作『之』，當據正。」

④「屹然從乎趙盾而入」，阮校：「唐石經、諸本同。《經

義雜記》曰：『《鄉飲酒禮》《賓西階上，疑立」，注：

「疑讀爲『疑然從於趙盾』之『疑』。疑，正立自定之

貌。」則鄭所據《公羊》『屹然』作『疑然』。按：『乎』作

蹶階而走。^①蹶猶超遽不暇以次。○蹶，丑略反，與

蹶同，一本作「走」，音同。劇不，其據反，本亦作「遽」。

靈公有周狗，^②周狗，可以比周之狗，所指如意。○

比，毗志反。謂之獒，犬四尺曰獒。○獒，五刀反。

【疏】注「犬四尺曰獒」。○解云：《釋畜》文。呼獒而

屬之，獒亦蹶階而從之。祁彌逆而蹶

之，以足逆蹶曰蹶。○蹶，音存，以足逆蹶之。蹶，徒臘

反。【疏】「呼獒而屬之」。○解云：謂呼而指屬之。今呼

犬謂之屬，義出於此。絕其領。^③領，口。○領，戶感

反。趙盾顧曰：「君之獒，不若臣之獒

也！」然而宮中甲鼓而起。甲即上所道伏甲，約

勒聞鼓聲當起殺盾。有起于甲中者，抱趙盾而

乘之。欲趨疾走。趙盾顧曰：「吾何以得此

于子？」猶曰「吾何以得此救急之恩於子邪」，非所以

意悟。曰：「子某時所食活我于暴桑下者

也。」某時者，記傳者失之。暴桑，蒲蘇桑。傳道此者，

明人當素積恩德。趙盾曰：「子名爲誰？」後欲

報之。曰：「吾君孰爲介？介，甲也。猶曰「我晉

君誰爲興此甲兵，豈不爲盾乎」。子之乘矣！何

問吾名？」之乘，即上車也。猶曰「子以上車矣」，何

不疾去，而反徐問吾名乎」。欲令蚤免去，不望報矣。○

蚤，音早。趙盾驅而出，衆無留之者。明盾賢

人，不忍殺也。且靈公無道，民衆不悅，以致見殺。趙

穿緣民衆不說，起弑靈公，然後迎趙盾而

①「蹶階」，阮校：「唐石經、諸本同。《釋文》：「蹶，與

蹶同，一本作「走」，音同。《經義雜記》曰：「《說文》

「走，乍行乍止也，從彳從止，讀若《春秋公羊傳》曰

「走階而走」。《釋文》謂「一本作走」，與《說文》正合，

則古本《公羊》作「走階」矣。」

②「靈公有周狗」，阮校：「唐石經、諸本同。何注云「可

以比周之狗」。按：《爾雅·釋畜》「狗四尺爲獒」，郭

注：「《公羊傳》曰：靈公有害狗，謂之獒也。」又宋本

張華《博物志》云：「晉靈公有害狗。」「害」與「周」形

相近，故文異。害狗謂能害人之狗。」

③「絕其領」，阮校引段玉裁云：「《玉篇》引作「絕其

領」。」

④「以」，阮校：「鄂本作「已」。」

人，與之立于朝，復大夫位也。即所謂復國不討賊，明史得用責之。傳極道此上事者，明君雖不君，臣不可以不臣。○不說，音悅。而立成公黑臀。不書者，明以惡夷獯，猶不書剽立。○臀，徒門反。剽，匹妙反。【疏】注「不書」至「剽立」。○解云：襄公二十六年二月，辛卯，衛甯喜弑其君剽，「甲午，衛侯衎復歸于衛」。^①「然則曷爲不言剽之立？不言剽之立者，以惡衛侯矣」。^②注云：「欲起衛侯失衆出奔，故不書剽立。剽立無惡，則衛侯惡明矣。」然則此處不書黑臀之立，以惡夷獯明矣，故如此解。

夏，四月。

秋，八月，螽。先是宣公伐莒取向，公比如齊所致。【疏】注「先是」至「取向」。^③○解云：在上四年春也。○注「公比如齊」。○解云：即四年「秋，公如齊」，五年「春，公如齊」是也。

冬，十月。

七年，春，衛侯使孫良夫來盟。
夏，公會齊侯伐萊。

秋，公至自伐萊。

大旱。爲伐萊踰時也。○爲，于僞反。【疏】「春衛侯」至「來盟」。^④○解云：不書日月者，桓十四年夏，「鄭伯使其弟語來盟」之下，何氏云：「時者，從內爲王義，明王者當以至信先天下。」然則成三年「冬，十有一月，晉侯使荀庚來聘。衛侯使孫良夫來聘。丙午，及荀庚盟。丁未，及孫良夫盟」，亦是來盟而書日月，彼下注云：「書者，惡之。《詩》曰：『君子屢盟，亂是用長。』」二國既修禮相聘，不能親信，反復相疑，故舉聘以非之。」是其惡，故不舉重而書日月之義也，是當文皆有注解。

冬，公會晉侯、宋公、衛侯、鄭伯、曹伯

- ① 「歸于衛」，阮校：「浦鍾云：下脫『傳云』。是也。」
- ② 「矣」，杉浦校：「單疏鈔本作『也』。」
- ③ 「注先是至取向」，原作「注先君至取向」。中華本作「注先是至取向」，引注起訖與注文合。「取向」，京都本、再造善本作「取向」，今據京都本、再造善本、中華本改。
- ④ 「春衛侯至來盟」，阮校：「此本此節疏在『大旱』下，閔、監、毛本移於經文『七年，春，衛侯使孫良夫來盟』之下。」

于黑壤。

八年，春，公至自會。

夏，六月，公子遂如齊，至黃乃復。其

言「至黃乃復」何？據公孫敖不言「至復」，又不言

「乃」。【疏】注「據公」至「言乃」。○解云：即文八年冬，

「公孫敖如京師，不至復。丙戌，奔莒」是也。有疾也。

乃，難辭也。上言「乃復」，下有「卒」，知以疾為難。○難

辭，乃旦反。何言乎「有疾乃復」？據公如晉以

有疾乃復，弑恥，^①以為有疾無惡。【疏】注「據公如」至

「無惡」。○解云：即昭二十三年「冬，公如晉，至河，公有

疾乃復」，傳云「何言乎公有疾乃復？殺恥也」，注云「因

有疾以殺畏晉之恥」是也。譏。何譏爾？大夫

以君命出，聞喪徐行而不反。聞喪者，聞父母

之喪。徐行者，不忍疾行，又為君當使人追代之。以喪

喻疾者，喪尚不當反，況於疾乎？順經文而重責之。言

乃不言有疾者，有疾猶不得反也。敖不言乃者，明無所

難為重。敖當誅，遂當絕。【疏】注「順經文」至「難為

重」。○解云：正以傳不言大夫以君命出，遇疾而還非禮，

而言聞喪徐行而不反者，是其順經文而重責之故也。○注「敖當誅遂絕」。^②○解云：以敖違命罪大，故當誅。誅者，罪累家也。^③遂前雖弑君，而宣公不以為罪，直以當時行事而責之，責其奉命不終而以疾辭，故當絕其身而已。

辛巳，有事于太廟。

仲遂卒于垂。仲遂者何？據不稱公子，

故問之。公子遂也。自是後無遂卒，知公子遂。何

以不稱公子？據公子季友卒，雖加字，猶稱公子

也。^④【疏】注「據公」至「子也」。○解云：即僖十六年

「三月，壬申，公子季友卒」是也。言「雖加字」者，欲道仲

遂亦加字，而不稱公子矣。貶。曷為貶？據叔孫

得臣卒不貶。【疏】注「據叔」至「不貶」。○解云：即宣五

年秋九月，「叔孫得臣卒」是也。何氏云：「不日者，知公

子遂欲弑君，為人臣知賊而不言，明當誅。」然則得臣與

①「弑」，阮校：「閩、監、毛本「弑」作「殺」，此誤。蓋凡

「殺」字皆改為「弑」，遂誤改此爾。」

②「遂」下，閩本有「當」字，與注文合。

③「累」，原脫，今據京都本、再造善本、中華本、閩本補。

④「也」，阮校：「鄂本無。」

遂同罪，而或貶或否，故難之。為弑子赤貶。然則

曷為不於其弑焉貶？據鞏終隱之篇貶，欲使於

文十八年「子赤卒」年中貶。【疏】注「據鞏」至「中貶」。

○解云：即隱四年「秋，鞏帥師會宋公」以下「伐鄭」，傳云：「鞏何以不稱公子？貶。曷為貶？與弑公也。」十

年「夏，鞏帥師會齊人、鄭人伐宋」，傳云「此公子鞏也，何以不稱公子？貶。曷為貶？隱之罪人也，故終隱之篇

貶也」是也。於文則無罪，於子則無年。此解十

八年秋如齊不貶意也。十八年編於文公貶之，則嫌有罪

於文公，無罪於子赤也。卒乃貶者，元年逆女，嫌為喪娶

貶也。公會平州下如齊也，嫌「公遂」。^①如齊，嫌坐乃復

貶也。貶加字者，起嬰齊所氏，明為歸父後，大宗不得絕

也。地者，絕外卒，^②明當有卒外禮也。日者，不去樂也。

書有事者，為不去樂張本。○編，必連反。【疏】注「元年

逆」至「貶也」。○解云：即上元年「公子遂如齊逆女」，彼

注云「嫌觸諱不成其文也」是也。○注「公會」至「公

遂」。^③○解云：即元年經云，夏，「公會齊侯于平州。公

子遂如齊」是也。若不言公子，直言「遂如齊」，文承公會

於平州之下，嫌謂「公遂如齊」，非公子遂，是以不得去公

子矣。○注「如齊嫌坐乃復貶也」。^④○解云：公子鞏助

桓篡弑，入篇即不貶，見其無罪於桓公。今此公子遂助

宣篡弑，而於宣貶者，正以於子赤則無年，遂之罪重不得

令免，會須貶之。諸見之處，悉皆有嫌，不得作文，是以

正於卒時貶，見其事。○注「貶加字」至「絕也」。○解

云：成十五年「三月，乙巳，仲嬰齊卒」，傳云：「仲嬰齊者

何？公孫嬰齊也。公孫嬰齊，則曷為謂之仲嬰齊？為

兄後也。為兄後，則曷為謂之仲嬰齊？為人後者，為之

子也。」注云「更為公孫之子，故不得復氏公孫」。傳文

^①「如齊也嫌公遂」，阮校：「鄂本「如齊」下無「也」字，

「公遂」下有「八年」二字。當據以訂正。言於元年公

會平州下如齊，貶不稱公子，則嫌公如齊矣。於八年

如齊，至黃乃復，貶不稱公子，則嫌因坐乃復貶之

矣。」

^②「地者絕外卒」，阮校：「鄂本作「地者卒外」，此本

「絕」衍字，「外卒」誤倒。按：解云「此言於垂者，正

以卒於外故也」，是疏本亦作「卒外」，不言「絕」。

^③「公」，原作「云」，今據京都本、再造善本改。

^④「如齊」上，阮校：「當有「八年」二字。」杉浦校：「單

疏鈔本有「八年」二字。」

云：①「為人後者爲其子，則其稱仲何？孫以王父字爲氏也。然則嬰齊孰後？後歸父也。歸父使于晉而未反，何以後之？」注云「據已絕也」。傳云：「叔仲惠伯，傅子赤者也。文公死，子幼，公子遂謂叔仲惠伯曰：『君幼，如之何？願與子慮之。』叔仲惠伯曰：『吾子相之，老夫抱之，何幼君之有？』公子遂知其不可與謀，退而殺叔仲惠伯，弑子赤而立宣公。宣公死，成公幼，臧宣叔者相也，②君死不哭，聚諸大夫而問焉，曰：『昔者叔仲惠伯之事，孰爲之？』諸大夫雜然曰：『仲氏也，其然乎？』於是遣歸父之家。」注云「時見君幼，欲以防示諸大夫」。「然後哭君。歸父使乎晉，還自晉，至櫟，聞君薨，家遣，埋帷，哭君成踊，反命于介，自是走之齊。魯人徐傷歸父之無後也」，注云「徐者，皆共之辭也，關東語。傷其先人爲惡，身見逐絕不忿懣也」。「於是使嬰齊後之也」，注云「弟無後兄之義，爲亂昭穆之序，失父子之親，故不言仲孫，明不與子爲父孫」是也。③然遂既被貶而加字者，欲起成十五年仲嬰齊以仲爲氏故也。嬰齊者，仲遂之子，宜稱公孫而氏仲者，明爲其兄公孫歸父之後，不得氏公孫，故氏仲矣。所以弟爲兄後者，正以大宗不得絕故也。

○注「地者」至「禮也」。○解云：欲道公子季友之文皆不

地。此言「於垂」者，正以卒於外故也。所以卒於外則地之者，明其當有卒於外之禮故也。○注「日者不去樂也」。○解云：正以《春秋》之例，失禮鬼神例日故也。○注「書有」至「張本」。○解云：正以時祭之禮，初夏作之，即是得時不書之例，而書之者，爲下不去樂張本故也。而言有事者，約不合書，是以但言有事，爲下張本而已，似若文二年注云「不言吉禘者，就不三年不復議，略爲下張本」而已之類。

壬午，猶繹。萬人去籥。繹者何？

祭之明日也。禮，繹繼昨日事，但不灌地降神爾。天子諸侯曰繹，大夫曰賓尸，士曰宴尸，去事之殺也。必繹者，尸屬昨日配先祖食，不忍輒忘，故因以復祭，禮則無有誤，敬慎之至。殷曰彤，周曰繹。繹者，據今日道昨

①「文」，阮校：「浦鏜云：當『又』字誤。是也。」杉浦校：「單疏鈔本『文』作『又』。」

②「臧」，原作「藏」，今據成公十五年傳及中華本、閩本改。

③「爲父」，原重文。阮校：「浦鏜云：複衍『爲父』二字。按：何校本無此二字是也。」今據閩本刪。

日，不敢斥尊言之，文意也。彤者，彤彤不絕，據昨日道今日，斥尊言之，質意也。祭必有尸者，節神也。禮，天子以卿爲尸，諸侯以大夫爲尸，卿大夫以下以孫爲尸。夏立尸，殷坐尸，周旅酬六尸。○屬，音燭。彤，羊弓反。【疏】「釋者何」。○解云：欲言是祭，去約大近，欲言非祭，釋者祭名，故執不知問。○注「禮釋」至「神爾」。○解云：正以《釋天》云「釋，又祭也」，孫氏云「祭之明日，尋釋復祭」，故言繼昨日事。正以昨日祭，已灌地降神，是以今日釋，主爲尸作，何以爲灌乎？故云「但不灌地降神爾」。○注「天子諸侯」至「宴尸」。○解云：《春秋說》文也。稍得言名釋在正祭之後，故曰「去事之殺」也。○注「則無有誤」。○解云：畏敬先君之尸而爲之設祭，則無有過誤也。○注「殷曰彤，周曰釋」。○解云：《釋天》文。案郭氏《爾雅》，其下文仍有「夏曰復昨」之文，^①而何氏不言之者，正以諸家《爾雅》悉無此言，故不引之。復昨，郭氏云「未見義所出也」。○注「釋者」至「意也」。○解云：祭尊于釋，欲道今日所尋釋，乃是昨日之正祭，故云「據今日道昨日」。不敢斥尊，乃是尊正之義，故曰「文意也」。○注「彤者」至「神也」。○解云：正由昨日正祭，是以今日作又祭，相因而不絕彤彤然，故曰「據昨日道今日」。

日」。乃是迫近而不尊，故曰「質意」也。○注「禮天子」至「孫爲尸」。○解云：何氏差約古禮也。天子不使公，諸侯不使卿，皆爲其疑也。卿大夫已下以孫爲尸，以其昭穆同也。○注「夏立」至「六尸」。○解云：即《禮器》云「周坐尸」，注云「言此亦周所因於殷也」。「夏立尸而卒祭」，^②注云「夏禮尸有事乃坐」。「殷坐尸」，注云「無事猶坐」。「周旅酬六尸」，注云「使之相酌也」。后稷之尸，發爵不受旅。「曾子曰『周禮其猶釀與』」，注云「斂錢飲酒爲釀，旅酬相酌似之也」。萬者何？干舞也。干，謂楯也。能爲人扞難而不使害人，故聖王貴之，以爲武樂。萬者，其篇名。武王以萬人服天下，民樂之，故名之云爾。○楯，食允反。扞，戶旦反。【疏】「萬者何」。○解云：欲言其樂，文無樂名，欲言非樂，祭祀用之，故執不知問。○注「武王」至「云爾」。○解云：《春秋說》文。昔武王一會八伯諸侯，人數豈止萬而已，蓋以萬是總名，故

^① 「文」下，杉浦校：「單疏鈔本、毛本夾注『昨音祚』三字。」

^② 「夏」，原作「而」，今據京都本、再造善本、中華本、閣本改。

據以言耳。簫者何？簫舞也。簫所吹以節舞也。

吹簫而舞，文樂之長。【疏】「簫者何」。○解云：欲言非

樂，簫是樂名，欲言是樂，臨祭見去，故執不知問。○注

「吹簫而舞文樂之長」。○解云：正以萬是武樂，人而用

之，而簫特備矣。其言「萬人去簫」何？據入者

不言萬，去樂不言名。【疏】注「去樂不言名」。○解云：

即昭十五年「二月，癸酉，有事于武宮。簫人，叔弓卒，去

樂卒事」是也。去其有聲者，不欲令人聞之也。①

廢其無聲者，廢，置也。置者，不去也，齊人語。存

其心焉爾。「存其心焉爾」者何？知其不

可而爲之也。明其心猶存於樂，知其不可，故去其有

聲者而爲之。【疏】「存其心焉爾者何」。○解云：欲道存

心于樂，而有去簫之文，欲道存心于股肱，而繹萬不廢，

故執不知問。猶者何？通可以已也。禮，大夫

死，爲廢一時之祭，有事于廟而聞之者，去樂卒事。②而

聞之者，廢繹。日者，起明日也。言入者，據未奏去簫時

書。凡祭，自三年喪已下，各以日月廢時祭，唯郊社越紼

而行事可。③【疏】「猶者何」。○解云：欲言是禮，書而

譏之，欲言非禮，乃當正祭之明日，故執不知問。○「禮

大夫」至「之祭」。○解云：正以正祭爲吉事故也。○注

「有事」至「去樂」。○解云：即昭十五年「二月，癸酉，有

事于武宮。簫人，叔弓卒，去樂卒事」，傳云：「其言去樂

卒事何？禮也。君有事于廟，聞大夫之喪，去樂。」注

云：「恩痛不忍舉。」○注「卒事」至「日也」。○解云：即

《檀弓下》篇云「仲遂卒于垂，壬午，猶繹，萬人，去簫。仲

尼曰「非禮也，卿卒不繹」是也。○注「言人」至「時書」。

○解云：欲道所以不言萬作而言萬人之意也。○注「凡

祭」至「事可」。○解云：即《王制》曰「喪三年不祭，唯祭

天地社稷，爲越紼而行事」，鄭注云「不敢以卑廢尊。越

猶繹也。紼，輔車索」是也。④

戊子，夫人熊氏薨。

①「也」，阮校：「鄂本無，此誤衍。」

②「去樂卒事」，阮校：「鄂本疊「卒事」二字，此因重文

誤脫，當據補。按：疏引昭十五年經「去樂卒事」，以

證上卒事，又標「注卒事至日也」，以釋下注，則疏本

亦疊「卒事」二字。」

③「可」，阮校：「鄂本作「也」。按：疏標起訖作「凡祭」

至「事可」。」「輔」，阮校：「浦鏜云：「輔」誤「輔」。是也。」

晉師、白狄伐秦。

楚人滅舒蓼。

秋，七月，甲子，日有食之，既。是後楚莊

王圍宋，析骸易子，伐鄭勝晉，鄭伯肉袒，晉大敗於邲，中國精奪，屈服強楚之應。【疏】注「是後」至「易子」。○解云：「圍宋」者，即下十四年「秋，九月，楚子圍宋」是也。言「析骸易子」者，即十五年傳云「易子而食之，析骸而炊之」是也。○注「伐鄭勝晉」。○解云：即下九年冬，「楚子伐鄭。晉卻缺帥師救鄭」。十年夏，「晉人、宋人、衛人、曹人伐鄭」；冬，「楚子伐鄭」。十一年「夏，楚子、陳侯、鄭伯盟于辰陵」。注云：「不日月者，莊王行霸，約諸侯，明王法，討微舒，善其憂中國，故爲信辭。」然則比年之間，晉、楚爭共伐鄭，鄭伯終服于楚，盟于辰陵，楚勝于晉，居然明矣，故云伐鄭勝晉也。○「鄭伯肉袒」。^①○解云：即下十二年春，「楚子圍鄭」，「鄭伯肉袒，左執茅旌，右執鸞刀，以逆莊王」是也。○注「晉大敗于邲」。○解云：即下十二年夏，「晉荀林父帥師，及楚子戰于邲，晉師敗績」。○注「中國精奪」。○解云：正以日者，太陽之精，諸夏之象，今而被食，故曰中國精奪。

冬，十月，己丑，葬我小君頃熊。雨不

克葬。庚寅，日中而克葬。頃熊者何？

宣公之母也。熊氏，楚女。宣公即僖公妾子。○頃，

音傾。【疏】「頃熊者何」。○解云：欲言是妾，卒葬備書，

欲言夫人，與君別謚，故執不知問。而者何？難

也。乃者何？謂問定公曰下昃乃克葬。^②【疏】「而

者何」。○解云：魯公夫人薨葬多矣，此獨言，故執不知

問。○注「謂問定公曰下昃乃克葬」。^③○解云：即是十

五年九月，^④「丁巳，葬我君定公，雨不克葬。戊午，日下

昃，乃克葬」是也。然則言「乃」之經，不干此事，而於此

問之者，正以葬時遇雨廢葬，而乃異文，是以連而問之。

難也。禮，卜葬從遠日。不克葬見難者，臣子重難，不

① 「鄭」上，依例當有「注」字。

② 「謂」，阮校：「鄂本無，此誤衍。」

③ 「注謂」，杉浦校：「單疏鈔本『注』上有『乃者何』三字，是傳文也。『注』下，單疏本無『謂』字。按：疏中標注有『謂』者，當爲衍文。」

④ 「十五年」上，阮校：「當有『定』字。」

得以正日葬其君。【疏】「禮卜葬從遠日」。①○解云：即《曲禮上》篇云「喪事先遠日」，鄭注云：「喪事，葬與練祥也。」《左氏傳》云：「禮，卜葬先遠日，辟不懷也。」舊典之遺存也。曷爲或言「而」，或言「乃」？「乃」難乎「而」也。言「乃」者，內而深。言「而」者，外而淺。下旻，日昃久，故言「乃」。孔子曰：「其爲之也難，言之得無訕乎？」皆所以起孝子之情也。雨不克葬者，爲不得行葬禮。孔子曰：「生事之以禮，死葬之以禮，祭之以禮。」故不得行禮則不葬也。魯錄雨不克葬者，恩錄內尤深也。別朝莫者，明見日乃葬也。○訕，音刃。莫，音暮。【疏】注「孔子」至「訕乎」。②○解云：《論語》文。引之者，證難言之事，必須訕而言之，似若臣子不得正日，雖言重難，亦須訕而葬之。○注「所以起孝子之情也」。○解云：謂《春秋》言「而」言「乃」者，所以起見孝子之情，重難有淺深故也。○注「魯錄」至「深也」。○解云：欲道外諸侯葬多矣，而無不克之文者，以其恩淺也。○注「別朝」至「葬也」。○解云：謂日中與旻。然則朝莫猶早晚也。

城平陽。

楚師伐陳。

九年，春，王正月，公如齊。月者，善宣公事齊合古禮，卒使齊歸濟西田。不就十年月者，五年再朝，近得正。孔子曰：「知和而和，不以禮節之，亦不可行也。」明雖事人，皆當合禮。【疏】注「月者」至「西田」。○解云：即下十年春，「齊人歸我濟西田」是也。○注「不就」至「合禮」。○解云：何氏之意，以爲《春秋》之道，祖述堯舜，天子五年一巡狩，諸侯亦五年一朝天子，是以桓元年注「故即位，比年使大夫小聘，三年使上卿大聘，四年又使大夫小聘，五年一朝」是也。然則諸侯自相朝，雖文不著，若欲以朝，亦不過是也。宣公五年「春，公如齊」，今九年春又如齊，乃五年之內，不得正盡五年，故曰「近得正」。言「近」者，不正是之辭也。雖不正是，近合於禮，是以《春秋》此年書月，以見善宣公，至十年公復如齊，是爲大數，唯近取濟西田之文，③亦不得見善，故言不就十年月者，五年再朝近得正。

① 「禮」上，依例當有「注」字。

② 「訕」，原作「認」，今據注文及京都本，再造善本，中華本、閩本改。

③ 「唯」，阮校引浦鏜云：「疑『雖』」。

公至自齊。

夏，仲孫蔑如京師。

齊侯伐萊。

秋，取根牟。根牟者何？邾婁之邑

也。曷爲不繫乎邾婁？諱亟也。亟，疾也。

屬有小君之喪，邾婁子來加禮，未期而取其邑，故諱不繫邾婁也。上有小君喪，而下諱取之，則邾婁加禮明矣。

未期年從加禮數者，猶王子虎從會葬數。○亟，去冀反。

未期，音基。【疏】「根牟者何」。○解云：欲言是國，經典

未有，欲言非國，文無所繫，故執不知問。○注「屬有小

君之喪」。○解云：即上八年夏，「夫人熊氏薨」是也。○

注「邾婁子來加禮」。○解云：謂上八年冬十月葬頃熊之

時，邾婁子使人來加禮，但例不書之，故不見也。○注

「未期」至「婁也」。○解云：去年十月來加禮，今年七月

而取邑，故言「未期」也。加禮者，或是贈襚之屬，皆是葬

前之事，而要繫會葬言之。言未期者，欲取諱亟之義強

故也。必知過期之後，不復諱之者，正以定十五年夏五

月定公薨，「邾婁子來奔喪」，至於哀元年「冬，仲孫何忌

帥師伐邾婁」，注云「邾婁子新來奔喪，伐之不諱者，期外

恩殺惡輕，明當與根牟有差」是也。○注「未期年」至「葬

數」。○解云：此文欲取未期之義，而從加禮數之，若取

薨之時，則過於期矣。若似僖三十三年冬十二月，「公薨

于小寢」，文元年「天王使叔服來會葬」，夏四月，「葬我君

僖公」。文三年「夏，五月，王子虎卒」，傳云：「王子虎者

何？天子之大夫也。外大夫不卒，此何以卒？新使乎

我也。」注云：「王子虎，即叔服也。新爲王者使來會葬，在

葬後三年中卒，君子恩隆於親親，則加報之，故卒，明當有

恩禮也。」然則王子虎之卒在文三年夏，若數來會葬之時，

則在三年之內，若數公卒時，四年矣，與此相似，故猶之。

八月，滕子卒。

九月，晉侯、宋公、衛侯、鄭伯、曹伯會

于扈。

晉荀林父帥師伐陳。

辛酉，晉侯黑臀卒于扈。扈者何？

晉之邑也。諸侯卒其封內不地，此何以

地？據陳侯鮑卒不地。【疏】「扈者何」。○解云：若

言晉地，不應書之，欲道外地，文無所繫，故執不知問。

○注「據陳侯鮑卒不地」。○解云：桓五年「春，正月，甲

戊，己丑，陳侯鮑卒」，傳云：「曷爲以二日卒之？憾也。甲戌之日亡，己丑之日死而得，君子疑焉，故以二日卒之也。」是其卒於封內不書地，故難之。卒于會，故地也。起時衰多窮厄伐喪，而卒於諸侯會上，故地，危之。

未出其地，故不言會也。左右皆臣民，雖卒於會上，危愈於竟外，故不復著言會也。出外死有輕重，死於師尤甚，於會次之，如人國次之，^①於封內最輕。不書葬者，故纂也。^②【疏】注「出外死」至「最輕」。○解云：時衰多窮厄伐喪，師者用兵之處，而君死焉，故言「于師」，著其危甚，即襄十八年「曹伯負芻卒于師」是也。是以僖四年「夏，許男新臣卒」，何氏云「不言卒於師者，桓公師無危」，是其義也。云「於會次之」者，與人交接之處，或相劫詐未可知，若柯之盟曹子劫桓公之類是也，而君卒焉，故言次之，即定四年「夏，杞伯戊卒于會」是也。^③云「於人國次之」者，正以時多背死向生，而君卒於竟外，似有掩襲之理，但於主國有賓客之道，是故又以爲次矣，即襄二十六年秋「許男甯卒于楚」之屬是也。云「於封內最輕」者，正以左右皆臣民，危少於竟外，是以不言於會矣，但有外國之人，亦有危理，故書其地，即此文書「晉侯黑

臀卒於扈」是也。若不聚會，直卒於封內者，仍自不地，即「陳侯鮑卒」是也。若然，昭十三年「夏，四月，楚公子比自晉歸于楚，弑其君虔于乾谿」，不與人會而書地者，彼注云「封內地者，起禍所由，因以爲戒」是也。而云「起禍所由」者，案彼傳云：「靈王爲無道，作乾谿之臺，三年不成，楚公子棄疾脅比而立之，然後令于乾谿之役曰：『比已立矣，』^④後歸者不得復其田里。」衆罷而去之，靈王經而死。」是其致禍之由。○注「不書」至「纂也」。○解云：《春秋》之義，纂明者書葬，即小白之屬是也。纂不明者，即不書其葬以見纂，即此黑臀之屬是也，云云，已說于上。

冬，十月，癸酉，衛侯鄭卒。不書葬者，殺公子瑕也。【疏】注「不書葬」至「瑕也」。○解云：即僖三十年「秋，衛殺其大夫元咺及公子瑕也」，不言殺元咺，元

①「如」，阮校：「閩、監、毛本『如』作『於』，當據正。」

②「故」，阮校：「鄂本無。」

③「杞伯戊」，原作「杞伯成」，今據定公四年經及京都本，再造善本、閣本改。

④「比」，原作「此」，今據上文「楚公子棄疾脅比而立之」及京都本、閣本改。

咺有罪云云，已說于上。

宋人圍滕。

楚子伐鄭。

晉卻缺帥師救鄭。

陳殺其大夫泄冶。

監本附音春秋公羊注疏宣公卷第十五

監本附音春秋公羊注疏宣公卷第十六

起十年，盡十八年

何休學

十年，春，公如齊。公至自齊。齊人

歸我濟西田。^①齊已取之矣，其言我何？

據歸謹及闡，^②齊已取不言「我」。○俾，本又作「闡」，昌

善反。【疏】注「據歸」至「言我」。○解云：哀公八年「夏，

齊人取謹及俾」，冬，「齊人歸謹及俾」是也。言我者，

未絕於我也。曷爲未絕于我？據有俄道。^③

【疏】注「據有俄道」。○解云：即桓二年傳云「至乎地之

與之則不然，^④俄而可以爲其有矣」，彼注云「俄者，謂須

臾之間，制得之頃也」。言俄爾之間，則有絕于本主之

道，爾來十年，何言未絕于我乎？故難之。齊已言

取之矣，齊已言語許取之。其實未之齊也。其

人民貢賦尚屬於魯，實未歸於齊。不言來者，明不從齊

來，不當坐取邑。凡歸邑，物例皆時。【疏】注「不言來」

至「取邑」。○解云：案元年注云「亦因惡齊取篡者賂，當

坐取邑」者，正以篡逆之賊天下共惡，齊乃許取其賂而與

之同，似若漢律行言許受財之類，故云「當坐取邑」耳。

今言「不當坐取邑」者，正以爾來十年仍不入己，見宣有

禮，還復歸之，功過相除，可以減其初惡，是以《春秋》恕

之，不復書來，以除其過，故曰「不當坐取邑」耳。○注

「凡歸邑物例皆時」。○解云：其歸邑時者，即定十年夏，

「齊人來歸運、謹、龜陰田」，及此經書春之屬皆是也。其

歸物時者，即莊六年冬「齊人來歸衛寶」，注云「寶者，玉

物凡名」是也。以此言之，則知哀八年「齊人歸謹及俾」

在日月之下，不蒙日月亦可知也。

夏，四月，丙辰，日有食之。與甲子既同，

①「西」下，阮校：「唐石經磨改增『之』字，鄂本亦有。」

②「闡」，阮校：「閩、監、毛本作『俾』，《釋文》作『及俾』，

云『本又作闡』。」

③「俄」，阮校：「鄂本作『我』，是也，當據正。」

④「與之」，阮校：「浦鏜云：『與人』，『人』誤『之』。是

也。」杉浦校：「單疏鈔本『與之』作『與人』。」

事重故累食。【疏】注「與甲子既同」。○解云：即上八年「秋，七月，甲子，日有食之，既」，彼注云「是後楚莊王圍宋，析骸易子，伐鄭勝晉，鄭伯肉袒，晉師大敗于郟，中國精奪，屈服強楚之應」。今此與彼同占，故曰「與甲子既同」也。

己巳，齊侯元卒。

齊崔氏出奔衛。崔氏者何？齊大夫也。其稱崔氏何？據齊高無咎出奔名。連崔氏

者，與尹氏俱稱氏，嫌爲采邑。【疏】「崔氏者何」。○解

云：欲言大夫，而直言崔氏，欲言微者，而得書于經，故執不知問。○注「據齊」至「奔名」。○解云：即成十七年

秋，「齊高無咎出奔莒」是也。○注「連崔氏者」。○解

云：「與尹氏俱稱氏，嫌爲采邑」者，即隱三年「夏，四月，辛卯，尹氏卒」是也。貶。曷爲貶？據外大夫奔不

貶。【疏】注「據外大夫奔不貶」。○解云：即上引「高

無咎出奔莒之屬」是也。譏世卿。世卿非禮也。

復見譏者，嫌尹氏王者大夫，職重不當世，諸侯大夫任輕可世也。②因齊大國禍著，故就可以爲法戒，明王者尊莫大於周室，彊莫大於齊國，世卿猶能危之。【疏】注「復

見」至「世也」。○解云：即隱三年「尹氏卒」單稱氏，已是譏之。今復單言「崔氏」，故言「復」也。○注「因齊大國」至「危之」。○解云：欲道等是諸侯，科取即得，所以不於僖二十八年「衛元咺出奔晉」之經見之者，因齊大國有弑君之禍著，明于出奔故也。

公如齊。不言奔喪者，尊內也。猶不言朝聘。

【疏】注「不言」至「內也」。○解云：正以上文四月「己巳，齊侯元卒」，則知此經「公如齊」者，奔喪而往。而言尊內也者，欲道定十五年夏，「公薨于高寢」，「邾婁子來奔喪」，彼則書之，今此否者，尊內故也。

五月，公至自齊。

癸巳，陳夏徵舒弑其君平國。

六月，宋師伐滕。

公孫歸父如齊，葬齊惠公。

晉人、宋人、衛人、曹人伐鄭。

秋，天王使王季子來聘。王季子者

① 「貶」下，杉浦校：「單疏鈔本有『也者』二字。」
② 「世」，原作「出」，今據余本、閣本改。

何？天子之大夫也。其稱王季子何？據

叔服不繫王，不稱子，王札子不稱季。【疏】「五月公至自齊」。○解云：致例時，而書五月者，爲下癸巳出之。

○「王季子者何」。○解云：欲言諸侯，而王使來聘，欲言大夫，而經書子，故執不知問。○注「據叔」至「稱子」。

○解云：即文元年「天王使叔服來會葬」是也。○「王札子不稱季」。○解云：即下十五年夏，「六月，王札子殺召伯、毛伯」是也。貴也。其貴奈何？母弟也。

子者，王子也。天子不言子弟，故變文上季繫先王以明之，著其骨肉貴，體親也。【疏】注「子者王子」至「明之」。

○解云：言天子不言子弟者，即文元年注云「叔服者，王子虎也」，「不繫王者，不以親疎錄也。不稱王子者，時天子諸侯不務求賢，而專貴親親，故尤其在位子弟，刺其早任以權也」是也。既言「尤其在位子弟」，是以不得稱之。

「王子瑕奔晉」，「天王殺其弟年夫」，難之云云，已說在文元年。○注「著其」至「親也」。○解云：以其稟氣于先王，故言「骨肉貴」，以其今王母弟，故曰「體親也」。

公孫歸父帥師伐邾婁，取類。① ○類，音

類，又力對、欺類二反。

大水。先是城平陽，取根牟及類，役重民怨之所

生。【疏】注「先是城平陽」。○解云：在上八年冬。○注「取根牟」者。② ○解云：在上九年秋。

季孫行父如齊。

冬，公孫歸父如齊。

齊侯使國佐來聘。

饑。何以書？以重書也。民食不足，百

姓不可復興，危亡將至，故重而書之。明當自省減，開倉庫，贍振乏。③ 哀公問於有若曰：「年饑，用不足，如之何？」有若對曰：「盍徹乎？」曰：「二，吾猶不足，如之何其徹也？」對曰：「百姓足，君孰與不足？百姓不足，君孰與足？」○瞻，常豔反。④

楚子伐鄭。

十有一年，春，王正月。

① 「類」，阮校引惠棟云：「二傳作『繹』。」

② 「者」，阮本無此字。

③ 「乏」，阮校：「鄂本『乏』作『之』，此誤。」

④ 「常」，原作「當」，今據京都本、閣本、宋本《釋文》改。

夏，楚子、陳侯、鄭伯盟于辰陵。不日月者，莊王行霸，約諸侯，明王法，討微舒，善其憂中國，故爲信辭。

公孫歸父會齊人伐莒。

秋，晉侯會狄于欒函。離不言會。言會者，見所聞世治近升平，內諸夏而詳錄之，殊夷狄也。下發傳於吳者，方具說其義，故從外內悉舉者明言之。【疏】注「發傳於吳」至「明言之」。○解云：即成十五年「冬，十有一月，叔孫僑如會晉士燮、齊高無咎、宋華元、衛孫林父、鄭公子鱣、邾婁人會吳于鍾離」，傳云：「曷爲殊會吳？外吳也。曷爲外也？《春秋》內其國而外諸夏，內諸夏而外夷狄。王者欲一乎天下，曷爲以外內之辭言之？言自近者始也。」注云「明當先正京師，乃正諸夏。諸夏正，乃正夷狄，以漸治之」是也。

冬，十月，楚人殺陳夏徵舒。此楚子也，其稱人何？據下人陳稱子。【疏】注「據下人陳稱子」。○解云：即下「丁亥，楚子入陳」是也。貶。曷爲貶？據徵舒有罪。不與外討也。辟天子，故貶見之，即所謂貶絕然後罪惡見。【疏】注「即所謂」至

「惡見」。○解云：即昭元年傳云「《春秋》不待貶絕而罪惡見者，不貶絕以見罪惡也」是也。不與外討者，因其討乎外而不與也。雖內討亦不與也。雖自討其臣下，亦不得與也。【疏】雖內討亦不與也。○解云：案《檀弓》云：「臣弑君，^①凡在官者，殺無舍。」是以隱四年「九月，衛人殺州吁于濮」，傳曰：「其稱人何？討賊之辭也。」注云：「討者，除也，明國中人人得討之，所以廣忠孝之路。」以此言之，則弑君之賊，國內人人皆得殺之。而言「雖內討亦不與」者，正以與莊王非國內，是以不與其外討。又言「雖內討亦不與」者，正以莊王身為君而見在，寧得更有弑君之賊而討之乎？明知莊王內討者，更以他罪耳。諸侯不得專殺大夫，是以不與。曷爲不與？據善爲齊誅之。【疏】注「據善爲齊誅之」。○解云：即昭四年「秋，七月，楚子」以下「伐吳，執齊慶封，殺之」，傳云「此伐吳也，其言執齊慶封何？爲齊誅也。其爲齊誅奈何？慶封走之吳，吳封於防」，何氏云「月者，善義兵」是也。實與，不言執，與討賊同文。

①「弑」，杉浦校：「單疏鈔本作『殺』。」

【疏】注「不言執」至「同文」。○解云：正以昭八年夏「楚人執陳行人于徵師，殺之」言「執」，非討賊之文，隱四年「衛人殺州吁」、莊九年「齊人殺無知」皆不言執，以見此不言執，乃與討賊同文，故知實與矣。而文不與。文曷爲不與？諸侯之義，不得專討也。諸侯之義不得專討，則其曰實與之何？上無天子，下無方伯，天下諸侯有爲無道者，臣弑君，子弑父，^①力能討之，則討之可也。與齊桓專封同義。不書兵者，時不伐。【疏】注「與齊桓專封同義」。○解云：即僖元年齊師救邢之下，傳云：「曷爲先言次，後言救？君也。君則其稱師何？不與諸侯專封也。曷爲不與？實與而文不與。文曷爲不與？諸侯之義，不得專封也。諸侯之義不得專封，則其曰實與之何？上無天子，下無方伯，天下諸侯有相滅亡者，力能救之，則救之可也。」注云：「主書者，起文從實也。」今此亦然，故曰齊桓專封同義耳。^②○注「不書兵者時不伐」。○解云：欲決昭四年秋，「楚子」以下「伐吳，執齊慶封，殺之」，彼實有兵，故言伐。今此不書兵者，時實不伐，非是省文之義耳。

丁亥，楚子入陳，日者，惡莊王討賊之後，欲利其國。復出楚子者，爲下納善不當貶，不可因上貶文。【疏】注「日者」至「利其國」。○解云：正以《春秋》之義，入例書時，傷害多則書月。今此書日以詳其惡，故如此解。○注「復出楚」至「貶文」。○解云：《春秋》之義，以納爲纂辭，而言爲下納善者，正以上有起文，故與凡納異，何者？上有討賊之文，而即言納二子于陳，故知其善，所謂美惡不嫌同辭矣。納公孫甯、儀行父于陳。此皆大夫也，其言納何？據納者謂已絕也。今甯、儀行父上未有出奔絕文，故見大夫，反言納也。○甯，乃定反，音寧。【疏】注「據納」至「言納也」。○解云：定十四年秋「衛世子蒯聵出奔宋」，至哀二年夏

① 「臣弑君子弑父」，阮校：「唐石經、諸本同。昭十一年疏引作『臣弑君，子殺父』，蓋『弑』字本皆作『殺』，後改弑君而仍殺父耳。」

② 「故曰齊桓專封同義耳」，阮校：「浦鏜云：『曰』下脫『與』。是也。」杉浦校：「單疏鈔本『曰』下有『與』字，下無『耳』字，與注合。」今按：何注言「與齊桓」，則有「與」字是。

「晉趙鞅納衛世子蒯聵于戚」，是其上有出奔絕文而下言納矣。而僖二十五年「秋，楚人圍陳，納頓子于頓」，上文不言頓子出奔者，正以頓是微國，出入不兩書，故彼注云「頓子出奔不書，小國例也」。云「故見大夫」者，言此二子上無絕文，故見任爲大夫，而反言納于陳。

納公黨

與也。微舒弑君，甯、儀行父如楚訴微舒，微舒之黨從後絕其位，楚爲討微舒而納之。本以助公見絕，故言納公黨與。不書微舒絕之者，以弑君爲重。主書者，美楚能變悔改過，以遂前功，卒不取其國而存陳。不繫國者，因上人陳可知。【疏】注「不書」至「主書者」。○解云：若書微舒絕之，宜云陳公孫甯等出奔楚，傳云「此訴于楚矣，曷爲謂之出奔？微舒絕其位，是以謂之奔也」。①○注「美楚」至「改過」。○解云：謂之人陳是也。○注「以遂前功」。○解云：討微舒是也。○注「不繫國」至「可知」。○解云：欲決哀二年「納衛世子」云云，繫衛是也。

十有二年，春，葬陳靈公。討此賊者，

非臣子也，何以書葬？據惠公殺里克，不書卓子葬。【疏】注「據惠」至「子葬」。○解云：僖十年春，「里克殺其君卓」，②夏，晉惠公殺里克是也。君子辭也。

楚已討之矣，臣子雖欲討之，而無所討也。

無所復討也，不從殺泄冶不書葬者，③泄冶有罪，故從討賊書葬，則君子辭與泄冶罪兩見矣。不月者，獨甯、儀行父有訴楚功，上已言納，故從餘臣子恩薄略之。【疏】「君子」至「討也」。○注「無所復討也」。④○解云：然則卓子之賊，亦是惠公已討之，其臣子雖欲討之，亦無所討。而不作君子辭者，正以惠公之殺里克，不作討賊之意，是以《春秋》不書卓子葬，以責其臣子也。今此楚莊本有討賊之意而殺微舒，⑤一賊不可再討，故不責之。○注「不從」至「有罪」。○解云：案何氏作《膏肓》，以爲泄冶無罪，而此注云有罪者，其何氏兩解乎？正以《春秋》之義，殺無罪大夫者，例去其葬以見之。今乃經書靈公之

①「奔」上，杉浦校：「單疏鈔本有『出』字。按：作『出奔』爲長。」

②「里克殺其君卓」，杉浦校：「單疏鈔本、毛本『殺』作『弑』，與僖十年經合。」

③「泄冶」，阮校：「鄂本『泄』作『洩』，下並同。」

④「君子至討也注無所復討也」，疑此乃單疏本之格式之一，前以傳文起訖爲題，下釋注文。

⑤「有」，杉浦校：「單疏鈔本、毛本作『以』。」

葬，則知泄治有罪明矣。而《膏肓》以爲無罪者，蓋以諫君之人，罪之無文，而《左氏》罪之，故言無罪矣。而此何氏以爲有罪者，其更有他罪乎？○注「從討」至「兩見矣」。○解云：賊不討不書葬者，欲責臣子不討賊。今而書葬，則知賊已討矣，君子恕之，不復責臣子矣。又且君殺無罪大夫，則不書其葬。今靈公殺泄治而得書葬，則知泄治有罪明矣，故云「兩見」矣。○注「不月者」至「略之」。○解云：正以卒日葬月，大國之常，今書春，故須辨之。

楚子圍鄭。

夏，六月，乙卯，晉荀林父帥師及楚子戰于邲，晉師敗績。大夫不敵君，此其稱名氏以敵楚子何？據城濮之戰，子玉得臣貶也。

【疏】注「據城濮」至「貶也」。○解云：即僖二十八年夏，晉侯以下「楚人戰于城濮」，楚師敗績，傳云：「此大戰也，曷爲使微者？」子玉得臣也。子玉得臣則其稱人何？貶。曷爲貶？大夫不敵君也。「不與晉而與楚子爲禮也」。不與晉而反與楚子爲君臣之禮，以惡晉。【疏】「不與晉」至「禮也」。○解云：但作一句連讀

之。注云「不與晉而反與楚子爲君臣之禮」，②亦爲一句連讀之。○注「以惡晉」。○解云：內諸夏以外夷狄，《春秋》之常。今敘晉于楚子之上，正是其例。而知其惡晉者，但楚莊德進行修，同於諸夏，討陳之賊，不利其土，入鄭皇門而不取其地，既卓然有君子之信，寧得殊之？既不合殊，即是晉侯之匹，林父人臣，何得序於其上？既序人君之上，無臣子之禮明矣。臣而不臣，故知惡晉也。曷爲不與晉而與楚子爲禮也？據城濮之戰，貶得臣者，不與楚爲禮。莊王伐鄭，勝乎皇門，勝戰勝。皇門，鄭郭門。放乎路衢。路衢，郭內衢。道四達謂之衢。【疏】注「道四達謂之衢」。○解云：《釋宮》文。鄭伯肉袒，左執茅旌，茅旌，祀宗廟所用迎道神，指護祭者。斷曰藉，不斷曰旌。用茅者，取其心理順一，自本而暢乎末，所以通精誠，副至意。○斷，音短。藉，在夜反。【疏】注「茅旌」至「至意」。○解云：「茅旌，

① 「晉侯以下」下，阮校引浦鏜云：「脫『及』。」杉浦校：「單疏鈔本作『晉侯以下及』。按：此本與浦說合。」今按：僖公二十八年經有「及」字。

② 「禮」下，杉浦校：「單疏鈔本有『者』字。」

祀宗廟所用「云者」，^①皆時王之禮。正以公羊子是景帝時人，是以何氏取當時之事以解其語。云「用茅者，取其心理順」者，言茅心文理皆順無逆矣。云「自本而暢乎末」者，言其文理從本而申暢于末，無絕以絕之。^②右

執鸞刀，鸞刀，宗廟割切之刀，環有和，鋒有鸞。執宗廟器者，示以宗廟不血食，自歸首。【疏】注「鸞刀宗」至「有鸞」。○解云：亦時王之制。《祭義》亦云「祭之日，君牽牲」，「卿大夫序從」，彼注云：「序以次第從也。」既入廟門，麗于碑，卿大夫袒，而毛牛尚耳，鸞刀以割取腍脊，鄭注云：「麗猶繫也。毛牛尚耳，以耳毛爲上也。腍脊，血與腸間脂也。」又《祭統》云「鸞刀羞膾」，是鸞刀爲宗廟割切之刀矣。○注「執宗廟」至「自歸首」。○解云：言「示以宗廟」者，言示楚以宗廟血食之器也。言己宗廟將墮滅，斟酌在楚耳，故言自歸首矣。以逆莊王，曰：「寡人無良邊垂之臣，諸侯自稱曰寡人，天子自稱曰朕。良，善也。無善，喻有過。言己有過於楚邊垂之臣，謙不敢斥莊王。」【疏】注「諸侯自稱曰寡人」。○解云：《曲禮》文。○注「天子自稱曰朕」。○解云：時王之禮也。若古禮，自稱爲「予一人」矣。以干

天禍，干，犯也。謙不敢斥莊王，歸之於天。是以使

君王沛焉。沛焉者，怒有餘之貌，猶傳曰「力沛若有餘」。○沛，普蓋反。【疏】注「猶傳」至「有餘」。○解

云：文十四年傳文。辱到敝邑。遠自勞辱到於鄭

也。諸侯自稱國曰敝邑。君如矜此喪人，自謂己喪

亡。錫之不毛之地，境埆不生五穀曰不毛，謙不敢

求肥饒。○境埆，上苦交反，下音畧。【疏】注「境埆」至

「肥饒」。○解云：境埆者，壘鹵之稱，若俗言境埆矣。

使帥一二耄老而綏焉。六十稱耄，七十稱老。

綏，安也。謙不敢多索丁夫，願得主帥一二老夫以自安。

○多索，所白反，舊本作「策」，音索。【疏】注「六十」至

「稱老」。○解云：「七十稱老」，《曲禮》文也。案今《曲

禮》云「七十曰耄」，^③與此異也。蓋何氏所見，與鄭注者

①「者」，杉浦校：「單疏鈔本作「云」，是也。」

②「無絕」，杉浦校：「單疏鈔本「絕」作「節」。按：「無絕」當作「無節」。」

③「今曲禮云七十曰耄」，阮校：「閩、監、毛本同。《經義雜記》曰：當作「今曲禮六十曰耄」，徐據今《禮記》曰者，不作耄，故下云「或者此「耄」字誤耳」。」

不同，或者此「臺」字誤耳。請唯君王之命。」莊王

曰：「君之不令臣交易爲言，是亦莊王謙不斥鄭

伯之辭。令，善也。交易，猶往來也。言君之不善臣，數

往來爲惡言。① ○屢往，力住反，又作「數」，音朔。是

以使寡人得見君之玉面，而微至乎此。」微，

喻小也。積小語言，以致於此。【疏】「是以使」至「玉

面」。○解云：若《祭統》云：「故國君取夫人之辭

曰：「請君之玉女，與寡人共有敝邑，事宗廟社稷。」鄭注

云：「言玉女者，美言之也。君子於玉比德焉。」然則此言

玉面者，亦美言之也。莊王親自手旌，自以手持旌

也。緇廣充幅長尋曰旌，② 繼旌如燕尾曰旆，加文章曰

旗，③ 錯革鳥曰旗，注旆首曰旒。【疏】注「緇廣充」至「曰

旌」。○解云：此注皆《爾雅·釋天》文。其間少有不同

者，蓋所見異，或何氏潤色之。案今《爾雅·釋天》「緇

作「緇」字，孫氏云「緇，黑繒也」，郭氏云「帛全幅長八

尺」。又云「繼旌曰旆」，孫氏云「帛續旌末亦長尋，《詩》

云「帛旆英英」是也」，郭氏曰「帛續旌末爲燕尾者」，故此

何氏云「繼旌如燕尾曰旆」也。④ 又云「有鈴曰旆」，李氏

云「有鈴，以鈴著旆端」，孫氏曰「鈴在旆上，旆者畫龍」，

郭氏曰「縣鈴於竿頭，畫交龍於旆」，是以此注云「加文章

曰旗」也。又云「錯革鳥曰旗」，李氏云「以革爲之，置於

旆端」，孫氏曰「錯，置也。革，急也。言畫急疾之鳥于

旆，《周官》所謂鳥準爲旗者矣」。⑤ 又云「注旆首曰旒」，

李氏云「以鼈牛尾旆首者」，⑥ 郭氏云「載旆於竿頭，如今

之幢，亦有旆」是也。左右搗軍，退舍七里。將

軍子重諫曰：「南郢之與鄭，相去數千里，

南郢，楚都，不能二千里，言數千里者，欲深感莊王，使納

其言。○數，所主反。諸大夫死者數人，廝役扈

養死者數百人。艾草爲防者曰廝，汲水漿者曰役，

① 「數」，阮校：「宋本同，閩、監、毛本作「屢」。」

② 「緇」，阮校：「解云：今《爾雅·釋天》「緇」作「緇」字。按此，則何注本作「緇廣充幅」，當訂正。」

③ 「旗」，阮校：「當作「旆」，疏同。疏引《爾雅》及孫炎

注皆作「旆」。

④ 「旆」，阮校：「按：「旆」當依注作「旆」。」

⑤ 「旆」、「準」，阮校引浦鏜云：「「緇」誤「旆」，「準」誤

「準」。杉浦校：「單疏鈔本「準」作「隼」。」

⑥ 「旆」上，杉浦校：「單疏鈔本有「著」字。」

養馬者曰扈，炊亨者曰養。○扈養，餘亮反。艾，魚廢反。【疏】注「艾草」至「曰養」。○解云：蓋于時猶然，是以何氏知之。今君勝鄭而不有，無乃失民臣之力乎？」無乃，猶得無。【疏】注「無乃猶得無」。○

解云：言得無失民臣之力乎？言其失民臣之力矣。莊

王曰：「古者杆不穿，皮不蠹，則不出於四方。杆，飲水器。穿，敗也。皮，裘也。蠹，壞也。言杆

穿皮蠹乃出四方。古者出四方朝聘征伐，皆當多少圖有所喪費，然後乃行爾。喻己出征伐，士卒死傷，固其宜也，不當以是故滅有鄭，恥不能早服也。○杆不，音于。

費，芳味反。【疏】注「杆飲水器」。○解云：其音于，若今

馬孟矣。舊說云：「杆」是「杆」字，^①若今食俗矣。案今

音作「于」，則舊說非。是以君子篤於禮而薄于

利，篤，厚也。不惜杆皮之費，而貴朝聘征伐者，厚於禮

義，薄於財利，要其人而不要其土。本所以伐鄭

者，欲要其人服罪過耳，不要取其土地，猶古朝聘欲厚禮

義，不顧杆皮。告從，從，服從。不赦不詳。善用

心曰詳。吾以不詳道民，災及吾身，何日之

有？」何日之有，猶無有日。既則晉師之救鄭者

至，荀林父也。^②曰：「請戰。」荀林父請戰。莊

王許諾。將軍子重諫曰：「晉，大國也。國

大衆彊。王師淹病矣，淹，久也。諸大夫廝役死者

是。君請勿許也。」莊王曰：「弱者吾威之，

彊者吾辟之，是以使寡人無以立乎天下。」

以是故，必使寡人無以立功名于天下。令之還師，

而逆晉寇。言還者，時莊王勝鄭去矣，會晉師至，復

還戰也。言寇者，傳序經意，^③謂晉如寇虜。莊王鼓

之，晉師大敗。晉衆之走者，舟中之指可

掬矣。時晉乘舟度鄆水戰，^④兵敗反走，欲急去，先人

^①「杆」字，杉浦校：「單疏鈔本「杆」作「杆」，「字」下夾

注「工旦反」。毛本並如此。按：「杆」當作「杆」。」

^②「父」，原作「又」，今據京都本、再造善本、中華本、閣本改。

^③「意」，原作「音」，今據余本、京都本改。

^④「度」，阮校：「鄂本「度」作「渡」。按下注云「使得過渡鄆水去也」，作「渡」字，此誤。」

舟者，斬後板舟者指，指隋舟中，身隨邲水中而死。可掬者，言其多也。以兩手曰掬。禮，天子造舟，諸侯維舟，卿大夫方舟，士特舟。○可掬，九六反，注同。扳，普顏反，又必顏反。造，七報反。【疏】注「禮天子造舟」至「士特舟」。①○解云：《釋水》文也。造，②孫氏云「比舟為梁」，郭氏云「比船為橋」。舊說云：「以舟為橋，詣其上而行過，故曰造舟也。」③言以舟為梁，故謂之造。造，成也。「諸侯維舟」，孫氏云「維連四船」，《音義》曰「維持使不動搖也」者是也。「大夫方舟」者，李氏云「併兩船曰方舟也」。「士特舟」者，郭注云「單船」，李氏云「一舟曰特舟」是也。案《爾雅》下文云「庶人乘桴」，④李氏曰「併木以渡，別尊卑」是也。此注引之不盡者，蓋何氏所見者無此文矣。案今孫、郭所注者，亦有其文。莊王曰：

「嘻！吾兩君不相好，敵大夫戰，言兩君者，林父本以君命來。百姓何罪？」令之還師，而佚晉寇。佚猶過，使得過渡邲水去也。⑤晉見莊王行義於陳，功立威行，嫉妬欲敗之，救鄭雖解，猶擊之不止，為其欲壞楚善行，以求二人，⑥故奪不使與楚成禮，而序林父於上，罪起其事。言「及」者，大臣及君，⑦不嫌晉直，明晉

汲汲欲敗楚爾。陸戰當舉地，而舉水者，大莊王閱隋水而佚晉寇。○而佚，音逸，注同。壞，音怪。【疏】注「晉見莊」至「立威行」。○解云：即上十一年討夏徵舒，是其行義也。討陳既得，鄭人遂服，是其功立威行也。○注「救鄭」至「之不止」。○解云：上文「令之還師」之下，注云：「言還者，時莊王勝鄭去矣，會晉師至，復還戰也。」以此言之，晉師未至之時，楚師已解去也，非謂晉人擊之令解也。言「猶擊之不止」者，謂欲一逐而擊之，非謂已擊也。

秋，七月。

冬，十有二月，戊寅，楚子滅蕭。日者，

①「持」，疑誤，何注作「特」，下疏引亦作「特」。

②「造」下，杉浦校：「單疏鈔本夾注『音七報反』四字。」

③「舟」下，杉浦校：「單疏鈔本夾注『一音作道反』五字。」

④「桴」下，杉浦校：「單疏鈔本夾注『音敷一音普侯反』七字。」

⑤「水」，京都本、再造善本作「來」。

⑥「二人」，阮校：「鄂本作『上人』，此誤。」

⑦「大」，阮校：「鄂本『大』作『以』，此誤。」

屬上有王言，今反滅人，故深責之。【疏】注「日者」至「深責之」。○解云：《春秋》之義，滅例書月，即莊十年「冬，十月，齊師滅譚」之屬是。今乃書日，故解之也。言屬上有王言，謂適上文云「莊王曰：『嘻！吾兩君不相好，百姓何罪？』」令之還師，而佚晉寇者，王霸之言也。王者之道，宜存人矜患，^①今反滅人，爲過深矣，是故書日變於常例，故曰「深責之」耳。「宋師伐陳」者，案諸家經皆有此文，唯賈氏注者闕此一經，疑脫耳。

晉人、宋人、衛人、曹人同盟于清丘。

宋師伐陳。衛人救陳。

十有三年，春，齊師伐衛。

夏，楚子伐宋。

秋，螽。先是新饑，而使歸父會齊人伐莒，賦斂不足，國家遂虛，下求不已之應。○螽，音終。【疏】注「先是新饑」。○解云：即十年冬書饑是也。○注「而使」至「伐莒」者。○解云：即上十一年「公孫歸父會齊人伐莒」是也。^②

冬，晉殺其大夫先穀。

十有四年，春，衛殺其大夫孔達。

十有四年，春，衛殺其大夫孔達。

夏，五月，壬申，曹伯壽卒。日者，公子喜

時父也，緣臣子尊榮，莫不欲與君父共之，故加錄之，所以養孝子之志。許人子者，必使父也。^③【疏】注「日者公子」至「使父也」。○解云：正以曹爲小國，卒月葬時，即昭十八年三月，曹伯須卒，「秋，葬曹平公」之屬是。今而書日，故以加錄解之也。公子喜時之讓，^④在成十三年「曹伯廬卒」處也。其傳云云之說，在昭二十年「曹公孫會自鄭出奔宋」之下。云「所以養孝子之志」者，正以喜時之讓，而《春秋》尊榮其父，故曰養孝子之志也。云「許人子者，必使人父也」者，謂喜時爲子，必使其人父亦尊榮，是以加錄之，似若襄二十九年傳云「以季子爲臣，則宜有君者也」之類也。

① 「存人矜患」，杉浦校：「單疏鈔本『人』作『亡』，是。『矜』作『矜』。」

② 「十一年」，原作「十二年」。杉浦校：「單疏鈔本『二』作『一』。按：作『十一年』是也。」今據改。

③ 「必使父也」，阮校：「元本同。閩、監、毛本『父』上有『人』字。按：疏中引注亦作『必使人父也』，此脫。」

④ 「時」，原脫，今據閣本補。

晉侯伐鄭。

秋，九月，楚子圍宋。月者，惡久圍宋，使易

子而食之。○惡，烏路反。【疏】注「月者」至「而食之」。

○解云：正以凡圍例時，即上十二年春「楚子圍鄭」之屬是。今而書月，故解之。言「使易子而食之」者，下十五年傳文。

葬曹文公。

冬，公孫歸父會齊侯于穀。

十有五年，春，公孫歸父會楚子于宋。

宋見圍不得與會。地以宋者，善內為救宋行，雖不能解，猶為見人之厄則矜之，故養遂其善意，不嫌與實解宋同文者，平事見刺皆可知。○與，音預。【疏】注「宋見」至「皆可知」。○解云：《春秋》盟會之義，以國都為地名者，皆是主人與之可知，即隱元年「九月，及宋人盟于宿」，注云：「宿不出主名者，主國主名與可知，故省文，明宿當自首其榮辱也。」今宋見圍，不得與會，而地以宋者，正欲善內為救宋行，養遂其善意，故地于宋耳。「不嫌與實解宋同文者，平事見刺皆可知」者，魯春會楚子于宋，至夏宋、楚始平，忖度其事，則知魯人不能平得之，宋圍自解也。

且下傳云：「此皆大夫也，其稱人何？貶。曷為貶？平者在下也。」注云：「言在下者，譏二子在君側，不先以便宜反報歸美于君，而生事專平，故貶稱人。」然則二子專平，口云易子析骸，明其急矣，遂不告君，是以見刺，被貶稱人。以此言之，宋圍不解，亦可知矣，故言平事見刺皆可知。舊云「見刺者，謂魯人見刺也」者，疑之。^①

夏，五月，宋人及楚人平。外平不書，

此何以書？據上楚、鄭平不書。【疏】注「據上」至

「不書」。○解云：適上十二年春「楚子圍鄭」之時，傳云「莊王親自手旌，左右搗軍，^②退舍七里」，是其平也。但經不書之，故難之。大其平乎己也。己，二大夫。

何大乎其平乎己？據大夫無遂事。【疏】注「據大

夫無遂事」。○解云：即莊十九年傳云「大夫無遂事，此其言遂何？聘禮，大夫受命不受辭」是也。莊王圍

宋，軍有七日之糧爾，盡此不勝，將去而歸爾。於是使司馬子反乘堙而闚宋城，宋華

① 「之」，阮校引浦鏜云：「疑『非』字誤。」

② 「搗」，原作「偽」，今據中華本、閣本改。

元亦乘堙而出見之。堙，距堙，土城具。①【疏】

「軍有七日之糧」至「歸爾」。○解云：考諸舊本，或云「軍有七日之糧爾，七日盡此不勝，將去而歸爾」。即云更留七日之糧，有糧而不得勝，②將去宋而歸爾。今定本無下「七日」二字。司馬子反曰：「子之國何如？」

華元曰：「憊矣。」曰：「何如？」問憊意也。○

憊，皮誠反。曰：「易子而食之，析骸而炊之。」析，破。骸，人骨也。司馬子反曰：「嘻！

甚矣憊。雖然，雖如所言。吾聞之也，圍者古

有見圍者。柑馬而秣之，秣者，以粟置馬口中。柑

者，以木銜其口，不欲令食粟，示有畜積。○柑，其廉反，

以木銜馬口。使肥者應客，示飽足也。是何子

之情也？」猶曰「何大露情」。【疏】「是何子之情也」。

○解云：言「是何」者，猶言是何大然也。子之情者，言子

之露情也。是以何氏云「猶曰何大露情」。華元

曰：「吾聞之，君子見人之厄則矜之，矜，閔。

小人見人之厄則幸之。幸，僥幸。吾見子之

君子也，是以告情于子也。」司馬子反

曰：「諾。諾者，受語辭。勉之矣！勉猶努力。

使努力堅守之。吾軍亦有七日之糧爾，盡此不勝，將去而歸爾。」揖而去之，反于莊王。反報於莊王。莊王曰：「何如？」司馬子反

曰：「憊矣！」曰：「何如？」曰：「易子而

食之，析骸而炊之。」莊王曰：「嘻！甚矣憊。雖然，雖已憊。吾今取此，然後而歸

爾。」意未足也。司馬子反曰：「不可。臣已

告之矣，軍有七日之糧爾。」莊王怒曰：「吾

使子往視之，子曷爲告之？」司馬子反

曰：「以區區之宋，區區，小貌。猶有不欺人

之臣，可以楚而無乎？是以告之也。」莊

王曰：「諾。先以諾受，絕子反語。舍而止。受命

①「土」，阮校：「鄂本『土』作『上』，當據正。」

②「更留七日之糧有糧而不得勝」，杉浦校：「單疏鈔本作『更留七日盡此資糧而不得勝』。」

築舍而止，^①示無去計。雖然，雖宋已知我糧短。吾猶取此然後歸爾。」欲徵糧待勝也。司馬子反曰：「然則君請處于此，臣請歸爾。」莊王曰：「子去我而歸，吾孰與處于此？吾亦從子而歸爾。」引師而去之。故君子大其平乎己也。大其有仁恩。此皆大夫也，其稱人何？貶。曷爲貶？據大其平。平者在下也。言在下者，譏二子在君側，不先以便宜反報歸美于君，而生事專平，故貶稱人。等不物貶，^②不言遂者，在君側無遂道也。以主坐在君側遂爲罪也，知經不以文實貶也。凡爲文實貶者，皆以取專事爲罪。月者，專平不易。【疏】注「等不勿貶」至「道也」。○解云：案莊十九年「秋，公子結媵陳人之婦于鄆。遂及齊侯、宋公盟」之下，傳云：「大夫無遂事，此其言遂何？聘禮，大夫受命不受辭」，出竟乃得專之。以此言之，則知大夫在君側無遂道也。是以此注言等欲見大夫專平爲罪不勿貶，但當言遂，亦足以見其專平矣。所以不言遂者，正以在君側無遂道故也。若當言楚圍宋，^③宋華元、楚子反遂平于宋

矣。○注「以主」至「爲罪」。○解云：凡言遂者，專事之辭也。爲文實貶者，皆以時無王霸，諸侯專事，雖違古典，于時爲宜，是以《春秋》文雖貶惡，其實與之，即僖元年齊師云云，救邢貶齊侯稱師，刺其專事，不言狄人滅邢而爲之諱，見其實與是也。今此以主坐爲在君側專事爲罪，更無起文，則知經稱人者，實爲專貶之稱人，非是實與而文不與矣。所以反覆解之者，正以凡爲文實貶者，皆以取專事爲罪故也。○注「月者專平不易」。○解云：正以定十一年「冬，及鄭平」，^④不書月者，易故也。昭七年「春，王正月，暨齊平」，注云「月者，刺內暨暨也」，定十年「王三月，及齊平」，注云「月者，頰谷之會，齊侯欲執定公，故不易」之類皆如此。

六月，癸卯，晉師滅赤狄潞氏，以潞子

①「受」，阮校：「鄂本作『更』，此誤。」

②「等不物貶」，阮校：「疏標起訖亦作『等不勿貶』，言與不勿貶相等，謂貶也。此本『勿』作『物』，誤，當訂正。」

③「若」下，阮校引浦鏜云：「當脫『言遂』二字。」

④「一」，原作「二」。阮校：「何校本『二』作『一』，是也。」今按：「冬，及鄭平」在定公十一年，據改。

嬰兒歸。潞何以稱子？據其滅稱氏。潞子

之爲善也躬，足以亡爾。躬，身。雖然，君子

不可不記也。離于夷狄，疾夷狄之俗而去離之，

故稱子。而未能合于中國，未能與中國合同禮義，

相親比也，故猶繫赤狄。晉師伐之，中國不救，

狄人不有，是以亡也。以去俗歸義亡，故君子閔

傷進之。日者，痛錄之。名者，示所聞世始錄小國也。

錄以歸者，因可責而責之。責而加進之者，明不當絕，當

復其氏。【疏】注「以去」至「其氏」。○解云：言「以去俗

歸義亡」者，謂去離夷狄之俗，而欲歸中國之義，卒無救

助者，是以亡也。正以文在蠻夷氏之下，故取以說之。

云「日者，痛錄之」者，正以凡滅例月，今此書日，故以爲

哀痛而詳錄之耳。云「名者，示所聞世始錄小國也」者，

正以僖二十六年「秋，楚人滅隗，以隗子歸」，彼注云：「不

名者，所傳聞世，見治始起，責小國略。」然則此書名者，

示所聞世始錄小國也。云「錄以歸者，因可責而責之」

者，謂因其行進在可責之限，故書以歸，責其不死位，是

以僖二十六年「以隗子歸」之下，何氏云「書以歸者，惡不

死位」是也。云「明不當絕，當復其氏者」，言其行既進，

明不當絕滅其國，還當復其潞氏以爲國矣。

秦人伐晉

王札子殺召伯、毛伯。王札子者何？

長庶之號也。天子之庶兄。札者，冠且字也。禮，天

子庶兄冠而不名，所以尊之。子者，王子也。天子不言

子弟，故變文王札繫先王以明之。①不稱伯仲者，辟同母

兄弟，起其爲庶兄也。主書者，惡天子不以禮尊之而任

以權，至令殺尊卿二人。不言其大夫者，挈也，惡二大夫

居尊卿之位，爲下所提挈而殺之。大夫相殺不稱人者，

正之。諸侯大夫顧弑君重，故降稱人。王者至尊，不得

顧。【疏】「王札子者何」。○解云：欲言王子，以札問之，

欲言其非，而經有王子之文，故執不知問。○注「天子」

至「得顧」。○解云：言禮天子庶兄冠而不名，所以尊之

者，時王之制，與《春秋》同也。言既加冠之後，天子不復

名之，所以尊之也。云「子者，王子也。天子不言子弟，

故變文上札繫先王以明之」者，言「子者，王子也」者，王

①「王札」，閩、監、毛本作「上札」。阮校：「此本「上」作「王」，誤。解云：「謂以札於子上，以札近先王。」今按：本疏亦引作「上札」。

以子在札下，^①故須解之。言「天子不言子弟」者，謂不言在位子弟也，即文元年注云「不稱王子者，時天子諸侯不務求賢，而專貴親親，尤其在位子弟，^②刺其早任以權也」是也。至於出奔被殺，仍自言子弟，即「王子瑕奔晉」，「天王殺其弟年夫」之屬是。言「故變文」者，謂變文不言王子也。言「上札繫先王以明之」者，謂以札於子上，以札近先王，明其今王之庶兄矣。云「不稱伯仲者，辟同母兄弟，起為庶兄也」者，若其與君同母者，即稱伯仲字，^③即上十年「秋，天王使王季子來聘」，彼傳云「其稱王季子何？貴也。其貴奈何？母弟也」是也。今稱王札子，^④故言「辟同母兄弟，起其為庶兄也」云云。「主書者，天子不以禮尊之而任以權，至令殺尊卿二人」者，正以經不稱爵，知非公，故云「不以禮尊之」矣。正以堪殺二卿，故知任以權也。云「不言其大夫者，挈也」者，由其為下所提挈而殺之，失大夫位，故不云大夫也。云「居尊卿之位」者，正以稱其五十字，知是尊卿耳。云「大夫相殺不稱人者，正之」者，以文十六年「宋人弑其君處白」之下，傳云「大夫弑君稱名氏，賤者窮諸人」，注云：「賤者，謂士也，士正自當稱人。」「大夫相殺稱人，賤者窮諸盜」，注云：「降大夫使稱人，降士使稱盜者，所以別死刑有輕重也。」

然則大夫相殺例合稱人，今此不稱人者，正之使稱王札子故也。所以正之者，如下云「諸侯大夫顧弑君重，故降稱人」者，即大夫弑君稱名氏，大夫相殺稱人是也。云「王者至尊，不得顧」者，言至尊之人，無有弑之理，不可顧，是以大夫相殺，不假降之稱人矣。

秋，螽。從十三年之後，上求未已，而又歸父比年再出會，內計稅畝，^⑤百姓動擾之應。【疏】注「從十三年」至「之應」。○解云：即上十三年「秋，螽」，^⑥注云「先是新饑，而使歸父會齊人伐莒，賦斂不足，國家遂虛，下求不已之應」，是以此注足之云爾。云「而又歸父比年再出會」者，即上十四年「冬，公孫歸父會齊侯于穀」，十五年

①「王」，杉浦校：「單疏鈔本作『正』，當作『正』。」

②「尤其在位子弟」，阮校：「浦鏜云：上脫『故』字。是也。」

③「伯仲」，杉浦校：「單疏鈔本作『五十』，是也。」

④「王札子」，京都本作「王札字」。杉浦校：「單疏鈔本作『二十字』。阮氏《校勘記》云：閩、監、毛本『二十』改『王札』。」

⑤「計」，阮校：「閩、監、毛本同，鄂本作『議』。」

⑥「螽」，阮校：「當依經作『螽』。」

「春，公孫歸父會楚子于宋」是也。

仲孫蔑會齊高固于牟婁。^①

初稅畝。初者何？始也。稅畝者

何？履畝而稅也。時宣公無恩信於民，民不肯盡

力於公田，故履踐案行，擇其善畝穀最好者，稅取之。

【疏】「初者何」。○解云：賦稅之式，國之常經，今而言

初，故執不知問。○「稅畝者何」。○解云：什一而行，明

王舊典，今而變文謂之稅畝，故執不知問。初稅畝何

以書？譏。何譏爾？譏始履畝而稅也。

何譏乎始履畝而稅？據用田賦不言初，亦不言

稅畝。【疏】注「據用田」至「稅畝」。○解云：即哀十二年

「春，用田賦」是也。然則用田賦亦是改古易常，而不言

初，又不言稅畝，今此特言初稅畝以譏之，故難之也。

古者什一而藉。什一以借民力，以什與民，自取其

一爲公田。古者曷爲什一而藉？據數非一。

什一者，天下之中正也。多乎什一，大桀

小桀，奢泰多取於民，比於桀也。【疏】「多乎什一大桀

小桀」。○解云：夏桀無道，重賦於人，今過什一，與之相

似。若十取四五，則爲桀之大貪，若取二三，則爲桀之小

貪，故曰「多乎什一，大桀小桀」。所以不言紂者，略舉以

爲說耳。舊說云：「不言紂者，近事不嫌不知。」寡乎什

一，大貉小貉。^②蠻貉無社稷宗廟百官制度之費，稅

薄。○大貉，亡百反。費，芳味反。【疏】「寡乎」至「小

貉」。○注「蠻貉」至「稅薄」。○解云：若十四五乃取其

一，則爲大貉行，若二十三乃取一，則爲小貉行，故曰

寡乎十一，則大貉小貉也。然則多於什一則有爲桀之

譏，寡於十一則有蠻貉之恥，是以什一而稅，三王所不

易，故傳比于中正之言。什一者，天下之中正

也。什一行而頌聲作矣。頌聲者，大平歌頌之

聲，帝王之高雅也。《春秋》經傳數萬，指意無窮，狀相須

而舉，相待而成，至此獨言頌聲作者，民以食爲本也。夫

飢寒並至，^③雖堯舜躬化，不能使野無寇盜。貧富兼并，

①「牟婁」，阮校：「唐石經、諸本同。《左氏》、《穀梁》無

「婁」字。」

②「大貉」，《釋文》作「大貉」。

③「飢」，阮校：「鄂本、閩本同。監、毛本改「饑」，下及

疏同。

雖臯陶制法，不能使彊不陵弱。是故聖人制井田之法而口分之：一夫一婦受田百畝，以養父母妻子，五口爲一家，公田十畝，即所謂十一而稅也。^①廬舍二畝半，凡爲田一頃十二畝半，八家而九頃，共爲一井，故曰井田。廬舍在內，貴人也。公田次之，重公也。私田在外，賤私也。井田之義：一曰無泄地氣，二曰無費一家，三曰同風俗，四曰合巧拙，五曰通財貨。因井田以爲市，故俗語曰市井。種穀不得種一穀，以備災害。田中不得有樹，以妨五穀。還廬舍種桑荻雜菜，^②畜五母雞兩母豕，瓜果種疆畔，女上蠶織，^③老者得衣帛焉，得食肉焉，死者得葬焉。多於五口，名曰餘夫，餘夫以率受田二十五畝。十井共出兵車一乘。司空謹別田之高下善惡，分爲三品：上田一歲一墾，中田二歲一墾，下田三歲一墾。肥饒不得獨樂，墾墾不得獨苦，故三年一換土易居，^④財均力平，兵車素定，是謂均民力，彊國家。在田曰廬，在邑曰里。一里八十戶，八家共一巷。中里爲校室，選其耆老有高德者名曰父老，其有辯護伉健者爲里正，皆受倍田，得乘馬。父老比三老孝弟官屬，^⑤里正比庶人在官吏。^⑥民春夏出田，秋冬入保城郭。田作之時，春，父老及里正旦開門坐塾上，晏出後時者不得出，莫不持樵者不得入。

五穀畢入，民皆居宅，里正趨緝績，男女同巷，相從夜績，至於夜中，故女功一月得四十五日作，從十月盡正月止。男女有所怨恨，相從而歌，飢者歌其食，勞者歌其事。男年六十，女年五十無子者，官衣食之，使之民間求詩，鄉移於邑，邑移於國，國以聞於天子。故王者不出牖戶，盡知天下所苦，不下堂而知四方。十月事訖，父老教於校室，八歲者學小學，十五者學大學。其有秀者移於鄉學，鄉學之秀者移於庠，庠之秀者移於國學。學於小學，諸

①「十一」，阮校：「閩、監、毛本作「什一」。」

②「荻」，阮校：「按：《食貨志》無「荻」字，此「荻」當作「菽」，菽者，楸之假借字，楸者，梓也。」

③「上」，阮校：「閩、監、毛本同，浦鏜云：「工」誤「上」。按：「上」同「尚」。」

④「土」，原作「主」，今據鄂本、京都本、再造善本改。

⑤「比」，原作「此」。阮校：「鄂本「此」作「比」，當據正。」今據改。

⑥「里」，原作「墾」，今據京都本、再造善本、中華本、閩本改。「官」下，阮校：「鄂本有「之」字，《儀禮經傳通解》同。」

侯歲貢小學之秀者於天子。學於大學，其有秀者命曰進士，^①行同而能偶，別之以射，然後爵之。士以才能進取，君以考功授官。三年耕餘一年之畜，九年耕餘三年之積，三十年耕有十年之儲，雖遇唐堯之水，殷湯之旱，民無近憂，四海之內莫不樂其業，故曰頌聲作矣。○數，所主反。以食，音嗣。伉，苦浪反，一音苦杏反。塾，音淑。莫，音暮。【疏】「什一行而頌聲作矣」。○解云：頌者，太平之歌。案文、宣之時，乃升平之世也，而言頌聲作者，因事而言之故也。何者？案文、宣之時，乃升平之世，言但能均其衆寡，等其功力，平正而行，必時和而年豐，什一而稅之，則四海不失業，歌頌功德而歸鄉之，故曰頌聲作矣。不謂宣公之時，實致頌聲。○注「帝王之高致也」。○解云：謂帝王之行清高，乃致頌聲，故曰高致也。○注「春秋經傳」至「作矣」。○解云：言《春秋》經與傳數萬之字，論其科指意義實無窮，然其上下經例相須而舉，其上下意義相待而成。以此言之，則非一言可盡，至此獨言頌聲作者，正以此處論稅畝之事，若稅畝得所，以致太平，故云「民以食爲本」也。云「夫飢寒並至，雖堯舜躬化，不能使野無寇盜」云云者，是謂假設之辭耳。云「是故聖人制井田之法而口分之，一夫一婦受田百畝」云云

以下，皆是時王之制。云「井田之義，一曰無泄地氣」者，謂其冬前相助犁。云「二曰無費一家」者，謂其田器相通。云「三曰同風俗」者，謂其同耕而相習。云「四曰合巧拙」者，謂其治耒耜。云「五曰通財貨」者，謂井地相交，遂生恩義，貨財有無，可以相通。云「因井田以爲市，故俗語曰市井」者，古者邑居，秋冬之時入保城郭，春夏之時出居田野，既作田野，遂相交易，井田之處而爲此市，^②故謂之市井。云「里正旦開門坐塾上」者，即鄭注《學記》曰「古者仕焉而已者，歸教於閭里，朝夕坐於門，門側之堂謂之塾」是也。

冬，蜚生。未有言蜚生者，此其言蜚生何？蜚即蜚也，始生曰蜚，大曰蜚。○蜚，與專反。蜚生不書，此何以書？幸之也。幸，僥幸。【疏】「蜚生不書」。○解云：謂例不書之。幸之者何？聞災當懼，反喜，非其類，故執不知問。猶曰受

①「進」，阮校：「鄂本『進』作『造』，《儀禮經傳通解》同，當據正。」

②「井」上，杉浦校：「單疏鈔本有『因』字，爲長。」

之云爾。「受之云爾」者何？上變古易

常，上謂宣公，變易公田古常舊制而稅畝。【疏】「受之

云爾者何」。○解云：災是害物，宜避之，今而云受之，於

義似乖，故執不知問。應是有天災，應是變古易

常而有天災，民用飢。其諸則宜於此焉變矣。

言宣公於此天災饑後，能受過變，明年復古行中，冬大

有年，其功美過於無災，^①故君子深為喜而僥倖之。變蠲

言蠲，以不為災書，起其事。

饑。

十有六年，春，王正月，晉人滅赤狄甲

氏及留吁。言「及」者，留吁行微不進。

夏，成周宣謝災。^②成周者何？東周

也。後周分為二，天下所名為東周。名為成周者，本成

王所定名，天下初號之云爾。○宣謝災，《左氏》作「宣謝

火」。^③【疏】「成周者何」。○解云：欲言天子正居，經無

京師之文，欲言是邑，而錄其災，故執不知問。○注「後

周」至「之云爾」。○解云：何氏之意，以成周為天子正

居，但至昭二十二年夏景王崩，敬王即位，王子猛與之爭

立，入于王城，自號西周，是故天下之人因號成周為東周矣。是以昭二十二年「秋，劉子、單子以王猛入于王城」，傳云「王城者何？西周也」，注云「時居王城邑，自號西周王」。二十六年「冬，十月，天王入于成周」，傳云「成周者何？東周也」，注云「是時王猛自號為西周，天下因謂成周為東周」也。云名為成周者，即鄭注《書序》云「居攝七年，天下太平，而此邑成，乃名曰成周」也者，是其名作成周之義矣。宣謝者何？宣宮之謝也。宣宮，周宣王之廟也。至此不毀者，有中興之功。室有東西廂曰廟，無東西廂有室曰寢，無室曰謝。【疏】「宣謝者何」。○解云：宣王親盡，不宜有廟，今災其榭，故執不知問。○注「室有東西」至「曰謝」。○解云：皆《釋宮》文。李氏

①「其」，阮校：「鄂本作「有」。」

②「宣謝災」，阮校：「鄂本、閩本同。監、毛本「謝」作「榭」，下及注、疏並同。唐石經缺。惠棟云：襄九年

疏引作「謝」，古無「榭」字，或止作「射」，周邠敦銘曰「王格于宣射」，是也。三傳皆作「謝」，俗從木。又「災」，《左傳》作「火」。

③「謝」，宋本《釋文》作「榭」。

曰「室有東西廂，^①謂宗廟殿有東西小堂也」，孫氏云「夾室前堂」。「無東西廂有室曰寢」者，郭注云「但有大室」。

云「無室曰榭」者，但有大殿無室內名曰榭，郭注云「榭即今堂堦」是也。何言乎「成周宣謝災」？據天子

之居稱京師，宋災不別所燒。【疏】注「據天子」至「所燒」。○解云：即桓九年「紀季姜歸于京師」，傳云「京師者何？天子之居也。京者何？大也。師者何？衆也。天子之居，必以衆大之辭言之」是也。云「宋災不別所燒」者，即襄三十年夏五月「宋災」是也。特據宋災者，

以其王者之後，與周相類也。樂器藏焉爾。宣王中興所作樂器。【疏】注「宣王」至「樂器」。○解云：蓋夷、厲之時樂器有壞，故宣王作之，不謂更造別樂，何者？正以考諸古典，不見宣王別有樂名故也。成周宣謝

災，何以書？記災也。外災不書，此何以書？新周也。新周故分別有災，^②不與宋同也。孔子以《春秋》當新王，上黜杞，下新周，而故宋，因天災中興之樂器，示周不復興，故繫宣謝於成周，使若國文，黜而新之，從爲王者後記災也。【疏】注「使若」至「記災也」。○解云：使周成爲國，與宋、齊之屬相似。云「從爲

王者之後記災也」者，^③即襄九年「宋火」之下，傳云「外災不書？此何以書？爲王者之後記災也」是也。

秋，鄒伯姬來歸。嫁不書者，爲媵也。來歸

書者，後爲嫡也。死不卒者，已棄，有更適人之道，或時爲大夫妻，故不得待以初也。棄歸例有罪時，無罪月。

【疏】注「嫁不」至「罪月」。○解云：正于《春秋》上下，魯女嫁爲諸侯夫人者，無不書之，即「叔姬歸于紀」、「伯姬歸于宋」之屬是也。今此不書，故知爲媵。若然，案隱七年「叔姬歸于紀」，注云「叔姬者，伯姬之媵也」，「媵賤書者，後爲嫡」。然則彼後爲嫡，初去則書，此亦後得爲嫡，而初嫁不書者，蓋以不賢故也。是以彼注云「媵賤書者，後爲嫡，終有賢行。紀侯爲齊所滅，紀季以鄆入于齊，叔姬歸之，能處隱約，全竟婦道，故重錄之」是也。然則彼以終有賢行，故初去得書，此則初去不書，明其無賢也。

①「廂」，原作「廟」，今據京都本、再造善本、中華本、閣本改。

②「有」，余本作「所」。

③「之」，阮校：「閩、監、毛本無。按：注中亦無，乃衍文。」

正以其嫡不書，則知伯姬非姪娣也。左媵右媵皆尊于嫡姪娣，故後得爲嫡耳。云「來歸書者，後爲嫡也」者，正以紀叔姬後爲嫡，卒葬皆書，即莊二十九年「紀叔姬卒」，三十年「葬紀叔姬」是也。今此被出亦待書見，^①故知後得爲嫡矣。云「死不卒者，已棄」云云，案莊二十九年「紀叔姬卒」，注云「國滅卒者，從夫人行，待之以初也」。然則彼叔姬者，莊十二年「歸于鄆」時從夫人行，故雖國滅，猶待之以初。今此伯姬或時爲大夫妻，故不得作夫人待之，是以不復書其卒矣。云云之說，在莊二十九年。云「棄歸例」云云，「有罪時」者，此文書秋是也。「無罪月」者，即成五年「春，王正月，杞叔姬來歸」之屬是也。

冬，大有年。

十有七年，春，王正月，庚子，許男錫我卒。○錫，思歷反。丁未，蔡侯申卒。

夏，葬許昭公。

葬蔡文公。不月者，齊桓、晉文沒後，先背中國

與楚，故略之。與楚在文十年。【疏】注「不月」至「文十年」。○解云：正以卒日葬月，大國之常例，今此蔡侯不月，故解之。云「與楚在文十年」者，即文十年冬「楚子、

蔡侯次于屈貉」者是也。

六月，癸卯，日有食之。是後邾婁人戕鄆

子，四國大夫敗齊師于鞌，齊侯逸獲，君道微，臣道強之所致。○鞌，音安。【疏】注「是後」至「之所致」。○解云：即十八年秋，「邾婁人戕鄆子于鄆」，傳云「殘賊而弑之也」是也。^②云「四國大夫敗齊師于鞌」者，即成二年夏六月季孫行父云云，「會晉郤克、衛孫良夫、曹公子手，及齊侯戰于鞌，齊師敗績」是也。言「齊侯佚獲」者，即成二年「秋，七月，齊侯使國佐如師」，傳云「君不使乎大夫，此其行乎大夫何？佚獲也」，注云「佚獲者，已獲而逃亡也。當絕賤，使與大夫敵體以起之」是也。

己未，公會晉侯、衛侯、曹伯、邾婁子同盟于斷道。○斷，音短，又大短反。

秋，公至自會。

冬，十有一月，壬午，公弟叔肸卒。稱字

①「待」，杉浦校：「單疏鈔本『待』作『得』。當作『得』。」

②「弑」，單疏鈔本、何校本作「殺」。阮校引浦鏜云：「『殺』誤『弑』。」

者，賢之。宣公篡立，叔肸不仕其朝，不食其祿，終身於貧賤，故孔子曰「篤信好學，守死善道。危邦不入，亂邦不居。天下有道則見，無道則隱」，此之謂也。禮，盛德之士不名，天子上大夫不名。《春秋》公子不爲大夫者不卒，卒而字者，起其宜爲天子上大夫也。孔子曰：「興滅國，繼絕世，舉逸民，天下之民歸心焉。」

十有八年，春，晉侯、衛世子臧伐齊。

公伐杞。

夏，四月。

秋，七月，邾婁人戕鄫子于鄫。「戕鄫

子于鄫」者何？殘賊而殺之也。支解節斷

之，故變殺言戕。戕則殘賊，^①惡無道也。言「于鄫」者，刺鄫無守備。小國本不卒，故亦不日。○斷，音短。

【疏】「戕鄫子于鄫者何」。○解云：欲言殘賊，於鄫國都，

欲言非殘賊，戕者殘文，故執不知問。○注「小國本」至

「不日」。○解云：正以凡滅例月，即莊十年「冬，十月，齊

師滅譚」之屬是。若有所責者，則書日，即上十二年十二

月，「戊寅，楚子滅蕭」，注云「日者，屬上有王言，今反滅

人，故深責之」是也。然則邾婁無道，殘賊人君于其國

都，與滅相似，亦宜書日，以責其暴。而不日者，正以鄫爲微國，本不合卒，是以略之，不書其日也。而僖十九年夏六月，「己酉，邾婁人執鄫子用之」，亦是無道，與此相似，而書日者，彼注云「日者，魯不能防正其女，以至於此，明當痛其女禍而自責之」是也。

甲戌，楚子旅卒。何以不書葬？據日

而名。【疏】注「據日而名」。○解云：書日書名，全一是

諸夏大國之例，是以弟子因遂責其不與大國例同書葬是

也。^②吳、楚之君不書葬，辟其號也。旅即莊

王也。葬從臣子辭當稱王，故絕其葬，明當誅之。至此

卒者，因其有賢行。○行，下孟反。【疏】注「至此」至「賢

行」。○解云：正以已前未有書楚子卒處故也。若文十

八年春，「秦伯罃卒」，彼注云：「秦穆公也。至此卒者，因

其賢。」

①「殘」，原作「賤」，今據余本、京都本、再造善本、中華本、閣本改。

②下「是」字，杉浦校：「單疏鈔本無「是」字。按：「是」字疑衍。」

公孫歸父如晉。

冬，十月，壬戌，公薨于路寢。

歸父還自晉，至櫟，遂奔齊。還者

何？善辭也。何善爾？歸父使於晉，上

如晉是。【疏】「還者何」。○解云：以大夫使反，例不書

至，今乃書還，違於常例，故執不知問。還自晉，至

櫟，聞君薨家遣，家爲魯所逐遣，^①以先人弑君故

也。【疏】注「家爲」至「弑君故也」。○解云：即成十五年

春，「仲嬰齊卒」之下，傳言公子遂「殺叔仲惠伯，弑子赤

而立宣公。宣公死，成公幼，臧宣叔者相也，君死不哭，

聚諸大夫而問焉，曰：「昔者叔仲惠伯之事，孰爲之？」諸

大夫皆雜言曰：「仲氏也。其然乎？」於是遣歸父之

家，然後哭君。歸父使乎晉，還自晉，至櫟，聞君薨家遣，

墯帷哭君成踊，反命于介，自是走之齊」是也。墯帷，

婦地曰墯，今齊俗名之云爾。將袒踊，^③故設帷重形。○

墯帷，音善，掃地張帷。哭君成踊，踊，辟踊也。禮必

踊者，如嬰兒之慕母矣。成踊，成三日五哭踊之禮。禮，

臣爲君本服斬衰，故成踊，比二日朝莫哭踊，三日朝哭

踊，莫不復哭踊，去事之殺也。○殺，所戒反。【疏】注

「成三日」至「之禮」者。○解云：出《禮記·奔喪》也。

反命乎介，^④因介反命。禮，卿出聘，以大夫爲上介，

以士爲衆介。【疏】注「禮卿」至「衆介」。○解云：出《聘

禮》。自是走之齊。主書者，善其不以家見逐怨懟，

成踊哭君，終臣子之道，起時莫能然也。言「至櫟」者，善

其得禮於櫟。言「遂」者，因介反命是也，不待報罪也。^⑤

遂弑君本當絕，^⑥小善錄者，本宣公同篡之人，又不當逐。

不日者，伯討可逐，故從有罪例也。○懟，直類反。【疏】

注「不日」至「例也」。○解云：凡內大夫出奔例無罪者

日，^⑦即襄二十三年「冬，十月，乙亥，臧孫紇出奔邾婁」，

昭十二年「冬，十月，公子整出奔齊」之屬是也。今此歸

①「逐」，原作「遂」，今據余本、中華本、閩本改。

②「雜言」，阮校：「閩、監、毛本作『雜然』，與傳同。」

③「袒」，原作「祖」，今據中華本、閩本改。

④「反命乎介」，阮校：「唐石經、諸本同，成十五年傳作

「反命于介」。

⑤「罪」，阮校：「鄂本作『非』。」

⑥「遂」，余本、鄂本、京都本、再造善本作「逐」。

⑦「凡」，原作「几」，今據中華本、閩本改。

父亦無罪出奔，不日者，正以仲遂弑君，其家合沒，但與宣公同謀，魯人不合逐之。若作伯討之時，歸父可逐，故從有罪之例矣。

監本附音春秋公羊注疏宣公卷第十六

監本附音春秋公羊注疏成公卷第十七

起元年，盡十年

何休學

元年，春，王正月，公即位。

二月，辛酉，葬我君宣公。

無冰。周二月，^①夏十二月。《尚書》曰「舒，恒燠

若」，^②《易》京房傳曰「當寒而溫，倒賞也」。^③是時成公幼少，季孫行父專權，而委任之所致。○舒恒，如字，緩也。《尚書》作「豫」。「奧」，本又作「燠」，於六反，煖也。少，詩召反。【疏】注「尚書」至「燠若」。○解云：《洪範》文。舒，遲也。恒，常也。若，順也。言人君舉事太舒，則有常燠之咎氣來順之是也。○注「易京」至「賞也」。○解云：凡為賞罰，宜出君門，而臣下行之，故曰「倒賞」也。是以《洪範》云「唯辟作福，唯辟作威，唯辟玉食」，鄭氏云：「此凡君抑臣之言也，作福專慶賞，作威專刑罰，玉食備珍美。」又云「臣之有作福作威玉食，其害于而家，凶

于而國」，鄭氏云「害于汝家，福去室凶，凶于汝國，亂下民」是也。然則是時成公幼少，季孫專政，是以無冰矣。桓十四年「無冰」之下，何氏云：「此夫人淫泆，陰而陽行之所致。」襄二十八年「無冰」之下，何氏云：「豹羯為政之所致。」皆與此注合。

三月，作丘甲。何以書？譏。何譏爾？譏始丘使也。四井為邑，四邑為丘。甲，鎧

^①「二」，原作「正」，今據余本、中華本、閩本改。

^②「舒恒燠若」，阮校：「閩、監、毛本同。《釋文》：「舒恒，《尚書》作「豫」。奧若，本又作「燠」。《經義雜記》曰：「《尚書》「厥民燠」，《五帝本紀》作「其民燠」，蓋古文《尚書》「厥民奧」，今文《尚書》「厥民燠」。《釋文》引馬云「煖也」，是馬從今文讀。」按：何氏今文之學也，引《尚書》作「恒奧若」，是今文「燠」亦作「奧」。補校曰：「按段玉裁云：偽孔本作「豫」，鄭、王本作「舒」，《群經音辨》引作「舒常奧若」，云何休讀今本作「燠」。按：《音辨》「恒」作「常」，避宋諱也。」

^③「倒賞」，原作「例賞」。阮校：「按：「例」當「倒」字之誤也。此本疏云「凡為賞罰，宜出君門，而臣下行之，故曰倒賞也」，可證。襄廿八年疏引作「倒置」，「置」字誤，「倒」字不誤。」今據余本、閩本改。

也。讎始使丘民作鎧也。古者有四民：一曰德能居位曰士，二曰辟土殖穀曰農，三曰巧心勞手以成器物曰工，四曰通財粥貨曰商。^①四民不相兼，然後財用足。月者，重錄之。○鎧，苦代反。^②辟，婢亦反。粥，羊六反。【疏】「讎始丘使也」。○解云：謂不辨能否以丘責甲，^③故讎之矣。○注「四井」至「爲丘」。○解云：《司馬法》文，《周禮》經亦然。○注「古者」至「錄之」。○解云：四民之言，出《齊語》也。「德能居位曰士」者，即彼云「處士就間宴」是也。「辟土殖穀曰農」者，即彼云「處農就田野」是也。「巧心勞手以成器物曰工」者，即彼云「處工就官府」是也。「通財粥貨曰商」者，即彼云「處商就市井」是也。云「月者，重錄之」者，欲道宣十五年秋「初稅畝」，哀十二年「春，用田賦」皆書時，今書月，故如此解。

夏，臧孫許及晉侯盟于赤棘。時者，謀結

鞏之戰不相負也。後爲晉所執。不日者，執在三年外尋舊盟後，非此盟所能保。【疏】注「時者」至「負也」。○解云：正以《春秋》之義，大信者書時故也。鞏之戰在下二年。○注「後爲」至「能保」。○解云：《春秋》之義，不信者日，故如此注也。言「後爲晉所執」者，即下十六年「九月，晉人執季孫行父，舍之於招丘」是也。言「執在三年

外尋舊盟後」者，即下三年「冬，十有一月，晉侯使荀庚來聘。丙午，及荀庚盟」，傳云「此聘也，其言盟何？聘而言盟者，尋舊盟也」是。

秋，王師敗績于貿戎。孰敗之？蓋

晉敗之。以晉比侵柳圍郊，知王師討晉而敗之。○貿戎，^④音茂，一音茅，《左氏》作「茅戎」。【疏】注「以晉」至「茅戎」。○解云：宣元年「冬，晉趙穿帥師侵柳」，傳云「柳者何？天子之邑也。曷爲不繫乎周？不與伐天子也」者，是晉侵柳之事。昭二十三年春，「晉人圍郊」，傳云「郊者何？天子之邑也。曷爲不繫于周？不與伐天子也」者，是晉人圍郊之事。然則圍郊之事超在此經之後，得如此明義者，正以往前晉人侵柳已犯天子，至於在

① 「粥貨」，原脫「粥」字，阮校：「閩、監、毛本作『通財粥貨曰商』，《釋文》：『粥貨，羊六反。』此脫。」今按：本

疏亦引作「粥貨」，據補。

② 「代」，原作「伐」，今據余本、中華本、閣本、宋本《釋文》改。

③ 「貴」，原作「賁」，今據京都本、再造善本、中華本、閣本改。

④ 「戎」，原作「伐」，今據余本、中華本、宋本《釋文》改。

後圍郊復犯天子，二經之間天子敗績，據上下更無餘國犯王之處，故知正是天子討晉而為所敗，故如此解。或曰貿戎敗之。以地貿戎故。【疏】注「以地貿戎故」。

○解云：蓋晉侯不臣，知王討之，逆往敗之，亦何傷？然則曷為不言晉敗之？據侵柳圍郊言晉。

王者無敵，莫敢當也。正其義使若王自敗于貿戎，莫敢當敵敗之也。不日月者，深正之使若不戰。【疏】「王

者」至「當也」。○解云：《春秋》之義，託魯為王，而使舊王無敵者，見任為王，寧可會奪？正可時時內魯見義而已。○注「不日」至「不戰」。○解云：正以《春秋》之例偏

戰者日，詐戰者月，故如此解。

冬，十月。

二年，春，齊侯伐我北鄙。

夏，四月，丙戌，衛孫良夫帥師及齊師戰于新築，衛師敗績。○築，音竹。

六月，癸酉，季孫行父、臧孫許、叔孫僑如、公孫嬰齊帥師會晉郤克、衛孫良夫、曹公子手，^①及齊侯戰于鞏，齊師敗績。曹

無大夫，公子手何以書？據羈無氏。○公子

手，一本作「午」，《左氏》作「首」。鞏，音安。【疏】注「據

羈無氏」。○解云：即莊二十四年冬，「曹羈出奔陳」，傳

曰：「曹羈者何？曹大夫也。」注云：「以小國知無氏為

大夫。」然則曹為小國，例無大夫，假有須見者，仍名氏不

具。以此言之，則是不合有大夫之限，故傳云「曹無大

夫，公子手何以書」。憂內也。《春秋》託王于魯，因假

以見王法，明諸侯有能從王者征伐不義，克勝有功，當褒

之，故與大夫。大夫敵君不貶者，隨從王者大夫得敵諸

侯也。不從內言敵之者，^②君子不掩人之功，故從外言戰

也。魯舉四大夫不舉重者，惡內多虛，國家悉出用兵，重

錄內也。○以見，賢徧反，年末注同。^③惡，烏路反。

①「曹公子手」，阮校：「《經義雜記》曰：『《春秋正義》

云：沈氏引《穀梁傳》『曹公子首偃』，今本作『曹公子

首偃』。《大射儀》『相者皆左何瑟，後首』，注：『古文

『後首』為『後手』。』則手為假借字，首為正字。一作

「午」者，「手」字形近之誤。」

②「敵」，阮校：「此本『敗』誤『敵』。」

③「末」，原作「未」，今據余本、中華本、閩本、宋本《釋文》改。

【疏】注「大夫」至「侯也」。○解云：欲決僖二十八年夏，晉侯以下「及楚人戰于城濮，楚師敗績」，即傳云：「此大戰也，曷爲使微者？」子玉得臣也。子玉得臣則其稱人何？貶。曷爲貶？大夫不敵君也。」注云：「臣無敵君戰之義，故絕正也。」然則彼是大夫敵君，故貶之，此不貶者，隨從王者大夫有得敵諸侯之義故也。以此言之，即知宣十二年晉荀林父序于楚子之上爲惡者，^②時無王者大夫故也。○注「不從」至「戰也」。○解云：桓十年冬，「齊侯、衛侯、鄭伯來戰于郎」，傳云：「此偏戰也，何以不言師敗績？」內不言戰，言戰乃敗矣。」注云《春秋》託王於魯。戰者，敵文也。王者兵不與諸侯敵，戰乃其已敗之文，故不復言師敗績矣。然則此戰之內有魯大夫，若從魯爲文，宜直云季孫行父以下，敗齊師于鞏而已，但以君子不掩人功，故從外爲文，言戰于鞏，齊師敗績耳。何氏必如此解者，正以桓十三年「春，二月，公會紀侯、鄭伯。己巳，及齊侯、宋公、衛侯、燕人戰，齊師、宋師、衛師、燕師敗績」，傳云：「內不言戰，此其言戰何？從外也。曷爲從外？持外，^③故從外也。」何氏云「明當歸功乎紀、鄭言戰」。然則此亦歸功于晉、衛，不掩其功，故從外言戰也。

秋，七月，齊侯使國佐如師。己酉，及國佐盟于袁婁。君不使乎大夫，^④此其行使乎大夫何？據高子來盟，魯無君不稱使。不從王者大夫稱使者，實晉卻克爲主，經先晉，傳舉卻克是也。○不使，所吏反，下及注「使乎大夫」同。【疏】注「據高」至「稱使」。○解云：即閔二年「齊高子來盟」，傳云：「何以不稱使？我無君也。」何氏云「時閔公弑，僖公未立，故正其義，明君臣無相適之道也。《春秋》謹於別尊卑，理嫌疑，故絕去使文，以起事張例，則所謂君不行使乎大夫也」者是。○注「不從」至「是也」。○解云：經先晉，謂未戰之時，經已言「及晉侯盟于赤棘」是也。云「傳

①「即」，阮校：「浦鏜云：『即』當衍字。是也。」

②「即」，阮校：「閩、監本同，毛本改『則』。」

③「持」，阮校：「爲『恃』之誤。」

④「君不使乎大夫」，阮校：「唐石經、諸本同。按：『君不』下似脫『行』字，當補正。解云『所謂君不行使乎大夫也者』是」，則疏本有「行」字。又隱六年疏兩引皆作「君不行使乎大夫」，閔元年（校者按：當爲二年。）疏引同。」

舉卻克是也」者，即下傳云「師還齊侯，晉卻克投戟，逡巡再拜稽首馬前」之屬是也。或者言先晉，正謂會晉卻克是也，何者？序四大夫乃言會晉卻克，則似卻克先在此，而四大夫往會之，是為先晉之文，猶如宣元年「宋公、陳侯」以下，「會晉師于斐林，伐鄭」然。佚獲也。佚獲者，已獲而逃亡也。當絕賤，使與大夫敵體以起之。君獲不言師敗績，等起不去師敗績者，辟內敗文。○佚獲，音逸，下同，一本作「失」。去，起呂反。【疏】注「君獲」至「敗文」。○解云：言「君獲不言師敗績」者，即僖十五年冬，「晉侯及秦伯戰于韓，獲晉侯」，傳云：「此偏戰也，何以不言師敗績？君獲不言師敗績也。」注云「舉君獲為重也」是也。然則君若被獲，則不言師敗績。今此經等欲起見齊侯被獲，何不去師敗績以見之，而書使乎大夫以起之者，正欲辟內敗之文故也，何者？《春秋》王魯，內不言戰，言戰乃敗。若直言季孫行父以下及齊侯戰于鞏，不言齊師敗績，則是內敗之文。其佚獲奈何？師還齊侯，還，繞。○還，音環，注同。晉卻克投戟，逡巡再拜稽首馬前。逢丑父者，頃公之車右也，人君驂乘有車右，有御者。○逡，七巡反。

頃，音傾。乘，繩證反。【疏】「晉卻」至「馬前」。○解云：禮，介者不拜。而卻克再拜者，蓋齊師已敗，行賓命之禮，^①投戟之後得再拜矣。若當戰之時，將軍有不可犯之色，寧有拜乎？故《表記》曰「君子衰經則有哀色，端冕則有敬色，甲冑則有不可辱之色」，鄭注云「言色稱其服也」是。面目與頃公相似，衣服與頃公相似，禮，皮弁以征，故言衣服相似。頃公有負晉、魯之心，故特異丑父備急，^②欲以自代。^③【疏】注「禮皮弁以征」。○解云：時王之禮，即昭二十五年注云「皮弁以征不義」是也。《韓詩傳》亦有此文。○注「頃公」至「之心」。○解云：即下傳云「前此者，晉卻克與臧孫許同時而聘于齊，則客或跛或眇，於是使跛者逐跛者，眇者逐眇者」是也。代頃公當左，升車象陽，陽道尚左，故人君居左，臣居右。○尚，時亮反。使頃公取飲。頃

①「賓命」，孫校：「當作『隕命』」，「隕命之禮」見《國語·晉語五》，韋注引《司馬法》為釋。《左氏》成二年疏引服注作「隕命」。

②「異」，阮校：「宋本、毛本『異』作『選』，當據正。」

③「代」，原作「伐」，今據余本、中華本、閣本改。

公操飲而至，不知頃公將欲堅敵意邪？^①勢未得去

邪？○公操，七刀反，持也。曰：「革取清者。」

革，更也。軍中人多水泉濁，欲使遠取清者，因亡去。

頃公用是佚而不反。不書獲者，內大惡諱。【疏】

注「不書」至「惡諱」。○解云：獲人君故爲大惡，是以諱

而不書也。若獲大夫則當書之，是以莊十二年傳云「萬

嘗與莊公戰，獲乎莊公」，「數月，然後歸之」。何氏云：

「獲不書者，士也。」然則萬若大夫，書之明矣。逢丑父

曰：「吾賴社稷之神靈，吾君已免矣。」卻克

曰：「欺三軍者，其法奈何？」顧問執法者。

曰：「法斲。」斲，斬。○斲，在略反，^②又仕略反，斬

也。【疏】「曰法斲」。○解云：《釋器》云：「魚曰斲之。」

樊光云：「斲，斫也。」又《說文》云：「斲，斬也。」故此，何

氏亦云「斲，斬」也。於是斲逢丑父。丑父死君不賢

之者，經有使乎大夫，於王法頃公當絕。如賢丑父，是賞

人之臣絕其君也。若以丑父故不絕頃公，是開諸侯戰不

能死難也。如以衰世無絕頃公者，自齊所當善爾，非王

法所當貴。^③○難，乃旦反。【疏】注「若以」至「難也」。

○解云：言若以丑父故不絕頃公，似若襄二十九年「吳子使札來聘」，傳曰「吳無君，無大夫，此何以有君，有大夫？賢季子也。何賢乎季子？讓國也」。賢季子，則賢君，許使臣，有大夫，故宜有君矣。^④今若以丑父賢，以爲齊國宜有君而不絕頃公，即開諸侯不死社稷。○注「如以」至「得貴」。○解云：丑父權以免齊侯，是以齊人得善之，但《春秋》爲王法，是以不得貴耳。而《公羊說》、《解疑論》皆譏丑父者，非何氏意，不足爲妨。

①「將欲」，阮校：「閩、監、毛本同，鄂本『將欲』作『欲將』。」

②「在」，閩本、宋本《釋文》作「莊」。

③「非王法所當貴」，阮校：「當作『非王法所得貴』。」

按：疏標起訖云「注如以至得貴」，解云：「但《春秋》爲王法，是以不得貴耳。」則疏本作「得」字。今毛本疏標起訖亦改作「當貴」矣。」

④「賢季子則賢君許使臣有大夫故宜有君矣」，阮校：「何校本作『賢季子，則吳何以有君有大夫？以季子爲臣，則宜有君者也』，共廿三字，與襄廿九年傳合，當據正。」

己酉，及齊國佐盟于袁婁。曷爲不盟于師而盟于袁婁？據國佐如師。前此者，晉卻克與臧孫許同時而聘于齊。不書，恥之。^①

【疏】注「不書恥之」。^②謂魯使尊卿聘齊，爲所侮戲，假藉大國而雪其恥，是以不書如齊，恥之矣。其卻克不書者，自從外相如之例。○注「臧孫許眇也」者，正以當聘之時

無有內魯之義，晉爲大國，卻克宜先而魯宜後，傳先言或跛，故知眇者是臧孫許矣。或曰一本云「臧孫許跛」，舊解傳言客或跛或眇，據魯序上者非也。案此一句注宜在「不書恥之」下，今定本無，疑脫誤也。^③蕭同姪子

者，齊君之母也。蕭同，國名。姪子者，蕭同君姪娣之子，嫁於齊，生頃公。○姪，大結反，又丈乙反。^④踊于楮而窺客，踊，上也。凡無高下有絕，加踊板曰楮，

齊人語。○踊，音勇，上也。楮，普口反，又步侯反，高下有絕，加踊板曰楮。而闕，去規反，本又作「窺」。上，時

掌反。踊，女輒反。【疏】注「凡無」至「曰楮」。○解云：

無高下猶言莫問高下，但當有縣絕而加踊板者，皆曰楮矣。則客或跛或眇。於是使跛者逐跛者，

使眇者逐眇者。逐，迎。卿主迎者也。^⑤聘禮，賓

至，大夫率至于館，^⑥卿致館，宰夫朝服致殯，厥明至于

館。^⑦○跛，布可反。眇，亡小反。逐，本又作「訝」，五嫁

反，迎也。殯，音孫。脛，而審反。【疏】注「聘禮」至「于

館」。○解云：皆《聘禮》文。二大夫出，相與踰閭

而語，閭，當道門。閉一扇，開一扇，一人在外，一人在

內，曰踰閭。將別，恨爲齊所侮戲，謀伐之，而不欲使人

①「恥之」，阮校：「據疏，此下有『臧孫許眇也』五字一句，今各本脫去，則疏文無所繫。」

②「之下」，杉浦校：「單疏鈔本有『者』字。」

③「案此」至「疑脫誤也」，阮校：「此二十字當是校書者札記語，非作疏者本文也。作疏時，注固不脫，且疏

內少言定本者，定本乃唐初顏師古所爲，則知《公羊》疏出唐以前人矣。」

④「文」，原作「文」，今據余本、宋本《釋文》改。

⑤「也」，阮校：「鄂本無。」

⑥「率至」，阮校：「盧文弨曰：『至』當作『逐』。按：《儀

禮》『率』作『帥』。」

⑦「至」，阮校：「鄂本『至』作『訝』，當據正。盧文弨曰：《儀禮》『脛』作『飪』，音義同。」

聽之。○踣間，居倚反，踣足也。又音於綺反，初義反。

何云：「閉一扇，開一扇，一人在外，一人在內，曰踣間。」

移日然後相去。齊人皆曰：「患之起，必自此始。」

知必為國家憂，明芻蕘之言不可廢，且起頃公

不覺寤。^①○芻，初俱反。蕘，如遙反。二大夫歸，

相與率師為鞏之戰，齊師大敗。齊侯使國

佐如師，怪師勝猶不解，往問之。卻克曰：「與我

紀侯之甌，齊襄公滅紀所得甌邑，其土肥饒，欲得之。

或說，甌，玉甌。○甌，音言，又魚輦反，又音彥，邑也。

【疏】注「齊襄公」至「甌邑」。○解云：襄公滅紀者，即莊

四年夏，「紀侯大去其國」是也。正以繫紀侯言之，故知

紀邑。而或說云「甌，玉甌」者，蓋以《左傳》云「賂以紀甌

玉磬」，^②又別言與地，明甌是器名，非地，故以玉甌解之。

反魯、衛之侵地，使耕者東畝，使耕者東西如晉

地。【疏】注「使耕」至「晉地」。○解云：蓋晉地谷川宜東

畝者多，故言此，是以下傳云「使耕東畝」，^③是則土齊也」。

何氏云「則晉悉以齊為土地，是不可行」者，是其晉東畝

之義也。舊云「如者，往也。使齊東西其畝，往來於晉地

易」，非《公羊》意也。且以蕭同姪子為質。見侮

戲本由蕭同姪子。○為質，音致，下注及下同。則吾

舍子矣。」國佐曰：「與我紀侯之甌，請諾。

反魯、衛之侵地，請諾。使耕者東畝，是則

土齊也。則晉悉以齊為土地，是不可行。【疏】「是則

土齊」。○解云：亦有一本云「是則土齊，曰不可也」

者。^④蕭同姪子者，齊君之母也。齊君之

母，猶晉君之母也，不可。言至尊不可為質。

請戰。如欲使耕者東西畝，質齊君之母，當請戰。壹

①「且」，余本作「具」。

②「磬」，阮校：「《左傳》作『磬』。」

③「耕」下，下傳文及閣本有「者」字，此當脫。

④「亦有一本云是則土齊曰不可也者」，王引之《經義述

聞》：「一本是也。曰不可者，國佐自答上語也。『齊

君之母，猶晉君之母也，不可』，『不可』上亦當有『曰』

字，皆後人不解古人文義而刪之耳。《後漢書·孔融

傳》注引此云「齊君之母，猶晉君之母也，曰不可」，則

所見本尚未刪「曰」字。兩曰「不可」，與上文之兩「請

諾」相應為文，若去其一，則文不相應矣。」

戰不勝，請再。再戰不勝，請三。言齊雖敗，尚可三戰。三戰不勝，則齊國盡子之有也。何必以蕭同姪子爲質？「揖而去之。」郤克眖魯、衛之使，使其辭而爲之請，郤克恥傷其威，故使魯、衛大夫以國佐辭爲國佐請。○眖，音舜，又丑乙反，^①又達結反。之使，所吏反。爲之，于僞反，注皆同。然後許之。逮于袁婁而與之盟。逮，及也。追及國佐于袁婁也。傳極道此者，本禍所由生，因錄國佐受命不受辭，義可拒則拒，可許則許，一言使四國大夫汲追與之盟。^②【疏】注「因錄國」至「與之盟」。○解云：其受命不受辭者，即莊十九年傳云「聘禮，大夫受命不受辭」是也。

八月，壬午，宋公鮑卒。○鮑，白卯反。

庚寅，衛侯遫卒。○遫，音速。

取汶陽田。汶陽田者何？鞌之賂

也。以國佐言反魯、衛之侵地請諾。本所侵地非一，總繫汶陽者，省文也。不言取之齊者，恥內乘勝脅齊，求賂得邑，故諱使若非齊邑。○汶，音問。【疏】「汶陽田者

何」。○解云：欲言是國，曾來未有，欲言非國，乃與取邾婁田同文，故執不知問。○注「本所侵地」至「省文也」。○解云：知侵非一者，正以下三年「秋，叔孫僑如率師圍棘」，^③傳云：「棘者何？汶陽之不服邑也。」以此言之，則知汶陽大畔之名明矣。○注「不言」至「非齊邑」。○解云：決襄十九年春，「取邾婁田，自漚水」，繫邾婁言之故也。

冬，楚師、鄭師侵衛。

十有一月，公會楚公子嬰齊于蜀。

丙申，公及楚人、秦人、宋人、陳人、衛人、鄭人、齊人、曹人、邾婁人、薛人、鄆人盟于蜀。此楚公子嬰齊也，其稱人何？據會而盟一處，知一人也。○處，昌慮反。【疏】「鄭人齊人」至「盟于蜀」。○解云：亦有一本無「齊人」者，脫也。

①「丑」，原作「王」，今據中華本、閩本、宋本《釋文》改。

②「汲」，阮校：「鄂本疊「汲」字，此脫。」

③「孫」，原脫，今據成公三年經及閩本補。

得一貶焉爾。^①得一貶者，獨此一事得具見其惡，故

貶之爾。不然，則當沒公也，如齊高僂矣。不沒公者，明不主爲公故也。上會不序諸侯大夫者，嬰齊，楚專政驕蹇臣也，數道其君率諸侯侵中國，故獨先舉於上，乃貶之，明本在嬰齊，當先誅其本，乃及其末。○數道，所角反，下音導。【疏】「得一貶焉爾」者。○解云：正以於此處得一貶焉爾。○注「不然則」至「高僂矣」。○解云：即莊二十二年秋，「及齊高僂盟于防」，傳云：「公則曷爲不言公？諱與大夫盟也。」○注「不沒公」至「公故也」。^②○解云：言高僂本意敵公，故恥之。今嬰齊者，止自元性驕蹇，^③不主爲公，是以《春秋》不沒公以見之矣。○注「數道」至「侵中國」。^④○解云：即宣十四年秋「楚子圍宋」，十五年夏「宋人及楚人平」，上文「冬，楚師、鄭師侵衛」之屬是也。以其非一，故謂之數也。

三年，春，王正月，公會晉侯、宋公、衛侯、曹伯伐鄭。

辛亥，葬衛繆公。○繆，音穆。

二月，公至自伐鄭。

甲子，新宮災，三日哭。新宮者何？

宣公之宮也。以無新宮，知宣公之宮廟。^⑤【疏】「二

月公」至「自伐鄭」。○解云：莊公六年傳云「得意致會，不得意致伐」，何氏云「此謂公與二國以上也」。然則此言公至自伐鄭者，不得意故也。莊六年注云「皆例時」，今此書二月者，爲下甲子出也。○「新宮者何」。○解云：欲言宮廟，未有新公之名，欲言非廟，言宮舉災，故執不知問。○注「以無新宮知宣公之宮廟」者。^⑥正以《春秋》上下無新公宮，則知此言新宮者，正是其父宣公之

①「一」，阮校：「唐石經作『壹』，蓋因何注作『一貶』轉改也。」

②「注不沒公至公故也」，杉浦校：「單疏鈔本作『是云不沒公者明不主爲公也者』。」

③「元」，閣本作「立」。「驕」，原作「驕蹇」。注曰「嬰齊，楚專政驕蹇臣也」，則此當作「驕蹇」。今據中華本、閣本改。

④「注數道至侵中國」，杉浦校：「單疏鈔本作『云數道其君率諸侯侵中國也者』。」

⑤「以無新宮」，阮校：「按：當作『以無新公』，乃合魯桓公廟謂之桓宮，僖公廟謂之僖宮，煬公廟謂之煬宮，魯無新公，故疑之而問也。」

⑥「新宮」，阮校：「何校本作『新公』是也。」

宮，以其至近被災，故謂之新宮災。宣宮則曷爲謂之新宮？不忍言也。親之精神所依而災，孝子

隱痛，不忍正言也。謂之新宮者，^①因新入宮，易其西北角，示昭穆相繼代，有所改更也。【疏】注「謂之新宮」至

「有所改更也」者。○解云：即《穀梁傳》云「壞廟之道，易檐可也」者，是易其西北角之檐也乎？故《爾雅·釋宮》

云「西北隅謂之屋漏」是也。孫氏曰「當室之日光所漏入也」，^②不與何氏別。其言「三日哭」何？據桓、僖

宮災，不言三日哭。【疏】注「據桓」至「日哭」者。即下哀

三年夏，「辛卯，桓宮、僖宮災」是也。廟災三日哭，

禮也。善得禮，痛傷鬼神無所依歸，故君臣素縞哭之。

○縞，古老反。【疏】注「善得禮」至「縞哭之」。○解云：

即《檀弓》下《曰》：「有焚其先人之室，則三日哭。」鄭氏云

「謂人燒其宗廟。哭者，哀精神之有虧傷。」故此注云「善得禮，痛傷鬼神無所依歸」是也。云「故君臣素縞哭之」

者，謂著素衣縞冠哭之。新宮災，何以書？記

災也。此象宣公篡立，當誅絕，不宜列昭穆。成公幼

少，臣威大重，結怨彊齊，將不得久承宗廟之應。○幼

少，詩召反，下同。大重，音泰，一音他賀反。【疏】注「此

象」至「昭穆」。○解云：案桓公亦篡立，不災其宮者，蓋

以桓母言賸，^③次第宜立，隱公攝位久不還，天示其變，隱

猶不覺，是以隱九年「三月，癸酉，大雨震電」，何氏云：

「周之三月，夏之正月，雨當水雪雜下，雷當聞於地中，電

未可見，而大雨震電，此陽氣大失其節，猶隱公久居位不

反於桓，失其宜也。」然則桓正宜立，隱是左賸之子，據位

失宜而桓弑之，雖曰篡君，其罪差輕，是以不災其廟，豈

若宣公以庶篡適，其子失政，將不得久承宗廟之應，故災

其宮矣。而哀三年「五月，辛卯，桓宮、僖宮災」者，彼是

已毀後復立之，是不宜立，故天災之，不謂怒其篡隱也。

乙亥，葬宋文公。

夏，公如晉。

鄭公子去疾率師伐許。○去，起呂反。

公至自晉。

①「官」，原作「官」，今據京都本、再造善本、閣本改。

②「也」下，杉浦校：「單疏鈔本有『者』字。」

③「言」，閣本作「右」，當是。

秋，叔孫僑如率師圍棘。棘者何？

汶陽之不服邑也。棘民初未服於魯。【疏】「棘者

何」。○解云：欲言內邑，不應圍之，欲言外邑，不繫於

國，故執不知問。○注「棘民初未服於魯」。○解云：言

初未服者，欲言終服於魯矣。知終服者，正以汶陽田者，

大畔之名，棘者乃是其小邑，上二年經「取汶陽田」，以知

盡得之，但有不服之意，故魯圍之。若然，《公羊》之義，

以圍者爲不克之文，若其得之而言圍者，正謂當時未克，

何妨終得之乎？其言圍之何？據國內兵不舉。

【疏】注「據國內兵不舉者」。○解云：即定八年傳云「公

斂處父帥師而至」，經不書之是也。不聽也。不聽者，

叛也。不言叛者，爲內諱，故書圍以起之。不先以文德

來之，而便以兵圍之，當與圍外邑同罪，故言圍也。得曰

取，不得曰圍。○爲，于僞反。【疏】注「當與圍外邑」至

「圍也」者。欲道國內之兵本自不書，而此書者，惡其失

所，令與圍外邑同矣。○注「得曰取不得曰圍」。○解

云：取者是得文，故言「得曰取」也，即上文「取汶陽田」，

及哀九年春「宋皇瑗帥師取鄭師于雍丘」之屬是也。故

傳云「其言取之何？易也。其易奈何？詐之也」，何氏

云「詐謂陷阱奇伏之類」也。其不得曰圍者，即定四年「楚人圍蔡」之屬是也。正以圍而去者，非克之故也。

大雩。成公幼少，大臣秉政，變亂政教，先是作

丘甲，爲牽之戰，伐鄭圍棘，不恤民之所生。【疏】注「先

是作丘甲」者。○解云：在上元年。云「爲牽之戰」者，在

上二年。云「伐鄭」者，在上正月也。云「圍棘」者，在上

文秋也。

晉卻克、衛孫良夫伐將咎如。○將咎如，

咎音古刀反，《左氏》作「廣咎如」。【疏】「伐將咎如」者。

《左氏》將「作」廣「字」。

冬，十有一月，晉侯使荀庚來聘。衛

侯使孫良夫來聘。丙午，及荀庚盟。丁

未，及孫良夫盟。此聘也，其言盟何？據不

舉重，嫌生事，故此以輕問重也。【疏】注「據不舉」至「重

也」。○解云：《春秋》之義，舉重略輕，即莊十年傳「戰不

言伐，圍不言戰，人不言圍，滅不言入，書其重者也」是

也。今聘盟兩受命書，故云不舉重矣。云「嫌生事」者，

嫌是荀庚初受君命，但聘而已，至及於魯，生事而盟，故

曰「嫌生事」矣。云「故此以輕問重也」者，聘輕而盟重，

即此傳云「此聘也，其言盟何」是也。聘而言盟者，

尋舊盟也。尋猶尋繹也。以不舉重，連聘而言之，知

尋繹舊故約誓也。書者，惡之。《詩》曰：「君子屢盟。亂

是用長。」二國既修禮相聘，不能相親信，反復相疑，故舉

聘以非之。○繹，音亦。惡之，烏路反，下同。屢，力住

反。用長，丁丈反。反復，扶又反。【疏】注「不舉」至「約

誓」。○解云：若其特結約誓，當但舉重，即文十五年「三

月，宋司馬華孫來盟」，宣七年「春，衛侯使孫良夫來盟」

之屬，皆因聘而爲之，不言聘而言盟，故知特結盟。此則

言聘又言盟，故知非特結盟，而尋繹舊事盟矣，故傳云

「聘而言盟者，尋舊盟也」。

鄭伐許。謂之鄭者，惡鄭襄公與楚同心，數侵伐

諸夏。自此之後，中國盟會無已，兵革數起，夷狄比周爲

黨，故夷狄之。○數侵，所角反，下同。比，毗志反。

四年，春，宋公使華元來聘。

三月，壬申，鄭伯堅卒。①○伯堅，苦刃反，

本或作「堅」。【疏】鄭伯堅卒者。○解云：《左氏》作

「堅」字，《穀梁》作「賢」字，今定本亦作「堅」字。

杞伯來朝。

夏，四月，甲寅，臧孫許卒。

公如晉。

葬鄭襄公。

秋，公至自晉。

冬，城運。②

鄭伯伐許。未踰年君稱伯者，時樂成君位，親

自伐許，故如其意，以著其惡。【疏】注「未踰年」至「其意

①「鄭伯堅卒」，阮校：「唐石經、諸本同。按：云定本

亦作堅，與《左氏》同，然則疏本作「堅」，與《釋文》同

也。《九經古義》云：「『堅』與『賢』本一字，《說文》

「堅，古文以爲賢字」。漢潘乾校官碑云「親賢寶智國

三老」，袁良碑云「優賢之寵」。「堅」又與「賢」通，《東

觀漢紀》云「陰城公主名賢得」，《續漢書·天文志》作

②

「堅得」。疑古「賢」字、「堅」字皆省作「堅」，《公羊》從

以著其惡」。○解云：正以莊三十二年傳云：「君存稱世子，君薨稱子某，既葬稱子，踰年稱公。」即僖二十五年夏「衛侯燬卒」，秋「葬衛文公」，冬「衛子、莒慶盟于洮」是也。今此鄭伯未踰年而已稱伯，故如此注矣。

五年，春，王正月，杞叔姬來歸。始歸不書，與鄭伯姬同。【疏】注「始歸不書與鄭伯姬同」。○解云：即宣十六年「秋，鄭伯姬來歸」，何氏云「嫁不書者，爲媵也。來歸書者，後爲嫡也」，「棄歸例，有罪時，無罪月」是也。然則今書月者，無罪之文矣。

仲孫蔑如宋。

夏，叔孫僑如會晉荀秀于穀。○荀秀，

《左氏》作「荀首」。

梁山崩。梁山者何？河上之山也。

梁山崩，何以書？記異也。何異爾？大

也。何大爾？梁山崩，壅河三日不汜。故

不日以起之。不書壅河者，舉崩大爲重。○壅，於勇反。

汜，音流。【疏】「梁山者何」。○解云：欲言晉山，文不繫

晉，欲言魯物，見在晉竟，故執不知問。○注「故不日以起之」。○解云：謂起其三日不汜也，則但一日，不可不

書日矣。若無所起，例當書日，即僖十四年「秋，八月，辛卯，沙鹿崩」是也。外異不書，此何以書？爲

天下記異也。山者，陽精，德澤所由生，君之象。河

者，四瀆，所以通道中國，與正道同。①記山崩壅河者，此

象諸侯失勢，王道絕，大夫擅恣，爲海內害，自是之後，六十年之中，弑君十四，亡國三十二，故湟梁之盟，②徧刺天下之大夫。【疏】「外異不書」者。正以文十一年長狄之

齊，晉，不書故也。○注「河者」至「道同」。○解云：《釋水》云：「江、河、淮、濟爲四瀆。」四瀆者，發源注海者也。

○注「記山」至「河者」。○解云：壅河不書，而言記壅河

者，正以不書日，以起壅河三日汜之義，故亦謂之記壅河矣。○注「自是之後」至「亡國三十二」。③《春秋說》文。

若對經數之，從今以後，訖於六十年，則不及於此數，何

①「正」，阮校：「閩、監、毛本同，鄂本作「王」。」

②「湟梁」，原作「湟梁」。阮校：「鄂本、閩本「湟」作

「湟」，《釋文》「湟，古闕反」，當據正。疏同。」今據改。下「湟梁」、「湟水」同。

③「注自是之後至亡國三十二」，杉浦校：「單疏鈔本作「云自是之後六十年之中弑君十四亡國三十二者」。」

者？自今以後，盡昭十六年，弑君止有十，亡國止有九，即襄二十五年「齊崔杼弑其君光」，吳子「門于巢」爲巢人所弑，二十六年「衛甯喜弑其君剽」，二十九年「閔弑吳子餘祭」，三十年「蔡世子般殺其君固」，三十一年「莒人弑其君密州」，昭公八年陳招殺偃師，十一年「楚子殺蔡侯般」，十三年楚公子比弑其君虔，「楚公子棄疾弑公子比」，是六十年弑君但十矣。其亡國止有九者，成十七年「楚滅舒庸」；襄六年「莒人滅鄆」，「齊侯滅萊」，十年「遂滅偃陽」，十三年「取詩」，二十五年「楚滅舒鳩」；昭四年「遂滅瑕」，^①八年「楚滅陳」，十三年「滅蔡」，^②是九也。然則《春秋》書遂其可書者矣，說文舉者悉言之，是以多少異爾。或者此注誤也。○注「故湟梁」至「之大夫」。○解云：襄十六年春「公會晉侯、宋公」以下「于湟梁」。戊寅，大夫盟，傳云：「諸侯皆在是，其言大夫盟何？信在大夫也。何言乎信在大夫？徧刺天下之大夫也。曷爲徧刺天下之大夫？君若贅旒然。」何氏云「旒，旒旒。贅，繫屬之辭」，「以旒旒喻者，爲下所執持東西」是矣。

秋，大水。

先是既有丘甲、鞏、棘之役，^③又重以城鄆，民怨之所生。○重，直用反。【疏】注「先是既」至「之所生」。○解云：作丘甲在元年三月，鞏之師在二年

夏，叔孫僑如圍棘在三年秋，城運在四年冬。

冬，十有一月，己酉，天王崩。定王。

十有二月，己丑，公會晉侯、齊侯、宋公、衛侯、鄭伯、曹伯、邾婁子、杞伯，同盟于蟲牢。約備彊楚。○蟲牢，直弓反，下力刀反。

六年，春，王正月，公至自會。月者，前魯

大夫獲齊侯，今親相見，故危之。【疏】注「月者前」至「故危之」。○解云：諸致例時，即桓二年「冬，公至自唐」、僖二十六年冬「公至自伐齊」、哀十三年「秋，公至自會」之屬是也。今此書月，故解之也。言「前魯大夫獲齊侯」者，即上二年鞏戰時也。言「今親相見」者，即上五年冬，「公會晉侯、齊侯」以下「于蟲牢」是也。

二月，辛巳，立武宮。武宮者何？武公之宮也。在春秋前。【疏】「武宮者何」。○解云：

①「瑕」，阮校：「浦鍾云：『厲』誤『瑕』。按浦說是也。」

杉浦校：「單疏鈔本『瑕』作『厲』。」

②「三」，阮校：「浦鍾云：『一』誤『三』。按：是也。」

③「丘」，原作「兵」，今據余本、中華本、閩本改。

《春秋》之內，未有武公之文，而立武宮，故執不知問。立者何？立者不宜立也。立武宮，非禮

也。禮，天子諸侯立五廟，受命始封之君立一廟，至於子孫。過高祖，不得復立廟。周家祖有功，尊有德，立后稷、文、武廟，至於子孫，自高祖已下而七廟。天子卿大夫三廟，元士二廟。諸侯之卿大夫比元士二廟，諸侯之士一廟。立武宮者，蓋時衰多廢人事，而好求福於鬼神，故重而書之。臧孫許伐齊有功，故立武宮。○復，扶又反。好，呼報反。【疏】「立者何」。○解云：置廟是常，而乃書「立」，故執不知問。○「立者不宜立也」。○解云：亦有直云「不宜立」，無在上「立者」二字也。○注「天子諸侯立五廟」至「元士二廟」。○解云：皆出《祭法》也。其文云「天下有王，分地建國」，注云：「建國，封諸侯也。」「置都立邑」，注云：「置都立邑，爲卿大夫采地，及賜士有功者之地。」「設廟桃壇墠而祭之」，注云：「廟之言貌也。宗廟者，先祖之尊貌也。桃之言超也，超上去意也。封土曰壇，除地曰墠。《書》曰『三壇同墠』。」「乃爲親疎多少之數，是故王立七廟，一壇一墠，曰考廟，曰王考廟，曰皇考廟，曰顯考廟，曰祖考廟，皆月祭之」，注云：「王、皇皆君也。顯，明也。祖，始也。名先人以君明始者，所以

尊本之意也。」「有二桃，享嘗乃止」，①云：「享嘗，謂四時之祭。」「諸侯立五廟，一壇一墠，曰考廟，曰王考廟，曰皇考廟，皆月祭之。顯考廟，祖考廟，享嘗乃止。大夫立三廟二壇，曰考廟，曰王考廟，曰皇考廟，享嘗乃止。顯考、祖考無廟，有禱焉，爲壇祭之。適士二廟一壇，曰考廟，曰王考廟，享嘗乃止。顯考無廟，有禱焉，爲壇祭之」，注云：「適士，上士也。此適士云顯考無廟，非也，當爲「皇考」字之誤。」「官師一廟，曰考廟，王考無廟而祭之。庶士、庶人無廟」，注云：「官師，中士、下士。庶士，府史之屬。」然則此注云「禮，天子諸侯立五廟」者，據正禮通諸上代而言之，《祭法》云「王立七廟」者，據周言之耳。《祭法》云「大夫立三廟」、「適士二廟」者，皆據天子大夫士也。○云「諸侯之卿大夫比元士」。○解云：更無正文，何氏以意當之。○注「諸侯之士一廟」，②《禮說》文云。

①「有二桃享嘗乃止」，阮校：「浦鍾云：下脫『注』。是也。」「有」字上，何校本有「遠廟爲桃」四字，與《祭法》合。」

②「注諸侯之士一廟」，杉浦校：「單疏鈔本『注』作『云』，下有『者』字。下節疏『注故使若非蟲牢人矣』亦同。」

而鄭注《王制》云，士一廟者，「謂諸侯之中士，名曰官師者。上士二廟也」，^①與何氏異。○注「立武」至「書之」。

○解云：案《明堂位》云「武公之廟，武世室」，然則謂之世室者，世世不毀。而此傳也及注譏其立者，^②《明堂位》之作在此文之後，記人見武公之廟已立，欲成魯之善，故言此，非實然。故彼下即云「魯之君臣未嘗相弑也」，鄭注「春秋時魯國君弑」，^③而云「君臣未嘗相弑」，亦近誣矣。○注「臧孫許伐齊有功」。○解云：正以伐齊之由，本起臧孫故也。

取鄆。鄆者何？邾婁之邑也。曷爲

不繫于邾婁？諱亟也。諱魯背信亟也，屬相與爲蟲牢之盟，旋取其邑，故使若非蟲牢人矣。○鄆，市轉反，又音專。亟，去異反，注同。背，音佩。屬，音燭。【疏】「鄆者何」。○解云：欲言是國，曾來未有，欲言是邑，文無所繫，故執不知問。○注「屬相」至「其邑」。○解云：即上五年冬，「公會晉侯、齊侯」以下「同盟于蟲牢」是也。○注「故使若非蟲牢人矣」。○解云：謂所取之邑，非同盟之物然也。

衛孫良夫率師侵宋。

夏，六月，邾婁子來朝。

公孫嬰齊如晉。

壬申，鄭伯費卒。不書葬者，爲中國諱。蟲

牢之盟，約備彊楚。楚伐鄭喪，不能救，晉又侵之，故去葬，使若非伐喪。○費，音祕。爲，于僞反。去，起呂反。

【疏】注「楚伐鄭喪不能救晉又侵之」者。○解云：即下文秋「楚公子嬰齊帥師伐鄭」，冬「晉欒書帥師侵鄭」是也。

秋，仲孫蔑、叔孫僑如率師侵宋。

楚公子嬰齊率師伐鄭。

冬，季孫行父如晉。

①「二」，原脫。杉浦校：「單疏鈔本『廟』作『二廟』。」

按：作「二廟」是也，今《禮記·王制》注作「一廟」。今據補。

②「也」，阮校：「浦鏜云：也，衍字。是也。」

③「國」，阮校：「浦鏜云：『三』誤『國』。浦說是也。作『三』字，與彼注合，彼正義詳之。」

晉樂書率師侵鄭。^①

七年，春，王正月，饾鼠食郊牛角。改

卜牛，饾鼠又食其角，乃免牛。饾鼠者，鼠中之

微者，角生上指，逆之象。《易》京房傳曰：「祭天不慎，饾

鼠食郊牛角。」書「又食」者，重錄魯不覺寤，重有災也。

不重言牛，獨重言鼠者，言角，牛可知。食牛者未必故

鼠，^②故重言鼠。○饾，音兮。重有，直用反，下同。【疏】

注「角生上指逆之象」。○解云：言角在牲體之上，指于

天，亦是上逆之象。○注「書又食者」至「有災也」。^③○

解云：重，讀如「煩重」之「重」也。《異義》《公羊》說「云

「饾鼠初食牛角，咎在有司。又有，^④咎在人君。取已有

災，而不云改更」者，^⑤義通于此。若然，改卜牛之徒皆言

改，而莊三年夏，「五月，葬桓王」，傳云「此未有言崩者，

何以書葬？蓋改葬」，經何故不言改者？蓋改卜牛之

徒，皆有所由，故得言改，其葬桓王者，上未有經，是以無

由言之。

吳伐郟。吳國見者，罕與中國交，至升平乃見，

故因始見以漸進。○郟，音談。見者，賢徧反，下同。

【疏】注「吳國見者」至「以漸進」。○解云：正以莊十年

秋，「荆敗蔡師于莘」，傳云「荆者何？州名也。州不若國，國不若氏」云云，何氏：^⑥「不言楚言荆者，楚強而近中國，卒暴責之，則恐為害深，故進之以漸，從此七等之極始也。」然則吳、楚相敵，亦宜言「揚」，當以「揚州」言之，而經言「吳」者，正以罕與中國交，至今升平之世乃始見經，故因其始見于升平，故經直以漸進之。

夏，五月，曹伯來朝。

不郊，猶三望。

秋，楚公子嬰齊率師伐鄭。

①「侵鄭」，阮校：「唐石經、諸本同。按：《左氏》、《穀梁》皆作「救鄭」。上書「楚公子嬰齊率師伐鄭」，故晉

樂書率師救之也。『侵』字誤。嚴杰曰：上文鄭伯費卒，注云「楚伐鄭喪，不能救，晉又侵之」，則《公羊》作

「侵鄭」，與《左》、《穀》異也。」

②「食」上，阮校：「《左傳正義》引注有「後」字。」

③「注書又食者至有災也」，杉浦校：「單疏鈔本作「云書又食者重錄魯不覺寤重有災也」，無「○解云」。」

④「又有」，阮校引浦鏜云：「『又有』當「又食」之誤。」

⑤「云」，阮校：「按：『云』疑衍。」

⑥「何氏」，阮校引浦鏜云：「『何氏』下脫「云」。」

公會晉侯、齊侯、宋公、衛侯、曹伯、莒子、邾婁子、杞伯救鄭。八月，戊辰，同盟于馬陵。公至自會。

吳人州來。

冬，大雩。先是公會諸侯救鄭，承前不恤民之所致。【疏】注「承前不恤民之所致」。○解云：即上三年「大雩」之下，注云「成公幼少，六臣秉政，^①先是作丘甲，爲鞏之戰，伐鄭圍棘，不恤民之所生」是也。

衛孫林父出奔晉。

八年，春，晉侯使韓穿來言汶陽之田，歸之于齊。來言者何？內辭也，脅我使我歸之也。以此經加「之」，知見使，即聞晉語。自歸之，但當言「歸」。【疏】「來言者何」。○解云：語言見經，於例未有，今而書之，故執不知問。○注「以此經加之」至「當言歸」。○解云：其自歸言歸者，哀八年夏，「歸邾婁子益于邾婁」，注云：「善魯能悔過歸之。」然則若自歸，當言歸汶陽之田于齊，今乃如此作文，而又言「之」，則知被晉使之，非其本情。曷爲使我歸之？據本魯

邑。【疏】注「據本魯邑」。○解云：正以莊十三年曹子劫齊侯，反其所取侵地之時：「管子曰：『然則君何求？』」曹子曰：「願請汶陽之田。」又上二年傳曰「反魯、衛之侵地」之下，其經云「取汶陽田」，以此言之，汶陽之田本是魯物明矣。鞏之戰，齊師大敗。齊侯歸，弔死視疾，七年不飲酒，不食肉。晉侯聞之曰：「嘻！奈何使人之君七年不飲酒，不食肉？請皆反其所取侵地。」晉侯聞齊侯悔過自責，高其義，畏其德，使諸侯還鞏之所喪邑。魯見使，卑有恥，故諱。不言使者，因兩爲其義，諸侯不得相奪土地，晉適可來議語之，魯宜聞義自歸之爾，不得使也。主書者，善晉之義齊。○嘻，許其反。喪，息浪反。語，魚據反。

晉樂書帥師侵蔡。

①「六」，阮校引浦鏜云：「『大』誤『六』。」今按：成公三年何注作「大臣」，浦說是。

②「邑」字，原脫，此引何注，當有「邑」字，今據中華本補。

公孫嬰齊如莒。

宋公使華元來聘。

夏，宋公使公孫壽來納幣。納幣不

書，此何以書？據紀履緌來逆女，不書納幣。○

綸，音須。【疏】注「據紀履」至「納幣」。○解云：隱二年

「九月，紀履緌來逆女」是也。錄伯姬也。伯姬守節，

逮火而死，賢，故詳錄其禮，所以殊於衆女。【疏】注「伯

姬守節逮火死」。①○解云：即襄三十年夏，「五月，甲

午，宋災，伯姬卒」，「秋，七月，叔弓如宋，葬共姬」。傳云

「外夫人不書葬，此何以書？隱之也。何隱爾？宋災，

伯姬卒焉。其稱謚何？賢也。何賢爾？宋災，伯姬存

焉。有司復曰：「火至矣，請出。」伯姬曰：「不可。吾聞

之也，婦人夜出，不見傅母不下堂。」傳至矣，母未至也，

逮乎火而死」是也。

晉殺其大夫趙盾、趙括。○括，古活反。

秋，七月，天子使召伯來錫公命。其

稱天子何？據天王使毛伯來錫文公命，不稱天子。

【疏】注「據天王使」至「稱天子」。○解云：即文元年夏四

月，「天王使毛伯來錫公命」是也。元年，春，王正

月，正也，正者，文不變也。【疏】「元年春王正月

也」。②○解云：據始言之，其實二年、三年以下之經皆

如是。其餘皆通矣。其餘謂不繫于元年者。或言

王，或言天王，或言天子，皆相通矣，以見刺譏是非也。

王者，號也。德合元者稱皇。孔子曰：「皇象元，道遙術，

無文字，德明謚。」德合天者稱帝，河洛受瑞可放。仁義

合者稱王，符瑞應，天下歸往。天子者，爵稱也，聖人受

命，皆天所生，故謂之天子。此錫命稱天子者，為王者長

愛幼少之義，欲進勉幼君，當勞來與賢師良傅，如父教

子，不當賜也。月者，例也，為魯喜錄之。○見，賢偏反。

應，應對之應。爵稱，尺證反。為王，于僞反，下「為魯」，

「為下」同。少，詩召反。勞來，力報反，下力代反。【疏】

注「其餘謂不繫于年」。③○解云：何氏亦順傳文，是以

①「逮火死」，何注作「逮火而死」。

②「也」上，阮校引浦鍾云：「當有「正」字。」杉浦校：

「單疏鈔本「也」上有「正」字。」

③「年」上，杉浦校：「單疏鈔本「年」上有「元」字，與何

獨言元年矣。○注「或言王」。○解云：①即莊元年冬「王使榮叔來錫桓公命」、文公五年春「王使榮叔歸含且賵」、三月「王使召伯來會葬」之屬是也。○注「或言天王」。○解云：隱元年「秋，七月，天王使宰咺來歸惠公仲子之賵」之屬是也。○注「或言天子」。○解云：此文是也。莊元年榮叔之下，何氏云：「不言天王者，桓行實惡，而乃追錫之，尤悖天道，故云爾。」文五年榮叔之下，注云：「去天者，含者臣子職，以至尊行至卑事，失尊之義也。」召伯之下，何氏云：「去天者，不及事，刺比失喪禮也。」隱元年宰咺之下，何氏云：「言天王者，時吳、楚上僭稱王，王者不能正，而上繫于天也。」②《春秋》不正者，因以廣是非。」然則王是舊名，天王者，《春秋》時稱耳。但《春秋》見當時之王皆繫于天，是以逐本不追正，見其是非，何者？若單稱王者，是其舊號，若繫于天者，明非古禮矣。作《春秋》既不追正，遂以天王作其常稱，是以《春秋》之內不言「天」者，皆悉解之，見其失所。此注云「皆相通矣，以見刺譏是非也」，言「皆相通矣」者，此三者皆是上之通稱，但以天王者，得當時之言，王與天子者，皆有所刺，故曰「以見刺譏是非也」。○注「王者號也」。○解云：言正是當時天子之號也。○注「德合元者稱皇」。

○解云：謂元氣是總三氣之名，是故其德與之相合者謂之皇。皇者，美大之名。○注「孔子曰皇象」至「明謚」。○解云：皆《春秋說》文。宋氏云：「言皇之德象合元矣。逍遙猶勤動，行其德術，未有文字之教，其德盛明者，為其謚矣。」○注「德合天者」至「可放」。○解云：天者，二儀分散以後之稱，故其德與之相合者謂之帝。帝者，諦也，言審諦如天矣。當爾之時，河出圖，洛出書，可以受而行之，則施于天下，故曰河洛受瑞可放耳。○注「仁義合者稱王」至「歸往」。○解云：二儀既分，人乃生焉。人之行也，正直為本，行合於仁義者謂之王，行合人道者符瑞應之，而為天下所歸往耳。是以王字通於三才，得為歸往之義。○注「天子者爵稱也」。○解云：案《辨名記》云「天子無爵」，而言天子為爵稱者，言爵者，醺也，所以醺盡其材，天子有聖德，居無極之尊位，謂之爵稱亦何

①「注或言王○解云」，杉浦校：「單疏鈔本作「云或言王者」，無「○解云」。」今按：注疏本與單疏鈔本標起訖多有不同，此節以下疏，單疏鈔本多「注」作「云」，末以「者」結尾，無「○解云」，以下不一一出校。

②「上」下，阮校：「浦鏜云：脫「自」字。浦說是也，隱元年注有「自」字。」

傷？而云天子無爵者，謂無如諸侯以下九命之爵，豈謂無尊美之爵乎？《禮記·郊特牲》云：「古者生無爵，死無謚。」天子有謚，有爵明矣。○注「此錫命稱天子」至「不當賜也」。○解云：如此注者，決文元年「天王使毛伯來錫公命」，言天王矣。彼注云：「主書者，惡天子也。古者三載考績，三考黜陟幽明。文公新即位，功未足施而錫之，非也。」^①然則文公初受命而未有功，而王錫之，故見非也。但文公年長，故稱天王。今成公幼少，當須如父教子，未當錫也，是以爲之張義而言天子矣。○注「月者例也」。○解云：正以此經書月，故知例月。然外來朝聘皆例書時，天王錫命而書月，魯人喜得王命而詳錄之故也。然則莊元年「錫桓公命」，文元年「錫文公命」，雖承上日，不蒙上日亦可知矣。

冬，十月，癸卯，杞叔姬卒。棄而日卒者，爲下脅杞歸其喪張本文，使若尚爲杞夫人。【疏】注「棄而日卒」至「杞夫人」。○解云：外夫人之卒，經例書日，即襄三十年夏，「五月，甲午，宋災，伯姬卒」，何氏云「外災例時，此日者，爲伯姬卒日」是也。今此已棄而書日，故解之。其棄者，即上五年「春，王正月，杞叔姬來歸」是也。○注「爲下脅杞歸其喪」。○解云：即下九年春，「杞

伯來逆叔姬之喪以歸」，傳曰「脅而歸之」是也。

晉侯使士燮來聘。

叔孫僑如會晉士燮、齊人、邾婁人

伐邾。

衛人來媵。媵不書，此何以書？據逆

女不書媵也。言來媵者，禮，君不求媵，諸侯自媵夫人。

○來媵，以證反，又繩證反。【疏】注「據逆女不書媵也」。

○解云：蓋通內外言之。何者？隱二年「紀履緌來逆女」，桓三年「公子翬如齊逆女」之屬，皆不書媵故也。云

媵例時者，即下九年夏「晉人來媵」，莊十九年「秋，公子結媵陳人之婦于鄆」之屬是也。然則此經文承日月之

下，不蒙日月明矣。

錄伯姬也。伯姬以賢聞諸侯，諸侯爭欲媵之，

故善而詳錄之。媵例時。

九年，春，王正月，杞伯來逆叔姬之喪

以歸。杞伯曷爲來逆叔姬之喪以歸？據已

歸。

①「非」下，阮校：「浦鍾云：脫『禮』字。按：文元年注有『禮』字。」

棄也。內辭也，脅而歸之也。言「以歸」者，^①與忿怒執人同辭，而不得專其本意，知其爲脅也。已棄而脅歸其喪，悖義恥深惡重，故使若杞伯自來逆之。○悖，布內反。【疏】注「言以歸」至「爲脅」。○解云：言「忿怒執人同辭」者，即襄十六年春「晉人執莒子、邾婁子以歸」、昭十三年秋「晉人執季孫隱如以歸」之屬是也。○注「而不得專其本意」。○解云：正以「以」者，行其意之辭故也。是以桓十四年冬「宋人以齊人、衛人、蔡人、陳人伐鄭」，傳云：「以者何？行其意。」何氏云：「以己從人曰行，言四國行宋意。」今叔姬之喪言「以歸」，不得專其本意，明知杞伯有忿怒，是以知其被脅耳。言「知其爲脅」者，「爲」讀如「子爲衛君乎」之「爲」也。

公會晉侯、齊侯、宋公、衛侯、鄭伯、曹伯、莒子、杞伯同盟于蒲。不日者，已得鄭盟，當以備楚，而不以罪執之，旋使離叛，楚緣隙潰莒，不能救，禍由中國無信，故諱爲信辭。使若莒潰非盟失信，所以甚中國，因與下潰日相起。【疏】注「不日者已」至「信辭」。○解云：正以《春秋》之義，不信者日，故以不日爲信辭矣。言「已得鄭盟」者，有鄭伯也。「當以備楚」者，

正以楚人數爲諸夏之患故也。○注「而不以罪執之」。○解云：即下文秋「晉人執鄭伯」是也。正以僖四年傳曰：「稱侯而執者，伯討也。稱人而執者，非伯討也。」今經稱人，故曰「不以罪執」矣。○注「旋使離叛」者。○解云：即其下文云「晉欒書帥師伐鄭」是也。○注「楚緣隙潰莒」。○解云：即下文冬「楚公子嬰齊帥師伐莒。庚申，莒潰」是也。言楚人緣其有不和之隙來伐莒而潰之，故曰「緣隙潰莒」矣。知「不能救」者，正見以下遂無救文故也。○注「所以甚中國」。○解云：謂其作信辭也，所以甚惡中國之無信矣。○注「因與下潰日相起」者。○解云：其言因非正爲之辭矣。言此盟不日，非直甚中國之無信，亦因欲起其下潰書日者，乃是中國無信，同盟不相救，至爲夷狄所潰矣。言相者，兩事相共之辭，則下潰書日，亦起此盟之不信矣。

公至自會。

二月，伯姬歸于宋。

夏，季孫行父如宋致女。未有言致女

①「以」，余本、京成本作「已」。

者，此其言致女何？錄伯姬也。古者婦人三

月而後廟見稱婦，擇日而祭於禰，成婦之義也。父母使大夫操禮而致之。必三月者，取一時足以別貞信，貞信著，然後成婦禮。書者，與上納幣同義。所以彰其絜，且

為父母安榮之。言女者，謙不敢自成禮。婦人未廟見而死，歸葬於女氏之黨。○廟見，賢徧反，下同。操，七刀反。別，彼列反。且為，于僞反。【疏】「未有言致女者」。

○解云：謂《春秋》無此經也。○注「古者婦人」至「之義也」。○解云：此皆《曾子問》文也。其文云：「孔子曰：

取婦之家，三日不舉樂，思嗣親也。三月而廟見，稱來婦也。擇日而祭于禰，成婦之義也。」鄭注云：「謂舅姑沒者

也，必祭成婦義者，婦有共養之禮，猶舅姑存時，盥饋特豚於室」是也。○注「書者與上納幣同義」。○解云：即

上八年「夏，宋公使公孫壽來納幣」，傳云：「納幣不書，此何以書？錄伯姬也。」注云：「伯姬守節，逮火而死，賢，故

詳錄其禮，所以殊於衆女」是也。今此書其致女者，義亦然，故云「書者與上納幣同義」。○注「所以彰其絜」至

「敢自成」。○解云：重得父母之命，乃行婦道，故曰「所以彰其絜」也。其女當夫，非禮不動，光照九族，父母得

安，故曰「榮之」。○注「禮婦人未」至「氏之黨」。○解

云：《曾子問》文也。其文云：「曾子曰：『女未廟見而死，則如之何？』」孔子曰：「不遷於廟，^①不祔於皇姑，塋不杖，不菲，不次，歸葬于女氏之黨，示未成婦也。」鄭氏云「遷朝廟也。塋雖不備喪禮，猶為之服齊衰」是也。

晉人來媵。媵不書，此何以書？錄

伯姬也。義與上同。復發傳者，樂道人之善。○復，

扶又反。【疏】注「義與同上也」。^②○解云：謂亦與上致女，皆同書納幣矣。

秋，七月，丙子，齊侯無野卒。

晉人執鄭伯。

晉欒書帥師伐鄭。

冬，十有一月，葬齊頃公。

楚公子嬰齊帥師伐莒。^③庚申，莒潰。

①「廟」，京都本、再造善本、閩本作「祖」，與《禮記·曾子問》合。

②「義與同上也」，阮校：「閩、監、毛本刪「也」字，毛本「義」改「議」。此本「上同」誤倒。」

③「子」，原脫，今據余本、中華本、閩本補。

日者，錄責中國無信，同盟不能相救，至爲夷狄所潰。○潰，戶內反。【疏】注「日者錄責」至「狄所潰」。○解云：正以凡潰例月，即僖四年春王正月「蔡潰」，文三年春王正月「沈潰」之屬是也。今而書日，故如此解。

楚人入運。

秦人、白狄伐晉。

鄭人圍許。

城小城。

十年，春，衛侯之弟黑背率師侵鄭。

夏，四月，五卜郊，不從，乃不郊。其

言「乃不郊」何？據上不郊不言「乃」，僖公不從言

免牲也。【疏】注「據上不郊不言乃」。○解云：即上七年

夏，「不郊，猶三望」是也。○注「僖公不從言免牲」。○

解云：僖三十一年夏，「四卜郊不從，乃免牲，猶三望」

是也。不免牲，故言「乃不郊」也。不免牲，當坐

盜天牲，失事天之道，故諱使若重難不得郊。○難，乃旦

反。【疏】注「使若重難不得郊」。○解云：宣八年傳云：

「而者何？難也。乃者何？難也。曷爲或言而，或言

乃？乃難乎而也。」何氏云：「言乃者內而深，言而者外而淺。下昃日昃久，故言乃。」然則「乃」者難之深，今經云「乃不郊」，故云「使若重難不得郊」也。重難之義，皆出於「乃」字。

五月，公會晉侯、齊侯、宋公、衛侯、曹

伯伐鄭。②不致者，成公數卜郊不從，怨懟故不免牲。

不但不免牲而已，故奪臣子辭以起之。○數，所角反。

懟，直類反。【疏】注「不致者」至「牲而已」。○解云：莊

六年傳云：「得意致會，不得意致伐。」注云：「此謂公與

二國以上也。」然則此經「公會晉侯、宋公」以下「伐鄭」，

亦是二國以上，若得意宜致會，不得意宜致伐。今全不

致，故如此解也。言「成公數卜郊不從」者，即此上文「五

卜郊，不從」是也。五卜郊，卜之多者，故言數。云「不但

不免牲而已」者，謂成公意卒竟而不復郊。知如此者，正

①「僖」上，杉浦校：「單疏鈔本有『即』字。毛本無。

按：無『即』字，蓋後人所刪。」

②「公會晉侯齊侯宋公衛侯曹伯伐鄭」，阮校：「諸本同，唐石經缺。解云『此經公會晉侯宋公以下伐鄭』，與今本異。」

以不免牲，上文已有說，今此仍不致，故知更有罪也。○注「故奪臣子辭以起之」。○解云：謂不致也。奪其臣子之辭，以起見其罪矣。所以不致得謂之奪臣子辭者，桓二年注云：「凡致者，臣子喜其君父脫危而至。」今不書至，以若不得脫危然，^①故曰「奪臣子辭」也。桓元年注云「不致之者」至「而凡奪臣子辭」，^②成誅文也」者，義亦通于此。

齊人來媵。媵不書，此何以書？錄

伯姬也。三國來媵，非禮也。曷爲皆以「錄伯姬」之辭言之？婦人以衆多爲侈也。侈，大也。朝廷侈於妬上，^③婦人侈於妬下。伯姬以至賢爲三國所爭媵，故侈大其能容之。^④唯天子娶十二女。○侈，昌氏反，大也。妬，子故反。取十，七住反，本或作「娶」。【疏】注「朝廷侈於妬上」。○解云：言妬其有賢才而居於已上位者，是朝廷侈之妬也。○注「婦人侈於妬下」。○解云：言不能容衆妾而妬惡之者，是婦人妬也。○「故侈大其能容之」。○解云：考諸舊本，「大」上無「侈」字。○注「唯天子娶十二女」。○解云：《保乾圖》文。孔子爲後王，^⑤非古禮也。

丙午，晉侯獯卒。不書葬者，殺大夫趙同等。

○獯，乃侯反。【疏】注「不書葬」至「同等」。○解云：《春秋》之義，君殺無罪大夫，例不書其葬，見其合絕之。是以僖九年「晉侯詭諸卒」，何氏云「不書葬者，沒世子也」是也。^⑥其殺趙同等，即上八年「晉殺其大夫趙同、趙括」是也。

秋，七月。

①「以」，阮校：「浦鏜云：『似』誤『以』。浦說是也，與桓二年注合。」杉浦校：「單疏鈔本『以』作『似』。」

②「至而凡」，阮校：「浦鏜云：『故復』誤『而凡』。是也。」杉浦校：「單疏鈔本『至而凡』作『云云』二字。

按：浦說與此本異，蓋非。」

③「上」下，杉浦校：「單疏鈔本有『云云』二字。」

④「故侈大其能容之」，阮校：「解云：『考諸舊本，『大』上無『侈』字。』按：上云『侈，大也』，故此云『大其能容之』。舊本是，今衍。」

⑤「孔子爲後王」，阮校：「浦鏜云：下當脫『立制』二字。是也。」

⑥「沒」，阮校：「浦鏜云：『殺』誤『沒』。是也。」杉浦校：「單疏鈔本『沒』作『殺』。」

公如晉。如晉者，冬也。去冬者，惡成公前既怨

懟不免牲，今復如晉，過郊乃反，遂怨懟無事天之意，當

絕之。^①○去，起吕反。惡，烏路反。復，扶又反。【疏】

注「過郊乃反」至「天之意」。○解云：謂明年「三月，公至

自晉」，是過郊乃反，是其無事天之意。○注「當絕之」

者。○解云：當合絕之，不可為魯侯矣。^②

監本附音春秋公羊注疏成公卷第十七

①「絕」，阮校：「疏及諸本同，鄂本『絕』作『詔』。」

②「矣」下，《左傳》、《穀梁傳》經文於此年未有「冬十月」

三字。阮校：「此本、鄂本、閩、監、毛本皆脫，唯唐石

經有之。嚴杰曰：『《左》、《穀》皆有此三字，與《公

羊》經異。』錢大昕云：『何注云「去冬者，惡成公」。

然則石經有此三字，非何意也。故知唐石經未必是，

歷來版本未必非也。』今按：此疑為嚴、顏之異，故

何休本無此三字。

監本附音春秋公羊注疏成公卷第十八

起十一年，盡十八年

何休學

十有一年，春，王三月，公至自晉。

晉侯使郤州來聘。^①己丑，及郤州盟。

○郤州，本亦作「犇」，尺由反。【疏】「晉侯」至「州盟」。

○解云：上三年冬，「晉侯使荀庚來聘。丙午，及荀庚

盟」，傳云：「此聘也，其言盟何？聘而言盟者，尋舊盟

也。」注云：「以不舉重，連聘而言之，知尋繹舊故約誓也。

書者，惡之。二國既修禮相聘，不能相親信，反復相疑，

故舉聘以非之。」今此亦然，而無傳注者，從彼可知，故省

文。案桓十四年夏，「鄭伯使其弟語來盟」，注云：「時者，

從內爲王義，明王者當以至信先天下。」是以《春秋》之

例，莅盟，來盟悉書時，即僖三年「冬，公子友如齊莅盟」

之屬是也。今此經及上三年「荀庚盟」之屬，皆書日者，

蓋以既修禮相聘，不能相親信，反相疑，^②是故不與信

辭耳。

夏，季孫行父如晉。

秋，叔孫僑如如齊。

冬，十月。

十有一年，春，周公出奔晉。周公者

何？天子之三公也。王者無外，此其言

出何？自其私土而出也。私土者，謂其國也。

此起諸侯入爲天子三公也。周公驕蹇不事天子，出居私

土，不聽京師之政，天子召之而出走，明當并絕其國，故

以出國錄也。不月者，小國也。【疏】「周公者何」。○解

云：既是周臣，自周無出，而經書出，故執不知問。○注

「私土不聽」至「小國」。○解云：《春秋》之例，大國君奔

例皆書月，即桓十六年「十有一月，衛侯朔出奔齊」之屬

①「郤州」，阮校：「唐石經、諸本同。《釋文》：『郤州，

本亦作「犇」。』《九經古義》云：『《世本》：『郤豹生義，

義生步，揚生州』，州即犇也，與《公羊》合。《左傳》魏

武子犇，《世本》亦作「州」。司馬貞云：州、犇聲相

近，字異耳。』

②「反相疑」，杉浦校：「單疏鈔本『反』下有『復』字。」

是也。小國例時者，即昭三年冬，「北燕伯款出奔齊」，及此經書春皆是也。又《王制》云「天子三公之田視公侯」，既視公侯，何言小國者？^①據其私土之言也。周公本是小國諸侯，而入為天子三公，於王畿之內，雖有采地，但從私土而去，故從小國例。^②

夏，公會晉侯、衛侯于沙澤。○沙澤，素禾反，又如字，二傳作「瑣澤」，定七年同。

秋，晉人敗狄于交剛。

冬，十月。

十有三年，春，晉侯使郤錡來乞師。○

郤錡，魚綺反。

三月，公如京師。月者，善公尊天子。【疏】

注「月者善公尊天子」者。○解云：正以朝聘時故也。

夏，五月，公自京師，遂會晉侯、齊侯、

宋公、衛侯、鄭伯、曹伯、邾婁人、滕人伐秦。其言「自京師」何？據僖公二十八年諸侯遂圍許，不言自王所。【疏】「五月」至「自京師」。○解云：

「公」下「自」上有「至」字者，衍文。○注「據僖公」至「自

王所」。○解云：僖二十八年「冬，公會晉侯」以下「于溫。天王狩于河陽」，「壬申，公朝于王所」，「諸侯遂圍許」是也。然則彼亦朝天子而往圍許，不言自王所，^③與此異，故難之。公鑿行也。以起公鑿行也。鑿猶更造之意。○鑿，在洛反，造意也。公鑿行奈何？不敢過天子也。時本欲直伐秦，塗過京師，不敢過天子而不朝，復生事修朝禮而後行，故起時，善而褒成其意，使若故朝然後生事也。問無事，復出公者，善公鑿行。○復出，扶又反。【疏】注「生事修朝禮而行」者。^④○解云：「生事」之上，亦有「復」字者，衍文。○注「問無復出」

①「小國」，阮校引浦鏜云：「疑當疊『小國』二字。」

②「例」下，杉浦校：「單疏鈔本有『矣』字。」

③「不」，原脫。阮校：「按：『言』上當脫『不』字。」今據單疏鈔本、閩本補。

④「注生事修朝禮而行者」，阮校：「閩、監、毛本作『生事修朝禮而後行』。」杉浦校：「單疏鈔本『而』下有『後』字。按：閩、監、毛本『者』改『○』，非。又各本有『解云』二字，是後人所增。而疏中標注『生事』上無『復』字，依此，則疏本無『復』，今有者衍。」

至「鑿行」。^①○解云：昭十三年「秋，公會劉子、晉侯」以下「于平丘」。八月，甲戌，同盟于平丘，注云：「不言劉子及諸侯者，間無異事可知矣。」然則彼以間無事，不勞重舉劉子及諸侯，此亦間無事，但言夏五月遂會晉侯以下伐秦足矣，而重舉公者，善公鑿行故也。定四年召陵之會再言公者，彼注自具。

曹伯廬卒于師。○廬，力吳反，本亦作「盧」。

秋，七月，公至自伐秦。月者，危公幼而遠用兵。【疏】注「月者危公幼而遠用兵」者。○解云：正以凡致例時，故如此解。

冬，葬曹宣公。

十有四年，春，王正月，莒子朱卒。莒大于邾婁，至此乃卒者，庶其見殺不得卒，至此始卒，又不得日。【疏】注「莒大于」至「不得卒」。○解云：正以莊十六年冬十有二月，「邾婁子克卒」，二十八年「夏，四月，丁未，邾婁子瑱卒」。《春秋》之序，莒常在上，而至此乃卒者，正由文十八年「莒弑其君庶其」，是以不得書其卒矣。○注「至此始卒又不得日」。○解云：邾婁子瑱之卒，所以書日者，非直行進，其邾子克往前已卒，是以《春秋》得

詳錄之。今此始卒，故不得書日。曹書日者，何氏云「老，使世子來朝，《春秋》敬老重恩，故為魯恩錄之尤深」是也。然則此注何以不言「故不得日」，而言「又」者？欲道曹伯終生雖亦始卒，但於魯有恩，是以書日。今此莒子非直始卒，又無善行，是以不日。

夏，衛孫林父自晉歸于衛。

秋，叔孫僑如如齊逆女。凡娶早晚皆不譏者，從紀履綸一譏而已。○凡取，本又作「娶」。【疏】注「秋叔孫僑如如齊逆女」。○解云：隱二年注云：「不親迎例月，重錄之。」今此不月者，蓋以成公即位十有四年，始娶元妃，非重繼嗣之義，故略之。○注「凡娶早」至「譏而已」。○解云：隱二年「九月，紀履綸來逆女」，傳云：「外逆女不書，此何以書？」譏。何譏爾？譏始不親迎也。始不親迎，昉於此乎？前此矣。前此，則曷為始乎此？託始焉爾。曷為託始焉爾？《春秋》之始也。然則宣公元年春，「公子遂如齊逆女」，喪服未除，是其大早

①「注間無復出至鑿行」，阮校：「閩、監、毛本作『注間無事復至鑿行』，此脫『事』字。」杉浦校：「單疏鈔本作『云間無事復出公者善公鑿行者』。」

也。成公十四年秋，始使僑如如齊逆女，非重繼嗣之義，是其大晚也，故言「凡娶早晚」矣。但略舉一二人，則桓公三年娶于齊，文公四年娶于齊，合在其間也。然則諸侯之法合親迎，而魯侯悉使大夫，所以不復發傳云「何以書」？譏。何譏爾？譏不親迎者，正欲從隱二年紀履綸之一譏而已，是以不復發傳以解之。舊解云：「隱二年履綸之下，注云：『內逆女常書，外逆女但疾始不常書者，明當先自詳正，躬自厚而薄責於人，故略外也。』」然則外之娶妻，莫問早晚，其不親迎者，皆不復書。而譏之者，悉從履綸之經一譏而已。所以此處注之者，正以內逆女常書之末，是以於此處決之。更有或解，不足述也。

鄭公子喜率師伐許。

九月，僑如以夫人婦姜氏至自齊。

冬，十月，庚寅，衛侯臧卒。秦伯卒。

十有五年，春，王二月，葬衛定公。

三月，乙巳，仲嬰齊卒。仲嬰齊者

何？疑仲遂後，故問之。【疏】注「疑仲」至「故問

之」。^①○解云：何氏欲解弟子問所不知之意，何者？

欲言仲遂之子，宜稱公孫，今經稱仲，故執不知問。公

孫嬰齊也。未見於經，為公孫嬰齊，今為大夫死，見

於經，為仲嬰齊。○未見，賢徧反，下同，年末及注皆

同。^②【疏】注「未見於經」至「仲嬰齊」。○解云：未見於

經者，謂未作大夫不得見於經。當爾之時，猶為公子之

子，故為公孫嬰齊矣。今為大夫而死，得見於經，更為公

子之孫，孫以王父字為氏，故為仲嬰齊矣。其更為公子

之孫之事，其說在下。公孫嬰齊，則曷為謂之仲

嬰齊？為兄後也。為兄後，則曷為謂之

仲嬰齊？據本公孫。【疏】注「據本公孫」。○解云：

言其本公孫，昭穆須正，雖代兄為大夫，甯得更為公孫之

子乎？故難之。為人後者，為之子也。更為公

孫之子，故不得復氏公孫。○復氏，扶又反，年內同。

為人後者為其子，則其稱仲何？據氏非一。

孫以王父字為氏也。謂諸侯子也。顧興滅繼絕，

故紀族明所出。然則嬰齊孰後？後歸父

^①「至」，原作「後」，今據中華本改。

^②「皆」，宋本《釋文》作「並」。

也。^①歸父使于晉而未反，宣公十八年自晉至櫟奔齊，訖今未還。○使于，所吏反，及下「使乎」同。何

以後之？據已絕也。叔仲惠伯，傅子赤者

也。叔仲者，叔彭生氏也。文家字積於叔，叔仲有長

幼，故連氏之。經云仲者，明《春秋》質家，當積於仲。

惠，謚也。○長，丁丈反。【疏】注「叔仲者叔彭生氏也」。

○解云：即文十一年叔彭生之氏族也。○注「文家字積

於叔」至「謚也」。○解云：知如此者，正以大姒之子皆稱

叔，唯有聘季而已，是文家字積於叔之義也。注言此者，

欲道彭生之經，所以不連仲之意也。云「叔仲有長幼，故

連氏之」者，注言此者，欲道彭生之傳所以連叔仲之意

也。何者？彭生之祖生於叔氏，其父武仲又長幼當仲，

是以彭生遠而言之，雖非正禮，要是當時之事，是以傳家

述其私稱，連言仲矣。○注「經云仲」至「積於仲」。○解

云：注言此者，欲道嬰齊此經，何故不連其父歸父之字，

而單言仲者，欲明《春秋》當質，正得積於仲，是以不得更

以他字連之。文公死，子幼。子赤幼也。公子遂

謂叔仲惠伯曰：「君幼，如之何？」願與子

慮之。」叔仲惠伯曰：「吾子相之，老夫抱

之，禮，大夫七十而致事。若不得謝，則必賜之几杖，行

役以婦人從，適四方，乘安車，自稱曰老夫。○相之，息

亮反，^②下同。【疏】注「禮大夫」至「稱曰老夫」。○解

云：皆《上曲禮》文。鄭氏云「致其所掌之事於君而告老。

謝猶聽也。君必有命，勞若辭謝之，^③其有德尚壯，則不

聽耳。几杖，婦人、安車，所以養其身體也。安車坐乘，

若今小車也。老夫，老人稱也。亦明君貪賢，^④《春秋傳》

曰「老夫耄矣」是也。何幼君之有？」公子遂知

其不可與謀，退而殺叔仲惠伯，弑子赤而

立宣公。殺叔仲惠伯不書者，舉弑君爲重。叔仲惠伯

事與荀息相類，不得爲累者，有異也。叔仲惠伯直先見

殺爾，不如荀息死之。○殺子，音弑。【疏】注「叔仲惠

①「後」，原脫，今據余本、中華本、閩本補。

②「息」，原作「貞」，今據余本、京都本、再造善本、閩本、

宋本《釋文》改。

③「若」，當誤，《禮記·曲禮上》鄭注作「苦」。

④「貪賢」，《禮記·曲禮上》阮元《校勘記》云：「惠棟校

宋本「貪」作「尊」，嘉靖本同，《儀禮經傳通解》同。
案：《考文》引古本、足利本亦作「尊」。

伯「至」息死之」。○解云：僖十年春，「晉里克弑其君卓子，及其大夫荀息」，傳云：「及者何？累也。弑君多矣，舍此無累者乎？」曰有，孔父、仇牧皆累也。舍孔父、仇牧無累者乎？曰有。有則此何以書？賢也。何賢乎荀息？傳云：①「驪姬者，國色也，獻公愛之甚，欲立其子，於是殺世子申生。申生者，里克傳之。獻公病將死，謂荀息曰：『士何如則可謂之信矣？』荀息對曰：『使死者反生，生者不愧乎其言，則可謂信矣。』獻公死，奚齊立。里克謂荀息曰：『君殺正而立不正，廢長而立幼，如之何？』願與子慮之。」荀息曰：『君嘗訊臣矣，臣對曰：『使死者反生，生者不愧乎其言，則可謂信矣。』里克知其不可與謀，退弑奚齊。荀息立卓子，里克弑卓子，荀息死之。」若然，桓二年「宋督弑其君與夷，及其大夫孔父」，案彼傳文，則孔父亦先見殺，與此正同，而得爲累者，正以「孔父生存，殤公不可得而弑，故於是先攻孔父之家。殤公知孔父死，已必死，趨而救之，皆死焉。孔父正色而立於朝，則人莫敢過而致難於其君者，孔父可謂義形于色矣」。然孔父雖先見殺，而事君之正義形于顏色，豈如惠伯但爲傳子赤而吝之，公子遂但欲弑子赤而殺之，不畏惠伯衛若，寧得類於孔父乎？若然，內之弑例皆諱不

書，假令成累，安可作文？而注言此者，雖不言弑，宜言「冬，十月，子赤及叔彭生卒」。案今文公十八年經直言「冬，十月，子卒」，故言「不得爲累」矣。宣公死，成公幼，臧宣公者相也。②臧孫許，宣謚。君死不哭，聚諸大夫而問焉，曰：「昔者叔仲惠伯之事，孰爲之？」諸大夫皆雜然曰：③「仲氏也，其然乎？」於是遣歸父之家，時見君幼，欲以防示諸大夫。○雜，七合反，又如字。【疏】注「時見君」至「諸大夫」。○解云：於時見君幼少，恐有禍變，欲以有防衛之義，示其諸大夫。然後哭君。歸父使乎晉，還自晉，至櫟，聞君薨家遣，墀

①「何賢乎荀息傳云」，阮校：「浦鏜云：『傳云』二字衍。」何煌云：「『何賢乎荀息』下當有『奚齊、卓子者，驪姬之子也，荀息傳焉』十五字。」傳云「二字誤。」

②「臧宣公」，阮校：「鄂本作『臧宣叔』，宣十八年疏引此傳同，當據正。唐石經缺。」

③「諸大夫皆雜然曰」，阮校：「唐石經、諸本同。宣十八年疏引作『雜言曰』。」

帷，哭君成踊，反命于介，自是走之齊。魯

人徐傷歸父之無後也，徐者，皆共之辭也，關東語。傷其先人爲惡，身見逐絕，不忿懣也。於是使嬰

齊後之也。弟無後兄之義，爲亂昭穆之序，失父子之

親，^①故不言仲孫，明不與子爲父孫。【疏】注「弟無後兄」

至「爲父孫」。○解云：案《異義》《公羊》說「云：『質家

立世子弟，文家立世子子，而《春秋》從質，故得立其弟。』

以此言之，嬰齊爲兄後，正合諸《春秋》之義，何得謂之

「亂昭穆之序」者？正以質家立世子弟者，謂立之爲君

而已，豈謂作世子之子乎？今嬰齊後之者，若爲歸父之

子然，故爲亂昭穆之序。言「失父子之親」者，若後歸父，

即不爲仲遂之子，故云失父子之親矣。

癸丑，公會晉侯、衛侯、鄭伯、曹伯、宋

世子成、齊國佐、邾婁人同盟于戚。^②○世子

成，^③音恤，本或作「成」。

晉侯執曹伯，歸之于京師。^④爲篡喜時。

○爲，于僞反。【疏】注「爲篡喜時」者，^⑤即昭二十年傳

云：「何賢乎公子喜時？」讓國也。其讓國奈何？曹伯

廬卒于師。」注云「在成十三年」。傳又云「公子喜時，見

公子負芻之當主也，逡巡而退」是也。

公至自會。

夏，六月，宋公固卒。不日者，多取三國媵，

非禮，故略之。【疏】注「不日者多」至「略之」。○解云：

即上九年「伯姬歸于宋」之時，「衛人來媵」、「晉人來媵」、

「齊人來媵」，傳云「三國來媵，非禮也」是。宋得用天子

禮而非之者，其婚娶當從諸侯故也，雖於伯姬爲榮，而宋

公有失，故死略之。

楚子伐鄭。

①「失」，原作「矣」。余本、京都本、再造善本、閩本皆作

「失」，本疏兩引均作「失父子之親」，今據改。

②「成」，阮校：「鄂本、元本同。唐石經、閩、監、毛本作

「戌」。

③「成」，宋本《釋文》作「戌」。

④「晉侯執曹伯歸之于京師」，阮校：「唐石經、諸本同。

僖廿八年注作「歸于京師」，無「之」字。傳文方辨別

「歸之于」、「歸于」二者之不同，然則石經此處有「之」

字，其誤甚矣。《左氏》、《穀梁》亦無「之」。

⑤「注爲篡喜時者」，阮校：「閩、監、毛本刪「者」，下有

秋，八月，庚辰，葬宋共公。○共，音恭。

宋華元出奔晉。宋華元自晉歸于宋。

不省文，復出宋華元者，宋公卒，^①子幼，華元以憂國爲太夫山所譖，出奔晉。晉人理其罪，宋人反華元誅山，故繁文大之也。言歸者，明出入無惡。【疏】注「不省文」至「文大之言」。^②○解云：襄三十年秋，「鄭良霄出奔許，自許入于鄭」，彼則省文，不言鄭良霄自許入于鄭，今則不省文，故決之。必知不省文是大之者，正以孔子曰「書之重，辭之復，嗚呼！其中必有美者焉，不可不察」，故知也。言「華元以憂國爲太夫山所譖，出奔晉」者，皆《春秋說》文也。○注「言歸者明出入無惡」。○解云：即上桓十五年傳例云「復歸者，出惡歸無惡。復入者，出無惡人有惡。入者，出入惡。歸者，出入無惡」是也。宋殺其太夫山。不氏者，見殺在華元歸後，嫌直自見殺者，故貶之，明以譖華元故。【疏】注「不氏者」至「華元故」。○解云：襄二十三年夏，「陳殺其大夫慶虎及慶寅。陳侯之弟光自楚歸于陳」，注云：「前爲二慶所譖，出奔楚。楚人治其罪，陳人誅二慶反光，故言歸。宋太夫山譖華元貶，此不貶者，殺二慶而光歸，譖光可知。」然則今

此華元歸後，山見殺，故須貶山以見其義矣。山者，魚石之親，若其不貶，宜言魚山也。宋魚石出奔楚。與

山有親，恐見及也。後得言復入者，出無惡，知非君漏言，魚石不殺山。【疏】注「與山有親恐見及也」。○解云：知如此者，襄二十年秋，「蔡殺其大夫公子燮。蔡公子履出奔楚」，同稱公子，親眷明矣。今此「宋殺其太夫山。宋魚石出奔楚」，文與彼同，故知山之親也。但山以譖華元而見貶，是以不得言魚矣。○注「後得言復」至「不殺山」。○解云：復入者，即下十八年夏，「宋魚石復入于彭城」是也。言「復入者，出無惡」者，桓十五年傳文。案文六年冬，「晉殺其大夫陽處父。晉狐射姑出奔狄」，傳云：「晉殺其大夫陽處父，則狐射姑曷爲出奔？射姑殺也。射姑殺則其稱國以殺何？君漏言也。」彼注云：「自上言泄，下曰漏。其漏言奈何？君將使射姑將，

①「宋」，原作「朱」，今據余本、京都本、再造善本、中華本、閣本改。

②「注不省文至文大之言」，阮校：「閩、監、毛本『言』作『也』」，此「言」字蓋誤衍。注中當本無「也」字。

陽處父諫曰：「狐射姑，^①民衆不說，不可使將。」於是廢將。陽處父出，射姑入，君謂射姑曰：「陽處父言曰：射姑，民衆不說，不可使將。」射姑怒，出刺陽處父於朝而走。」注云：「明君漏言殺之，當坐殺也。」以此言之，若由君漏言魚石殺山而走出，是出有惡，不得言復入。^②今魚石之奔，下言復入，知非君漏言，魚石不殺山也。

冬，十有一月，叔孫僑如會晉士燮、齊高無咎、宋華元、衛孫林父、鄭公子鮪、邾婁人，會吳于鍾離。曷爲殊會吳？據楚不殊。○燮，息協反。咎，其九反。鮪，音秋。【疏】注「據楚不殊」。○解云：即僖二十一年「秋，宋公、楚子、陳侯、蔡侯、鄭伯、許男、曹伯會于霍」是也。外吳也。曷爲外也？據襄五年不外之。【疏】注「據襄五年不外之」。○解云：其經云，秋，「公會晉侯、宋公」以下「齊世子光、吳人、鄭人于戚」是也。《春秋》內其國而外諸夏，內諸夏而外夷狄。內其國者，假魯以爲京師也。諸夏，外土諸侯也。^③謂之夏者，大總下土言之辭也。^④不殊楚者，楚始見所傳聞世，尚外諸夏，未得殊也。至於所聞世可得殊，又卓然有君子之行。吳似夷狄差

醇，而適見於可殊之時，故獨殊吳。○傳，直專反。行，下孟反。差醇，初賣反，下音純。【疏】「春秋內其國而外諸夏」。○解云：即經云「叔孫僑如會晉士燮、齊高無咎」以下是也。云「內諸夏而外夷狄」者，即經序諸大夫訖，乃言「會吳于鍾離」是也。^⑤○注「不殊楚者楚始」至「得殊也」。○解云：即僖二十一年「秋，宋公、楚子、陳侯、蔡侯、鄭伯、許男、曹伯會于霍」之屬是也。○注「至於」至「之行」。○解云：即宣十一年「夏，楚子、陳侯、鄭伯盟于辰陵」者，是不殊楚之經也。言「卓然有君子之行」者，即彼注云「不日月者，莊王行霸，約諸侯，明王法，討微舒，善其憂中國，故爲信辭」也。然則討微舒，明王法，勝鄭而不取，令之還師佚晉寇之屬，皆是卓然有君子之行矣。王者欲一乎天下，曷爲以外內之辭言之？

①「狐射姑」，阮校：「按今傳無「狐」字。」

②「得」，原作「復」，今據京都本、再造善本、閣本改。

③「土」，原作「士」，今據余本、鄂本、毛本、閣本改。

④「土」，原作「上」，今據余本、中華本、閣本改。

⑤「鍾」，本年經作「鍾」。

據大一統。【疏】注「據大一統」。○解云：即元年傳云：①「何言乎王正月？大一統也。」注云：「統者，始也，總繫之辭。夫王者始受命改制，布政施教於天下，自公侯至於庶人，自山川至於草木昆蟲，莫不一繫於正月，②故云政教之始。」然則王者施政，欲其遠近徧及，海內如此，③而殊外內，故難之。言自近者始也。明當先正京師，乃正諸夏。諸夏正，乃正夷狄，以漸治之。葉公問政於孔子，孔子曰「近者說，遠者來」；季康子問政於孔子，孔子曰「政者，正也。子帥以正，④孰敢不正」是也。月者，危錄之。諸侯既委任大夫，復命交接夷狄。○葉公，舒涉反，下文同。說，音悅。【疏】注「子帥以正，孰敢不正是也」。⑤○解云：帥，長也。言子爲諸侯之長而爲正，誰敢不爲正乎？亦是先正於近，乃始及遠之義，故引之。

許遷于葉。

十有六年，春，王正月，雨木冰。「雨木冰」者何？雨而木冰也。何以書？記異也。木者，少陽，幼君大臣之象。冰者，凝陰，⑥兵之類也。冰脅木者，君臣將執於兵之徵也。【疏】「雨木冰

者何」。○解云：雨與木冰，理不相類，如此作經，故執不知問。○注「木者」至「之象」。○解云：木始於東方，故曰少陽。陽比君，故有幼君之義。震爲六子之宗，乃是乾之長子，故爲大臣之象也。

夏，四月，辛未，滕子卒。滕始卒於宣公，

日於成公，不名。邾婁始卒於文公，日於襄公，名。俱葬於昭公。是以知滕小。【疏】注「滕始」至「滕小」。○解云：滕始卒於宣公者，即宣九年秋，「八月，滕子卒」是也。其日于成公者，即此注云「辛未，⑦滕子卒」是也。二者皆

①「元年傳云」，杉浦校：「單疏鈔本『元年』上有『隱』字，是也。」

②「一繫於正月」，阮校：「何校本作『一一繫於正月』。」

杉浦校：「單疏鈔本『一一作『一一』，與何校合。」

③「此」，單疏鈔本、閩本、監本、毛本作「一」，當是。

④「以」，余本作「而」。

⑤「以」，杉浦校：「單疏鈔本作『而』。按：今何注『以』字，當據此本改正。」

⑥「凝」，余本、京都本作「疑」。

⑦「注」，阮校引浦鏜云：「『經』誤『注』。」杉浦校：「單疏鈔本『注』作『經』。」

不及名，故曰「不名」。其邾婁始卒于文公者，即文十三年夏五月，「邾婁子遽蔭卒」是也。其日于襄公者，即襄十七年「春，王二月，庚午，邾婁子睂卒」是也。書遽蔭與睂，故曰「名」也。云「俱葬于昭公」者，即昭元年，「六月，丁未，邾婁子華卒」，秋「葬邾婁悼公」，昭三年「春，王正月，丁未，滕子泉卒」，「五月，葬滕成公」是也。然則《春秋》於所聞之世，始錄微國之卒，書日書名，明其大小。滕子卒葬皆在邾婁之後，邾婁之君名於所聞之世，于滕則未，是以知其小于邾婁也。何氏所以不予會序比之，而據其卒葬者，會是主會次之，未得其義，其大小仍自難明，故如此解。若然，案莊十六年十二月「邾婁子克卒」，二十八年「夏，四月，丁未，邾婁子瑱卒」，然則邾婁始卒書日書名，並在莊公之世，而邾婁卒于文公日于襄公名者，彼是傳聞之世，小國之卒例不合書，而莊公之時邾婁之君得書卒者，何氏於「克卒」之下注云：「小國未嘗卒而卒者，為慕霸者，有尊天子之心，行進也。」「瑱卒」之下注云：「日者，附從霸者，朝天子行進。」以此言之，直是行而得書卒書日，❶非其常例，故不取之。

鄭公子喜帥師侵宋。

六月，丙寅，朔，日有食之。是後楚滅舒

庸，晉厲公見餓殺，尤重，故十七年復食。○復，扶又反。【疏】注「是後楚滅舒庸」者。❷○解云：在下十七年冬十二月。○注「晉厲公見餓殺」。○解云：即下十八年「春，王正月，庚申，晉弑其君州蒲」是也。《春秋說》以為厲公狠殺四大夫，臣下人人恐見及，正月幽之，二月而死，故此注云「見餓殺」也。○注「故十七年復食」。○解云：即十七年「十有二月，丁巳，朔，日有食之」是也。

晉侯使欒黶來乞師。○欒，力官反。黶，於斬反。

甲午，晦。晦者何？冥也。何以書？記異也。此王公失道，臣代其治，故陰代陽。○冥，亡定反，又亡丁反。治，直吏反。【疏】「晦者何」。○解云：欲言月晦，例所不書，欲言旦冥，文不言書，❸故執不知問。

晉侯及楚子、鄭伯戰于鄆陵，楚子、鄭

❶「行」下，阮校引浦鏜云：「當脫『進』字。」杉浦校：

「單疏鈔本『行』下有『進』字。浦說是也。」

❷「者」，阮校：「閩、監、毛本『者』改『〇』。」

❸「文不言書」，單疏鈔本、閩本「書」作「畫」。阮校引浦鏜云：「當作『又不言畫』。」

師敗績。敗者稱師，楚何以不稱師？據宋

公戰于泓，敗績稱師。○鄆，於晚反，又於建反。泓，烏

宏反。【疏】注「據宋公戰」至「稱師」。○解云：即僖二十

二年「冬，十有一月，己巳，朔，宋公及楚人戰于泓，宋師

敗績」是也。①王瘝也。王瘝者何？傷乎矢

也。時為飛矢所中。○瘝，音夷，傷也。所中，丁仲反。

【疏】「王瘝者何」。○解云：王有三軍之衛而身見傷，②

似非其類，故執不知問。然則何以不言師敗

績？據王瘝。末言爾。末，無也。無所取於言師

敗績也。凡舉師敗績，為重衆。今親傷人君，當舉傷君

為重。以言戰，又言敗績，知非詐，當蒙上日也。○為，

于偽反。下「為代公」同。【疏】注「以言戰」至「上日也」。

○解云：正以《春秋》之義，偏戰者日，詐者月。令孤、鄆

陵之經言戰言敗績，知非詐，故當蒙上日甲午矣。

楚殺其大夫公子側。

秋，公會晉侯、齊侯、衛侯、宋華元、邾

婁人于沙隨。不見公。公至自會。不見

公者何？公不見見也。不見見者，悲乞師不得，

欲執之。○悲，一睡反。【疏】「不見公者何」。○解云：

公會晉侯，是與會之文，言「不見公」，疑其非類，故執不

知問。○注「不見見者悲乞師不得欲執之」。③即下傳云

「其代公執奈何？前此者，晉人來乞師而不與，公會晉

侯，將執公」是也。公不見見，大夫執，何以致

會？據不得意。扈之會，公失序不致。【疏】注「據不

得意」者。○解云：正以莊六年傳云「得意致會，不得意

致伐」，何氏云：「此謂公與二國以上也。公與二國以上

出會盟，得意致會，不得意不致。」今會不得意而致會，故

據而難之。○注「扈之會公失序不致」。○解云：即文七

年「秋，公會諸侯、晉大夫盟于扈」，傳云「諸侯何以不

序？④大夫何以不名？公失序也。公失序奈何？諸

①「宋」，原作「朱」，今據京都本、再造善本、中華本、閣

本改。

②「三」，原作「主」，京都本、再造善本作「王」，今據中華

本、閣本改。

③「之」下，杉浦校：「單疏鈔本有「者」字。」

④「侯」，原作「使」，今據京都本、再造善本、中華本、閣

本改。

侯不可使與公盟，眅晉大夫與公盟也」是也。然則彼是公不得意不書致，今此亦不得意而反致，故難之。不恥也。曷爲不恥？據扈之會公失序恥。公幼也。因公幼殺眅爲諱辭。不書行父執者，公不見見已重矣。【疏】注「因公幼殺眅爲諱辭」。○解云：實不見，今而致會，詐若得意然，故言爲諱辭耳。○注「不書行父執者」。○解云：是時累代公執，而下經但書其一，故此注「不書行父執者，公不見見已重矣」。

公會尹子、晉侯、^①齊國佐、邾婁人伐鄭。

曹伯歸自京師。執而歸者名，曹伯何以不名？而不言復歸于曹何？據曹伯襄復歸于曹。【疏】注「據曹伯襄復歸于曹」。○解云：在僖二十八年冬。易也。易故未言之，不復舉國名。○易，以豉反，注及下同。復，扶又反，下「而復」同。其易奈何？公子喜時在內也。公子喜時在內，則何以易？據本纂喜時也。○喜時，《左傳》作「欣時」。公子喜時者，仁人也，內平其國而待

之，和平其臣民，令專心于負芻。○令，力呈反。外治諸京師而免之。訟治于京師，解免使來歸。其言「自京師」何？據僖二十八年晉人執衛侯歸之于京師，後復歸于衛，俱天子所歸，不言「自京師」。不連歸問者，嫌自京師天子有力文，言甚易，欲并問力文，與上說「喜時」錯。【疏】注「據僖二十八年」至「言自京師」。○解云：即僖二十八年冬「晉人執衛侯歸之于京師」，三十年秋「衛侯鄭歸于衛」是也。○注「不連歸問」至「喜時錯」。○解云：問者之意，欲道僖三十年「衛侯鄭歸于衛」，亦是天子所歸，不言「自京師」。今曹伯亦爲天子所歸，獨言「自京師」，文相違背，故問之。若連歸問云「其言歸自京師何」，即嫌歸自京師者，乃是天子有力之文，似若僖二十八年冬「衛元咺自晉復歸于衛」，傳云：「自者何？有力焉者也。」然上說言其所以易，正猶公子喜時之力。○若此處并問天子有力之文，即與上說喜時之力自相違。言甚易也，舍是無難矣。言歸自京

① 「侯」，原脫，今據余本、中華本、閩本補。
② 「猶」，阮校引浦鏜云：「當『由』字誤。」

師者，與內據臣子致公同文，欲言甚易也。舍此所從還，無危難矣。主所以見曹伯歸，本據喜時平國反之書，非錄京師有力也。執歸書者，賢喜時爲兄所篡，終無怨心，而復深推精誠，憂免其難，非至仁莫能行之，故書起其功也。○舍是，音捨，注同，下傳「舍臣」放此。無難，乃旦反，注同。【疏】注「言歸自京師者」至「致公同文」。○解云：與上十三年「公至自京師」相似。○注「執歸書者」至「起其功也」。○解正：①以僖十九年「宋人執滕子嬰齊」，二十一年「執宋公」之屬，皆不書其歸也。若然，僖二十八年春，晉侯「執曹伯以畀介宋人」，②冬，「晉人執衛侯歸之于京師」，「曹伯襄復歸于曹」，三十年秋「衛侯鄭復歸于衛」，皆是被執而書之者，曹伯之下注云「執歸不書」。書者，名惡當見，衛侯之下注云「執歸不書」。主書者，名惡當見是也。前此者晉人來乞師而不與者，③即上十六年夏六月，「晉侯使欒黶來乞師」，「晉侯及楚子、鄭伯戰于鄢陵，楚子、鄭師敗績」，於戰之經不見魯師，則知不與矣。

九月，晉人執季孫行父，舍之于招丘。執未可言舍之者，此其言「舍之」何？仁

之也。④曰在招丘，悵矣。悵，悲也。仁之者，若曰在招丘，可悲矣。閔錄之辭。○招丘，章遙反，又上饒反，二傳作「茗丘」。悵，音希，悲也。執未有言「仁之」者，此其言人之何？⑤代公執也。其代公執奈何？前此者，晉人來乞師而不

①「注執歸書者至起其功也」○解正，杉浦校：「單疏鈔本作「云執歸書者云云者」，無「○解正」。毛本「解正」作「解云」。」

②「以畀介宋人」，阮校引浦鏜云：「『以』、『介』二字衍。」杉浦校：「單疏鈔本無『介』字。」

③「前此者晉人來乞師而不與者」，阮校：「閔、監、毛本作「前此者至不與」○解云」，移此疏於「執未有言仁之者」節注下。」

④「仁之也」，阮校：「唐石經、諸本同。浦鏜云：《禮記·表記》注引此「仁之也」作「人也」，疏云：「欲人愛此行人。」

⑤「人之何」，阮校：「唐石經、諸本作「仁之何」，此與《表記》注合。」補校曰：「按：此誤字，而有合于古者也。《公羊》本三云「人之」，後來皆改作「仁之」，則此作「人之」，爲誤字矣。」

與，不書者，不與無惡。【疏】注「不書者不與無惡」。○

解云：若其書之，宜言晉侯使欒黶來乞師，公不許之。今無此經，故言「不與不書」也。言「不與無惡」者，僖二十

六年「公子遂如楚乞師」之下，傳云：「乞者何？卑辭也。

曷爲以外內同若辭？重師也。曷爲重師？師出不正

反，戰不正勝也。」何氏云「兵，凶器。戰，危事。不得已

而用之爾，乃以假人，故重而不暇別外內也」者，是其「不

與無惡」之義。^①公會晉侯，會沙隨也。將執公。

季孫行父曰：「此臣之罪也。」於是執季孫

行父。成公將會厲公，^②謂上伐鄭。^③言謚者，別

嬰齊所請也。明言「公會晉侯」者，嬰齊所請事也，故下

與嬰齊傳合同。○別，彼列反。【疏】「於是執季孫行

父」。○解云：此以上，道今年秋會于沙隨之時事。○注

「謂上伐鄭」至「傳合同」。○解云：下十七年「公孫嬰齊

卒于狸軫」之下，傳云：「前此者，嬰齊走之晉。公會晉

侯，將執公，嬰齊爲公請。公許之反爲大夫。歸，至于狸

軫而卒。」然則上言公會晉侯，將執公者，乃是上經沙隨

之事，故下與嬰齊傳文合。言成公將會厲公，言謚者，

欲別於嬰齊所請之事，明其是上伐鄭時也。案此傳沙隨

之事，時行父亦請，而特言嬰齊所請事者，欲言行父再請，而嬰齊三請，俱在沙隨故也。會不當期，將執

公。季孫行父曰：「臣有罪，執其君，子有

罪，執其父，此聽失之大者也。今此臣之

罪也，舍臣之身而執臣之君，吾恐聽失之

爲宗廟羞也。」於是執季孫行父。善其過則稱

己，美則稱君，累代公執，在危殆之地，故地言舍而月之

者，痛傷忠臣不得其所。爲代公執不稱行人者，在君側，

非出使。○出使，所吏反。【疏】「此聽失之大者也」。○

解云：言聽獄者失之大者矣。○注「故地言舍」至「得其

所」。○解云：言「故地言舍而月之」者，即經書「九月，晉

人執季孫行父，舍之于招丘」是也。言月則爲傷痛之文

者，正以凡執例時故也。即僖四年夏「齊人執陳袁濩

塗」，五年「冬，晉人執虞公」之屬是也。○注「爲代公」至

①「是」，杉浦校：「單疏鈔本重『是』字。按：此本『是』

字，其一當屬上文。」

②「厲公」，阮校：「唐石經作『晉厲公』，此脫『晉』字。」

③「鄭」下，阮校：「鄂本有『也』字。」

「非出使」。○解云：①正以文十四年冬「齊人執單伯」之下，傳云：「執者曷爲或稱行人？」或不稱行人？」注云：「此問諸侯相執大夫所稱例。」傳云：「稱行人而執者，以其事執也。」注云：「以其銜命奉國事執之，②『晉人執我行人叔孫舍』是也。」傳又云：「不稱行人而執者，以己執也。」注云：「己者，己大夫。自以大夫之罪執之。分別之者，罪惡當各歸其本。」以此言之，則知自爲己執者，乃不稱行人。今此行父爲代公執，而亦不稱行人者，正以其在君側，非出使故也。

冬，十月，乙亥，叔孫僑如出奔齊。

十有二月，乙丑，季孫行父及晉郤州

盟于扈。行父執釋不致者，舉公至爲重。【疏】注「行

父執釋不致者舉公至爲重」。○解云：正以昭十三年秋

「晉人執季孫隱如以歸」，十四年「春，隱如至自晉」；二十

三年春「晉人執我行人叔孫舍」，③二十四年春「叔孫舍至

自晉」，皆書其至。今此不書至，故言舉公至爲重。

公至自會。

乙酉，刺公子偃。【疏】「乙酉刺公子偃」。○

解云：即僖二十八年注云「內殺大夫例，有罪不日，無罪

日」者，正謂此文是也。考諸舊本，此經之下悉皆無注，若有注者衍字耳。

十有七年，春，衛北宮結率師侵鄭。

夏，公會尹子、單子、晉侯、齊侯、宋

公、衛侯、曹伯、邾婁人伐鄭。

六月，乙酉，同盟于柯陵。○柯，古河反。

秋，公至自會。

齊高無咎出奔莒。

九月，辛丑，用郊。用者何？用者不

宜用也。九月，非所用郊也。周之九月，夏之

七月，天氣上升，地氣下降，又非郊時，故加用之。【疏】

「用者何」。○解云：正以上下之郊，例不言「用」，此獨違

例，故執不知問。然則郊曷用？郊用正月上

①「注爲代公至非出使」○解云：「杉浦校：『單疏鈔本作

「云爲代公云云者」，無「○解云」。

②「銜命」，阮校引浦鍾云：「『所銜』誤『銜命』。」今

按：作「所銜」，與文公十四年注合。

辛。魯郊博卜春三月，言正月者，因見百王正所當用也。三王之郊，一用夏正。言正月者，《春秋》之制也。

正月者，歲首，上辛尤始新，^①皆取其首先之意。日者，明用辛例，不郊則不日。○因見，賢徧反，下同。【疏】注

「魯郊博」至「所當用」。○解云：僖三十一年傳云「魯郊，

非禮也」，彼注云「以魯郊非禮，故卜爾」。昔武王既沒，成

王幼少，周公居攝，行天子事，制禮作樂，致太平，有王

功。周公薨，成王以王禮葬之，命魯使郊，以彰周公之

德。非正故卜，三卜吉則用之，不吉則免牲」者，是其「魯

郊博卜春三月」之義也。而此傳止言正月者，因見其自

今后百代之王正所當用之月也。○注「三王之郊」至「制

也」。○解云：三王之郊，一用夏正者，《易說》文也。既

用夏正，而此傳特言用正月上辛者，但《春秋》之制也。

《春秋》因魯以制法，令自今以後之郊，皆用周之正月故

也。○注「不郊則不日」。○解云：即僖三十一年「夏，四

月，四卜郊，不從，乃免牲，猶三望」，成七年「春，王正月，

饗鼠食郊牛角，改卜牛」，夏五月「不郊，猶三望」之屬，是

「不郊則不日」之文也。或曰：用然後郊。或曰：

用者，先有事存后稷神名也。^②晉人將有事於河，必先有

事於惡池。齊人將有事於泰山，必先有事於蜚林。^③魯

人將有事於天，必先有事於泮宮。^④九月郊尤悖禮，故言

用，小大盡譏之，以不郊乃譏三望，知郊不得譏小也。又

夕牲告牷后稷，當在日上，不當在日下。^⑤○惡，如字，又

火吳反。池，如字，又大河反。蜚，芳尾反，又音配。泮，

音判，本又作「郊」。拴，音全。【疏】注「晉人將有事」至

「於泮宮」。○解云：即《禮器》云「魯人將有事於上帝，必

先有事於泮宮」，注云：「上帝，周所郊祀之帝，謂蒼帝靈

威仰也。魯以周公之故，得郊祀上帝與周同。先有事于

泮宮，告后稷也。告之者，將以配天先仁也。泮宮，郊之

學也，《詩》所謂泮宮也，字或為「郊宮」。「晉人將有事於

河，必先有事於惡池」，鄭注云：「惡」當為「呼」，聲之誤

也。呼池，嘔夷，并州川。「齊人將有事於泰山，必先有

事於配林」，注云「配林，林名」是也。○注「以不郊」至

①「尤」，阮校：「閩、監、毛本同，鄂本作「猶」，是也。」

②「名」，阮校引浦鏜云：「名，衍字，從《續通解》校。」

③「蜚林」，阮校引惠棟云：「古「配」字讀為「妃」，故「配林」一作「蜚林」，音相近。」

④「泮宮」，阮校：「按：《禮記·禮器》注云：泮宮，字或為「郊宮」。」

⑤「當」，余本作「得」。

「譏小也」。○解云：①即僖三十一年「夏，四月，四卜郊，不從，乃免牲，猶三望」，傳云：「猶者何？通可以已也。譏不郊而望祭也。」何氏云「譏尊者不食而卑者獨食」也。○注「又夕牲告」至「在日下」。○解云：言古禮，郊之前日，午後，陳其牲物，告牲之牲于后稷，則知此經宜云「九月，用辛丑郊」。

晉侯使荀息來乞師。○魯，乙耕反。

冬，公會單子、晉侯、宋公、衛侯、曹伯、齊人、邾婁人伐鄭。

十有一月，公至自伐鄭。月者，方正下壬申，故月之。【疏】注「月者方」至「月之」。○解云：正以凡致例時，故此解之。言「正下壬申」者，欲正壬申為十月之日，是以不得不言十一月以來之。

壬申，公孫嬰齊卒于貍軫。非此月日也，曷為以此月日卒之？據下丁巳朔，知壬申

在十月。○貍，力之反。軫，之忍反，《左氏》作「脈」，《穀梁》作「蜃」。【疏】「卒于貍軫」者。○解云：正本作「貍辰」字。○注「據下丁巳」至「十月」。○解云：即下「十有二月，丁巳，朔，日有食之」是也。十二月丁巳朔，逆而推

之，則丁亥為十一月朔日，又逆而推之，即丁卯為十月十一日矣。即從丁卯數之，戊辰、己巳、庚午、辛未、壬申，然則壬申乃為十月十六日，故云「據下丁巳朔，知壬申在十月」矣。待君命然後卒大夫。曷為待君命然後卒大夫？據昭公出奔卒叔孫舍。【疏】注「據昭公」至「孫舍」。○解云：即昭二十五年「九月，己亥，公孫于齊」，冬，十月，戊辰，叔孫舍卒，三十二年冬十二月「公薨于乾侯」是也。前此者，嬰齊走之晉。不書者，以為公請除出奔之罪也。○為，于僞反，下文「為公」同。【疏】注「不書者」至「之罪也」。○解云：其請公者，謂上沙隨時也。公會晉侯，將執公，嬰齊為公請。公許之反為大夫。歸，至于貍軫而卒。十月壬申日。貍軫，魯地。無君命，不敢卒大夫。國人未被君命，不敢使從大夫禮。公至，十一月至是也。【疏】注「十一月至是也」。○解云：「十有一月」

①「○」，原無，據例補。

月，^①公至自伐鄭」是也。若以上傳言之，則嬰齊之請，魯侯許之，皆是沙隨時也。若在沙隨會時，即在伐鄭之上，何故待公伐鄭之還乃始卒之？正以成公許之，實在沙隨，但嬰齊未還，公又伐鄭，伐鄭未歸，嬰齊已卒，國人不聞公命，未敢卒之，亦何傷？曰：「吾固許之反爲大夫。」許反爲大夫，即受命矣。然後卒之。善其不敢自專，故引其死日，下就公至月卒之，起其事，所以激當世之驕臣。○激，古狄反。

十有二月，丁巳，朔，日有食之。

邾婁子貜且卒。○貜且，俱縛反，下子餘反。

晉殺其大夫卻錡、卻州、卻至。

楚人滅舒庸。舒庸，東夷。道吳圍巢。【疏】

注「舒庸東夷道吳圍巢」。○解云：出《左氏》。考諸舊本，亦有無此注者。

十有八年，春，王正月，晉殺其大夫胥童。

庚申，晉弑其君州蒲。日者，二月庚申日。

上繫於正月者，起正月見幽，二月庚申日死也。厲公猥

殺四大夫，臣下人人恐見及，以致此禍，故日起其事，深爲有國者戒也。【疏】注「日者」至「申日」。○解云：正以文十八年冬，「莒弑其君庶其」，傳云：「稱國以弑者，衆弑君之辭。」注云：「一人弑君，國中人人盡喜，故舉國以明失衆，當坐絕也。例皆時者，略之也。」然則稱國以弑者例書時，而此書日，故解之。而昭二十七年「夏，四月，吳弑其君僚」，何氏云「月者，非失衆見弑，故不略」是也。云云之說在彼。知庚申二月日者，亦以上十二月丁巳朔言之也。去年十二月丁巳朔，則知今年二月丙辰朔也。何者？以長曆推之，今年正月小故也。二月丙辰朔數之，丁巳、戊午、己未、庚申，則庚申爲二月五日矣。正月之中，寧得有之乎？故知庚申二月日也。○注「上繫于正月」至「日死也」。○解云：②《春秋說》云「厲公猥殺四大夫，臣下人人恐見及，正月幽之，二月而死」是也。○

①「上」，杉浦校：「單疏鈔本有『即上經云』四字，是也。」

②「注上繫于正月至日死也」○解云：「杉浦校：『單疏鈔本作『云上繫于正月者以起正月見幽二月庚申日死也者』，無『○解云』。按：今何注『于』作『於』，『起』上無『以』字，與此所據之本異。』」

注「厲公猥殺四大夫」者。○解云：即去年殺三郤，是歲殺胥童是也。

齊殺其大夫國佐。

公如晉。

夏，楚子、鄭伯伐宋。

宋魚石復入于彭城。不書叛者，楚爲魚石

伐取彭城以封之。^①本受于楚，非得于宋，故舉伐於上，起其意也。楚以封魚石，復本繫于宋。言復入者，不與

楚專封，故從犯君錄之。主書者，^②其專封。○復入，扶

又反，注同。爲，于僞反，下「爲失」同。^③【疏】注「不書叛

者」至「其意也」。○解云：如此注者，欲決昭二十一年

「宋華亥、向甯、華定自陳入于宋南里以畔」之文故也。

○注「楚以」至「君錄之」。○解云：桓十五年傳云：「復

入者，出無惡，人有惡。」故言「從犯君錄之」。何者？魚

石出時直爲與山有親，更無實罪，故曰「出無惡也」。今

犯君而入，故爲人惡，從犯君錄之。○注「主書者」至「專

封」。○解云：言楚子伐宋下，即言魚石復入于彭城，是

起其專封之義。必起其專封者，正欲責之故也。

公至自晉。

晉侯使士匄來聘。○匄，古害反。

秋，杞伯來朝。

八月，邾婁子來朝。

築鹿囿。何以書？譏。何譏爾？

有囿矣，又爲也。刺奢泰妨民。天子囿方百里，公、

侯十里，伯七里，子、男五里，皆取一也。○鹿囿，音又。

【疏】注「天子囿」至「取一也」。○解云：《孟子》文，《司馬法》亦云也。

己丑，公薨于路寢。

冬，楚人、鄭人侵宋。

晉侯使士彭來乞師。○士彭，二傳作「士

魴」，襄十二年同。

^①「伐」下，阮校：「鄂本有「宋」字，此脫。」

^②「主書者」，阮校：「鄂本「者」下有「起」，此脫。解

云：起其專封之義。」杉浦校：「單疏鈔本標起訖

「者」下有「起」字。」

^③「爲失」，宋本《釋文》作「爲宋」。下十有二月「爲宋誅

魚石」，則作「爲宋」是也。

十有二月，仲孫蔑會晉侯、宋公、衛侯、邾婁子、齊崔杼同盟于虛朶。不日者，時欲行義，爲宋誅魚石，故善而爲信辭，或喪盟略。○杼，直呂反。虛朶，起魚反，下敕丁反。

丁未，葬我君成公。

監本附音春秋公羊注疏成公卷第十八

監本附音春秋公羊注疏襄公卷第十九

起元年，盡十一年

何休學

元年，春，王正月，公即位。

仲孫蔑會晉欒黶、宋華元、衛甯殖、曹人、莒人、邾婁人、滕人、薛人圍宋彭城。宋華元曷爲與諸侯圍宋彭城？據晉趙鞅以地

正國，加叛文，今此無加叛文，故問之。○殖，市力反。

【疏】注「據晉」至「問之」。○解云：即定十三年「秋，晉趙鞅入于晉陽以叛。」冬，晉荀寅及士吉射入于朝歌以叛。晉趙鞅歸于晉。傳云：「此叛也，其言歸何？」注云：

「據叛與出入惡同。」「以地正國也」，又注云：「軍以井田立數，故言以地。」傳又云：「其以地正國奈何？晉趙鞅取晉陽之甲，以逐荀寅與士吉射。荀寅與士吉射者，曷爲者也？君側之惡人也。此逐君側之惡人，曷爲以叛

言之？無君命也。」注云：「無君命者，操兵鄉國，故初謂之叛，後知其意，欲逐君側之惡人，故錄其釋兵，書歸救之。」^②君子誅意不誅事。」今華元與諸侯操兵鄉國而不加叛文，故難之。云「宋華元曷爲與諸侯圍宋彭城」，而不加叛文，與趙鞅異乎？然則趙鞅以采地之兵，逐君側之惡人，以正其國，其意實善，而《春秋》必加叛文者，正以人臣之義，本無自專之道，若其許之，恐惡逆之臣，外託興義之兵，內有覬覦之意，是以雖爲善，不得與之。爲

宋誅也。故華元無惡文。○爲宋，于僞反，下「爲宋」，「楚爲」并注同。【疏】注「故華元無惡文」。○解云：雖云操兵鄉國，但稟宋公之命，與諸侯之師逐去叛人，以衛社稷，《春秋》善之，故無惡文也。其爲宋誅奈何？

魚石走之楚，楚爲之伐宋，取彭城以封魚石。魚石之罪奈何？以人是爲罪也。說在成十八年。書者，善諸侯爲宋誅。雖不能誅，猶有屈彊

① 「入」，原作「人」，今據京都本、再造善本、中華本、閣本改。

② 「救」，定公十三年注作「救」。

臣之助。^①【疏】注「魚石之楚」。○解云：即成十五年「宋魚石出奔楚」是也。○「楚爲」至「魚石」。○解云：即成十八年「夏，楚子、鄭伯伐宋。宋魚石復入于彭城」是也。○「以人是爲罪也」。○解云：言魚石於成十五年初出之時，直是與山有親，恐見及，是以辟而去，非其大罪也。至成十八年，外託鄭、楚之兵以伐取君邑，遂居彭城，與君相拒，失人臣之義，非順行之道，故曰「以人是爲罪也」。○注「說在成十八年」。○解云：即謂成十八年經，具說「楚子、鄭伯伐宋。宋魚石復入于彭城」之事。言上舉楚、鄭伐宋，下即言魚石復入。復入者，^②出無惡之文，明其出奔楚時，非其罪也，但倚託楚、鄭，伐取彭城爲大惡，故此傳云「以人是爲罪」矣，非謂成十八年更有解注。○注「書者」至「之助」。^③○解云：傳云「爲宋誅」，而知不能誅者，正以助其君討叛臣，義之高者。若能誅之，理應在見，似若昭四年經書「執慶封，殺之」。今但言圍而無殺文，故知不能誅。雖不能誅，猶有屈魚石之功，是以《春秋》書之，善其爲宋誅矣。楚已取之矣，曷爲繫之宋？據莒人伐杞取牟婁，后莒牟夷以牟婁來奔，不繫杞。【疏】注「據」至「繫杞」。○解云：「莒人伐杞取牟婁」，在隱四年春。其後來奔者，即昭五

年「夏，莒牟夷以牟婁及防茲來奔」是也。不與諸侯專封也。故奪繫于宋，使若宋邑者。楚救不書者，從封內兵也。【疏】注「故奪」至「邑者」。○解云：案僖二年「春，王正月，城楚丘」，傳云：「不與諸侯專封也。」然則不與諸侯專封，取事一也，所以或繫於宋，或不繫於衛者，彼以衛國已滅，故無所繫。不言桓公城之者，不與諸侯專封故也。今此魚石受楚之封，入邑而叛，是以奪而繫國，以示不成。然則不與之言雖同，其不與之理實異，是以齊侯封衛，《春秋》實與，楚封魚石，繫宋以抑之。云云之說，在僖二年。○注「楚救」至「兵也」。○解云：經傳無文，而知楚救者，正以楚人去年封之故也。楚人是時并兵于魚石，魚石之叛抑而不成，今華元討之，即是宋國封內之兵也。封內之兵，例所不錄，是以楚救魚石不得書之。知封內之兵例所不錄者，正以定公八年傳云「公

①「助」，阮校：「鄂本『助』作『功』，解亦云『雖不能誅，猶有屈魚石之功』，當據以訂正。」

②「入」，原作「人」，今據京都本、再造善本、中華本、閣本改。

③「助」，阮校：「鄂本『助』作『功』。」

斂處父帥師而至」，經不書之是也。若然，哀三年「衛石曼姑帥師圍戚」，亦是封內之兵而得書者，彼以國夏爲伯討，是以得書，故彼傳云：「齊國夏曷爲與石曼姑帥師圍戚？」^①伯討也。然則《春秋》不與蒯聵之直，故令國夏得討之。國夏得討之，則非封內之兵也。今此魚石不成叛，是以與彼異也。

夏，晉韓屈帥師伐鄭。

仲孫蔑會齊崔杼、曹人、邾婁人、杞人次

于合。刺欲救宋而後不能也。知不救鄭者，時鄭背中國，

不能救不得刺。○于合，二傳作「鄩」。背，音佩。【疏】注「夏晉韓屈」。○解云：②《左傳》、《穀梁》「屈」作「厥」字也。

○「次于合」者，《左氏》「合」作「鄩」字也。○注「刺」至「得刺」。○解云：知如此者，正以莊三年「冬，公次于郎」，傳云：「其言次于郎何？刺欲救紀而後不能也。」今此下文即有楚人侵宋，言次于合，魯人在其間，故知與彼宜同例，亦是初欲救宋而後不能，是以《春秋》書其止次譏之。

秋，楚公子壬夫帥師侵宋。

九月，辛酉，天王崩。

邾婁子來朝。

冬，衛侯使公孫剽來聘。○剽，匹妙反。

晉侯使荀瑩來聘。【疏】「九月辛酉」至「來聘」。

○解云：諸侯爲天子身服斬衰三年，是以《曾子問》云：「諸侯相見，揖讓而入門，^③不得終禮，廢者幾？」孔子曰：「六。」請問之。曰：「天子崩，大廟火，日食，后夫人之喪，雨露服，失容，則廢」。然則天王九月崩，而四國得行朝聘禮者，杜氏云「辛酉，九月十五。冬者，十月初也。天王崩赴未至，皆未聞喪，故各得行朝聘之禮」是也。若然，則四國行朝聘之時，王之赴告未至於魯，經書「天王崩」，得在朝聘之上者，《公羊》之義據百二十國寶書，案而爲經，雖四國未知，何妨先書乎？

二年，春，王正月，葬簡王。【疏】「二年」至

「簡王」。^④○解云：隱三年傳云：「天子記崩不記葬，必

①「石」，阮校：「浦鏗云：『石』上脫『衛』。按：浦說與哀三年傳合。」

②「注夏晉韓屈」○解云，杉浦校：「單疏鈔本作『夏晉韓屈者』，下無『○解云』。按：『夏』上有『注』字，當爲衍文。」

③「揖讓而入門」，阮校：「今《禮記》無『而』字。」

④「二年至簡王」，杉浦校：「單疏鈔本作『葬簡王』。」

其時也。」而此書者，即文公九年傳云：「不及時書，過時書，我有往者則書。」彼注云：「謂使大夫往也，惡文公不自往，故書葬，以起大夫會之。」然則簡王去年九月崩，至今年正月，但始五月矣，所謂不及時，是以書之。

鄭師伐宋。

夏，五月，庚寅，夫人姜氏薨。

六月，庚辰，鄭伯論卒。不書葬者，諱伐喪。

○論，古困反。【疏】注「不書」至「伐喪」。○解云：《春秋》之內，諸侯之卒，不書其葬，非止一義而已，或諱背殯用兵，或譏其篡，或刺不討賊，枉殺大夫。案鄭伯，襄公之子，繼體爲君，復非篡立，從成十五年即位以來，未有罪惡之事，明其不書葬者，不爲上事明也。而下又云「冬，仲孫蔑會晉荀罃」以下云云「于戚，遂城虎牢」，傳云：「虎牢者何？鄭之邑也。其言城之何？取之也。取之則曷爲不言取之？爲中國諱也。曷爲爲中國諱？諱伐喪也。」然則既不爲上事，下即有諱伐喪之文，則知不書葬者，正爲諸侯諱其伐喪故也。

晉師、宋師、衛甯殖侵鄭。

秋，七月，仲孫蔑會晉荀罃、宋華元、

衛孫林父、曹人、邾婁人于戚。

己丑，葬我小君齊姜。齊姜者何？

齊姜與繆姜，則未知其爲宣夫人與？成

夫人與？齊姜者，宣公夫人。九年繆姜者，成公夫人

也。傳家依違者，襄公服繆姜喪未踰年，親自伐鄭，有

惡，故傳從內義，不正言也。○繆，音穆。人與，音餘。①

【疏】齊姜者何？○解云：欲言成母，謚不言宣，欲言成妻，與成謚別，故執不知問。○注「齊姜」至「正言也」。

○解云：《左氏》以齊姜，成公夫人，繆姜，宣公夫人。而

何氏不然者，正以齊姜先薨，多是姑，繆姜後卒，理宜爲

婦，實無文據，以順言之也。且九年襄公伐鄭，不書其

至，若非親母，不應貶之至此矣。言襄公服繆姜喪未踰

年，親自伐鄭者，即襄九年「五月，辛酉，夫人姜氏薨。

秋，八月，癸未，葬我小君繆姜。冬，公會晉侯」以下「伐

鄭」是也。然則襄公母死未期，已爲兵首，無恩之甚，是

故爲諱。若爲祖，差輕可言。是以彼注云「不致者，惡公

服繆姜喪未踰年，親自伐鄭，故奪臣子辭」是也。舊云：

①「音餘」下，宋本《釋文》有「下同」二字。

傳言惡襄公喪服用師，故以祖爲親母，所以甚責內，是以何氏順傳文也者，非也。《公羊》之義，口授相傳，五世以後方著竹帛，是以傳家數云「無聞焉爾」。以此言之，容或未察，止作公羊氏實不分明，何以不得而要知傳序經意依違之者，正以文與桓公九年曹世子射姑同故也。案桓公九年「冬，曹伯使其世子射姑來朝」，傳云：「諸侯來曰朝。此世子也，其言朝何？」《春秋》有譏父老，子代從政者，則未知其在齊與？在曹與？」注云：「在齊者，世子光也。時曹伯年老有疾，使世子行聘禮，恐卑，故使自代朝，雖非禮，有尊厚魯之心，傳見下卒葬詳錄，故敘經意依違之也。」然則彼刺曹世子，而傳序經意不正言之，今此文正與彼同，故知亦依違言之。

孫叔豹如宋。

冬，仲孫蔑會晉荀罃、齊崔杼、宋華元、衛孫林父、曹人、邾婁人、滕人、薛人、小邾婁人于戚，遂城虎牢。虎牢者何？鄭之邑也。以下戍繫鄭。【疏】「虎牢者何」。○解云：欲言鄭邑，今不繫鄭，欲言他邑，有城虎牢之文，故執不知問。①○注「以下戍繫鄭」者。○解云：即下十年

冬，「戍鄭虎牢」是。其言城之何？據外城邑不書。【疏】注「據外」至「不書」。○解云：正以《春秋》上下無外城邑之經故也，而何氏兼邑言之者，正以外城國都亦有書者，是以不得直言據外城國都，其書之者，即「城邢」、「城楚丘」、「城緣陵」、「城成周」之屬是也。其外城國都，雖非常例，要自數數有經，是以何氏據邑言之。取之也。取之則曷爲不言取之？據取牟婁。【疏】注「取牟婁」。○解云：即隱四年「二月，莒人伐杞，取牟婁」是也。爲中國諱也。曷爲爲中國諱？據莒伐杞取牟婁，不爲中國諱。②○爲中，于僞反，下及注并下文「鄭爲」皆同。諱伐喪也。曷爲不繫乎

①「故」，原脫，今據中華本、閩本補。

②「據莒伐杞取牟婁不爲中國諱」，阮校：「諸本同。按：此注當衍。《釋文》本有此，疏本無之是也。《釋文》音傳「爲中」云「于僞反，下及注并下文「鄭爲」皆同」，此陸本有注之證。解云：「正據莒人取牟婁，不爲中國諱矣。而何氏不注之者，以上文已據取牟婁，是以不能重出。」此疏本無注之證。淺人襲疏語爲之，而未覺其與上複也。」

鄭？爲中國諱也。大夫無遂事，此其言遂何？歸惡乎大夫也。使若大夫自生事取之者，即實遂，但當言取之。

楚殺其大夫公子申。【疏】注「諱伐喪也」。

○解云：考諸古本，皆無此注，且與下傳文煩重。若有注者，是衍字也。○「曷爲爲中國諱」。○解云：正據莒人取牟婁，不爲中國諱矣。而何氏不注之者，以上文已據取牟婁，是以不能重出。「曷爲不繫乎鄭」者，正據下十年冬戍之時繫鄭也。「爲中國諱也」者，若繫于鄭，還有伐喪之義，故云「中國諱」也。○注「即實」至「取之」。○解云：若實大夫自生事，即非諸侯使之取，是以不勞爲諸侯諱，依實書之亦無傷，故言即實遂，但當言取之。

三年，春，楚公子嬰齊帥師伐吳。

公如晉。

夏，四月，壬戌，公及晉侯盟于長檣。

○檣，敕居反。

公至自晉。

①盟地者，不于都也。以晉致者，上盟不于都，嫌如晉不得人，故以晉致起之。不別盟得意者，成公比失意如晉，②公獨得容盟，得意亦可知。○

別，彼列反。【疏】注「盟地」至「可知」。○解云：文三年

「冬，公如晉。十有二月，己巳，公及晉侯盟」，彼不舉地者，以其在國都故也。今此舉長檣，故言「不于都」矣。

云「以晉至起之」者，③昭二十八年「春，王三月，公如晉，次于乾侯」，二十九年「春，公至自乾侯，居于運」，何氏云：「不致以晉者，不見容于晉，未至晉。」然此經上言「盟于長檣」，今若又言「至自長檣」，即嫌似次于乾侯然，亦不得入晉都，故以晉致起其文也。云「不別」至「可知」者，公與二國以上出會盟，得意致會，不得意不致。公與一國出會盟，得意致地，不得意不致。然則此襄公得與晉侯盟，宜直致地，不致地者，以其可知也。言「成公比失意於晉」者，即成公十六年「秋，公會晉侯」以下「于沙隨，不見公」，傳云：「前此者，晉人來乞師而不與，公會晉侯，將執公。季孫行父曰：『此臣之罪也。』」於是執季孫行

①「公至自晉」，阮校：「鄂本與上「長檣」合爲一節。」

②「成公比失意如晉」，阮校：「鄂本「如」作「于」，此誤。疏云：「言成公比失意於晉者。」「于」作「於」爲是，當據正。」

③「至」，上注云「故以晉致起之」，則當作「致」。

父。」經又云「公會尹子、晉侯」以下「伐鄭」，傳云「成公將會晉厲公，會不當期，將執公。季孫行父曰：『臣有罪，執其君，子有罪，執其父，此聽失之大者也。今此臣之罪也，舍臣之身而執臣之君，吾恐聽失之爲宗廟羞也。』於是執季孫行父」是也。

六月，公會單子、晉侯、宋公、衛侯、鄭伯、莒子、邾婁子、齊世子光。己未，同盟于雞澤。盟下日者，信在世子光也。【疏】注「盟下」至

「光也」。○解云：言信任在於世子光，若如盟日定否世子光制之然，是以下日以近之，由如文十四年注云「盟下日者，^①刺諸侯微弱，信在趙盾」之類。何氏何以數言信在？正以下十六年傳云「諸侯皆在是，其言大夫盟何？信在大夫也」。舊解云「齊光亢諸侯之禮，晉侯貴致大國，衆人畏之，故却日以待之」，非也。

陳侯使袁僑如會。其言「如會」何？

據曹伯襄言會諸侯，鄆子言會盟。○僑，其驕反。【疏】注「據曹伯襄言會諸侯」者。^②即僖二十八年冬，「曹伯襄復歸于曹。遂會諸侯圍許」是也。云「鄆子言會盟」者，即僖十九年「鄆子會盟于邾婁」是也。後會也。不直

言會盟者，時諸侯不親與袁僑盟，又下方殊及之。【疏】注「不直」至「及之」。○解云：若其諸侯親與之盟，宜云「公會單子、晉侯以下盟于雞澤，陳侯使袁僑來會盟」。正由諸侯不親與之盟，^③故止得言如會矣。云「又下方殊及之」者，即下云「及諸侯之大夫，及陳袁僑盟」是也。言下方殊文，道及陳袁僑盟，是以此處未勞道會盟。

戊寅，叔孫豹及諸侯之大夫，及陳袁僑盟。曷爲殊及陳袁僑？據俱諸侯之大夫也。

言「之大夫」者，辟諸侯與大夫皆盟。爲其與袁僑盟也。陳、鄭，楚之與國，陳侯有慕中國之心，有疾，使大夫會，諸侯欲附疏，不復備責，遂與之盟，共結和親，故殊

① 「由」，阮校：「浦鍾云：當作『猶』。按：『由』與『猶』通。」杉浦校：「單疏鈔本『由』作『猶』。」

② 「者」，阮校：「閩、監、毛本無『者』字，有『解云』。」

③ 「親」，原作「新」，注曰「時諸侯不親與袁僑盟」，則作「親」是，今據京都本，再造善本，閣本改。

之，起主爲與袁僑盟也。①復出陳者，喜得陳國也。②不重出地，有諸侯在，臣繫君，故因上地。○爲其，于僞反，注同。不復，扶又反，下同。重，直用反。【疏】注「陳鄭」至「國也」。○解云：即宣十一年「夏」，③楚子、陳侯、鄭伯盟于辰陵是也。知有慕中國之心者，正謂使大夫如會是也。且僖八年「鄭伯乞盟」之下，注云：「時鄭伯欲與楚，不肯自來盟，處其國，遣使挹取其血，而請與之約束，④無汲汲慕中國之心，故抑之，使若叩頭乞盟者也。不錄使者，方抑鄭伯，使若自來也。」然則鄭伯無慕中國之心，抑言乞盟，又不錄其使，則今不言乞盟，又錄其使，則有慕中國之心明矣。又知有疾者，非直以其不自來，又見下四年三月，「陳侯午卒」矣。云「復出陳者，喜得陳國也」者，欲決成二年「及國佐盟于袁婁」之經。彼不重言齊，今重言陳者，喜得陳國故也。孔子曰：「書之重，辭之復，嗚呼！不可不察，其中必有美者焉。」是以僖四年傳云：「曷爲再言盟？喜服楚也。」故此注云：「復出陳者，喜得陳也。」《春秋》意必如此者，正以楚人強盛，諸夏微弱，陳侯背楚，故喜得之。所以奪夷狄之勢，益諸夏之榮也。○注「不重出地」。○解云：正決襄二十七年「夏，叔孫豹會晉趙武、楚屈建」以下「于宋」，「秋，七月，辛巳，

豹及諸侯之大夫盟于宋」。彼所以再出地者，正以上無君故也。今諸侯在，臣繫於君，故因上地矣。下十六年春，「公會晉侯」以下「于溴梁」。戊寅，大夫盟之下，不重出地者，亦以爲諸侯在，臣繫于君，得因上地，故彼注云「不重出地者，與三年雞澤大夫盟同義」是也。

秋，公至自會。

冬，晉荀罃帥師伐許。

四年，春，王三月，己酉，陳侯午卒。

夏，叔孫豹如晉。

秋，七月，戊子，夫人弋氏薨。○弋氏，以

職反，莒女也，《左氏》作「姒氏」。【疏】「四年」至「夫人弋

①「與」，阮校：「鄂本無。」

②「陳」，原作「臣」，今據余本、京都本、再造善本、中華本、閣本改。

③「即」上，杉浦校：「單疏鈔本有「陳楚之與國者」六字。此六字非誤衍，但「陳」下疑脫「鄭」。」

④「束」，原作「束」，今據京都本、再造善本、中華本、閣本改。

氏薨。」^①○解云：《左氏》經作「姒氏」字，聲勢與此同。○「定弋者何？」○解云：欲言君母，謚不言成，欲言是妾，卒，葬並見，故執不知問。

葬陳成公。

八月，辛亥，葬我小君定弋。定弋

者，^②襄公之母也。定弋，莒女也。襄公者，成公之妾子。○定弋，《左氏》作「定姒」。【疏】注「定弋」至「妾子」。^③○解云：正以鄫世子巫者，莒之外孫，下五年傳意以爲與襄公爲舅出，故知弋氏爲莒女也。

冬，公如晉。

陳人圍頓。

五年，春，公至自晉。

夏，鄭伯使公子發來聘。

叔孫豹、鄫世子巫如晉。外相如不書，此何以書？據晉郤克與莊孫許同時而聘于

齊，^④不書。○巫，丘扶反。^⑤【疏】注「據晉」至「不書」。○解云：成二年傳云云者是也。然則臧孫許不書者，自是恥之故也。而郤克聘齊不書之者，是外相如例不書故

也。是以據之。若然，桓五年「夏，齊侯、鄭伯如紀」，傳云：「外相如不書，此何以書？」何氏云：「據蔡侯東國卒于楚不言如也。」何氏彼據蔡侯，此據郤克者，欲逐其相類故也，何者？彼齊侯、鄭伯是君，且事不干魯，故據蔡侯卒于楚不言如矣。此鄫世子巫事非親，^⑥且叔孫豹率之，故據晉大夫與臧孫許俱行者，所引譬連類，得其象也。且其齊、鄭如紀，州公如曹，皆得書者，彼文悉有成解。爲叔孫豹率而與之俱也。以不殊鄫世子，俱言如也。○爲，于僞反。【疏】注「以不」至「如也」。○解云：正以不言「及鄫世子」，與叔孫共作一文，故知叔孫率之矣。叔孫豹則曷爲率而與之俱？據非內

①「四年至夫人弋氏薨」，杉浦校：「單疏鈔本作『夫人弋氏薨』，上無『四年至』，下無『○解云』。」

②「定弋者」，余本作「定弋者何」。

③「注定弋至妾子」，杉浦校：「單疏鈔本作『注定弋莒女也者』，下無『○解云』。」

④「莊」，阮校：「鄂本作『臧』，當據正。疏中作『臧孫許』，不誤。」

⑤「丘」，宋本《釋文》作「亡」。

⑥「親」，閩本作「君」。

大夫。蓋舅出也。巫者，鄩前夫人、襄公母姊妹之子

也，俱莒外孫，故曰舅出。【疏】「蓋舅出也」者。①○解

云：謂巫是襄公舅氏之所出，姊妹之子謂之出也。言蓋

者，公羊子不受于師，故疑，若下傳「蓋欲立其出也」之

類。或言此「蓋」宜訓爲「皆」，若隱三年傳云「蓋通于

下」，似「蓋云歸哉」之類。②言襄公與巫，皆是一舅姊妹

之子也。莒將滅之，故相與往殆乎晉也。殆，

疑。凝讞于晉，③齊人語。○凝讞，魚竭反。莒將滅

之，則曷爲相與往殆乎晉？據當以兵救之。

取後乎莒也。其取後乎莒奈何？莒女有

爲鄩夫人者，④蓋欲立其出也。時莒女嫁爲鄩

後夫人，夫人無男有女，還嫁之于莒，有外孫。鄩子愛後

夫人而無子，欲立其外孫，主者善之。⑤得爲善者，雖揚

父之惡，救國之滅者可也。

仲孫蔑、衛孫林父會吳于善稻。不殊衛

者，晉侯欲會吳于戚，使魯、衛先通好，見使界故不殊，蓋

起所恥。○善稻，《左氏》作「善道」。好，呼報反。【疏】

注「書者善之」。○解云：六年秋，「莒人滅鄩」。然則不

能救滅而得善之者，雖不能救，有言之功故也。

秋，大雩。先是襄公數用兵，圍彭城，城虎牢。

三年再會，四年如晉，踰年乃反。○又賦斂重，⑥恩澤不

施所致。⑦○數，所角反。斂，力驗反。【疏】注「先是」至

三年再會，四年如晉，踰年乃反。○又賦斂重，⑥恩澤不

施所致。⑦○數，所角反。斂，力驗反。【疏】注「先是」至

三年再會，四年如晉，踰年乃反。○又賦斂重，⑥恩澤不

施所致。⑦○數，所角反。斂，力驗反。【疏】注「先是」至

三年再會，四年如晉，踰年乃反。○又賦斂重，⑥恩澤不

施所致。⑦○數，所角反。斂，力驗反。【疏】注「先是」至

三年再會，四年如晉，踰年乃反。○又賦斂重，⑥恩澤不

施所致。⑦○數，所角反。斂，力驗反。【疏】注「先是」至

三年再會，四年如晉，踰年乃反。○又賦斂重，⑥恩澤不

施所致。⑦○數，所角反。斂，力驗反。【疏】注「先是」至

三年再會，四年如晉，踰年乃反。○又賦斂重，⑥恩澤不

施所致。⑦○數，所角反。斂，力驗反。【疏】注「先是」至

三年再會，四年如晉，踰年乃反。○又賦斂重，⑥恩澤不

施所致。⑦○數，所角反。斂，力驗反。【疏】注「先是」至

三年再會，四年如晉，踰年乃反。○又賦斂重，⑥恩澤不

施所致。⑦○數，所角反。斂，力驗反。【疏】注「先是」至

三年再會，四年如晉，踰年乃反。○又賦斂重，⑥恩澤不

施所致。⑦○數，所角反。斂，力驗反。【疏】注「先是」至

「所致」。○解云：「圍彭城」在元年春，即經云「仲孫蔑會晉欒黶」以下「圍彭城」是也。其城虎牢者，在上二年冬，「遂城虎牢」是也。^①云「三年再會」者，蓋為三年「六月，^②公會單子、晉侯」以下「同盟于雞澤」，下云「戊寅，叔孫豹及諸侯之大夫，及陳袁僑盟」是也。雖是一出行，頻有二事，停車費重而致旱，緣是之故，得作然解。云「四年如晉，踰年乃反」者，即上四年「冬，公如晉」，五年「春，公至自晉」是也。其元年夏「仲孫蔑會齊崔杼」以下「次于合」，二年秋「叔孫豹如宋。冬，仲孫蔑會晉荀罃」以下「于戚」。於此諸事，豈不為費？而注不言之者，正以元年舉「圍彭城」，二年舉「城虎牢」，三年舉再會，四年舉「如晉」，年舉一事，粗而言之，見其致旱之由而已。其餘不足舉者，文略不悉耳。其三年再會並舉之者，以其皆會事，可以一言而盡故也。

楚殺其大夫公子壬夫。

公會晉侯、宋公、陳侯、衛侯、鄭伯、曹伯、莒子、邾婁子、滕子、薛伯、齊世子光、吳人、鄫人于戚。^③吳何以稱人？據上善稻之會不稱人。【疏】「楚殺其大夫公子壬夫」。^④○解

云：《春秋》之內，君殺大夫，皆至葬時別有罪無罪。今吳、楚之君，例不書葬，不作他文以別之者，蓋以略夷狄故之也。^⑤吳鄫人云則不辭。孔子曰：「言不順，則事不成。」方以吳抑鄫，國列在稱人上，不以順辭，故進吳稱人。所以抑鄫者，經書莒人滅鄫，又與巫訴，^⑥巫當存，惡鄫文不見，見惡必以吳者，夷狄尚知父死子繼，故以甚鄫也。等不使鄫稱國者，鄫不如夷狄，故不得與夷狄同文。○惡鄫，烏路反。不見，賢徧反。【疏】注「所以抑」至「不見」。○解云：經書言莒人滅鄫者，在下六年

①「虎」，原脫，今據中華本、閩本補。

②「為」，阮校引浦鍾云：「『為』當『謂』字誤。」杉浦校：「單疏鈔本『為』作『謂』。」

③「邾婁子」，阮校：「唐石經、諸本同。《左氏》、《穀梁》作『邾子』。」

④「殺」，原脫，此引經文，當有「殺」字，今據中華本補。

⑤「蓋以略夷狄故之也」，阮校：「閩、監、毛本脫『之』。」按：「故之」當作「之故」。杉浦校：「單疏鈔本无『之』字。按：此當作『蓋以略夷狄故也』。」

⑥「又」，原作「文」，今據余本、閩本改。

秋。其經稱人，似貶黜之。云又與巫訴者，①即上文「世子巫如晉」是也。許之訴，即合存之義。然則上下二經皆非鄭咎，故曰「惡鄭文不見」也。

公至自會。

冬，戍陳。孰戍之？諸侯戍之。曷

爲不言諸侯戍之？據下救陳言諸侯。【疏】注「據

下救陳言諸侯」。○解云：謂歷敘諸侯，即下文云「公會

晉侯」以下「救陳」是也。離至不可得而序，離至，

離別前後至也。陳坐欲與中國，被強楚之害，中國宜雜

然同心救之，乃解急前後至，故不序，以刺中國之無信。

○雜然，七合反，又如字，十年注同。解，古賣反。【疏】

注「陳坐」至「無信」。②○解云：其與中國者，謂欲得與

中國，即上三年「陳侯使袁僑如會」是也。其被強楚之害

者，正見諸侯戍之故也。故言我也。言我者，以魯至

時書，與魯微者同文。微者同文者，使若城楚丘，辟魯獨

戍之。戍例時。【疏】注「與魯微者同文」。③○解云：以

不載名氏及國，直言其事者，若莊公二十八年「冬，築微」

之文，故云「與魯微者同文」矣。云「微者同文者，使若城

楚丘，辟魯獨戍之」者，城楚丘在僖二年，彼時亦直言「城

楚丘」，作魯微者之文。魯之微者，焉能獨城乎？明其更有餘國，是以書月，見其非內城。今此戍陳之經，亦作魯微者之文，魯之微者，焉能獨戍乎？明其更有餘國矣，故曰「使若城楚丘，辟魯獨戍之」。云「戍例時」者，正以此文直書冬，十年冬「戍鄭虎牢」，故知例時也。

楚公子貞帥師伐陳。

公會晉侯、宋公、衛侯、鄭伯、曹伯、莒

子、邾婁子、滕子、薛伯、齊世子光救陳。

十有二月，公至自救陳。

辛未，季孫行父卒。【疏】「十有二月公至自

救陳」。○賈氏云：「月爲下卒起其義也。」

六年，春，王三月，壬午，杞伯姑容卒。

始卒，更名，④日、書葬者，新黜未忍便略也。【疏】注「始

①「又」，原作「文」，今據京都本、再造善本、閣本改。

②「注陳坐至無信」，杉浦校：「單疏鈔本作「注陳坐欲

與中國被強楚之害」，然則標注起訖，當改「至無信」

作「至之害」。

③「文」，原脫，此引注文，當有「文」字，今據中華本補。

④「更」，阮校：「鄂本作「便」。」

卒「至略也」。○解云：案僖二十三年「冬，十有一月，杞子卒」。而於此言始者，彼注云：「卒者，桓公存王者後，功尤美，故爲表異卒錄之。」然則傳聞之世，小國之卒未合書見，非其常例矣。至所聞之世，始合書卒，是以於此言始矣。文十三年夏五月「邾婁子貜條卒」，宣九年秋「八月，滕子卒」，其名、日與葬皆未書，今此盡錄，故解之也。言「新黜未忍便略也」者，即莊二十七年冬，「杞伯朝」，^①注云「杞，夏後。不稱公者，《春秋》黜杞新周而故宋，以《春秋》當新王者，以其稟氣先王，聖人胤嗣，雖其微弱，未忍便略之。」

夏，宋華弱來奔。

秋，葬杞桓公。

滕子來朝。

莒人滅鄆。莒稱人者，莒公子，鄆外孫。稱人

者，從莒無大夫也。言滅者，以異姓爲後，莒人當坐滅也。不月者，取後于莒，非兵滅。【疏】注「莒稱人者」。○解云：從莒無大夫，即莊二十七年傳「莒無大夫，此何以書」是也。○注「不月者」。○解云：凡兵滅者例書月，即莊十年「冬，十月，齊師滅譚」，十三年「夏，六月，齊人

滅遂」之屬是也。今此非兵滅，故書時矣。以此言之，即知僖二年「晉滅下陽」，僖十年「狄滅溫」之屬，皆蒙上月矣。僖十七年「夏，滅項」，彼注云：「不月者，桓公不坐滅，略小國。」僖二十六年「秋，楚人滅夔」，^②何氏云：「不月者，略夷狄滅微國也。」以此言之，則知僖十二年「夏，楚人滅黃」，文五年「秋，楚人滅六」之屬，亦是略之故也。其「衛侯燬滅邢」、「楚子滅蕭」、「蔡歸生滅沈」之屬，皆當文自釋，不勞備說。注「據譚子言奔」者，^③即莊十年「齊師滅譚，譚子奔莒」是也。

冬，叔孫豹如邾婁。

季孫宿如晉。

十有二月，齊侯滅萊。曷爲不言萊君出奔？據譚子言奔。○曷爲于僞反。國滅，君死之，正也。明國當存。不書殺萊君者，舉滅國爲

① 「杞伯朝」，莊公二十七年經作「杞伯來朝」。

② 「夔」，阮校引浦鏜云：「《公羊》經作「隗」，《左》、《穀》作「夔」。杉浦校：「單疏鈔本「夔」作「隗」。」

③ 「注據譚子言奔者」，阮校：「閩、監、毛本分「注據譚子」以下疏文於「齊侯滅萊」傳注下。」

重。○重，直用反。【疏】注「不書」至「爲重」。○解云：欲決定四年「四月，庚辰，蔡公孫歸生帥師滅沈」^①以沈子嘉歸，殺之」文也。彼注云「不舉滅爲重，書以歸殺之者，責不死位也」是也。

七年，春，鄆子來朝。○鄆，音談。

夏，四月，三卜郊，不從，乃免牲。

小邾婁子來朝。

城費。○費，音秘。

秋，季孫宿如衛。

八月，螽。先是鄆、小邾婁來朝，有賓主之賦，加以城費，季孫宿如衛，煩擾之應。○螽，音終，一音鍾。

冬，十月，衛侯使孫林父來聘。壬戌，及孫林父盟。

楚公子貞帥師圍陳。

十有二月，公會晉侯、宋公、陳侯、衛侯、曹伯、莒子、邾婁子于鄆。○鄆，于委反，《字林》凡吹反。

鄭伯髡原如會，^②未見諸侯，丙戌，卒

于操。操者何？鄭之邑也。諸侯卒其封內不地，此何以地？據陳侯鮑卒不地。○髡原，

苦門反，《左氏》作「髡頑」。操，七報反，一音七南反，《左氏》作「鄆」。【疏】「鄭伯髡頑如會」者。^③○解云：正本

作「頑」字，亦有一本作「原」字，^④非也。○「操者何」。○

解云：欲言鄭邑，封內不地，欲言外邑，文不繫外，故執不知問。其「鄆」字者，^⑤非正本也。○注「據陳」至「不地」。

○解云：即桓五年「正月，甲戌，己丑，陳侯鮑卒」，傳曰：「曷爲二日卒之？」^⑥愷也。甲戌之日亡，己丑之日死而

①「公孫歸生」，京都本、再造善本作「公孫歸姓」，與《公羊》定公四年經合。參見《公羊》該年阮校。

②「髡原」，阮校：「唐石經作「髡原」，《釋文》：「髡原，

《左氏》作「髡頑」。』疏本作「髡頑」，解云：「正本作「頑」字，一本作「原」，非也。」按：疏文所據之本，較之《釋文》多得其正。」

③「者」，阮校：「閩、監、毛本刪。」

④「字」下，杉浦校：「單疏鈔本有「者」字。按：當以此本爲長。」

⑤「字」下，杉浦校：「單疏鈔本有「亦作操字」四字。」

⑥「二日」，阮校：「按：桓五年傳「二」上有「以」字。」

得，君子疑焉，故以二日卒之。」是封內卒不地者，故據而難之。隱之也。何隱爾？弑也。孰弑之？

其大夫弑之。曷爲不言其大夫弑之？據鄭

公子歸生弑其君夷書。○殺也，音試，下及注皆同。

【疏】注「據鄭」至「夷書」。○解云：在宣四年夏六月。書

者，謂書大夫名氏矣。爲中國諱也。曷爲爲中

國諱？據歸生弑君，不爲中國諱。○爲中，于僞反，

下及注皆同。鄭伯將會諸侯于鄆，其大夫諫

曰：「中國不足歸也，則不若與楚。」鄭伯

曰：「不可。」^①其大夫曰：「以中國爲義，則

伐我喪。據城虎牢事。【疏】注「據城虎牢」者。^②○

解云：上二年經云「遂城虎牢」，傳云「虎牢者何？鄭之

邑也。其言城之何？取之也。取之，曷爲不取之？」^③

爲中國諱也。曷爲爲中國諱？諱伐喪也」是也。^④以

中國爲彊，則不若楚。」言楚屬圍陳，不能救。○

屬，音燭。【疏】注「言楚」至「能救」。○解云：即上文云

「楚公子貞帥師圍陳」，終無救文是也。於是弑之。

既由中國無義，故深諱使若自卒。○既由，音禍。鄭伯

髡原何以名？據陳侯如會不名。【疏】注「據陳」至

「不名」。○解云：即僖二十八年五月，「公會晉侯」以下

「于踐土。陳侯如會」是也。傷而反，未至乎舍而

卒也。舍，昨日所舍止處也。以操定邑，^⑤知傷而反

也。未見諸侯，尚往辭，知未至舍也。云爾者，古者保

辜，諸侯卒名，故於如會名之，明如會時爲大夫所傷，以

傷辜死也。君親無將，見辜者，辜內當以弑君論之，辜外

當以傷君論之。○處，昌慮反。見辜，賢徧反。【疏】注

「以操定邑知傷而反也」者。○解云：正以操是鄭邑，操

①「鄭伯曰不可」，阮校：「昭十二年疏引作「鄭伯不

可」，無「曰」字。」

②「注據城虎牢者」，阮校：「閩、監、毛本「者」作「事」，

是也。案：「事」下當有「者」字。」杉浦校：「單疏鈔

本作「注據城虎牢事者」，無「○解云」。」

③「曷爲不取之」，阮校：「傳作「則曷爲不言取之」。杉

浦校：「單疏鈔本「曷」上有「則」字，「不」下有「言」

字。」

④「諱伐喪也」，阮校：「此本此疏「諱伐」之下「喪也」之

上空二格，當是此句有脫。」

本去鄆彌遠，是以知其見傷而還。○注「未見諸侯」至「舍也」者。○解云：凡言未見者，有欲見之理，知尚往辭，若其迴還至舍，便絕未見之義，經不應得言未見，故如此解。○注「君親無將」。○解云：莊三十二年傳云「君親無將，將而必誅」，故此注引之。其弑君論之者，其身梟首，其家執之。其傷君論之，^①其身斬首而已，罪不累家。漢律有其事。然則知古者保辜者，亦依漢律，律文多依古事，故知然也。未見諸侯，其言「如會」何？致其意也。鄭伯欲與中國，意未達而見弑，故養逐而致之，^②所以達賢者之心。【疏】「未見諸侯其言會何」。^③○解云：上「陳侯如會」、「袁僑如會」之輩，皆是至會。今鄭伯既言未見諸侯，而言如會，故據未見而難之。

陳侯逃歸。起鄭伯欲與中國，卒逢其禍，諸侯莫有恩痛自疾之心，於是懼，然後逃歸，故書以刺中國之無義。加逃者，抑陳侯也。孔子曰：「夷狄之有君，不如諸夏之亡。」不當背也。○背，音佩。

八年，春，王正月，公如晉。月者，起鄆之會，鄭伯以弑，陳侯逃歸，公獨修禮於大國，得自安之道，

故善錄之。○以殺，音試。

夏，葬鄭僖公。賊未討，何以書葬？

爲中國諱也。探順事上，^①使若無賊然。不月者，本實當去葬責臣子，故不足也。○爲中，于僞反。去，起呂反。【疏】賊未討何以書葬。○解云：正以隱十一年傳云「春秋弑君賊不討」，^②不書葬，以爲無臣子也，是以弟子據而難之。○注「不月者」。○解云：本實當去葬，責臣子，故不足也者，正以卒日葬月，達於《春秋》，大國之例。今鄭爲大國，不月，故如此解。

鄭人侵蔡，獲蔡公子燮。此侵也，其言獲何？據宋師敗績，獲宋華元，戰乃言獲也。○

燮，素協反。【疏】「獲蔡公子燮」者，《穀梁》作「公子濕」。

^①「之」，阮校：「下當脫『者』字。」杉浦校：「單疏鈔本『之』下有『者』字。」

^②「逐」，阮校：「鄂本、閩本作『遂』，當據正。」

^③「其言會何」，阮校：「毛本作『其言如會何』，與傳合。」

^④「事上」，阮校：「鄂本作『上事』。」

^⑤「弑君」，阮校：「閩、監、毛本作『君弑』，今傳同。」

○注「據宋」至「獲也」。○解曰：即宣二年春，「宋華元帥師，及鄭公子歸生帥師，戰于大棘。宋師敗績，獲宋華元」是也。《公羊》之義，以為「梟者曰侵」，故如此解。^①侵而言獲者，適得之也。時適遇值其不備獲得

之，易，不言取之者，封內兵不書，嫌如子糾取一人，故言獲，起有兵也。又將兵禦難，不明候伺，雖不戰鬪，當坐獲。○易，以豉反。難，乃旦反。伺，音司，又息嗣反。

【疏】注「易不言取之者」。○解云：《春秋》之義，「取」為易辭，故隱十年「鄭伯伐取之」，傳云「其言伐取之何？易也」者是。《春秋》之義，封內之兵，例不書之，故定八年傳云「公斂處父帥師而至」，經不書之是也。莊九年「齊人取子糾殺之」者，^②是取一人之文。凡言獲者，用兵之文，即「獲宋華元」、「獲陳夏齧」之輩是也。然則此傳言「適得之」，即是易之甚者。所以不言取之者，其人時將兵拒鄭，但未至鬪戰。封內之兵，例所不書。既不得書有蔡師，若言鄭人侵蔡取公子燮，則嫌如莊九年「齊人取子糾殺之」然，但取一人而已，故言「獲」起其文，是時亦將兵來。云「又將兵禦難，不明候伺」，^③雖不戰鬪，當坐獲者，以謂蔡公子燮，^④當以被獲為坐罪，何者？以其於守禦之道不足故也。

季孫宿會晉侯、鄭伯、齊人、宋人、衛人、邾婁人于邢丘。○邢，音刑。

公至自晉。

莒人伐我東鄙。

秋，九月，大雩。由城費，公比出會，如晉，莒

人伐我，動擾不恤民之應。【疏】注「由城」至「之應」。○解云：城費在七年夏也。公比出會者，即五年冬「公會晉侯」以下「救陳」，七年十二月「公會晉侯」以下「于鄆」是也。「如晉」者，即今年「正月，公如晉」是也。「莒人伐我」者，即今年夏，「莒人伐我東鄙」是也。或者公比出會者，即七年「公會晉侯」以下「于鄆」，今年「季孫宿會晉侯」以下「于邢丘」是也。然則季孫宿會而言公比出會者，略舉以言之，是以不復別也。

① 故如此解，杉浦校：「單疏鈔本作『故此難』。」

② 者者，「者」字疑誤重。

③ 候伺，原誤倒，阮校：「閩、監、毛本作『候伺』，注及《釋文》同。」今據京都本、再造善本、閣本乙正。

④ 以，杉浦校：「單疏鈔本無。按：『以』字疑衍。」

冬，楚公子貞帥師伐鄭。

晉侯使士匄來聘。

九年，春，宋火。曷爲或言災？或言

火？大者曰災，小者曰火。大者謂正寢、社稷、

宗廟、朝廷也，^①下此則小矣。災者，離本辭，故可以見

火。^②○宋火，二傳作「宋災」。^③離，力智反。見，賢徧

反。【疏】「言火者」。^④○解云：《左傳》、《穀梁》作「宋

災」。「曷爲或言災」者，莊二十年「夏，齊大災」，襄三十

年「宋災」之類是。○「大者曰災，小者曰火」。○解云：

《五行書》云「害物爲災，不害物爲異」者，謂雪霜水旱螽

蟲之屬，非謂火害與否，與此非妨矣。○注「災者」至「見

火」。○解云：本實是火而謂之災，離其本體，故曰「離本

辭」。災者，害物之名，故可以見其大於火也。然則何氏

以爲《春秋》之義不記人火，火者皆是天害也。但害於大

物則言災，害於小物則言火，且不如《左氏》「人火曰火」，

故如此注。所以然者，正以《春秋》之義，重於天道，略於

人事，人火之難，何足記也。然則內何以不言

火？據西宮災不言火。【疏】注「據西」至「言火」。○

解云：即僖二十年夏，「五月，乙巳，西宮災」，傳云：「西

宮者何？小寢也。」彼注云：「西宮者，小寢內室，楚女所

居也。」以其非正寢、社稷、宗廟、朝廷，故謂之小。若然，

桓十四年「秋，八月，壬申，御廩災」，亦應是小，所以不據

之者，以其御用於宗廟之物，於小義不强，豈似西宮爲小

寢內室乎？內不言火者，甚之也。《春秋》以內

爲天下法，動作當先自克責，故小有火，如大有災。何

以書？記災也。外災不書，此何以書？

爲王者之後記災也。是時周樂已毀，先聖法度浸

疏遠不用之應。○爲王，于僞反。浸，子鳩反。【疏】「外

災不書」。^⑤○解云：莊十一年「秋，宋大水」之下，^⑥傳

①「庭」，余本、京都本、再造善本、中華本、閣本作「廷」。

②「火」，阮校：「諸本同。浦鏜云：『大』誤『火』。按解

云：「災者，害物之名，故可以見其大於火也」，浦校是。」

③「宋災」，宋本《釋文》作「灾」，無「宋」字。

④「言火者」，杉浦校：「單疏鈔本作『宋火者』，無『○解云』。此本作『宋火』爲是。」

⑤「書」下，杉浦校：「單疏鈔本有『云云』二字。」

⑥「十一」，原作「十二」，「宋大水」在莊公十一年，今據京都本、再造善本、閣本改。

云：「外災不書，此何以書？」注云「據渰移不書」是也。○「爲王者之後記災也」。○解云：《春秋》之義，詳內而略外，是以外災例不錄，而書皆善文，又皆有傳釋，不勞備載也。○注「是時」至「之應」。○解云：宣十六年「夏，成周宣謝火」，^①傳云：「成周者何？東周也。宣謝者何？宣宮之謝也。」彼注云：「宣宮，周宣王之廟。」傳云：「何言乎成周宣謝災？樂器藏焉爾。」注云「宣王中興所作樂器」，「天災中興之樂器，示周不復興」是也。然則宣公十六年時，周樂已毀，而宋是王者之後，先聖法度所存，今復災之，是法度浸疏遠不用之應也。

夏，季孫宿如晉。

五月，辛酉，夫人姜氏薨。

秋，八月，癸未，葬我小君繆姜。

冬，公會晉侯、宋公、衛侯、曹伯、莒子、邾婁子、滕子、薛伯、杞伯、小邾婁子、齊世子光伐鄭。十有二月，己亥，同盟于戲。事連上伐，不致者，惡公服繆姜喪未踰年，而親伐鄭，故奪臣子辭。○戲，許宜反，惡，烏路反。【疏】注「事連」至「子辭」。○解云：莊六年傳「得意致會，不得致伐」

者，^②謂公與二國以上會伐並有之時，若公與二國以上出會盟，得意致會，不得意不致也。然則今此若直同盟于戲而已，容或不致。今事連上伐，若其得意，宜致會，若其不得意，宜致伐，無不致之理。而今不致者，惡其母服未期，親自用兵，不子之甚，故不書致。言「奪臣子辭」者，正以凡書致者，皆是臣子喜其君父脫危而至。今不書致，似若不脫然，故曰「奪臣子辭」。

楚子伐鄭。

十年，春，公會晉侯、宋公、衛侯、曹伯、莒子、邾婁子、滕子、薛伯、杞伯、小邾婁子、齊世子光，會吳于柤。○柤，莊加反。

① 「火」，阮校：「浦鏜云：『災』誤『火』。按：宣十六年經作『災』。」

② 「不得致伐」，杉浦校：「單疏鈔本『不得』下有『意』字。」今按：《公羊》莊公六年傳作「不得意致伐」，單疏鈔本是。

夏，五月，甲午，遂滅偃陽。^① ○偃，音福，

又彼力反。【疏】「遂滅偃陽」。○解云：《左氏》經作「偃」字，音夫目反，一音逼近之逼，^②而南州人云道仍有偃陽之類，如逼近之逼矣。

公至自會。滅日者，甚惡諸侯不崇禮義以相

安，反遂爲不仁，開道彊夷滅中國。中國之禍，連蔓日及，故疾錄之。滅比于取邑，^③例不當書晉。^④書致者，深諱，^⑤若公與上會，不與下滅。○惡，烏路反。道，音導。蔓，音萬。公與，音預，下同。【疏】注「滅日」至「下滅」。○解云：凡滅例月，即莊十年「冬，十月，齊師滅譚」，十三年「夏，六月，齊人滅遂」之屬是。今乃書日，故如此解也。言「反遂爲不仁」者，則此經「遂滅偃陽」是也。云「開道彊夷」者，昭八年夏「楚人執陳行人于徵師殺之」，「冬，十月，壬午，楚師滅陳。執公子招，放之于越。殺陳孔瑗」，十一年「夏，四月，^⑥丁巳，楚子虔誘蔡侯般，殺之于申」，「楚公子棄疾帥師圍蔡」，「冬，十有一月，丁酉，楚師滅蔡。執蔡世子有以歸，用之」，三十年「冬，十有二月，吳滅徐。徐子章禹奔楚」，定十四年「楚公子結帥師滅頓，以頓子嬗歸」，十五年春「楚子滅胡。以胡子豹歸」之屬，皆是彊夷迭害諸夏，故言「連蔓日及」，是

以變例書日，疾而錄之。云「滅比」云云者，《春秋》之義，主書致者，正欲別其得意以不，故莊六年傳曰「得意致會，不得意致伐」是也。若取邑例不書致，所以然者，取得他邑，得意明矣，何勞書致以見之乎？是以僖三十三年夏，「公伐邾婁，取叢」，何氏云「取邑不致者，得意可知例」是也。然則滅得他國，義如取邑，故曰滅比取邑，亦不當致而致之者，深爲內諱，使若公不與滅事故也。

楚公子貞、鄭公孫輒帥師伐宋。晉師

①「偃陽」，阮校：「唐石經、諸本同。按：《左氏》經當本作「福陽」，《穀梁》作「傳陽」。《九經古義》云：

「《古今人表》作「福陽」，《漢書·地理志》及《續漢志》皆作「傳陽」。」

②「音夫目反一音逼近之逼」，杉浦校：「單疏鈔本「夫目」以下夾注。」

③「比」，原作「止」，今據京都本、中華本、閣本改。

④「晉」，鄂本、閣本作「致」，當是。

⑤「深諱」，阮校：「鄂本「諱」下有「使」字，此脫。按：正義本有「使」字。」

⑥「夏」，原作「冬」，今據昭公十一年經及京都本、再造善本、閣本改。

伐秦。

秋，莒人伐我東鄙。

公會晉侯、宋公、衛侯、曹伯、莒子、邾婁子、齊世子光、滕子、薛伯、杞伯、小邾婁子伐鄭。

冬，盜殺鄭公子斐、公子發、公孫輒。

不言其大夫者，降從盜，故與盜同文。○斐，芳尾反，《左氏》作「駢」。【疏】「冬盜殺」云云。○解云：凡《春秋》之事，君殺大夫稱國，即僖七年「鄭殺其大夫申侯」之屬是也。大夫相殺稱人，即文九年「晉人殺其大夫先都」之屬是也。今此士殺其大夫，故言盜矣。是以文十六年傳云：「大夫弑君稱名氏，賤者窮諸人。」注云：「賤者謂士也，士正自當稱人。」大夫相殺稱人，賤者窮諸盜，注云「降大夫使稱人，降士使稱盜者，所以別死刑有輕重也」者，是其士殺大夫稱盜之義也。○注「不言其」至「同文」。○解云：士正自當稱人，宜言「鄭人殺其大夫某甲」，今不言「其大夫」者，正以士既降從盜，故與盜同文也。其盜殺者，即哀四年春，「盜弑蔡侯申」，傳云：「弑君，賤者窮諸人，此其稱盜以弑何？賤乎賤者也。賤乎

賤者孰謂？謂罪人也。」彼注云：「罪人者，未加刑也。蔡侯近罪人，卒逢其禍，故以爲人君深戒。」^①不言其君者，方當刑放之，與刑人義同。」然則盜殺蔡侯申，不言「其君」，今此士殺大夫，降之言盜，亦不言「其大夫」，與實盜同，故云「降從盜，故與盜同文」也。而哀四年注云「當刑放之，與刑人義同」者，襄二十九年夏五月，「闔弑吳子餘祭」，傳云：「闔者何？門人也。」注云：「以刑人爲闔，非其人，故變盜言闔。」「君子不近刑人，近刑人，則輕死之道也」，注云：「不言其君者，公家不畜，士庶不友，放之遠地，欲去聽所之，故不繫國。不繫國，故不言其君。」然則刑人所止，不常厥居，若故出奔，任其所願，由此之故，不合繫國。既不繫國，則君臣義盡，是以《春秋》去君父以見之。其殺蔡侯者，由未加刑，而亦不言其君者，方當刑放，故與刑人同義也。

戍鄭虎牢。孰戍之？諸侯戍之。曷爲不言諸侯戍之？離至不可得而序，故言我也。刺諸侯既取虎牢以爲蕃蔽，不能雖然同心安

① 「故」，杉浦校：「單疏鈔本疊「故」字。按：其一當連上，其一當屬下。」

附之。○爲蕃，方元反。【疏】「戍鄭虎牢」云云。①○解

云：五年「陳戍」之下已有傳，②而復發者，蓋嫌國邑不同

故也。注「既取虎牢」者，即二年冬，「遂城虎牢」，傳云

「虎牢者何？鄭之邑也。其言城之何？取之也。取之

曷爲不言取之？③爲中國諱也。曷爲爲中國諱？諱伐

喪也」是也。諸侯已取之矣，曷爲繫之鄭？據

莒牟夷以牟婁來奔，本杞之邑，不繫于杞。【疏】注「據

莒」至「于杞」。④○解云：即昭五年「莒牟夷以牟婁及防

茲來奔」是也。云本杞之邑，⑤即隱四年「二月，莒人伐

杞，取牟婁」是也。諸侯莫之主有，故反繫之

鄭。諸侯本無利虎牢之心，欲共以距楚爾，無主有之

者，故不當坐取邑，故反繫之鄭，見其意也。所以見之

者，上諱伐喪不言取，今刺戍之舒緩，嫌於義反，故正之

云爾。○諸侯莫之主有，絕句。見其賢徧反，下同。

【疏】注「所以見之者」。○解云：上諱伐喪不言取者，即

二年冬，「遂城虎牢」，傳云云是也。不言取，諱之似不合

取，既不合取，戍之舒緩即不合刺，而今刺之，義似違，是

以《春秋》繫之於鄭，見無主有，明欲拒楚，實無貪利，即

諸侯取之不合罪坐也，故云「不當坐取邑」耳。

楚公子貞帥師救鄭。

公至自伐鄭。

十有一年，春，王正月，作三軍。三軍

者何？三卿也。爲軍置三卿官也。卿大夫爵號，

大同小異。方據上卿道中，下，故總言三卿。○爲軍，于

僞反，年末同。【疏】「作三軍」。○解云：《公羊》以爲王

官之伯，宜半天子，乃有三軍。魯爲州牧，但合二軍，司

徒、司空將之而已，今更益司馬之軍，添滿三軍，是以《春

秋》書而譏之，故曰「作三軍」。是以隱五年注「禮，天子

六師，方伯二師，諸侯一師」，是其一隅也。何氏之意，以

①「云云」下，杉浦校：「單疏鈔本有『者』字，下無『○解云』。」

②「陳戍」，阮校：「浦鏜云：『戍陳』誤倒。按：浦說是也。」

③「曷」上，杉浦校：「單疏鈔本有『則』字，是也，與襄二年傳合。」

④「注據莒至于杞」，杉浦校：「單疏鈔本作『注莒牟夷以牟婁來奔者』，下無『○解云』。」

⑤「邑」下，杉浦校：「單疏鈔本有『者』字爲是。」

軍與師得爲通稱，而臨時名耳。是以或言軍，或言師，不必萬二千五百人爲軍也。○「三軍者何也」。^①○解云：欲言先有，不應言「作」，欲言先無，軍是常役，故執不知問。○注「爲軍」至「官也」。○解云：魯人前此止置司徒、司空以爲將，下各有小卿二人輔助其政。其司馬事省，蓋總監而已，故但有一小卿輔之。今更置中軍司馬將之，亦置二小卿輔助其政，故曰「爲軍置三卿官」也。然則問者云「三軍者何」，師答之云「三卿」也者，謂言作三軍者，正是致司馬之職，^②三卿之官爲軍將也。○注「卿大」至「小異」。卿大夫者，皆是爵號，但大同小異而已。若總而言之，皆曰卿大夫，若別而異之，乃貴者曰卿，賤者曰大夫耳。如此注者，欲道一卿二大夫，所以總名三卿之意也。○注「方據」至「三卿」。○解云：言卿與大夫，析而言之，其實有異，而皆謂之卿者，方據上卿言其中、下者，遂得卿稱，故得通言三卿也。其二小卿謂之中、下者，蓋二者相對有尊卑，^③若似《大司馬》敘官云：「大司馬卿一人，小司馬中大夫，軍司馬下大夫然。」作三軍，何以書？欲問作多書乎？作少書乎？故復全舉句以問之。○復，扶又反。【疏】注「欲問」至「問之」。○解云：欲道所以不直言「何以書」而舉「作三

軍」者，弟子之意，欲問《春秋》之義書其「作三軍」者，爲是嫌其作軍大多而書乎？爲是嫌其大少而書乎？故復全舉經文一句軍之頭數問之。若直言「何以書」，但問主書，無以見其數，故言此也。譏。何譏爾？古

者上卿下卿，上士下士，說古制司馬官數。古者諸侯有司徒、司空，上卿各一，下卿各二，司馬事省，上下卿各一。上士相上卿，下士相下卿，足以爲治。襄公委任強臣，^⑤國家內亂，兵革四起，軍職不共，^⑥不推其原，乃益司馬作中卿官，踰王制，故譏之。言軍者，本以

① 「三軍者何也」，阮校：「閩、監、毛本無「也」字。」杉浦校：「單疏鈔本作「三軍者何者」，無「○解云」。」

② 「致」，杉浦校：「單疏鈔本作「置」。按：「致」當作「置」。」

③ 「對」下，杉浦校：「單疏鈔本有「復」字，爲長。」

④ 「若似」，阮校：「何校本同，閩、監、毛本「似」改「是」。按：隱三年疏亦云「若似蓋云歸哉」，言若似者，重累言之。」

⑤ 「強」，阮校：「鄂本作「疆」。按《公羊》注「疆弱」字皆作「疆」，今本「疆」、「強」錯出。」

⑥ 「共」，阮校：「鄂本作「恭」。《釋文》：「不共，音恭。」

軍數置之。月者，重錄之。○省，所景反。相上，息亮反，下同。治，直吏反。共，音恭。【疏】注「說古制」。

○解云：言古者司馬一官，但上卿一人，下卿一人，上士一人，下士一人而已，所以爾者，以其事省，不作軍將故也。○注「古者」至「爲治」。○解云：何氏之意，知古者但有司徒、司空典事者，正以《詩》云「乃召司徒，乃召司空」，不見司馬，故知司馬事省，總監而已。然則司徒卿一人，其大夫二人，司空卿一人，其大夫二人，司馬卿一人，其大夫一人，所謂諸侯之制，三卿五大夫矣。云「襄公委任強臣」者，謂三家季孫宿之徒是也。②云「國家內亂」者，謂舉事不由君命，即下十二年「遂入運」之屬是也。云「乃益司馬作中卿官，踰王制，故譏之」者，言「乃益司馬」，謂添益其職內也。作中卿官者，謂於司馬內更作一卿官，尊于小卿，故曰「作中卿官」也。言「踰王制」者，謂過于先王舊制。云「言軍者，本以軍數置之」，求其實置中卿，③而言作三軍者，言本所以置此中卿官者，正欲令助司馬爲軍將，將三軍，故曰「本以軍數置之」。云「月者，重錄之」者，此事無例，不可相決，但言重失禮，故詳言之。④

夏，四月，四卜郊，不從，乃不郊。成公

下文不致此致者，襄公但不免牲爾。不怨懟，無所起。○懟，直類反。【疏】注「成公」至「所起」。○解云：成十年「夏，四月，五卜郊，不從，乃不郊」，傳云：「其言乃不郊何？不免牲，故言乃不郊也。」下云「五月，公會晉侯」以下「伐鄭」，注云「不致者，成公數卜郊不從，怨懟，故不免牲。不但不免牲而已，故奪臣子辭以起之」者，是其成公下文不致之文也。今何氏難明前義，故令上下相曉也。

鄭公孫舍之帥師侵宋。

公會晉侯、宋公、衛侯、曹伯、齊世子光、莒子、邾婁子、滕子、薛伯、杞伯、小邾婁子伐鄭。

①「制」下，杉浦校：「單疏鈔本有『司馬官數』四字。」

②「也」，杉浦校：「單疏鈔本作『矣』。」

③「求」，京都本、再造善本作「未」，單疏鈔本、閣本作「者」，作「者」當是，屬上。

④「言」，杉浦校：「單疏鈔本作『錄』。按：『言』當作『錄』，下二十五年疏云『故詳錄之』可證。」

秋，七月，己未，同盟于京城北。^① ○京

城北，《左氏》作「亳城北」。^②【疏】「同盟于京城北」。

○解云：《穀梁》與此同，《左氏》經作「亳城北」，服氏之經亦作

「京城北」，乃與此傳同之也。^③

公至自伐鄭。

楚子、鄭伯伐宋。

公會晉侯、宋公、衛侯、曹伯、齊世子

光、莒子、邾婁子、滕子、薛伯、杞伯、小邾

婁子伐鄭，會于蕭魚。此伐鄭也，其言「會

于蕭魚」何？據伐鄭常難，今有詳錄之文。○難，乃

旦反。【疏】注「據伐」至「之文」。○解云：謂以上伐鄭，

多以伐致，作不得意之文，故曰「常難」。言「今有詳錄之

文」者，謂錄其會蕭魚，並下文「公至自會」之屬是也。與

前經異，故難之。蓋鄭與會爾。中國以鄭故，三年

之中五起兵，至是乃服，其後無干戈之患二十餘年，故喜

而詳錄其會，起得鄭爲重。○與，音預。【疏】注「中國」

至「爲重」。^④○解云：即上文九年「冬，公會晉侯」以下

「伐鄭」，「同盟于戲」，一也。十年秋，「公會晉侯」以下

「伐鄭」，二也。冬，「戍鄭虎牢」，三也。今年「公會晉侯」

以下「伐鄭」，「同盟于京城北」，四也。通此則五矣，故曰

「三年之中五起兵」耳。云「至是乃服」者，非直鄭人與

會，下文公以會致，亦是其服文矣。云「其後無干戈之患

二十餘年」者，謂鄭之遂服，不復伐之，不謂不伐餘國，即

下十四年夏，「叔孫豹會晉荀偃」以下「伐秦」，十八年「公

會晉侯」以下「同圍齊」之屬是。言二十餘年，謂不滿得

三十年，至昭公之時，屬楚滅陳、蔡，蠻夷內侵，乃是諸夏

之患，故言此。

公至自會。

楚人執鄭行人良霄。○霄，音消。

①「京城北」，阮校：「唐石經、諸本同。解云：『《穀梁》

與此同，《左氏》經作「亳城北」，服氏之經亦作「京城

北」。《九經古義》云：「京城地在滎陽，隱元年傳「謂

之京城大叔」是也。亳城無考，當從《公》、《穀》爲

正。」

②「之也」，杉浦校：「單疏鈔本無。」

③「注中國至爲重」，杉浦校：「單疏鈔本作「注中國以

鄭故三年之中五起兵者」，無「○解云」。

④「文」，杉浦校：「單疏鈔本無「文」字。」

冬，秦人伐晉。爲楚救鄭。【疏】注「爲楚救鄭」。○解云：爲楚救鄭之義，出《左氏傳》矣。

監本附音春秋公羊注疏襄公卷第十九

監本附音春秋公羊注疏襄公卷第二十

起十二年，盡二十四年

何休學

十有二年，春，王三月，莒人伐我東

鄙，圍台。邑不言圍，此其言圍何？伐而

言圍者，取邑之辭也。伐而不言圍者，非

取邑之辭也。外取邑有嘉惡當書，不直言取邑者，深

恥中國之無信也。前九年伐得鄭，同盟于戲。楚伐鄭不

救，卒爲鄭所背，中國以弱，蠻荆以強，兵革亟作。蕭魚

之會，服鄭最難，不務長和親，復相貪犯，故諱而言圍以

起之。月者，加責之。○台，他來反，又音臺。背，音佩。

亟，去冀反。難，乃旦反。長，丁丈反。【疏】「邑不言

圍」。○解云：隱五年冬，「宋人伐鄭，圍長葛」，傳云「邑

不言圍」，注云「據伐於餘丘不言圍」也。今此不注者，從

彼可知矣。○注「外取」至「責之」。○解云：凡外取魯

邑，有所嘉，有所惡，皆當書見。昭二十五年冬，「齊侯取運」，傳云：「外取邑不書，此何以書？爲公之也。」^①彼注云「爲公取運，以居公，善其憂內，故書」者，是其有嘉而書也。宣元年「六月，齊人取濟西田」，傳云：「外取邑不書，此何以書？所以賂齊也。曷爲賂齊？爲弑子赤之賂也。」注云「子赤，齊外孫。宣公篡弑之，恐爲齊所誅，爲是賂之，故諱使若齊自取之者。月者，惡內甚於鄭婁子益者，是其有惡書也。故言「外取邑有嘉惡當書」也。然則外取魯邑，有所嘉，有所惡，當書取。今亦有所惡，所以不直言取邑而言圍者，深恥中國之無信故也。

云「前九年伐得鄭」，知九年伐得鄭者，以上言「公會晉侯」以下，即言「同盟于戲」，是其伐得之也。言「楚伐鄭不救」者，即下文「楚子伐鄭」，經無救鄭之文是也。言「卒爲鄭所背」者，即十年夏，「楚公子貞、鄭公孫轅帥師伐宋」，是其背諸夏之文。云「兵革亟作」者，即前年注云「三年之中五起兵」是也。云「蕭魚之會，服鄭最難」者，正以三年之中五起兵，然後得之，直會于蕭魚。蕭魚鄭

① 「爲公之也」，單疏鈔本、毛本作「爲公取之也」。阮校：「此本誤脫「取」字。」

人與會而已，經無同盟之文，故知服鄭最難矣。云「故諱而言圍以起之」者，不直言取而諱之言圍，作無所嘉惡之文者，欲以起禍深，不可言故也。知此「莒人伐我東鄙，圍台」之經爲文者，^①正以此傳作常文釋之云：「伐而言圍者，取邑之辭也。伐而不言圍者，非取邑之辭也。」下十五年「夏，齊侯伐我北鄙，圍成」，十七年「秋，齊侯伐我北鄙，圍洮。齊高厚帥師伐我北鄙，圍防」之屬，皆從此文而不釋，故知常文明矣。若此是義之經，至齊高厚之下傳當解之。云「月者，加責之」者，欲道下十七年「秋，齊侯伐我北鄙，圍洮」，及高厚「圍防」之屬，皆不書月，故知此特月，加而責之故也。而十五年「圍成」之下，注云「俱犯蕭魚，此不月，十二年月者，疾始可知」者，正以去此勢近，故令從此義。十七年者差遠，故不復解之。

季孫宿帥師救台，遂入運。入運者，討叛

也。封內兵書者，爲「遂」舉。討叛惡遂者，得而不取，與不討同，故言「入」，起其事。【疏】注「入運討叛也」。^②○解云：昭元年，「三月，取運」。^③運者何？內之邑也。其言取之何？不聽也。何氏云：「不聽者，叛也。不言叛者，爲內諱，故書取以起之。」然則運者是內邑，而季孫入之，故知討叛也。○注「封內兵書者爲遂舉」。○解云：

《春秋》之義，封內之兵，例所不書，即定八年傳云「公斂處父帥師而至」，經不書之是也。今書「救台」與「入運」者，爲惡季孫之遂，是以舉之。○注「討叛」至「其事」。^①○解云：《春秋》之義，大夫出竟，有可以安社稷利國家者，專之可也。然則討叛之事，可以容其專之，而惡其遂者，正以得而不取，與不討莫異。知得而不取者，正以經書入故也。是以隱二年夏「莒人入向」之下，傳云：「入者何？得而不居也。」案下注云「季孫宿遂取鄆以自益其邑」，然則此言「得而不取」者，謂雖得運，不取以入國家，非謂全不取也。言「故書入起其事」者，以起其不取運以入國家之事也。大夫無遂事，此其言遂何？公不得爲政爾。時公微弱，政教不行，故季孫宿遂取鄆而自益其邑。^④【疏】「大夫無遂事」云云。○解云：莊公十九年「公子結」之下已發此傳，今此復言之者，嫌

- ^①「爲」下，阮校引浦鏜云：「當脫『常』字。」
- ^②「運」下，杉浦校：「單疏鈔本有『者』字。」
- ^③「取運」，阮校引浦鏜云：「『運』下當脫『傳云』。」
- ^④「而」，阮校：「鄂本作『以』。按：正義正作『以』。」

討叛不惡遂，故明之。○注「季孫宿」至「其邑」。①○解云：遂者，專事之辭。言季孫自專取鄆，故言「遂取鄆」也。知以自益其邑者，正以討叛邑而不入國家，故知以自益其邑也。

夏，晉侯使士彭來聘。

秋，九月，吳子乘卒。至此卒者，與中國會同，本在楚後，賢季子，因始卒其父，②是後亦欲見其迭爲君。卒皆不日，吳遠于楚。○迭，大結反。【疏】「夏晉侯使士彭來聘」。○解云：考諸正本，皆作「士魴」字。若作「士彭」者，誤矣。○注「至此」至「其父」。○解云：案宣十八年秋，「楚子旅卒」，而吳至是乃書卒者，正以其與中國會同本在楚後，是以《春秋》略之，不書卒，但因季子之賢，乃始卒其父矣。僖十九年冬「會陳人、蔡人、楚人、鄭人盟于齊」，二十一年春「宋人、齊人、楚人盟于鹿上」，「秋，宋公、楚子、陳侯」以下「會于霍」；成十五年冬「叔孫僑如會晉士燮」以下「會吳于鍾離」。然則於傳聞之世，楚人數與中國會同，至所聞之世，吳人乃會，故云「與中國會同，本在楚後」也。知「賢季子，乃始卒其父」者，正以吳子乘不慕諸夏，會大晚，理宜略之，今得書卒，明其有因。③是以二十九年夏，「吳子使札來聘」之下，傳

云：「吳無君無大夫，此何以有君有大夫？賢季子也。何賢乎季子？讓國也。賢季子，則吳何以有君有大夫？以季子爲臣，則國宜有君者也。」④札者何？吳季子之名也。《春秋》賢者不名，此何以名？許夷狄者，不壹而足也。季子者，所賢也。曷爲不足乎季子？許人臣者必使臣，許人子者必使子也。彼注云「緣臣子尊榮，莫不欲與君父共之」，「故不足乎季子，所以隆父子之親也」。以此言之，則知由賢季子卒其父也。○注「是後」至「爲君」。○解云：今書其父卒，亦欲見其四子迭爲君之義故也。襄二十九年傳云：「其讓國奈何？謁也，餘祭也，夷昧也，與季子同母者四，季子弱而才，兄弟皆愛之，同欲立之以爲君。謁曰：『今若是淫而與季子國，季子猶不受也。請無與子而與弟，弟兄迭爲君，而致國乎

①「注季孫宿至其邑」，杉浦校：「單疏鈔本作「季孫宿遂取鄆以自益其邑者」，無「○解云」。按：依此本，則注「而自益其邑」，當疏本作「以自益其邑」。」

②「因」，阮校：「疏中「因」作「乃」。」

③「明」，原作「問」，杉浦校：「單疏鈔本「問」作「明」，當據此本以改。」今據改。

④「國」，襄公二十九年傳無此字。

季子。」皆曰：「諾。」故諸爲君者，皆輕死爲勇，飲食必祝。」是其迭爲君之事。○注「卒皆不日吳遠於楚」。○解云：言皆不日者，即此文書九月，下二十五年冬十二月「吳子謁伐楚，門于巢，卒」，昭十五年「春，王正月，吳子夷昧卒」之屬，故云「卒皆不日」也。言「吳遠於楚」者，正以宣十八年秋七月「甲戌，楚子旅卒」，下十三年「秋，九月，庚辰，楚子審卒」之屬皆書日，故決之也。凡爲人宜道接而生恩，楚邇於諸夏，數會同，親而邇近之，故書其日，吳側海隅，而與諸夏罕接，故皆不日，以見其遠也。

冬，楚公子貞帥師侵宋。

公如晉。

十有三年，春，公至自晉。

夏，取詩。^①詩者何？邾婁之邑也。

曷爲不繫乎邾婁？諱亟也。諱背蕭魚之會

亟。○取詩，^②二傳作「邾」。亟，去冀反，注同。背，音

佩。【疏】夏取詩者。○解云：正本皆作「邾」字。有作

「詩」字者，誤。○「詩者何」。○解云：欲言其國，曾來未

有，欲言其邑，又不繫國，^③故執不知問。○注「諱背」至「會亟」。○解云：正以上十一年蕭魚之會，邾婁在其間，

故如此解。^④

秋，九月，庚辰，楚子審卒。

冬，城防。

十有四年，春，王正月，季孫宿、叔老會晉士匄、齊人、宋人、衛人、鄭公孫囓、曹人、莒人、邾婁人、滕人、薛人、杞人、小邾婁人，會吳于向。月者，危刺諸侯委任大夫交會彊夷，臣日以彊，三年之後，^⑤君若贅旒然。^⑥○囓，敕邁

①「詩」，阮校：「唐石經、諸本同。齊召南云：『《公羊》經傳作「詩」，《漢·地理志》東平國亢父詩亭，故詩國，亦是同《公羊》，非誤也。』按：《說文》：「邾，附庸國，在東平亢父邾亭。」

②「○」，原作「一」，今據余本、中華本、閩本改。

③「又」，杉浦校：「單疏鈔本作「文」，毛本亦然，是也。」

④「故」，原脫，今據京都本、再造善本、中華本、閩本補。

⑤「三」，阮校引浦鏜云：「「二」誤「三」，從《穀梁》疏校。」

⑥「贅旒」，阮校：「《釋文》作「綴旒」，云「一本作「贅旒」。按：《穀梁》疏引此亦作「贅」。」

反，二傳作「薑」。向，舒亮反。綴流，知銳反，又作丁悅反，^①一本作「贅旒」。**【疏】**注「三年之後君若贅旒然」者。^②即下十六年春，「三月，公會晉侯」以下「于湟梁。戊寅，大夫盟」，傳云：「諸侯皆在是，其言大夫盟何？信在大夫也。何言乎信在大夫？偏刺天下之大夫也。曷爲偏刺天下之大夫？君若贅旒然。」彼注云「旒，旂旒。贅，繫屬之辭」，「以旂旒喻者，爲下所執持東西」者也。

二月，乙未，朔，日有食之。是後衛侯爲彊臣所逐出奔。湟梁之盟，信在大夫。**【疏】**注「是後衛」至「大夫」。^③○解云：彊臣，謂孫、甯矣。云「湟梁之盟，信在大夫」者，在下十六年春，鄉已引之訖。

夏，四月，叔孫豹會晉荀偃、齊人、宋人、衛北宮結、鄭公孫嚙、曹人、莒人、邾婁人、滕人、薛人、杞人、小邾婁人伐秦。

己未，衛侯衎出奔齊。^④日者，爲孫氏、甯氏所逐，後甯氏復納之者同，^⑤當相起，故獨日也。不書孫、甯逐君者，舉君絕爲重，見逐說在二十七年。○復，扶又反。**【疏】**「叔孫豹會晉荀」者。^⑥○解云：舊本作「荀偃」。若作「荀偃」者，誤。○注「日者」至「日也」。○

解云：凡諸侯出奔之例，大國月，重乖離之，^⑦小國書時，即桓十五年「五月，鄭伯罕出奔蔡」，^⑧昭三年冬「北燕伯欵出奔齊」之屬是也。今此書日，故須解之。「爲孫氏、甯氏所逐」者，下二十七年傳云「衛甯殖與孫林父逐衛侯而立公孫剽」是也。知後甯氏復納者，亦彼傳文，甯殖已死，其子甯喜納之也。云「出納之者同，當相起，故獨日

①「悅」，宋本《釋文》作「悅」。

②「者」，阮校：「閩、監、毛本作『○』，下有『解云』二字。」

③「注是後衛至大夫」，杉浦校：「單疏鈔本作『注是後衛侯爲彊臣所逐出奔者』，無『○解云』。」

④「衎」，阮校：「《左》、《穀》無。」

⑤「復納之」，阮校：「鄂本『復納之』下有『出納之』三字，此脫。按：疏中引注亦有，當據以補入。」

⑥「叔孫豹會晉荀者」，阮校：「閩、監、毛本『者』作『偃』，按：『偃』、『者』當並有。」杉浦校：「單疏鈔本『荀』下有『偃』字。阮說與此本合。」

⑦「大國月重乖離之」，阮校：「毛本『月』上有『書』字，『之』下有『禍』字。此誤脫。」單疏鈔本同毛本。

⑧「罕」，杉浦校：「單疏鈔本作『突』，毛本亦然，與桓十五年經合。」

也」者，欲見其出納之者同，故出人皆書，見其一家之事。其人書日之經，即下二十六年二月，「甲午，衛侯衍復歸于衛」是也。云「舉君絕爲重」者，謂書衍之名，見其當絕，不合爲諸侯。云「見逐說在二十七年」者，謂下二十七年夏，「衛侯之弟鱄出奔晉」之下，傳具道見逐之由也。

莒人侵我東鄙。

秋，楚公子貞帥師伐吳。

冬，季孫宿會晉士匄、宋華閱、衛孫林父、鄭公孫嚙、莒人、邾婁人于戚。○閱，音悅。

十有五年，春，宋公使向戌來聘。○戌，音恤。

二月，己亥，及向戌盟于劉。

劉夏逆王后于齊。劉夏者何？天子之大夫也。^①劉者何？邑也。其稱劉何？據宰渠伯糾繫官。○劉夏，戶雅反。【疏】「劉夏者何」。

○解云：欲言王臣，文不言爵，欲言諸侯臣，而逆王后，故執不知問。○「劉者何」。○解云：欲言官名，經

典未有，欲言非官，與宰咺文相值，故執不知問。○注「據宰渠伯糾繫官」者。即桓四年「夏，天王使宰渠伯糾來聘」是也。以邑氏也。諸侯人爲天子大夫，不得氏

國稱本爵，故以所受采邑氏，稱子。所謂采者，不得有其土地人民，采取其租稅爾。《禮記·王制》曰：「天子三公之田視公侯，卿視伯，大夫視子男，^②元士視附庸。稱子者，參見義。顧爲天子大夫，亦可以見諸侯不生名，亦可以見爵，亦可以見大夫稱，傳曰「天子大夫」是也。不稱「劉子」而名者，禮，逆王后當使三公，故貶去大夫，明非禮也。○采邑，七代反，下「謂采」同。租稅，子奴反，下舒銳反。見義，賢徧反，下同。大夫稱，尺證反。去，起呂反。【疏】注「諸侯」至「稱子」。○解云：知劉夏是諸

^①「天子之大夫也」，阮校引孫志祖曰：「《穀梁》疏云『《公羊》以劉夏爲天子下大夫』，據此，則「大夫」之上疑脫「下」字。」

^②「大」，原作「視」，今據余本、京都本、再造善本、中華本、閣本改。

侯，人爲天子大夫者，正以卒、葬並書，即定四年秋七月，^①「劉卷卒」，「葬劉文公」是也。若直爲大夫者，假令書卒，不錄其葬，即文三年「夏，五月，王子虎卒」，經無葬文是也。言「不得氏國稱本爵」者，謂不得氏本國，不得稱本爵也。其本國本爵，今史文無記，不可以指知也。言「故以所受采邑氏，稱子」者，即劉子、尹子、單子之屬是也。言其常文然，不謂此經得稱子矣。○注「禮記」至「附庸」。○解云：《公羊》之義，天子圻內不封諸侯，故如此解，即引《王制》以證之，與《左氏》、《穀梁》之義異。若然，案《王制》下文云：「天子之縣內，方百里之國九，七十里之國二十有一，五十之國六十有三，^②凡九十三國。名山大澤不以盼，其餘以錄土，^③以爲間田。」鄭氏云：「大國九者，三公之田三，爲有致仕者副之爲六也，其餘三，待封王之子弟。次國二十一者，卿之田六，亦爲有致仕者副之爲十二，又三爲三孤之田，其餘六，亦待封王之子弟。小國六十三，大夫之田二十七，亦爲有致仕者副之爲五十四，其餘九，亦以待封王之子弟。三孤之田不副者，以其無職，佐公論道耳，雖其致仕，猶可即而謀焉。」以此言之，天子圻內九十三國。言天子圻內不封諸侯者，謂采地以爲國，比圻外諸侯，田自采取其稅租而已，^④

不得取即有其人民，身沒之後，子孫不世，不得以諸侯難之。○注「稱子」至「是也」。○解云：「參」讀爲「三」之「三」也。言凡諸侯人爲天子大夫所以稱子者，三種見義，何者？正欲顧其爲天子大夫。其稱子所以得三見義者：一則可以見諸侯不生名，故曰子。一則可以見其本爵，何者？是圻外諸侯，容其稱爵，雖不得正稱其本爵，亦得稱子以見之。一則可以見大夫稱，故曰參見義也。言「傳曰天子大夫是也」者，即上傳云「劉夏者何？天子之大夫也」是也。○注「不稱」至「非禮也」。○解云：桓八年冬十月，「祭公來，遂逆王后于紀」，傳云：「祭公者何？天子之三公也。」何氏云：「婚禮成於伍：先納采、問名、納吉、納徵、請期，然後親迎。時王者遣祭公

① 「定四年」，「年」字原脫。阮校：「四」下誤脫「年」字。」杉浦校：「單疏鈔本「四」下有「年」字，毛本亦有。」今據補。

② 「五十」，阮校：「浦鏜云：「五十」下脫「里」。按：浦說是也。」

③ 「錄」，阮校引浦鏜云：「「錄」誤「録」。今按：《禮記·王制》作「禄」。

④ 「田」，京都本、再造善本作「由」，義爲長。

來，使魯爲媒，可則因用魯往迎之，不復成禮，疾王者不重妃匹，逆天下之母，若逆婢妾，將謂海內何哉？故譏之。」其注并引親迎言之，則知何氏以爲天子親迎，是以《異義》《公羊》說「云天子至庶人皆親迎，所以重婚禮也」者是。何此注云「禮，逆王后當使三公」者，蓋謂有故之時，或者何氏此注云「禮，逆王后當使三公」，即知何氏之意，以爲不親迎，與桓八年注云「婚禮成於五」云云，「然後親迎」者，欲道士婚禮親迎之前，仍有此五禮，于時王者不行，^①不謂解天子親迎也。又言疾王者不重妃匹云云者，正謂疾時王不行五禮，不謂責親迎。而《異義》《公羊》說「云天子親迎」者，彼是章句家說，非何氏之意也。云「故貶去大夫，明非禮也」者，謂子是大夫之稱，今貶而去之，故曰貶去大夫也。去其大夫正稱，非禮明矣，故云「貶去大夫，明非禮也」。外逆女不書，此何以書？過我也。明魯當共送迎之禮。^②○過，古禾反。共，音恭。

夏，齊侯伐我北鄙，圍成。俱犯蕭魚。此不月，十二年月者，疾始可知。【疏】注「俱犯」至「可知」。○解云：即十二年「三月，莒人伐我東鄙，圍台」，傳云：

「邑不言圍，此其言圍何？伐而言圍者，取邑之辭也。」彼注云：「不直言取邑者，深恥中國之無信也。前九年伐得鄭，同盟于戲。楚伐鄭不救，卒爲鄭所背，中國以弱，蠻荆以強，兵革亟作。蕭魚之會，服鄭最難，不務長和親，復相貪犯，故諱而言圍以起之。月者，加責之。」然則今「齊侯伐我北鄙，圍成」者，亦是取邑之辭，但深恥諸夏之無信，故言圍以起之。然則齊侯不務長和親，復相貪犯，背蕭魚約，而特不月者，疾始可知也。

公救成，至遇。其言「至遇」何？據季

孫宿救台不言所至。【疏】注「據季」至「所至」。○解云：即上十二年春，「季孫宿帥師救台，遂入運」是也。不敢進也。兵不敵，不敢進也。不言止次，如公次于郎以刺之者，量力不貴重民也，故與至攜同文。^③封內兵書者，爲不進張本。○攜，戶圭反，又囚充反。爲，于僞反。【疏】注「不言」至「民也」云云。○解云：莊三年「公

①「行」下，杉浦校：「單疏鈔本有「之」字。」

②「迎」，阮校：「鄂本作「逆」。」

③「至攜」，阮校：「鄂本同，閩、監、毛本「攜」改「攜」。」

按：此疏及傳廿六年經傳、《釋文》皆作「至攜」。

次于郎，傳云：「其言次于郎何？」刺欲救紀而後不能也。彼注云「惡公既救人，辟難道還，故書其止次以起之」是也。正以此量力不責之，則知莊公三年者，力能救之而不敢救，故刺之。云「故與至薨同文」者，僖二十六年春，「公追齊師至薨，弗及」是也。然則彼言「至薨」，此言「至遇」，故言與至薨同文。彼下注云：「國內兵不書，而舉地者，善公齊師去則止，不遠勞百姓，過復取勝，得用兵之節，故詳錄之。」即襄公知力不能敵，不忍戰殺其民，至遇則止，亦得用兵之宜，故與之同文。○注「封內」云云。○解云：定八年傳云「公斂處父帥師而至」，經不書之，則知封內之兵例不書也。今此公救成，亦是封內之兵，書之者，正爲至遇張本也。至遇者，是不進之文，故言此也。

季孫宿、叔孫豹帥師城成郛。○郛，芳夫反。

秋，八月，丁巳，日有食之。是後湟梁之

盟，信在大夫，齊、蔡、莒、吳、衛之禍，徧滿天下。【疏】注「是後」至「大夫」。○解云：在下十六年春。○注「齊蔡」至「天下」。○解云：下二十五年「夏，五月，乙亥，齊崔杼弑其君光」，冬十二月「吳子謁伐楚，門于巢，卒」，二十六

年春二月，辛卯，衛甯喜弑其君剽，二十九年夏五月「閔弑吳子餘祭」，三十年「夏，四月，蔡世子般弑其君固」，三十一年「冬，十有一月，莒人弑其君密州」。事不次者，意及則言，不必見義也。

邾婁人伐我南鄙。

冬，十有一月，癸亥，晉侯周卒。○周，一本作「雕」。

十有六年，春，王正月，葬晉悼公。

三月，公會晉侯、宋公、衛侯、鄭伯、曹伯、莒子、邾婁子、薛伯、杞伯、小邾婁子于湟梁。○湟，本又作臭，①古閔反。

戊寅，大夫盟。諸侯皆在是，其言「大夫盟」何？據葵丘之盟諸侯皆在，有大夫，不言大夫盟。【疏】「公會晉侯」以下「于湟梁」者。②○解云：《爾

①「湟本又作臭」，宋本《釋文》出音作「臭」，云「本又作湟」。

②「者」，阮校：「閔、監、毛本刪，下「注據葵丘之盟者」同。」

雅·釋地》云「梁莫大于湟梁」，孫氏曰：「梁，水橋也。」

《音義》云「湟水出河內軹縣東南，至溫入河」是也。○注

「據葵丘之盟」者。○解云：在僖九年。其經云「夏，公會

宰周公、齊侯、宋子」以下「于葵丘」，九月，戊辰，諸侯盟

于葵丘」。案彼經傳云，不見有大夫之盟文，唯有僖十五

年「三月，公會齊侯、宋公」以下，「盟于牡丘，遂次于匡。

公孫敖率師及諸侯之大夫救徐」。然則牡丘之盟，即有

大夫可知。此注云「葵丘之盟」者，誤也，宜爲「牡丘」字

矣。「信在大夫也」者，言其信任在于大夫。信在大

夫也。故書大夫盟，不言諸侯之大夫者，起信在大夫。

【疏】注「不言諸侯之大夫者起信在大夫」。○解云：欲決

上三年雞澤之會，經云「及諸侯之大夫」也。何言乎

信在大夫？據上三年戊寅不起。【疏】注「據上」至

「不起」。○解云：即上三年雞澤之會，經云「戊寅，叔孫

豹及諸侯之大夫，及陳袁僑盟」，連言諸侯，是其不起之

文。而言「上戊寅不起」者，欲道今此戊寅起之，二經皆

言戊寅，故得相對爲上下也。徧刺天下之大夫

也。曷爲徧刺天下之大夫？據戊寅不刺之。

○徧刺者，①音遍，下及下同。②【疏】注「據戊寅不刺

之」。○解云：不復言上戊寅者，上已言之，從可知省文。

君若贅旒然。旒，旒旒。贅，繫屬之辭，若今俗名就

婿爲贅婿矣。以旒旒喻者，爲下所執持東西。旒者，其

數名。《禮記·玉藻》曰：「天子旒十有二旒，諸侯九，卿

大夫七，士五。」不言諸侯之大夫者，明所刺者非但會上

大夫，并徧刺天下之大夫。不殊內大夫者，欲一其文，見

惡同也。至此所以徧刺之者，蕭魚之會，服鄭最難，諸侯

勞倦，莫肯復出，而大夫常行，三委于臣，而君遂失權，③

大夫故得信在，④故孔子曰：「唯器與名，不可以假人。」

不重出地者，與三年雞澤大夫盟同義。○贅，章銳反，本

又作「綴」，丁衛反，又丁劣反，繫屬也。旒，音留，本又作

「流」，旌旗之旒。屬，音燭。見惡，賢徧反。難，乃旦反。

①「者」字，宋本《釋文》無。

②「下及下同」，宋本《釋文》作「下及下注同」。

③「三委于臣而君遂失權」，阮校：「浦鏗云：『正』誤

「三」，從《六經正誤》校。按：此本疏引注云「而君遂

失實權」，閩、監、毛本疏無「實」字。」杉浦校：「單疏

鈔本無「實」字。按：依下疏文，則作「三委」是也，

「實」字當衍。」

④「在」，阮校：「鄂本「在」作「任」，此誤。」

復，扶又反。重，直用反。【疏】注「若今俗名就婿爲贅婿矣」。○解云：亦是妻所持挈，^①故名之云爾。○注「禮記玉藻」。○解云：案今《禮記·玉藻》即無此文，唯《禮說稽命徵》及《含文嘉》皆云「天子旗九刃，十二旒，曳地。諸侯七刃，九旒，齊軫。卿大夫五刃，七旒，齊較。士三刃，五旒，齊首」，而言《玉藻》，誤也。云「不言至大夫」者，注已云「不言諸侯之大夫者，起信在大夫」，今又言此者，謂不言諸侯之大夫有兩種之義，非但起信在大夫，明徧刺天下之大夫也。云「不殊內大夫者，欲一其文，見惡同也」者，欲道上三年雞澤之會，殊叔孫豹不一其文者，非唯彼大夫之過，豹惡亦可見故也。云「諸侯勞倦，莫肯復出，而大夫常行，三委于臣，而君遂失實權，大夫故得信在」者，謂上十一年蕭魚之會以來，十四年春「季孫宿、叔老會晉士匄」以下「于向」，夏「叔孫豹會晉荀偃」以下「伐秦」，「冬，季孫宿會晉士匄」以下「于戚」之屬，是諸侯不出，大夫常行也。云「故孔子曰『唯器與名，不可以假人』者，《家語》文。成二年《左傳》亦有此言。云「不重出地者，與三年雞澤大夫盟同義」者，即上注云「不重出地，有諸侯在，臣繫君，故因上地」是也。

晉人執莒子、邾婁子以歸。錄以歸者，甚

惡晉。有罪無罪，皆當歸京師，不得自治之。○惡，烏路反。【疏】注「錄以」至「治之」。○解云：稱人以執非伯討，已是晉之惡也。復言「以歸」，不決於天子，又是其惡，故其錄以歸者，甚惡晉矣。

齊侯伐我北鄙。

夏，公至自會。

五月，甲子，地震。是時涇梁之盟，政在臣

下，其後叛臣二，弑君五，楚滅舒鳩，齊侯襲莒，乖離出奔，兵事最甚。【疏】注「其後叛臣二者」。○解云：即下二十三年夏「晉欒黶復入于晉，入于曲沃」，二十六年春「衛孫林父入于戚以叛」是也。云「弑君五」者，即下二十五年夏「齊崔杼弑其君光」，二十六年春「衛甯喜弑其君剌」，二十九年夏「閔弑吳子餘祭」，三十年夏「蔡世子般弑其君固」，三十一年冬「莒人弑其君密州」之屬是也。云「楚滅舒鳩」者，即下二十五年秋，「楚屈建帥師滅舒鳩」是也。云「齊侯襲莒」者，在下二十三年冬。云「乖離

①「持」，杉浦校：「單疏鈔本作『提』。按：『持挈』當『提挈』誤。」

出奔」者，即下十七年「宋華臣出奔陳」，二十年「蔡公子履」、「陳侯之弟光出奔楚」之屬也。「叔老會鄭伯、晉荀偃」者，正本作「荀偃」，若有作「荀偃」者，誤矣。^①

叔老會鄭伯、晉荀偃、衛甯殖、宋人伐許。

秋，齊侯伐我北鄙，圍成。

大雩。先是伐許，齊侯圍成，動民之應。

冬，叔孫豹如晉。

十有七年，春，王二月，庚午，邾婁子矰卒。○矰，音閑，或下姁反，《左氏》作「慄」。

宋人伐陳。

夏，衛石買帥師伐曹。

秋，齊侯伐我北鄙，圍洮。○洮，他刀反，

《左氏》作「桃」。

齊高厚帥師伐我北鄙，圍防。

九月，大雩。比年仍見圍，不暇恤民之應。

宋華臣出奔陳。

冬，邾婁人伐我南鄙。

十有八年，春，白狄來。白狄者何？夷狄之君也。何以不言朝？不能朝也。

○言朝，直遙反，下同。【疏】「白狄者何」。○解云：欲言其君，經不書朝，欲言其臣，不見名氏，故執不知問。

夏，晉人執衛行人石買。

秋，齊師伐我北鄙。

冬，十月，公會晉侯、宋公、衛侯、鄭伯、曹伯、莒子、邾婁子、滕子、薛伯、杞伯、小邾婁子同圍齊。曹伯負芻卒于師。

楚公子午帥師伐鄭。

十有九年，春，王正月，諸侯盟于祝阿。下有執，不日者，善同伐齊，故褒與信辭。○祝阿，

① 「叔老會鄭伯」至「誤矣」，阮校：「鄂、閩、監、毛本移此於『宋人伐許』下，又刪『者』字，增『解云』二字。」

二傳作「祝柯」。**【疏】**「下有」至「信辭」。**①**○解云：《公羊》之義，不信者日。今上文同盟，下即執邾婁子，是為不信，而不日者，褒與信辭故也。

晉人執邾婁子。

公至自伐齊。此同圍齊也，何以致伐？據諸侯圍許致圍。**【疏】**注「據諸侯圍許致圍」者。

○解云：即僖二十八年冬「諸侯遂圍許」，二十九年「公至自圍許」是也。未圍齊也。故致伐起。未圍齊，

則其言圍齊何？抑齊也。曷為抑齊？據

侵蔡伐楚猶不抑。**【疏】**注「據侵」至「不抑」。○解云：即

僖四年「春，王正月，公會齊侯」以下「侵蔡，蔡潰」，「遂伐楚」是也。言「猶不抑」者，正以楚為彊夷，數害諸侯，論

深淺，**②**甚於齊矣，猶不抑之，故以為難也。為其亟伐

也。**③**或曰為其驕蹇，使其世子處乎諸侯

之上也。以下葬略，或說是也。亟伐者，并數爾。加

圍者，明當從滅死二等，奪其爵土。○為其，于僞反，下

同。亟，去冀反，注同。驕蹇，紀橋反，本又作「橋」，下紀

釐反。并數，必正反，**④**下所主反，下「數年」同。**【疏】**或

曰為其「至」上也」。○解云：即上十一年夏，「公會晉侯」以下「伐鄭」之時，齊世子光在於莒子之上之屬是也。○注「以下」至「是也」。○解云：下葬略者，即下文「冬，葬齊靈公」，注云「不月者，抑其父，嫌子可得無過，故奪臣子恩，明光代父從政，處諸侯之上，不孝也」者，是正以葬是生者之事，故略其父葬，得惡其子，則知或說近其義也。云「亟伐者，并數爾」者，即上「圍成」、「圍洮」、「圍防」之屬，故言「并數爾」。必如此解者，正以宣九年「秋，取根牟」，傳云：「根牟者何？邾婁之邑也。曷為不繫乎邾婁？諱亟也。」注云：「亟，疾也。屬有小君之喪，邾婁子來加禮，未期而取其邑，故諱不繫邾婁也。」然則彼言亟者，謂上有小君薨，邾婁來加禮於魯，**⑤**未期而伐取邑，

① 「下有至信辭」，杉浦校：「單疏鈔本作「注下有執不日者云云」。按：當有「注」字。」

② 「論深淺」，杉浦校：「單疏鈔本作「論其淺深」。」

③ 「為其亟伐也」，杉浦校：「注疏本此傳無疏。單疏鈔本有疏云：為其亟伐也者，即上十七年、十八年圍洮，防是也。」

④ 「正」，余本、宋本《釋文》作「政」。

⑤ 「邾婁」，杉浦校：「單疏鈔本「婁」下有「子」字。」

背信大疾，故云亟。今此直是頻擊伐魯，故云亟，故須解云「亟伐者并數爾」，以別彼文。○注「加圍者」至「爵土」。○解云：據未圍而言圍，故謂之加也。莊十年傳云：「粗者曰侵，精者曰伐，戰不言伐，圍不言戰，人不言圍，滅不言入，書其重者。」然則用兵之道，滅爲最甚，人次之，圍次之。今加言圍，輕於滅、入二等，明不合死，但合黜爵滅土耳。

取邾婁田，自漈水。其言「自漈水」

何？據齊人取濟西田，不言自濟水。○漈，火號反，徐音郭。取濟，子禮反，下同。【疏】注「據齊人」至「濟水」。○解云：即宣元年夏，「六月，齊人取濟西田」是也。以漈爲竟也。何言乎「以漈爲竟」？據取邑未嘗道竟界。漈移也。魯本與邾婁以漈爲竟，漈移入邾婁界，^①魯隨而有之。諸侯土地，本有度數，不得隨水。隨水有之，當坐取邑，故云爾。【疏】「漈移也」。○解云：漈移而經不書者，外異故也。然則傳每言「外異不書」者，亦據此文也。

季孫宿如晉。

葬曹成公。

夏，衛孫林父帥師伐齊。

秋，七月，辛卯，齊侯瑗卒。○瑗，于眷反，一音環，二傳作「環」。【疏】「齊侯瑗卒」者。○解云：《左氏》、《穀梁》作「環」字也。

晉士匄帥師侵齊，至穀，聞齊侯卒，乃還。還者何？善辭也。何善爾？大其不伐喪也。此受命乎君而伐齊，則何大乎其不伐喪？據公子買戍衛不卒戍，言戍衛，遂公意。

【疏】「還者何」。○解云：欲言其善，而廢君命，欲言其惡，還是善辭，故執不知問。○注「據公」至「公意」。○解云：即僖二十八年春「公子買戍衛，不卒戍，刺之」，傳云：「不卒戍者何？不卒戍者，內辭也，不可使往也。不可使往，則其言戍衛何？遂公意也。」彼注云「使臣子不可使，恥深，故諱使若往不卒戍事者，明臣不得壅塞君命」是也。然則公子買不可使往，而經書戍衛以遂公意，以明臣子不得壅塞君命。今此士匄不行君命，而經大

①「入」，原作「人」，今據余本、京都本、再造善本、閣本改。

之，故以爲難也。大夫以君命出，進退在大夫也。禮，兵不從中御外，臨事制宜，當敵爲師，唯義所在。士勾聞齊侯卒，引師而去，恩動孝子之心，服諸侯之君，^①是後兵寢數年，故起時善之。言乃者，士勾有難重廢君命之心，故見之。言至穀者，未侵齊也。言聞者，在竟外。舉侵者，張本。○難，乃旦反。見，賢徧反。【疏】

注「禮兵」至「張本」。○解云：《司馬法》云：「闔外之事，將軍裁之。」故云：禮，用兵之道，不得國中制御于外也。凡爲將軍之法，必須臨事制宜，謂專進退也。當其敵之強弱，而爲帥以禦之，^②唯不爲非義而已，故言「唯義所在」。而《老子》云「將軍有廟勝之策」者，謂未行之時，先謀於廟，授之斧鉞，令有勝功也。既授之斧鉞之後，明即自專之義，裁其可否，故是其宜也。云「恩動孝子之心，義服諸侯之君」者，哀痛其喪，是其恩，故曰「恩動孝子之心」。依禮而行，是其義，故曰「義服諸侯之君」也。云「是後兵寢數年」者，謂自此以後，兵事寢伏，數年不起，至二十三年「秋，齊侯伐衛，遂伐晉」，二十四年「冬，楚子、蔡侯、陳侯、許男伐鄭」者，始有兵起也。案明年「仲孫遫帥師伐邾婁」，亦是兵，而言數年者，正以魯與邾婁竟界相近，數相冒犯，非齊、晉之事，故得然解也。云「故

起時善之」者，正以士勾此事實依古禮，但時莫能然，特以爲善，故云「起時善之」。云「言乃者，士勾有難重廢君命之心，故見之」者，正以宣八年傳云：「乃者何？難也。」今又言「乃」，故以重難解之。而言「重」者，正以「乃」難於「而」，故彼注云：「言乃者，內而深。言而者，外而淺。」故此云「重難」也。云「言至穀者，未侵齊也」者，上十五年夏，「公救成，至遇」，傳云：「其言至遇何？不敢進也。」然則彼言至者不進之文，今至穀即聞其喪，明其未行侵，故云「言至穀者，未侵齊也」。云「言聞者，在竟外」者，正以古禮，庶人爲君齊衰三月，若其人竟，即舉而知之，何道聞乎？故如此解也。云「舉侵者，張本」者，若如上說，本未入齊，但在竟外聞喪，而言「侵」者，爲下張本耳。

八月，丙辰，仲孫蔑卒。

齊殺其大夫高厚。

①

「恩動孝子之心服諸侯之君」，阮校：「鄂本、毛本『心』下有『義』字。按解云『故曰義服諸侯之君也』，是疏本有『義』字，當據補。」

②

「帥」，孫校：「疑『師』之誤。」

鄭殺其大夫公子喜。○喜，二傳作「嘉」。

【疏】「鄭殺」至「子喜」。○解云：《左氏》、《穀梁》作「公子嘉」也。

冬，葬齊靈公。不月者，抑其父，嫌子可得無過，故奪臣子恩，明光代父從政，處諸侯之上，不孝也。

【疏】注「不月」至「不孝也」。○解云：正以卒日葬月，終于《春秋》，為大國之例，今葬不書月，故須解之。言「抑其父」者，即上十九年傳云「未圍齊，則言其圍齊何？」①

抑齊也。曷為抑齊？為其亟伐也。或曰為其驕蹇，使其世子處乎諸侯之上也」是也。言「嫌子可得無過」者，正以明王之制，父子兄弟罪不相兼故也，「故奪臣子恩」者，正以葬是生者之事，故略其父葬，不書其月，可以奪臣子恩也。言「明光代父從政，處諸侯之上，不孝也」者，正以孝子之道，見父母不義之事，不合從父之命，處其人君之上，焉得為孝乎？故去其父葬月以見之。

城西郭。言西郭者，據都城錄道東西。

叔孫豹會晉士匄于柯。○柯，古河反。

城武城。

二十年，春，王正月，辛亥，仲孫遨會

莒人盟于向。○邀，音速。

夏，六月，庚申，公會晉侯、齊侯、宋公、衛侯、鄭伯、曹伯、莒子、邾婁子、滕子、薛伯、杞伯、小邾婁子，盟于澶淵。○澶，市然反。

秋，公至自會。

仲孫遨帥師伐邾婁。

蔡殺其大夫公子燮。

蔡公子履出奔楚。

陳侯之弟光出奔楚。②為二慶所譖，還在二

十三年。○弟光，《左氏傳》作「弟黃」。【疏】注「為二慶」至「三年」。○解云：即下二十三年經云「陳殺其大夫慶虎及慶寅。陳侯之弟光自楚歸于陳」，注云「前為二慶所譖出奔楚，楚人治其罪，陳人誅二慶，反光，故言歸」。宋

①「言其」，閣本作「其言」，與十九年傳合。

②「弟光」，阮校：「唐石經、諸本同。《釋文》：『弟光，《左氏》作「弟黃」。』《九經古義》云：『《白虎通》云「璜之為言光也」，《風俗通》云「黃，光也」。』」

大夫山譖華元貶之，而今此不貶者，殺二慶而光歸，譖光可知者，即其義也。

叔老如齊。

冬，十月，丙辰，朔，日有食之。自溴梁之

盟，臣恣日甚，故比年日食。【疏】注「自溴」至「日食」。

○解云：自上十六年溴梁之盟，信在大夫以來，臣之放恣日甚矣。言比年日食，即下二十一年秋，「九月，庚戌，朔，日有食之。」冬，十月，庚辰，朔，日有食之，二十三年

「春，王二月，癸酉，日有食之」是也。

季孫宿如宋。

二十有一年，春，王正月，公如晉。月

者，溴梁之盟後，中國方乖離，善公獨能與大國。【疏】注

「月者」至「大國」。○解云：正以朝聘例時，故如此解。

邾婁庶其以漆，閭丘來奔。邾婁庶其

者何？邾婁大夫也。邾婁無大夫，此何

以書？據快無氏。○漆，音七。閭，力於反。快，苦

夬反。【疏】「邾婁庶其者何」。○解云：欲言其君，經不

書爵，欲言其大夫，邾婁無大夫，故執不知問。○注「據

快無氏」。○解云：即昭二十七年冬，「邾婁快來奔」，是

其無氏，即不合書見之義。②問者，見「快」不書氏，知邾婁無大夫，既無大夫，何以特書庶其乎？故難之。然案下二十三年「夏，邾婁鼻我來奔」，何故不據「鼻我」，而要據「快」者？正以鼻我以二字為稱，嫌鼻我為字，若其據之，於義不明，故如此注也。重地也。惡受叛臣邑，③故重而書之。不言叛者，舉地言奔，則魯坐受與庶其叛兩明，故省文也。○惡，烏路反。

夏，公至自晉。

秋，晉欒盈出奔楚。

九月，庚戌，朔，日有食之。

冬，十月，庚辰，朔，日有食之。

曹伯來朝。

公會晉侯、齊侯、宋公、衛侯、鄭伯、曹

伯、莒子、邾婁子于商任。○任，音壬。

①「癸酉」下，阮校引浦鏜云：「脫『朔』字。」
②「義」下，杉浦校：「單疏鈔本有『也』字。」
③「受」下，余本、鄂本有「人」字。

十有一月，庚子，孔子生。^①時歲在己卯。

○庚子孔子生，傳文上有十月庚辰，此亦十月也。一本作「十一月庚子」，又本無此句。【疏】「十有一月庚子孔子生」。○解云：《左氏》經無此言，則《公羊》師從後記之。○注「時歲在己卯」者。○解云：何氏自有長歷，不得以《左氏》難之。

二十有二年，春，王正月，公至自會。

月者，危公。前彊隨渚有邾婁地，^②又受其叛臣邑，而今與魯，^③不於上會月者，與日食同月，不得復見。○與，音預。見，賢徧反。【疏】注「月者危公」者。○解云：正以凡致例時，故如此解。云「前彊隨渚有邾婁地」者，即上十九年春，「取邾婁田，自渚水」是也。云「又受其叛臣邑」者，即上二十一年春，「邾婁庶其以漆，閭丘來奔」是也。云「不於上會」云云者，言所以不於上商任會時書月以見危者，正以與上「冬，十月，庚辰，朔，日有食之」，同在十月，不得見此義，是以於此危。

夏，四月。

秋，七月，辛酉，叔老卒。

冬，公會晉侯、齊侯、宋公、衛侯、鄭

伯、曹伯、莒子、邾婁子、滕子、薛伯、杞伯、小邾婁子于沙隨。^④公至自會。

楚殺其大夫公子追舒。

二十有三年，春，王二月，癸酉，朔，日有食之。

三月，己巳，杞伯句卒。○句，古害反。

夏，邾婁鼻我來奔。邾婁鼻我者何？邾婁大夫也。邾婁無大夫，此何以書？以近書也。以奔無他義，知以治近升平書也。所傳

①「十有一月庚子孔子生」，阮校：「唐石經、諸本同。按：《穀梁傳》作『庚子孔子生』，與陸氏本合。疏本作『十有一月庚子』，與唐石經同。」補校：「按：作『十月』者是也。考杜氏《長曆》，十月庚辰小，十一月己酉大，十一月無庚子，庚子乃十月二十一日也。齊

召南說。」

②「彊」，阮校：「鄂本同，閩、監、毛本作『疆』，疏同。」

③「魯」，阮校：「鄂本『魯』作『會』，此誤。」

④「公會晉侯」至「于沙隨」，阮校：「唐石經、諸本同。二傳『邾婁子』作『邾子』，《左氏》無『滕子』。」

聞世，見治始起，外諸夏，錄大略小，大國有大夫，小國略稱人。所聞之世，內諸夏，治小如大，廩廩近升平，故小國有大夫，治之漸也。見於邾婁者，自近始也。①獨舉一國者，時亂實未有大夫，治亂不失其實，故取足張法而已。○鼻我，二傳作「畀我」。以治，直吏反。下「見治」、「治之漸」同。近升平，「附近」之「近」，下「近升」同。傳，直專反。見治，賢徧反，下同。【疏】「邾婁鼻我者何」。○解云：已解於上。○「以近書也」者。○解云：以其治近於升平，故復書之。○注「以奔」至「而已」。○解云：莊二十四年冬，「曹羈出奔」之下，傳云「曹無大夫，此何以書？賢也。何賢乎曹羈」，「三諫不從，遂去之，故君子以爲得君臣之義也」。然則曹羈得諫義，是以書之。上二十一年，邾庶其之奔，傳云「邾婁無大夫，此何以書？重地也」。昭五年「夏，莒牟夷以牟婁及防茲來奔」，傳云：「此何以書？重地也」。然則庶其、牟夷皆以重地故書，悉非常例。今此鼻我無三諫之善，無盜土之惡，直奔而已，更無它義而得書見，知以治近升平之故也。云「見於邾婁者，自近始也」者，正以地接于魯，故先治之也。云「治亂不失其實，故取足張法而已」者，言孔子作《春秋》，欲以撥亂世，多舉小國悉有大夫，則恐文害

其理，故曰「治亂不失其實」也。今鼻我更無他義而得書見，明其張三世之法，故曰「取足張法」而已。

葬杞孝公。

陳殺其大夫慶虎及慶寅。

陳侯之弟光自楚歸于陳。前爲二慶所譖，

出奔楚，楚人治其罪，陳人誅二慶，反光，故言歸。宋大夫山譖華元貶，②此不貶者，殺二慶而光歸，譖光可知。

○譖，側鳩反。【疏】注「前爲」至「言歸」。③○解云：在上二十年秋。云「故言歸」者，正以歸者出入無惡之文故也。云「宋大夫山譖華元貶」者，即成十五年秋「宋華元出奔晉，宋華元自晉歸于宋。宋殺其大夫山」，何氏云：「不氏者，見殺在華元歸後，嫌直自見殺者，故貶之，明以

①「自近始也」，阮校：「諸本同。昭廿七年疏引作『以近治也』，『始』爲『治』之訛，當據正。按解云：『正以地接于魯，故先治之也。』是疏本作『治』。」

②「宋大夫山譖華元貶」，阮校：「二十年疏引此下有『之』字。」

③「注前爲至言歸」，杉浦校：「單疏鈔本作『注前爲二慶所譖出奔楚者』，無『○解云』。」

譖華元故。」今此殺二慶之後光乃歸，歸者出入無惡之文，則知譖光明矣。

晉欒盈復入于晉，^①入于曲沃。曲沃

者何？晉之邑也。其言「入于晉，入于曲

沃」何？據當舉重。○復入，扶又反，注同。【疏】「曲

沃者何」。○解云：欲言晉邑，理當舉重，欲言非晉邑，繫

晉言之，故執不知問。欒盈將入晉，晉人不納，

由乎曲沃而人也。欒盈本欲入晉篡大夫位，晉人

不納，更入於曲沃，得其士衆，以入晉國，曲沃大夫當坐，

故「復」言「入」。篡大夫位例時。【疏】注「欒盈本」至「例

時」。○解云：復入者，出無惡之文，故知其人欲有所篡

也。不直言入，又無叛文，故知不篡君位也。其惡之文，

不繫於篡君，故知止欲篡大夫也。云「曲沃大夫當坐，故

「復」言「入」也，^②正以入者，出入惡之文，而入于曲

沃，^③故知從晉鄉曲沃之時，有罪明矣。曲沃大夫受納

有罪之人，故云「當坐」。《春秋》欲見此義，故不舉重，

復書「入于曲沃」矣。云「篡大夫位例時」者，正以經書

夏，故知例時。昭二十一年夏「宋華亥、向甯、華定自陳

入于宋南里以畔」，定十一年「秋，宋樂世心自曹入于

蕭」之屬皆是也。

秋，齊侯伐衛，遂伐晉。

八月，叔孫豹帥師救晉，次于雍洹。曷

爲先言救而後言次？據次于曷北救邢。○渝，

羊朱反，《左氏》作「掄」。曷，女輒反。【疏】注「據次」至

「救邢」。○解云：即僖元年春，「齊師、宋師、曹師次于曷

北，救邢」是也。先通君命也。惡其不遂君命而專

止次，故先通君命言救。○惡，烏路反。

己卯，仲孫遫卒。

冬，十月，乙亥，臧孫紇出奔邾婁。○

紇，恨發反。

晉人殺欒盈。曷爲不言殺其大夫？

據篡得大夫之位。【疏】注「據篡」至「之位」。○解云：正

^①「入」，原作「人」，今據余本、京都本、再造善本、中華

本、閣本改。

^②「也」，阮校引浦鏜云：「『者』誤『也』」。

^③「入」，原作「人」，今據京都本、再造善本、中華本、

閣本改。

以夏已入晉，冬乃殺之。傳又云「曷為不言殺其大夫」，故知篡得大夫之位矣。非其大夫也。明非君所置，不得為大夫。無大夫文而殺之稱人者，從討賊辭，大其除亂也。【疏】注「明非」至「亂也」。^①○解云：《公羊》之例，大夫自相殺稱人，即文九年「晉人殺其大夫先都」之屬是。今無大夫之文稱人者，欲從「衛人殺州吁」、「齊人殺無知」之屬，是討賊之辭故也。實非篡而作討賊之辭者，大其除亂也。

齊侯襲莒。

二十有四年，春，叔孫豹如晉。

仲孫羯帥師侵齊。○仲孫羯，本又作「謁」，

亦作「謁」，同居謁反。^②

夏，楚子伐吳。

秋，七月，甲子，朔，日有食之，既。是後

楚滅舒鳩，齊崔杼、衛甯喜弑其君。【疏】注「是後」至「其

君」。○解云：二十五年秋「楚屈建帥師滅舒鳩」，二十五年夏「齊崔杼弑其君光」，二十六年春「衛甯喜弑其君剽」是也。

齊崔杼帥師伐莒。

大水。前此叔孫豹救晉，仲孫羯侵齊，此興師衆，民怨之所生也。^③

八月，癸巳，朔，日有食之。與甲子同。

【疏】注「與甲子同」。○解云：在上七月也。

公會晉侯、宋公、衛侯、鄭伯、曹伯、莒子、邾婁子、滕子、薛伯、杞伯、小邾婁子于陳儀。○陳儀，二傳作「夷儀」，二十五年同。

冬，楚子、蔡侯、陳侯、許男伐鄭。

公至自會。

陳鍼宜咎出奔楚。○咸，本又作「鍼」，其廉

反。咎，其九反。

叔孫豹如京師。

大饑。有死傷曰大饑，無死傷曰饑。【疏】「于陳

①「注明非至亂也」，杉浦校：「單疏鈔本作『注無大夫云云』。按：注疏本標起止誤也，當據單疏本以訂。」

②「謁」，宋本《釋文》作「謁」。

③「也」，阮校：「鄂本無，當據以訂正。」

儀」。《左氏》與《穀梁》作「夷儀」。○注「有死傷曰大饑」。○解云：①正以諸經直言饑，此加「大」故也。

監本附音春秋公羊注疏襄公卷第二十②

①「注有死傷曰大饑○解云」，杉浦校：「單疏鈔本作「注有死傷者曰大饑者」，無「○解云」。按：依此本，則何注「傷」下當疏本有「者」字。」

②「監本附音春秋公羊注疏襄公卷第二十」，原無，今據他卷例補。

監本附音春秋公羊注疏襄公卷第二十一

起二十五年，盡三十一年

何休學解^①

二十有五年，春，齊崔杼帥師伐我北鄙。

夏，五月，乙亥，齊崔杼弑其君光。

公會晉侯、宋公、衛侯、鄭伯、曹伯、莒子、邾婁子、滕子、薛伯、杞伯、小邾婁子于陳儀。

六月，壬子，鄭公孫舍之帥師入陳。

日者，陳、鄭俱楚之與國，今鄭背楚入陳，明中國當憂助鄭以離楚弱陳，故為中國憂錄之。○背，音佩。為，于僞反。【疏】注「日者」至「錄之」。○解云：正以《公羊》之

義，人例書時，傷害多者乃始書月，即成七年秋「吳人州來」，隱二年「夏，五月，莒人人向」之屬是。今此書日，故

為憂錄之故也。言陳、鄭楚之與國者，^②正以宣十一年「夏，楚子、陳侯、鄭伯盟于辰陵」之文也。

秋，八月，己巳，諸侯同盟于重丘。會、

盟再出，不舉重者，起諸侯欲誅崔杼，故詳錄之。○重，直龍反。【疏】注「會盟」至「錄之」。○解云：正以文十四

年夏，「公會宋公」以下，「同盟于新城」，舉盟以為重，不言會于某。今會、盟並舉，故須解之。僖九年「公會宰周

公」以下「于葵丘」之下，注云「會、盟一事，不舉重者，時宰周公不與盟」也。昭十三年「平丘」之下，注云「不舉重

者，起諸侯欲討棄疾，故詳錄之」，與此同。

公至自會。

衛侯入于陳儀。陳儀者何？衛之邑

也。曷為不言入于衛？據與鄭突入櫟同。○

櫟，力狄反。【疏】「陳儀者何」。○解云：欲言是國，衛侯

「入于」，欲言其邑，不繫于衛，故執不知問。○注「據與」

① 「解」，他卷俱無此字，疑衍。

② 「鄭」下，何注有「俱」字。

至「櫟同」。○解云：桓十五年「秋，九月，鄭伯突入于櫟」，^①「櫟者何？鄭之邑。曷為不言入于鄭」，注云：「據齊陽生立陳乞家，言入于齊。」今此亦據哀公六年齊陽生之事，^②與之同，故云「據與鄭突入櫟同」矣。哀六年傳云「景公死而舍立，陳乞使人迎陽生于諸其家」，「諸大夫不得已，皆逡巡北面，再拜稽首而君之爾」。然則陽生實入陳乞家，而言入于齊，今衛侯入于陳儀，不言入于衛，是以據而難之。然則陽生入于陳乞之家，在國都之內，故言入于齊，陳儀非國都，故不得言入于衛。 諶君以弑也。以先言人，后言弑也。時衛侯為剽所篡逐，不能以義自復，詐願居是邑為剽臣，然後候間伺便，使甯喜弑之。君子耻其所為，故就為臣以諶君惡之。未得國，言人者，起詐篡從此始。○諶，況元反。以弑，音試，注同，后年放此。伺便，音司，下婢面反。惡，烏路反。 【疏】注「以先」至「弑也」。○解云：謂今言人，^③二十六年弑剽是也。云「時衛侯為剽所篡逐」者，初見篡逐在十四年，今仍未復，故言時也。云「然後候間伺便，使甯喜弑之」者，在下二十六年春。云「故就為臣以諶君惡之」者，謂就其君之文以惡之。云「未得國，言人者」云云，欲言小白、陽生之屬，得國乃言人。

楚屈建帥師滅舒鳩。○屈，居勿反。

冬，鄭公孫嚙帥師伐陳。^④【疏】「公孫嚙」

云云。亦有本作「公孫萬」字者。^⑤

十有二月，吳子謁伐楚，^⑥門于巢，卒。

「門于巢，卒」者何？人門乎巢而卒也。

^①「鄭伯突入于櫟」，阮校引浦鏜云：「下當脫『傳云』。」

^②「哀公六年齊陽生之事」，杉浦校：「單疏鈔本無『公』字，『生』字。」

^③「入」，杉浦校：「單疏鈔本無。按：『入』字疑衍文。」

^④「公孫嚙」，阮校：「諸本同，唐石經本作『公孫薑』，口旁後加。疏云：『公孫嚙云云，亦有一本作『公孫萬』字者。』何焯云：『萬』當『薑』字誤。按：閩、監、毛本皆脫此疏。」

^⑤「本」上，單疏鈔本、京都本、再造善本有「一」字，義為長。

^⑥「謁」，阮校：「唐石經、諸本同。《釋文》云：『謁，《左氏》作『遏』。』按：疏本作『遏』，云『亦有一本作『謁』字者』。作『遏』則與《左氏》合，而陸氏乃區別之。義疏所據之本往往勝於《釋文》，《公羊》疏非唐人所為也。」

「入門乎巢而卒」者何？入巢之門而卒

也。以先言門，后言于巢。吳子欲伐楚，過巢，不假塗，

卒暴入巢門，門者以爲欲犯巢而射殺之。君子不怨所不

知，故與巢得殺之，使若吳爲自死文，所以彊守禦也。書

伐者，明持兵入門，乃得殺之。○謁，《左氏》作「遏」。卒

暴，七忽反。射，食亦反。【疏】「吳子遏」者，亦有一本作

「謁」字者。○「門于巢卒者何」。○解云：欲言好者，^①

舉「門于巢，卒」，欲言其殺，「卒」非殺之稱，故執不知

問。^②○「入門乎巢而卒者何」。○解云：雖加「入」

者，^③仍未分明，故更以不知問之。○注「先言門后言于

巢」者。○解云：正以先入其門，巢人乃殺，故言「門于

巢，卒」。傳云「入巢之門而卒也」者，解入于巢而卒。

吳子謁何以名？據諸侯伐人不名。傷而反，

未至乎舍而卒也。以名卒，問無事，知以傷辜死，

還就張本文伐名，^④知傷而反，卒繫巢，知未還至舍。巢

不坐殺，復見辜者，辜內當以弑君論之，辜外當以傷君論

之。○復，扶又反。【疏】「吳子謁」至「卒也」。○解

云：上七年傳云「鄭伯髡原何以名？傷而反，未至乎舍

而卒也」，已是辜傳也。今復發之者，正以彼是臣傷其

君，今此異國，因其異，故復發之。○注「以名」至「本文」。○解云：正以伐楚而書名，門于巢而言卒，其間更無事，知以傷之故，傷辜而死，是以還就于伐而書其名，爲卒張本文。云「伐名，知傷而反，卒繫巢，知未還至舍」者，正以名者，卒爵之稱，今于伐已名，知其見傷而反也。其卒之時，仍繫巢言之，故知於被傷還，未至于舍止之處而卒也。云「巢不坐殺，復見辜者」，上注云「與巢得殺」，是巢不坐殺也。言「復見辜」者，對上七年言之，故言「復」也。云「辜內當」云云者，上注云「與巢得殺之」，今見辜者，正以過國假塗，賓客之謙謹，重門設守，主人之恒備。今吳人無禮，凌暴巢國，若不與殺，開衰世諸侯得使縱橫。巢無禦備而殺人之君，若今舍之，又脫漏其罪，

①「者」，閩本作「死」。

②「問」，原作「門」，今據京都本、再造善本、閩本改。

③「者」，杉浦校：「單疏鈔本作『字』，爲是。」

④「還就張本文伐名」，阮校引惠棟云：「『伐名』二字屬上句，蓋名于伐而不名于卒，故謂知以傷辜死，爲伐名張本。疏云『伐名知傷而反卒』誤讀。」

是以何氏進退月之。^①若以殺論，巢君合絕，若以傷論，貶黜而已。云云之說，在上七年。

二十有六年，春，王二月，辛卯，衛甯喜弑其君剽。甯喜爲衛侯衍弑剽。不舉衍弑剽者，

諼成于喜。○剽，匹妙反。喜爲，于僞反，下文「爲惡」、

「曷爲」同。【疏】注「甯喜」至「剽者」。○解云：下二十七

年傳文。云「不舉衍弑剽者，諼成于喜」者，言喜若爲衍

弑剽，《春秋》舉重，宜書衍弑，今書喜者，正由諼成于喜

故也。是以下二十七年傳曰：「甯殖死，喜立爲大夫，使

人謂獻公：「黜公者，非甯氏也，孫氏爲之。吾欲納公，何

如？」是諼詐于成喜之文也。^②

衛孫林父入于戚以叛。衍盜國，林父未君

事衍。言叛者，林父本逐衍，衍入故叛。衍得誅之，猶定

公得誅季氏，故正之云爾。【疏】注「林父」至「言叛者」。

○解云：正以凡言叛者，臣盜土之辭，故如此解。云「林

父本逐衍」者，在十四年也。○注「猶定公」至「云爾」。

○解云：昔林父逐衍，衍得誅之。季氏不逐定公，而定公

得誅季氏者，正以昭公是父，父子一體，榮辱同之。季氏

逐昭公，故與定公得誅之也。知如此者，正以定公元年

「實霜殺菽」，何氏云「周十月，夏八月，微霜用事，未可殺菽。菽者少類，爲稼強，季氏象也。是時定公喜於得位，而不念父黜逐之恥，反爲淫祀立煬宮，故天示以當早誅季氏」是也。

甲午，衛侯衍復歸于衛。此諼君以弑

也，其言「復歸」何？據齊陽生至陳乞家，時書「入

于齊」，不書「復歸」。復歸者，人無惡文。【疏】注「據齊」

至「歸者」。○解云：即哀六年秋，^③「齊陽生入于齊」，傳

云「景公死而舍立，陳乞使人迎陽生于諸其家」，「諸大夫

不得已，皆再拜稽首而君之爾」是也。云「復歸者，人無

惡文」者，即桓十五年傳云「復歸者，出惡歸無惡」是也。

惡剽也。主惡剽，衛侯人無惡，則剽惡明矣。○惡剽，

烏路反，注及下「惡剽」、「以惡」并上注「故惡」、「反惡」、

「惡輕」、「以惡」皆同。曷爲惡剽？據齊陽生不書歸

①「月」，單疏鈔本、閣本「月」作「見」。杉浦校：「當作『見』。」

②「于成」，阮校引浦鏗云：「『成于』字誤倒。」

③「哀」下，杉浦校：「單疏鈔本有『公』字。」

惡舍。剽之立，於是未有說也。凡篡立，皆緣親

親也。剽以公孫立於是位，尤非其次，故衛人未有說，喜由此得成謾禍，故惡以爲戒也。篡重不書，反惡此者，因重不得書，故得惡輕，亦欲以見重。○有說，音悅，注同。以見，賢偏反，下「出見」同。【疏】注「凡篡」至「親親也」

者。○解云：正以有繼及之道故也。○云「剽以公孫立於是位，尤非其次，故衛人未有說」者。○解云：若以昭穆言之，遠於公子，故曰「尤非其次」也。昭穆既遠，復無

賢德，是以衛未有說之也。然則曷爲不言剽之立？據衛人立晉。【疏】注「據衛人立晉」者。在隱四

年。不言剽之立者，以惡衛侯也。欲起衛侯失

衆出奔，故不書剽立。剽立無惡，則衛侯惡明矣。日者，

起甯氏復納之，故出入同文也。甯喜弑君而衛侯歸，則甯氏納之明矣。以歸，出奔俱日，知出納之者同。衛侯

歸而孫氏叛，孫氏本與甯氏共逐之亦可知也。名者，起盜國。盜國明，則復歸爲惡剽出見矣。○復納，扶又反。

【疏】注「日者」至「納之」。○解云：正以《春秋》之例，歸與復歸例皆時，即僖二十八年夏，「六月，衛侯鄭自楚復歸于衛」，何氏云「復歸例皆時，此月者，爲下卒出也」是

也。今此書日，故須解之。○云「故出入同文也」者。○

解云：即十四年夏四月，「己未，衛侯衍出奔齊」。今此復日，故曰同文也。○云「盜國明」至「見矣」者。○解云：正以復歸者，出有惡，人無惡，故得爲惡剽之文。何者？衍既盜國，寧得無惡而人言復歸？知更有所見。

夏，晉侯使荀吳來聘。

公會晉人、鄭良霄、宋人、曹人于

澶淵。

秋，宋公殺其世子痤。痤有罪，故平公書

葬。○痤，在禾反。【疏】注「痤有罪」至「書葬」。○解

云：《春秋》之例，君殺無罪大夫及枉殺世子者，皆不書

葬，以明其合絕，是以申生無罪，不書獻公之葬，至昭十

一年經云「叔弓如宋，葬宋平公」者，正以痤有罪故也。①

若隱元年「鄭伯克段于鄆」，以其有罪，故去弟。痤今若

有罪，仍言世子者，正以段有當國之罪重，故如其意貶去

其弟，使如國君，氏上鄭，所以見段之惡逆矣。今痤之罪

微，不足去世子，但是合罪之科，故得存其葬矣。

① 「痤」下，杉浦校：「單疏鈔本有『今若』二字。」

晉人執衛甯喜。此執有罪，何以不得爲伯討？據甯喜弑君者，稱人而執，非伯討。【疏】注「稱人而執非伯討」者。○解云：僖四年傳文也。不以其罪執之也。明不得以爲功，當坐執人。

八月，壬午，許男甯卒于楚。○甯，乃定反。

冬，楚子、蔡侯、陳侯伐鄭。

葬許靈公。

二十有七年，春，齊侯使慶封來聘。

夏，叔孫豹會晉趙武、楚屈建、蔡公孫歸生、衛石惡、陳孔瑗、鄭良霄、許人、曹人于宋。○孔瑗，二傳作「孔免」。

衛殺其大夫甯喜。衛侯之弟鱄出奔晉。衛殺其大夫甯喜，則衛侯之弟鱄曷爲出奔晉？據與射姑同。○鱄，市轉反，又音專，一音直轉反。射，音亦，又音夜。【疏】注「據與射姑同」。○解云：即文六年「晉殺其大夫陽處父。狐射姑出奔狄」，

傳云：「晉殺其大夫陽處父，則狐射姑曷爲出奔？」①彼注云：「據蔡殺其大夫公子燮，蔡公子履出奔楚，此非同姓，恐見及。」然則今此亦據公子履出奔之事，與射姑同，故言「據與射姑同」矣。其公子履之事，在上二十年秋。執鈇鑕者，若似司弓矢，云甲革楯鑕之類。爲殺甯喜出奔也。曷爲爲殺甯喜出奔？據非同姓。○

爲殺，于僞反，下「爲殺」、「爲我」、「爲衛」，注「深爲」皆同。衛甯殖與孫林父逐衛侯而立公孫剽。甯殖病，將死，謂喜曰：「黜公者，非吾意也，孫氏爲之。」黜猶出逐。○黜公，敕律反，下文注同。我即死，②女能固納公乎？「固猶必也。喜者，殖子。殖本與孫氏共立剽，而孫氏獨得其權，故有此言。○女，音汝。喜曰：「諾。」甯殖死，喜立爲大夫，使人謂獻公曰：「黜公者，非甯氏也，孫氏爲之。吾欲納公，何如？」獻公曰：

①「狐」，原作「孤」，今據中華本、閣本改。

②「即」，阮校：「唐石經、諸本同。鄂本作「則」。」

「子苟納我，^①吾請與子盟。」盟者，欲堅固喜意。

喜曰：「無所用盟，時喜見獻公多詐，欲使公子縛保之，故辭不肯盟，曰：『臣納君，義也，無用爲盟矣。』」請

使公子縛約之。」喜素信縛，以爲縛能保獻公。獻

公謂公子縛曰：「甯氏將納我，吾欲與之盟，其言曰：『無所用盟，請使公子縛約之。』子固爲我與之約矣。」公子縛辭曰：

「夫負羈繫，繫，馬絆也。○羈繫，本又作「羈」，下陟立反，馬絆也。絆，音半。執鈇鎖，從君東西南

北，則是臣僕庶孽之事也。僕，從者。庶孽，衆賤子，猶樹之有孽生。○鈇，音甫，又方于反。^②鎖，之實

反。從君，才用反，又如字，注同。孽，魚列反，又五割反，注及下同。若夫約言爲信，則非臣僕庶孽之所敢與也。」縛見獻公多詐，不敢保。○與，音預。

獻公怒曰：「黜我者，非甯氏與孫氏，凡在爾。」欲以此語迫從，令必約之。○令，力呈反。公子

縛不得已，而與之約。已約，歸至，殺甯

喜。獻公歸至國，背約殺甯喜。○背約，音佩，下同。

公子縛挈其妻子而去之，慙慙不能保獻公。○

挈，苦結反。慙，一睡反。將濟于河，攜其妻子，

攜猶提也。而與之盟，恐乘舟有風波之害，己意不得

展，故將濟，豫與之盟。曰：「苟有履衛地，食衛

粟者，昧雉彼視。」昧，割也。時割雉以爲盟。猶曰

視彼割雉，負此盟則如彼矣。傳極道此者，見獻公無信，

刺縛兄爲彊臣所逐，^③既不能救，又移心事剽，背爲姦約。

獻公雖復因喜得反，誅之，小負未爲大惡，而深以自絕，

所謂守小信而忘大義，拘小介而失大忠。不爲君漏言

者，即漏言，當坐殺大夫，不得以正葬，正葬明喜有罪。

○昧，舊音勿，亡粉反，一音末，^④又音蔑，割也。見獻，賢

^①「子苟納我」，阮校：「唐石經作『子苟欲納我』，諸本

脫「欲」字。《石經考文提要》云：宋景德本、鄂泮官

書本、《春秋集傳釋義》皆作『子苟欲納我』。」

^②「于」，原作「丁」，今據宋本《釋文》改。

^③「縛」，原作「縛」，今據余本改。

^④「末」，原作「未」，今據余本、京都本、再造善本、閩本

徧反，下「見此」同。復，扶又反。介，音界。【疏】注「誅之」至「大忠」。^①○解云：獻公之人，甯喜之由，背賢弟之約，殺所恃之人，應爲大惡，而言小負者，正以甯氏殺逐兩君，累世同惡，雖納舊君，未足掩其前罪。今獻公違約殺之，故謂之小負。何氏必知小負者，正以下二十九年秋，「葬衛獻公」。若殺無罪大夫，例不書葬，而獻公書葬，甯喜有罪明矣。喜既有罪，則殺之者罪輕。其罪既輕，謂之小負，不亦宜乎？○注「不爲」至「有罪」。○解云：君漏言者，即文六年傳云「射殺」，^②則其稱國以殺何？君漏言也」是也。然則君漏言者，即坐殺大夫，故當去其葬。而文六年晉襄公由漏言以殺處父，而經書「公子遂如晉，葬襄公」者，正以彼經殺在葬後，是以不得去其君葬矣。

秋，七月，辛巳，豹及諸侯之大夫盟于

宋。曷爲再言豹？據盟于首戴，不再出公。【疏】

注「據盟」至「出公」。○解云：即僖五年夏，「公及齊侯、宋公」以下，「會王世子于首戴」，「秋，八月，諸侯盟于首戴」是也。殆諸侯也。殆，危也。危諸侯，故再出豹，懼錄之。曷爲殆諸侯？據首戴不殆。爲衛石

惡在是也，曰：惡人之徒在是矣。衛侯衍不信，而使惡臣石惡來，故深爲諸侯危，懼其將負約爲禍原。先見此者，衍負鱗殺喜得書葬，嫌於義絕可，欲起其小負。會、盟再出，不舉重者，方再出豹也。石惡惡者，下出奔是也。【疏】注「會盟」至「豹也」。○解云：正以文十四年夏，「公會宋公」以下，「同盟于新城」，舉盟以爲重，不言會于某。今此會、盟並舉，故須解之。

冬，十有二月，乙亥，朔，日有食之。是

後閹殺吳子餘祭，蔡世子般弑其君，莒人弑其君之應。^③

○閹殺，音昏，下音弑，二十九年同。祭，側界反。【疏】注「是後」至「之應」。○解云：即下二十九年夏五月「閹

①「注誅之至大忠」，杉浦校：「單疏鈔本作「誅之小負未爲大惡云云」。」

②「射殺」，杉浦校：「單疏鈔本「射」下有「姑」字，是也，與文六年傳合。」

③「蔡世子般弑其君莒人弑其君之應」，阮校：「諸本同。按《釋文》『閹殺』下音弑，此二「弑」字亦當作「殺」，音弑。因上有《釋文》故作「殺」，此無《釋文》故改「弑」也。」

弑吳子餘祭，^①三十年「夏，四月，蔡世子般弑其君固」，三十一年冬十月「莒人弑其君密州」是也。^②

二十有八年，春，無冰。豹、羯爲政之所致。

【疏】注「豹、羯」至「所致」。○解云：成元年「無冰」之下，注云：「《尚書》曰：『舒，恒燠若。』《易》京房傳曰：『當寒而溫，倒置也。』」^③是時成公幼少，季孫行父專權而委任之所致。即其義也。而偏指豹、羯者，正以數年以來，專見豹、羯之事，不見季孫見經，明是時豹、羯用事故也，即上二十三年「叔孫豹帥師救晉，次于雍渝」，^④二十四年「叔孫豹如晉。仲孫羯帥師侵齊」，^⑤二十七年「夏，叔孫豹會晉趙武」以下「于宋」，案下文秋「仲孫羯如晉」，二十九年「夏，仲孫羯會晉荀盈」以下「城杞」之屬是也。

夏，衛石惡出奔晉。

邾婁子來朝。

秋，八月，大雩。公方久如楚，^⑥先是豫賦于

民之所致。【疏】注「公方久如楚」。○解云：即下十一月「公如楚」，二十九年「夏，五月，公至自楚」是也。

仲孫羯如晉。

冬，齊慶封來奔。

十有一月，公如楚。如楚皆月者，危公朝夷狄也。【疏】注「如楚皆月者」。^⑦○解云：即此及昭七年「三月，公如楚」皆月之屬是也。

十有二月，甲寅，天王崩。靈王。

乙未，^⑧楚子昭卒。乙未與甲寅相去四十二

日，蓋閏月也。葬以閏數。卒不書閏者，正取替月。明

①「弑」，杉浦校：「單疏鈔本作『殺』。」

②「冬十月」，當誤，「莒人弑其君密州」在襄公三十一年十一月。

③「賞」，原作「置」，杉浦校：「單疏鈔本作『賞』。」今據成公元年注及單疏鈔本改。

④「渝」，阮校：《左氏》經作「榆」。

⑤「師」，原脫，今據中華本、閣本補。

⑥「久」，阮校：「鄂本作『欲』，此誤。」

⑦「楚」，原作「晉」，今據京都本、再造善本、閣本改。

⑧「乙未」，王引之《經義述聞》：「『乙未』當爲『己未』，甲寅爲十二月十七日，則己未當爲二十二日。『己』與『乙』字形相似，故『己』誤作『乙』。」

替三年之喪，^①始死得以閏數，非死月不得數閏。○閏數，所主反，下同。期月，居其反，又作「替」。**【疏】**注「葬以閏」至「數閏」。○解云：哀五年「閏月，葬齊景公」，傳云：「閏不書，何以書？」^②注云：「據楚子昭卒不書閏。」傳云：「喪以閏數也。」注云：「謂喪服大功以下諸喪，當以閏月爲數。」傳又云：「喪曷爲以閏數？」注云：「據卒不書閏。」傳云：「喪數略也。」注云：「略猶殺也。以月數恩殺，故并閏數。」然則大功以下，以月爲數，故得數之，故此注云「葬以閏數」。云「卒不書閏者，正取替月」者，以其取替月，故不得書閏矣。何者？以閏非正月故也。以此言之，明替三年之喪，始死在閏月得數之，何者？正以閏月者，前月之餘，故得繼前月言之。若閏不在始死之月，則不得數之，何者？替三年皆以年計，若通閏數之，則不滿替三年故也。

二十有九年，春，王正月，公在楚。何言乎公在楚？據成十一年正月公在晉，不書。

【疏】注「據成」至「不書」。○解云：即成十年「秋，七月，公如晉」，十一年「春，王三月，公至自晉」，則知正月之時，公在晉明矣。正月以存君也。正月，歲終而復

始，臣子喜其君父與歲終而復始，執贄存之，故言在。在晉不書在楚書者，惡襄公久在夷狄，爲臣子危錄之。○而復，扶又反，下皆同。惡襄，烏路反，下「惡以」同。爲臣，于僞反，下「故爲」、「爲季子」、傳「凡爲」同。**【疏】**注「臣子」至「言在」。○解云：公在國時，恒以歲首存之。今君在楚，不得行此事，故書其所在。云「在晉不書」云云者，即成十一年是也。若然，案昭三十一年、三十二年，皆云「春，王正月，公在乾侯」，何言「在晉不書」者？昭三十年注云：「閔公運潰，無尺土之居，遠在乾侯，故以存君書，明臣子當憂納之。」然則閔公失國，遠在晉地，是以書之，仍非常例也。

夏，五月，公至自楚。

庚午，衛侯衎卒。

^①「年」，原作「月」，今據余本、京都本、再造善本、中華本、閣本改。

^②「何以書」，阮校：「浦鏜云：『何』上脫『此』字。是也。」

閹弑吳子餘祭。閹者何？門人也，^①

守門人號。【疏】「閹者何」。○解云：欲言其臣，閹非臣稱，欲言非臣，而得弑吳子，^②故執不知問。刑人也。

以刑爲閹。古者肉刑，墨、劓、剕、宮，與大辟而五。孔子曰：「三皇設言民不違，五帝畫象世順機，三王肉刑揆漸加，應世黠巧姦僞多。」○劓，魚器反。剕，毗忍反。辟，婢亦反。畫象，音獲。應世，應對之應。黠，閑八反。

【疏】注「以刑」至「而五」。○解云：何氏所以必言「古者肉刑」者，正以漢文帝感女子之訴，恕倉公之罪，除肉刑之制，故指肉刑爲古者矣。知五刑爲此等者，正以《元命包》云「墨、劓、剕之屬各千，臙辟之屬五百，宮辟之屬三百，大辟之屬二百，列爲五刑，罪次三千」是也。案《周禮·司刑》職云「墨罪五百，劓罪五百，剕罪五百，宮罪五百，大辟五百」，凡二千五百，與此違者，鄭駁《異義》云「臙陶改臙爲剕」。《呂刑》有剕，周改制爲劓。然則《司刑》職，周刑也。孔子爲《春秋》，採摛古制，是以《元命包》之文與《司刑》名異，條目不同。云孔子曰「三皇設言民不違，五帝畫象世順機，三王肉刑揆漸加，應世黠巧姦僞多」者，《孝經說》文。言三皇之時，天下醇粹，其若設言，民無違者，是以不勞制刑，故曰「三皇設言民無違」。

也。其五帝之時，黎庶已薄，故設象刑以示其恥，當世之人，順而從之，疾之而機矣，^③故曰「五帝畫象世順機」也，畫猶設也。其象刑者，即《唐傳》云：「唐虞之象刑，上刑赭衣不純。」注云：「純，緣也。」時人尚德義，犯罪者但易之衣服，自爲大恥，中刑雜屨，屨，履也，下刑墨幪，幪，巾也，使不得冠飾。《周禮》罷民亦然。「上刑易三，中刑易二，下刑易一，輕重之差，以居州里而民恥之」是也。三王之時，劣薄已甚，故作肉刑以威恐之。言三王必爲重刑者，正揆度其世，以漸欲加而重之，故曰「揆漸加」也。當時之人，應其時世而爲黠巧作姦僞者彌多于本，用此之故，須爲重刑也。云云之說，^④備在《孝經》疏。刑人則曷爲謂之閹？據非刑人名。刑人非其人也。以刑人爲閹，非其人，故變盜言閹。【疏】注「以刑」

① 「人」，原作「入」，今據余本、京都本、再造善本、中華本、閩本改。

② 「弑」，杉浦校：「單疏鈔本作『殺』。」

③ 「疾之而機矣」，阮校：「諸本同。盧文弨曰：疑當作『疾如機矣』，即所謂其機如此也。」

④ 「之」，原闕，今據京都本、再造善本、中華本、閩本補。

至「言閹」。○解云：《曲禮上》篇云：「刑人不在君側。」

鄭注云：「爲怨恨爲害。」《祭統》云：「古者不使刑人守

門。」然則刑人不合爲閹，故曰「以刑人爲閹，非其人」也。

刑人弑君正合書盜，故哀四年「盜弑蔡侯申」之下，傳

云：「弑君，賤者窮諸人，此其稱盜以弑何？賤乎賤者

也。賤乎賤者孰謂？謂罪人也。」是其刑人弑君正合稱

盜之文，是以此注云「故變盜言閹」。君子不近刑

人，近刑人則輕死之道也。刑人不自賴，而用作

閹，由之出入，卒爲所殺，故以爲戒。不言其君者，公家

不畜，士庶不友，放之遠地，欲去聽所之，故不繫國。不

繫國，故不言其君。○不近，附近之近，下同。【疏】注

「刑人」至「其君」。○解云：猶言不自重，似若世人名輕

賤之物云非可賴也。又云「公家不畜，士庶不友，放之遠

地，欲去聽所之」者，出《禮記·王制》文。注「故不」至

「其君」者。言故不繫國者，謂不言吳閹也。既不繫國，

則絕君臣之義，故不言弑其君矣。

仲孫羯會晉荀盈、齊高止、宋華定、衛

世叔齊、鄭公孫段、曹人、莒人、邾婁人、滕

人、薛人、小邾婁人城杞。書者，杞時微，善能成

王者後。【疏】「衛世叔齊」。○解云：《左氏》經作「大叔儀」。

晉侯使士鞅來聘。○鞅，於丈反。

杞子來盟。貶稱子者，微弱不能自城，危社稷

宗廟，當坐。善諸侯城之，復貶者，諸侯自閔而城之，非

杞能以善道致諸侯。【疏】注「貶稱」至「當坐」。○解

云：杞是王者之後，實爲公，但《春秋》之義，假魯爲王，新

周故宋，黜杞爲伯，是以莊二十七年冬，「杞伯來朝」，注

云：「杞，夏後，不稱公者，《春秋》黜杞，新周而故宋，以

《春秋》當新王。」然則杞之常爵，正合稱伯，而稱子者，微

弱不能自城，危社稷宗廟，當坐故也。云云之說，在僖二

十三年。

吳子使札來聘。吳無君無大夫，此何

以有君有大夫？據向之會稱國。○札，側八反。

【疏】注「據向之會稱國」。○解云：即上十四年，「季孫

宿，叔老會晉士匄」以下，「會吳于向」是也。賢季子

也。何賢乎季子？據聘不足賢，而使賢有君有大

夫，「荆人來聘」是也。【疏】注「荆人來聘是也」。○釋

曰：①即莊二十三年夏，「荆人來聘」是也。然則彼亦來聘而但稱人，則知來聘之功，不足褒美，今得加文，故怪之。讓國也。其讓國奈何？謁也，餘祭也，夷昧也，與季子同母者四。與，并也，并季子四人。季子弱而才，兄弟皆愛之，同欲立之以為君。謁曰：「今若是迕而與季子國，迕，起也，倉卒意。○迕，子各反，起也。卒，七忽反。季子猶不受也。請無與子而與弟，弟兄迭為君，迭猶更也。○迭，大結反，更也。更也，音庚。而致國乎季子。」皆曰：「諾。」故諸為君者，皆輕死為勇，飲食必祝，祝，因祭祀也。《論語》曰「雖疏食、菜羹、瓜、祭」是也。②○祝，之又反，又之六反，注同。疏食，音嗣。【疏】「故諸」至「為勇」。○解云：言其或輕其死，或為勇事，即餘祭不遠刑人，③謁為巢門所殺是也。○注「論語」至「是也」。○釋曰：④《論語·鄉黨》文。言雖疏食、菜羹及瓜質薄之物，亦必祭其所先，君子有事不忘本也。引之者，證飲食有祭之義。吳子因此祭而得自祝也。曰：「天苟有吳國，猶曰「天誠

欲有吳國，當與賢弟」。【疏】注「猶曰」至「賢弟」。○釋曰：言天誠有吳而不滅之，我當將國以與賢弟也。尚速有悔於予身。尚猶努力。速，疾也。悔，咎。予，我也。欲急致國于季子意。【疏】「尚速」至「予身」。○解云：案成十七年《左氏傳》云晉士燮祈死下，何氏作《膏肓》難之曰：「休以為人生有三命，有壽命以保度，有隨命以督行，有遭命以摘暴，未聞死可祈也。昔周公之隆，天

①「注荆人來聘是也」○釋曰，「一〇」原無，據例補。阮校：「毛本『釋曰』改『解云』」。按：《周禮》、《儀禮》疏及《穀梁》疏皆稱「釋曰」，《公羊》疏稱「解云」，或後人所改，此其改之未盡者。杉浦校：「單疏鈔本作「注荆人來聘是也者」，下無「釋曰」。按：阮說非也，「釋曰」衍，此當刪去。」

②「雖疏食菜羹瓜祭是也」，阮校：「按：古《論語》作「瓜祭」，魯《論語》作「必祭」。何氏今文之學，當引作「必祭」。補校曰：「按：何於《尚書》多用伏生之學，於《論語》不可必其用魯也。」

③「即」，杉浦校：「單疏鈔本無。」

④「注論語至是也」○釋曰，杉浦校：「單疏鈔本作「注論語曰雖疏食菜羹瓜祭是也者」，無「一〇釋曰」。按：「釋曰」當刪。」

不出妖，地不出孽，陰陽和調，災害不生。武王有疾，周公植璧秉珪，願以身代，武王疾愈，周公不夭。由此言之，死不可請，偶自天祿欲盡矣，非果死。今《左氏》以爲果死，因著其事，以爲信然，於義《左氏》爲短。」然則今此謁等亦自祈死，而得難《左氏》者，《公羊》此事，直見謁等愛其友弟，致國無由，精誠之至，而願早卒，遂忘死不可祈之義矣。猶如周公代死，子路請禱之類，豈言謁等祈得死乎？而謁及餘祭之死，或入巢之門，或閹人所殺，抑亦事非天眷也，豈如《左氏》以果死爲信然，故得難之。然則季子仁者，知兄如此，何不早去？而令三君遇咎自悔者，蓋謁等但爲密謀，季子不知，是以未去耳。故謁也死，餘祭也立。故迭爲君。【疏】「故謁也死」。○解云：在上二十五年。餘祭也立，在上二十六年。餘祭也死，在今年夏。夷昧也立，在明年。夷昧也死，在昭十五年春。「季子使而反，至而君之爾」者，在昭十五年。凡爲季子之故也者，^①三君皆然，故言凡。凡者，非一之辭。餘祭也死，夷昧也立。夷昧也死，則國宜之季子者也。季子使而亡焉。僚者，長庶也，即之。緣兄弟相繼而即位，所以不書僚篡者，

緣季子之心，惡以己之是，揚兄之非，故爲之諱，所以起至而君之。○季子使，所吏反，下同。僚者，力雕反。長庶，丁丈反，下注同。季子使而反，至而君之爾。不爲讓國者，僚已得國，無讓也。^②闔廬曰：「先君之所以不與子國，而與弟者，凡爲季子故也。將從先君之命與，則國宜之季子者也。如不從先君之命與，則我宜立者也。僚惡得爲君乎？」^③於是使專諸刺僚。闔廬，

謁之長子光。專諸，膳宰。僚者炙魚，因進魚而刺之。○闔，戶臘反。廬，力居反。命與，音餘，下「命與」同。僚焉，於虔反，本又作「惡」，音烏。刺僚，七賜反，又七亦反，注同。耆，市志反。【疏】注「闔廬」至「子光」。○解

①「凡爲季子之故也者」，阮校：「闔、監、毛本作「凡爲季子故也」○解云。」

②「無讓也」，阮校：「鄂本作「無所讓」，此誤。」

③「僚惡得爲君乎」，阮校：「唐石經、鄂本同。闔、監、毛本「惡」改「焉」。按：《釋文》作「僚焉」，云「於虔反，本又作惡，音烏」，蓋據此所改。」

云：①正以上云「則我宜立」故也。云「專諸，膳宰。僚者炙魚，因進魚而刺之」者，《吳語》文。自「闔廬」以下，至「去之延陵」，皆在昭二十七年。而致國乎季子。

季子不受，曰：「爾弑吾君，②吾受爾國，是吾與爾爲篡也。爾殺吾兄，吾又殺爾，是父子兄弟相殺，終身無已也。」③兄弟相殺者，謂闔廬爲季子殺僚。○爾殺吾君，申志反，注「殺僚」同。篡，初患反。去之延陵，延陵，吳下邑。禮，公子無去

國之義，故不越竟。終身不入吳國。不入吳朝，既不忍討闔廬，義不可留事。④【疏】注「不入吳朝」。○解云：正以延陵者，竟內之邑，而言不入吳國，故以朝廷解之。故君子以其不受爲義，以其不殺爲仁。

故大其能去，以其不以貧賤苟止，故推二事與之。【疏】注「故大其能去」。○解云：言由其能去之，故君子與之。

賢季子，則吳何以有君有大夫？據其本不賢其君。以季子爲臣，則宜有君者也。⑤方以季

子賢，許使有臣有大夫，故宜有君。札者何？吳季

子之名也。《春秋》賢者不名，此何以名？

許夷狄者，不壹而足也。故降字而名。【疏】「札者何」。○解云：欲言其名，違賢者例，欲言其字，仍不足其氏，故執不知問。○「許夷狄者不壹而足也」者。○解

①「注闔廬至子光」○解云「，阮校：「閩、監、毛本改作『注闔廬謁之長子光者』。」

②「弑」，阮校：「唐石經、鄂本同，閩、監、毛本『弑』改『殺』。按：《釋文》作『爾殺吾君』，云『申志反，注『殺僚』同』。蓋據此所改，注中則諸本皆作『殺僚』。」

③「終身無已也」，王引之《經義述聞》：「家大人曰：父子、兄弟非一人，不得言終身也。『身』字蓋因下文『終身不入吳國』而衍。『終無已』者，終，竟也，竟無已時也。《檀弓》曰『爾責於人終無已夫』，《莊子·則陽篇》『其可喜也終無已』，《呂氏春秋·知度篇》『是耳目人終無已也』，文義並與此同。昭二十七年疏引此已衍『身』字，則不始于唐石經矣。《新序·節士篇》亦作『終身無已』，蓋後人據誤本《公羊》增『身』字也。」

④「可」，阮校：「鄂本無，此衍。」

⑤「則宜有君者也」，阮校：「浦鍾云：『十二年疏引作『則國宜有君者也』。』唐石經缺。以上下字數計之，當無『國』字。」

云：壹而足者，即莊二十五年「春，陳侯使汝叔來聘」是也。季子者，所賢也，曷爲不足乎季子？許人臣者必使臣，許人子者必使子也。緣臣子尊榮，莫不欲與君父共之。字季子，則遠其君，夷狄常例，離君父辭，故不足以隆父子之親，厚君臣之義。^①季子讓在殺僚後，豫於此賢之者，移諱于闔廬，不可以見讓，故復因聘起其事。○遠，于萬反。見，賢徧反。【疏】注「季子」至「見讓」。○解云：殺僚在昭二十七年夏。言移諱于闔廬者，移却季子讓國之文，諱去闔廬之殺，是以不得見其讓矣。故彼注云「不書闔廬弑其君者，爲季子諱，明季子不忍父子兄弟自相殺，讓國闔廬，欲其高之，^②故爲沒其罪也」是也。

秋，九月，葬衛獻公。

齊高止出奔北燕。○燕，音烟。

冬，仲孫羯如晉。

三十年，春，王正月，楚子使薳頗來聘。月者，公數如晉，希見答，今見聘，故喜錄之。○薳，于委反。頗，音皮，又音彼，一音普何反。一本作「跛」者，音同。二傳作「薳罷」。數，所角反。【疏】注「月

者」至「錄之」。○解云：文當言「如晉」是，若有作「如楚」字者，誤也。言「數如晉」者，即上三年春「公如晉」、四年「冬，公如晉」、八年春「公如晉」、十二年冬「公如晉」、二十一年春「公如晉」之屬是也。在位之間，五朝于晉，故言數也。言「希見答」者，上十二年「夏，晉侯使士彭來聘」、二十九年夏「晉侯使士鞅來聘」是也。魯侯五朝，而晉人再答，故謂之希。二十八年公○如楚，^③楚亦一報，故喜錄之也。案上元年「晉侯使荀罃來聘」，而解之言希者，以其公如晉之前，非答公之事故也。

夏，四月，蔡世子般弑其君固。不日者，

深爲中國隱痛有子弑父之禍，故不忍言其日。○般，音班。深爲，于僞反，下「爲伯」、「不爲」、「爲中國」同。

【疏】注「不日」至「其日」。○解云：欲道文元年「冬，十

①「故不足以隆父子之親厚君臣之義」，阮校：「何校本十二年疏引作『故不足乎季子所以隆父子之親也』，與今本異。」

②「享」，原作「高」。阮校：「浦鏜云：『享』誤『高』。浦說是也。」杉浦校：「單疏鈔本『高』作『享』。」今據昭公二十七年注及單疏鈔本改。

③「○」，杉浦校：「單疏鈔本作『一』，是。」

月，丁未，楚世子商臣弑其君髡，以其是夷狄，忍言其日也。

五月，甲午，宋災。伯姬卒。伯姬守禮，

含悲極思之所生。外災例時，此日者，為伯姬卒日。○

思，息吏反。【疏】外災「至卒日」。^①○解云：外災例

時，即莊十一年「秋，宋大水」，莊二十年「夏，齊大災」，上九年「春，宋火」之屬是也。而昭九年「夏，四月，陳火」，

書月者，正以楚人強暴，行詐枉滅，君子閔之，故特月矣。

故彼注云「月者，閔之」是也。而昭十八年「夏，五月，壬

午，宋，衛、陳、鄭災」，而盡日者，^②正以四國同日而俱災。

四國者，天下象，若曰無天下云爾，故日之。然則此不合

日而日，自為伯姬卒故日。若然，即魯女之卒，例合書

日，而莊四年「三月，紀伯姬卒」不日者，彼夏「六月，乙

丑，齊侯葬紀伯姬」，何氏云「卒不日，葬日者，魯本宜葬

之，故移恩錄文於葬」是也。以此言之，則知莊二十九年

「冬，十有二月，紀叔姬卒」，三十年「八月，癸亥，葬紀叔

姬」，亦是魯本宜葬之，故移恩錄文於葬也。

天王殺其弟年夫。王者得專殺。書者，惡失

親親也。未三年，不去王者，方惡不思慕而殺弟，不與子

行也。不從直稱君者，舉重也。莒殺意恢，以失子行錄。

設但殺弟，不能書是也。不為諱者，年夫有罪。○年夫，

音佞，又如字，二傳作「佞夫」。惡失，烏路反，下皆同。

去，起吕反。子行，下孟反，下「子行」、「其行」同。【疏】

注「王者」至「親也」。○解云：諸侯之義，不得專殺大夫。

若大夫有罪而殺之者，皆惡于專殺，是以書見。今此天

王也，自得專殺，若殺大夫，宜不書之，書者，以其未王而

殺母弟，失親親，故惡而書也。○「未三」至「子行」。^③○

解云：文九年「毛伯來求金」之下，傳云：「何以不稱使？

當喪未君也。踰年矣，何以謂之未君？即位矣，而未稱

王也。未稱王，何以知其即位？以諸侯之踰年即位，亦

知天子之踰年即位也。」注云「俱繼體，其禮不得異」，「以

天子三年然後稱王，亦知諸侯於其封內三年稱子也」。

然則靈王之崩，在二十八年十有二月，則於此時未三年

也。未合稱王，而稱王者，責其在父服之內，方當思慕而

① 「外災至卒日」，杉浦校：「單疏鈔本作『注外災云云』。按：此脫『注』字。」

② 「盡」，閣本作「書」。杉浦校：「單疏鈔本、毛本作『書』。」

③ 「未三至子行」，阮校：「閩、監、毛本『三』下衍『年』，毛本『未』上有『注』字。」

已，而殺其母弟，非人子之義，是以直稱天王，不與其子行也。而昭二十二年夏四月，景王崩，至二十三年秋七月，「天王居于狄泉」，亦未三年而稱天王者，彼傳云：「此未三年，其稱天王何？著有天子也。」何氏云「時庶孽並篡，天王失位徙居，微弱甚，故急著正其號，明天下當救其難而事之」是也。○注「不從」至「有罪」。○解云：僖

五年「春，晉侯殺其世子申生」，傳云：「曷爲直稱晉侯以殺？殺世子母弟直稱君者，甚之也。」注云：「甚之者，甚惡殺親親也。」《春秋》公子貫於先君，唯世子與母弟以今君錄，親親也。今舍國體直稱君，知以親親責之。」然則殺世子母弟者，皆直稱君甚之。今經云「天王殺其弟年夫」者，寧知不是直稱爵之例，而知天王者乃是不與子行者，正以其在父服之內而不思慕，反殺先君之子，以此爲重，故知義然。云「莒殺意恢，以失子行錄」者，即昭十四年「冬，莒殺其公子意恢」，注云「莒無大夫，書殺公子者，未踰年而殺其君之子，不孝尤甚，故重而錄之。稱氏者，明君之子」是也。云「設但殺弟，不能書是也」者，正以莒殺意恢，以其在喪內，故書而責之，則知天王殺弟，若不在喪，不書矣。若諸侯之義，不得專殺大夫，而言莒殺意恢，在喪內乃書者，正以意恢直莒子之弟，不爲大夫

故也。今此王者自得專殺，若不在喪內，何勞書乎？故云「設但殺弟，不能書是也」。云「不爲諱者，年夫有罪」者，《春秋》之義，雖言黜周而王魯，乃實天子，服內殺弟，是甚惡。何故不爲尊者諱？因年夫有罪，則王者之惡稍輕，是以《春秋》不復諱矣。

王子瑕奔晉。稱王子者，惡天子重失親親。

○重，直用反，又直勇反。【疏】注「稱王」至「親親」。○解云：正以文元年「天王使叔服來會葬」，注云「叔服，王子虎也」，「不繫王者，不以親疏錄也」。今此王子瑕言王子者，正惡天王重失親親故也。

秋，七月，叔弓如宋，葬宋共姬。外夫

人不書葬，此何以書？隱之也。何隱

爾？宋災，伯姬卒焉。說在下也。○共，音恭。

其稱謚何？據葬紀伯姬不言謚。【疏】注「據葬」至

「言謚」。○解云：即莊四年「齊侯葬紀伯姬」是也。然則

宋伯姬得稱謚者，以其賢故也。即紀伯姬不言謚者，不賢明矣。若然，案隱七年「春，王三月，叔姬歸于紀」，何氏云「叔姬者，伯姬之媵也」，「媵賤書者，後爲嫡，終有賢行。紀侯爲齊所滅」，「能處隱約，全竟婦道，故重錄之」。

然則紀叔姬亦有賢行，而莊三十年「葬紀叔姬」之經不云謚者，蓋以劣於宋伯姬，故不得與之同文。何者？能處隱約，全竟婦道，豈同守節盡誠，逮火而死乎？賢也。

何賢爾？宋災，伯姬存焉。有司復曰：

「火至矣！請出。」伯姬曰：「不可。吾聞

之也，婦人夜出，謂有事宗廟。不見傅母不下

堂。禮，后夫人必有傅母，所以輔正其行，衛其身也。

選老大夫爲傅，選老大夫妻爲母。○傅母，如字，又武侯

反，^①本又作「姆」，同。【疏】注「選老」至「爲母」。○解

云：《春秋說》文，作時王之禮。「逮乎火而死」者，爲火所

逮，環而死也。傳至矣，母未至也。」逮乎火而

死。故賢而錄其說。^②

鄭良霄出奔許。自許入于鄭。鄭人

殺良霄。

冬，十月，葬蔡景公。賊未討，何以書

葬？君子辭也。君子爲中國諱，使若加弑。月者，

弑父比髡原恥尤重，故足諱辭。○加弑，^③音試，下同。

【疏】注「君子」至「加弑」。○解云：凡君弑者，雖賊未討，

亦書其君葬，故昭十九年「夏，五月，戊辰，許世子止弑其君買」，「冬，葬許悼公」。傳云：「賊未討，何以書葬？不成于弑也。」○注「月者」至「諱辭」。○解云：即上七年冬十二月，「鄭伯髡原如會，未見諸侯。丙戌，卒于操」。傳云：「諸侯卒其封內不地，此何以地？隱之也。何隱爾？弑也。孰弑之？其大夫弑之。曷爲不言其大夫弑之？爲中國諱也。」八年「夏，葬鄭僖公」，傳云：「賊未討，何以書葬？爲中國諱也。」何氏云：「探順上事，使若無賊然。不月者，本實當去葬責臣子，故不足也。」然則案彼髡原爲大夫所弑，雖爲中國諱而書其葬，猶責不足其文。今此蔡侯爲子所弑，比於髡原爲恥尤重，是以足其諱辭，備書時月也。

晉人、齊人、宋人、衛人、鄭人、曹人、莒人、邾婁人、滕人、薛人、杞人、小邾婁人會于澶淵。宋災故。「宋災故」者何？諸侯會于澶淵，凡爲宋災故也。會未有言其

①「侯」，余本、中華本、宋本《釋文》作「候」。

②「說」，阮校：「鄂本『說』作『謚』，此誤。」

③「弑」，宋本《釋文》作「殺」。

所爲者，此言所爲何？錄伯姬也。重錄伯姬

之賢，爲諸侯所閔憂。^①○凡爲，于僞反，下及注「所爲」

同。【疏】「宋災故者何」。○解云：上下諸會不錄所爲，

唯此特書，故執不知問。諸侯相聚，聚，斂也。相聚

斂財物。而更宋之所喪，更，復也。如今俗名解浣

衣復之爲更衣。○更宋，音庚，又古孟反，復也，償也。

所喪，息浪反，下注同。浣，戶管反。曰：死者不可

復生，爾財復矣。復者，如故時。諸侯共償復其所

喪。○復生，扶又反。償，常亮反。此大事也，曷爲

使微者？據詳錄所爲故。卿也。卿則其稱人

何？貶。曷爲貶？據善事也。卿不得憂諸

侯也。時雖各諸侯使之，^②恩實從卿發，故貶起其事，

明大夫之義，得憂內，不得憂外，所以抑臣道也。宋憂

內，并貶者，非救危亡，禁作福也。【疏】注「時雖」至「其

事」。○解云：以此言之，若恩從君發而使大夫行之，雖

其非正，罪不至貶也。○注「明大」至「臣道」。○解云：

在禮，家施不及國，而言得憂內者，正謂救危亡之時，助

君憂內，不謂自專行之。以此言之，若助君憂內，以救危

之時，雖恩發大夫，不合譏。○注「宋憂」至「福也」。○

解云：言宋雖遭災，未至於滅，而恩發於大夫，外求鄰國，

近乎作福，是以禁之。^③《洪範》云：「惟辟作福，惟辟作

威。」今乃大夫行之，故云「禁作福也」。

三十有一年，春，王正月。

夏，六月，辛巳，公薨于楚宮。公朝楚，好

其宮，歸而作之，故名之云爾。作不書者，見者不復見。

○好其，呼報反。見者，賢徧反，下同。【疏】注「公朝」至

「云爾」。○解云：正以上言「公如楚」，「公至自楚」，下言

「公薨于楚宮」，故云「朝楚，好其宮，歸而作之」，故名楚

宮。○注「作不」至「復見」。○解云：哀公三年夏，「五

月，辛卯，桓宮、僖宮災」，傳云：「此皆毀廟也，其言災

①「閔」，阮校：「鄂本作『同』，此誤。」

②「各」，阮校：「鄂本作『名』，此誤。」

③「禁」，原作「楚」，今據單疏鈔本、杉浦校毛本、京都本、再造善本、閣本改。

何？復立也。曷為不言其復立？《春秋》見者不復見也。」^①何氏云：「謂內所改作也，哀自立之，善惡獨在哀，故得省文。」然則言「見者不復見」，謂《春秋》之義，諸是內所改作者，但隨其重處一過見之而已，其餘輕處不復見之。所以然者，正以哀自作之，還於哀上災之，^②善惡獨在於哀，故得省文矣。今此作楚宮，亦是襄自作之，還復襄自薨之，善惡獨在於襄，故得省文，故引彼傳云「見者不復見」也。以此言之，則知成六年「立武宮」，昭十五年「有事于武宮」，亦是內所改作而重見者。正以成公立之，至昭乃有事立之祭之者異，故不得省文。

秋，九月，癸巳，子野卒。

己亥，仲孫羯卒。

冬，十月，滕子來會葬。此書者，與叔服同

義。【疏】注「此書」至「同義」。○解云：文元年春，^③「天王使叔服來會葬」，傳云：「其言來會葬何？會葬禮也。」何氏云：「常事，書者，文公不肖，諸侯莫肯會之，故書天子之厚，以起諸侯之薄。」然則今此會葬亦是常禮，而書之者，亦是襄公不肖，諸侯莫肯會之，故書滕子之厚，以起諸侯之薄，故云「與叔服同義」矣。

癸酉，葬我君襄公。

十有一月，莒人弑其君密州。莒子納去

疾，及展立，莒子廢之。展因國人攻莒子，殺之。去疾奔齊。稱人以弑者，莒無大夫，密州為君，惡民所賤，故稱國以弑之。

監本附音春秋公羊注疏襄公卷第二十一

①「復」，原作「得」。阮校：「浦鏜云：『復』誤『得』。

按：浦說是也。」杉浦校：「單疏鈔本『得』作『復』。」今據哀公三年傳及單疏鈔本改。

②「上」，阮校引浦鏜云：「『世』誤『上』。」

③「元」，原作「九」。阮校：「浦鏜云：『元』誤『九』。按：浦說是也。」杉浦校：「單疏鈔本『九』作『元』。」

今據文公元年經及單疏鈔本改。

監本附音春秋公羊注疏昭公卷第二十二

起元年，盡十二年

何休學

元年，春，王正月，公即位。

叔孫豹會晉趙武、楚公子圍、齊國

酌、^①宋向戌、衛石惡、^②陳公子招、蔡公孫

歸生、鄭軒虎、許人、曹人于鄆。戌、惡皆與君

同名，不正之者，正之當貶，貶之嫌觸大惡，方譏二名爲

諱，義當正亦可知。○國酌，二傳作「國弱」。招，上遙

反。軒虎，軒依字許言反，舊音罕，二傳作「罕虎」。鄆，

音郭，又音號，《左氏》作「號」，《穀梁》作「郭」。【疏】「齊

國酌」。○解云：亦有作「國弱」者。○注「戌惡」至「大

惡」。○解云：下七年秋「衛侯惡卒」，十年冬「宋公戌

卒」，知向戌、齊惡皆與君同名也。然則君臣者，父子之

倫，寧有同名之理？今二子與君同名，乃是不可之甚，

而《春秋》不正之者，若正之，當去其氏，或貶稱人。若其

去氏，嫌如宋督、宋山、齊無知之屬。若其稱人，嫌如襄

三十年澶淵之大夫，有作福之大惡。由茲進退，不得正

之。然則君臣同名，不軌之甚，得不爲大惡者，正以名者

父之所置，己父未必爲今君之臣，己或先世子而生，君子

既孤，禮有不更名之義，是以《春秋》謂之小惡。《曲禮

下》篇云「不敢與世子同名」，鄭注云：「其先之生，則亦不

改。」義亦通於此。以此言之，則知無駭入極之屬，自是

大惡，故去其氏。俠卒，鞏、溺會齊師之屬，未命大夫，正

合無氏，須辟嫌故。○注「方譏」至「可知」。○解云：定

六年「冬，季孫斯、仲孫忌帥師圍運」，傳云：「此仲孫忌忌

也，曷爲謂之仲孫忌？譏二名。二名，非禮也。」何氏

云：「爲其難諱也。一字爲名，令難言而易諱，所以長臣

子之敬，不逼下也。《春秋》定、哀之間，文致太平，故見

①「齊國酌」，阮校：「唐石經、諸本同。《釋文》：『國酌，二傳作「國弱」。』按疏云：『齊國酌，亦有作「國弱」者。』是《公羊》本與二傳同。」

②「石惡」，阮校：「齊召南云：『二傳作「齊惡」是也。石惡已於襄廿八年出奔晉矣。案：《釋文》不云二傳作

「齊惡」，是《公羊》古本與二傳同。孫志祖說。」

王者治定，^①無所復爲議，^②唯有二名，故譏之，此《春秋》之制也。然則所見之世，文致太平，二名者小過，猶尚譏之，況名不辟君，乃小惡之大者乎？當須正之亦可知矣。總三世言之，昭爲大平之首，所以不譏二名，而定哀之間乃譏之者，蓋欲析而言之，未當孔子之身故也。云云之說，在定六年。此陳侯之弟招也，何以不稱弟？據八年稱弟。【疏】注「據八年稱弟」。○解云：即八年經云「春，陳侯之弟招殺陳世子偃師」是。貶。曷爲貶？據八年殺偃師猶不貶。爲殺世子偃師貶，曰「陳侯之弟招殺陳世子偃師」。大夫相殺稱人，此其稱名氏以殺何？難八年事。○爲殺，于僞反，下注「爲內」、「爲仕」皆同。難八，乃旦反，二年注同。【疏】「曰陳」至「偃師」。○解云：先舉八年經文，然後難之。○「大夫相殺稱人」。○解云：文十六年「宋人弑其君處白」之下師解，故此弟子取而難之。言將自是弑君也。明其欲弑君，故令與弑君而立者同文。孔瑗弑君，本謀在招。○令，力呈反。【疏】「言將」至「君也」。○解云：世子者，君之副貳，今而殺之，明其從是以後有弑君之心，故稱其名氏，

不作兩下相殺辭矣。○注「明其」至「同文」。○解云：兩下相殺，例自稱人。今欲明自是弑君，故與文十四年「齊公子商人弑其君舍」又同矣。^③若然，大夫相殺稱人，而宣十五年「王札子殺召伯、毛伯」，亦是大夫相殺，而不稱人殺者，彼注云「大夫相殺不稱人者，正之。諸侯大夫顧弑君重，故降稱人。王者至尊，不得顧」是也。○注「孔瑗」至「在招」。○解云：案昭八年「春，陳侯之弟招殺陳世子偃師。夏，四月，辛丑，陳侯溺卒」，竟無孔瑗弑君之文。而知孔瑗弑君者，正以八年下文「冬，十月，壬午，楚師滅陳。執陳公子招，放之于越。殺陳孔瑗。葬陳哀公」。當爾之時，楚人託討于陳，招殺世子，但適放之而已。孔瑗見殺，明其弑君故也。是以九年「陳火」之下，傳云：「滅人之國，執人之罪人，殺人之賊，葬人之君。」以此言之，知孔瑗爲弑君賊矣。而經不書孔瑗弑君者，本

①「故」，阮校：「浦鏜云：『欲』誤『故』。四年『會于申』疏同。」

②「議」，阮校：「定六年注『議』作『譏』，昭四年疏引同。」杉浦校：「單疏鈔本『議』作『譏』。」

③「又」，單疏鈔本、閣本作「文」。阮校引浦鏜云：「『文』誤『又』。」

爲招弑，當舉招爲重也，但始有計，^①不成爲弑。陳侯溺卒者，但自卒耳。何氏之意，見招作弑君之文，故知本謀在招也。本謀在招，則招當爲首，而楚人所以不殺招，但放之者，蓋楚失其意，或陳招歸罪於孔瑗，是以但罪於孔瑗，而招但罪其殺世子之愆，遂免弑君之咎。《春秋》體其事，故於殺世子經書其名氏矣。今將爾，詞曷爲與親弑者同？君親無將，將而必誅焉。

然則曷爲不於其弑焉貶？據未弑也。【疏】「今

將」至「者同」。○解云：言招但與孔瑗爲謀首，而將欲弑陳侯爾，而經曷爲書招名氏，乃與親弑者同文乎？○注

「據未弑也」。○解云：據今仍未弑而已貶去其弟，曷爲不於八年殺世子時貶之乎？以親者弑，然後其

罪惡甚。《春秋》不待貶絕而罪惡見者，不貶絕以見罪惡也。招殺偃師是也。○見者，賢徧

反，下同。【疏】「以親」至「惡也」。○解云：傳言此者，欲

道八年之時，罪惡大甚，不假貶絕也。云「《春秋》不待貶絕而罪惡見者」云云者，解之而言《春秋》者，欲道上下通例如此，不爲此文。貶絕然後罪惡見者，^②貶絕

以見罪惡也。招稱公子，及楚人討夏徵舒貶，皆是

也。【疏】注「招稱公子」。○解云：此文是也。○注「及

楚」至「徵舒」。^③○解云：即宣十一年「冬，十月，楚人殺

陳夏徵舒」，傳云「此楚子也，其稱人何？貶。曷爲貶？

不與外討」是也。今招之罪已重矣，曷爲復貶

乎此？據棄疾不豫貶。○復，扶又反。【疏】「今招」

至「乎此」。○解云：此今謂八年之時，言八年殺世子之

時，將有弑君之意，即是其罪已重矣，何不逐其重處而貶

之？曷爲又復豫貶於此？○注「據棄疾不豫貶」。○

解云：下十一年夏，「楚公子弃疾帥師圍蔡」，至十三年

夏，「楚公子弃疾弑公子比」，^④與招殺偃師無異。弃疾於

①「有」下，杉浦校：「單疏鈔本有「其」字，爲是。」

②「後」，原作「然」，今據余本、京都本、再造善本、中華本、閣本改。

③「注及楚至徵舒」，杉浦校：「單疏鈔本作「云及楚人討陳夏徵舒者」，下無「○解云」。今按：何注「夏」上無「陳」字。

④「比」，原作「此」，今據京都本、再造善本、中華本、閣本改。

圍蔡之時不豫貶，此則貶之，故以爲難也。著招之有罪也。何著乎招之有罪？據弃疾不著。言楚之託乎討招以滅陳也。起楚託討招以滅陳意也。所以起之者，八年先言滅，後言執，託討招不明，故豫貶於此，^①明楚先以正罪討招，乃滅陳也。【疏】注「所以至「陳也」」。○解云：八年經云「冬，十月，^②壬午，楚師滅陳。執陳公子招，放之于越。殺陳孔瑗。葬陳哀公」，是其先言滅，後言執之事也。言「託討招不明」者，正以若其託討，宜先執後滅，今乃先言滅，後言執，是託討不明，楚先以正罪討招，乃滅陳也。而八年經先書滅者，彼注云：「託義不先書者，本懷滅心。」然則楚人本懷滅人之心，故先書滅。而宣十一年「冬，十月，楚人殺陳夏徵舒」，「丁亥，楚子入陳」，先書討賊，乃言入陳者，莊王討賊之後，始有利陳國之意，故後書人也。

三月，取運。運者何？內之邑也。

其言取之何？據自魯之有。不聽也。不聽者，叛也。不言叛者，爲內諱，故書取以起之。不先以文德來之，而便以兵取之，當與外取邑同罪，故書取。月者，爲內喜得之。【疏】「運者何」。○解云：欲言內邑，而經

書取，欲言外邑，文無所繫，故執不知問。○注「月者爲內喜得之」。○解云：正以僖三十一年「春，取濟西田」，不書月，故知此月者，以其是內之叛邑，喜討得之故也，^③是以彼注云「以不月者，^④與取運異，知非內叛邑」，故言取是也。「秦無大夫」者，正以文十二年秋，「秦伯使遂來聘」，傳云：「秦無大夫，此何以書？賢繆公也。何賢乎繆公？其爲能變。」然則秦處西戎，罕接諸夏，賢于繆公，始有大夫，自爾以來，常多格化，《春秋》漏之，無大夫名氏。今得書見，是以據而問之。^⑤

夏，秦伯之弟鍼出奔晉。秦無大夫，此何以書？仕諸晉也。爲仕之於晉書。○鍼，其廉反。曷爲仕諸晉？據國地足以祿之。有千乘之國，十井爲一乘，公侯封方百里，凡千乘，伯四百

① 「貶」，原作「則」，今據余本、中華本、閣本改。

② 「月」，原作「年」，今據昭公八年經及中華本、閣本改。

③ 「討」，原作「封」，今據京都本、再造善本、閣本改。

④ 「者」，阮校：「浦鏜云：『者』衍。按：浦說是也。」

⑤ 「秦無大夫」至「是以據而問之」，阮校：「毛本此段

疏文八十六字在下節注下，是也，此本誤。」

九十乘，子男二百五十乘。時秦侵伐自廣大，故曰千乘。○千乘，繩證反，注同。【疏】注「公侯」至「千乘」。○解云：《王制》文。連言侯者，據有功者言之。云「伯四百九十乘」者，正以《王制》云「伯七十里」故也。云「時秦侵伐自廣大，故曰千乘」者，正以此伯故也。^①而不能容其母弟，故君子謂之出奔也。弟賢，當任用之，不肖，當安處之。乃仕之他國，與逐之無異，故云爾。

六月，丁巳，邾婁子華卒。

晉荀吳帥師敗狄于大原。此大鹵也，曷爲謂之大原？據讀言大原也。○大原，音泰，下同。鹵，力古反。【疏】「晉荀」至「大原」。○解云：案《左氏》作「大鹵」字，《穀梁》與此同。○「此大鹵」至「大原」。

○解云：案古史文及夷狄之人皆謂之大鹵，而今經與師讀皆謂之大原，故難之。○注「據讀言大原也」。○解云：時公羊子亦讀言大原也。地物從中國，以中國形名言之，所以曉中國，教殊俗也。【疏】「地物從中國」。^②○解云：言所以今經與師讀皆言大原者，正以地與諸物之名，皆須從諸夏名之故也。○注「以中」至「言之」。○解云：謂諸夏之稱，皆從地之形勢爲名。此地形

勢高大而廣平，故謂之大原。云「所以曉中國，教殊俗也」者，本史及夷狄皆謂之大鹵，而今經與師讀必謂之大原者，正以曉中國之人，教有殊俗之義故也。邑人名從主人。邑人名，自夷狄所名也。不若地物有形名可得正，^③故從夷狄辭言之。【疏】「邑人名從主人」。○解云：此主人謂夷狄也。言大原人道云之時，從其夷狄，皆謂之大鹵，故注云：「邑人名，自夷狄所名也。」○注「不若」至「言之」。○解云：諸夏地物有形名言之，夷狄之俗，不如諸夏之地物有形勢之名也。可得正者，猶言可能正，是故本史及邑人止從夷狄辭言之，謂之大鹵也。

原者何？上平曰原，下平曰隰。分別之者，

地勢各有所生，原宜粟，隰宜麥，當教民所宜，因以制貢

① 「正以此伯故也」，阮校：「閩、監、毛本同。一本作

「正以稱伯故也」，當互脫一字。」杉浦校：「單疏鈔本

「此」作「稱」。按：當從此本。」

② 「地」，原作「他」。此引經文，當作「地」，今據中華本改。

③ 「地」，原作「他」，今據余本、京都本、再造善本、閣本改。

賦。○隰，音習。別，彼列反。【疏】「原者何」。○解云：《春秋》之文既同，明是廣大之義。原、鹵名異，未有分別之言，故以不知問之。○「上平曰原」。○解云：《釋地》云：「廣平曰原。」李氏云：「廣平，謂土地寬博而平正者名原。」然則此言上平者，蓋欲對隰言之，故謂之上平，其實與《爾雅》「廣平不異」①。○「下平曰隰」。○解云：《釋地》云：「下濕曰隰。」李氏云：「下濕，謂土地窊下，但當名為隰。」②然則此言下平者，正欲對上平言之，仍與濕不異。

秋，莒去疾自齊入于莒。

莒展出奔吳。主書去疾者，重篡也。莒無大夫，書展者，起與去疾爭篡，當國出奔。言自齊者，當坐有力也。皆不氏者，當國也。不從莒無大夫去氏者，莒殺意恢稱公子，篡重，不嫌本不當氏。○去疾，起呂反。【疏】注「莒無」至「當氏」。○解云：在莊二十七年傳文。云「當國出奔」者，正以襄三十一年冬，「莒人弑其君密州」。今言去疾之人，③人者，出入惡之文，而文不氏，故知出時為當國也。既是當國，正合書人。而言自齊者，刺齊有力矣。其出奔不書者，《春秋》之義，微者出入不兩書故也。云「皆不氏者，當國也」者，正以隱元年「鄭伯

克段于鄆」之下，傳云：「何以不稱弟？當國也。」則此等下言公子者，是當國之文。注「不從」云云者，下十四年「冬，莒殺其公子意恢」，④何氏云「莒無大夫，書殺公子者，子未踰年而殺其君之子」，⑤不孝大甚，故重錄之。稱氏者，明君之子也。然則莒為小國，大夫名氏例不錄見，假有錄者，名氏不具，即莒慶之屬無氏是也。今此去疾之徒，寧知不爾？彊云當國故不當氏者，⑥正以莒殺意恢重而錄氏。今邪庶並篡，其事非輕，固宜重而錄之，但欲當國為君，故如其意，使惡逆見也。然則意恢事重，

①「平」，原作「乎」，今據京都本、再造善本、中華本、閣本改。

②「但當」，阮校引浦鏜云：「『常沮洳』三字誤『但當』。」

③「言」，原作「年」，今據京都本、閣本改。

④「其公子」，原作「莒公子」。阮校：「浦鏜云：『其公子』誤『莒公子』。浦說是也。」杉浦校：「單疏鈔本『莒公子』作『其公子』。」今據下十四年文及單疏鈔本改。

⑤「子未踰年」，阮校：「浦鏜云：『子』衍字。浦說是也。」

⑥「彊」，阮校引浦鏜云：「當『而』字誤。」

故稱公子，今亦纂重，明其未貶之時，亦合稱氏，故云「纂重，不嫌本不當氏」也。

叔弓帥師疆運田。疆運田者何？與

莒爲竟也。疆，竟也。與莒是正竟界，若言「城中

丘」。^①○疆運，居良反，下同。【疏】「疆運田者何」。

解云：欲言正界，而經書「帥師」，欲言侵伐，而道「疆運」，故執不知問。○「與莒爲竟也」。○解云：若言與莒人造

作竟界。○注「若言城中丘」。○解云：隱七年「夏，^②城

中丘」，傳云：「何以書？以重書也。」何氏云：「以功重

故書，當稍稍補完之，至令大崩弛壞敗，然後發衆城之，

猥苦百姓，空虛國家，故言城，明其功重，與始作無異。」

則彼若稍稍補完，則輕而不書，至於功重，故書而刺之。

今此魯若往前之時，少侵即正，則輕而不書，至於大損，

而興師發衆，乃能正之，明其功重，與始取無異，故若城

中丘。與莒爲竟，則曷爲帥師而往？據非侵

伐。畏莒也。畏莒有賊臣亂子，而興師與之正竟，刺

魯微弱失操，煩擾百姓。【疏】注「畏莒」至「百姓」。○解

云：襄三十一年「莒人弑其君密州」，是爲賊臣。而二子

爭篡，是爲亂子。魯人見其賊亂，恐其轉侵，是以興兵與

之正竟。賊亂之人，自救無暇，焉能轉侵乎？故云「微弱失操，煩擾百姓」也。

葬邾婁悼公。

冬，十有一月，己酉，楚子卷卒。○卷，

音權，《左氏》作「麋」。【疏】「楚子卷卒」。○解云：《左

氏》作「麋」字，二小傳本亦有作「麋」字者。^③

楚公子比出奔晉。辟內難也。【疏】注「辟內

難也」。○解云：正以更無他事，於君薨之際而出奔，故

知止應辟內難故也。

二年，春，晉侯使韓起來聘。

夏，叔弓如晉。

秋，鄭殺其大夫公孫黑。

冬，公如晉，至河乃復。其言「至河乃

復」何？據公如晉，次于乾侯，而還言「至自乾侯」，不

①「若」，原作「莒」，今據余本、中華本、閩本改。

②「七」，原作「十」。阮校：「浦鏜云：『七』誤『十』。浦

說是也。」今據隱公七年經及單疏鈔本改。

③「小」，阮校引浦鏜云：「『小』字衍。」

言「至乾侯乃復」。【疏】注「據公」至「乃復」。○解云：即下二十八年春「公如晉，次于乾侯」，二十九年「春，公至自乾侯」是也。不敢進也。乃，難辭也。時聞晉欲執之，不敢往，君子榮見與，恥見距，故諱使若至河，河水有難而反。○乃難，奴旦反，①下「有難」同。【疏】注「乃難辭也」。○解云：宣八年傳文。云「故諱使若至河，河水有難而反」者，若如川之滿，不可游也然。

季孫宿如晉。

三年，春，王正月，丁未，滕子泉卒。

【疏】滕子泉卒。○解云：《左氏》、《穀梁》作「原」字。

夏，叔弓如滕。

五月，葬滕成公。月者，襄公上葬，②諸侯莫

肯加禮，獨滕子來會葬，故恩錄之。明公當自行，不當遣大夫，失禮尤重，以責內。【疏】注「月者」至「錄之」。○

解云：卒月葬時者，小國之常典，下六年夏，「葬杞文公」之屬是也。今而書月，故以爲恩錄之。言「襄公上葬」者，謂上文葬襄公時也。言「諸侯莫肯加禮，獨滕子來會葬」者，即襄三十一年夏，「公薨于楚宮」，「冬，十月，滕子來會葬。癸酉，葬我君襄公」是也。○注「明公」至「責

內」。○解云：《公羊》之義，鄰國諸侯，及鄰國夫人喪，皆公自會葬，故《異義》《公羊》說「云：襄公三十年，叔弓如宋葬恭姬」，③議公不自行」是也。④然則凡乎諸侯之葬，公猶自行，況其加禮於己者乎？故言「失禮尤重，以責內」也。

秋，小邾婁子來朝。

八月，大雩。先是公、季孫宿比如晉。

冬，大雨雹。爲季氏。○雨，于付反。雹，步角

反。爲，于僞反。

北燕伯款出奔齊。名者，所見世著治太平，

責小國詳錄，出奔當誅。○治，直吏反。大，音泰。【疏】注「名者」至「當誅」。○解云：《春秋》之義，有三世異辭，人所見之世，小國出奔而書其名，故知義然也，即莊十年「譚子奔莒」，僖五年「弘子奔黃」，十年「溫子奔衛」，成十

①「奴」，原作「如」，今據余本、閩本、宋本《釋文》改。

②「襄公上葬」，阮校：「《穀梁》疏引作「葬襄公」，不誤。」

③「恭」，原作「葬」，今據京都本、再造善本、中華本改。

④「議」，杉浦校：「單疏鈔本「議」作「譏」。」

二年「周公出奔晉」之屬皆不名。至于此文「北燕伯款」，下三十年冬「徐子章禹出奔楚」之屬，^①皆書其名是也。言「出奔當誅」者，謂太平之世，民皆有禮，況於諸侯，不死社稷，而棄國出奔，當合誅滅矣。

四年，春，王正月，大雨雪。^②為季氏。○

大雨雪，于付反，《左氏》作「大雨雹」。為季，于偽反，下文及注「為齊誅」並同。【疏】「大雨雹」。○解云：案正本皆作「雹」字，《左氏》經亦作「雹」字，故賈氏云「《穀梁》作「大雨雪」。今此若有作「雪」字者，誤也。

夏，楚子、蔡侯、陳侯、鄭伯、許男、徐子、滕子、頓子、胡子、沈子、小邾婁子、宋世子佐、淮夷會于申。不殊淮夷者，楚子主會行義，故君子不殊其類，所以順楚而病中國。【疏】注「不殊至「中國」。○解云：內諸夏外夷狄者，《春秋》之常典。而不殊淮夷者，正以此會楚子為主會行義。其行義者，即下文「為齊誅」是也。故「君子不殊其類」者，君子謂孔子。孔子作《春秋》，不殊楚之類。孔子之意所以然者，正欲順楚之事，而病諸夏之衰微，何者？言楚夷狄，尚能行義以相榮顯，況於諸夏反不能然，故得病之。若

然，《春秋》之式，傳聞之世，內其國，外諸夏；所聞之世，內諸夏，外夷狄；所見之世，治致太平，錄夷狄。則不殊淮夷，固其宜也，何則此注云「由楚子主會行義，^③君子不殊其類」者，正以等是太平，^④亦有粗細，昭當其父，非已時事，定、哀之世，乃醇粹也。是以定六年「仲孫氏」之下，^⑤何氏云「《春秋》定、哀之間，文致太平，故見王者治定，^⑥無所復為譏，唯有二名，故譏之」是也。然則淮夷始見，安行無禮，是以此經更無進稱，未當定、哀之間，仍合外限，但由楚子主會，故得不殊，是以何氏更為立義矣。

楚人執徐子。

- ①「屬」，原作「國」，今據中華本、閩本改。
- ②「大雨雪」，阮校：「唐石經、諸本同。《經義雜記》曰：「范注《穀梁》云：「雪，或為雹。」則《穀梁》亦有作「雹」者，或據《左氏》、《公羊》言之。若今《公羊》作「雪」，《釋文》同，則誤也。」
- ③「則」，杉浦校：「單疏鈔本「則」作「得」。」
- ④「太平」，原作「太年」，今據京都本、再造善本、閩本改。
- ⑤「仲孫氏」，定公六年經及中華本、閩本作「仲孫忌」。
- ⑥「故」，阮校：「按：定六年注「故」作「欲」，此誤。」

秋，七月，楚子、蔡侯、陳侯、許男、頓子、胡子、沈子、淮夷伐吳，執齊慶封，殺之。此伐吳也，其言「執齊慶封」何？爲齊誅也。故繫之齊。其爲齊誅奈何？慶封走之吳，以襄公二十八年奔魯，自是走之吳。不書者，以絕于齊，在魯不復爲大夫，賤，故不復錄之。○不復，扶又反，^①下同。【疏】注「以襄公」至「奔魯」。○解云：即彼云「冬，齊慶封來奔」是也。○注「不書」至「錄之」。^②○解云：案如此經上言「伐吳」，則犯吳之文已著，何得注云「使防繫吳，嫌犯吳也」，正以慶封往前已封于防，爲小國矣。但諸侯之義不得專封，是以《春秋》奪言伐吳矣，實言之非伐吳矣。今日此經若言人防，則更成上「伐吳」之文，實伐吳則爲犯吳。若直言人防執齊慶封殺之，則恐防是齊邑，是以進退不得作文也。吳封之於防。不書人防者，使防繫吳，嫌犯吳也。去吳，嫌齊邑也。○去，起呂反。然則曷爲不言伐防？據防已爲國。^③不與諸侯專封也。故奪言伐吳。慶封之罪何？脅齊君而亂齊國也。道爲齊

誅意也。稱侯而執者，伯討也。月者，善義兵。^④【疏】注

「稱侯」至「討也」。○解云：僖四年傳文。上下更無稱爵

以執大夫之事，唯此一經，可以當之，故何氏言焉。若

然，案如此經不重出楚上，^⑤以爲伯討之義。僖二十一年

「秋，宋公、楚子、陳侯」以下「會于霍，執宋公以伐宋」，傳

云「曷爲不言楚子執之？不與夷狄之執中國」者，正以

此經楚子爲會主而序于上，下言執慶封殺之，可以因上

文，不勞重出也。既得因上文，即是稱爵以執之，故知爲

伯討。案霍之經，宋公序上，乃次楚子，下言執宋公，明

知不得因上文矣。既不因上文，而不更出楚子，不與夷

狄之執諸夏故也。云「月者，善義兵」也者，正以侵伐例

^①「扶又反」，原作「扶反又」，今據余本、閩本、宋本《釋文》改。

^②「注不書至錄之」，阮校：「閩、監、毛本改作『注不書至邑也』，移於『不書入防者』節注下。」

^③「已」，原作「邑」，今據余本、京都本、再造善本、中華本、閩本改。

^④「善義兵」，阮校：「五年疏引作『月者，善錄義兵』。此脫『錄』字。」

^⑤「上」，單疏鈔本、閩本作「子」。

時故也。遂滅厲。莊王滅蕭日，此不日者，靈王非賢，責之略。○滅厲，如字，又音賴，《左氏》作「賴」。【疏】「遂滅厲」。○解云：有作「賴」字者。○注「莊王」至「之略」。○解云：宣十二年「冬，十有二月，戊寅，楚子滅蕭」，彼注云「日者，屬上有王言，今反滅人，故深責之」是也。然則以靈王非賢，故責之略，還依常例書月，若似莊十年「冬，十月，齊師滅譚」之屬是。

九月，取鄆。其言取之何？據國言滅。

【疏】注「據國言滅」。○解云：即滅譚，滅遂之屬是也。滅之也。滅之則其言取之何？內大惡，諱也。因鄆上有滅文，故使若取內邑。【疏】「內大惡諱也」。○解云：隱二年無駭入極之下，傳云：「此滅也，其言人何？內大惡，諱也。」今又重發之者，正以人、取之文不同故也。○注「因鄆」至「內邑」。○解云：直言取鄆。言上有滅文者，即襄六年秋，「莒人滅鄆」是也。內取邑直言取者，上元年「三月，取運」之屬是也。言上有滅鄆之文，鄆不復爲國，因此之故，遂直言取，若似內自取邑。^①然則襄六年之時，鄆已見滅，今而言取者，彼直取後乎莒，非兵滅，是以魯人今得取之。以此言之，則無

駭入極不言取者，正以極上無滅文故也。

冬，十有二月，乙卯，叔孫豹卒。

五年，春，王正月，舍中軍。舍中軍者

何？復古也。善復古也。○舍中，音捨，下及注

同。【疏】「舍中軍」。○解云：襄十一年時，於司馬之下爲之置中卿之官，令助司馬爲軍將，添前司徒、司空之屬爲三軍，踰王制，故於彼經云「作三軍」以譏之。今還依古禮，舍司馬，不復令作將軍，故曰「舍中軍」。○「舍中軍者何」。○解云：欲言非禮，實如王制，欲言是禮，不應復書之，故執不知問。○「復古也」。○解云：正以魯爲州，^②故正舍二軍。^③今舍僭從禮，故曰復古，是以隱五年注云「方伯二師」是也。○注「善復古也」。○解云：言舍僭從禮，正是常事，而書之者，正以當時皆僭，獨自能抑從禮，善其復古，是以書之，故云「善復古」也。然則

①「自」，杉浦校：「單疏鈔本無。」

②「魯爲州」，襄公十一年疏曰：「《公羊》以爲王官之伯，宜半天子，乃有三軍。魯爲州牧，但合二軍，司徒、司空將之而已。」則此「州」當爲「州牧」之訛。

③「舍」，阮校引浦鏜云：「『舍』誤『舍』。」

曷爲不言三卿？^①據上言作三軍，等問不言軍云

卿者，上師解言三卿，因以爲難。○爲難，乃旦反，下同。

【疏】注「據上言作三軍」。○解云：弟子之意，見上文襄十一年時，云道「作三軍」，今日舍之，應言「舍三軍」，而言舍中軍，與上文異，故難之。○注「等問」至「爲難」。

○解云：襄十一年傳云：「三軍者何？三卿也。」然則今於此問，何故不云「曷爲不言舍三軍」，而言「卿」者？正以上文襄十一年時，師解以爲「三軍者何？三卿也」，是以弟子因而難之，云「曷爲不言舍三卿」。五亦有中，

三亦有中。此乃解上作三軍時意，作時益中軍，不可言中軍者，五亦有中，^②三亦有中，不知何中也。今此據上作三軍，不言中，則益三之中，舍三之中，皆可知也。

弟子本據上言作三，難下中不言三也。如師解言本益中，故下言舍中，爲其將復據下中難上不言中，故解上以解下，如此，則下不言三亦可知也。不言卿者，欲同上下文以相起。傳不足以解之者，以上解下，^③文當同亦可知。月者，善錄之。○爲，于僞反。復，扶又反。【疏】

「五亦」至「有中」。○解云：襄十一年時益司馬之職，更令將軍，正是作中，而不言作中軍者，正以五亦有中，三

亦有中。若言作中軍，嫌是五之中，故變言作三軍。若欲實而言之，正是作中軍，故至舍時云道中軍矣。○注「此乃」至「三也」。○解云：上謂襄十一年時也。云「作時益中軍」者，謂於司馬之下置中卿，令助司馬將軍，添前二軍爲三軍，故曰「作時益中軍」也。云「今此據上作三軍，不言中云三」者，^④今此公羊子據上作三軍時不言中之意，故言「五亦有中，三亦有中」也。如此則上益三之中，下舍三之中，皆可知矣。何者？上言作三軍，下言舍中軍，則非五之中亦明矣。云「弟子本據上言作三，難下中不言三也」者，即此傳云「然則曷爲不言舍三卿」是也。○注「如師」至「可知也」。○解云：「如」詰爲

① 「不言三卿」，本疏作「不言舍三卿」。

② 「五」，原作「吾」，今據余本、京都本、再造善本、中華本、閣本改。

③ 「傳不足以解之者以上解下」，阮校：「諸本同，誤也。按解云「今此傳文少，故言「傳不足解之」也。欲以上解下者」云云，則此注「足」下衍「以」字，「者」下脫「欲」字。當據以刪補。」

④ 「云三」，杉浦校：「單疏鈔本作「云云」是。」

「若」。若公羊答之云本益三之中，^①故言舍中，即恐弟子難之云今舍時言中軍，作時曷爲不言作中軍？若其如此，即是守文不察，疑惑門人，非師訓之道，故公羊子解上以解下。何者？解上作時實是中軍，但有嫌疑，不得言中，遂變言三軍，即是解此下文舍中軍不得言三之意，故云「解上以解下」。如此言之，即下文不言三軍昭然可解，故云「亦可知」。云「不言卿者，欲同上下文以相起」者，正實而言之，正是舍去司馬之職，中卿之官。何以不言舍中卿，而言舍中軍者，正以襄十一年時云「作三軍」，故欲同其文，相起爲一物。○注「傳不」至「錄之」。○解云：傳若足解之，宜云「前此作三軍之時不言中者，五亦有中，三亦有中。此舍三軍不言三者，正以前三非正稱，故舍時不得言三」。^②今此傳文少，故言「傳不足解之」也。欲以上解下者，以作時文在上，故傳特解之。上文既解訖，下文不言三之意當同上義亦可知。云「月者，善錄之」者，謂善其復古而詳錄之也。

楚殺其大夫屈申。

公如晉。

夏，莒牟夷以牟婁及防茲來奔。莒牟

夷者何？莒大夫也。莒無大夫，此何以書？重地也。其言「及防茲」來奔何？據

漆，閭丘不言「及」，高張言「及」。【疏】「莒牟夷者何」。

○解云：欲言莒君，經不言子，欲言大夫，莒無大夫，故執不知問。○注「據漆」至「言及」。○解云：言漆，閭丘不言及者，即襄二十一年春，「邾婁庶其以漆，閭丘來奔」是也。高張言及者，即哀六年「夏，齊國夏及高張來奔」是也。正以地邑無及文，上下大夫乃言及，與此防茲之義違，故難之。何者？人之尊卑，自有差等，故可以言及，

地邑無尊卑之義，恐其不得言及也。不以私邑累公邑也。公邑，君邑也。私邑，臣邑也。累，次也。義不可使臣邑與君邑相次序，故言及以絕之。

秋，七月，公至自晉。

戊辰，叔弓帥師敗莒師于潰泉。潰泉者何？直泉也。直泉者何？涌泉也。蓋戰而涌，爲異也。不傳異者，外異不書。此象公在晉，臣

① 「公羊」下，疑脫「子」字。

② 「時」，杉浦校：「單疏鈔本無。」

下專爲莒叛臣地以興兵戰鬪，^①百姓悲怨歎息，氣逆之所致，故因以著戰處，欲明天之與人相報應之義。○潰泉，

扶粉反。潰泉，踊泉也，《左氏》作「蚡泉」，《穀梁》作「賁泉」。^②處，昌慮反。應，應對之應。【疏】「于潰泉」。

○解云：《左氏》作「蚡」字，^③《穀梁》作「賁泉」字。^④○「潰泉者何」。○解云：欲言地名，以泉名之，欲言是水，戰於其處，故執不知問。○「直泉也」。○解云：謂此泉直上

而出。^⑤○「直泉者何」。○解云：欲言涌地，不應言直，欲言土地，仍謂之泉，故執不知問。○注「蓋戰」至「而涌爲異也」。

○解云：似穀洛鬪之事也。○注「不傳」至「戰鬪」。○解云：《春秋》之義，外異不書，即襄十九年不書

潞移之屬是。今此潰泉爲異，故不錄。經既不錄，傳無由發之。經若書之，傳宜云「何以書？爲天下記異」，似

若僖十四年「沙鹿崩」之傳矣。云「此象公在晉」云云者，公在晉者，即上春「公如晉」是也。「臣下專受莒叛臣地」

者，即經書「夏，莒牟夷」以下云云「來奔」，在「秋，七月，公至自晉」之上是也。「以興兵戰鬪」者，即此戰敗于潰

泉是。正以敗者，內戰之文故也。○注「百姓」至「所致」。○解云：上注云「外異」，今此云魯人悲怨致之者，

正以潰泉在莒魯界上，二國結怨，方戰於此，應而爲異，

何以不然？○注「故因」至「之義」。○解云：疏具僖三年。

秦伯卒。何以不名？據諸侯名。秦者，

夷也，匿嫡之名也。嫡子生，不以名令于四竟，擇

勇猛者而立之。○嫡之，丁歷反，注及下同。【疏】注「嫡

子」至「立之」。^⑥○解云：即《內則》云「夫告宰名，宰辯

告諸男名，書曰某年某月某日某生，而藏之。宰告閭史，

書爲二：其一藏諸閭府，其一獻諸州史，州史獻諸州伯，

州伯命藏諸州府」，是其以名令於四竟之義也。其擇勇

猛者而立之者，正以夷狄之人，不尚文德故也。其名

①「爲」，閣本作「受」，本疏亦作「受」。

②「賁」，原作「潰」，今據余本、中華本、閣本、宋本《釋文》改。

③「蚡」下，杉浦校：「單疏鈔本有『泉』字，當據補正。」

④「賁」，原作「潰」。杉浦校：「單疏鈔本『潰』作『賁』。」今據改。

⑤「泉」下，杉浦校：「單疏鈔本有『水』字，當據。」

⑥「注嫡子至立之」，杉浦校：「單疏鈔本作『注嫡子生不以名令於四竟者』。」

何？據秦伯嬰、稻名。【疏】注「據秦伯嬰稻名」。○解云：文十八年春「秦伯罈卒」，宣四年春「秦伯稻卒」是也。然則文十八年經作「罈」字，今此「嬰」字者，^①誤也。寧知非彼誤者，正以文十八年「秦伯罈卒」之下，賈氏云「穀梁傳云秦伯偃」，不道《公羊》曰「嬰」，知《公羊》與《左氏》同，皆作「罈」字矣。注「獨嬰、稻以嫡得立之」者，「嬰」字亦誤，宜爲「罈」字矣。嫡得之也。獨嬰、稻以嫡得立之。

冬，楚子、蔡侯、陳侯、許男、頓子、沈子、徐人、越人伐吳。吳未服慶封之罪故也。越稱人者，俱助義兵，意進于淮夷，故加「人」以進之。義兵不月者，進越爲義兵明，故省文。【疏】注「越稱」至「省文」。○解云：即上四年「秋，七月，楚子、蔡侯、陳侯、許男、頓子、胡子、沈子、淮夷伐吳」，彼注云：「月者，善義兵。」然則上文淮夷唯助義兵，其意不進，故不稱淮人。今稱人，故以進解之。云「義兵不月者，進越爲義兵明，故省文」者，正以侵伐例時，義兵則詳錄，故上四年「秋，七月，楚子」以下「伐吳」，注云「月者，善錄義兵」是也。今此亦爲義兵而不書月，故如此解。

六年，春，王正月，杞伯益姑卒。不日者，行微弱，故略之。上城杞已貶，復卒略之者，人所見世，責小國詳，始錄內行也。諸侯內行小失，不可勝書，故於終略責之，見其義。○復，扶又反。內行，下孟反，下同。勝，音升。見其，^②賢徧反。【疏】注「不日」至「略之」。○解云：正以襄二十三年春，「三月，己巳，杞伯益卒」，^③彼已書日，今而書月，故解之。○注「上城」至「其義」。○解云：上城已貶者，^④謂襄二十九年「夏，仲孫羯會晉荀盈、齊高止、宋華定」以下「城杞」，「杞子來盟」，注云「貶稱子者，微弱不能自城，危社稷宗廟，當坐」是也。律云：一人有數罪，則以重者坐之，然則亦不再加，而卒復略之者，正以此是人所見之世，責小國詳，始錄其內行故也。諸侯內行小失，寧可備盡，^⑤但當卒時略之而已。

①「今此」下，阮校：「當脫『作』字。」

②「其」，原作「匿」，今據中華本、閣本、宋本《釋文》改。

③「句」，原作「句」，阮校：「浦鏜云：『句』誤『句』。」

按：浦說是也。今據襄公二十三年經及閣本改。

④「城」下，阮校：「何校本有『杞』字。」

⑤「盡」，阮校引浦鏜云：「當『書』之誤。」

言「不可勝書」者，言小行非一，不可勝負，不可具書，猶如《序》云「不可勝記」之類也。何氏必此解者，正以往前經傳，不見杞伯之惡而經略之，知內行有失也。

葬秦景公。

夏，季孫宿如晉。

葬杞文公。

宋華合比出奔衛。○比，如字，又毗志反。

秋，九月，大雩。先是季孫宿如晉，是後叔弓

與公比如楚，有豫賦之煩也。○賦斂，力驗反，或無此字。【疏】注「先是」至「之煩也」。○解云：文當如是。言先是季孫宿如晉，即上文「夏，季孫宿如晉」是也。言是後叔弓與公比如楚者，即下文「冬，叔弓如楚」，七年「三月，公如楚」，故謂之比也。二年事皆在後，故云「有豫賦之煩」也。亦有一本云「叔弓如齊」者，誤。

楚薳頗帥師伐吳。【疏】楚薳頗。①○解

云：《左氏》、《穀梁》作「薳羅」字。

冬，叔弓如楚。

齊侯伐北燕。

七年，春，王正月，暨齊平。書者，善錄內

也。不出主名者，君相與平，國中皆安，故以舉國體言之。月者，刺內暨暨也。時魯方結婚于吳，外慕強楚，故不汲汲于齊。○暨，其器反。【疏】注「書者善錄內也」。○解云：正以平為善事，今而書之，故云「善錄內也」。○注「月者」至「暨也」。○解云：正以定十一年「冬，及鄭平」，則知例書時也。今此書月，故如此解也。隱元年傳云：「及猶汲汲，暨猶暨暨也。及，我欲之。暨，不得已。」然則暨暨是不獲已，然後為之，平是善事而不汲汲，故書月以刺之，故云「月者刺內暨暨」矣。○注「時魯」至「于齊」。○解云：下十年冬注云：「去冬者，蓋昭公娶吳孟子之年，故貶之。」然則十年不書冬者，是其方結婚于吳之事。②其外慕強楚者，即上文「叔弓如楚」，下文「公如楚」之屬是也。正以文不言及，故云「不汲汲于齊」矣。

①「薳頗」，閩本作「薳羅」，與本經合。

②「婚」，原作「緡」。何注曰「方結婚于吳」，則此作「緡」者誤。今據京都本、再造善本、閩本改。

注「是後楚滅陳」云云者，^①即八年「冬，十月，壬午，^②楚師滅陳」是也，及下十一年「十有一月，丁酉，楚師滅蔡」是也。云楚弑其君于乾谿者，即下十三年「夏，四月，楚公子比自晉歸于楚，弑其君于乾谿」是也。^③

三月，公如楚。

叔孫舍如齊莅盟。○叔孫舍，二傳作「婁」。

夏，四月，甲辰，朔，日有食之。是後楚滅

陳，^④楚弑君虔于乾谿。

秋，八月，戊辰，衛侯惡卒。

九月，公至自楚。

冬，十有一月，癸未，季孫宿卒。

十有二月，癸亥，葬衛襄公。當時而日

者，世子輒有惡疾，不早廢之，臨死乃命臣下廢之。自下廢上，鮮不為亂，故危錄之。○當，丁浪反，又如字。鮮，息淺反。【疏】注「當時」至「錄之」。○解云：隱三年傳云：「當時而日，危不得葬也。」今此衛侯八月卒，至此正五月，^⑤而經書癸亥，故言「危錄之」。言「世子輒有惡疾」者，即下二十年「秋，^⑥盜殺衛侯之兄輒」，傳云「母兄稱兄。兄何以不立？有惡疾也」是矣。知其不早廢，臨死

乃命臣下廢之者，正以危錄其葬故也。其若不然，更無危事，不知衛使葬何以書日乎？^⑦言「危錄之」者，以其有危，故錄其日也。

八年，春，陳侯之弟招殺陳世子偃師。

說在元年。變「其」言「陳」者，起招致楚滅陳自此始，故重舉國。○故重，直用反，年末同。【疏】注「說在元年」。○解云：即元年傳云「大夫相殺稱人，此其稱名氏以殺

①「注是後楚滅陳云云者」，阮校：「閩、監、毛本改作『注是後楚滅陳蔡』○解云」，移此以下於「日有食之」注下。」

②「午」，原作「年」，今據昭公八年經及京都本，再造善本、閩本改。

③「君」下，昭公十三年經有「虔」字。

④「是後楚滅陳」，阮校：「鄂本同，疏及閩、監、毛本下有『蔡』字，此脫。」

⑤「月」，原作「目」，今據中華本、閩本改。

⑥「二」，原作「三」。阮校：「浦鏜云：『二』誤『三』。按：浦說是也。」杉浦校：「單疏鈔本『三』作『二』。」今據昭公二十年經及單疏鈔本改。

⑦「使」，杉浦校：「單疏鈔本作『侯』。按：『使』當『侯』字誤。」

何？言將自是弑君也。今將爾，詞曷為與親弑者同？君親無將，將而必誅之屬是也。○注「變其」至「舉國」。

○解云：《春秋》之義，大夫相殺稱人。言「其」，即莊二十二年春，「陳人殺其公子禦寇」，下「陳人殺其大夫公子過」，文九年「晉人殺其大夫先都」之屬，今變兩下之例，言殺陳世子者，起招致楚滅陳自此始，是以重舉陳矣。

夏，四月，辛丑，陳侯溺卒。○溺，乃狄反。

叔弓如晉。

楚人執陳行人于徵師殺之。^①

陳公子留出奔鄭。

秋，蒐于紅。蒐者何？簡車徒也。

徒，衆。○廋，所苗反，^②本亦作「蒐」。【疏】「蒐者何」。

○解云：正以常事不書，今此見經，故執不知問。何以

書？蓋以罕書也。說在桓六年。【疏】注「說在桓

六年」。○解云：桓六年「秋，八月，壬午，大閱」，傳云：

「大閱者何？簡車徒也。何以書？蓋以罕書也。」注

云：「罕，希也。孔子曰：『以不教民戰，是謂棄之。』」故比

年簡徒，謂之蒐。三年簡車，謂之大閱。五年大簡車徒，

謂之大蒐。存不忘亡，安不忘危。不地者，常地也。蒐

例時，此日者，桓既無文德，又忽忘武備，故尤危錄。然則為蒐之法，比年作之，今此不然，故云「以罕書」。

陳人殺其大夫公子過。○過，音戈。

大雩。先是公如楚，半年乃歸，費多賦重所致。

○費，芳味反。【疏】注「先是」至「乃歸」。○解云：即去年「三月，公如楚」，「九月，公至自楚」是也。

冬，十月，壬午，楚師滅陳。執陳公子

招，放之于越。殺陳孔瑗。【疏】「殺陳孔瑗」。

○解云：《左傳》、《穀梁》作「矣」。

葬陳哀公。日者，疾詐謾滅人也。不舉滅為

重，復書三事言執者，疾謾託義，故列見之。託義不先書

者，本懷滅心。重舉陳者，上已言滅，不復重舉無以明。

○謾，況元反。復書，扶又反，下同。見，賢偏反。【疏】

注「日者」至「人也」。○解云：《春秋》之義，滅例書月，即

莊十年「冬，十月，齊師滅譚」，十三年「夏，六月，齊人滅

^①「于」，閏本作「千」。今按：《左傳》經作「千」，宋本

《釋文》：「千徵師，古丹反。」

^②「苗」，閏本、宋本《釋文》作「留」。

遂」之屬是也。上四年「秋，七月，楚子滅厲」之下，注云「莊王滅蕭日，此不日者，靈王非賢，責之略」，是以還依常例書月矣。今而日者，疾詐譖滅人故也。○注「不舉」至「見之」。○解云：《春秋》之義，舉滅爲重，是以襄六年「齊侯滅萊」之下，何氏云「不書殺萊君者，舉國滅爲重」是也。今不舉滅爲重，故須辨之。言「復書三事言執者」，謂復書三事，又言執者，以疾其詐譖託義，故須列而見之。三事，放招，殺瑗，葬哀公是。○注「託義」至「滅心」。○解云：宣十一年「冬，十月，楚人殺陳夏徵舒」，「丁亥，楚子入陳」。然則彼乃楚子行義，先書其殺，今此楚子亦是託義討賊，書在滅後者，見本懷滅心故也。○注「重舉」至「以明」。○解云：成二年「秋，七月，齊侯使國佐如師。己酉，及國佐盟于袁婁」，^①不重舉齊，此重舉陳者，上已言楚師滅陳，若不復舉陳，無以明其是陳人矣。

九年，春，叔弓會楚子于陳。陳已滅，復

見者，從地名錄，猶宋郕以邑錄。不舉小地者，顧後當存。○復見，扶又反，下同。下賢徧反。【疏】注「陳已」至「當存」。○解云：郕者，是文王之子，春秋前宋人滅之，至隱十年夏，「六月，壬戌，公敗宋師于菅」。^②辛未，取

郕。辛巳，取防」是也。云「不舉小地，顧後當存」者，言陳是總號，當是會時，未必在其國都，所以不舉小地而舉陳者，正以楚人暴滅，《春秋》欲閔陳而存之，故還舉其大號而言之。其存陳者，即下經「夏，四月，陳火」是也。

許遷于夷。

夏，四月，陳火。陳已滅矣，其言「陳火」何？^③據災異爲有國者戒。○陳火，《左氏》作「災」。【疏】陳火。○解云：《左氏》作「災」字，《穀梁》

與此同。○「陳已」至「火何」。○解云：所以不言「外災」不書，此何以書之義者，正以解言存陳，故書其火，則外災得書之義亦見矣。存陳也。陳已滅，復火者，死灰復燃之象也。此大意欲存之，^④故從有國記災。【疏】注

①「袁」，杉浦校：「單疏鈔本作「爰」。」

②「菅」，原作「管」，今據隱公十年經文及中華本改。

③「其言陳火何」，阮校：「諸本同，唐石經作「其言火何」，無「陳」字。」

④「大」，余本、鄂本作「天」，當是。

「陳已」至「記災」。^①○解云：即《考異郵》不「陳火之類，^②未當誅絕，天曉其君，死灰更燃之意」是也。曰存

陳，悌矣。書火存陳者，若曰「陳爲天所存」，悲之。○

悌，音希，悲也。【疏】「曰存陳悌矣」。○解云：悌，謂悲

也。公羊子曰：陳爲天所存者，天悲痛之故也。曷爲

存陳？據災非一，天意曷爲悲陳而存之？【疏】注

「據災」至「存之」。○解云：弟子之意，以爲《春秋》之內，

書災者非止一處而已矣，意曷爲正於此災之上，悲陳而

存之乎？^③滅人之國，執人之罪人，罪人，招也。

殺人之賊，孔瑗，弑君賊也。葬人之君，若是，

則陳存悌矣。楚爲無道，託討賊行義，陳臣子辟門虛

心待之，而滅其國。若是，則天存之者，悲之也。不書孔

瑗弑君者，本爲招弑，當舉招爲重，方不與楚討賊，故沒

招正賊文，^④以將與上貶起之。月者，閔之。○辟，婢亦

反，開也。本爲，于僞反。【疏】注「不書」至「閔之」。^⑤○

解云：案如上文，則孔瑗與招本謀弑君，而責是弑文者，

正以君親無將，將而必誅，故言「當舉招爲重」。言「故沒

招正賊文」者，謂不於討處貶招，見其有弑君之罪矣。言

「以將與上貶起之」者，上貶，謂元年稱公子，傳云「此陳

侯之弟招，何以不稱弟？貶」是也。云「月者，閔之」者，正以外災例時，即襄九年「春，^⑥宋火」之屬是，今而書月，故言閔之。

秋，仲孫矍如齊。○矍，具縛反，^⑦又居碧反。

冬，築郎囿。○囿，音又。

十年，春，王正月。

①「注陳已至記災」，杉浦校：「單疏鈔本作『注陳已滅復火者死灰復燃之象也者』，下無『解云』二字。」

②「不」，閣本作「云」，當是。

③「存」，京都本、再造善本作「有」。

④「故」，原作「於」。本疏引作「故」，是。今據余本、中華本、閣本改。

⑤「閔之」，杉浦校：「單疏鈔本作『起之』。」

⑥「九」，原作「元」。阮校：「浦鍾云：『九』誤『元』。浦說是也。」杉浦校：「單疏鈔本『元』作『九』。」今據襄公九年經及單疏鈔本改。

⑦「具」，宋本《釋文》作「俱」。

夏，晉樂施來奔。^①○晉樂施，《左氏》作「齊樂施」。

秋，七月，季孫隱如、叔弓、仲孫貜帥師伐莒。○隱如，《左氏》作「意如」。

戊子，晉侯彪卒。○彪，彼虬反。

九月，叔孫舍如晉。

葬晉平公。

十有二月，甲子，宋公戌卒。去冬者，蓋

昭公取吳孟子之年，故貶之。○宋戌，讀《左傳》者音成，^②何云「向戌與君同名」，則宜音恤。去，起呂反。

【疏】注「去冬」至「貶之」。○解云：正以《禮記》、《論語》皆有「昭公取于吳，謂之吳孟子」之文，但不指其取之年歲。今無冬者，^③無他罪可指，是以何氏以意當之，以無正文，故言蓋也。取吳孟子所以不書者，諱取同姓故也。賈，服以爲刺不登臺視氣，范氏以爲「不書冬，甯所未詳」。

十有一年，春，王正月，叔弓如宋。
葬宋平公。

夏，四月，丁巳，楚子虔誘蔡侯般，殺之于申。楚子虔何以名？據誘戎曼子不名。○戎曼，音蠻。【疏】注「據誘」至「不名」。○解云：即昭十六年春，「楚子誘戎曼子殺之」是也。絕。曷爲絕之？^④據俱誘之。爲其誘討也。^⑤使不自知而死，^⑥故加誘。○爲，于僞反。【疏】注「使不」至「加誘」。○解云：即《左氏傳》云「醉而殺之」是也。此討賊也。蔡侯般弑父而立。【疏】注「蔡侯」至「而立」。○解

①「晉樂施」，阮校：「唐石經、諸本同。《釋文》：『晉樂施，《左氏》作「齊樂施」。』孫志祖云：此非晉之樂氏，

《公羊》經文誤，當同《左氏》作「齊」。

②「讀左傳者音成」，原作「誘左傳者音皮」，今據余本、中華本、閩本、宋本《釋文》改。

③「者」，單疏鈔本、閩、監、毛本作「更」，屬下。

④「絕曷爲絕之」，阮校：「唐石經、諸本同。十三年疏引作「絕也曷爲絕之」，此脫「也」字。」

⑤「誘討」，原作「誘封」。本年注、疏及十三年疏引同作「誘討」，則此作「誘封」者誤。今據余本、京都本、再造善本、閩本改。

⑥「使」，京都本、再造善本作「徒」。

云：即襄三十年「夏，四月，蔡世子般弑其君固」是也。

雖誘之，則曷爲絕之？據與莊王外討，晉文譎

尊。○譎，古穴反。【疏】注「據與」至「譎尊」。○解云：

莊王外討者，即宣十一年「冬，十月，楚人殺陳夏徵舒」，

傳云「此楚子也，其稱人何？貶。曷爲貶？不與外討

也，「曷爲不與？實與而文不與。文曷爲不與？諸侯

之義，不得專討也。諸侯之義不得專討，則其曰實與之

何？上無天子，下無方伯，天下諸侯有爲無道者，臣弑

君，子殺父，力能討之，則討之可也」者，是其實與莊王外

討之文也。云「晉文譎尊」者，即僖二十八年「五月，癸

丑，公會晉侯」以下「盟于踐土」，「公朝于王所」，傳云「曷

爲不言公如京師？天子在是也。曷爲不言天子在是？

不與致天子也」，注云「時晉文公年老，恐霸功不成，故上

白天子曰諸侯不可卒致，願王居踐土。下謂諸侯曰天子

在是，不可不朝，迫使正君臣，明王法，雖非正，起時可

與，故書朝，因正其義。所以見文公之功」是也。懷惡

而討不義，君子不予也。內懷利國之心，而外託

討賊，故不與其討賊，而責其誘詐也。地者，起以好會誘

之。○好，呼報反。【疏】注「地者」至「誘之」。○解云：

正以昭十六年，「楚子誘戎曼子殺之」，不書地，今言于申，故解之。

楚公子棄疾帥師圍蔡。

五月，甲申，夫人歸氏薨。

大蒐于比蒲。大蒐者何？簡車徒

也。何以書？蓋以罕書也。說在桓六年。○

比，音毗。【疏】「大蒐者何」。○解云：欲言常事，而經加

「大」，欲言非常事，蒐是常獵之名，故執不知問。○注

「說在桓六年」。○解云：即桓六年「秋，八月，壬午，大

閱」，傳云：「大閱者何？簡車徒。何以書？蓋以罕書

也。」注云：「罕，希也。孔子曰：『以不教民戰，是謂棄

之。』故比年簡徒謂之蒐，三年簡車謂之大閱，五年大簡

車徒謂之大蒐，存不忘亡，安不忘危。」然則大蒐之法，五

年一爲，今此不然，故曰「以罕書」也。上八年「蒐于紅」

之下，何氏云「說在桓六年」，今復指之者，正以蒐與大蒐

希數大異，^①禮亦不同，是以不得相因，各指其所在。

① 「大」，單疏鈔本、監本、毛本作「實」。杉浦校：「按：作『實』不誤。」

仲孫纁會邾婁子盟于侵羊。不日者，蓋

諱喪盟，使若議結善事。○侵羊，二傳作「侵祥」。【疏】

「盟于浸羊」。①○解云：《穀梁傳》作「侵祥」字，服氏注

引者，直作「詳」字，「侵」字，②皆是所見異也。○注「不

日」至「善事」。○解云：上文五月「夫人歸氏薨」，君居

喪，居喪而與人盟，至十三年秋平丘之會，邾婁子與晉爲

議，不容公盟，而執季孫，理宜書日，見其不信，而不書日

者，正以身居大喪而不以爲憂，是內惡可諱之限，其爲信

辭，③使若此盟方欲議論，結其善事然。齊國酌者，賈氏

作「酌」字，與此同，服氏及《穀梁》皆作「齊國弱」字也。④

秋，季孫隱如會晉韓起、齊國酌、宋華

亥、衛北宮佗、鄭軒虎、曹人、杞人于屈

銀。⑤○佗，大河反。屈銀，並如字，二傳作「厥慙」。

【疏】「于屈銀」。○解云：《左氏》、《穀梁》作「厥慙」字。

九月，己亥，葬我小君齊歸。齊歸者

何？昭公之母也。歸氏，胡女，襄公嫡夫人。○嫡，

丁歷反。【疏】「齊歸者何」。○解云：欲言夫人，初至不錄，

欲言其妾，薨葬具書，故執不知問。○注「歸氏」至「夫人」。

○解云：皆《史記》文。而初至不書者，蓋爲世子時娶之。然

則沙隨之會，襄公始生，而成公之世已娶夫人者，案《公羊》上下，竟無幼少之文，則何氏不信《左氏》故也。

冬，十有一月，丁酉，楚師滅蔡。執蔡

世子有以歸，用之。此未踰年之君也，其

稱世子何？據陳子也。【疏】注「據陳子也」。○解

云：即僖二十八年「冬，公會晉侯、齊侯、宋公、蔡侯、鄭

伯、陳子」以下「于溫」是也。不君靈公，不成其子

也。靈公即般也。不君，不與。靈公坐弑父誅，不得爲

君也。不成其子，不成有得稱子繼父也。上不與楚誘

①「浸羊」，單疏鈔本、閩本、監本、毛本作「侵羊」。杉浦

校：「按：唐石經作『侵羊』，陸氏《釋文》亦作『侵

羊』，云『二傳作侵祥』，單疏本標注又作『侵羊』，然則

晉宋《公羊》古本作『侵羊』，當據正。」

②「侵字」，阮校：「閩、監、毛本作『無侵字』，此誤。」

③「其」，中華本、閩本作「故」。

④「齊國酌者」至「字也」，阮校：「閩、監、毛本移『齊國

酌者』二十四字於『秋季孫隱如』節經下。」

⑤「屈銀」，阮校：「唐石經、諸本同。《釋文》：『屈銀，

二傳作『厥慙』。《九經古義》云：『《說文》：『慙，從

心，秋聲。』秋讀若銀，《公羊》『厥』字多作『屈』。』

討，嫌有不當絕，故正之云耳。【疏】「不君」至「子也」。

○解云：靈公弑父而立，弑父之人，人倫所不容，今而見誅，正是其宜，是以《春秋》不與靈公爲君也，故曰「不君靈公」也。莊三十二年傳云：「君存稱世子，君薨稱子某，既葬稱子，踰年稱公。」然則稱子者，嗣君之稱。《春秋》之義，既不與靈公得爲成君，故亦不成其子有得爲嗣君，以繼其父，故曰「不成其子」也。云靈公「坐弑父誅」者，即襄三十年「夏，四月，蔡世子般弑其君固」，上四月「楚子虔誘蔡侯般，殺之于申」是也。云「上不與楚誘討」者，即上傳云「曷爲絕之？」爲其誘討也。此討賊也，雖誘之，則曷爲絕之？懷惡而討不義，故君子不與「是」。不君靈公，則曷爲不成其子？據惡惡止其身。誅君之子不立。雖不與楚誘討，其惡坐弑父誅，當以誅君論之，故云爾。言執者，時楚託義滅之。【疏】注「當以」至「云爾」。○解云：若不君靈公，而以誅君論之，何故上四年申之會，及伐吳之經，上文楚子誘殺之時，皆稱其爵者，凡貶刺之例，正可於一事之上，足見其惡而已，寧可文文皆貶，似若莊四年「冬，公及齊人狩于郕」，傳云「前此者有事矣，後此者有事矣，則曷爲獨於此譏」，

「擇其重者而譏焉，莫重乎其與讎狩也」，「其餘從同」是也。○注「言執」至「滅之」。○解云：《春秋》之義，舉滅國以爲重，其餘輕者皆從略，是以襄六年注云「不書殺萊君者，舉滅國爲重」是。今并書其執者，正以楚人託義滅之，故見其義也，似若上八年注云「不舉滅爲重，復書三事言執者，疾譏託義，故列見之」是也。楚既託義，執用蔡之世子以滅其國，當先書其餘，^①似若宣十一年「冬，十月，楚人殺陳夏徵舒」，「丁亥，楚子入陳」然。今乃先書滅蔡者，起其本懷滅心故也，是以八年注云「託義不先書者，本懷滅心」故是也。非怒也，無繼也。父誅，^②子當絕。【疏】「非怒也無繼也」。○解云：莊四年傳云：「今紀無罪，此非怒與？」何氏云：「怒，遷怒。齊人語。此非怒其先祖，遷之于子孫與？」然則齊人謂遷怒爲怒也。言今不成有爲子者，非由惡其父，遷怒其子孫，但由靈公大逆，理無繼嗣矣，是以注「父誅，子當絕」也。其「非」字有作「悲」字者，誤也。惡乎用之？用之

①「餘」，杉浦校：「單疏鈔本作『執』」。

②「父」，原作「公」。本疏引作「父」，合於文義。今據余本、京都本、再造善本、閣本改。

防也。其用之防奈何？蓋以築防也。持其足，以頭築防，惡不以道。孔子曰：「人而不仁，疾之已甚，亂也。」日者，疾，譖滅人。○惡乎，音烏。惡不，烏路反。【疏】注「日者疾譖滅人」。○解云：正以凡滅例月，即莊十年「冬，十月，齊師滅譚」，上四年秋七月「遂滅厲」之屬是也。今而書日者，疾詐譖故也。

十有二年，春，齊高偃帥師，納北燕伯于陽。伯于陽者何？即納上伯款，非犯父命，不當言「于陽」。又微國，出人不兩書，伯不當再出，故斷三字問之。○斷，丁管反，又丁亂反。【疏】注「即納」至「問之」。

○解云：納上伯款者，即上三年冬，「北燕伯款出奔齊」是也。其犯父命而見納言于邑者，即哀二年夏，「晉趙鞅帥師，納衛世子蒯聵于戚」，傳云：「戚者何？衛之邑也。曷為不言入于衛？父有子，子不得有父也。」注云「明其父得有子而廢之」，子不得有父之所有，故奪其國文，正其義也。者是也。然則今此「納北燕伯于陽」，若是納上伯款，即非犯父之命者，正以出奔稱伯，不似蒯聵稱世子故也，是以何氏於款之上連伯言之，見非犯父之命。云「又微國，出人不兩書」者，僖二十五年「秋，楚人

圍陳，納頓子于頓。②何以不言遂，兩之也」，注云「頓子出奔不書者，小國例也」是也。公子陽生也。子曰：「我乃知之矣。」子謂孔子。乃，乃是歲也。時孔子年二十三，具知其事，後作《春秋》，案史記，知「公」誤為「伯」，「子」誤為「于」，「陽」在「生」刊滅闕。○刊，苦于反。③在側者曰：「子苟知之，何以不革？」曰：「如爾所不知何？如猶奈也。猶曰：「奈女所不知何？寧可強更之乎？」此夫子欲為後人法，不欲令人妄億錯。④「子絕四：毋意，毋必，毋固，

①「其」，阮校：「按：哀二年注無「其」字，此衍。」

②「納頓子於頓」，阮校：「浦鏜云：下當脫「傳云」。是也。」

③「于」，閩本作「干」，當是。

④「億錯」，阮校：「蜀大字本、閩、監、毛本同。鄂本作「億」作「意」。《釋文》：「妄億，於力反。錯也，字或作「措」。按：《論語音義》「毋意，或於力反」，「於力反」則本作「億」，與此注合。陸氏以為非，誤也。此本「錯」字剗改，故小而偏，當本作「措」，疏標起訖作「億措」可證。閩、監、毛本疏亦改作「億錯」矣。」今按：余本作「億措」。《釋文》出音，「錯」下有「也」字。

毋我」。○女，音汝。強，其丈反。令，力呈反，下「令楚」同。億，於力反。錯，七故反，或七各反，字或作「措」。

【疏】注「如猶」至「億措」。○解云：孔子云當是歲時，我已年立，具見其事，奈汝在側之徒不見之何？故曰「奈汝所不知何」也。孔子雖知伯于陽者是公子陽生，但在側之徒皆不委曲，若改之，謂已苟出心肺，故曰「寧可彊更之乎」。莊七年「星實如雨」之下，傳云：「不修《春秋》曰：『雨星不及地尺而復。』君子修之曰：『星實如雨。』」何氏云：「明其狀似雨耳，不當言雨星。不言尺者，實則爲異，不以尺寸錄之。」然孔子修《春秋》，大有改之處，而特此文不改之者，欲示後人重其舊事，似劉公即君與爲不上禮之類也，故曰「夫子欲爲後人法，不欲人妄億措」也。億措者，億謂有所擬度，措者置也，置意於言也。不欲令人妄擬度，不欲令人妄置意於言矣。若擬度而中者無傷，即「柴也！其來乎！」由也！其死矣」之類是也。若億措而妄者，正得學者不思之義也，則「學而不思則罔」之類是也。云「子絕四」者，備於鄭注。引之者，欲道無事億措，乃孔子所絕，是以修《春秋》，而有其義矣。

《春秋》之信史也。其序，則齊桓、晉文，唯齊桓、晉文會能以德優劣、國大小相次序。【疏】注「唯

齊」至「次序」。○解云：謂其盛時事也。及其衰末亦不醇粹，^①是以僖十三年鹹之會，許男序于曹伯之上，而何氏於僖四年「許男辛臣卒」，^②「葬許穆公」之下，注云「得卒葬於所傳聞世者，許大小次曹，故卒少在曹後」者，是鹹之會，當桓末年，^③許在曹上，非其次序之事也。其會，則主會者爲之也，非齊桓、晉文，則如主會者爲之，雖優劣大小相越，不改更，信史也。^④其詞，則丘有罪焉耳。」丘，孔子名。其貶絕譏刺之辭，有所失者，是丘之罪。聖人德盛尚謙，故自名爾。主書者，惡納篡也。不書所篡出奔者，微國雖未踰年君猶不錄。不足「陽」下言「于北燕」者，史文也，^⑤北燕本在上，從史文

① 「未」，原作「未」，今據單疏鈔本、何校本、閩本、監本改。

② 「辛臣」，阮校：「閩、監、毛本『辛』作『新』。」今按：僖公四年經作「新臣」。

③ 「未」，原作「未」，今據京都本、再造善本、中華本、閩本改。

④ 「史」，余本作「文」。

⑤ 「史文也」，阮校：「閩本同，鄂本無『也』字，此衍。」

也。○惡納，烏路反。【疏】注「其貶」至「之罪」。○解云：即《春秋說》云「孔子作《春秋》，一萬八千字，九月而書成，以授游、夏之徒，游、夏之徒不能改一字」是也。云「主書者，惡納纂也」者，正以《春秋》之義，立、納、入皆爲纂辭，且上有「伯款出奔齊」之文，知今納，宜是纂人也。○注「不書」至「不錄」。○解云：正以上三年之末「伯款出奔」，遙歷十許年，計應有君矣。陽生纂之，宜書其出。今不書者，微國之君被纂而出走者，皆略而不書之。假令非被纂，但是微國，未踰年之君卒猶不書，況乎被纂出奔，寧不略之乎？何氏所以必將未踰年君約之者，正以所見之世，微國成君之出，例皆錄之故也，即伯款之徒是也。○注「不足」至「史文也」。○解云：若足其文，宜云「齊高偃帥師納北燕公子陽生于北燕」。今「陽生」之下不言「北燕」者，正以史之本文「陽生」之上有「北燕」之字，因而從之，不及改順文。楚殺其大夫成然者，①《左氏》作「成熊」，《穀梁》作「成虔」字。②

三月，壬申，鄭伯嘉卒。

夏，宋公使華定來聘。

公如晉，至河乃復。

五月，葬鄭簡公。
楚殺其大夫成然。○成然，《左氏》作「成熊」。

秋，七月。

冬，十月，公子整出奔齊。○整，之領反，

或作「慙」，魚覲反。

楚子伐徐。

晉伐鮮虞。謂之晉者，中國以無義，故爲夷狄

所強。今楚行詐滅陳、蔡，③諸夏懼然去而與晉會于屈銀，不因以大綏諸侯，先之以博愛，而先伐同姓，從親親起，欲以立威行霸，故狄之。【疏】注「謂之」至「狄之」。

①「楚殺其大夫成然者」，阮校：「閩、監、毛本刪「楚殺其大夫者」六字，移「成然左氏」十三字於「楚殺其大

夫成然」經下。」

②「虔」，當爲「虎」之誤，《穀梁》昭公十二年經作「楚殺其大夫成虎」。

③「今」，阮校：「鄂本作「令」，此本疏中兩引亦作「令」，當據以訂正。」

○解云：諸夏之稱，連國稱霸，今單言晉，作夷狄之號，^①故須解之。言中國無義，故爲夷狄所彊者，即襄七年「鄭伯髡原」之下，傳云：「曷爲不言其大夫弑之？」爲中國諱也。曷爲爲中國諱？鄭伯將會諸侯于鄆，其大夫諫曰：「中國不足歸也，則不若與楚。」鄭伯不可。其大夫曰：「以中國爲義，即伐我喪。」^②以中國爲彊，則不若楚。於是弑之。」何氏云「禍由中國無義，故深諱使若自卒」之屬，是中國無義之文也。言遂爲夷狄所彊也者，即四年「夏，楚子」以下「會于申」，「執齊慶封，殺之」之屬是也。云「令楚行詐，滅陳、蔡」者，即昭八年滅陳，十一年滅蔡是也。「令楚行詐」者，即託義討招、瑗，託義討蔡般是也。言「諸夏懼然去而與晉會于屈銀」者，即上十一年「秋，季孫隱如會晉韓起」以下「于屈銀」是也。言先伐同姓者，正以鮮虞姬姓故也。

監本附音春秋公羊注疏昭公卷第二十二

①

「號」，京都本、再造善本作「法」。

②

「即」，阮校：「襄七年疏作『則』是也。」

監本附音春秋公羊注疏昭公卷第二十三

起十三年，盡二十二年^①

何休學

十有三年，春，叔弓帥師圍費。○費，音祕。

夏，四月，楚公子比自晉歸于楚，弑其君虔于乾谿。此弑其君，其言歸何？據齊

陽生人惡不言歸。○谿，苦兮反。【疏】「此弑」至「歸何」。○解云：正以歸者，出入無惡之文。今君弑而言歸，故難之。○注「據齊」至「言歸」。○解云：即哀六年秋七月，「齊陽生入于齊」是也。其陽生人惡者，先詐致諸大夫，立於陳乞之家，自是往弑舍是也。歸無惡於弑立也。歸無惡於弑立者何？靈王爲無道，作乾谿之臺，三年不成，楚公子棄疾脅比而立之。然後令于乾谿之役曰：「比已

立矣，後歸者不得復其田里。」衆罷而去之，靈王經而死。時棄疾詐告比得晉力可以歸，^②

至而脅立之。比之義，宜效死不立，而立，君因自經，故

加弑也。言歸者，謂其本無弑君而立之意，^③加弑，^④責

之爾。不日者，惡靈王無道。封內地者，起禍所由，因以

爲戒。○罷，音皮。惡靈，烏路反。【疏】「歸無」至「立

也」。○解云：弑謂虔也。言所以書其歸者，正於弑虔之

時，比無惡。○「歸無」至「者何」。○解云：正據經書「弑

其君虔」，曷爲言無惡？故問之。○「靈王經而死」。○

解云：經者，謂懸縊而死也。若申生雉經，及《論語》云

「豈若匹夫匹婦之爲諒也，自經於溝瀆」者是也，故何氏

云「君因自經」。○注「時棄」至「爲戒」。○解云：正以經

①「二十二」，原作「二十三」，今據閣本改。

②「晉」，京都本、再造善本作「有」。今按：本疏作「有」。

③「謂」，阮校：「諸本同，誤也。鄂本『謂』作『明』，疏引注同，當據正。」

④「加弑」，阮校：「此本疏中引注作『加殺』，閩、監、毛本亦改作『弑』。」

書「自晉」，故得爲有力之義，故如此解。○云「比之義」，^①宜效死不立者，下傳文。云「言歸者，明其本無弑君而立之意，加殺，^②責之爾」者，桓十五年傳曰：「歸者，出入無惡。」故云「本無弑君而立之意」。言「加殺，責之」者，謂責其不效死而立矣。云「不日者，惡靈王無道」者，正以宣二年「秋，七月，乙丑，晉趙盾弑其君夷獯」，^③四年「夏，六月，乙酉，鄭公子歸生弑其君夷」，則《春秋》之義不問加弑與否，例皆書日。今而不日，故解之。云「封內地者，起禍所由，因爲戒」者，^④正以下二十五年「宋公佐卒於曲棘」，傳云：「曲棘者何？宋之邑。諸侯卒其封內地，此何以地？憂內也。」注云：「時宋公聞昭公見逐，欲憂納之，至曲棘而卒，故恩錄之。」然則諸侯卒其封內例不地，今此靈王見弑乾谿之由，是以書地以起之，故曰「起禍所由，因爲戒」也。

楚公子棄疾弑公子比。比已立矣，其稱公子何？據齊公子商人弑其君舍。【疏】注「據齊」至「君舍」。○解云：在文十四年九月。彼傳云：「此未踰年之君也，其言弑其君舍何？已立之，已殺之，成死者而賤生者也。」注云：「惡商人懷詐無道，故成舍之君號，以賤商人之所爲。」然則彼未踰年君，而見弑稱成君，

今比亦爲未踰年君，見弑稱公子，故據而難之。所以不據僖九年「晉里克弑其君之子奚齊」者，正以取成君之號以難公子，義強于「君之子」之文故也。其意不當也。據上傳知其脅。【疏】注「據上」至「其脅」。○解云：即上傳云「楚公子棄疾脅比而立之」是也。其意不當，則曷爲加弑焉爾？據王子朝不貶。○朝，如字。【疏】注「據王子朝不貶」。○解云：即二十三年秋，「尹氏立王子朝」，注云：「貶言尹氏者，著世卿之權。尹氏貶，子朝不貶者，^⑤年未滿十歲，未知欲富貴，不當坐，明罪在尹氏。」然則子朝之意，與此相似，子朝不貶而比加弑，故難之。比之義，宜乎效死不立。

①「故如此解」○云，京都本作「故如此」○解云，單疏鈔本「此解」二字之間空一格。杉浦校：「按：『解』字當屬下。」今按：「○云」當衍文。

②「殺」，原作「弑」，今據京都本、再造善本改。

③「獯」，原作「樛」，今據宣公二年經及中華本、閣本改。

④「爲」上，據上注文當脫「以」字。

⑤「子」，原作「于」，今據京都本、再造善本、中華本、閣本改。

大夫相殺稱人，此其稱名氏以弑何？據經

言「弑公子比」也。【疏】「比之」至「不立」。^①○解云：即

守死善道，若王子閭之類也。○「大夫」至「稱人」。○解

云：即文十六年冬，「宋人弑其君處白」之下，傳云「大夫

弑君稱名氏，賤者窮諸人」，注云：「賤者謂士也，士正自

當稱人。」「大夫相殺稱人，賤者窮諸盜」，注云：「降大夫

使稱人，降士使稱盜者，所以別死刑有輕重也。」然則文

十六年師有成解，故此弟子取而難之。○注「據經」至

「比也」。○解云：經言「弑公子比」，即是兩下相殺之文，

而稱棄疾名氏，是以據而難之。言將自是為君也。

故使與弑君而立者同文也。不言「其」者，比實已立，嫌

觸實公子，棄疾則楚子居也。^②【疏】「言將」至「君也」。

○解云：謂棄疾從是殺比之後，遂代比為君矣。○注「故

使」至「文也」。○解云：同文也，^③即文十四年秋九月，

「齊公子商人弑其君舍」是也。○注「不言」至「公子」。

○解云：莊二十二年春，「陳人殺其公子禦寇」，注云「書

者，殺君之子，重也」。下十四年「冬，莒殺其公子意恢」。

然則彼二公子見殺言「其」，今公子比實已立訖，若言「殺

其公子比」，則嫌觸彼二公子文，故曰「嫌觸實公子」。云

「棄疾即楚子居也」者，即下二十六年秋，「楚子居卒」

是也。

秋，公會劉子、晉侯、齊侯、宋公、衛

侯、鄭伯、曹伯、莒子、邾婁子、滕子、薛伯、

杞伯、小邾婁子于平丘。八月，甲戌，同盟

于平丘。不舉重者，起諸侯欲討棄疾，故詳錄之。不

言「劉子及諸侯」者，間無異事可知矣。【疏】注「不舉」至

「錄之」。○解云：文十四年「六月，公會宋公」以下，「同

盟于新城」。然則彼亦是二事，舉盟為重，不言會于某，

今會、盟並舉，故須解之，故云「諸侯欲討棄疾」。以上有

棄疾弑君之事，下傳有「諸侯遂亂」之言，故知於間詳錄

此會，欲討之矣。○注「不言」至「知矣」。○解云：《春

秋》之義，會、盟咸有而間隔事者，則重言諸侯，即定公四

①「至」，原作「義」，今據京都本、再造善本、中華本改。

②「則」，阮校：「閩、監、毛本作『即』，疏同。」

③「注故使至文也」○解云同文也，杉浦校：「單疏鈔本

作「注故使與弑君而立者同文也」，無「○解云」。

按：「○解云」當衍文。」

年「三月，公會劉子、^①晉侯」以下「于召陵，侵楚」，夏四月，「蔡公孫歸姓帥師滅沈，以沈子嘉歸，殺之」，「五月，公及諸侯盟于浩油」。然則彼由間有隔事，劉子不與盟，是以重出諸侯。今則間無隔事，劉子復與盟，是以不勞重出劉子及諸侯，見其可知矣。

公不與盟。○與，音預，注二「不肯與」及下文

「不與焉」，注「公不與」、「不宜與」皆同。【疏】「公不與盟者何」。^②○解云：正以盟會詳錄即爲善事，^③而公不與

盟，於義似違，故執不知問。晉人執季孫隱如以

歸。公至自會。公不與盟者何？公不見

與盟也。時晉主會，疑公如楚，不肯與公盟，故諱使若

公自不肯與盟。【疏】注「時晉」至「與盟」。○解云：須言

「時晉主會」者，^④正以此會劉子在其間，故須辨之。知非

劉子主會者，正以當時天子微弱故也。知「疑公如楚，不

肯與公盟」者，正以上七年「三月，公如楚」，「九月，公至

自楚」之文。十一年「公如晉，至河乃復」，是其見疑，不

得人晉故也。公不見與盟，大夫執，何以致

會？據得意乃致會。【疏】注「據得意乃致會」。○解

云：即莊六年注云：「公與二國以上出會盟，得意致會，

不得意不致。」今此平丘之經，亦是公與二國以上出會盟之事，故言「據得意乃致會」也。若欲伯事言之，即哀十三年夏，「公會晉侯及吳子于黃池」，^⑤「公至自會」是也。不恥也。曷爲不恥？據扈之會公失序恥之。^⑥

【疏】注「據扈之會」至「恥之」。^⑦○解云：即文七年「秋，八月，公會諸侯，晉大夫盟于扈」，傳云：「諸侯何以不序？大夫何以不名？公失序也。公失序奈何？」^⑧諸侯不可使與公盟，跌晉大夫使與公盟也。」何氏云「爲諸

^①「會」，原作「子」，今據京都本、再造善本、中華本、閣本改。

^②「公不與盟者何」，阮校：「此本此節疏在『公不與盟』之下，閩本、監本、毛本移於『公不與盟者何』之下。」

^③「詳」，京都本、再造善本作「並」。

^④「須」，疑「注」字之訛。

^⑤「池」，原作「他」，今據哀公十三年經及中華本、閣本改。

^⑥「恥」，原作「又」，今據余本、中華本、閣本改。

^⑦「之會」，阮校：「閩、監、毛本刪。」

^⑧「公」，杉浦校：「單疏鈔本無『公』字，下『何氏云』之下有『公』字。」

侯所薄賤，不見序，故深諱爲不可知之辭」是也。諸侯

遂亂，反陳、蔡，蔡，君子恥不與焉。^①時諸侯將征

棄疾，棄疾乃封陳、蔡之君，使說諸侯，諸侯從陳、蔡之君言還反，不復討楚，楚亂遂成，故云爾。公不與盟，不書成楚亂者，時不受盟也。^②諸侯實不與公盟，而言公不與盟者，遂亂，雖見與，公猶不宜與也，故因爲公張義。○復，扶又反。爲公，于僞反。【疏】注「棄疾」至「之君」。

○解云：即下文是也。○注「公不」至「賂也」。○解云：《春秋》之義，諱內惡。故隱五年「春，公觀魚于棠」，傳云：「何以書？譏。何譏爾？遠也。」何氏云：「實譏張魚而言觀，譏遠者，恥公去南面之位，下與百姓爭利，匹夫無異，故諱使若以遠觀爲譏也。」然則公若與盟，即成楚亂，便是內惡，例諱不書。今公不與盟，不書楚亂者，正以時不受賂，是以不得書其成亂矣。桓二年春，「公會齊侯、陳侯、鄭伯于稷，以成宋亂」。「夏，四月，取郕大鼎于宋」，「戊申，納于太廟」。傳云：「何以書？譏。何譏爾？」遂亂受賂，納于太廟，非禮也。」然則彼以受賂之故，書其成宋亂，今不受賂，是以不書成楚亂決之。^③《春秋》之義，爲內諱大惡，而桓公受賂而成宋亂，不爲之諱者，彼注云「宋公馮與督共弑君而立，諸侯會于稷，欲

共誅之，受賂便還，令宋亂遂成。桓公本亦弑隱而立，君子疾同類相養，小人同惡相長，故賤不爲諱也」者是也。○注「諸侯」至「張義」。○解云：上注云「故諱使若公自不肯與之盟」，今又言此者，正以諸侯遂亂，是以魯侯不肯與之盟。然則上下二注，彌縫爲義，非別解。「云因爲公張義」者，謂書公不與盟者，非直爲國諱，因見諸侯遂亂大惡，公亦不宜與，故言因爲公張義也。

蔡侯廬歸于蔡。陳侯吳歸于陳。此

皆滅國也，其言歸何？據歸者有國辭。○廬，力

吳反。【疏】注「據歸者有國辭」。○解云：即僖三十年

①「君子恥不與焉」，阮校：「唐石經、諸本作『君子不恥不與焉』，此本脫上『不』字。」

②「時不受盟也」，阮校：「諸本作『時不受賂也』，疏引桓二年傳『受賂』以證之。此本作『受盟』，『盟』字剗改。今按：疏曰『正以時不受賂』，疏引起訖亦作『賂』。但推究文義，作『盟』爲長。」

③「以不」，原作「不以」，單疏鈔本、京都本、再造善本作「以不」。杉浦校：「當作『以不』。」今據改。

秋，「衛侯鄭歸于衛」之屬是也。^①不與諸侯專封

也。故使若有國自歸者也。名者，專受其封，當誅。書

者，因以起楚封之。^②所以能起之者，上有存陳文，陳見

滅，無君所責。^③又蔡本以篡見殺，但不成其子，不絕其

國，即諸侯存之，^④當有文實也。【疏】「不與」至「封也」。

○解云：宜言「不與楚專封」，而云「不與諸侯專封」者，宣

十一年傳云：「此楚子也，其稱人何？諸侯之義，不得專

討也。」是楚得言諸侯之義矣。而舊云楚子初無封陳、蔡

之意，但畏諸侯之誅，遂許封陳、蔡之子孫，陳、蔡為之請

于諸侯，諸侯止不伐楚，楚乃封陳、蔡。然則陳、蔡得封，

本由諸侯，故傳言諸侯以明之也，無疑焉。○注「名者」

至「當誅」。○解云：諸侯之式，不合生名。今陳、蔡之

君，既已稱爵，而書名者，正以諸侯之封，宜受于天子，而

受國于楚，故名之，見當誅討，不合為諸侯矣。○注「書

者」至「實也」。○解云：言主書此事者，非直惡陳、蔡之

君，不受天子之命，亦固以起楚封之。所以能起楚之封

者，正以上九年「夏，四月，陳火」，傳云：「陳已滅矣，其言

陳火何？存陳也。」注云：「陳已滅，復火者，死灰復燃之

象也。此天意欲存之，故從有國記災。」故曰「上有存陳

- 君可責。而火之者，天意作死灰復燃之象，見陳國合存之意。言「蔡本以篡見殺」者，即襄三十年「夏，四月，蔡世子般弑其君固」，至上十一年「夏，四月，丁巳，楚子虔誘蔡侯般，殺之于申」是也。言「但不成其子」者，即上十一年冬十有一月，「楚師滅蔡。執蔡世子有以歸，用之」，傳云「未踰年之君，其稱世子何？不君靈公，不成其子」是也。子者，嗣君之稱，謂不成其子有得稱嗣君以繼其父矣。^⑤言「不絕其國」者，正以書滅是也。何者？僖五年「晉人執虞公」之下，傳云：「虞已滅矣，其言執之何？」
- ①「侯」，原作「滅」，杉浦校：「單疏鈔本作「侯」。今據僖公三十年經及單疏鈔本改。」
- ②「因」，阮校：「此本疏引作「固」。」
- ③「無君所責」，阮校：「鄂本同，疏及閩、監、毛本作「無君無所責」。」
- ④「存之」，京都本、再造善本作「存陳」。阮校：「按解云：『非謂上會諸侯墾地封之，若是上會諸侯墾地封之，當如救邢、城楚丘之屬，傳亦有文實之文。』然則「存之」當作「封之」矣。」
- ⑤「有」上，疑脫「不成」二字。昭公十一年傳「不成其子也」，注云：「不成其子，不成有得稱子繼父也。」

不與滅也。曷爲不與滅？滅者亡國之善辭。」注云「言王者起當存之，故爲善辭」也。傳云：「滅者，上下同力者也。」注云「言滅者，臣子與君戮力一心，其死之辭」是也。然則何氏言此者，欲道陳、蔡皆舊有國，二君之子復先在楚，楚人封之，而遂反國，^①故得言歸，非謂上會諸侯埤地封之。若是上會諸侯埤地封之，當如救邢、城楚丘之屬，傳亦有文實之文。若作文實之文，宜云「城陳、蔡」，傳云「孰城之？諸侯城之。曷爲不言諸侯城之？不與諸侯專封。曷爲不與？實與而文不與。文曷爲不與？諸侯之義，不得專封。諸侯之義不得專封，則其曰實與之者，上無天子，下無方伯，天下諸侯有相滅亡者，^②力能存之，則存之可也」。

冬，十月，葬蔡靈公。書葬者，經不與楚討，

嫌本可責復讎，故書葬，明當從誅君論之，不得責臣子。
【疏】注「書葬」至「臣子」。○解云：隱十一年傳云：「然則何以不書葬？」^③《春秋》君弑賊不討，不書葬，以爲無臣子也。然則靈公上十一年爲楚誘殺，未見復讎之文，而書其葬者，正以上十一年經不與楚討，若不書其葬，即嫌可以責蔡臣子無復讎之義，是以書葬。靈公本者弑父而立，^④當從誅君論之，不得責臣子復讎於楚矣。言「經

不與楚討」者，即上十一年傳云「楚子虔何以不名？」^⑤絕也。^⑥曷爲絕之？爲其誘討也。此討賊，雖誘之，曷爲絕之？懷惡而討不義，君子不與」是也。

公如晉，至河乃復。

吳滅州來。不日者，略兩夷。^⑦【疏】注「不日

者略兩夷」。○解云：上四年秋，七月，「遂滅厲」，注云：「莊王滅蕭日，此不日者，靈王非賢，責之略。」然則吳子

①「而」，杉浦校：「單疏鈔本作「因」。」

②「亡」，原作「云」，今據京都本、再造善本、中華本、閣

本改。

③「然」，阮校引浦鏜云：「『弑』誤『然』。」

④「者」，阮校：「閩、監、毛本刪。按：『者』字當在「靈公」下。」

⑤「不」，阮校引浦鏜云：「衍字。」

⑥「也」，阮校：「十一年傳無『也』字。」

⑦「不日者略兩夷」，阮校：「解云：『考諸舊本，「日」亦有作「月」字者。《春秋》上下減例書月，然則爲「日」字者誤。』按：三十年「冬，十有二月，吳滅徐」，疏引此注云：「不月者，略兩夷。」此處疏本仍作「日」。」

夷昧兄弟立謀讓位季子，即爲賢者，而反滅人，宜亦書日以責之，而不日者，正以兩夷相滅，故略之。考諸舊本，「日」亦有作「月」字者。若作「月」字，當云《春秋》上下，滅例書月，即莊十年「冬，十月，齊師滅譚」，十三年「夏，六月，齊人滅遂」之屬是。今此不月，略兩夷故也。是以下三十年十二月，「吳滅徐」之下，而注云「至此乃月者，所見世始錄夷狄滅小國也。不從上州來，巢見義者，因有奔文可責」是也。^①以此言之，則知此文無月明矣。文承十月之下，而言無月者，謂不在十月內也。然則爲「日」字者，誤。云云之說，在三十年。

十有四年，春，隱如至自晉。

三月，曹伯滕卒。

夏，四月。

秋，葬曹武公。

八月，莒子去疾卒。入昭公卒不日。不書葬

者，本纂，故因不序。○去，起呂反。【疏】注「入昭」至「不序」。○解云：《春秋》之義，所傳聞之世，略於小國，不書其卒。至所聞之世，乃始書之，即文十三年「邾婁子薳餘卒」之徒是也。至所見之世，文致大平，書小國而錄

之，卒月葬時。^②即下二十八年「秋，七月，癸巳，滕子甯卒。冬，葬滕悼公」之屬是也。今此莒君，入昭公所見之世，宜令卒日葬時，而卒不日，復不書其葬者，正由其本是篡人，故因略之，不序其卒日，亦不序其葬矣。其本纂者，即上元年「秋，莒去疾自齊入于莒」是也。然則《春秋》之義，纂明者例書其葬，即衛晉、鄭突、齊小白、陽生之徒是。今此去疾於上元年秋亦有「自齊入于莒」之文，即是纂明，例合書葬，但以本纂，故固不序。^③然則入昭公所見之世，小國之卒，例合書日，而上「三月，曹伯滕卒」亦不日者，莊二十三年冬十一月，「曹伯射姑卒」之下，何氏云：「曹伯達於《春秋》，當卒月葬時也。如卒日

① 「因有奔文可責」，三十年注作「固有出奔可責」。

② 「卒月葬時」，疏云「即下二十八年『秋，七月，癸巳，滕子甯卒。冬，葬滕悼公』之屬是也」，卒記日，葬書時。又疏下文云「入昭公所見之世，宜令卒日葬時」，則此當作「卒日葬時」。

③ 「固」，單疏鈔本、閩本、監本、毛本作「因」。

葬月，嫌與大國同，故復卒不日。人所聞世，可日不復日。^①然則曹伯終生於桓十年時，以《春秋》敬老重恩之故，而得卒日葬月，以為大平，是以人所見之世，雖例可日，亦不復日，是故上文上曹伯不書日矣。^②

冬，莒殺其公子意恢。

莒無大夫，書殺公子者，未踰年而殺其君之子，不孝尤甚，故重而錄之。稱氏者，明君之子。○恢，苦回反。【疏】注「莒無大夫」。○解云：莊二十七年傳文。○注「稱氏」至「之子」。○解云：小國大夫假令得見，皆不書氏，即莒慶之徒是也。今兼書公子者，欲明其是君之子故也。若言莒殺意恢，無以明嗣子不孝。

十有五年，春，王正月，吳子夷昧卒。

○夷昧，音末，^③本亦作「末」。

二月，癸酉，有事于武宮。籥人，叔弓

卒，去樂，卒事。其言「去樂，卒事」何？據

人者言萬，去籥言名，不言卒事。○籥，羊略反。去樂，

起呂反。注「去籥」及下文「去樂」同。【疏】注「據人」至

「卒事」。○解云：即宣八年夏六月，「辛巳，有事于大廟。

仲遂卒于垂」，「壬午，猶繹」，^④萬人去籥」是也。然則彼乃

人者言萬，此則人者言籥，彼則去籥言名，此則漫言去樂而已。彼又不言卒事，與此異，是故弟子據而難之。禮也。以加錄卒事，即非禮，但當言去樂而已，若去籥矣，總言樂者，明悉去也。君有事于廟，聞大夫之喪，去樂，恩痛不忍舉。卒事。畢其祭事。^⑤大夫聞君之喪，攝主而往。主，謂己主祭者。臣聞君之喪，義不可以不即行，故使兄弟若宗人，攝行主事而

①「曹伯達於」至「可日不復日」，杉浦校：「單疏鈔本「當作「常」。阮校：「按：此「常」誤「當」，「始」誤

「如」，「後」誤「復」。今按：此疏文與莊公二十三年冬十一月「曹伯射姑卒」下何注多有不合，其云：「曹達《春秋》，常卒月葬時也。始卒日葬月，嫌與大國同，後卒而不日。入所聞世，可日不復日。」

②「上曹伯」，阮校引浦鏗云：「當作「卒曹伯」。」

③「末」，原作「未」。《釋文》下曰「本亦作「未」」，則作「末」是也，否則「亦」字無所著落。今據閣本及宋本《釋文》改。

④「繹」，原作「釋」，杉浦校：「單疏鈔本「釋」作「繹」。今據宣公八年經及單疏鈔本改。

⑤「其」，阮校：「閩、監、毛本作「竟」。」

往。不廢祭者，古禮也。古有分土無分民，大夫不世，己父未必爲今君臣也。《孝經》曰：「資于事父以事君，而敬同。」【疏】注「主謂」至「臣也」。○解云：謂己於廟內主其祭事者矣。云「古有分土無分民」，知如此者，正以《詩》云「誓將去汝」，^①適彼樂土，《論語》云「四方之民繹負其子而至矣」之言故也。云「大夫不世」者，謂凡乎大夫也，不得以有功德大夫難之。○注「孝經」至「敬同」。○解云：何氏之意，以資爲取，言取事父之道以事君，所以得然者，而敬同故也。以此言之，則何氏解《孝經》，與鄭稱同，^②與康成異矣。云云之說，在《孝經》疏。大夫聞大夫之喪，尸事畢而往。賓尸事畢而往也。日者，爲卒日。○爲，于僞反。【疏】注「賓尸」至「往也」。○解云：正以禮，大夫祭謂之賓尸故也。云「日者，爲卒日」者，正以《春秋》之義，失禮鬼神例日。今非失禮，知日爲卒。

夏，蔡昭吳奔鄭。不言出者，始封名言歸，^③

嫌與天子歸有罪同，故奪其有國之辭，明專封。○昭吳，《左氏》作「朝吳」。【疏】夏蔡昭吳奔鄭。○解云：《左氏》、《穀梁》皆言「朝吳出奔鄭」，今此作「昭吳」字，又不

言「出」者，所見之文異。案《左氏》、《穀梁》皆以朝吳爲蔡大夫，則知此昭吳亦爲蔡大夫矣。而舊解以昭吳爲蔡侯廬之字者，^①似非何氏之意。○注「不言」至「專封」。

○解云：今此昭吳出奔鄭，不言出者，正以其君始封之時名書歸，即上十三年「蔡侯廬歸于蔡」是也。云「嫌與天子歸有罪同」者，謂書名言歸者，乃與天子歸有罪之文近相似，故以爲嫌。何者？僖公二十八年夏，「六月，衛侯鄭自楚復歸于衛」，注云「言復歸者」，「刺天子歸有罪矣」。冬，「曹伯襄復歸于曹」，而注云：「曹伯言復歸者，天子歸之。名者，與衛侯鄭同義。」然則天子歸有罪者書

①「誓」，阮校引浦鏜云：「『逝』誤『誓』。」

②「鄭稱」，阮校：「浦鏜云：『鄭稱』當『孔傳』之誤。梁

玉繩云：鄭偁爲魏侍中，有答魏武帝金縢之問，見《續後漢書·輿服志》注。又《魏志》延康元年注引

《魏略》言「偁篤學大儒，爲武德侯叡傳」，叡即魏明帝也。丁杰云：《孝經》鄭注，據此處疏文，非康成，亦非小同，當是鄭偁。孫志祖云：徐彥疏云「與鄭偁同，與康成異」，則偁與康成爲二家明矣。」

③「言歸」，阮校：「疏作『書歸』。」

④「廬」，杉浦校：「單疏鈔本作『廬』。」

名言歸，向上「蔡侯廬歸于蔡」，亦有罪歸，故言嫌與天子歸有罪同，非謂確然相似。^①言「故奪其有國之辭」者，正以君子之歸有所嫌，故奪其昭吳有國之辭，不言其出矣。云「明專封」者，欲明其蔡侯爲楚所專封矣。吳既受諸侯之專封，不合有國，故不言大夫之出，奪其國文以見之。

六月，丁巳，朔，日有食之。并十七年食，

蓋與孛于大辰同占。【疏】注「并十」至「同占」。○解云：謂此文「日有食之」，并十七年「夏，六月，甲戌，朔，日有食之」，皆與十七年「有星孛於大辰」同占也。其占者，則「孛大辰」之下，注云「是後周分爲二，天下兩主，宋南里以亡」是也。

秋，晉荀吳帥師伐鮮虞。

冬，公如晉。

十有六年，春，齊侯伐徐。

楚子誘戎曼子，殺之。楚子何以不

名？據誘蔡侯名。○戎曼，音蠻，又音萬，二傳作「戎蠻」，哀四年同。【疏】注「據誘蔡侯名」。○解云：即上十一年夏，「楚子虔誘蔡侯般，殺之于申」是也。夷狄相

誘，君子不疾也。曷爲不疾？據俱誘也。若不疾，乃疾之也。以爲固當常然者，乃所以爲惡也，

顧以無知薄責之。戎曼稱子者，人昭公，見王道太平，百蠻貢職，夷狄皆進至其爵。不日者，本不卒。不地者，略也。○見，賢徧反。【疏】注「戎曼」至「其爵」。○解云：

上四年申之會，伐吳再見淮夷，五年冬「越人伐吳」，一見越人。所見之世而不進之者，君子因事見義故也。何者？淮夷與越，蓋遣大夫會，此是君，因可進而進之。且昭公之時，文致大平，實不治定，但可張法而已，寧可文皆進乎？○注「不日者本不卒」。○解云：上十一年「夏，四月，丁巳，楚子虔誘蔡侯般，殺之于申」，書其丁巳。今亦誘殺而不日者，正以戎曼乃是夷狄之內最爲微國，雖於大平之世亦不合卒，是故《春秋》因略之，不書其日矣。云「不地者，略也」者，正以蔡侯誘殺，經書「于申」，今此不地，故言略也。

夏，公至自晉。

秋，八月，己亥，晉侯夷卒。

①「確」，阮校：「何校本同，閩、監、毛本作『確』。」

九月，大雩。先是公數如晉。○數如，音朔。

季孫隱如如晉。

冬，十月，葬晉昭公。

十有七年，春，小邾婁子來朝。

夏，六月，甲戌，朔，日有食之。

秋，鄆子來朝。

八月，晉荀吳帥師滅賁渾戎。^①○賁渾，

音六，下戶門反。

冬，有星孛于大辰。孛者何？彗星

也。三字皆發問者，或言人，或言于，或言方，嫌爲孛

異，猶問錄之。○星孛，音佩。彗，息遂反，又囚歲反。

【疏】「孛者何」。○解云：欲言星名，星名未有孛，欲言非星，錄爲星稱，故執不知問。○注「三字」至「錄之」。○

解云：言三字皆發問者，即文十四年「秋，七月，有星孛入

于北斗」，傳云：「孛者何？彗星也。其言入于北斗何？

北斗有中也。何以書？記異也。」哀十三年「冬，十有一

月，有星孛於東方」，傳云：「孛者何？彗星也。其言于東方何？見于旦也。何以書？記異也。」并此三處皆

言「孛者何」，故言「三字皆發問」也。所以三處皆問之者，正以文十四年經言「入于北斗」，此經言「于大辰」，哀十三年經言「于東方」，三文甚異，即嫌爲孛之不同，是以處處猶發問而詳錄之，故云「或言人，或言于，或言方，嫌爲孛異，猶問錄之」。其言「于大辰」何？據北斗

言「入于」，「大辰」非常名。【疏】注「據北斗言入于」。○

解云：正以此經不言「入」，直言「于」，^②故據「入」而難

之。^③云「大辰非常名」者，正以東方七宿皆謂之辰，故曰大辰非七宿之常名，而經舉之，因以爲難也。在大辰

也。大辰者何？大火也。大火謂心。【疏】「大

辰者何」。○解云：正以大辰之名非一而已，不知何者，

故執不知問。○注「大火謂心」。○解云：《左氏傳》「心

爲大火」是也。^④而《釋天》云「柳，鶉火」者，正以柳在南

方，亦可爲出火之候故也，不謂心星非大火，然則《爾雅》

①「賁渾戎」，阮校：「《穀梁》『賁』作『陸』，《左氏》作『陸渾之戎』。」

②「直」，原作「宜」，今據單疏鈔本及閣本改。

③「故」，原作「北」，今據單疏鈔本改。

④「左氏」上，杉浦校：「單疏鈔本有『即』字。」

不言心爲大火者，文不備也。大火爲大辰，伐爲

大辰，伐，謂參伐也。大火與伐，天所以示民時早晚，天

下所取正，故謂之大辰。辰，時也。○參，所林反。【疏】

「大火爲大辰」。○解云：即《釋天》云「大火謂之大辰」，

李氏云：「大火，蒼龍宿之心，以候四時，故曰大辰。」孫

氏、郭氏云「大火，心也。在中最明，故時候主焉」是也。

○注「伐謂參伐也」。○解云：正以伐在參傍，與參連體

而六星，故言「伐謂參伐」，伐與參爲一候故也。北辰

亦爲大辰。北辰，北極，天之中也，常居其所，迷惑不

知東西者，須視北辰以別心伐所在，故加「亦」。亦者，兩

相須之意。○別，彼列反。【疏】注「北辰北極」。○解

云：即《釋天》云「北極謂之北辰」，李氏云：「北極，天心，

居北方，正四時，謂之北辰。」孫氏、郭氏曰「北極，天

中，以正四時，謂之北辰」是也。云「天中也」者，以天面

言之故也。然則謂之極者，取於居中之義矣。而《春秋

說》云「北者，高也。極者，藏也。」^①言大一之星，高居深

藏，故名北極也」者，與先儒說違，其何氏兩解乎？云

「常居其所」者，謂常居紫微宮所矣。何以書？記

異也。心者，天子明堂布政之宮，亦爲宇。彗者，邪亂

之氣，掃故置新之象，是後周分爲二，天下兩主，宋南里以亡。○邪，似嗟反。【疏】注「心者」至「之宮」。○解

云：《春秋說》文。《星經》亦云。云「亦爲宇」者，亦如北

斗爲彗所宇矣。○注「是後」至「以亡」。○解云：言周分

爲二，天下兩主者，謂敬王在成周，王猛居王城，故下二

十二年「秋，劉子、單子以王猛入于王城」，傳云：「王城者

何？西周也。」何氏云：「時居王城邑，自號西周王。」^②

經又言「冬，十月，王子猛卒」，二十三年秋，^③「尹氏立王

子朝」。然則王猛卒後，子朝復篡，恒與敬王處据相拒，^④

故云「周分爲二，天下兩主」也，是以《運斗樞》云「星宇賊

起，守大辰於五堂，亂兵填門，三王爭，周以分」是也。然

①「北者高也極者藏也」，阮校：「按：『高』、『藏』字疑互誤。」

②「自」，原作「目」，今據京都本、再造善本、阮本、閣本改。

③「三年」，原作「二年」。阮校引浦鏜云：「『三年』誤『二年』。」今據昭公二十三年經及單疏鈔本改。

④「處拒」，阮校：「疑『居處』之誤，或當爲『處據』。」

「拒」，京都本作「指」。

則彼有三王爭者，^①通前後言之。今此云「周分爲二，天下兩主」者，正以子猛、子朝之篡是一也。言「宋南里以亡」者，即下二十一年夏，「宋華亥、向寧、華定自陳入于宋南里以畔」是也。

楚人及吳戰于長岸。詐戰不言戰，此其言戰何？據於越敗吳于醉李。○「醉李」音醉，本或作「醉」。敵也。俱無勝負，不可言敗，故言戰也。

不月者，略兩夷。【疏】「詐戰」至「戰何」。○解云：經文言戰，而傳以詐戰問之者，正以夷狄質薄，不能結日偏戰。今此兩夷而言戰，故以詐戰難之。○注「據於」至「醉李」。○解云：在定十四年夏也。彼此皆是兩夷，無言戰之經，是以據而難之。○注「不月者略兩夷」。○解云：正以《春秋》之例，偏戰者日，詐戰者月。今此詐戰而不月，故言略兩夷。

十有八年，春，王三月，曹伯須卒。

夏，五月，壬午，宋、衛、陳、鄭災。何以書？記異也。何異爾？異其同日而俱災也。外異不書，此何以書？爲天下

記異也。^②《詩》云：「其儀不忒，正是四國。」四國，天

下象也。是後王室亂，諸侯莫肯救，故天應以同日俱災，若曰無天下云爾。○爲，于僞反。忒，他得反。^③應，應對之應。【疏】「記異也」。○解云：經言災者，以其焚宗廟、朝廷故也。傳云異者，正以四國同日而俱災。○注「四國天下象也」。○解云：正以四國得爲四方之國，故得謂之天下象。○注「是後王室亂諸侯莫肯救」。○解云：即下二十二年夏六月，「王室亂」，傳云「何言乎王室亂」，注云：「據天子之居稱京師。」「言不及外也」，注云「宮謂之室。刺周室之微弱，邪庶並篡，無一諸侯之助、匹夫之救，如一家之亂也，故變京師言王室」，「不爲天子諱者，方責天下不救之」者，是王室亂，諸侯莫肯救之事也。

六月，邾婁人入郕。○郕，音禹，又音矩。

秋，葬曹平公。

冬，許遷于白羽。

①「有」，杉浦校：「單疏鈔本作「言」。」

②「異」，阮校：「鄂本作「災」。」

③「他」，原作「官」，今據閣本、宋本《釋文》改。

十有九年，春，宋公伐邾婁。

夏，五月，戊辰，許世子止弑其君買。

蔡世子般弑父不忍日，此日者，加弑爾，非實弑也。【疏】

注「蔡世」至「弑也」。○解云：即襄三十年「夏，四月，蔡

世子般弑其君固」，何氏云「不日者，深為中國隱痛，有子

弑父之禍，故不忍言其日」是也。然則許亦中國而言日

者，正以加弑，非實弑故也。知加弑者，下傳備文。若夷

狄弑父，則忍言其日者，即文元年「冬，十月，丁未，楚世

子商臣弑其君髡」，彼注云「日者，夷狄子弑父，忍言其

日」是也。

己卯，地震。季氏稍盛，宋南里以叛，王室大

亂，諸侯莫肯救，晉人國郊，^①吳勝雞父，尹氏立王子朝之

應。【疏】注「季氏」至「之應」。○解云：謂稍稍盛也。往

前時豹、羯為政，自上十二年夏「公如晉」，^②至河乃復，十

三年平丘之會「公不與盟」以來，季孫隱如數見經，至二

十五年逐出昭公矣。^③云「宋南里以叛」者，在二十一年

夏。云「晉人國郊」者，^④在下二十三年也，彼傳云「郊者

何？天子之邑也」。^⑤曷為不繫于周？不與伐天子也」

是也。云「吳勝雞父」者，即下二十三年秋七月，「戊寅」，^⑥

吳敗頓、胡、沈、蔡、陳、許之師于雞父」是也。云「尹氏立王子朝」者，即下二十三年秋，「尹氏立王子朝」是也。「賊未討，何以書葬」者，^⑦正以隱十一年傳云「春秋」君弑賊不討，不書葬，以為無臣子也」，然則師有解爾，故此弟子據而難之。

秋，齊高發帥師伐莒。

冬，葬許悼公。賊未討，何以書葬？

不成于弑也。曷為不成于弑？據將而誅之。

①「國」，閣本作「圍」。阮校：「此本「圍」誤「國」，疏同。」

②「二」，原作「一」，今據十二年經及單疏鈔本改。

③「逐」，阮校：「當作「遂」。」

④「國」，杉浦校：「單疏鈔本「國」作「圍」。按：「國郊」當作「圍郊」。」

⑤「邑」，原作「色」，今據京都本，再造善本、中華本、閣本改。

⑥「戊寅」，昭公二十三年經作「戊辰」。阮校：「浦鏜云：「戊辰」之誤。按：浦說是也。」

⑦「賊未討何以書葬者」，阮校：「閩、監、毛本下增「○解云」，移「賊未討」以下於傳下。」

○于殺，音弑，①下「于殺」、「加殺」皆同。止進藥而

藥殺也。時悼公病，止進藥，悼公飲藥而死。止進

藥而藥殺，則曷爲加弑焉爾？據意善也。譏

子道之不盡也。其譏子道之不盡奈何？

曰：「樂正子春之視疾也，樂正子春，曾子弟子，

以孝名聞。【疏】注「樂正」至「名聞」。○解云：《祭義》云

「樂正子春下堂而傷其足，數月不出，猶有憂色。門弟

子」云云，子春曰「吾聞諸曾子，曾子聞諸夫子曰：天之所

生，地之所養，無人爲大。父母全而生之，子全而歸之，

可謂孝矣」云云，「今予忘孝之道，予是以有憂色」云云是

也。復加一飯，則脫然愈，復損一飯，則脫

然愈。復加一衣，則脫然愈，復損一衣，則

脫然愈。」脫然，疾除貌也。言消息得其節。○復加，

扶又反，下同。一飯，扶晚反，下同。【疏】「復加」至「然

愈」。○解云：言子春視疾之時，消息得其節，觀其顏色，

力少如可時，更加一飯以與之，其病者脫然加愈。若觀

其顏色，力少如弱時，則復損一飯以與之，則其病者脫然

加愈。又觀其顏色，力似寒時，則復加一衣以與之，則病

者脫然又加愈。又觀其顏色，力似如燠，則復損一衣以與之，則病者脫然而愈。止進藥而藥殺，是以君

子加弑焉爾。失其消息多少之宜，曰「許世子止

弑其君買」，是君子之聽止也。聽治止罪。

「葬許悼公」，是君子之赦止也。原止進藥，本

欲愈父之病，無害父之意，故赦之。赦止者，免止之

罪辭也。明止但得免罪，不得繼父后，許男斯代立，無

惡文是也。【疏】注「明止」至「是也」。②○解云：正以此

傳但有赦止之文，而無善止之處，故知但得免罪而已，無

嗣父之義矣。云「許男斯代立，無惡文是也」者，正以自

此以后，不見許男卒葬之文，唯有定六年「春，王正月，癸

亥，鄭游邀帥師滅許，以許男斯歸」是也。言無惡文者，

正以不見立、人之文故也。若止宜立而斯篡之，《春秋》

之義，應作篡文以惡斯矣，似若隱四年衛桓見弑，嗣子宜

① 「殺」，京都本、再造善本作「弑」。「弑」，宋本《釋文》作「試」。

② 「注明止至是也」，杉浦校：「單疏鈔本作「明止但得免罪不得繼父後者」，無「○解云」。」

立而宣纂之，經書立晉，以爲惡晉之文也。

二十年，春，王正月。

夏，曹公孫會自鄆出奔宋。奔未有言

「自」者，此其言「自」何？據始出奔未有言此

者，^①與宋華亥入宋南里復出奔異。○鄆，音蒙，又亡忠

反，又亡貢反，一音亡增反。者此，舊於「此」下有「比」

者，非。復，扶又反。【疏】注「據始」至「言此」。^②○解

云：謂始發國出未有言「自」者，故云爾。云「與宋華亥入

宋南里復出奔異」者，即下文「冬，十月，宋華亥、向寧、華

定出奔陳」，二十一年夏「宋華亥、向寧、華定自陳入于宋

南里以叛」，二十二年春「宋華亥、向寧、華定自宋南里出

奔楚」是也。而言異者，正以華亥之徒奔而入叛邑之處，

乃始出奔，故得言「自」。今會始出，故云異矣。畔也。

時會盜鄆以奔宋。畔則曷爲不言其畔？言叛

者，當言以畔，^③如邾婁庶期。【疏】注「言叛」至「庶期」。

○解云：若其作叛文，當言公孫會以鄆出奔宋，如似襄二

十一年「邾婁庶其以漆、閭丘來奔」之類也。爲公子

喜時之後諱也。《春秋》爲賢者諱。諱使若從

鄆出奔者，故與「自南里」同文。○爲公子，于僞反，下

「爲賢」、「爲會」、「爲之諱」同。何賢乎公子喜時？

據喜時不書。【疏】注「據喜時不書」。○解云：正以曹

羈、叔肸，《春秋》賢之者，皆書見經，即莊二十四年冬「曹

羈出奔陳」，宣十七年冬「公弟叔肸卒」之文是也。今此

喜時既不書見，非所賢矣，則何賢乎喜時？故難之。

讓國也。其讓國奈何？曹伯廬卒于師，在

成十三年。則未知公子喜時從與？喜時，曹伯

廬弟。○從與，才用反，下音餘，下「從與」同。【疏】注

「喜時曹伯廬弟」。○解云：而賈、服以爲廬之庶子者，蓋

所見本異也。公子負芻從與？負芻，喜時庶兄。^④

或爲主于國，或爲主于師。古者諸侯師出，世子

^①「據始出奔未有言此者」，閩本、監本、毛本、閣本「此」

作「自」。解云「謂始發國出未有言自者」，蓋本作

「自」。

^②「注據始至言此」，杉浦校：「單疏鈔本作『注據始出

奔未有言此者』，下無『○解云』。」

^③「以畔」，阮校：「鄂本『以畔』作『以鄆』，此誤。」

^④「庶兄」，阮校：「鄂本作『從兄』。」

率與守國。^①次宜爲君者，持棺絮從，所以備不虞。或時疾病相代行，本史文不具，故傳疑之。○絮從，女居反。《說文》云：「絮，緼也。一曰敝絮也。」【疏】注「古者」至「不虞」。○解云：《春秋說》文。言「率與守國」者，與，衆也，謂率衆以守國也。《左氏春秋傳》云「大子之法，君行則守」是也。其次宜爲君者，謂若大子母弟也。言「持棺絮從」者，棺者，裨也，即《禮》云「以裨從」之文是也。絮謂新綿，即《禮記》云「屬纊以俟絕氣」之文是也。云「或時疾病相代行」者，正以曹伯無子，喜時其母弟也，當守國。公子負芻者，庶兄也，禮當從君，但或時負芻疾而喜時代之行。今傳不言者，正以史文不具故也。公子喜時見公子負芻之當主也，逡巡而退。賢公子喜時，則曷爲爲會諱？君子之善善也長，惡惡也短。惡惡止其身，不遷怒也。○逡，七旬反。惡惡，並如字，一讀上烏路反，下同。【疏】「公子」至「其身」。^②○解云：當依正禮，喜時守國，則負芻當主者，在薨之處，當主而來。若其疾病求代行，則負芻當主也者，在國而當主矣。善善及子孫。賢者子孫，故君子爲之諱也。君子不使行善者有後患，

故以喜時之讓，除會之叛。不通鄭爲國，如通濫者，喜時本正當立，有明王興，當還國，明叔術功惡相除，裁足通濫爾。○濫，力甘反，又力暫反。【疏】注「不通」至「濫爾」。○解云：昭三十一年「冬，黑弓以濫來奔」，傳云「文何以無邾婁」，注云：「據讀言邾婁。」「通濫也」，注云：「通濫爲國，故使無所繫。」曷爲通濫？賢者子孫宜有地也。賢者孰謂？謂叔術也。何賢乎叔術？讓國也。云云。然則今若通鄭爲國，宜云「夏，公孫會以鄭出奔宋」，傳云「文何以無曹？通鄭也。曷爲通鄭？賢者子孫宜有地也。賢者孰謂？謂喜時也。何賢乎喜時？讓國也」云云。今不如此者，正以喜時本正當立，若有明王興，興滅國，繼絕世之時，當令還其國，則不宜通鄭邑以爲小國而已。以此言之，明叔術以讓國之功，除其妻嫂殺顏之惡，裁足通濫邑以爲小國而已，不足以得邾

① 「率與守國」，阮校：「閩、監、毛本『與』作『興』，此誤。」

② 「公子至其身」，阮校：「閩、監、毛本『其身』改『當主』。杉浦校：「單疏鈔本作『公子喜時見公子負芻之正當主也云云』。按：依此本，則傳『當主』上當有『正』字。」

婁也。

秋，盜殺衛侯之兄輒。母兄稱兄，兄何以不立？據立嫡以長。○輒，《左氏》作「縶」。

嫡，丁歷反。長，丁丈反。【疏】注「據立嫡以長」。○解

云：即隱元年傳曰「隱長又賢，何以不宜立？立嫡以長不以賢，立子以貴不以長」之文是也。有疾也。何

疾爾？惡疾也。惡疾，謂瘡、聾、盲、癘、禿、跛、偻，

不逮人倫之屬也。書者，惡衛侯兄有疾，不憐傷厚遇，營

衛不固，至令見殺，失親親也。公子不言「之」，兄弟言

「之」者，敵體辭，嫌於尊卑不明，故加「之」以絕之，所以

正名也。○瘡，於今反。聾，路工反。癘，力世反，又力

大反。禿，吐木反。跛，布可反。偻，於矩反。惡，烏路

反。令，力呈反。【疏】注「失親親也」。○解云：①失親

親之道也。

冬，十月，宋華亥、向甯、華定出奔陳。

月者，危三大夫同時出奔，將為國家患，明當防之。○向

甯，二傳作「向寧」。【疏】注「月者」至「防之」。○解云：

《春秋》之義，大夫出奔，例皆書時，即成七年冬「衛孫林

父出奔晉」，襄二十八年「夏，衛石惡出奔晉」，「冬，齊慶

封來奔」之屬是也。今此書月，故須解之。言「將為國家患」者，即下文「人于宋南里以畔」是也。若言三大夫同時出奔，然後乃月，案莊十二年「冬，十月，宋萬出奔陳」，一大夫也，亦書月者，使與大國君出奔同，明彊禦之甚是也。

十有一月，辛卯，蔡侯廬卒。

二十有一年，春，王三月，葬蔡平公。

夏，晉侯使士鞅來聘。

宋華亥、向甯、華定自陳入于宋南里

以畔。宋南里者何？若曰因諸者然。因諸

者，齊故刑人之地。②公羊子，齊人，故以齊喻也。宋樂

世心自曹入于蕭，③不言宋。④南里者，略。叛臣從刑

人，于國家尤危，故重舉國。○重，宜用反。【疏】「入于

①「解云」，杉浦校：「單疏鈔本無「解云」，有「謂」字。」

②「故」，阮校：「鄂本作「放」，當據正。」

③「世心」，原作「大心」。阮校：「《公羊》作「世心」，《左氏》作「大心」，廿五年《釋文》可證。嚴傑說。」今據中華本、閩本改。

④「不言宋」，阮校：「鄂本此下疊「言宋」二字，此脫。」

至「以畔」。○解云：《左氏》、《穀梁》皆作「南里」字，而賈氏云《穀梁》曰「南鄙」，蓋所見異也。○「宋南里者何」。○解云：欲言其邑，而繫宋言之，與蕭例異。欲言非邑，入之而叛，與蕭相似，故執不知問。○注「因諸」至「之地」。○解云：舊說云：即《博物志》云「周曰囹圄，齊曰因諸」是也。○注「宋樂」至「言宋」。○解云：即定十一年「秋，宋樂世心自曹入于蕭」，注云「不言叛者，從叛臣，叛可知」者是也。何氏特引此事者，正以自外而入，與此相似，而不繫宋，故須解之。

秋，七月，壬午，朔，日有食之。是後周有篡禍。【疏】注「是後周有篡禍」。○解云：在明年。

八月，乙亥，叔痤卒。○叔痤，在禾反，《左氏》作「叔輒」。【疏】「叔痤卒」。^①○解云：《左氏》、《穀梁》作「叔輒」。

冬，蔡侯朱出奔楚。出奔者，為東國所篡也。

大國奔例月，此時者，惡背中國而與楚，^②故略之。○惡，烏路反，下音佩。【疏】「冬蔡侯朱」。○解云：《左氏》與此同，《穀梁》作「蔡侯東」。○注「出奔」至「篡也」。○解云：知此者，正以二十三年「夏，六月，蔡侯東國卒于楚」

故也。篡不書者，東國之下，自有注說。○注「大國」至「略之」。○解云：大國奔例月者，即桓十六年十一月「衛侯朔出奔齊」之徒是也。言「惡背中國而與楚」者，即「奔楚」是也。

公如晉，至河乃復。

二十有二年，春，齊侯伐莒。

宋華亥、向甯、華定自宋南里出奔楚。

前出奔已絕賤，復錄者，以故大夫專勢入南里，犯君而出，當誅也。言「自」者，別從國去。○復，扶又反。別從，彼列反，下同。【疏】注「前出」至「國去」。^③○解云：在上二十年冬也。《春秋》之例，大夫奔之後，其位已絕，即襄二十八年「冬，齊慶封來奔」，其後因魯奔吳，經不書之是也。今此書者，正以專勢入南里，犯君而出，起其當誅故也。云「言自者，別從國去」者，謂言「自宋南里」者，欲別於宋萬出奔陳之文，從國都而去者故也。

① 「痤」，原作「又」，今據本經及中華本改。

② 「惡」，原作「意」，《釋文》、《本疏》引及下二十三年注文、閩本皆作「惡」。今據改。

③ 「至」，原作「去」，今據中華本改。

大蒐于昌姦。○大瘦，^①所求反，本亦作「蒐」。

昌姦，二傳作「昌間」。

夏，四月，乙丑，天王崩。

六月，叔鞅如京師。

葬景王。

王室亂。謂王猛之事。【疏】注「謂王」至「之

事」。○解云：即下文「秋，劉子、單子以王猛入于王城」

是也。不言子朝者，子朝于時篡事未成故也。何言乎

王室亂？據天子之居稱京師，「天王入于成周」，「天

王出居于鄭」，不言亂。【疏】注「據天」至「京師」。○解

云：桓九年「紀季姜歸于京師」，「京師者何？天子之居

也。京者何？大也。師者何？衆也。天子之居，必以

衆大之辭言之」是也。云「天王入于成周」者，即下二十

六年「冬，十月，天王入于成周」是也。以上二事，^②以解

傳文「何言乎王室」之意。云「天王出居于鄭，不言亂」

者，即僖二十四年「冬，天王出居于鄭」是也。言不及

外也。宮謂之室。刺周室之微，^③邪庶並篡，無一諸侯

之助，匹夫之救，如一家之亂也，故變京師言王室。不言

成周，言王室者，正王以責諸侯也。傳不事事悉解者，言

不及外，外當責之，故正王可知也。^④不爲天子諱者，方

責天下不救之。○邪庶，似嗟反。【疏】注「宮謂之室」。

○解云：《爾雅》文。云「邪庶並篡」者，正以子猛、子朝皆

非正適，故謂之邪庶也。共篡敬王，故謂之「並篡」。時

子朝篡事未成，而言「並篡」者，欲見尹氏之徒，已有立之

之意也。云「無一諸侯之助，匹夫之救」者，正以變京師

言王室，故知如此。云「不言成周，言王室者，正王以責

諸侯也」者，《公羊》之義，以成周是正居，既不言京師亂，

何故不言成周亂，而言王室亂者，又欲正其王號，以責諸

侯不救之，謂敬王爲王矣，其若不然，景王之崩，至今期

年，其嗣子在喪，得云王室乎？云「傳不事事悉解」者，

傳若事悉解，^⑤宜云「不言京師言王室者，刺周家之微也，

^①「瘦」，宋本《釋文》作「廋」，當是。

^②「以上二事」至「之意」，阮校：「案：此本『王室』下脫

「亂」字。」又云：「按：此十六字當在『天王出居于鄭

是也』之下。」今按：此述傳文，當有「亂」字。

^③「刺周室之微」，阮校：「十八年疏引此下有『弱』字。」

^④「可知也」，阮校：「疏引作『皆可知』。」

^⑤「事」下，阮校引浦鏜云：「疑脫一『事』字。」

如一家之亂而已，責諸侯不救，急著天王之號，今不爾者，正以言不及外之文，足兼此等之意，是故不復費辭爾。^①云「言不及外」，即是外邊諸侯之當責之可知，由是之故，須著言王，責諸侯之不救也，故曰「皆可知」。云注「不為天子諱者」，^②方責天下不救之者，閔二年傳云：「曷為外之？」《春秋》為尊者諱。然則《春秋》之義，為尊者諱，今天子微弱，不能討亂，失國之刑，而不為諱者，方責天下不救之，是以不得不見者矣。

劉子、單子以王猛居于皇。其稱「王猛」何？

據未踰年已葬當稱子。【疏】注「據未」至「稱子」。○解云：正以莊三十二年傳云「既葬稱子，踰年稱公」故也。言已葬者，即上文「葬景王」是也。當國也。

時欲當王者位，故稱「王猛」見當國也。錄居者，事所見也。不舉猛為重者，時猛尚幼，以二子為計勢，故加「以」。以「者」，行二子意辭也。二子不舉重者，尊同權等。○見當，賢徧反，下同。【疏】注「時欲」至「國也」。

○解云：正以言王，傾國受師，^④似當國之人，鄭段之徒矣。云「錄居者，事所見也」者，正以當國之人，未成為王，理宜略之，而錄其居者，《春秋》刺其篡逆，若不書云

「王猛居于皇」，則其當國之事無由見，故曰「錄居者，事所見也」。云「不舉猛為重」者，《春秋》之徒，悉皆舉重，是以下二十三年秋「天王居于狄泉」之經，不言其大夫「以」之。今不舉重，故如此解也。云「以者，行二子意辭也者，正以桓十四年「宋人以齊人、衛人、蔡人、陳人伐鄭。以者何？」^⑤行其意也」，何氏云「以己從人曰行，言四國行宋意」是也。

秋，劉子、單子以王猛入于王城。王

城者何？西周也。時居王城邑，自號西周王。^⑥

【疏】「王城者何」。○解云：欲言正居，文無成周之稱，欲

①「爾」，京都本、再造善本作「耳」。

②「云注」，阮校：「按：『注』字當衍，何校本作『注云』。」

③「二」，阮校：「浦鏜云：『元』誤『二』。按：浦說是也。」

④「傾」，單疏鈔本、京都本、再造善本、監本、毛本作「須」，義為長。

⑤「以者何」上，阮校引浦鏜云：「脫『傳云』。」

⑥「王」，原作「主」，今據昭公二十六年「冬十月天王入于成周」下疏文及閣本改。

言非正居，王猛入之，故執不知問。其言人何？據非成周。【疏】注「據非成周」。○解云：正以《公羊》之義，以成周爲正居，故言此矣，是以二十六年「冬，十月，天王入于成周」是也。篡辭也。時雖不入成周，已得京師地半，稱王置官，自號西周，故從篡辭言入，起其事也。不言西周者，正之無二京師也。不月者，^①本無此國，無可與別輕重也。【疏】注「故從篡辭言入」。○解云：正以《春秋》之義，立、納、入皆爲篡辭，故此謂入爲篡辭矣。○注「不月至重也」。○解云：《春秋》之義，大國之篡，例合書月，即隱四年冬十二月「衛人立晉」之徒是，何者？以其禍大故也。小國例時，以其禍小矣，即昭元年「秋，莒去疾自齊入于莒」之文是。今此人王城之邑而篡天子，計其禍咎，實如大國之例，而不月者，正以本無可與別輕重之義，是以時之也。

冬，十月，王子猛卒。此未踰年之君也，其稱「王子猛卒」何？據子卒不言名，外未踰年君不當卒。【疏】注「據子卒不言名」。○解云：即文十八年「冬，十月，子卒」是也。云「外未踰年君不當卒」者，正以《春秋》上下無其事故也。而僖九年「冬，晉里克

弑其君之子奚齊」書者，彼乃見殺，非此之類也。而言外者，正以內之子般、子野之徒，皆書之故也。不與當也。不與當者，不與當父死子繼，兄死弟及之辭也。《春秋》篡成者，皆與使當君之父死子繼，兄死弟及者，篡所緣得位成爲君辭也。猛未悉得京師，未得成王，又外未踰年君，三者皆不當卒。卒又名者，^②非與使當成爲君也。嫌上人無成周文，非篡辭，故從得位卒，明其爲篡也。月者，方以得位明事，故從外未踰年君例。【疏】注「春秋」至「辭也」。○解云：即「公及齊侯盟于柯」，「齊侯小白卒」之徒是也。○注「猛未」至「當卒」。○解云：猛未悉得京師，即從篡不成，已是不當卒也。假令得作外踰年君，問自不得書其卒，^③況未成外踰年君，實不得書其卒，言二者不當卒矣。○注「卒又」至

①「不月者」，阮校：「鄂本無「者」字。」

②「三者皆不當卒卒又名者」，阮校：「鄂本「三」作「二」，無下「卒」字，當據以訂正。按解云「言二者不當卒」，又云「既不合卒，今書其名」，皆與鄂本合。」

③「問」，杉浦校：「單疏鈔本「問」作「尚」。當據鈔本作「尚」。」

「篡」。○解云：既不合卒，今書其名，非欲成其爲君，但嫌上經入于王城之時，無成周之文，恐其非篡辭，故從其得位而書其卒，正欲明爲篡故也。○注「月者」至「君例」。○解云：篡既不成，理宜略之。而書其月者，《春秋》方書其卒，若得位然，以明其篡事，故曰「方以得位明事」也。言「故從外未踰年君例」者，即僖九年「冬，晉里克弑其君之子奚齊」，何氏云：「弑未踰年君，例當月。不月者，不正遇禍，終始惡明，故略之。」今此書月，從未踰年君例矣。

十有二月，癸酉，朔，日有食之。是後晉人圍郊，犯天子邑。

監本附音春秋公羊注疏昭公卷第二十三^①

①

「昭公」，原作「襄公」，今據京都本、再造善本改。

監本附音春秋公羊注疏昭公卷第二十四

起二十三年，盡三十二年

何休學

二十三年，^①春，王正月，叔孫舍如晉。

癸丑，叔鞅卒。

晉人執我行人叔孫舍。

晉人圍郊。郊者何？天子之邑也。

天子間田，有大夫主之。○問，音閑。【疏】「叔孫舍」

者。^②○解：『左氏』《穀梁》作「婣」字。○「郊者何」。

○解云：欲言外邑，文無所繫，欲言魯邑，而不言伐我，故執不知問也。曷爲不繫于周？不與伐天子

也。與侵柳同義。【疏】注「與侵柳同義」。○解云：即

宣元年「冬，晉趙穿帥師侵柳」，傳曰：「柳者何？天子之

邑也。」注云「天子間田也」。^③有大夫守之，晉與大夫忿爭

侵之也。「曷爲不繫乎周」，注云「據王師敗績于貿戎，

繫王」。「不與伐天子也」，注云「絕正其義，使若兩國自相伐」。今此圍郊亦然，故曰「與侵柳同義」。然則彼已有傳，今復發之者，正以侵、圍異文故也。且若不發傳，無以知其伐天子。

夏，六月，蔡侯東國卒于楚。不日者，惡

背中國而與楚，故略之。月者，比肸附父仇，責之淺也。不書葬者，篡也。篡不書者，以惡朱。在三年之內，不共悲哀，舉錯無度，失衆見篡。○惡背，烏路反，下同。背，音佩。共，音恭。錯，七故反。【疏】注「不日」至「略之」。

○解云：正以大國之卒，例皆書日，今此不日，故解之。言「背中國而與楚」者，即此文卒於楚是也。○注「月者」至「淺也」。

○解云：僖十四年「冬，蔡侯肸卒」，注云：

「不月者，賤其背中國而附父仇，故略之甚也。」然則彼過深，故不月，此則過淺，但不日而已。云云之說，備於僖

^①「二十三年」，阮校：「唐石經作『廿有三年』，此脫『有』字。」

^②「者」，阮校：「閩、監、毛本刪。」

^③「解」下，疑脫「云」字。

^④「天子間田也」，宣公元年注作「天子之閒田也」。

十四年。云「不書葬者，篡也」者，以《春秋》之例，篡不明者，例不書葬。今此東國篡不明，不書其葬，以明篡矣。○注「篡不」至「見篡」。○解云：二十一年「冬，蔡侯朱出奔楚」，何氏云：「奔者，^①為東國所篡。」然則東國既篡於朱，而無立、入之文者，正欲惡朱故也，何者？東國篡朱，而無文貶，則知《春秋》之義，惡朱明矣。言「在三年之內」者，即二十年冬「蔡侯廬卒」，至二十一年冬朱即出奔，故曰「三年之內」也。所見之世，始錄諸侯內行小失，不可勝書，是以《春秋》但粗而見譏而已，故何氏云「不共悲哀，舉錯無度」而已矣。凡是為人所篡，^②皆失衆之所由，故何氏云「失衆見篡」也。

秋，七月，莒子庚與來奔。

戊辰，吳敗頓、胡、沈、蔡、陳、許之師于雞父。胡子髡、沈子楹滅，^③獲陳夏齧。此偏戰也，曷為以詐戰之辭言之？據甲戌齊

國書及吳戰于艾陵，俱與夷狄言戰，今此從詐戰辭言敗。○雞父，音甫。髡，苦門反。楹，音盈，《左氏》作「逞」，《穀梁》作「盈」。夏，戶雅反。齧，五結反。艾，五蓋反。【疏】「此偏戰也」。^④○解云：正以《春秋》之例，偏戰者

日，詐戰者月，^⑤今此書日，故言偏戰。○注「據甲戌」至「言敗」。○解云：即哀十一年夏，「五月，公會吳伐齊。甲戌，齊國書帥師，及吳戰于艾陵，齊師敗績，獲齊國書」是也。不與夷狄之主中國也。序上言戰，別客主人直不直也。今吳序上而言戰，則主中國辭也。○別客，彼列反，下及傳同。【疏】注「序上言戰」。○解云：以莊二十八年齊伐衛，^⑥「衛人及齊人戰，衛人敗績」，傳云「《春秋》伐者為客」，注云「伐人者為客」。「伐者為主」，注云「見伐者為主」。「故使衛主之也」，彼注云「戰序上

①「奔者」，阮校：「浦鏜云：『奔』上脫『出』字。是也。」

②「篡」下，杉浦校：「單疏鈔本有『者』字。」

③「沈子楹」，阮校：「唐石經、諸本同。《釋文》亦作「楹」，云「《左氏》作『逞』，《穀梁》作『盈』」。按：此本疏中下文作「沈子盈」，則疏本與《穀梁》同，故於此下無文。」

④「此偏戰也」，杉浦校：「單疏鈔本『此』上有『沈子楹左氏楹作逞字』九字，『也』下有『云云』二字。」

⑤「者月」，杉浦校：「單疏鈔本作『則月』。」

⑥「齊伐衛」，莊公二十八年經作「齊人伐衛」。

言及者爲主」。「曷爲使衛主之？衛未有罪矣」，①注云「蓋爲幽之會，服父喪未終而不至故」。又僖十八年春，宋公以下伐齊，夏，「宋師及齊師戰于甌，齊師敗績」，傳云：「《春秋》伐者爲客，伐者爲主。曷爲不使齊主之？與襄公之征齊也。曷爲與襄公之征齊？桓公死，豎刀、②易牙爭權不葬，爲是伐之也。」③以此言之，若主人直，則主序上，若客直，則客序上，故云「序上言戰，別客主人直不直」。今吳人序其上而言戰，則是吳人爲主中國之辭，故不得言戰，直言敗而已，故云「不與夷狄之主中國」。然則曷爲不使中國主之？據齊國書主吳。中國亦新夷狄也。中國所以異乎夷狄者，④以其能尊尊也。王室亂莫肯救，君臣上下壞敗，亦新有夷狄之行，故不使主之。不稱國出師者，賤略之。言「之師」者，辟許獨稱師，上五國稱國之嫌。○之行，下孟反，下同。【疏】注「君臣上下壞敗」者。○解云：不救天子，有無君臣上下之道，故云「君臣上下壞敗」。○注「不稱國出師者賤略之」者。○解云：決桓十三年春「齊師、宋師、衛師、燕師敗績」之文。○注「言之師者」。○解云：若不言「之」，直言「吳敗頓、胡、沈、蔡、陳、許師于雞父」，則嫌師文獨使許稱，自陳以上單稱國，是故言之，

以散之矣。其言滅、獲何？據蔡公孫歸生滅沈，以沈子嘉歸，殺之。國言滅，君言殺。又獲晉侯言獲，此陳夏鬻亦言獲，君、大夫無別。【疏】注「據蔡」至「言殺」。○解云：即定十四年「夏，⑤四月，庚辰，蔡公孫歸生帥師滅沈，⑥以沈子嘉歸，殺之」。彼國言滅，君言殺，今此君言滅，是以據而難之。云「又獲晉侯言獲」者，即僖十五年冬十一月，「壬戌，晉侯及秦伯戰于韓，獲晉侯」是也。然則國言滅，君言殺，以解傳「其言滅何」之文，又獲晉侯言獲，以解傳「其言獲何」之文。別君臣也。君死于位曰滅，生得曰獲，大夫生死皆曰獲。大夫不世，故不別死位。【疏】「君死于位曰滅」者。○解

- ①「矣」，阮校引浦鏜云：「『爾』誤『矣』」。杉浦校：「單疏鈔本『矣』作『爾』」。
- ②「豎刀」，單疏鈔本、閩本、毛本作「豎刁」。
- ③「是」下，僖公十八年傳有「故」字。
- ④「乎」，余本作「于」。
- ⑤「定十四年」，阮校：「浦鏜云：『十』，衍字。是也。」
- ⑥「公孫歸生」，《公羊》定公四年經作「公孫歸姓」，今此注、疏均引作「歸生」。阮校：「按：經作『歸姓』，此順注文引作『生』。」

云：即此胡子髡、沈子盈滅是也。^①「生得曰獲」者，即「獲晉侯」是也。「大夫生死皆曰獲」者，大夫死曰獲者，即此「獲陳夏齧」，及哀十一年「獲齊國書」之徒是也。其大夫生得曰獲者，宣二年「獲宋華元」是也。○注「大夫不世故不別死位」。○解云：正謂諸侯世，故別其死社稷與不，若其死社稷者而經書滅，不能者貶之言獲也。大夫不世，是以不勞別之，故不問生死，^②皆謂之獲也。不與夷狄之主中國，則其言「獲陳夏齧」何？據荆敗蔡師于莘，以蔡侯獻舞歸，不言獲。○莘，所巾反。【疏】注「據荆」至「言獲」。○解云：在莊十年秋九月，彼傳云：「曷為不言其獲？不與夷狄之獲中國也。」吳少進也。能結日偏戰，行少進，故從中國辭治之。髡、楹下云滅者，死戰當加禮，使若自卒，相順也。經先舉敗文，嫌敗走及殺也，^③故以自滅為文，明本死位，乃敗之爾。名者，從赴辭也。【疏】注「髡楹」至「順也」。○解云：獲晉侯、戕鄆子之徒，皆獲、戕之文在上，今髡、楹之滅，滅文在下者，以其死戰，當合加禮，故退滅文於下，使若公子友卒之類，不為人所殺然，故曰「使若自卒」。一則不言戰，不與夷狄之主中國，一則其言滅，不與夷狄之

殺諸夏，二理合符，故言「相順也」。○注「名者從赴辭也」。○解云：《公羊》之義，合書則書，不待赴告，而言從赴辭者，正以髡、楹既死，故胡、沈之臣赴告鄰國，云道：寡君某甲，為吳所滅。諸侯之史，悉書其名。孔子案諸國之文，^④而為《春秋》，由是之故，錄其名矣，故曰「名者，從赴辭」。隱公八年「夏，六月，己亥，蔡侯考父卒」，秋「八月，葬蔡宣公」，傳云：「卒何以名而葬不名？卒從正。」注云：「卒當赴告天子，君前臣名，故從君臣之正義言也。」而葬從主人，彼注云「至葬者，有常月可知，不赴告天子，故從蔡臣子辭稱公」也。以此言之，則此注云「名者，從赴辭」者，謂其赴告天子之辭，是以稱人矣。^⑤

天王居于狄泉。此未三年，其稱天王何？據毛伯來求金，不稱天王。【疏】注「據毛」至「天王」。○解云：即文九年「毛伯來求金」是也。彼云：「何

①「盈」，阮校：「閩、監、毛本作『楹』。」

②「生死」，杉浦校：「單疏鈔本作『死生』。」

③「也」，阮校：「鄂本作『之』，此誤。」

④「文」，杉浦校：「單疏鈔本作『史』，為長。」

⑤「人矣」，杉浦校：「單疏鈔本『人矣』作『名爾』。」

以不稱使？當喪未君也。踰年矣，何以謂之未君？即位矣，而未稱王也。未稱王，何以知其即位？以諸侯之踰年即位，亦知天子之踰年即位也。」注云：「俱繼體，其禮不得異。」以天子三年然後稱王，亦知諸侯於封內三年稱子也」。然則天子之法，三年然後方始稱王，故此傳云「此未三年，其稱王何」，^①據毛伯不稱天王以難之。著有天子也。時庶孽並篡，天王失位徙居，微弱甚，故急著正其號，明天下當救其難而事之。○孽，魚列反。難，乃旦反。

尹氏立王子朝。貶言尹氏者，著世卿之權。

尹氏貶，王子朝不貶者，年未滿十歲，未知欲富貴，不當坐，明罪在尹氏。○子朝，如字。【疏】注「貶言尹氏者」。^②○解云：即隱三年夏「尹氏卒」之下，傳云「尹氏者何？天子之大夫也。其稱尹氏何？貶。曷爲貶？譏世卿」是也。云「年未滿十歲」者，何氏更有所見，或者正以衛人立晉，莒展去疾之徒，悉去公子，見其當國。今此王子朝經無貶文，乃與楚公子比之經相似。案上十三年「公子比」之下，傳云：「比已立矣，其稱公子何？其意不當也。」以此言之，明其幼少也。年既幼少，未貪富貴，故以未盈十歲言，以下二十六年出奔之時，^③年已稍長，

而不去王子者，順上文也。

八月，乙未，地震。是時猛、朝更起，與王爭

入，遂至數年。晉陵周竟，吳敗六國，季氏逐昭公，吳光弑僚滅徐，故日至三食，地爲再動。○更，音庚。數，所主反。爲，于僞反。【疏】「是時」至「數年」。○解云：猛今雖卒，但篡來世近，而子朝復逆，故曰「猛、朝更起」。上「王猛入于王城」，今言「天王居于狄泉」，「尹氏立王子朝」，二十六年「天王入于成周」，「王子朝奔楚」，故云「與王爭入」也。首尾五載，故曰「遂至數年」。云「晉陵周竟者，即上「圍郊」是也。云「吳敗六國」者，上文云「吳敗頓、胡、沈、蔡、陳、許之師」云云是也。云「季氏逐昭公」者，即下二十五年「九月，癸亥，^④公孫于齊」是也。○

① 「王」，本傳作「天王」。

② 「注貶言尹氏者」，杉浦校：「單疏鈔本作「注貶言尹氏著世卿之權者」，無「○解云」。按：此當據此本訂正。」

③ 「以下」，杉浦校：「單疏鈔本「以」作「之」，絕句，義爲長。」

④ 「癸」，阮校：「浦鏜云：「己」誤「癸」。按：浦說是也。」

注「吳光殺僚滅徐」者。^①即下二十七年「夏，四月，吳弑其君僚」。滅徐者，即下三十年冬十二月，「吳滅徐，徐子章禹奔楚」是也。云「故日至三食，地爲再動」者，上二十一年「秋，七月，壬午，朔，日有食之」，二十二年十有二月，^②「癸酉，朔，日有食之」，二十四年「夏，五月，乙未，朔，日有食之」，故云「日至三食」也。上十九年夏，「五月，己卯，地震」，今年又震，故曰「地爲再動」。

冬，公如晉。至河，公有疾，乃復。何

言乎「公有疾乃復」？據上比「乃復」，不言公，不言有疾。【疏】注「據上」至「有疾」。○解云：上十三年冬「公如晉，至河乃復」，又二十一年冬「公如晉，至河乃復」，皆言「公如」，而云「不言公」者，正謂「至河」之下不言公矣。殺恥也。因有疾以殺畏晉之恥。舉公者，重疾也。「子之所慎：齋、^③戰、疾」。

二十有四年，春，王二月，丙戌，仲孫貜卒。

叔孫舍至自晉。^④

夏，五月，乙未，朔，日有食之。是後季氏

逐昭公，吳滅巢，弑其君僚，又滅徐。

秋，八月，大雩。先是公如晉，仲孫貜卒，民被其役，時年叔倪出會，^⑤故秋七月復大雩。○被，皮寄反。

丁酉，杞伯鬱釐卒。○鬱釐，音來，又力之反，^⑥二傳作「郁釐」。

冬，吳滅巢。

葬杞平公。^⑦【疏】「叔孫舍至自晉」。○解

云：上十四年「春，隱如至自晉」，以其被執而還，故省去

^①「吳光殺僚滅徐者」，阮校：「閩、監本同，毛本『者』下增『○解云』。」

^②「二年」，原作「三年」，阮校：「浦鏜云：『二年』誤『三年』。按：浦說是也。」杉浦校：「單疏鈔本『三年』作『二年』。今據昭公二十二年經及單疏鈔本補。」

^③「齋」，阮校：「鄂本、閩、監、毛本作『齊』。」

^④「叔孫舍」，阮校：「二傳無『叔孫』字。」王引之《經義述聞》：「『叔孫』二字，後人所增，非其原本也。」

^⑤「時年」，阮校：「鄂本作『明年』，諸本皆誤作『時』。」

^⑥「釐」，宋本《釋文》作「釐」。「又力之反」下，宋本《釋文》有「本亦作釐」四字。

^⑦「葬杞平公」，阮校：「此本『叔孫舍至自晉』三節疏皆在此經下，閩、監、毛本分配各經之下。」

其氏。今此叔孫舍不去氏者，蓋以無罪故也，是以文十四年傳云「稱行人而執者，以其事執也」，注云：「以其所銜奉國事執之，晉人執我行人叔孫舍是也。」「不稱行人而執者，以己執也」，注云：「己者，己大夫，自以大夫之罪執之。分別之者，罪惡當各歸其本。」以此言之，則知隱如有罪，故去其氏，叔孫無罪，故無貶文。若然，文十五年夏，「單伯至自齊」，案彼單伯亦以其有罪執，而存其氏者，恥之故也，是以彼注云「不省去氏者，淫當絕，使若他單伯至」是也。注「是後季氏逐昭公」者，在下二十五年九月。云「吳滅巢」者，在今年冬。云「弑其君僚」者，在二十七年。云「又滅徐」者，在三十年冬。先言季氏逐昭公者，正欲決吳事故也。「杞伯鬱釐卒」者，《左氏》、《穀梁》作「郁釐」字，今正本亦有「郁」字者。^①

二十有五年，春，叔孫舍如宋。

夏，叔倪會晉趙鞅、宋樂世心、衛北宮喜、鄭游吉、曹人、邾婁人、滕人、薛人、小邾婁人于黃父。○倪，音詣，又五兮反，《左氏》作「詣」。樂世心，世如字，又以制反，《左氏》作「大心」。父，音甫。

有鸛鵒來巢。^②何以書？記異也。

何異爾？非中國之禽也，宜穴又巢也。非

中國之禽而來居此國，國將危亡之象。鸛鵒，猶權欲。宜穴又巢，此權臣欲國，自下居上之徵也，其後卒為季氏所逐。○鸛，音權，《左氏》作「鸛」，音劬。鵒，音欲。

【疏】夏叔倪者，《穀梁》與此同，《左氏》經賈注者作「叔詣」字。○「有鸛鵒來巢」者。^③○解云：案《運斗樞》云

「有鸛鵒來巢于榆」，此經不言「于榆」者，欲道來巢即為異，不假指其處所。若莊七年傳云「不修《春秋》曰：『雨星不及地尺而復。』君子修之曰：『星實如雨。』」何氏云：

①「有」下，阮校以為當脫「作」字。

②「有鸛鵒來巢」，阮校：「唐石經、諸本同。按：《周禮·考工記》『鸛鵒不踰濟』，《釋文》：『本作鸛鵒。』」

此疏亦引《冬官》『鸛鵒不踰濟』。今按：《周禮·考工記》『鸛鵒不踰濟』，鄭注：「鸛鵒，鳥也，《春秋》昭二十五年『有鸛鵒來巢』，傳云：『書所無也。』」賈公彥疏曰：「《左氏傳》作『鸛鵒』，《公羊傳》作『鸛鵒』。此經注皆作『鸛』字，與《左氏》同。《春秋》昭二十五年『有鸛鵒來巢』，傳曰：『書所無也。』」

③「者」，杉浦校：「單疏鈔本無。」

「明其狀似雨爾，不當言雨星。不言尺者，實則爲異，不以尺寸錄之。」^①「非中國之禽也」者，謂是夷狄之鳥，以《異義》《公羊》說二云「鸛鵒，夷狄之鳥，不當來入中國」，鄭君駁之曰：「《春秋》之鳥不言來者，多爲夷狄來也。」^②若鸛鵒乃飛從夷狄而來，則昭將去遠域之外。」以此言之，則知「非中國之禽」者，謂是夷狄之鳥。而《冬官》云「鸛鵒不踰濟」，鄭氏云「無妨於中國有之」者，何氏所不取也。舊解以爲中國、國中者，非得注之意。^③《穀梁》與此同。

秋，七月，上辛，大雩。季辛，又雩。

又雩者何？又雩者，非雩也，聚衆以逐季氏也。一月不當再舉雩。言又雩者，起非雩也。昭公依托上雩，生事聚衆，欲以逐季氏。不書逐季氏者，諱不能逐，反起下孫，及爲所敗，故因雩起其事也。但舉日，不舉辰者，辰不同，不可相爲上下。又日爲君，辰爲臣，^④去臣，^⑤則逐季氏意明矣。上不當日，言上辛者，爲下辛張本。不言下辛，言季辛者，起季氏不執下而逐君。○下孫，音遜，下文同。去，起呂反。爲下，于僞反，下「而爲」同。【疏】「又雩者何」。○解云：諸夏雩祭文，悉不言

「又」，異于常例，故執不知問。○注「一月」至「事也」。○解云：僖三年注云：「大平一月不雨即書，《春秋》亂世，一月不雨，未害物，未足爲異，當滿一時乃書。」然則《春秋》之義，一時能害，方始書雩，豈有再舉其雩乎？故曰「一月不當再舉雩」矣。既無再舉雩之例，^⑥而言又雩者可？^⑦以起其非實雩，故云「言又雩者，起非雩也」。

①「不」下，原有「可」字。阮校引浦鏜云：「『可』衍字。」

杉浦校：「單疏鈔本無『可』字。」今據莊公七年何注及單疏鈔本刪。

②「春秋之鳥不言來者多爲夷狄來也」，孫校：「此當從《考工記》賈疏引作『《春秋》言來者甚多，非皆從夷狄來也』，此引訛衍不可通。」

③「得注」，閩本作「傳注」，義爲長。

④「辰」，原作「長」，今據余本、京都本、再造善本、中華本、閩本改。

⑤「臣」，阮校：「鄂本『臣』作『辰』，當據正。《釋文》亦作『去辰』。」

⑥「之」，杉浦校：「單疏鈔本無。」

⑦「何」，原作「可」，阮校：「閩本、監本、毛本『可』作『何』。」今按：傳云「又雩者何」，此疏釋傳語，當以閩本、監本、毛本爲正，據改。

○注「但舉」至「上下」。○解云：正以去年「夏，五月，乙未，朔，日有食之」，則此月上辛爲辛丑，下辛爲辛酉，所以直言辛，不兼言丑、酉者，若言辛丑、辛酉，即是參差不同，不可相爲上下故也。○注「又日」至「明矣」。○解云：十日爲陽爲幹，故爲君之義。十二辰爲陰爲枝，故爲臣之象，故云「日爲君，辰爲臣」。○注「上不」至「張本」。○解云：《春秋》之雩，其例書時，即桓五年秋「大雩」之文是，故云「上不當日」也。若然，亦不合月。而云七月者，欲見上辛、下辛皆七月之日故。○注「不言」至「逐君」。○解云：凡言上者，對下之稱。既言上辛，而不言下辛者，欲起季氏不執臣下之卑而逐君矣。

九月，己亥，公孫于齊，次于楊州。地

者，臣子痛君失位，詳錄所舍止。○楊州，《左氏》作「陽州」。【疏】注「地者」至「舍止」。○解云：地者，即經書「次于楊州」是也。《春秋》之義，悉皆舉重。不舉公孫爲重，而復書「次于楊州」者，臣子哀痛公之失位，是以詳錄公之所舍止之處矣。

齊侯唁公于野井。唁公者何？昭公

將弑季氏，^①傳言弑者，從昭公之辭。○唁，音彥。將

殺，^②音試，下及注同。【疏】「唁公者何」。○解云：失國見唁，在可諱之限。今而書見，故執不知問。○注「傳言」至「之辭」。○解云：君討臣下，正應言「殺」。今傳云「弑」，故須解之。而言「從昭公之辭」者，即下文云「吾欲弑之，何如」是也。^③「季氏爲無道」者，謂無臣之道。^④告子家駒曰：「季氏爲無道，僭於公室久矣。諸侯稱公室。吾欲弑之，何如？」昭公素畏季氏，意者以爲如人君，故言「弑」。【疏】注「昭公」至「言弑」。○解云：隱四年傳云「與弑公」，何氏云：「弑者，殺君之辭。」^⑤然則臣下犯於君父，皆謂之弑。今昭公欲討臣下而言弑，違於常義，故須解之。子家駒曰：「諸

① 「弑」，阮校：「漢石經《公羊》『弑』皆作『試』，猶今人語云『姑且試之』，故其語可通乎上下也。」

② 「殺」，京都本、再造善本作「弑」。

③ 「何如」，原作「如何」，今據下疏文及單疏鈔本、閩本、監本、毛本改。

④ 「臣」，原作「日」，今據中華本、閩本改。

⑤ 「殺君」，杉浦校：「單疏鈔本作『弑君』。」

侯僭於天子，大夫僭於諸侯，^①久矣。」昭公

曰：「吾何僭矣哉？」失禮成俗，不自知也。【疏】

注「失禮成」至「知也」。○解云：正以魯人始僭在春秋

前，至昭已久，故不自知。子家駒曰：「設兩觀，

禮，天子諸侯臺門，^②天子外闕兩觀，諸侯內闕一觀。○

觀，工亂反，注同。【疏】注「禮天子」至「一觀」。^③○解

云：在《禮器》文。云「天子外闕兩觀，諸侯內闕一觀」者，

《禮說》文也。乘大路，禮，天子大路，諸侯路車，大夫

大車，士飾車。【疏】注「禮天子大」至「飾車」。^④○解

云：《顧命》之文也。云「諸侯路車」，《詩》云「路車乘馬」

是也。云「大夫大車」者，即《詩》云「大車檻檻」是也。云

「士飾車」者，即《書傳》云「乘飾車兩馬，庶人單馬木車」

是也。朱干，干，楯也。以朱飾楯。○^⑤楯，食允反，^⑥

又音尹。玉戚，戚，斧也。以玉飾斧。○玉戚，于戚

反，^⑦以玉飾斧。以舞《大夏》，《大夏》，夏樂也。周

所以舞夏樂者，王者始起，未制作之時，取先王之樂與己

同者，假以風化天下，天下大同，乃自作樂。取夏樂者，

與周俱文也。王者舞六樂于宗廟之中，舞先王之樂，明

有法也；舞己之樂，明有則也；^⑧舞四夷之樂，大德廣及

①「諸侯僭於天子大夫僭於諸侯」，阮校：「唐石經、諸

本同。《考工記》「畫績之事」：「其象方，天時變。」注

引子家駒曰「天子僭天」，今何本無此句。《周禮·大

宰》疏引作「諸侯僭天子，大夫僭諸侯」。此二「於」字

當為衍文，《考工記》注無「於」字可證。今按：定公

五年夏疏文引亦無「於」字。

②「天子諸侯臺門」，阮校：「《周禮·大宰》疏引何氏云

「天子兩觀，諸侯臺門」，與今本異。」

③「注禮天子至一觀」，阮校：「當作「禮天子諸侯臺

門」，故解云「在《禮器》文」。今本標起訖是後人所

改。」杉浦校：「單疏鈔本作「注天子諸侯台門者」，無

「○解云」。當據此本以訂正。沈氏《注疏正字》

云：《周禮·大宰》疏引此注作「天子兩觀諸侯臺

門」。

④「注禮天子大至飾車」，杉浦校：「單疏鈔本作「注禮

天子大路者」，無「○解云」。

⑤「○」，原無。下「楯，食允反，又音尹」為《釋文》語，依

例當有「○」標記。余本不脫，今據補。

⑥「允」，宋本《釋文》作「尹」。

⑦「戚」，宋本《釋文》作「寂」，當是。

⑧「則」，阮校：「鄂本「則」作「制」，當據正。「制」謂己

所制也。「則」即「法」，複上。」

之也。東夷之樂曰株離，南夷之樂曰任，西夷之樂曰禁，北夷之樂曰昧。○大夏，戶雅反，注曰。^①株離，音誅。禁，音金，又居鳩反。【疏】注「東夷之樂」至「曰昧」。○解云：以下皆《樂說》文。彼注云「陽氣始起於懷任之物，各離其株也」。^②南者，任也，盛夏之時，物皆懷任矣。草木畢成，禁如收斂。盛陽消盡，蔽其光景昧然」是也。八佾以舞《大武》，此皆天子之禮也。且夫牛馬維婁，繫馬曰維，繫牛曰婁。○佾，音逸。且夫音扶，下「有夫」并注同。婁，力主反。【疏】「此皆天子之禮也」。○解云：以周公之功，得用四代之樂，而以《大夏》之徒謂之爲僭者，刺其群公之廟，若祭周公則備。○「牛馬維婁」者。○解云：皆謂繫之於廐，不得放逸于郊也。○注「繫馬曰維」者。即《詩》云「皎皎白駒，繫之維之」是。云「繫牛曰婁」者，^③正以上言「牛馬」，下言「維婁」，「維」既屬馬，「婁」屬於牛亦可知矣。而文不次者，意到則言矣。舊說云：「婁者，侶也。謂聚之於廐。」委己者也。委食己者。○委己，于僞反，注同。己，音紀。委食，音嗣，下同。而柔焉。柔，順。【疏】「委己者也而柔焉」。○解云：言牛馬之數，猶順於己之人，^④而季

氏作賞，有年歲矣，民從之，固是其宜矣。^⑤季氏得民衆久矣，季氏專賞罰，得民衆之心久矣，民順從之，猶牛馬之於委食己者。君無多辱焉。」恐民必不從君命，固爲季氏用，^⑥反逐君，故云爾。子家駒上說正法，下引時事以諫者，欲使昭公先自正，乃正季氏。【疏】注「子家駒上說正法」者。○解云：即謂上文「朱干，玉戚」之屬

①「曰」，宋本《釋文》作「同」。

②「各」，原作「名」，今據中華本、閩本改。

③「云」，京都本、閩本、監本、毛本作「也」，屬上。

④「言牛馬之數猶順於己之人」，阮校：「浦鏜云：『於』下當脫「食」字。」杉浦校：「單疏鈔本「數」作「類」，「己」上有「委」字。按此當作「言牛馬之類猶順於委己之人」。」

⑤「民從之固是其宜矣」，阮校：「浦鏜云：『也』誤「矣」，從《經傳通解》校。」杉浦校：「單疏鈔本「從」下有「服」字，「矣」作「也」。」

⑥「固爲季氏用」，阮校：「鄂本作「而爲季氏用」，與《儀禮通解》正合，當據以訂正。」

是也。①云「下引時事」者，謂「牛馬維婁」是也。昭公

不從其言，終弑而敗焉，②果反爲季氏所逐。

【疏】「終弑之」者。○解云：謂陳兵欲往攻殺之也。走

之齊。齊侯唁公于野井，弔亡國曰唁，弔死國曰

弔，③弔喪主曰傷，弔所執紼曰纒。○紼，音弗。纒，音

問。【疏】注「弔亡國曰唁」者。○解云：此文是也。○注

「弔喪」至「曰纒」。○解云：皆當時之制也。曰：「奈

何君去魯國之社稷？」昭公曰：「喪人自謂

亡人。○喪，息浪反，④亡也。不佞，不善。失守魯

國之社稷，執事以羞。」謙自比齊下執事，言以羞

及君。⑤【疏】「執事以羞」。○解云：⑥言己之尊卑，比

齊之執事也，而舉措不善，失守社稷，由是之故，以羞及

君。再拜顙。顙者，猶今叩頭矣。謝見唁也。○再拜

顙，息黨反，見而稽顙也。⑦慶子家駒，慶，賀。

曰：「慶子免君於大難矣。」子家駒曰：「臣

不佞，陷君於大難，君不忍加之以鈇鑕，賜

之以死。」鈇鑕，要斬之罪，即所錫之以死。⑧○大難，

乃旦反，下同。鈇，音甫，又方于反。鑕，之實反。要，一

遙反。再拜顙。謝爲齊侯所慶。高子執簞食，

簞，葦器也。圓曰簞，方曰筭。食，即下所致糗也。○

簞，音丹，葦器。食，音嗣，注。⑨葦，于鬼反。筭，思嗣

反。糗，丘九反，又昌紹反。【疏】注「簞葦器也」至「方曰

筭」。○解云：《釋器》無文，蓋以時事言之。云「食即下

①「解云」至「是也」，杉浦校：「單疏鈔本無「解云」二

字，「即」下無「謂」字。」

②「終弑而敗焉」，阮校：「唐石經作「終弑之而敗焉」，

諸本脫「之」字。按：疏中標經云「終弑之者」，有

「之」，與石經合。」

③「弔死國曰弔」，阮校：「諸本同。段玉裁云：此「國」

字衍。」

④「息浪反」下，宋本《釋文》有「下同」二字。

⑤「言以羞及君」下，余本有「○謙自音謙本亦作謙」八

字，乃《釋文》語，此脫。

⑥「云」，原作「亡」，今據中華本改。

⑦「見」，宋本《釋文》作「拜」。

⑧「錫」，阮校：「鄂本作「賜」。按：傳言「賜」，不當殊

文，鄂本是也。」

所致糗也」者，即下文云「敢致糗於從者」是也。與四

脰脯。屈曰胸，申曰脰。^①○脰，他頂反，又大頂反。

胸，其俱反。【疏】注「屈曰胸申曰脰」者。○解云：正以脰是伸舒之名，則知胸是屈疊之稱矣。鄭注《曲禮上》篇云「屈中曰胸」，義通於此。國子執壺漿，壺，禮器。

腹方口圓曰壺，反之曰方壺，有爵飾。【疏】注「壺禮器」。○解云：即《燕禮》云「司宮尊于東楹之西，兩方壺，左玄酒，南上」是也。云「腹方」至「爵飾者」，《釋器》無文，蓋用舊說，或以時事知之。言「有爵飾」者，謂刻畫蓋爵之形，飾其壺體。曰：「吾寡君聞君在外，餒饗未就，餒，熟食。饗，熟肉。未就，未成也。解所以致糗意。○餒，音俊。【疏】注「餒熟食饗熟肉」。○解云：《聘禮》曰「宰夫朝服設飧，飪一牢，在西，鼎九」，是飧爲熟食也。又云「致饗饌五牢」，^②飪一牢「云云，上文對饌，下文有「飪一牢」之言，故知熟肉明矣。敢致糗于從者。」糗，糒也。謙不敢斥魯侯，故言從者。○于從，才用反，注及下皆同。糒，音備。【疏】注「糗糒也」。○解云：言糗糒，若今之糒米也。○糗，妹紹反，又羌九反。

糒，平祕反。^③昭公曰：「君不忘吾先君，延及

喪人，錫之以大禮。」再拜稽首，以衽受。

衽，衣下裳當前者。乏器，謙不敢求索。○衽，而甚反，又而鳩反，^④掩裳際也。索，所白反。【疏】「錫之以大禮」。上文糗是也。○注「衽衣」至「乏器」。自解云：^⑤

①「申」，阮校：「鄂本同，此本疏中亦作「申」。閩、監、毛本改「伸」，疏同。」

②「致」，阮校：「浦鏜云：經作「歸」。是也。」

③「注糗糒也」至「平祕反」，杉浦校：「單疏鈔本無「○解云」，「米也」下無「○糗妹紹反又羌九反糒平祕反」，「糗」下夾注「音妹紹反一音羌九反」九字，「糒」下夾注「音平祕反」四字，「米也」作「米矣」。阮氏校勘記出「若今之糒米也」○云：「諸本同。按：此

「○」當刪，下載糗、糒字音切，亦義疏之言，非《釋文》也。浦鏜云「已見《釋文》，當衍」者，非，此與《釋文》不同。」

④「鷗」，原作「鷗」，今據余本、宋本《釋文》改。

⑤「自解云」，杉浦校：「單疏鈔本無「自」字。」今按：「解云」前有「自」字，與體例不合，「自」字當衍。

所以枉受之者，而以行客之人於器物乏故也。^①高子

曰：「有夫不祥，猶曰：人皆有夫不善。君無所

辱大禮。」禮，臣受君錫，答拜，謂之拜命謂之辱。^②高

子見昭公拜辱大卑，故曰「君無所辱大禮」。○大卑，音

泰，下「大學」同。昭公蓋祭而不嘗。食必祭者，謙

不敢便嘗，示有所先。不嘗者，待禮讓也。【疏】注「食

必」至「讓也」。^③○解云：凡禮，食必先須祭者，正欲作

謙，其未祭之時，不敢便即嘗之，欲示有所先。今昭公祭

訖猶不嘗者，正欲待禮讓故也。景公曰：「寡人有

不腆先君之服，未之敢服，腆，厚也。服，謂齊侯

所著衣服也。言「未敢服」者，見魯侯乃敢服之，謙辭也。

禮，天子朝皮弁，夕玄端，朝服以聽朝，玄端以燕，皮弁以

征不義，取禽獸，行射。諸侯朝朝服，夕深衣，玄端以燕，

裨冕以朝。天子以祭其祖禰，卿大夫冕服而助君祭，朝

服祭其祖禰，士爵弁黻衣裳以助公祭，玄端以祭其祖禰。

○腆，他典反，厚也。著，丁略反。裨，婢支反。黻，音

弗。【疏】注「禮天子朝」。○解云：皆出《禮記》。漢禮亦

然。有不腆先君之器，器謂上所執簠壺。【疏】注

「器謂上所執簠壺」者。上文「高子執簠食」、「國子執壺

漿」是也。然則上言饗飧未熟，今則更以簠壺盛饗飧

是。^④未之敢用，敢以請。」請行禮。昭公曰：

「喪人不佞，失守魯國之社稷，執事以羞，

敢辱大禮，敢辭。」不敢當大禮，故敢辭。【疏】「敢

辱」至「敢辭」。○解云：亦上有「不」字者，^⑤若有「不」

字，則辭下讀，是以注者以「不敢」言之。景公曰：

「寡人有不腆先君之服，未之敢服，有不腆

先君之器，未之敢用，敢固以請。」昭公曰：

「以吾宗廟之在魯也，以我守宗廟在魯時。有先

君之服，未之能以服，有先君之器，未之能

^①「而」，杉浦校：「單疏鈔本作『正』。按：此當從此本訂。」

^②「謂之拜命謂之辱」，余本、鄂本作「謂之拜命之辱」。

阮校：「此下『謂』字衍，當據以刪正。」

^③「食必」，「食」原作「祭」，今據中華本改。阮校：「閩、

監、毛本『必』下有『祭』。」

^④「是」，阮校引浦鏜云：「疑『也』字誤。」

^⑤「敢辱至敢辭」○解云亦上有不字者，杉浦校：「單疏鈔本作『敢辱大禮敢辭者敢上亦有不字者』，當據。」

以出，敢固辭。」已有時未能以事人，今已無有，義不可以受人之禮。【疏】「未之能以服」者。○解云：謂未能服之以事人矣。下文「未之能以出」亦然。○注「今已無有」者。謂「己身」之「己」，或解「己爲」、「已然」之「己」也。景公曰：「寡人有不腆先君之服，未之敢服，有不腆先君之器，未之敢用，請以饗乎從者。」欲令受之，故益謙言從者。○令，力呈反。

昭公曰：「喪人其何稱？」行禮，賓主當各有所稱。時齊侯以諸侯遇禮接昭公，昭公自謙失國，^①不敢以故稱自稱，故執謙問之。○故稱，尺證反。景公曰：

「孰君而無稱？」猶曰：誰爲君者而言無所稱乎？昭公非君乎？昭公於是噉然而哭，噉然，哭聲貌。感景公言而自傷。○噉，古弔反，一音古狄反。諸

大夫皆哭。魯諸大夫從昭公者。既哭，以人爲

菑，菑，周埒垣也。所以分別內外，衛威儀。今大學辟雍作「側」字。○菑，側其反，又側吏反。埒垣，力悅反，下音袁。別，彼列反。辟，音壁。【疏】注「菑周埒垣也」者。○解云：猶言周匝爲埒牆。云「今大學辟雍作「側」

字」者，謂何氏所注者是「菑」字，今漢時大學辟雍所讀者作「側」字，云「既哭以人爲側」。以臂爲席，臂，車覆

簋。^②○臂，示歷反，^③車覆簋也。一音呼閭反。^④覆

簋，力丁反。【疏】注「臂覆簋」。^⑤○解云：簋卽式也，但

車式以簋爲之，有豎者，有橫者，故《考工記》注云：「櫛，

式之植者橫者也。」禮，君羔臂虎植，大夫，士鹿臂豹植者

是也。以鞶爲几，以遇禮相見。以諸侯出相遇

之禮相見。○鞶，音安。孔子曰：「其禮與其辭

足觀矣。」言昭公素能若此，禍不至是。主書者，喜爲

大國所唁。地者，痛錄公，明臣子當憂納公也。【疏】注

「地者痛錄」至「公也」。○解云：書其唁公于野井者，正

欲痛公而詳錄之。下二十九年春「齊侯使高張來唁公」，

不復書其地，正以公居于運，與在國同，故與此異。下三

①「謙」，阮校：「鄂本『謙』作『嫌』，此誤。」

②「簋」，余本、京都本、再造善本作「簋」。

③「示」，余本、閣本、宋本《釋文》作「亡」，當是。

④「呼閭」，余本作「平閭」，宋本《釋文》作「呼聞」。

⑤「臂覆簋」，此引何注，「臂」下當有「車」字。杉浦

校：「單疏鈔本『臂』下有『車』字，與注合。」

十年「晉侯使荀欒唁公于乾侯」，^①地者，與此同。

冬，十月，戊辰，叔孫舍卒。

十有一月，己亥，宋公佐卒于曲棘。

曲棘者何？宋之邑也。諸侯卒其封內不地，此何以地？憂內也。時宋公聞昭公見逐，

欲憂納之，至曲棘而卒，故恩錄之。【疏】「曲棘者何」。

○解云：欲言宋邑，例所不書，欲言他邑，文無所繫，故執不知問。○「諸侯卒其封內不地此何以地」者。正以桓

五年「陳侯鮑卒」不地，是以弟子據而難之。但宣公九年「晉侯黑臀卒于扈」之下已有成注，故於此省文。

十有二月，齊侯取運。外取邑不書，

此何以書？為公取之也。為公取運以居公，善

其憂內，故書。不舉伐者，以言語從季氏取之。月者，善

錄齊侯。○為公，于僞反，注同。【疏】「外取邑不」至「以書」。○解云：正據襄元年傳云「魚石走之楚，楚為之伐

宋，取彭城以封魚石」，而經不書楚取彭城是也。但隱四年春「莒人伐杞，取牟婁」之下有注，故此省文。○注「不

舉伐者」。○解云：正以隱四年春，「莒人伐杞，取牟婁」，舉伐言取，故決之。云「月者，善錄齊侯」者，正以哀八年

「夏，齊人取譚及鄆」，外取邑而書時，今此書月，正以善憂內，詳錄齊侯矣。

二十有六年，春，王正月，葬宋元公。

三月，公至自齊，居于運。月者，閔公失國

居運。致者，明臣子當憂納公，不當使居運。後不復月

者，始錄可知。○不復，扶又反，下同。【疏】「三月公」至

「于運」。^②○解云：案上「公遜于齊，次于楊州。齊侯唁

公于野井」，似不入齊國都，而得言「至自齊」者，《穀梁

傳》云：「公次于楊州，其曰至自齊，何也？」注云：「據公

但至楊州，未至齊。」以齊侯之見公，可以言至自齊也，

注云：「齊侯唁公于野井，以親見齊侯為重，故可言至自

齊。」居于鄆者，公在外也，注云：「若但言公至自齊，而

不言居于鄆，則嫌公得歸國，欲明公實在外，故言居于

① 「三十年」，阮校：「浦鍾云：『十』下脫『一』。按：浦說是也。」

② 「三月公至自齊」，杉浦校：「單疏鈔本作『三月公至自齊居于鄆』。按：依此本，則經文本作『鄆』也。」

鄆。」○注「月者閔」至「居運」者。^①正以凡致例時故也。○注「致者」至「可知」。○解云：桓元年「三月，公會鄭伯于垂」之下，注云：「不致者，爲下去王，適足起無王，未足以見無王罪深淺，^②故復奪臣子辭，成誅文也。」然則昭公失所，爲臣所逐，而致之者，正以罪輕於桓公，明其臣子當憂納公故也。云「後不復月者，始錄可知」，^③即此秋「公至自會」，二十七年冬「公至自齊，居于鄆」之屬是也。^④

夏，公圍成。

書者，惡公失國，幸而得運，不修文德以來之，復擾其民圍成。不從叛書者，本與國俱叛，故不得復以叛爲重。不從定公，又以親圍下邑爲譏者，昭無臣子，又即如定公當致也。^⑤○惡，烏路反。【疏】注「不從」至「爲重」。○解云：成三年「秋，叔孫僑如率師圍棘。棘者何？汶陽之不服邑也。其言圍之何？不聽也」。注云：「不聽者，叛也。不言叛者，爲內諱，故書圍以起之。」然則今此圍成是圍叛之文，而知爲惡公書之者，正以本與國俱叛，理宜不復以叛爲重故也。○注「不從」至「臣子」。○解云：定十二年「十有二月，公圍成」，注云「天子不親征下土，諸侯不親征叛邑，不能圍成」，^⑥不能服，不能以一國爲家，甚危，若從他國來，故危錄之「是

也。然則此經不書月，亦與彼異，而注不決之者，省文從可知。

秋，公會齊侯、莒子、邾婁子、杞伯，盟于剡陵。^⑦

不月者，時諸侯相與約，欲納公，故內喜爲大信辭。○鄆，音專，本亦作「專」。【疏】注「不月」至「信辭」。○解云：《春秋》之義，大信者時，小信者月，不信者

^①「注月者閔至居運者」，阮校：「閔、監本同，毛本下增

「○解云」，何校本無「○解云」。杉浦校：「單疏鈔本

作「注月者閔公失國居于鄆者」，下無「○解云」。

^②「罪」下，阮校：「何校本有「之」字。」今按：桓公元年

何注作「適足以起無王，未足以見無王罪之深淺」，有

「之」字是。

^③「知」下，杉浦校：「單疏鈔本有「者」字。」

^④「鄆」，昭公二十七年經作「運」。

^⑤「又」，阮校：「蜀大字本、閩、監、毛本同，鄂本作

「入」，則上屬，言昭無臣子納公也。」

^⑥「不能圍成」，阮校：「定十二年注作「公親圍成」，此

誤。」杉浦校：「單疏鈔本「不能圍成」作「公親圍

成」。

^⑦「剡陵」，阮校：「鄂本、閩、監、毛本同，唐石經、蜀大

字本「剡」作「鄆」。

日。剽陵之會，^①無相犯，復無大信，止合書月，而書時者，正以約欲納公，故爲大信辭矣。

公至自會，居于運。致會者，責臣子，明公已

得意于諸侯，不憂助納之，而使居于運。【疏】注「致會者」至「于運」。○解云：莊六年注云：「公與二國以上出會盟，得意致會，不得意不致。」即哀十三年夏「公會晉侯及吳子於黃池」，「秋，公至自會」，宣七年「冬，公會晉侯」以下「于黑壤」之屬是也。然則公與二國以上出會盟，得意致會，明公已得意於諸侯。

九月，庚申，楚子居卒。

冬，十月，天王入于成周。成周者

何？東周也。是時王猛自號爲西周，天下因謂成

周爲東周。【疏】「成周者何」。○解云：欲言正居，經無

京師之稱，欲言非正居，天王入之，故執不知問。○注

「是時王」至「西周」。○解云：謂是上二十二年時。故彼

經稱「秋，劉子、單子以王猛入於王城」，傳云「王城者

何？西周也」，注云「時居王城邑，自號西周王」是也。

其言人何？據入者纂辭。【疏】注「據入者纂辭」。

○解云：即莊六年「衛侯朔入于衛」之下，傳文所云「其言

人何？纂辭也」是也。不嫌也。上言天王者，^②有天

子已明，不嫌爲纂。主言人者，起其難也。不言京師者，

起正居在成周，^③實外之。月者，爲天下喜錄王者反正

位。○爲天，于僞反。【疏】注「上言」至「難也」。○解

云：謂此經上有天王之文，下雖言人，非纂可知。上二十

三年秋「天王居于狄泉」，傳云：「此未三年，其稱天王者

何？著有天子。」^④然則此注云「著有天子已明」者，取上

傳之文。云「主言人者，起其難也」者，正以隱八年春「人

邴」之下，傳：「其言人何？難也。」莊二十四年秋「夫人

姜氏入」之下，傳云：「其言人何？難也。」然則入者，重

難之辭，故云「主言人者，起其難也」。○注「不言」至「外

之」。○解云：桓九年「春，紀季姜歸于京師」之下，傳

云：「京師者何？天子之居也。」則天子之居，乃京師是

①「剽陵之會」，杉浦校：「單疏鈔本作『今邴陵之會』。」

②「者」，鄂本、閣本作「著」，屬下，當是。

③「正」，阮校：「鄂本作『王』，當據正。」

④「其稱天王者何著有天子」，昭公二十三年傳作「其稱天王何？著有天子也」。

也。今言天王入于成周，不言入京師者，^①正欲起其正居在成周故也。所以能起之者，既爲天王所入，正居明矣。言「實外之」者，正以天子之重，海內瞻望，宜親九族，以自衛守，而辟庶孽，蒙塵于外，經歷數年，方歸舊守，是以不言京師，欲以外之。然則不言京師，兼二義矣。初起成周爲王居，終實外天子，故云「不言京師」，^②起正居在成周，實外之」也。注云「月者」，^③爲天下喜錄王者反正位」者，正以此上二十二年「秋，劉子、單子以王猛入于成周」，^④不書月。今此月者，爲天下喜錄王者反正位故也。

尹氏、召伯、毛伯以王子朝奔楚。

立王子朝獨舉尹氏，出奔并舉召伯、毛伯者，明本在尹氏，當先誅渠帥，^⑤後治其黨，猶楚嬰齊。○渠率，所類反，或作「帥」。【疏】「尹氏召伯」至「奔楚者」。○解云：《穀梁》與此同，《左氏》「召伯」作「召氏」。○注云「立王子朝獨舉尹氏者」。^⑥○解云：即上二十三年秋，「尹氏立王子朝」是也。云「當先誅渠帥，後治其黨」者，漢之賊首，皆謂之渠帥，故何氏云焉。云「猶楚嬰齊」者，成二年冬，「十有一月，公會楚公子嬰齊于蜀。丙申，公及楚人」以下「盟于蜀」，彼注云「上會不序諸侯大夫者，嬰齊，楚專政驕蹇臣也，數道其君率諸侯侵中國，故獨先舉于上，乃貶之」。

明本在嬰齊，當先誅其本，乃及其末」是也。

二十有七年，春，公如齊。公至自齊，居于運。

夏，四月，吳弑其君僚。不書闔廬弑其君者，爲季子諱，明季子不忍父子兄弟自相殺，讓國闔廬，欲其享之，故爲沒其罪也。不舉專諸弑者，起闔廬當國，賤者不得貶，無所明文，方見爲季子諱，本不出賊，以明闔廬罪，^⑦雖可貶，猶不舉。月者，非失衆見弑，故不略之。○爲季，于僞反，下同。見，賢徧反。【疏】注「不書闔廬弑其君者」。○解云：襄二十九年，「吳子使札來聘」，下傳云「闔廬曰：『先君之所以不與子國，而與弟者，」

①「入」下，杉浦校：「單疏鈔本有『于』字。」

②「帥」下，杉浦校：「單疏鈔本有『者』字。」

③「注」，杉浦校：「單疏鈔本無。」

④「成周」，昭公二十二年作「王城」。

⑤「帥」，阮校：「鄂本同，閩、監、毛本作『率』。按《釋文》作『渠率』，云『或作帥』。」

⑥「云」，單疏鈔本、毛本無此字。

⑦「明」，阮校：「鄂本作『除』，當據正。解云：『今此月者，直是本不出賊，以除闔廬罪。』可證本是『除』字。」

凡爲季子故也。將從先君之命與，則國宜之季子者也。如不從先君之命與，則我宜立者也。僚烏得爲君乎？」^①於是使專諸刺僚者，^②闔廬弑僚之文也。今不書闔廬弑，爲季子諱不討賊故也。云「明季子不忍父兄自相殺」者，^③即彼傳云「而致國乎季子，季子不受，曰：『爾弑吾君，吾受爾國，是吾與爾爲篡也。爾殺吾兄，吾又殺爾，是父子兄弟相殺，終身無已也。』」去之延陵，終身不入吳國者，是其文也。云「不舉專諸弑者」，桓二年「春，王正月，戊申，宋督弑其君與夷」之下，何氏注云：「督不氏者，起馮當國。」然則彼經貶去督之氏者，起其弑君，取國與馮。所以不舉專諸弑僚，見取國與闔廬者，正以其賤不得貶之，假令書見，正得稱人，文無所明故也。注「月者，非失衆見弑」，^④故不略之者，文十八年冬，「莒弑其君庶其」，傳云：「稱國以弑何？稱國以弑者，衆弑君之辭。」何氏云：「一人弑君，國中人人盡喜，故舉國以明失衆，當坐絕也。例皆時者，略之也。」然則稱國以弑者，例皆不月以略之。今此月者，直是本不出賊，以除闔廬罪，是以稱國，非失衆見弑之例，故不略之。

楚殺其大夫卻宛。○卻宛，去逆反，下紆

宛反。^⑤

秋，晉士鞅、宋樂祁犂、衛北宮喜、曹人、邾婁人、滕人會于扈。○犂，力兮反，又力私反。^⑥

冬，十月，曹伯午卒。

邾婁快來奔。邾婁快者何？邾婁之

大夫也。邾婁無大夫，此何以書？以近

書也。說與鼻我同義。○邾婁快，本又作「噲」，苦夾

反。【疏】注「說與鼻我同義」。○解云：即襄二十三年

「夏，邾婁鼻我來奔」，傳云：「邾婁鼻我者何？邾婁大夫

也。邾婁無大夫，此何以書？以近書也。」何氏云：「以

①「烏」，襄公二十九年傳及單疏鈔本作「惡」。

②「者」，阮校：「閩、監、毛本『者』改『著』。何煌

云：『者』疑作『是』。」

③「父兄」，何注作「父子兄弟」。

④「非」，原作「明」，阮校引浦鏜云：「『非』誤『明』。」杉浦校：「單疏鈔本『明』作『非』。」今按：何注作「非」，據改。

⑤「紆宛反」，閩本、宋本《釋文》作「紆阮反」，當是。

⑥「私」，宋本《釋文》作「秘」。

奔無他義，知以治近升平書也。所傳聞世，見治始起，外諸夏，錄大略小，大國有大夫，小國略稱人。所聞之世，內諸夏，治小如大，廩廩近升平，故小國有大夫，治之漸也。見於邾婁者，以近始也。獨舉一國，^①時亂實未有大夫，治亂不失其實，故取足張法而已。」然則邾婁快亦以奔，無它義，知以治近太平書也。見於邾婁者，以其近魯故也。太平世獨舉一國者，時亂實未有大夫，治亂不失其實，但取足張法而已，故云「說與鼻我同義」也。云云之說，在襄二十三年。

公如齊。公至自齊，居于運。

二十有八年，春，王三月，葬曹悼公。

月者，爲下出也。○爲，于僞反。【疏】注「月者爲下出也」。○解云：正以上十八年三月「曹伯須卒」，「秋，葬曹平公」，二十七年「冬，十月，曹伯午卒」。然則曹於所見之世，止自卒月葬時，^②故知此月宜爲其下事出矣。

公如晉，次于乾侯。乾侯，晉地名。月者，閏

公內爲強臣所逐，外如晉不見答，次于乾侯，不諱者，憂危不暇殺恥。後不月者，錄始可知。【疏】注「後不月」至「可知」。○解云：即下二十九年春「公如晉，次于乾侯」

是也。

夏，四月，丙戌，鄭伯甯卒。○伯甯，乃定反，下同，《左氏》并下滕子名並作「寧」。

六月，葬鄭定公。

秋，七月，癸巳，滕子甯卒。

冬，葬滕悼公。

二十有九年，春，公至自乾侯，居于運。不致以晉者，不見容于晉，未至晉。

齊侯使高張來唁公。言來者，居運，從國內

辭。書者，如晉不見答，喜見唁也。不月者，例時也。

【疏】注「言來」至「內辭」者。○解云：正以下三十一年，「晉侯使荀欒唁公于乾侯」，不言來故也。云「不月者，例時也」者，正以經不月，故知例然，則知下文荀欒唁公之徒，雖在日月之下，不蒙日月可知。

① 「以近始也獨舉一國」，阮校：「何校本『國』下有『者』字，是也。」杉浦校：「單疏鈔本作『自近始也獨舉一國者』。」

② 「止」，杉浦校：「單疏鈔本作『正』，爲是。」

公如晉，次于乾侯。

夏，四月，庚子，叔倪卒。

秋，七月。

冬，十月，運潰。邑不言潰，此其言潰

何？據國曰潰，邑曰叛。【疏】注「據國曰潰邑曰叛」。

○解云：即僖四年蔡潰，文三年沈潰者，是「國曰潰」之

文。襄二十六年春「衛孫林父入于戚，以叛」，定十一年

「春，^①宋公之弟辰及仲佗、石彊、公子池，自陳入于蕭，以

叛」，是「邑曰叛」之文。郭之也。郭，郭。【疏】注「郭

郭」者。「郭之」猶云「國之」，但古今異語也。曷爲郭

之？據成三年棘叛不言潰也。【疏】注「據成」至「潰

也」。○解云：即彼經云「叔孫僑如帥師圍棘。棘者何？

汶陽之不服邑也。其言圍之何？不聽也」。彼注云「不

聽者，叛也」是也。君存焉爾。昭公居之，故從國言

潰，明罪在公也。不言「國之」，言「郭之」者，公失國也。

不諱者，責臣子當憂而納之，殺恥不如救危也。孔子

曰：「不患寡而患不均，不患貧而患不安。」其本乃由于圍

成，失大得小，而不能節用。【疏】注「不言國之言郭之

者」。○解云：正以桓七年春，「焚咸丘」之下，傳云：「咸

丘者何？邾婁之邑也。曷爲不繫乎邾婁？國之也。」

莊二年「夏，公子慶父帥師伐於餘丘」之下，傳云：「於餘

丘者何？邾婁之邑也。曷爲不繫乎邾婁？國之也。」

然則彼二文皆言「國之」，今言「郭之」者，正以昭公居

國，^②裁得國外土地而已，其國內宗廟，非公之有，故傳言

「郭之」，不言「國之」耳。云孔子曰「不患寡而患不均，不

患貧而患不安」者，《論語》文。言爲國家者，不患土地人

民之寡少，而患政令之不均平，不患國無儲積，而患君臣

上下之不能相安。而引之者，欲道昭公政令失所，是以

出奔。今居小地，而復圍成，擾亂其民，令之不安，由茲

潰散，無寸土可居，久不得國，而卒於外者，身自取之者

也。云「其本乃由于圍成者」，圍成即二十六年「夏，公圍

成」是也。失魯之大，而得運邑，故曰「失大得小」，不能

自節約而用之，乃復擾亂其民圍成也。

①「一」，原作「三」。阮校引浦鏜云：「『一』誤『三』。」今

按：宋公之弟辰等「自陳入于蕭，以叛」在定公十一年，據單疏鈔本及阮校改。

②「居」，單疏鈔本、閩本作「失」，當是。

三十年，春，王正月，公在乾侯。月者，

閔公運潰，無尺土之居，遠在乾侯，故以存君書，明臣子當憂納之。【疏】注「故以存君書」者。○解云：即襄二十九年：「春，王正月，公在楚。何言乎公在楚？正月以存君也。」彼注云：「正月，歲終而復始，臣子喜其君父與歲終而復始，執贊存之，故言在。」今昭公運潰，無尺寸之土可居，^①遠在他邦，故以存君書之，故云「公在乾侯」。

夏，六月，庚辰，晉侯去疾卒。○去，起

呂反。

秋，八月，葬晉頃公。○頃，音傾。

冬，十有二月，吳滅徐。徐子章禹奔

楚。至此乃月者，所見世始錄夷狄滅小國也。不從上

州來，巢見義者，固有出奔可責。○見，賢徧反。【疏】注

「至此」至「國也」。○解云：正以僖二十六年「秋，楚人滅

隗，以隗子歸」，何氏云：「不月者，略夷狄滅微國也。」然

則此亦夷狄滅微國，而書月者，所見之世故也。○注「不

從」至「可責」。○解云：吳滅州來，在上十三年冬。吳滅

巢，在上二十四年冬。然則州來與巢，皆當所見世，而不

書月以見之，至此乃月者，正以既滅其國，復奔其君，因

責章禹不能死位，是以於二國皆不書月也。於上經既不書月，明其還同所聞之例，故何氏於「州來」之下○注云「不月者，略兩夷」是也。^②

三十有一年，春，王正月，公在乾侯。

季孫隱如會晉荀欒于適歷。時晉侯使荀

欒責季氏不納昭公，為此會也。季氏負捶謝過，^③欲納昭

公，昭公創惡季氏不敢入。公出奔在外，無君命，所以書

會，以殊外言來者，^④從王魯錄。諱亟取邑，卒大夫者，盈

孫文。○荀欒，本又作「欒」，又作「欒」，示滴欒也。^⑤適，

丁歷反，一音狄。負簠，章蘂反，本又作「捶」。惡，烏路

^①「寸」，原作「十」，今據京都本、再造善本、中華本、閩本改。

^②「○」，當衍。

^③「負捶」，阮校：「閩、監、毛本『捶』作『極』，疏同。《釋文》作『負簠』，云『本又作捶』。此本疏標起訖亦作『負簠』。」

^④「以」，阮校：「鄂本作『而』。」

^⑤「荀欒本又作欒又作欒示滴欒也」，宋本《釋文》作「荀欒，本又作欒，又作欒，亦滴欒也，皆同力狄反，一音與灼反」。

反。亟，去冀反。孫，音遜。【疏】注「季氏負簠」至「不敢入者」。○解云：《春秋說文》。彼注云：「負捶者，聽刑之禮也。」昭公創惡季氏不敢入者，《左傳》亦有其文也。○注「公出」至「魯錄」。○解云：《春秋》之義，待君命然後卒大夫，明其非君命者，不錄之也。今昭公不在，所以書「季孫隱如會晉荀欒于適歷」，又書「黑弓以濫來奔」之文，又以殊外者，從王魯錄文，故得然，不為爾時有君命也。①云「諱亟取邑」者，即下三十二年「取闕」，傳云：「闕者何？邾婁之邑。」②曷為不繫乎邾婁？諱亟也。注云「與取濫為亟」是也。云「卒大夫者，盈孫文」者，即上二十五年「公遜于齊」，後「叔孫舍卒」，二十九年「叔倪卒」之徒是也。然則《春秋》之義，為君父諱惡，《春秋》之義，待君命然後卒大夫，然今君不在國，而書大夫之卒，故須解之。然則取闕不繫邾婁，乃書大夫之卒者，正欲盈足諱奔言遜之義，故云「盈孫文」。

夏，四月，丁巳，薛伯穀卒。始卒便名、日、

書葬者，薛比滕最小，迫後定，寅皆當略。【疏】注「始卒便名日書葬者」。○解云：《春秋》之義，小國始卒，名、日及葬未能悉具，會二見之後，方始能備，即宣九年秋「八月，滕子卒」，成十六年「夏，四月，辛未，滕子卒」，昭三年

「春，王正月，丁未，滕子泉卒」，「五月，葬滕成公」之徒是也。言「薛比滕最小」者，正以滕子卒於宣公之篇，薛今始卒，故云比於滕為小國也。而今始卒日，即得名、葬具書，正由於後定，寅皆當見略，迫此之故，是以二注備書矣。其定見略者，即定十二年「春，薛伯定卒」，彼注云「不日月者，子無道，當廢之，而以爲後，未至三年，失衆見弑，危社稷宗廟，禍端在定，故略之」是也。其寅見略者，即哀十年夏，「薛伯寅卒」，彼注云「卒、葬略者，與杞伯益姑同」是也。昭六年「春，王正月，杞伯益姑卒」，彼注云「不日者，行微弱，故略之」。人所見世，責小國詳，始錄內行也。諸侯內行小失不可勝書，故於略責之，③見其義「是也」。

晉侯使荀欒唁公于乾侯。

秋，葬薛獻公。

冬，黑弓以濫來奔。文何以無邾婁？

據讀言邾婁。○黑弓，二傳作「黑肱」。濫，力甘反，又力

①「爲」，杉浦校：「單疏鈔本作『謂』。」

②「邑」下，昭公三十二年傳有「也」字。

③「於」下，杉浦校：「單疏鈔本、毛本有『終』字。」

暫反。【疏】「冬黑弓」者。謂當時公羊子口讀邾婁黑弓矣。通濫也。通濫爲國，故使無所繫。曷爲通濫？據庶其不通也。【疏】注「據庶其不通也」者。○解云：即襄二十一年春，「邾婁庶其以漆，聞丘來奔」是也。賢者子孫，宜有地也。賢者孰謂，謂叔術也。叔術者，邾婁顏公之弟也，或曰群公子。【疏】注「叔術者邾婁」至「弟也」。○解云：謂母弟也。「或曰群公子」，謂庶弟也。何賢乎叔術？據叔術不書。讓國也。其讓國奈何？當邾婁顏之時，顏公時也。邾婁女有爲魯夫人者，則未知其爲武公與？懿公與？孝公幼，不知孝公者，邾婁外孫邪？將妾子邪？○武公與，音餘，下及注皆同。顏淫九公子于宮中，所與淫公子凡九人。【疏】注「所與」至「九人」。○解云：謂顏公一人，^①不應並淫九人，故以「所」言之。因以納賊，則未知其爲魯公子與？邾婁公子與？臧氏之母，養公者也。君幼則宜有養者，大夫之妾，士之妻，禮也。則未知臧氏之母者，曷爲者也。

養公者必以其子入養，不離人母子，因以娛公也。

【疏】「則未知其爲魯公子與」者。○解云：爲內通于魯公子也。○「邾婁之公子與」者。不知爲是邾婁公子者與？古者諸侯一娶九女，二國媵之。而邾婁一國，以并有九女於魯宮內者，蓋所取於邾婁相通爲九人，不必盡是一人妻矣。「大夫之妾，士之妻」。^②○注「禮也」。○解云：「大夫之妾，士之妻」，《禮記·內則》文，故注云「禮也」。○「則未知臧氏之母者曷爲者也」。○解云：案《內則》，大夫之妾士之妻並陳之，謂士妻不吉，乃取大夫之妾，亦得事不具矣。何者？乳食一男，何假二人乎？則未知臧氏之母，^③爲是大夫之妾，爲是士之妻，^④故曰「曷爲者」。臧氏之母聞有賊，以其子易公，抱公以逃。以身死公，則可以其子易公，非事夫之義，然而於王法當賞，以活公爲重也。賊至，湊公寢而弑

①「謂」，杉浦校：「單疏鈔本作「計」。」

②「大夫之妾士之妻」，此七字蓋單疏本所標注起訖者，當刪去。

③「母」下，杉浦校：「單疏鈔本有「者」字，與傳文合。」

④「妻」，原作「妾」，今據本傳及中華本、閣本改。

之。弑臧氏子也。不知欲弑孝公者，納篡邪？將利其國也？○湊，七豆反。臣有鮑廣父與梁買子者，聞有賊，趨而至。臧氏之母曰：「公不死也，在是。吾以吾子易公矣。」於是負孝公之周訴天子，天子爲之誅顏而立叔術，反孝公于魯。顏夫人者，姬盈女也，國色也，其言曰：「有能爲我殺殺顏者，吾爲其妻。」殺顏者，鮑廣父、梁買子也。婦人以貞一爲行，云爾非德也。①○愬，音素，本亦作「訴」。爲之，于僞反，下「爲我」、「爲之」，「則爲」並同。姬，紆具反，一音紆羽反。爲行，下孟反，下「殺顏者之行」亦同。【疏】姬盈女也者。○解云：謂此老姬是盈姓之女。○「國色也」者。○解云：謂顏色一國之選。叔術爲之殺殺顏者，而以爲妻。利其色也。有子焉，謂之盱、夏父者，其所爲有於顏者也。爲顏公夫人時所爲顏公生也。②○盱，許于反，又許孤反。本或作「盱」，一音夸。夏父，戶雅反。盱及夏父，邾顏公之二子。【疏】「謂之盱夏父者」至「有於顏者也」。○解云：謂爲顏公妻時所以

有之者。盱幼而皆愛之，叔術、姬盈女皆愛盱。食必坐二子於其側而食之。有珍怪之食，珍怪，猶奇異也。○而食，音嗣。盱必先取足焉。夏父曰：「以來，猶曰：以彼物來置我前。人未足，人，夏父自謂也。而盱有餘。」言盱所得常多。叔術覺焉，覺，悟也。知小爭食，③長必爭國。《易》曰「君子見幾而作」，「知幾其神乎」，「幾者，動之微者，事之先見」。④○長，丁丈反。先見，賢偏反，下「欲見」、「見王者」同。【疏】注「易曰」至「先見」。○解云：皆出《下繫辭》。彼文云「知幾其神乎？君子上交不諂，下交不瀆，其知幾乎？幾者，動之微，吉之先見者也。君子見幾而作，不俟終日」是也。曰：「嘻！此誠爾國也」

①「德」，阮校：「鄂本無，此誤衍。蜀大字本脫「也」字。」

②「爲顏公夫人時所爲顏公生也」，阮校：「按：下「爲顏公」三字誤衍複上，當刪正。」

③「小」，阮校：「鄂本同，閩、監、毛本作「少」。」

④「者事之先見」，鄂本作「吉事之先見」。《周易·繫辭下》作「吉之先見者也」。

夫！」起而致國于夏父，夏父受而中分之。叔術曰：「不可。」三分之，叔術曰：「不可。」四分之，叔術曰：「不可。」五分之，然後受之。五分受其一。○曰嘻，許其反。也夫，音扶。

【疏】注「五分受其一」。○解云：服虔成《長義》云「邾婁本附庸三十里耳，而言五分之，爲六里國也」者，彼乃《左氏》之偏辭，未足以奪《公羊》以爲邾婁本大國，但《春秋》之前在名例，隱元年何氏有成解。公扈子者，邾婁之父兄也。當夫子作《春秋》時，於邾婁君爲父兄之行。公扈者，氏也。○之行，戶郎反。習乎邾婁之故，故，事也。道所以言也。【疏】注「道所」至「言也」。○解云：謂道下傳所言矣。其言曰：「惡有言人之國賢若此者乎？惡有，猶何有，寧有此之類也。言賢者，甯有反妻嫂，殺殺顏者之行乎？○惡有，音烏，注同。誅顏之時天子死，^①叔術起而致國于夏父。」言叔術本欲讓，迫有誅顏天子在爾，故天子死則讓，無妻嫂惑兒爭食之事。^②當此之時，邾婁人

常被兵于周，曰：「何故死吾天子？」猶曰：何故死畜吾天子，違生時命而立夏父乎？此天子死則讓之效也。夫子本所以知上傳，^③賢者惡少功大也。猶律一人有數罪，以重者論之，《春秋》滅不言人是也。案叔術妻嫂，雖有過惡，當絕身無死刑，當以殺殺顏者爲重。宋繆公以反國與與夷，除馮弒君之罪，死乃反國，不如生讓之大也。馮殺與夷，亦不輕于殺殺顏者，比其罪不足而功有餘，故得爲賢。傳復記公扈子言者，欲明夫子本以上傳通之，故公扈子有是言。○數，所主反。復，扶又反。【疏】注「夫子本所以」至「惡少功大也」者。○解云：上傳，謂「五分之，然後受之」以上矣。○云「春秋滅不言人是也」者，即莊十年傳云「戰不言伐，圍不言戰，人不言圍，滅不言人，書其重者也」是。云「當絕身無死刑」者，但當絕其身以爲不修，不合殺之，故曰「無死刑」。

- ① 「誅顏之時天子死」，阮校引惠棟云：「謂誅顏天子死也，作一句讀。按：『時』字疑衍。」
- ② 「惑」，阮校：「鄂本作『惑』，當據正。」
- ③ 「知」，阮校：「鄂本作『如』，此誤。」

然則外內亂，^①鳥獸行，則滅之者，謂姊妹之徒，^②今一則非父子聚麀，二則嫂非姑姊妹故也。○注「當以殺」至「爲重」。○解云：謂犯王命殺魯賢臣，故以爲重。○注「宋繆公以反國與」至「馮弑君之罪」。○解云：宋繆公反國之事，在隱三年，彼傳文具矣。其除馮弑君之罪者，即桓二年「宋督弑其君」之下，注云「督不氏者，起馮當國。不舉馮弑爲重者，繆公廢子而反國，得正，故爲之諱」是也。注云「死乃反國」，^③不如生讓之大也者，言繆公死乃反國，非其全讓之意，不如叔術生讓，其功大矣。注云「馮殺與夷，亦不輕於殺殺顏者」，謂馮爲弑君，叔術爲犯王命，皆是惡逆，其罪勢等矣。云「比其罪不足而功有餘，故得爲賢」者，上解云其罪勢等矣，而言罪不足者，謂犯王命，殺魯大夫，豈如宋馮弑君乎？故以爲罪少于馮矣。其罪既少，其功有餘，故得賢之。通濫，則文何以無邾婁？據國未有口繫于人。【疏】注「據國」至「于人」。○解云：言若通濫是國，宜應特達，何故文上無邾婁而已，其口仍繫邾婁言之乎？故注云「據國未有口繫于人」。天下未有濫也。欲見天下實未有濫國，《春秋》新通之爾，故口繫于邾婁。天下未有濫，則

其言「以濫來奔」何？據上說天下實未有濫者，

言《春秋》新通之也。《春秋》所通之，^④君文成矣，不言濫黑弓來奔，而反與大夫竊邑來奔同文。【疏】注「而反與大夫竊邑來奔同文」者。○解云：即襄二十一年春，「邾婁庶其以漆，閭丘來奔」之徒是。叔術者，賢大夫也。絕之，則爲叔術不欲絕，不絕，則世大夫也。此解不言「濫黑弓」意。叔術者，賢大夫也。如不口繫邾婁，文言「濫黑弓來奔」，則爲叔術賢心不欲自絕于國，又觸天下實有濫，無以起新通之，文不可設也。如口不絕邾婁，文言「濫黑弓來奔」，則嫌氏邑，起本邾婁世大夫，《春秋》口繫通之，文亦不可施。【疏】注「起本邾婁」至「可施」。○解云：若口云邾婁，文言「濫黑弓來奔」，即嫌大夫氏邑，欲起黑弓本是邾婁世大夫，口繫于

①「外內」，阮校：「閩、監、毛本作「內外」。」

②「姊妹」，「姑」下當脫「姊」字。

③「注」，杉浦校：「單疏鈔本無「注」字，下「馮殺」，「云」上亦無。」

④「所」，阮校：「鄂本「所」作「新」，此誤。上云「春秋新通之」可證。」

邾婁，欲通之爲世大夫故也。大夫之義不得世，

故於是推而通之也。推猶因也，因就大夫竊邑奔

文通之，則大夫不世，叔術賢心不欲自絕，兩明矣。主書者，在《春秋》前，見王者起，當追有功，顯有德，興滅國，繼絕世。【疏】注「主書者」至「繼絕世」。○解云：隱元年

注云：「諸大夫立隱不起者，在《春秋》前，明王者受命，不追治前事。」今此追之者，《春秋》之義，勸其後功，是以上二十年傳曰「君子之善善也長，惡惡也短，惡惡止其身，善善及子孫。賢者子孫，故君子爲之諱」是也。

十有二月，辛亥，朔，日有食之。是後昭

公死外，晉大夫專執，楚犯中國園蔡也。【疏】注「是後昭公死外」者。○解云：即下三十二年冬，「公薨于乾侯」是。云「晉大夫專執」者，即定元年「三月，晉人執宋仲機于京師」，①傳云「其稱人何？貶。曷爲貶？不與大夫專執也」是。云「楚犯中國園蔡也」者，即定四年秋「楚人圍蔡」是也。直言「園蔡」足矣，何須言「楚犯中國」？欲言日食爲夷狄強，諸夏微之象故也。

三十有二年，春，王正月，公在乾侯。

取闕。闕者何？邾婁之邑也。曷爲

不繫乎邾婁？諱亟也。與取濫爲亟。○闕，口

暫反。亟，去冀反，注同。【疏】「闕者何」。○解云：欲言是國，諸典未聞，欲言是邑，文無所繫，故執不知問。○注「與取濫爲亟」。○解云：「取」亦作「受」字者。②二年之間，比取兩邑，故以爲亟而諱之矣。

夏，吳伐越。

秋，七月。

冬，仲孫何忌會晉韓不信、齊高張、宋仲幾、衛世叔申、鄭國參、曹人、莒人、邾婁人、薛人、杞人、小邾婁人城成周。書者，起時善，其修廢職，有尊尊之意也。孔子曰：「謹權量，審法度，修廢官，四方之政行焉。」言成周者，起正居，③實外之。○量，音亮。【疏】注「書者」至「意也」。○解云：隱

①「宋仲機」，定公元年經作「宋仲幾」。阮校：「閩、監、毛本『機』改『幾』，是也。」

②「取亦作受字者」，杉浦校：「按：莊二年疏引此注『與受濫爲亟』，『取』作『受』。」

③「起正居」，阮校：「疏中引注作『欲起正居』，此脫『欲』字。」

七年「夏，城中丘」，傳云：「何以書？以重書也。」注云：「以功重故書也。當稍稍補完之，至令大崩弛壞敗，然後發衆城之，猥苦百姓，虛空國家，^①故言城，明其功重，與始作城無異。」然則天子之城，不時修理，至令大壞，方始城之。而書者，正欲起其當時之善故也。何者？當是之時，天子陵遲，諸侯奢縱，忽能修其廢職，有尊尊之心，是以書見，故曰「起時善」。云「孔子曰謹權量」至「行焉」者，《論語》文。彼注云「言成周者」，^②欲起正居，實外之「，正以不言京師，而言成周者，欲起正居在成周故也。言「實外之」者，正以王微弱，不能守成周，不是小事，猥苦天下，是以不言京師，實外天子。云云之說，在上二十六年。

十有二月，己未，公薨于乾侯。

監本附音春秋公羊注疏昭公卷第二十四

① 「虛空」，單疏鈔本作「空虛」，與隱公七年注合。

② 「彼注」，阮校：「按：「彼」字當衍，何校本無「彼」字。」杉浦校：「單疏鈔本無「彼注」二字，當爲衍文。」

監本附音春秋公羊注疏定公卷第二十五

起元年，盡五年^①。○《釋文》：何以定公爲昭

公子，與《左氏》異。

何休學

元年，春，王。定何以無正月？據莊公

雖不書即位，猶書正月。【疏】注「據莊」至「正月」。○解

云：即莊元年經云「元年，春，王正月。三月，夫人孫于

齊」是也。案莊公之經，上有正月，下有三月。今定公亦

下有三月，而上無正月，故據之。若然，案隱公之經亦云

「元年，春，王正月」，下云「三月，公及邾婁儀父盟于

昧」，^②亦是上有正月，下有三月，而不據之者，正以隱公

所承，不薨于外，且欲讓桓，位非己有，與定公不類，寧得

據之？其閔、僖之屬，雖承弑君之後，其所承者，皆在位

見弑，元年之下復無三月之文，與定不同，故不據之。然

則桓公戕于齊，昭公卒于外，亦是不類而得據之者，正以

昭公失道，爲臣所逐，終死于外，恥與桓同，故據之耳。

正月者，正即位也。本有正月者，^③正諸侯之即

位。【疏】注「本有」至「即位」。○解云：案隱元年傳云：

「何言乎王正月？大一統也。」何氏云：「統者，始也，總

繫之辭。夫王者始受命改制，布政施教於天下，自公侯

至於庶人，自山川至於草木昆蟲，莫不一繫於正月，故

云政教之始。」以此言之，似書正月者，爲大一統也。而

言本有正月者，正諸侯即位者，兼二義故也。何氏云自

公侯以下皆繫正月，即是正月者正諸侯即位之義。定

無正月者，即位後也。雖書即位於六月，實當如

莊公有正月。今無正月者，昭公出奔，國當絕，定公不得

繼體奉正，故諱爲微辭，使若即位在正月後，故不書正

月。【疏】「定無正月者即位後也」。○解云：謂定公行即

位之禮在正月之後也。○注「雖書」至「正月」。○解

云：依經及傳，正以定公即位在正月之後，故無正月，何

氏更言「昭公出奔，國當絕，定公不得繼體奉正」者，正以

①「五」，原作「四」，今據中華本、閩本改。

②「昧」，京都本、再造善本作「蔑」。閩本、監本、毛本、
閩本作「昧」，與隱公元年經合。參見隱公元年校記。

③「有」，原重文。阮校：「閩本不疊『有』字。按：下
『有』字衍文。」本疏引不重「有」字，是，今據刪。

書正月，大一統也，明不但一即位而已。且諸侯之法，禮當死位，而昭公不君，棄位出奔，終卒於外，爲辱實甚，論其罪惡，君臣共有，故知魯國之當絕矣，是以何氏消量作如此注。「故諱爲微辭」者，謂經與傳直作無即位，故無正月之義。其定公當絕之文沒而不見，故謂微辭爾。即位何以後？據正月正即位。昭公在外，昭公

喪在外。得人不得人，未可知也。曷爲未可知？據已稱元年。【疏】「得人不得人未可知也」者。

○解云：謂昭公之喪在外，得人不得人未可知，不謂據定公之身也。其實定公先在于內，是以上文已稱元年矣。但以君喪未入，未得正行即位禮，是以即位正月之後，而《左氏》以爲喪及壞隕，公子宋乃先入者，何氏所不取之。○注「據已稱元年」。○解云：謂已稱「元年，春」，似行即位之禮訖，何言昭公之喪得人不得人未可知也？而即位後乎？在季氏也。今季氏迎昭公喪而事之，

定公得即位，不迎而事之，則不得即位。【疏】「在季氏也」。○解云：定公是時雖以先君之喪未入，未行即位之禮，其實爲君之道已成，是以上文得稱「元年，春」矣。但猶微弱，不敢逆其父喪，故云「在季氏也」。定、哀多

微辭。微辭，即下傳所言者是也。定公有王無正月，不務公室，喪失國寶。哀公有黃池之會，獲麟，故總言多。【疏】「定哀多微辭」。○解云：定、哀二君，微辭有五，故謂之多，不謂餘處更有所對。若然，昭與定、哀同是太平之世，所以特言定、哀者，昭公之篇無微辭之事，寧可彊言之乎？○注「微辭」至「是也」。○解云：謂主人習其讀而問其傳，則未知己之有罪焉爾也。○注「定公」至「正月」。○解云：得爲微辭者，實爲昭公出奔國當絕，定公不得繼體奉正，故無正月。如似即位正月之後，是以無正月然，故得謂之微辭。○注「不務公室」。○解云：下二年「夏，五月，壬辰，雉門及兩觀災」，「冬，十月，新作雉門及兩觀」。傳云：「其言新作之何？修大也。」注云：「天災之，當減損如諸侯制，而復修大，僭天子之禮，故言新作以見修大也。」「修舊不書，此何以書？譏。何譏爾？不務乎公室也」，注云：「務猶勉也。不務公室，亦可施於久不修，亦可施于不務如公室之禮，微辭也。」然則書其「新作雉門及兩觀」者，主譏其僭天子之禮，可施於久不修治而錄之，傳云「不務公室」，亦得助成

微辭之義也。○「喪失國寶」。①○解云：下八年冬「盜竊寶玉大弓」，傳云：「寶者何？」璋判白。注云「不言璋言玉者，起珪、璧、琮、璜五玉盡亡之。」②傳特言璋者，③所以郊事天，尤重也。「書大弓者，使若都以國寶書，微辭也」。「謂之寶者，世世寶用之辭」也。④然則特書大弓者，欲通謂之寶，寶即大弓，是可以世世傳保而珠玉之，⑤故謂之寶玉也。○注「哀公」至「言多」。○解云：黃池之會者，即哀十三年夏「公會晉侯及吳子于黃池」，傳云：「吳何以稱子？吳主會也。吳主會，則曷為先言晉侯？不與夷狄之主中國也。其言及吳子何？會兩伯之辭也。不與夷狄之主中國，則曷為以會兩伯之辭言之？重吳也。曷為重吳？吳在是，則天下諸侯莫敢不至也。」彼注云「以晉大國，尚猶汲汲於吳，則知諸侯莫敢不至也。不書諸侯者，為微辭，使若天下盡會之，而魯侯蒙俗會之者，惡愈是也。其獲麟者，即哀十四年「春，西狩獲麟」是也，實為聖漢將興之瑞，周家當滅之象。今經直言獲麟，不論此事，若以麟來，⑥周王更欲中興之兆，得謂之微辭矣。主人習其讀而問其傳，讀謂經，傳謂訓詁，主人謂定公。言主人者，能為主人皆當為微辭，非獨定公。則未知己之有罪焉爾。此假設而言之，

主人謂定、哀也。設使定、哀習其經而讀之，問其傳解詁，則不知己之有罪於是。此孔子畏時君，上以諱尊隆恩，下以辟害容身，慎之至也。【疏】「主人」至「焉爾」。○解云：主人習其讀，⑦謂習其經而讀之也。云「而問其傳」者，謂問其夫子口授之傳解詁之義矣。云「則未知己之有罪焉爾」者，「焉爾」猶「於是」，讀其微辭，意指難明，雖問解詁，亦未知己之有罪乎《春秋》。假令讀定元年經，而問其傳之解詁云「定何以無正月？正月者，正即位也。定無正月者，即位後也」，則無以知其國當絕，定公不得繼體奉正之義。假令讀定二年經云「新作雉門及兩觀」，而問其傳之解詁云「修舊不書，此何以書？

①「喪」上，杉浦校：「單疏鈔本有「注」字。」

②「璜」下，阮校：「浦鏜云：脫「璋」。按：有「璋」字則與八年注合。」

③「特」，定公八年何注作「獨」。

④「寶用」，阮校：「何校本作「保用」是也。」

⑤「珠玉」，阮校：「八年疏作「金玉」，此誤。」

⑥「若以」，單疏鈔本、京都本、再造善本作「若似」。杉浦校：「按：「若以」當作「若似」。」

⑦「讀」下，杉浦校：「單疏鈔本有「者」字。」

譏。何譏爾？不務乎公室也，正以久不修理，不以公室爲急務，故書之，無以知其僭天子是也。○注「此假設而言」至「於是」。○解云：當爾之時，未有《春秋》，故知主人習其經而讀之者，假設而言之也。既未有《春秋》，而彊言主人，故云此假設而言之。云「主人謂定、哀」者，正以上言「定、哀多微辭」，下文即言「主人習其讀」，故知此主人者，宜指定、哀言之也。○注「此孔子」至「之至也」。○解云：此時君者，還指定、哀也。孔子作《春秋》當哀公之世，定沒未幾，臣子猶存，故亦畏之。爲之諱惡，恩隆於定、哀，故曰「上以諱尊隆恩」也。若不迴避其害，則身無所容，故曰「下以辟害容身」也。尊君卑己，故生上下之文耳。其傳未行，口授弟子，而作微辭，以辟其害，亦是謹慎之甚，故此曰「慎之至也」。^①

三月，晉人執宋仲幾于京師。仲幾之

罪何？據言「于京師」，成伯討辭，知有罪。○幾，本或作「機」。^②【疏】「仲幾之罪何」。○解云：上言晉人，似非伯討，言「于京師」，是伯討之文，與奪未明，故難之。不蓺城也。^③若今以草衣城是也。禮，諸侯爲天子治城，各有分丈尺，宋仲幾不治所主。○不蓺，^④素戈反，一

或作「蓺」，一或音初危反。衣，于既反。爲天，于僞反，下「善爲」同。【疏】「不蓺城也」。○解云：謂不以蓺苦城也。《公羊》之義，以爲昭三十二年「城成周」者，既是城訖，故於此處責其不蓺而已，不似《左氏》方始欲城耳。○注「蓺若今以草衣城是也」。^⑤衣，讀如衣輕裘之衣。

①「此曰」，阮校：「盧文弨曰：『此曰』倒。『此』蓋遙承上「此孔子」之「此」。」

②「機」，原作「譏」，今據余本、中華本、閣本、宋本《釋文》改。

③「不蓺城也」，阮校：「閩、監、毛本同，唐石經「蓺」作「衰」。《釋文》作「不蓺」，云「或作蓺」。《困學紀聞》云：「按《左氏傳》「遲速衰序，於是焉在」，又云「宋仲幾不受功」。「蓺」字當從《漢志》作「衰」，與《左氏》合。《經義雜記》曰：『《五行志》「不蓺城」，師古曰：「蓺城謂以差次受功賦也。衰音初爲反，一曰「衰讀曰蓺」。蓺城，謂以草覆城也。蓺音先和反。』按《釋文》及《漢志》，知《公羊》本作「不蓺城」。《說文》：「蓺，艸雨衣，從衣象形。」何注用《說文》本義，作「蓺」，俗字也。蓺城義當從師古說。」

④「蓺」，宋本《釋文》作「衰」。

⑤「也」下，杉浦校：「單疏鈔本有「者」字。」

○注「禮諸」至「主者」。○解云：正以宋人不治所主者，晉人執而歸之于京師，得爲伯討之文，故知禮有分丈尺之法，不謂更存禮文。其言「于京師」何？據城言

成周，執不地。【疏】注「據城言成周」。○解云：即昭三十二年「冬，仲孫何忌會晉韓不信」以下，「城成周」是也。

○注「執不地」。^①○解云：謂《春秋》上下，大夫見執，例不舉地，即下六年「秋，晉人執宋行人樂析黎」，^②七年秋「齊人執衛行人北宮結」之屬是也。若然，成十六年「九月，晉人執季孫行父，舍之于招丘」，彼傳自有解：「執未有言舍之者，^③此其言舍之何？仁之也。曰在招丘，恹矣。」注云：「恹，悲也。仁之者，若曰在招丘，可悲矣。閔錄之辭。」執未有言仁之者，此其言仁之何？代公執也」是也。伯討也。大夫不得專執，執無稱名氏，見伯

討例，故地以京師，明以天子事執之，得伯討之義。○見，賢遍反。【疏】注「大夫」至「之義」。○解云：下傳云「大夫之義，不得專執也」，故云「大夫不得專執」。若諸侯執人，即僖四年傳云：「稱侯而執者，伯討也。稱人而執者，非伯討也。」若其大夫不得專執，故其執人之時，無稱名氏，見伯討例，雖無其例，其執之有理，寧得不作其文？是故地以京師，明以天子事執之，見其得伯討之義

也。伯討則其稱人何？據城稱名氏，諸侯伯執不

稱人也。復發此難者，弟子未解，嫌大夫稱人相執，與諸侯同例。○復發，扶又反，下皆同。難，乃旦反。解，音

蟹。【疏】注「據城稱名氏」云云。○解云：即昭三十二年「冬，仲孫何忌會晉韓不信」以下「城成周」是也。○注

「諸侯伯執不稱人也」。^④○解云：即僖四年傳云「稱侯而執者，伯討也。稱人而執者，非伯討也」是也。若欲指經言之，即成十五年春，「晉侯執曹伯，歸之于京師」是也。貶。故稱人爾。不以非伯討故。曷爲貶？據

晉侯伯執稱人，以他罪舉。【疏】注「據晉」至「罪舉」。○

①「注執不地」，杉浦校：「單疏鈔本作『云執不地者』，無『○解云』。」

②「樂析黎」，定公六年經作「樂祁犁」，參定公六年阮校。杉浦校：「單疏鈔本『祈』作『祁』。」

③「有」，成公十六年傳作「可」。

④「注諸侯伯執不稱人也」，杉浦校：「單疏鈔本『注』作『云』，『也』下有『者』字，無『○解云』。」

解云：即僖二十八年「晉人執衛侯歸之于京師」，^①傳云「歸之于者，罪已定矣」，「此晉侯也，其稱人何？」貶。曷爲貶？衛之禍，文公爲之也。文公爲之奈何？文公逐衛侯而立叔武，使其兄弟相疑，^②放乎殺母弟者，文公爲之也。然則彼乃晉文之執衛侯，實得伯討之義，而稱人者，正由文公惡衛侯太深，愛叔武太甚，故致此禍，是以貶之稱人，故曰以他罪舉也。今此晉人執仲幾，亦得爲伯討之義，而貶稱人，故欲問其稱人之狀矣。^③不與大夫專執也。曷爲不與？據伯討。實與，言「于京師」是也。而文不與。文不與者，貶稱人是也。文曷爲不與？大夫之義，不得專執也。大夫不得專相執，辟諸侯也。不言歸者，諸侯當決於天子，犯之惡甚，故錄所歸。大夫當決主獄爾，犯之罪從小惡，不復別也。無例不在常書，又月者，善爲天子執之。○別，彼列反。【疏】文曷爲不與。○解云：據實與，但何氏省文，不復言「大夫之義不得專執，則其曰實與之何？」上無天子，下無方伯，天下大夫有爲無道者，力能執之，則執之可也。異僖元年，二年「救邢」、「城楚丘」之傳者，正以諸侯相執，伯者之常事，大夫相執，例之所

略，詳尊略卑之義也。○注「不言」至「別也」。○解云：正以僖二十八年冬「晉人執衛侯，歸之于京師」，成十五年春「晉侯執曹伯，歸之于京師」，襄十六年春「晉人執莒子、邾婁子以歸」者，是諸侯相執，錄其所歸之文。所以然者，正以諸侯尊貴，當決於天子，若其犯之，其惡深大，故須錄其歸之所在，即執衛侯、曹伯歸于京師，是其得正，執莒子、邾婁子以歸其國者，失所明矣。彼注云「錄『以歸』者，甚惡晉也。有罪無罪，皆當歸京師，不得自治之」是也。若然，案襄十九年春「晉人執邾婁子」，亦是諸侯相執，而不錄其所歸者，正以會上執之，即會上釋之，實無所歸，寧得錄之也？若執大夫，當決於主獄之人耳，若其犯之，但爲小惡，故從外小惡例，不復分別之也。若然，所見之世，錄外小惡，而言從外小惡不復別之

① 「二」，原作「三」，今據中華本、閩本改。「晉人執衛侯歸之于京師」，阮校：「『晉』上『冬』字脫，依全書體例，則『晉』字上當補『冬』字。」

② 「使其兄弟相疑」，僖公二十八年傳「其」作「人」。杉浦校：「單疏鈔本『使其』作『使人』，『弟』下無『相』字。」

③ 「狀」，京都本、再造善本作「義」。

者，正謂時時錄之，以見太平之世，諸夏小惡在治之限，文不盡錄，故得然解。○注「無例」至「執之」。○解云：欲道《春秋》上下，更無大夫相執之義，即是無其比例，不在常書之限。今而書之，又書其月詳錄之，與諸侯相執同例者，善為天子執故也。知諸侯相執例書月者，正以襄十六年三月「晉人執莒子、邾婁子」，十九年三月「晉人執邾婁子」之屬，^①皆書月故也。舊云：此事所以無「歸于」、「以歸」之例，正由大夫相執，不在當書故也。既不在當書，而書月以執之者，善為天子執之故也。

夏，六月，癸亥，公之喪至自乾侯。至自乾侯者，非公事齊不專，中去之晉，竟不見容，死于乾侯。

戊辰，公即位。癸亥，公之喪至自乾侯，則曷為以戊辰之日然後即位？據癸亥得人已知。正棺於兩楹之間，然後即位。正棺

者，象既小斂夷於堂。昭公死於外，不得以君臣禮治其喪，故示盡始死之禮。禮，始死于北牖下，^②浴於中雷，飯含於牖下，小斂於戶內，夷於兩楹之間，大斂於阼階，殯於西階之上，祖于庭，葬于墓，尊孝子之恩，動以遠也。禮，天子五日小斂，七日大斂。諸侯三日小斂，五日大

斂。卿大夫二日小斂，三日大斂。夷而經，殯而成服，故戊辰然後即位。凡喪，三日，授子杖。五日，授大夫杖。七日，授士杖。童子、婦人不杖，不能病故也。○小斂，力驗反，下皆同。北墉，音容，本又作「牖」。雷，力又反。飯，扶晚反。含，戶暗反。阼，才故反。【疏】注「正棺」至「故也」。○解云：《喪大記》云：「小斂，主人即位于戶內，主婦東面，乃斂。卒斂，主人馮之踊，主婦亦如之。徹帷，男女奉尸夷于堂，降拜。」鄭注「夷之言尸也。主人主婦以下從而奉之，孝敬之心。降拜，拜賓也」是也。云

「故示盡始死之禮」者，「示」字亦有作「不」字者，誤也。云「禮，始死于北牖下」者，即《喪大記》「疾病」，「寢東首於北牖下」是也。云「浴於中雷」云云者，即《坊記》云「子云「賓禮每進以讓，喪禮每加以遠。浴於中雷，飯於牖

^①「三」，阮校：「浦鏜云：『正』誤『三』。按：浦說是也。」

^②「北牖」，阮校：「宋本同，閩、監、毛本「牖」作「墉」，疏同。按：《釋文》作「北墉」，云「音容，本又作牖」。鄭注《禮記》「北牖下」云：「或為北墉。」蓋何注本作「北墉」，即鄭所云或本是也。今《公羊》注作「北牖」，則後人從《禮記》改轉。」

下，小斂於戶內，大斂於阼，殯於客位，祖於庭，葬於墓，所以示遠也」是也。而言「夷于兩楹之間」者，即此傳云「正棺于兩楹之間」是也。云「尊孝子之恩，動以遠也」者，何氏以意言之也。言此者，欲陳始死禮。云「天子五日」云云者，何氏差約古禮而言之，欲道始死之禮，五日大斂而殯，殯訖成服。今欲示盡始死之禮，故云公之喪癸亥日至，于丁卯殯而成服，戊辰之日乃即位矣。云「凡喪，三日」云云者，即《喪服四制》云「杖者何也？」爵也。三日授子杖，五日授大夫杖，七日授士杖，或曰擔主，或曰輔病，婦人、童子不杖，不能病也」是也。鄭注《喪大記》云：「三日者，死之後三日也。爲君杖不同日，人君禮大，可以見親疎也。」引之者，欲道喪入五日，嗣子、大夫授杖已訖，可以即位正其臣矣。子沈子曰：「定君乎國，定昭公之喪禮於國。然後即位。」即位不日，此何以日？據即位皆不日。錄乎內也。內事詳錄，善得五日變禮。或說危不得以踰年正月即位，故曰。主書者，重五始也。【疏】注「詳錄」至「始也」。○解云：書日所以得變禮者，癸亥之日公喪乃至，戊辰之日然後君即位，象五日殯訖即位之禮，故錄日以明之，言其

變而合禮矣。

秋，七月，癸巳，葬我君昭公。

九月，大雩。定公得立尤喜，而不恤民之應。

立煬宮。煬宮者何？據十二公無煬宮。

○煬，餘亮反。【疏】「煬宮者何」。○解云：正以《春秋》

之內，更無煬公之稱，而立其宮，故執不知問。煬公之

宮也。春秋前煬公也。立者何？立者不宜立

也。立煬宮，非禮也。不日嫌得禮，故復問立也。

不日者，所見之世諱深，使若比武宮惡愈，故不日。【疏】

「立者何」。○解云：欲言是禮，不應言立，欲言非禮，復

不書日，故執不知問。○「立者何」至「立也」。○解云：

隱四年冬「衛人立晉」之下，傳云：「立者何？立者不宜

立也。」成六年春「二月，辛巳，立武宮」之下，傳云：「立者

何？立者不宜立也。」然則《春秋》之內，三發此文者，

「公子晉」之下發之，是《春秋》之首；成六年「立武宮」之

下發之，嫌立宮與諸侯異例；此復發之者，正以「立武宮」

書日，此不書日，故同之。①昭二十三年秋「尹氏立王子

①「同」，阮校：「『同』爲『問』之誤。」

朝」，①不復發之者，從立晉之傳可知。○「不日」至「立也」。②○解云：《春秋》之例，失禮於宗廟例書日，故此不日嫌得禮也。注言此者，正以成六年已有此傳，今復發之，故解云耳。○「不日」至「不日」。○解云：例既書日，而不日者，正以當所見之世故也。若然，案莊二十三年「秋，丹桓宮楹」，何氏云「失禮宗廟例時」，與向說違者，蓋失禮於鬼神例日，故隱五年「初獻六羽」之下，何氏云「失禮鬼神例日」是也。若失禮修營於宗廟，則例書時，即莊二十三年「秋，丹桓宮楹」，何氏云「失禮宗廟例時」是也。莊二十四年「春，王三月，刻桓宮桷」書月者，何氏云「月者，功重於丹楹」是也。若其失禮始造宗廟者，例書日，即成六年「春，王二月，辛巳，立武宮」是也。所以然者，刻桷功重於丹楹，猶變例以書月，況於始造宗廟，為費實深，寧不日乎？例既宜日而不日者，正以當所見之世，為內諱深，使若惡愈於武宮故也。

冬，十月，霽霜殺菽。何以書？記異

也。菽，大豆。時猶殺菽，③不殺他物，故為異。○霽，于敏反。【疏】注「時殺」至「為異」。④○解云：知獨殺菽，不殺他物者，正以此經特舉殺菽，傳云「記異」故也。若更殺他物，則經直云霽霜，不舉穀名，傳云「記災也」。

即桓元年「秋，大水」，傳云：「何以書？記災也。」彼注云「災傷二穀以上」是也。此則但傷一穀，既不成災，故謂之異。此災菽也，曷為以異書？據無麥苗以災書。【疏】注「據無」至「災書」。○解云：即莊七年「秋，大水，無麥苗」，傳云「何以書？記災也」是也。然則大水殺麥苗，傳云「記災」，今此霽霜殺菽，傳云「記異」，故據而難之。若然，向解若更殺他物，則經直言霽霜，不舉穀名，何故？莊七年經云「秋，大水，無麥苗」者，彼傳云：「何災不書，⑤待無麥，然後書無苗。」彼注云「明君子不以一

①「三年」，原作「二年」，阮校引浦鏜云：「『三年』誤『二年』。」今據單疏鈔本改。

②「不日」上，杉浦校：「單疏鈔本有『注』字，是也。下『不日至不日』之上，又有『注』字，為是。」

③「猶」，阮校：「鄂本作『獨』。解云：『知獨殺菽，不殺他物者』，當據以訂正。」

④「注時殺至為異」，杉浦校：「單疏鈔本作『時獨殺菽云云』。按：依此本，則何注當作『時獨殺菽』。」

⑤「何」，單疏鈔本、閣本作「一」。阮校引浦鏜云：「『一』誤『何』。」

過責人，水、旱、螟、蟲，^①皆以傷二穀乃書。而不書穀名，^②至麥苗獨書者，民食最重是也。然則一災不書，今此書者，示以早當誅季氏，故不得不錄也。異大乎災也。異者，所以為人戒也。重異不重災，君子所以貴教化而賤刑罰也。周十月，夏八月，微霜用事，未可殺菽。菽者，少類，為稼強，季氏象也。是時定公喜於得位，而不念父黜逐之恥，反為淫祀立煬宮，故天示以當早誅季氏。【疏】「異大乎災也」。○解云：雖曰但傷一物，若以害物言之，^③災而必書者，正以異重于災故也。何者？隱三年而作注云：^④「異者，非常而可怪」，^⑤先事而至者。隱五年作注云：^⑥「災者，有害於人物，隨事而至者」。然則正由先事而至，可以為戒，若其變改，竟不害人物，若似君父教戒臣子之義，故但謂之異而貴之矣。災者，隨事而至，害於人物，雖言變改，亦無所及，若似刑罰一施，不可追更之義，故謂之災而不重之，故注云：「重異不重災，君子所以貴教化而賤刑罰也」。然則直是美大此異，故言異大於災，不論害物與否。《五行傳》云「害物為災，不害物為異」，亦通於此矣。○注「菽者」至「象也」。○解云：菽，季不同，而得為其象者，正以菽為第三之稱，故為少類。季氏於叔孟為弟，亦是少之義，故得為其象。

菽雖第三，為稼最強，季氏雖幼，彊於叔孟，故曰「菽者，少類，為稼強」，^⑦季氏之象也」。○注「是時」至「煬宮」。○解云：何氏以為定公者，昭公之子，與賈、復異。^⑧既為昭公之子，而喜於得位者，正以父見放逐，薨於乾侯，讎人秉政有年歲矣，為道亦何可知，忽然而立，寧不喜乎？是以忘其耻辱，欲求福於淫祀，天怪其所為，故示之戒也。舊云：定公為昭公弟，立非其次，是以喜之。而

①「蟲」，莊公七年何注作「蠧」，是。

②「而」，阮校：「莊七年注作『然』」。

③「之」下，杉浦校：「單疏鈔本有『不謂之』三字，義為長。」

④「隱三年而作注云」，閻本作「隱三年傳注云」。阮校引浦鏜云：「『而作』當『傳何』誤。下『作注』之『作』同。」

⑤「而」，閻本無此字，疑衍。阮校：「浦鏜云『衍』。按：浦說是也。」

⑥「作」，閻本作「傳」。據阮校引浦鏜所云，此「作」字當作「何」。

⑦「稼」，原作「嫁」，今據本傳注、疏及閻本改。

⑧「復」，阮校：「『復』當『服』之誤。」杉浦校：「單疏鈔本『復』作『服』。」

謂昭公爲父者，臣子一例故也。云「故天示以早當誅季氏也」者，^①天戒若曰，等欲勞心作淫祀之時，不如作意早誅季氏。所以然者，雖作淫祀，終竟無福，早誅季氏，可以復讎去患故也。

二年，春，王正月。

夏，五月，壬辰，雉門及兩觀災。其言

「雉門及兩觀災」何？據桓宮、僖宮災，不言

「及」。不但問「及」者，方於下「及」聞其文問之，^②故先俱

張本於上。○兩觀，工喚反，下及注皆同。【疏】注「據

桓」至「言及」。○解云：即哀三年夏，「五月，辛卯，桓宮、

僖宮災」是也。兩觀微也。雉門兩觀，皆天子之制，

門爲其主，觀爲其飾，故微也。【疏】注「雉門」至「微也」。

○解云：知如此者，正以昭二十五年傳云「子家駒曰：諸

侯僭天子久矣，設兩觀」云云者，此皆天子之禮。然則

兩觀既爲天子之禮，天惡其僭，故災之。則知雉門與之

同災者，亦僭明矣，故云雉門及兩觀，皆天子之制也。^③

若然，昭二十五年子家駒不言雉門爲僭者，正以天子諸

侯皆有雉門，但形制殊耳。若然，雉門爲僭，於辭爲負

矣。寧知非是主災兩觀，因及雉門而已？故子家駒不

數雉門爲僭，而何氏必言雉門亦如天子之制者，正以下文「新作雉門及兩觀」之下，傳云「不務公室」，既言不務如公室之禮，則知天子明矣。^④然則曷爲不言「雉門災，及兩觀」？據下「新作雉門及兩觀」，先言作者。主災者，兩觀也。時災從兩觀起。時災者兩觀，^⑤則曷爲後言之？據欲使言「兩觀災，及雉門」，若言「宋督弑其君與夷，及其大夫孔父」，不以微及大也。何以書？不復言雉門及兩觀災何以書者，上已問雉門及兩觀災，故但言「何以書」。○不復，扶又反，下同。【疏】注「不復」至「以書」。○解云：隱三年「秋，武氏子來求賻」，傳云：「武氏子來求賻，何以

①「早當」，何注作「當早」，此誤倒。

②「聞」，阮校：「鄂本作『問』，此誤。」

③「制」，原作「訓」。此釋何注「皆天子之制」，「訓」當爲「制」之訛。今據京都本，再造善本，閣本改。

④「知」，阮校：「當『如』字誤。」

⑤「時災者兩觀」，阮校：「唐石經作『主災者兩觀』，諸本皆誤作『時』。孫志祖云：《左傳》疏引作『主』。」孫校：「《周禮·閭人》疏引亦作『主』。」

書？」注云：「不但言何以書者，嫌主覆問上所說二事，^①不問求賄。」又七年「夏，城中丘」，傳云：「中丘者何？內之邑也。城中丘，何以書？」注云：「上言中丘者何？指問邑也。欲因言何以書，嫌但問書中丘，欲復言城中丘何以書。」^②僖二十年傳云：「西宮災，何以書？」然則彼三傳文，皆舉句而問之，今此不嫌不以微及大何以書，而不舉句而問之者，正以上傳已云「其言雉門及兩觀災何」，不能復重言之，故省文也。**記災也。**此本子家駒諫昭公所當先去以自正者，昭公不從其言，卒為季氏所逐。定公繼其後，宜去其所以失之者，故災亦云爾。立雉門兩觀不書者，僭天子不可言，雖在《春秋》中猶不書。○先去，起呂反，下同。【疏】注「此本」至「云爾」。○解云：在昭二十五年。○注「立雉」至「不書」。○解云：知如此者，正以隱五年秋「初獻六羽」，傳云「何以書？譏。何譏爾？譏始僭諸公也」，「始僭諸公，昉於此乎？前此矣。前此，則曷為始乎此？僭諸公，猶可言也；僭天子，不可言也」是也。若然，須更修大，還僭天子，而得書之者，但作微辭以譏之，仍自不正言。

秋，楚人伐吳。

冬，十月，新作雉門及兩觀。其言新作之何？據俱一門兩觀，如故常。【疏】注「據俱」至「如常」。○解云：正以所作與舊，俱一門兩觀，以故常無異，何言新作之乎？^③**修大也。**天災之，當減損如諸侯制，而復修大，僭天子之禮，故言「新作」，以見修大也。○見，賢遍反。【疏】注「故言」至「大也」。○解云：莊二十九年作注云：「繕故曰新，有所增益曰作。」然則此言新者，見其料理舊牆；言作者，見其增益新木，皆是還大於諸侯之義，故言新作，以見修大矣。**修舊不書，此何以書？**據西宮災復修不書。【疏】注「據西」至「不

①「主」上，阮校：「何校本有『以』字，與隱三年注合。」

②「欲」，阮校引浦鏜云：「『故』誤『欲』。」杉浦校：「單疏鈔本『欲』作『故』。」

③「注據俱」至「新作之乎」，阮校：「毛本『如常』改『故常』，『正以所作』誤『正以新作』。」杉浦校：「單疏鈔本作『注據俱一門兩觀如故常者正以所作與舊俱一門兩觀似故常無異何言新作之乎』。」

書」。^①○解云：在僖二十年。譏。何譏爾？不

務乎公室也。務，勉也。不務公室，亦可施于久不

修，亦可施于不務如公室之禮，^②微辭也。月者，久也。

當即修之，如諸侯禮。【疏】注「不務」至「侯禮」。○解

云：即文十三年傳：「世室屋壞，何以書？譏。何譏

爾？久不修也。」何氏云：「簡忽久不以時修治，至令壞

敗，故譏之。」然則此文不務公室者，亦可以見魯人簡忽，

五月有災，十月乃作之義，故云「亦可施於久不修」也。

云「月者，久也」者，正以莊二十九年「春，新延廡」，僖二

十年「春，新作南門」，皆書時，此特月者，譏其久不修故

也。舊云：「如天子之門，大不可即成，故月以久之。」

三年，春，王正月，公如晉，至河乃復。

月者，內有彊臣之讎，外不見答於晉，故危之。【疏】注

「月者」至「危之」。○解云：正以凡朝例時，假有小事，亦

不書月，是以昭二年「冬，公如晉，至河乃復」，傳云：「其

言至河乃復何？不敢進也。」注云：「乃，難辭也。時聞

晉欲執之，不敢往。君子榮見與，耻見距，故諱使若至

河，河水有難而反。」然則彼是小故不足以月，今乃內有

彊臣之讎，外不見答於晉，故書月以危之，似若襄二十八

年十一月「公如楚」，何氏云「如楚書月者」，^③危公朝夷狄之類也。而僖十年注云「故如京師，善則月榮之。如齊，晉，善則月安之者，善惡不嫌，假令同辭，亦何傷也。」

三月，辛卯，邾婁子穿卒。

夏，四月。

秋，葬邾婁莊公。

冬，仲孫何忌及邾婁子盟于枝。^④後相

犯。時者，諱公使大夫盟，又未踰年君，薄父子之恩，故爲易辭，使若義結善事。○枝，二傳作「拔」。易，以豉反。【疏】「三月辛卯」云云。^⑤《公羊》、《穀梁》皆作「三

①「注據西至不書」，杉浦校：「單疏鈔本作『注據西官災者』，無『○解云』。按：此標注起止，當據此本訂正。」

②「如」，原作「始」，今據余本、中華本、閩本改。

③「書」，襄公二十八年何注作「皆」。

④「于枝」，阮校：「唐石經、諸本同。《釋文》：『于枝，二傳作『拔』。』按：『枝』當爲『拔』字之誤也，如公孫拔之誤爲公孫枝。」

⑤「云云」下，杉浦校：「單疏鈔本有『者』字。」

月」，《左氏》作「二月」，未知孰正。○注「後相」至「善事」。○解云：其後相犯者，即哀元年「冬，仲孫何忌帥師伐邾婁」之屬是也。云「故爲易辭」者，即莊十三年「冬，公會齊侯盟于柯」，傳云：「何以不日？易也。」何氏云「易猶佼易也，相親信，無後患之辭」是也。

四年，春，王二月，癸巳，陳侯吳卒。

三月，公會劉子、晉侯、宋公、蔡侯、衛侯、陳子、鄭伯、許男、曹伯、莒子、邾婁子、頓子、胡子、滕子、薛伯、杞伯、小邾婁子、齊國夏于召陵，侵楚。月而不舉重者，楚以一裘之故，拘蔡昭公數年，然後歸之，諸侯雜然侵之，會同最盛，故善錄其行義兵也。拘不書者，惡蔡侯吝一裘而見拘執，故匹夫之。執歸不書者，從執例。○夏，戶雅反。召，上照反。①數年，所主反。雜，七合反，又如字。惡蔡，烏路反，年末同。吝一裘，力刃反。【疏】「陳子」。○解云：上文二月「陳侯吳卒」，下之「六月，葬陳惠公」。然則其父未葬，宜稱「子某」，而言「陳子」，僖九年「宋子」之下，注云「宋未葬，不稱子某者，出會諸侯，非尸柩之前，故不名」。然則今此陳子亦然，但從宋子省文，不復注

之。○注「月而」至「兵也」。○解云：《春秋》之義，侵伐例時，即上二年「秋，楚人伐吳」之屬是也。善其義兵則書月，即僖十八年「春，王正月，宋公、曹伯」以下伐齊，注云「月者，與襄公之征齊，善錄義兵」是也。若其舉重，宜云公會劉子、晉侯以下侵楚，不言于召陵也，似若成十六年秋，「公會單子、尹子、晉侯、齊國佐、邾婁子伐鄭」之屬。②今而書月，復不舉重者，善錄其行義兵故也。若然，案僖四年「春，王正月，公會齊侯」以下侵蔡，何氏云：「月者，善義兵也。」然則彼亦是義兵而舉重者，正以彼下經云「楚屈完來盟于師，盟于召陵」，傳云：「其言盟于師，盟于召陵何？師在召陵也。師在召陵，則曷爲再言盟？喜服楚也。」彼注云：「孔子曰：『書之重，辭之復，嗚呼！不可不察，其中必有美者焉。』」然則正以下有「喜服楚」之文，爲義兵可知，是以不勞具錄也。桓公

①「召上照反」，宋本《釋文》作「邵陵，上照反，本或作「召」，音同」。

②「成十六年秋」至「之屬」，阮校：「浦鏜云：十六年伐鄭無單子，十七年有之，「單子」二字當衍。按：浦說是也。」杉浦校：「單疏鈔本「邾婁子」作「邾婁人」，與成十六年經合。」

十五年「冬，十有一月，公會齊侯、宋公」以下「于侈，伐鄭」，彼注云：「月者，善諸侯征突，善錄義兵也。不舉伐爲重者，用兵重於會，嫌月爲桓伐有危舉，不爲義兵錄，故復錄會。」注云之屬，當文皆有成解，不勞逆說也。言

「楚以一裘之故，拘蔡昭公數年，然後歸之」者，即下傳云「蔡昭公朝乎楚，有美裘焉，囊瓦求之，昭公不與，爲是拘昭公於南郢，數年然後歸之」是也。○注「拘不」至「夫之」。○解云：僖二十一年霍之會，「執宋公以伐宋」之屬，皆書其執。今此不書，故決之。所以不直言賤之而已，而言「匹夫之」者，以楚人執良霄之屬，大夫猶書，今反不書，賤於大夫，故言「匹夫之」。○注「執歸」至「執例」。○解云：即僖二十一年注云：「凡出奔歸書，執獲歸不書者，出奔已失國，故錄還應盜國，與執獲者異，臣下尚隨君事之，未失國，不應盜國，無爲錄也。」是其被執而歸不書之義。今此蔡侯之執，經雖不書，其實見執，故得從其例矣。云云之說，備于僖二十一年。

夏，四月，庚辰，蔡公孫歸姓帥師滅

沈，^①以沈子嘉歸，殺之。爲不會召陵故也。不舉滅爲重，書「以歸，殺之」者，責不死位也。日者，定、哀滅例日。定公承黜君之後，有彊臣之讎，故有滅則危懼

之，爲定公戒也。○公孫歸姓，二傳無「歸」字。姓，音生，又音性。^②爲不，于僞反，下「爲季」、「爲下」、「爲治」、「爲蔡」同。【疏】注「爲不」至「故也」。○解云：正以召陵之會，蔡爲謀首，召陵之經不見沈子，而今滅之，故知義然也。○注「不舉」至「位也」。○解云：正以襄六年「十有二月，齊侯滅萊」，傳云：「曷爲不言萊君出奔？國滅，君死之，正也。」彼注云：「明國不存，^③不書殺萊君者，舉滅國爲重。」然則萊君死位，故得舉重，今沈子不死位，^④故不得舉滅爲重，而書「以歸，殺之」也。○「定哀」至「戒也」。○解云：定、哀之時，文致太平，若有相滅，爲罪已重，故皆書日以詳其惡，即此經及下六年「春，王正月，癸

①「公孫歸姓」，阮校：「唐石經、諸本同。《釋文》：公孫歸姓，二傳無「歸」字，姓音生。按：昭廿三年注作

「歸生」，疏引此經同。」

②「性」，原作「姓」，今據余本、中華本、閣本、宋本《釋文》改。

③「不」，阮校：「閩本剗改「不」作「當」，監、毛本承之。按：作「當」與襄六年注合。」杉浦校：「單疏鈔本「不」作「當」。」

④「今」，京都本、再造善本作「而」。

亥，鄭游速帥師滅許，^①以許男斯歸之屬是也。既言定、哀滅例日，乃是滅爲例矣。而又言「定公承黜君之後，有強臣之讎，故有滅則危懼之，爲定公戒」者，欲道哀公之篇，若有相滅例合日。欲見他義者，容不書之。即哀公八年「春，王正月，宋公入曹，以曹伯陽歸」，實是滅曹，但魯人諱同姓之滅而不書之，是以亦不書日是也。然則案哀公之篇，更無書滅之經，而知例日者，正以文承定公之下，定公猶日，則哀公明矣。定公承黜君之後，偏有危懼，是以有滅則書日，哀公無此義，故諱其滅，以沒不救同姓之罪，但知例合書其日，故何氏云焉。

五月，公及諸侯盟于浩油。^②再言公者，

昭公數如晉，不見答，卒爲季氏所逐。定公初即位，得與諸侯盟，故喜錄之。後楚復圍蔡不救，不日者，善諸侯能翕然俱有疾楚之心，會同最盛，故褒與信辭。○浩油，戶老反，又古老反，下音由，一音羊又反，二傳作「皋鼬」。數，所主反。楚復，扶又反，下「而復」、「復討」同。翕，許及反。【疏】注「再言」至「錄之」。○解云：正以僖五年夏「公及齊侯」以下「會王世子于首戴」，「秋，八月，諸侯盟于首戴」；九年「夏，公會宰周公」以下「于葵丘」，「九月，戊辰，諸侯盟于葵丘」之屬，皆不再言公。今此再言公，

故於此解之。^③言「昭公數如晉，不見答」者，即昭十二年夏「公如晉，至河乃復」，十三年冬「公如晉，至河乃復」，十五年「冬，公如晉」，十六年「夏，公至自晉」，二十一年冬「公如晉，至河乃復」，二十三年「公如晉，至河。公有疾，乃復」之屬，是數如晉之文也。竟不見晉人來聘之經，故云「不見答」也。「卒爲季氏所逐」者，即二十五年「九月，己亥，公孫于齊」是也。寧知再言公爲喜錄之者，正以文承詳錄義兵之下而再言公，故知其喜，似若僖四年夏「楚屈完來盟于師，盟于召陵」，傳云「曷爲再言盟？喜服楚也」之類，注云「孔子曰：『書之重，辭之復，嗚呼！不可不察，其中必有美者焉』」，義亦通於此。

杞伯戊卒于會。不日，與盟同日。○戊，音

①「遊速」，阮校：「經「速」作「遽」。」

②「浩油」，阮校：「《釋文》：『二傳作「皋鼬」。』《九經古義》云：『《鹽鐵論》作「誥鼬」。《爾雅·釋訓》：「皋皋瑁瑁」，樊光本作「浩浩」。』」

③「解」，京都本、再造善本作「錄」，義爲長。

茂，又音恤。二傳作「成」。^①【疏】注「不日與盟同日」。

○解云：考諸古本，「日」亦有作「月」者。若作「日」字，宜云所見之世，小國之卒例合書日，即上言「三月，辛卯，邾婁子穿卒」之屬是也。^②今不日者，正以與盟同日，文不可施故也。何者？若言「五月，甲子，公及諸侯盟于浩油，杞伯戊卒于會」，則嫌上會非信辭，若言「五月，公及諸侯盟于浩油。甲子，杞伯戊卒于會」，則嫌與盟別日，是以進退不得日也。若作「月」字，宜云所見之世，則例書日，^③若有內行失，亦但月之，即昭六年「春，王正月，杞伯益姑卒」，何氏云「不日者，行微弱，故略之」，「人所見之世，責小國詳，始錄內行也。諸侯內行小失，不可勝書，故於終略責之，見其義」是也。然則今杞伯亦有內小失，^④宜合書月而不書日，正以與盟同月故也。

六月，葬陳惠公。

許遷于容城。

秋，七月，公至自會。月者，爲下劉卷卒。

月者，重錄恩。○卷，音權。【疏】注「月者」至「卷卒」。

○解云：正以《春秋》之義，致公例時，則桓二年「冬，公至自唐」之屬是也。若其有危，乃合書月，即下八年「三月，

公至自侵齊」之屬是也。今此上會有義兵之錄，上盟有信辭之美，又再言公爲喜文，則知公於時無危明矣。既無危事，而有七月，故知其月爲下事爾。若然，案桓公十六年「秋，七月，公至自伐鄭」，何氏云：「致者，善桓公能疾惡同類，比與諸侯行義伐鄭。」^⑤致例時，此月者，善其比與善行義，故以致復加月也。」似月爲善者。正以桓是篡賊，動作有危，而能疾篡脫危而至，故致之。何氏彼注必言此者，欲對桓元年垂會之注云：「不致之者，爲下去王，適足以起無王，未足以見無王罪之深淺，故復奪臣子辭，成誅文也。」以此言之，則桓十六年注云「以致復加

① 「成」，原作「戌」，閣本、宋本《釋文》作「成」。《四部叢刊》影宋本《春秋經傳集解》、《春秋穀梁傳》定公四年

經俱作「成」，則此當作「成」。今據改。

② 「屬」，阮校：「何校本作『文』」。杉浦校：「單疏鈔本『屬』作『文』」。

③ 「則」，阮校：「何校本作『雖』」。

④ 「內」下，杉浦校：「單疏鈔本有『行』字，義長。」

⑤ 「伐鄭」，阮校：「按：桓十六年注『伐』字上有『兵』字。」

月」，仍是危文，但善其比與義，^①故能脫危而至，與此仍不妨矣。○注「月者重錄恩」。○解云：大夫之卒，宜又降于微國之君，但合書時而已，而書月者，正以新奉王命，主會于召陵，於魯有恩，故重而錄之，故云「月者，重錄恩」也。

劉卷卒。劉卷者何？天子之大夫也。外大夫不卒，此何以卒？我主之也。

劉卷，即上會劉子。我主之者，^②因上王魯文王之，^③張義也。卒者，明主會者，當有恩禮也。言劉卷者，主起以大夫卒之，^④屈於天子也。不日者，比尹氏以天子喪為主重也，^⑤此卷主會輕，故不日。【疏】「劉卷者何」。○解云：欲言諸侯，未有劉國，欲言大夫，大夫不卒，故執不知問。○注「劉卷」至「義也」。○解云：正以召陵之經，劉子為首，今而書卒，故知一人也。^⑥若不然，大夫之卒，例則不書，劉卷何事獨得錄見也？今而錄見，^⑦明有恩於魯，傳曰「我主之」，亦其一隅矣。劉子者，天子之大夫，奉天子之命，致諸侯於召陵，召陵之經序之於上，此言主之，主會明矣。此傳宜云「外大夫不卒，此何以卒？主我也」。而云「我主之」者，正以《春秋》王魯，因魯之文，故言「我主之」，不言「主我」也。言「張義」者，欲張魯君

為王之義。○注「卒者」至「禮也」。○解云：若主會有恩禮者，即違例書卒，案僖九年「公會宰周公」，成十六年、十七年之時，數有公會單子、尹子之文，而皆不卒。言卒等有恩，^⑧當論遠近，蓋在主會之年卒者，恩而錄之，若期外者，當從恩殺略之，是以尹子、單子之徒不見卒文。若奔喪主我使來會葬之屬，^⑨其恩差重，三年之外方始略

①「與」，阮校：「閩、監、毛本作「行」。」杉浦校：「單疏鈔本「與」作「行」。」

②「我」，余本作「也」，屬上。

③「文王之」，京都本、再造善本作「故王之」，閣本作「文主之」。疏云：「而云「我主之」者，正以《春秋》王魯，因魯之文，故言「我主之」。」據疏文，則閣本為長。

④「起以」，京都本、再造善本作「天子」。

⑤「比」，原作「此」，余本、閣本作「比」，本疏引同，今據改。

⑥「也」，杉浦校：「單疏鈔本作「其」。」「其」字當屬下讀。」

⑦「錄」，阮校：「何校本作「書」。」杉浦校：「單疏鈔本「錄」作「書」，與何校合。」

⑧「卒」，杉浦校：「單疏鈔本作「雖」。」

⑨「我」，京都本、再造善本作「王」。

之，即隱三年「夏，四月，辛卯，尹氏卒」，傳雲：「外大夫不卒，此何以卒？」天王之崩，爲諸侯之主也。」^①彼注雲：「時天王崩，魯隱往奔喪，尹氏主饋贊諸侯，與隱交接，而卒，恩隆於王者，則加禮錄之」，「明當有恩禮」。又文三年「夏，^②五月，王子虎卒」，傳雲：「外大夫不卒，此何以卒？新使乎我也。」彼注雲「王子虎，即叔服也，新爲王者使來會葬，在葬後三年中卒，君子恩隆於親親，則加報之，故卒，明當有恩禮也」是。○注「言劉」至「天子」。○解雲：襄十五年「劉夏」之下，傳雲：「劉夏者何？天子之大夫也。劉者何？邑也。其稱劉何？以邑氏也。」彼注雲「諸侯人爲天子大夫，不得氏國稱本爵，故以所受採邑氏稱子」，「不稱劉子而名者，禮，逆王后當使三公，故貶去大夫，明非禮也」。然則今此劉卷，乃是圻外諸侯，人爲天子大夫，所以不言「劉子卷卒」，從諸侯之例，而言劉卷，其但字者，正欲起大夫卒之，屈於天子故也。○注「不日」至「不日」。○解雲：文三年「王子虎」之下，何氏雲：「尹氏卒日，此不日者，在期外也。」然則尹氏之主諸侯，由其在期內，故日之。今此劉卷之主諸侯，亦在期內而不日者，正以尹氏之主諸侯，乃是天王崩，饋贊隱公，其恩重矣。劉卷之主諸侯，乃在召陵之會，故不書

日，見其輕矣。知雲「不日者，比尹氏以天子喪爲主重也」，言劉卷卒所以不書日者，若比尹氏之時，尹氏以天子喪爲主重，故書日，劉卷但爲會主，其恩輕，故不日矣。

葬杞悼公。

楚人圍蔡。囊瓦稱人者，楚爲無道，拘蔡昭公數年，而復怒蔡歸有言伐之，故貶，明罪重於圍。【疏】注「囊瓦」至「於圍」。○解雲：正以下傳雲「爲是興師，使囊瓦將而伐蔡」，故知此文「楚人」者，是囊瓦矣。言「拘蔡昭公數年，而復怒蔡歸有言伐之」者，皆下傳文。雲「故貶，明罪重於圍」者，謂由是之故貶之稱人，明其罪重，異於凡圍矣。其凡常之圍，^③罪不至貶，即哀元年「楚子」以

①「天王之崩爲諸侯之主也」，阮校：「浦鏜雲：上「之」衍，傳無「爲」。按：何校本無「之」、「爲」二字，與傳合。」

②「又」，京都本、再造善本作「也」，屬上，義爲長。

③「凡」，原作「幾」，今據京都本、再造善本、中華本、閣本改。

下「圍蔡」之屬是也。^①

晉士鞅、衛孔圉帥師伐鮮虞。○圍，魚呂

反，《左氏》作「圍」。虞，本或作「吳」，音虞。

葬劉文公。外大夫不書葬，此何以

書？錄我主也。其實以主我恩錄之，故雲爾。舉

採者，禮，諸侯人爲天子大夫，更受採地於京師，天子使大夫爲治其國，有功而卒者，當益封其子。時劉卷以功益封，故不以故國而以採地書葬起其事，因恩以廣義也。稱公者，明本諸侯也。○舉採，七代反，下「採地」同。

【疏】注「舉採」至「侯也」。○解雲：知劉卷本是諸侯者，正以其葬稱公故也。知天子使大夫爲治其國者，正以此人身在王朝，明其本國須有治之者。雲「有功而卒者，當益封其子」者，正以父子並得之，故謂之「益」。雲「不以故國」者，經使無文，^②不知其故國是何。雲「因恩以廣義也」者，謂因有主會之恩，遂舉採稱公，以廣見其本是諸侯之義也。雲「稱公者，明本諸侯也」者，正以天子大夫，本無稱公之義。今言葬劉文公，乃與葬晉文公之屬相似故也。

冬，十有一月，庚午，蔡侯以吳子及楚

人戰於柏莒，楚師敗績。吳何以稱子？據

滅徐稱國。○伯莒，《左氏》作「伯舉」。^③【疏】注「據滅徐

稱國」。○解雲：即昭三十年冬十二月，吳滅徐。徐子章

禹奔楚是也。夷狄也，而憂中國。言子，起憂中

國，言以明爲蔡故也，與桓十四年同。【疏】注「言以」至

「年同」。○解雲：桓十四年冬，「宋人以齊人」以下「伐鄭」，傳雲：「以者可？」^④行其意也。彼注雲「以己從人

曰行，言四國行宋意也」是也。其憂中國奈何？

伍子胥父誅乎楚，挾弓而去楚，挾弓者，懷格意

也。禮，天子雕弓，諸侯彤弓，大夫嬰弓，士盧弓。○挾

^①「哀元年」，原作「哀九年」。阮校：「浦鍾雲：『元』誤

「九」。按：何校本正作「元」。楚子圍蔡在哀元年，今據單疏鈔本改。

^②「使」，阮校：「浦鍾雲：『史』誤『使』。段校本作『傳』是也。」

^③「伯舉」，原作「柏舉」。余本、京都本、宋本《釋文》作「伯舉」，與《左傳》定公四年經合，今據改。

^④「可」，阮校引浦鍾雲：「『何』誤『可』」。今按：桓公十四年傳作「以者何」，則作「何」是。

弓，音協，又子協反。雖，下遼反。^①彤，大冬反。嬰弓，於耕反。見《司馬法》。盧，力吳反。【疏】注「挾弓」至「意也」。○解雲：格猶拒也。言所以挾弓者，謂若君使人追之時，已即懷拒之意，故曰「挾弓者，懷格意也」。若似今人謂不順之處為格化之類也。或雲：格，來也，言所以挾弓者，懷欲到來復讎之意。○注「禮天子」至「盧弓」。○解雲：古禮無文也。以干闔廬。不待禮見曰干。欲因闔廬以復讎。○禮見，賢遍反，下「不見」同。闔廬曰：「士之甚，言其以賢士之甚。勇之甚！」將為之興師而復讎於楚。伍子胥復曰：「諸侯不為匹夫興師，必須因事者，其義可得因公託私，^②而以匹夫興師討諸侯，則不免於亂。」^③○將為，於僞反，下「不為也」、「不為匹」、「為是」，注「為子胥」同。且臣聞之，事君猶事父也。虧君之義，復父之讎，臣不為也。」於是止。

蔡昭公朝乎楚，有美裘焉，囊瓦求之，昭公不與，為是拘昭公於南郢，數年然後歸之。於其歸焉，用事乎河，時北如晉請伐楚，

因祭河。○囊，乃郎反。郢，以井反，^④又以政反。【疏】「為是拘昭公於南郢」。○解雲：蓋以楚於諸夏差而近南，故謂之南郢。若宣十二年傳雲「南郢之與鄭，相去數千里」，何氏雲「南郢，楚都」之類是也。○注「時北」至「祭河」。○解雲：正以河非楚、蔡之間也。曰：「天下諸侯苟有能伐楚者，寡人請為之前列。」楚人聞之，怒，見侵後聞蔡有此言而怒。【疏】注「見侵」至「而怒」。○解雲：正以上文「楚人圍蔡」，在侵楚之後故也。而伐蔡者，即下「楚人圍蔡」是也。^⑤圍而言伐者，舉總名故也。為是興師，使囊瓦將而伐蔡。蔡請救於吳。伍子胥復曰：「蔡非有罪也，楚人為無道，君如有憂中國之心，則若時可矣。」猶曰：若是時可興師矣，激發初欲興師意。○

①「下」，宋本《釋文》作「丁」，當是。

②「託私」，京都本、再造善本作「無事」，屬下。

③「於」，京都本、再造善本、閣本作「為」。

④「井」，原作「其」，今據余本、宋本《釋文》改。

⑤「下」，杉浦校：「單疏鈔本作「上」是也。」

將，子匠反。激，古狄反。於是興師而救蔡。不書

與子胥俱者，舉君爲重。子胥不見於經，得爲善者，以吳義文得成之也。雖不舉子胥，爲非懷惡而討不義，君子不得不與也。^①【疏】「而救蔡」。○解云：不書救蔡者，

止以蔡爲兵故首也。^②○注「子胥」至「成之也」。○解

云：案此傳文，有善子胥之意。子胥不得見於經而得爲善之者，正以吳得進而稱子，是其義文。以是之故，得成子胥之善，故曰「以吳義文得成之」也。○注「雖不」至「與也」。○解云：吳子若直救蔡討楚而敗之也，是其憂中國，尊事周室之義，但親用子胥之謀，兼有爲復讎之意，是以傳家取而說之，遂舉子胥之辭以見之。雖舉子胥之辭，但非懷惡而討不義，是以君子與之。昭十一年楚子誘蔡侯之下，傳云：「懷惡而討不義，君子不予也。」故注者取而況之。^③

曰：事君猶事父也，此其爲可以復讎奈何？曰：父不受誅，不受誅，罪不當誅也。

子復讎可也。《孝經》曰：「資於事父以事君，而敬同。」本取事父之敬以事君，而父以無罪爲君所殺。諸侯之君與王者異，於義得去，君臣已絕，故可也。《孝經》

云：「資於事父以事母。」莊公不得報讎文姜者，母所生，雖輕於父，重於君也。《易》曰：「天地之大德曰生。」故得絕，不得殺。【疏】注「本取事父以事君」。○解云：何氏之意，以資爲取，與鄭異。鄭注云：「資者，人之行也。」注《四制》云：「資猶操也。」然則言人之行者，謂人操行也。雲雲之說，具於《孝經》疏。○注「莊公」至「君也」。○解云：即莊元年注雲，言遜者，「明但當推逐去之，亦不可誅，^④誅不加上之義」是也。○注「易曰」至「曰生」。○解云：《下繫辭》文也。父受誅，子復讎，推刃之道也。子復囚，^⑤非當復討其子。一往一來曰推刃。○當，丁浪反。復讎不除害，取讎身而已，不得兼讎

① 「與」，阮校：「鄂本『與』下有『之』。」

② 「止以蔡爲兵故首也」，阮校：「浦鏜雲：『故首』疑誤倒。何校本雲：『止』疑『正』。」杉浦校：「單疏鈔本

「止」作「正」，「故首」作「首故」。

③ 「況」，京都本、再造善本作「說」。

④ 「不可誅」，阮校：「浦鏜雲：『可』下脫『加』。按：浦說是也。」

⑤ 「囚」，阮校：「鄂本作『讎』，當據正。」

子復將恐害己而殺之。時子胥因吳之衆，^①墮平王之墓，燒其宗廟而已。昭王雖可得殺，不除雲。^②○墮，許規反。去，起呂反。【疏】注「時子胥」至「而已」。○解雲：《春秋說》文也。彼文又雲：「鞭平王之尸，血流至踝。」此注不言之者，省文也。案昭二十六年秋九月，「楚子居卒」，至今十餘年矣，而言血流至踝者，非常之事，寧可常理言之？或者蓋以子胥有至孝之至，精誠感天，使血流，所以快孝子之心也。朋友相衛，同門曰朋，同志曰友。相衛，不使爲讎所勝。時子胥因仕於吳爲大夫，君臣言朋友者，闔廬本以朋友之道爲子胥復讎。^③孔子曰：「益者三友，損者三友：友直，友諒，友多聞，益矣；友便辟，友善柔，友便佞，^④損矣。」○辟，婢亦反。辯佞，如字，本亦作「便佞」。^⑤【疏】注「同門」至「損矣」。○解雲：出《蒼頡篇》。漢主謂司馬遷雲：「李陵非汝同門之朋，同志之友乎？」義亦通於此。而《書傳》散宜生等受學於大公，大公除師學之禮，酌酒切肺，^⑥約爲朋友。然則大公爲師而言朋者，蓋大公知其非常人，遂除師學之禮，以友朋之道待之也。既除師學之禮，連朋言之亦何傷？雲「君臣言朋友者」雲雲，即《詩》雲「朋友攸攝，攝以威儀」，注雲：^⑦「朋友謂群臣，與成王同志好者。」義

亦通於此。雲「孔子曰益者三友」雲雲，^⑧《論語》文。引之者，道闔廬、子胥相與益友，蓋以闔廬爲諒。^⑨何者？謂一許爲之興師，終不變悔是也。蓋以子胥爲直與多聞，何者？不敢虧君之義復父之讎，是其直也。子胥賢者，博古今之事，是其多聞矣。便辟，謂巧爲譬喻。善柔，謂口柔面柔體柔之屬。^⑩辯佞，辯爲媚矣。案今世間有一《論語》，音便辟爲「便僻」者，非鄭氏之意，通人所不

①「因吳之衆」，阮校：「鄂本無『之』，此衍。」
②「雲」，余本、監本、毛本作「去」，當是。
③「廬」，原作「盧」，今據余本、京都本改。
④「便佞」，阮校：「諸本同。按：疏本亦作『辯佞』，雲：『辯爲媚矣。』今本作『便佞』，蓋據何晏《論語集解》所改。」
⑤「亦」，宋本《釋文》作「又」。
⑥「肺」，阮校：「《書傳》作『脯』。」
⑦「注」，阮校：「當作『箋』。」
⑧「雲雲」下，杉浦校：「單疏鈔本有『者』字。」
⑨「諒」，阮校：「何校本作『亮』。」杉浦校：「單疏鈔本『諒』作『亮』。」
⑩「體柔」之「柔」，原脫，今據單疏鈔本、毛本補。

取矣。^①而不相逋，逋，出表辭，猶先也。不當先相擊刺，所以伸孝子之恩。○逋，音峻，又音巡，又玄徧反，先也。刺，七亦反。【疏】注「逋出」至「先也」。^②○解雲：依《大司馬》，田獵習戰之時雲：「爲表，百步則一，爲三表，又五十步爲一表。」然則表者，謂其戰時旅進旅退之限約。逋者，謂不顧步伍勉力先往之意，故曰「出表辭」。若然，所以伐吳之經，不使子胥爲兵首者，蓋以吳王討楚，兵爲蔡故，且舉君爲重，是以不得見也。古之道也。

楚囊瓦出奔鄭。

庚辰，吳人楚。^③吳何以不稱子？據

狄人盟於邢，有進行稱人。○行，下孟反。【疏】「楚囊瓦出奔鄭」。○解雲：《左氏》以爲戰不勝而去。上經稱人者，貶。範氏雲：「知見伐由己，故懼而出奔。」蓋何氏與之同。而戰時稱人者，行不進矣。○注「據狄」至「稱人」。○解雲：即僖二十年「秋，齊人、狄人盟於邢」，何氏雲「狄稱人者，能常與中國也」是也。反夷狄也。其反夷狄奈何？君舍於君室，大夫舍於大

夫室，蓋妻楚王之母也。舍其室，因其婦人爲妻。日者，惡其無義。^④【疏】注「日者惡其無義也」者。正以《春秋》之義，入例書時，傷害多則月，即定五年夏「於越入吳」，僖三十三年「春，王正月」，^⑤秦人入滑之屬是。今而書日，故須解之。

五年，春，王正月，辛亥，朔，日有食之。是後臣恣日甚，魯失國寶，宋大夫叛。^⑥【疏】注「是後」至「夫叛」。^⑦○解雲：蓋謂下八年秋「晉趙鞅帥師侵

- ①「矣」，杉浦校：「單疏鈔本無。」
- ②「注逋出至先也」，杉浦校：「單疏鈔本作「逋出表辭猶先也者」，無「○解雲」。「者」下有「逋」字，「逋」下夾注「音思俊反」四字。」
- ③「楚」，阮校：「唐石經、諸本同。《左氏》作「郢」。」
- ④「無」，阮校：「鄂本作「不」，此誤。」
- ⑤「正」，阮校：「浦鏜雲：「二」誤「正」。按浦說是也。」
- ⑥「宋大夫叛」，阮校：「疏中引作「宋五大夫叛」，何校本同，此脫「五」字，當據補。」
- ⑦「注是後至夫叛」，杉浦校：「單疏鈔本作「是後臣恣日甚者」，無「○解雲」，當據。」

鄭，遂侵衛」之文是也。雲「魯失國寶」，^①即下八年冬，「盜竊寶玉大弓」，傳雲「季氏之幸，則微者也，惡乎得國寶而竊之」是也。雲「宋五大夫叛」，^②即下十一年「春，宋公之弟辰及仲佗、石彊、公子池自陳入於蕭，以叛」，「秋，宋樂世心自曹入於蕭」。何氏雲「不言叛者，從叛臣，叛可知」是也。

夏，歸粟於蔡。孰歸之？諸侯歸之。

曷為不言諸侯歸之？據齊人來歸衛寶。【疏】注

「據齊」至「衛寶」。○解雲：在莊六年。離至不可得

而序，故言我也。時為蔡新被強楚之兵，故歸之粟，

與戍陳同義。○為，於僞反。【疏】注「時為」至「之粟」。

○解雲：即《老子》雲「大兵之後，必有凶年」，彼注雲「言妨其耕稼」是也。○注「與戍陳義」。^③○解雲：即襄五

年「冬，戍陳」，傳雲：「孰戍之？諸侯戍之。曷為不言諸

侯戍之？離至不可得而序。」彼注雲：「離至，離別前後

至也。陳坐欲與中國，被強楚之害，中國宜雜然同心救

之，乃解怠前後至，不序，^④以刺中國之無信。」故言我

也」，注雲：「言我者，以魯至時書，與魯微者同文。微者

同文者，使若城楚丘，辟魯獨戍之。」今歸粟於蔡之義亦

然，故雲「與戍陳同義」矣。然則彼已有傳，而復發之者，正以歸戍之文異，故同之。

於越人吳。於越者何？越者何？不

言「或」者，嫌兩國。【疏】「於越者何」。○解雲：正以越

為國名，經典通稱，忽加「於」字，故執不知問。○「越者

何」。○解雲：問昭三十二年「夏，吳伐越」之屬矣。正以

此文加「於」字，是以單言越者，翻然可怪，故執不知問。

○「不言」至「兩國」。○解雲：隱元年傳雲「曷為或言會，

或言及」之屬皆言「或」，今此何故不雲「曷為或言於越，

或言越」者，弟子之意本疑於越與越為兩國，是以分別而

問之。舊雲：正以僖四年傳雲：「執者曷為或稱侯？或

稱人？稱侯而執者，伯討也，稱人而執者，非伯討也。」

然則彼言「或」者，乃是兩事之辭，今此若雲「曷為或言

①「寶」下，杉浦校：「單疏鈔本有『者』字。」

②「叛」下，杉浦校：「單疏鈔本有『者』字。」

③「義」上，阮校：「脫『同』。」杉浦校：「單疏鈔本『義』上有『同』，與注合。」

④「不序」，阮校：「何校本『不』上有『故』字。」今按：有「故」字，與襄公五年注合。

越，或言於越」，則嫌爲兩國，是以別之。於越者，未

能以其名通也。越者，能以其名通也。越人

自名於越，君子名之曰越。治國有狀，能與中國通者，以

中國之辭言之曰越。治國無狀，不能與中國通者，以其

俗辭言之，因其俗可以見善惡，故雲爾。赤狄以赤進者，

狄於北方總名，赤者其別，與越異也。吳新憂中國，士卒

罷敝，而人之疾罪重，故謂之於越。○見，賢偏反。卒，

子忽反。罷弊，音皮，弊亦作「敝」，音同。【疏】注「治國

有狀」雲雲，「治國無狀」雲雲。○解雲：此狀謂模狀也，

模狀猶規矩。若有規矩，是得先王之術，^①故謂之進。若

無規矩，是失治國之法，當獲咎禍，故謂之退。是以此注

雲「治國有狀」雲雲，「治國無狀」雲雲。凶儀雲「無狀招

禍」，義亦通於此。^②亦有一本「狀」皆作「禮」字，但非古

本，是以不能得從之也。^③○注「赤狄」至「異也」。○解

雲：正以宣十一年「秋，晉侯會狄於攢函」之文，^④直單言

狄，不言赤矣。宣十五年夏「晉師滅赤狄潞氏」，傳雲「潞

子之爲善也」，「離於夷狄」，是其加赤爲進之事也。但狄

者北方之總名，乃是鄙賤之號，赤者是其別稱，故得加之

爲進矣。今越者，乃是其國名，若似齊、晉、魯、衛之屬，

諸夏之人有禮儀者，其國名之上，不見加「於」處，唯有越

爲此文，尋檢其事，此時人吳，實合罪貶，故注之。○注「疾罪」至「於越」。○解雲：夷狄之稱，止有七等之名，州不若國，最其賤者，今乃加「於」，見其人吳之疾，故以罪重言之。

六月，丙申，季孫隱如卒。仲遂以貶起弑，

是不貶，著其逐君者，舉君出爲重，故從季辛起之，猶衛

孫甯。○弑，音試。【疏】注「仲遂」至「孫甯」。○解

雲：宣八年「仲遂卒於垂」，傳雲：「仲遂者何？公子遂

也。何以不稱公子？貶。曷爲貶？爲弑子赤貶。」是

其以貶起弑也。案公子翬、仲遂之類而不據之者，以其

無卒文故也。今此欲道隱如之卒，經無貶文，故據卒時

有貶文者言之也。欲舉君出爲重者，即昭二十五年「九

月，己亥，公孫於齊」是也。言舉其君出爲重，即隱如之

罪已重，是以於卒不復貶也。^⑤言「故從季辛起之」者，即

①「王」，原作「生」，今據京都本、再造善本、閣本改。

②「此」，原作「比」，今據京都本、再造善本、閣本改。

③「也」，杉浦校：「單疏鈔本無。」

④「攢函」，宣公十一年經作「橫函」。

⑤「於」，杉浦校：「單疏鈔本無。」

昭二十五年「秋，七月，上辛，大雩。季辛，又雩」者，彼注雲「不言下辛言季辛者，起季氏不執下而逐君」是也。言季辛已起其逐君之義，是以於卒不勞更貶也。言「猶衛孫、甯」者，即襄十四年夏「四月，己未，衛侯衎出奔齊」，注雲「不書孫、甯逐君者，舉君絕爲重」是也。

秋，七月，壬子，叔孫不敢卒。

冬，晉士鞅帥師圍鮮虞。

監本附音春秋公羊注疏卷第二十五

監本附音春秋公羊注疏定公卷第二十六

起六年，盡十五年

何休學

六年，春，王正月，癸亥，鄭游邀帥師滅許，以許男斯歸。

二月，公侵鄭。月者，內有彊臣之讎，不能討，而外結怨，故危之。公至自侵鄭。

夏，季孫斯、仲孫何忌如晉。

秋，晉人執宋行人樂祁犂。^①

冬，城中城。

季孫斯、仲孫忌帥師圍運。此仲孫何

忌也，曷爲謂之仲孫忌？譏二名。二名

非禮也。爲其難諱也。一字爲名，令難言而易諱，所

以長臣子之敬，不逼下也。《春秋》定、哀之間，文致太

平，欲見王者治定，無所復爲譏，唯有二名，故譏之，此《春秋》之制也。○爲其，於僞反。令，力呈反。易，以鼓反。長，丁丈反。大，音泰。見，賢徧反。治，直吏反。復，扶又反。【疏】「冬季孫斯仲孫忌」。○解云：古本無「何」字，有者誤也。《穀梁》及賈經皆無「何」字。又哀公三年經云「晉魏多帥師侵衛」，傳云：「此晉魏曼多也，曷爲謂之晉魏多？譏二名。二名非禮也。」以此言之，則此經無「何」明矣，^②而賈氏云《公羊》曰仲孫何忌者，蓋誤。○「此仲孫」至「之仲孫忌」。○解云：正決上文夏「仲孫何忌如晉」之文也。○注「一字」至「逼下」。○解云：難言者，謂言難著。既不言君父之名，即是臣子之敬，故曰「長臣子之敬」也。動不違禮，爲下之易，故曰「不逼下也」。云《春秋》定、哀之間，文致太平者，實不
太平，但作太平文而已，故曰「文致太平」也。案《春秋

① 「祁」，阮校：「唐石經同，閩、監、毛本「祁」改「祈」。」
② 「何」，原作「可」。阮校引浦鏜云：「「何」誤「可」。」今據單疏鈔本、閣本改。

說》，昭公亦為所見之世，而此注偏指定、哀為太平者，^①正以昭公之時，未譏二名故也。雲「唯有二名，故譏之」者，文王之臣散宜生，孔子門人必不齊之屬，皆親事聖人，而以二字為名者，謂依古禮，若似堯名放勳，^②舜名重華，禹名文命，宣王之興，名子為宮皇之屬是也。^③但孔子作《春秋》，欲改古禮為後王之法，是以譏其二名，故注即言「此《春秋》之制也」。然則傳雲「二名非禮」者，謂非新王禮，不謂非古禮也。

七年，春，王正月。

夏，四月。

秋，齊侯、鄭伯盟於鹹。^④○鹹，音咸。

齊人執衛行人北宮結以侵衛。

齊侯、衛侯盟於沙澤。^⑤

大雩。先是公侵鄭，城中城，季孫斯、仲孫忌如

晉、圍運，費重不恤民之應。○費重，芳味反，下同。

【疏】注「先是公侵鄭」。○解雲：即上六年「二月，公侵鄭」是也。雲「城中城」者，即上六年「冬，城中城」是也。雲「季孫斯、仲孫忌如晉」者，在上六年夏，而於「城中城」之下言之者，蓋遂重者先言之故也。^⑥雲「圍運」者，即上

六年冬季孫斯、仲孫何忌圍運是。^⑥

齊國夏帥師伐我西鄙。

九月，大雩。承前費重不恤民，又重之以齊師

伐我，我自救之役。^⑦○重之，直用反。

冬，十月。

八年，春，王正月，公侵齊。公至自

侵齊。

二月，公侵齊。三月，公至自侵齊。出

①「偏」，原作「徧」，今據京都本、再造善本、中華本、閣本改。

②「放」，原作「故」，今據京都本、再造善本、中華本、閣本改。

③「皇」，阮校：「閩、監本同，毛本改『涅』。」

④「沙澤」，阮校：「唐石經、諸本同。《左氏》、《穀梁》無『澤』字。」

⑤「遂」，阮校引浦鏜雲：「當『逐』字誤。」

⑥「仲孫何忌」，阮校：「浦鏜雲：經文無『何』字，惟六年夏「如晉」經有『何』字，亦衍文。按：浦說是也。」

⑦「我」，阮校：鄂本無此「我」字。

入月者，內有彊臣之讎，外犯彊齊再出，尤危於侵鄭，故知入亦當蒙上月。【疏】「春王正月公侵齊」。○解雲：侵伐例時，而此月者，正以內有強臣之讎，而外犯彊齊，故危之。○「公至自侵齊」。○解雲：以例言之，不蒙上月矣。○注「出入」至「上月」。○解雲：正以《春秋》之例，有雖在月下而不蒙月者，故賈氏雲「還至不月，爲曹伯卒月」是也，故何氏分疏之雲。此定公侵齊，所以出入月者，正以內有強臣之讎不能討，而外犯彊齊，頻煩再出，^①尤危於六年侵鄭之時，故知其入亦當蒙月也。上六年「二月，公侵鄭」，彼注雲：「月者，內有強臣之讎不能討，而外結怨，故危之也。」下經始雲「公至自侵鄭」，則知何氏以爲至不蒙月，故此決雲「再出尤危於侵鄭」，則知入亦當蒙月也。^②

曹伯露卒。

夏，齊國夏帥師伐我西鄙。

公會晉師於瓦。公至自瓦。此晉趙鞅之

師也，但言晉師者，君不會大夫之辭也。公會大夫，不別得意，雖得意不致，此致者，諱公爲大夫所會，故使若得意者。○別，彼列反。【疏】注「此晉」至「之辭」。○解

雲：正以下經雲「晉趙鞅帥師侵鄭，遂侵衛」，故知此言公會晉師，是趙鞅之師矣。宣元年秋「趙盾帥師救陳」，宋公以下「會晉師於斐林，伐鄭」，傳雲：「此晉趙盾之師，曷爲不言趙盾之師？君不會大夫之辭也。」今此文勢與彼正同，故此何氏取彼傳文以解之。○注「公會」至「不致」。○解雲：莊六年作注雲：「公與二國以上出會盟，得意致會，不得意不致。公與一國出會盟，得意致地，不得意不致。」然則公與諸侯尊同體敵，莫肯相下，故須別之，見其得意與否。若與大夫盟會之時，尊卑異等，得意可知，何勞別之乎？故僖二十五年冬「公會衛子、莒慶盟於洮」，何氏雲「洮，內地。公與未踰年君、大夫盟，不別得意，雖在外，猶不致也」是。雲「此致者，諱公爲大夫所會，故使若得意者」，正以公與一國出會盟，得意致地，不得意不致。今此書致，故雲「使若得意者」。

秋，七月，戊辰，陳侯柳卒。

① 「類」，原作「頓」，今據京都本、再造善本、閣本改。

② 「則」，杉浦校：「單疏鈔本作『故』，毛本亦然。按：『則』當『故』之誤。」

③ 「作」，阮校：「『作』爲『傳』之誤。」

晉趙鞅帥師侵鄭，遂侵衛。^①

葬曹靖公。^②○曹靖，才井反，本亦作「靖」。

九月，葬陳懷公。

季孫斯、仲孫何忌帥師侵衛。

冬，衛侯、鄭伯盟於曲濮。^③○濮，音卜。

從祀先公。從祀者何？順祀也。復文

公之逆祀。【疏】從祀者何？○解雲：欲言其祭，經無

宮廟之文，欲言非祭，謂之從祀，故執不知問。文公逆

祀，去者三人。諫不從而去之。【疏】文公逆祀去

者三人。○解雲：謂文二年「八月，丁卯，大事於大廟，

躋僖公」，傳雲「躋者何？升也。何言乎升僖公？」譏。

何譏爾？逆祀也。其逆祀奈何？先禰而後祖也」是

也。定公順祀，叛者五人。諫不以禮而去曰叛。

去與叛皆不書者，微也。不書禘者，後禘亦順，非獨禘

也。言祀者，無已長久之辭。不言僖公者，閔公亦得其

順。【疏】注「諫不」至「曰叛」。○解雲：謂諫君全不以

禮，不從之而去者，謂之叛也。○注「不書」至「禘也」。

○解雲：何氏之意，以爲三年一禘，五年一禘，謂諸侯始

封之年，禘祫並作之。但夏禘則不約，秋祫則不嘗而已。

一祫一禘，隨次而下，其間三五參差，亦有禘祫同年時

矣。若其有喪，正可於喪廢，其祫禘之年，仍自乘上而數

之，即僖八年「禘於大廟」之時，禘祫同年矣。至文二年

「大事於大廟」之下，^③傳雲：「大事者何？大祫也。」何

氏雲：「從僖八年禘數之，知爲大祫。」是從僖八年禘祫同

年數之，即文二年爲祫年，文五年爲禘祫同年，又隨次而

數之，至今定八年，亦禘祫同年矣。凡爲祭之法，先重而

後輕，禘大於祫，固當先之，則知此言從祀先公者，是禘

明矣，故雲「不書禘者，後祫亦順，非獨禘也」。若然，既

言是禘，理宜在夏，而在冬下者，當之矣。○注「言祀」至

「之辭」。○解雲：桓八年傳雲「春曰祠」，何氏雲：「祠猶

食也，猶繼嗣也。春物始生，孝子思親，繼嗣而食之，故

曰祠，因以別死生。」然則此經何以不言從祭先公，或言

①「趙鞅」，阮校：「《左氏傳》經作「士鞅」。」

②「曹靖」，阮校：「唐石經、諸本同。《釋文》作「曹靖」，雲「才井反，本亦作靖」。按：段校本作「靖」。」

③「二」，原作「三」。阮校：「浦鏜雲：「二」誤「三」。按：浦說是也。」今據單疏鈔本改。

大事於先公，而言祀者，見其相嗣不已，長久常然，故雲「言祀者，無已長久之辭」。○注「不言」至「其順」。○解雲：閔二年「夏，五月，乙酉，吉禘於莊公」，僖八年「秋，七月，禘於大廟」，文二年「八月，丁卯，大事於大廟」之文皆道其人，今此經文所以不言從祀僖公而言先公者，正以閔公亦得其順，是以不得特指之。

盜竊寶玉大弓。盜者孰謂？微而竊大，

可怪，故問之。【疏】注「微而」至「問之」。○解雲：哀四年傳雲：「弑君賤者窮諸人，此其稱盜以弑何？賤乎賤者也。」然則盜是微賤之稱，寶玉大弓，國之重寶，故雲「微而竊大」也。謂陽虎也。陽虎者，曷爲者也？季氏之宰也。季氏之陪臣爲政者。【疏】注

「季氏」至「政者」。○解雲：季氏之宰，於國爲陪臣，而爲政於魯，故曰「爲政」也。季氏之宰，則微者也，惡乎得國寶而竊之？陽虎專季氏，季氏專魯國。陽虎拘季孫，季氏逐昭公之後，取其寶玉，藏於其家。陽虎拘季孫，奪其寶玉。季孫取玉不書者，舉逐君爲重。○惡乎，音烏。【疏】注「季氏逐昭公」者。○解雲：在昭二十五年秋。孟氏與叔孫氏迭

而食之，賕而鉏其板，①以爪刻其饋斂板。○迭，

大結反，注同。食之，音嗣，下注「迭食」同。賕而，五多反，下同。鉏，本又作「鐵」，七廉反，又且審反，以爪刻饋斂板也。本或作「鉏」，誤。【疏】注「以爪刻」至「板」。○解雲：謂以指爪刻其饋器之上，斂藏衣物之板，謂蓋板也。曰：「某月某日，將殺我於蒲圃，②力能

救我則於是。」於是時。○圃，本又作「甫」，同，布古反，又音布。至乎日若時而出。臨南者，陽虎之出也，御之。爲季孫御。【疏】「至乎日若時」。○

解雲：謂至於某日如約之時也。以此言之，則知上文雲某月某日，宜亦言其時，但傳家省去之，至此乃言「若時」

①「賕」，阮校：「唐石經、諸本同。石經原刻作『俄』，後改『賕』，下同。按：桓二年傳『俄而可以爲其有矣』，莊三十二年傳『俄而牙紕械成』，字皆作『俄』。何注桓二年雲：『俄者，謂須臾之間，創得之頃也。』此從目，非。」

②「蒲圃」，阮校：「唐石經、諸本同。《釋文》：『蒲圃，本又作甫。』葉鈔本作『滿圃』。今按：宋本《釋文》作『滿圃』，與葉鈔本同。」

以刻日也。○「臨南」至「之出」。○解雲：姊妹之子謂之出，蓋是虎之外生也。或雲從其家出而仕於公，亦不妨，下季氏雲「世世有子」是矣。○「於其乘焉」者。謂於其上車之時矣。^①於其乘焉，季孫謂臨南曰：「以季氏之世世有子，言我季氏累世有女以爲臣。○其乘，繩證反，下皆同。女，音汝。子可以不免我死乎？」以義責之。臨南曰：「有力不足，臣何敢不勉？」陽越者，陽虎之從弟也，爲右。爲季孫車右，實衛之。○從弟，才用反，下同。【疏】注「實衛之」。○解雲：謂守衛季孫，不令走。諸陽之從者，車數十乘。至於孟衢，孟氏衢四達，可以橫去。○數，所主反。【疏】注「衢四」至「橫去」。○解雲：即《釋宮》「四達謂之衢」，李巡雲「四達各有所至曰衢」，孫氏曰「交通四出」是也。^②臨南投策而墜之，^③策，馬捶也。見二家迭食之，欲將季孫由孟氏免之，恐陽越不聽，故詐投策，欲使下車。○而墜，^④直類反。捶，章藥反。陽越下取策，臨南駭馬，捶馬銜走。○駭，本又作「掀」，字書無此字，相承用之，素動

反。而由乎孟氏，陽虎從而射之，矢著於莊門。莊門，孟氏所入門名。言幾中季孫，賴門閉，故著門。○射，食亦反。著，直略反，注同。莊，本或作「嚴」，亦音莊。幾，音祈。中，丁仲反。然而，甲起於琴如。甲，公斂處父所帥也。琴如，地名。二家知出期，故於是時起兵。【疏】注「甲公」至「地名」。○解雲：即下傳雲「既駕，公斂處父帥師而至」是也。○注「二家」至「起兵」。○解雲：即上傳雲「力能救我則於是」是也。弑不成，却反舍於郊，皆說然息。說，解舍然猶如。○殺不，音試，下同。卻反，^⑤去略反，本又作「却」。說然，本又作「稅」，始稅反，又他會反，注同。說，「○」，京都本，再造善本無此標識。「於其乘焉者謂於其上車之時矣」，阮校：「此疏當在下節注下，此誤。」^①「曰」下，杉浦校：「單疏鈔本有「衢」字。按：有「衢」字是也。」^②「墜」，阮校：「諸本同，《釋文》作「隊」，唐石經缺。」^③「墜」，宋本《釋文》作「隊」。^④「卻」，原作「卻」，據宋本《釋文》改。^⑤

解舍也。然猶如也。【疏】「弑不成」。○解雲：正以季孫於陽虎爲君，故謂之弑也。却反舍於郊者，謂上文陽虎從而射之時，逐之鄉孟氏，今而還去舍於郊，故曰「却反舍於郊」，不謂元從郊來。或曰：「弑千乘之主，時季氏邑至於千乘。而不克，舍此可乎？」嫌其近而無所依。陽虎曰：「夫孺子得國而已，得免專國家而已。如丈夫何？」如猶奈也。丈夫，大人稱也。○稱，尺證反。哦而曰：「彼哉！彼哉！」望見公斂處父師，而曰「彼哉彼哉」。再言之者，切遽意。○遽，其慮反。趣駕。」使疾駕。○趣，七欲反，一音七住反。既駕，公斂處父帥師而至，公斂處父，孟氏、叔孫氏將兵之將。【疏】注「公斂」至「之將」。○解雲：《左氏》以爲孟氏家臣。謹然後得免，自是走之晉。寶者何？璋判白，判，半也。半圭曰璋，①白藏天子，青藏諸侯，魯得郊天，故錫以白。不言璋言玉者，起珪、璧、琮、璜、璋五玉盡亡之也。傳獨言璋者，所以郊事天，尤重。《詩》云「奉璋峨峨，髦士攸宜」是也。禮，珪以朝，璧以聘，琮以發兵，璜以發衆，璋

以徵召。○懂，其靳反。璋，音章。琮，在宗反。璜，音黃。峨峨，五多反，本又作「蛾」。②髦，音毛。【疏】「寶者何」。○解雲：欲言貴物，微者竊之，欲言賤物，又在弓玉之上，故執不知問。○注「半圭曰璋」。③○解雲：《釋器》無文。雲「白藏天子，青藏諸侯」，《春秋說》文。雲「不言璋言玉者，起珪、璧、琮、璜、璋五玉盡亡之也」者，正以玉爲總名故也。○注「詩雲」至「徵召」。④○解雲：言文王祭皇天上帝時，在助祭者奉此半珪之璋，其儀容峨峨盛莊矣，盡是俊士之所宜利。何氏與鄭同。雲「禮，珪以朝，璧以聘，琮以發兵，璜以發衆，璋以徵召」者，時

①「圭」，阮校：「鄂本、閩本同，監、毛本「圭」作「珪」，下起珪、璧字皆從玉。」

②「蛾」，京都本、宋本《釋文》作「蛾」。

③「注半圭曰璋」，杉浦校：「單疏鈔本作「注半圭曰璋者」，下無「○解雲」。依此本，則注文本作「圭」也。」

④「注詩雲至徵召」，杉浦校：「單疏鈔本作「注詩雲奉璋峨峨，髦士攸宜是也者」，無「○解雲」。按：此疏標注起訖，作「注詩雲至徵召」，是後人所改。」

王之禮也。弓繡質，質，拊也。^①言大者，力千斤。○

拊，^②芳甫反，又方於反。^③【疏】注「言大者力千斤」。○

解雲：千斤之文，何氏有所見。《家語》云：「三十斤爲

鈞，謂之石。」^④然則千斤之弓，其力八石三斗有餘，故《左

傳》云「可以威不軌，戒不虞也」。龜青純。純，緣也。

謂緣甲頤也。千歲之龜青髯，明於吉凶。《易》曰：「定天

下之吉凶，成天下之亹亹者，莫善乎蓍龜。」^⑤經不言龜

者，以先知，從寶省文。謂之寶者，世世寶用之辭，^⑥此皆

魯始封之錫。不言取而言竊者，正名也。定公從季孫假

馬，孔子曰：「君之於臣，有取無假，而君臣之義立。」主書

者，定公失政，權移陪臣，拘其尊卿，喪其五玉，^⑦無以合

信天子，交質諸侯，當絕之。不書拘季孫者，舉五玉爲

重。書大弓者，使若都以國寶書，微辭也。○青純，之間

反，注同。^⑧純緣，悅絹反，^⑨下同。頤，而占反。亹，文

匪反。^⑩蓍，音尸。喪，息浪反。【疏】注「千歲之龜

青純」。○解雲：以時事知之也。○注「易曰」至「蓍龜

也」。^⑪○解雲：此皆《上繫辭》文也。今《易》本「善」作

「大」字爲異。彼注雲：「凡天下之善惡，及沒沒之衆事，

皆成定之。」言其廣大無不包也。○注「經不言龜」至「微

辭也」。○解雲：「弓繡質，龜青純」，然則此等皆喪之，而

①「質拊也」，阮校：「閩、監、毛本同，《釋文》『質拊』，此從手旁，訛。」

②「拊」，宋本《釋文》作「質拊」，當是。

③「於」，原作「千」，今據余本、中華本、閩本、宋本《釋文》改。

④「謂之石」，阮校：「段校本『謂』字上有『百二十斤』四字，下文『三斗有餘』四字乃衍文。」杉浦校：「單疏鈔本『謂』上有『四鈞』。」

⑤「莫善乎蓍龜」，阮校：「解雲：今《易》『善』作『大』爲異。惠棟雲：『古《易》皆作『莫善乎蓍龜』，王弼本『善』作『大』，後人皆仍其誤。』按：今文《易》作『莫善』，古文《易》作『莫大』。鄭注本及王弼本皆費氏古文也，故作『大』。鄭注雲『言其廣大，莫不包也』，可證是『大』字。」

⑥「寶」，余本、何校本、閩本作「保」。阮校：「疏引作『世世保用之辭』，此以『保』訓『寶』也。今本仍作『寶』，非，定元年疏引同。」

⑦「五玉」，京都本、再造善本、閩本作「寶玉」，義爲長。【注】上，宋本《釋文》有「緣也」二字。

⑧「絹」，原作「維」，今據余本、中華本、閩本、宋本《釋文》改。

⑨「文」，閩本、宋本《釋文》作「亡」。

⑩「著」，原作「著」，今據閩本改。

經言大弓，特不言龜者，正以《禮器》、《郊特牲》陳幣之時，雲龜爲前列先知也，以其先知，故得從寶省文。然則龜非珠玉而得從寶省文者，以其能定吉凶，可以世世保而用之，故注雲「謂之寶者，世世保用之辭」。雲「此皆魯始封之錫」者，《左傳》定四年具有其文也。雲「不言取而言竊者，正名也」者，正所以不言盜取而言竊者，盜是卑賤之稱，是以不得言取也。竊者是其正名，是以即引《家語》以證之。定公從季孫假馬，^①孔子曰「君之於臣，有取無假，而君臣之義立」者，《家語》文。^②雲「無以合信天子，交質諸侯，當絕之」者，即上注雲「珪以朝，璧以聘」，今珪璧盡亡，故言此也。雲「書大弓者，使若都以國寶書，^③微辭也」者，言大弓與龜皆可保用，所以龜得從寶省文，而特書大弓不省文，使若都以國寶書，作微辭之義，何者？經言「盜竊寶玉大弓」，若似所謂寶玉者，即大弓是，言可世世傳保而金玉之然，故得爲微辭也。

九年，春，王正月。

夏，四月，戊申，鄭伯嚙卒。○嚙，敕邁反，

《左氏》作「蠆」。

得寶玉大弓。何以書？國寶也。喪

之書，得之書。微辭也，使若都以重國寶故書。不以罪定公者，其實失之，當坐，得之，當除。以竊寶不月，知得例不蒙上。^④○喪，息浪反。【疏】注「微辭」至「故書」。○解雲：寶玉大弓者，乃是周公初封之時受賜於周之物，而必藏之魯者，欲使世世子孫無忘於周，而定公失之，季氏奪之，皆當合絕。而上文直言「盜竊寶玉大弓」，此文直雲「得寶玉大弓」，傳雲「何以書？國寶也。得之書，喪之書」，^⑤不見貶之者，正言作微辭，使若都以重國寶之故而書之，文更無刺譏之義也。然則此言微辭者，仍與上文共爲一事，以上元年「定、哀多微辭」之下，何氏

① 「定」上，杉浦校：「單疏鈔本有『雲』字，是。」

② 「而君臣之義立者家語文」，阮校：「今《家語》無『君臣之義立』。」

③ 「都」，原作「者」，今據京都本、再造善本、中華本、閣本改。

④ 「不蒙上」下，阮校：「鄂本有『月』字，諸本皆脫。疏雲『不蒙上月』。」

⑤ 「得之書喪之書」，阮校：「今傳『喪之書』在上。」

首數喪失國寶而已。^①○注「不已」至「當除」。^②○解雲：上文之下有注雲「無以合信天子，交質諸侯，當絕」，今此寧知不復闕絕之者，正以得之當除故也。杜氏雲：「弓、玉，魯之分器，得之足以爲榮，失之足以爲辱，故重而書之。」義亦通於此。雲「以竊寶不月」雲雲者，即上八年經雲「冬，衛侯、鄭伯盟於曲濮。從祀先公。盜竊寶玉大弓」是也，則知今雖文承四月之下，不蒙上月明矣。

六月，葬鄭獻公。

秋，齊侯、衛侯次於五氏。欲伐魯也。善

魯能却難早，故書次而去。○卻難，起略反，下乃旦反。卻，亦作「却」。【疏】注「欲伐」至「而去」。○解雲：知欲伐魯者，正以直書其次，上下更無起文，乃與莊十年「夏，六月，齊師、宋師次於郎。公敗宋師於乘丘」之文同，故知正欲伐魯也。故彼傳雲「其言次於郎何？伐也」，「我能敗之，故言次也」是也。彼注雲：「此解本所以不言伐言次意也。二國纔止次，未成於伐，魯即能敗宋師，齊師罷而去，故不言伐言次也。明國君當強，折衝當遠。魯微弱，深見犯，至於近邑，賴能速勝之，故雲爾。」所以強內者，是其書次雲欲伐魯，善其却難早之文。其餘見言次不欲伐魯者，皆自有起文，即次聶北救邢、伐楚次於陘

之屬是也。

秦伯卒。

冬，葬秦哀公。

十年，春，王三月，及齊平。月者，頰谷之會，齊侯欲執定公，故不易。○不易，以豉反，下同。

【疏】注「月者」至「不易」。○解雲：下十一年「冬，及鄭平」，「叔還如鄭莅盟」，則知平例書時，而有月者，皆見義矣。而言「不易」者，即莊十三年「冬，公會齊侯盟於柯」，傳雲：「何以不日？易也。」何氏雲：「易，猶佼易也，相親信無後患之辭。」然則此書「月者，頰谷之會，齊侯欲執定公，故不易」，宣十五年「夏，^③五月，宋人及楚人平」之下，何氏雲：「月者，專平不易。」昭七年「春，王正月，暨齊平」，何氏雲「月者，刺內暨暨也」者，皆與鄉解合。

夏，公會齊侯於頰谷。公至自頰谷。

上平爲頰谷之會不易，故月。致地者，頰谷之會，齊侯作

①「首」，京都本、再造善本、閣本作「直」，義爲長。
②「不已」，何注作「不以」，此標起訖，當作「不以」。
③「宣」，原作「宜」，今據京都本、再造善本、中華本、閣本改。

侏儒之樂，欲以執定公。孔子曰：「匹夫而榮惑於諸侯者，誅！」於是誅侏儒，^①首足異處，齊侯大懼，曲節從教，得意故致也。^②○頰谷，古協反，《左氏》作「夾谷」。榮惑，音螢，一音於瓊反。處，昌慮反。【疏】注「上平」至「致地」。○解雲：莊六年何注雲：「公與一國出會盟，得意致地，不得意不致。」即桓二年秋「公及戎盟於唐」，「冬，公至自唐」，隱二年「秋，八月，庚辰，公及戎盟於唐」之屬是也。今此上平為頰谷之會不易，故月，即此平不得意也。而致地者，正以初雖見脅，終竟得意故也。雲「頰谷之會」至「曲節從教」，《家語》及《晏子春秋》文也。

晉趙鞅帥師圍衛。

齊人來歸運、謹、龜、陰田。齊人曷為

來歸運、謹、龜、陰田？據齊嘗取魯邑。【疏】注

「據齊」至「魯邑」。○解雲：即宣元年「六月，齊人取濟西

田」，哀八年「夏，齊人取謹及俾」之文是也。孔子行

乎季孫，三月不違，孔子仕魯，政事行乎季孫，三月

之中不見違，過是違之也。不言政行乎定公者，政在季

氏之家。【疏】「孔子」至「不違」。○解雲：《孔子家語》亦

有此言。若以《家語》言之，孔子今年從邑宰為司空，既

為大夫，故有行於季孫之義。齊人為是來歸之。

齊侯自頰谷會歸，謂晏子曰：「寡人或過於魯侯，^③如之

何？」晏子曰：「君子謝過以質，小人謝過以文。齊嘗侵

魯四邑，請皆還之。」歸濟西田不言來，此其言來者，已絕

魯，不應復得，故從外來常文，與「齊人來歸衛寶」同。夫

子雖欲不受，定公貪而受之，此違之驗。○為，於僞反。

復得，扶又反，年末及十一年同。【疏】注「齊侯自頰谷」

至「還之」。^④○解雲：皆《晏子春秋》及《家語》、《孔子世

家》之文。其四邑者，蓋運也，謹也，龜也，陰也。邑而言

田者，桓元年傳雲「田多邑少稱田」，然則此等皆是土地

①「侏儒」，阮校：「鄂本疊「侏儒」二字。」

②「也」，阮校：「鄂本「也」作「地」，此誤。」

③「或」，阮校：「鄂本作「獲」，當據正。按：《穀梁》注

引作「獲」。

④「注齊侯自頰谷至還之」，杉浦校：「單疏鈔本作「注齊侯自頰谷之會歸雲盡請皆還之者」，無「○解雲」。按：此本標注作「頰谷之會」，則何注當疏本有「之」字。」

頃畝多，邑內人民少，故稱田。龜亦是邑，非山名，賈、服異。^①若欲同於賈、服，即雲上二邑，邑內人民多，故舉邑名，龜陰言田者，龜是山名，直得田而不得邑，而言侵魯四邑，請皆歸之者，謂雖有此請，齊君不全許，是以但得三邑而已，蓋非何氏之意。○注「歸濟」至「實同」。○解雲：宣十年「齊人歸我濟西田」者，是其不言來之文也。言「已絕魯，不應復得」者，即彼傳雲：「齊已取之矣，其言我何？未絕於我也。曷為未絕於我？齊已言取之矣。」注雲：「齊已言語許取之。」「其實未之齊也」，注雲：

「其人民貢賦尚屬於魯，實未歸於齊。不言來者，明不從齊來，不當坐取邑。」^②然則彼以未絕於魯，魯猶合得之，明其不從齊來，齊人不當坐取邑，故不言來。此言來者，入齊已久，絕於魯，不應復得之，故言來，從外來常文也。言「魯不應復得」者，止以不能保守先君世邑而失之故也。^③言「與齊人來歸衛寶同」者，即莊六年「冬，齊人來歸衛寶」是也。○注「夫子」至「之驗」。○解雲：知夫子雖欲不受者，正以四邑屬齊，年歲淹久，已絕於魯，魯不應得。頰谷之會，^④討殺侏儒，威劫齊侯，方始歸之。雖曰獲田，君子不貴，故知孔子之意不欲受也。若然，莊十三年曹子手劍而劫桓公，是以齊人歸我汶陽之田，何氏

雲：「劫桓公取汶陽田不書者，諱行詐劫人也。」然則此亦威劫齊侯而得田邑，與彼不異，而書不諱者，正以曹子本意行劫以求汶陽之田，君子恥其所為，故不書也。今在頰谷之會，孔子相儀，止欲兩君揖讓行盟會之禮，^⑤阻齊為不道，熒惑魯侯，而欲執之，孔子誅之，首足異處，^⑥齊侯內懼，歸其四邑以謝焉，於其本情，實非劫詐，書而不諱，不亦宜乎？言此違之驗者，欲對上傳雲「孔子行乎季孫，三月不違」文也。

叔孫州仇、仲孫何忌帥師圍郕。○郕，

①「賈」上，杉浦校：「單疏鈔本有『與』字。按：此當作『與賈服異』。」

②「坐」，原脫。阮校：「浦鏜雲：脫『坐』字。按：宣十年注有『坐』字，浦說是也。」杉浦校：「單疏鈔本『當』下有『坐』字，毛本亦有。」今據補。

③「止以不能保守先君世邑」，杉浦校：「單疏鈔本『止』作『正』，『世』作『田』。」

④「頰」，原作「頰」，今據閣本改。

⑤「止」，京都本、再造善本、閣本作「正」。阮校：「按：作『正』是也。」

⑥「首」，杉浦校：「單疏鈔本作『手』，疑『首』字誤。」

音后。

秋，叔孫州仇、仲孫何忌帥師圍費。

宋樂世心出奔曹。

宋公子池出奔陳。○池，《左氏》作「地」。

【疏】「帥師圍費」者。○解云：《左氏》、①《穀梁》此費字皆爲「郈」，但《公羊》正本作「費」字，與二家異。賈氏不雲《公羊》曰費者，蓋文不備，或所見異也。「宋樂世心」者，「世」字亦作「泄」字者，②故賈氏言焉，《左氏》、《穀梁》作「大」字。「會於鞌」者，《左氏》、《穀梁》作「安甫」。賈氏不雲《公羊》曰鞌者，亦是文不備。《穀梁》經「甫」亦有作「浦」字者。③

冬，齊侯、衛侯、鄭游邀會於鞌。○於

鞌，《左氏》作「安甫」。

叔孫州仇如齊。

宋公之弟辰暨宋仲佗、石彊出奔陳。④

復出宋者，惡仲佗悉欲帥國人去，故舉國言之，公子池、樂世心、石彊從之皆是也。辰言暨者，明仲佗強與俱出也。三大夫出不月者，舉國，危亦見矣。○暨，其器反。佗，大多反。彊，古侯反。惡，烏路反。強，其丈反。見，

賢偏反。【疏】注「復出宋」至「出也」。○解云：如此注者，正決昭二十年「冬，十月，宋華亥、向甯、華定出奔陳」，不重言宋向甯也。雲「公子池、樂世心、石彊從之皆是也」者，下十一年經文也。雲「辰言暨者，明仲佗強與俱出也」者，正以隱元年傳雲：「暨，猶暨暨也。及，我欲之。暨，不得已也。」然則弟辰是時事不獲已而從去，故曰「明仲佗強與俱出也」。知非辰強之者，正以莊三十二年公子牙，昭元年招之屬，以其有罪，皆去弟以貶之，今不去弟，故知仲佗強之矣。○注「三大」至「見矣」。○解云：《春秋》之例，外大夫出奔悉書時，即襄二十一年「秋，晉欒盈出奔楚」，⑤二十八年「冬，齊慶封來奔」之屬是

①「左氏」，阮校：「毛本『氏』作『傳』。」

②「亦」下，阮校：「當脫『有』字。」

③「會於鞌者」至「作浦字者」，阮校：「此疏文三十五字當在下節注下。」

④「宋公」，原作「齊公」，今據余本、京都本、再造善本、閣本改。

⑤「二」，原作「三」，「欒盈出奔楚」在襄公二十一年，今據京都本、再造善本、閣本改。

也。^①其衆出奔者，於國尤危，故書月，即昭二十年「冬，十月，宋華亥、向甯、華定出奔陳」，何氏雲「月者，危三大夫同時出奔」，^②將爲國家患，明當防之」是也。然則彼以三大夫同出奔，是以書月以見危，此亦三大夫同出，不月者，正以舉國，見其欲率國人去，其危亦見矣，是以不勞書月以見危也。

十有一年，春，宋公之弟辰及仲佗、石彊、公子池自陳入於蕭，以叛。不復言宋仲佗者，本舉國已明矣。辰言「及」者，後汲汲，當坐重。○復，扶又反。^③【疏】注「本舉」至「坐重」。○解雲：謂奔時舉言宋仲佗，是其欲率國人去已明矣，是以此經不復言宋也。雲「辰言及者，後汲汲，當坐重」者，正以隱元年傳雲：「及猶汲汲，及，我欲之。」故知辰言「及」者，是其汲汲也。而言「後汲汲」者，欲言初出之時，事不獲已，未汲汲也。言當重者，^④惡其母弟之親而汲汲於叛，故當合坐，重於疏者。

夏，四月。

秋，宋樂世心自曹入於蕭。不言叛者，從叛臣，叛可知。【疏】注「不言」至「可知」。○解雲：決上

經「自陳入於蕭，以叛」文也。

冬，及鄭平。

叔還如鄭蒞盟。

十有二年，春，薛伯定卒。不日月者，子無道，當廢之，^⑤而以爲後，未至三年，失衆見弑，危社稷宗廟，禍端在定，故略之。○見殺，音弑。【疏】注「不日」至「略之」。○解雲：今責日月者，正以所見之世，小國之卒例書日月，即昭三十一年「夏，四月，丁巳，薛伯穀卒」之屬是也。今不具日月，故解之。言子未三年失衆見弑者，即下十三年冬「薛弑其君比」是也。《春秋》之例，稱國以弑者，失衆見弑之辭，故文十八年冬「莒弑其君庶

①「也」，杉浦校：「單疏鈔本作『若』。按：此本『若』字屬下句。」

②「大夫」，原作「大大」，今據昭公二十年何注及閣本改。

③「扶」，原作「北」，今據余本、閣本、宋本《釋文》改。

④「當」下，阮校引浦鏜雲：「脫『坐』。」杉浦校：「單疏鈔本『當』下有『坐』字。」

⑤「廢之」下，阮校：「鄂本有『師』。」

其」，傳雲：「稱國以弑者，衆弑君之辭。」何氏雲：「一人弑君，國中人人盡喜，故舉國以明失衆，當坐絕也。例皆時者，略之也。」故此作注雲「未至三年，失衆見弑」也。雲「禍端在定」，「定」字亦有作「在是」字者，今解從「定」也。

夏，葬薛襄公。

叔孫州仇帥師墮郕。○墮，許規反，下同。

衛公孟彊帥師伐曹。

季孫斯、仲孫何忌帥師墮費。曷爲帥

師墮郕、帥師墮費？據城費。【疏】注「據城費」。

○解雲：即襄七年「城費」是也。然則彼時城費，今乃墮之，似於義反，故以爲難。孔子行乎季孫，三月不

違，曰：「家不藏甲，邑無百雉之城。」於是

帥師墮郕，帥師墮費。郕，叔孫氏所食邑。費，季

氏所食邑。二大夫宰吏數叛，患之，以問孔子。孔子

曰：「陪臣執國命，採長數叛者，坐邑有城池之固，家有甲兵之藏故也。」季氏說其言而墮之。故君子時然後言，人

不厭其言。書者，善定公任大聖，復古制，弱臣勢也。不

書去甲者，舉墮城爲重。○吏數，所角反。採長，七代反，^①下丁丈反。說，音悅。厭，於豔反。去，起呂反。

【疏】「孔子行」至「三月不違」。○解雲：案上十年齊人來歸邑之下，傳雲：「孔子行乎季孫，三月不違。」以此言之，三月之外，違之明矣，故上有注雲：「定公貪而受之，此違之驗。」然則三月之後，必似違之。^②今此傳文復言之者，蓋不違有二，何者？案如《家語》，定十年之時，孔子從邑宰爲司空，十一年又從司空爲司寇。然則爲司空之時，能別五土之宜，咸得其所，爲季孫所重，是以三月不違也。齊人遂懼，來歸四邑矣。及作司寇之時，攝行相事，設法而用之，國無姦民，在朝七日，誅亂政大夫少正卯，戮於兩觀之下，戶諸朝三日，政化大行，季孫重之，復不違三月，是以此傳文言其事矣。^③○「家不」至「之城」。○解雲：同之《左氏》，則「邑無百雉之城」者，亦據侯伯大

①「代」，原作「伐」，今據余本、中華本、閩本、宋本《釋文》改。

②「似」字，杉浦校：「單疏鈔本無。」

③「文」，杉浦校：「單疏鈔本作『又』。」

都已言之，^①若與之異，則魯凡邑皆然也。○注「二大夫宰吏數叛患之」者。○解云：即上十年夏「叔孫州仇、仲孫何忌帥師圍郕」，「秋，叔孫州仇、仲孫何忌帥師圍費」之屬是也。郕、費二邑，相因言之，故謂之數耳。○注「以問」至「墮之」。○解云：《春秋說》及《史記》皆有此言。云「故君子時然後言，人不厭其言」者，《論語》文也。云「不書去甲者，舉墮城爲重」者，正以傳云「家不藏甲，邑無百雉之城」，明其並從二事，而特舉墮城，不書去家之甲者，舉重故也。必知去甲亦合書者，正以成元年「三月，作丘甲」，書之於經，明知去甲亦合書矣。雉者何？五板而堵，^②八尺曰板，堵凡四十尺。○堵，丁古反。【疏】「雉者何」。○解云：正以傳言「邑無百雉之城」，經典未有其事，須知雉之度數，故執不知問。○注「八尺曰版堵」者。○解云：^③《韓詩外傳》文。^④五堵而雉，^⑤二百尺。百雉而城。二萬尺，凡周十一里三十三步二尺，公侯之制也。禮，天子千雉，蓋受百雉之城十，^⑥伯七十雉，子，男五十雉。天子周城，諸侯軒城。軒城者，缺南面以受過也。【疏】注「二萬」至「制也」。○解云：公侯方百雉，《春秋說》文也。古者六尺爲

步，三百步爲里，計一里有千八百尺，十里即有萬八千尺，更以一里三十三步二尺，爲二千尺，通前爲二萬尺也，故云二萬尺，凡周十一里三十三步二尺也。^⑦云「禮，天子千雉者」，《春秋說》文也。云「蓋受百雉之城十」者，謂公、侯於天子，十取一之義，似若《孟子》與《司馬法》云「天子囿方百里，公、侯十里」，是十取一之文也。云「伯

^①「已」，阮校引浦鏜云：「當「邑」字誤。」杉浦校：「單疏鈔本「已」作「邑」。」

^②「而」，阮校：「按：《毛詩·小雅》鄭箋引「而」作「爲」，下「而雉」同。」

^③「注八尺曰版堵者」○解云，阮校：「浦鏜云：「堵」衍字。按：傳、注「版」作「板」，當從此。」杉浦校：「單疏鈔本無「堵」字，「解云」。」

^④「外傳」，阮校：「按：此當作「內傳」。」

^⑤「五堵而雉」，阮校：「唐石經、諸本同。按：《詩·鴻雁》正義引王愆期注《公羊》云：「諸儒皆以爲雉長三文，堵長一丈。」疑「五」誤，當爲「三」。」

^⑥「城」，原作「比」，今據余本、京都本、再造善本、中華本、閣本改。

^⑦「三步」，原作「二步」。阮校引浦鏜云：「「三步」誤「二步」。今據單疏鈔本改。」

七十雉，子、男五十雉」者，《春秋說》文。○注「天子」至「過也」。○解云：「天子周城，諸侯軒城」者，《春秋說》文。云「缺其南面，以受過也」者，正以諸侯軒縣闕南方，則知軒城亦宜然。^①案舊古城無如此者，蓋但孔子設法如是，後代之人不能盡用故也。或者但不設射垣以備守，故曰「缺其南面以受過」，不妨仍有城。

秋，大雩。不能事事信用孔子，聖澤廢。【疏】

注「不能」至「澤廢」。○解云：並謂三月之後違之。

冬，十月，癸亥，公會晉侯盟于黃。^②

十有一月，丙寅，朔，日有食之。是後薛

弑其君比，晉荀寅、士吉射入于朝歌以叛。○射，食亦反，又食夜反。朝歌，如字。【疏】注「是後」至「以叛」。○解云：在十三年冬。云「晉荀寅、士吉射入于朝歌以叛者，亦在十三年冬。案晉荀寅、士吉射叛，在弑比之前，而後言之者，正以弑君之變重，故先取以應之。

公至自黃。

十有二月，公圍成。公至自圍成。成，

仲孫氏邑。圍成月又致者，天子不親征下土，諸侯不親征叛邑。公親圍成不能服，不能以一國為家，甚危，若從

他國來，故危錄之。^③【疏】注「圍城」至「錄之」。^④○解云：《春秋》義，圍例書時，即宣十二年春「楚子圍鄭」之文是，今此書月，故解之。莊二十七年注云：「凡公出在外致，在內不致。」今此在內而致，故須解之。云「天子不親征下土」者，即《公羊》說「云一國叛，王自征之，若四國皆叛，^⑤安得四王而征也」者，是其義也。若然，桓五年「秋，蔡人、衛人、陳人從王伐鄭」，傳云：「其言從王伐鄭何？從王正也。」彼注云：「美其得正義也，故以從王征伐錄之。」然則天子不親征下土而美之者，直是美諸侯之得正，猶自不言桓王伐鄭之善，故彼注又云「蓋起時天子

①「知」，原作「雉」，今據京都本、再造善本、閩本改。

②「晉侯」，阮校：「按：《左氏》、《穀梁》皆作「齊侯」，此作「晉」，誤也。宋張洽云：黃，齊地，《公羊》作「晉侯」，誤。」

③「錄之」，阮校：「鄂本下有「矣」。」

④「注圍城至錄之」，杉浦校：「單疏鈔本作「注圍成月又致者云云」。按：此作「圍城」，誤。」

⑤「若」，原作「君」，今據京都本、再造善本、中華本、閩本改。

微弱，諸侯背叛，不肯從王者征伐，^①以善三國之君，獨能尊天子死節。稱人者，刺王者也。天下之君，海內之主，當秉綱撮要，而親自用兵，故見其微弱，僅能從微者，不能從諸侯，猶莒稱人則從不疑也」是。《書序》曰「啓與有扈戰于甘之野，作《甘誓》」，其經曰「大戰于甘，乃召六卿」者，何氏以爲啓非至德之主，是以親征有扈，非《春秋》所美，豈害其義也？云「諸侯不親征叛邑」者，正以諸侯於天子，亦宜以國爲家，猶如天子之有天下也，而不能全服，親自征之，故爲非禮，而爲《春秋》所刺也。

十有三年，春，齊侯、衛侯次于垂瑕。

○垂瑕，如字，又音加，二傳作「垂葭」。

夏，築蛇淵囿。

大蒐于比蒲。○大蒐，所求反，本又作「蒐」。

比，音毗。【疏】夏築淵囿。^②○解云：成十八年秋「築鹿囿」，傳云：「何以書？譏。何譏爾？有囿矣，又爲也。」彼注云「刺奢泰妨民」也。然則彼有成說，故此處不復解之。○「大蒐于比蒲」。○解云：桓六年注云「五年大簡車徒」，^③謂之大蒐是也。所以書者，即昭八年「秋，蒐于紅」之下，傳云：「蒐者何，簡車徒也。何以書？蓋

以罕書也。」但彼已解訖，故此處不復論之。

衛公孟彊帥師伐曹。

秋，晉趙鞅入于晉陽以叛。

冬，晉荀寅及士吉射入于朝歌以叛。

晉趙鞅歸于晉。此叛也，其言歸何？

據叛與出入惡同。【疏】注「據叛」至「惡同」。○解云：桓十五年傳例云：「復歸者，出惡，歸無惡。復入者，出無惡，入有惡。入者，出人有惡。歸者，出入無惡。」然則書叛者，^④出入惡同，不宜書「歸」，作出入無惡之文，故難之。以地正國也。軍以井田立數，故言以地。【疏】注「軍以」至「以地」。○解云：假令天子六軍，方伯二軍之屬，皆以井田多少計出其數，故曰「軍以井田立數」也。今趙鞅以此井田之兵，逐君側之惡人，故云「以地正國」。

①「不肯」，阮校：「浦鏜云：彼注作「莫肯」。是也。」

②「築」下，杉浦校：「單疏鈔本有「蛇」字。」

③「簡」，原作「簡」，今據桓公六年注及中華本、閣本改。下「簡車徒」、「趙簡子之邑」同。

④「者」下，杉浦校：「單疏鈔本有「即與」二字，爲長。」

也」。其以地正國奈何？晉趙鞅取晉陽之甲，以逐荀寅與士吉射。荀寅與士吉射者曷爲者也？君側之惡人也。此逐君側之惡人，曷爲以叛言之？無君命也。無君命者，操兵鄉國，故初謂之叛，後知其意欲逐君側之惡人，故錄其釋兵，書「歸」赦之，^①君子誅意不誅事。晉陽之甲者，趙簡子之邑，以邑中甲逐之。○操，七曹反。鄉，許亮反。【疏】注「君子」至「誅事」。○解云：君子之人，探端知緒，但誅其意，若輕而難原，不誅其事，若重而可恕，以趙鞅意實非逆，但以持兵鄉國爲罪，是以《春秋》書歸以舍之，^②故曰「誅意不誅事」也。

薛弑其君比。

十有四年，春，衛公叔戌來奔。

晉趙陽出奔宋。○晉趙陽，《左氏》作「衛趙陽」。

【疏】「晉趙陽出奔宋」。○解云：《穀梁》與此同，《左氏》作「衛趙陽」字也。

三月，^③辛巳，楚公子結、陳公子佗人帥師滅頓，以頓子嬭歸。不別以歸何國者，明楚、

陳以滅人爲重，頓子以不死位爲重。○公子佗人，大河反，二傳作「公孫佗人」。嬭，七良反，二傳作「牂」。別，彼列反。【疏】「以頓子嬭歸」。○解云：《左氏》、《穀梁》皆作「頓子牂」字，賈氏不注，文不備。○注「不別」至「之重」。○解云：正以上四年「滅沈，以沈子嘉歸」，六年「以許男斯歸」之屬，其上文皆直一國大夫而已，是以其經直言以歸，不假分別。今此經上載二國，其下直言以歸而已，似非詳備之義，是以解之。云「明楚、陳以滅人爲重」者，正以二國之卿，擅相滅獲，其過已深，假言歸楚，不足輕陳之罪，假言歸陳，不足滅楚之惡，故曰「明楚、陳以滅人爲重」。云「頓子以不死位爲重」者，諸侯之禮，當合死位，頓子不死，其過已深，何假書言歸于某乎？故云「頓子以不死位爲重」也。

夏，衛北宮結來奔。

①「書歸赦之」，阮校：「哀三年疏引作『書歸而赦之』。」

②「舍」，阮校引浦鏜云：「『赦』誤『舍』。」

③「三月」，阮校：「唐石經原刻作『三月』，後磨去上一畫。按：《左氏》、《穀梁》皆作『二月』，此作『三』，

誤。」王引之《經義述聞》亦曰：「『三』當作『二』。」

五月，於越敗吳于醉李。月者，爲下卒出。

○醉李，本又作「雋」，音同。爲，于僞反。【疏】注「月者爲下卒出」。○解云：隱六年有注云：「戰例時，偏戰日，詐戰月。不日者，鄭詐之。」然則諸侯之例，詐戰者月。今此兩夷相敗，文宜略於諸夏，而經書月，故知爲下卒文出矣。

吳子光卒。

公會齊侯、衛侯于堅。○堅，如字，本又作

「擊」，音牽，《左氏》作「牽」。

公至自會。

秋，齊侯、宋公會于洮。○洮，他刀反。①

天王使石尚來歸賑。石尚者何？天

子之士也。天子上士，以名氏通。○賑，市軫反。

【疏】「石尚者何」。○解云：欲言大夫，單名無字，欲言微者，名氏俱見，故執不知問。○注「天子」至「氏通」。○解云：傳直云天子之士，而知上士者，何氏以爲《春秋》之例，天子上士以名氏通，中士以官錄，下士略稱人。今此經書其名氏，故知之。何氏意必知例然者，正以傳云：「石尚者何？天子之士。」隱元年傳云：「宰者何？官

也。咺者何？名也。曷爲以官氏？宰，士也。」僖八年

傳云：「王人者何？微者也。曷爲序乎諸侯之上？先王命也。」然則以此三處之傳言之，則知單名繼官，不以名氏通，單稱王人云者，不以名見，故隱元年注云「天子之上士以名氏通，中士以官錄，下士略稱人」是也。賑者何？俎實也。實俎肉也。【疏】「賑者何」。○解

云：欲言天子賜之祭肉，不見魯侯助祭之文，欲言賑非祭肉，不應遠來歸之，故執不知問。○「俎實也」者。○解

云：謂以肉填實於俎上，故注云「實俎肉也」，猶言實俎之肉也。腥曰賑，熟曰燔。禮，諸侯朝天子，助祭於

宗廟，然後受俎實。時魯不助祭而歸之，故書以譏之。

○燔，本亦作「膳」，又作「繇」，音煩。【疏】注「禮諸侯」至

「譏之」。○解云：正以魯無朝聘天子之處，而書歸賑以

譏之，則知助祭於宗廟者，有受俎實之禮矣。《論語》云

「祭於公，不宿肉」者，義亦通於此。宗伯以賑膳之禮，親

兄弟之國，似不通於異姓者，何氏所不取。

①「刀」，原作「切」，今據余本、中華本、閣本、宋本《釋文》改。

衛世子蒯聵出奔宋。主書者，子雖見逐，無

去父之義。○蒯聵，苦怪反，下五怪反。【疏】注「主書」

至「之義」。○解云：父子天倫，無相去之義，子若大爲惡

逆，人倫之所不容，乃可竄之深宮，閹人固守。若小小無

道，當安處之，隨宜罪譴，令其克改，寧有逐之他國，爲宗

廟羞？且子之事父，雖其見逐，止可起敬起孝，號泣而

諫之，諫若不入，悅則復諫，自不避殺，如舜與宜咎之徒，

寧有去父之義乎？今大子以小小無道，衛侯惡而逐之，

父無殺己之意，大子慙而去之，論其二三，上下俱失：衛

侯逐子，非爲父之道；大子去父，失爲子之義。今主書此

經者，一則譏衛侯之無恩，一則甚大子之不孝，故曰「子

雖見逐，無去父之義」。若其父大爲無道，如獻公、幽王

之類，若不迴避，必當殺己，如此之時，寧得陷父於惡？

是以申生不去，失至孝之名，宜咎奔申，無刺譏之典，但

衛侯爾時無殺子之意，是以蒯聵出奔，書氏譏之耳。①

衛公孟彊出奔鄭。

宋公之弟辰自蕭來奔。

大蒐于比蒲。譏亟也。○亟，去冀反。【疏】

「宋公」至「來奔」。○解云：上十年「出奔陳」，十一年春

「自陳入于蕭，以叛」，至此乃「自蕭來奔」矣。○注「譏亟也」。○解云：大蒐之禮，五年一爲，若數于此，則書而譏亟也。若緩於此，則書而譏罕。上十三年夏已「大蒐于比蒲」，今始一年，復行此禮，故曰「譏亟也」。

邾婁子來會公。書者，非邾婁子會人於都也。

如入人都，當修朝禮。古者諸侯將朝天子，必先會間隙之地，考德行，一刑法，講禮義，正文章，習事天子之儀，尊京師，重法度，恐過誤。言公者，不受于廟。○間隙，音閑，下去逆反。【疏】注「書者」至「于廟」。○解云：《曲

禮下》篇云：「諸侯相見於隙地曰會。」今乃會人于都，故書而非之。云「如入人都，當修朝禮」者，即桓六年注云：「諸侯相過，至竟必假塗，入都必朝，所以崇禮讓，絕

慢易，戒不虞也。」是其義也。云「古者諸侯將朝天子，必先會于間隙之地」者，出《曲禮》也。云「考德行，一刑法」者，謂考校其德行，齊一其刑法也。云「講禮義」者，謂習

其禮儀也。云「言公者，不受于廟」者，隱七年夏「齊侯使其弟年來聘」之下，注云：「不言聘公者，禮，聘受之於廟，

孝子謙不敢以己當之，歸美於先君，且重賓也。」隱十一

①「氏」，杉浦校：「單疏鈔本作『而』是也。」

年「春，滕侯、薛侯來朝」之下，注云：「不言朝公者，禮，朝受之於大廟，與聘同義。」莊二十三年夏「公及齊侯遇於穀」，「蕭叔朝公」。傳云：「其言朝公何？公在外也。」彼注云：「時公受朝於外，故言朝公，惡公不受於廟。」然則受朝之禮，禮當在廟，孝子歸美于先君，不敢以己當之。若不於廟，則言公，即「蕭叔朝公」是也。今此會禮不在廟，魯侯受之於外，故言「來會公」矣。言公者，不受于朝也。^①

城莒父及霄。去冬者，是歲蓋孔子由大司寇

攝相事，政化大行，粥羔肫者不飾，^②男女異路，道無拾遺。齊懼北面事魯，饋女樂以間之。定公聽季桓子受之，三日不朝。當坐淫，故貶之。歸女樂不書者，本以淫受之，故深諱其本文，^③三日不朝，孔子行。魯人皆知孔子所以去。附嫌近害，雖可書猶不書。或說無冬者，坐受女樂，令聖人去冬。陰，臣之象也。○父，音甫。去，起呂反。相，息亮反。粥羔，羊六反。間，問廁之間。近，附近之近。【疏】注「去冬」至「不書」。○解云：隱六年傳云：「《春秋》編年，四時具然後爲年。」今此無冬，四時不具，故須解之。云「是歲蓋孔子由大司寇攝相事」者，即《家語·始誅》篇云「孔子爲魯大司寇」，^④攝行相事，

有喜色」是也。魯之司寇云大者，蓋以無司寇之卿，是以大夫亦名大也。魯有司空卿，孔子爲司空不言大者，是其一隅也。若以《家語》言之，即定九年始爲邑宰，十年爲司空，十一年爲大司寇，從大司寇攝行相事之時，年月不明，故此注云「蓋」也。云「政化大行，粥羔豚者不飾，男女異路，道無拾遺」者，皆是《家語·相魯》篇文也。言「不飾」者，舊說云：「魯前之時，粥羔豚者，皆以彩物飾之，自孔子爲相，此事乃正，^⑤故曰「粥羔豚者不飾」也。」云「齊懼北面事魯，饋女樂以間之，定公聽季桓子受之，

①「朝」，杉浦校：「單疏鈔本作「廟」是也。」

②「羔肫」，阮校：「此本及閩、監本疏中引注「肫」作「豚」，毛本始改爲「肫」，非。按：《史記》、《家語》皆作「羔豚」。」

③「文」，阮校：「鄂本、蜀大字本「文」作「又」，屬下讀，當據正。」

④「家語始誅編云孔子爲魯大司寇」，阮校：「按：「編」當「篇」之誤。」又曰：「浦鏜云：《家語》無「大」字。按孫志祖云：《史記·孔子世家》亦有「大」字，疑今本《家語》脫耳。《相魯》篇亦云「由司空爲大司寇」。「正」，阮校引浦鏜云：「當「止」字誤。」

三日不朝」者，出《孔子世家》。案彼云：「定公十四年，孔子年五十六，由大司寇行攝相事」云云，「齊人聞而懼曰：『孔子爲政必霸，霸則吾地近焉，我之爲先并矣，盍致地焉？』」犁鋤曰：①「請先嘗沮之，沮之而不可，則致地，庸遲乎？」於是選齊國中女子好者八十人，皆衣文衣而舞康樂，文馬三十駟，遺魯君，陳女樂，馬於魯城南高門外。②季桓子微服往觀再三，將受，乃語魯侯爲周道游，往觀終日，怠於政事。子路曰：「夫子可以行矣！」孔子曰：「魯今且郊，如致膳乎大夫，則吾猶可以止。」桓子卒受齊女樂，三日不聽政，郊又不致膳胆於大夫，③孔子遂行。宿乎屯，而師已送曰：「夫子則非罪。」孔子曰：「吾歌，可夫？」歌曰：「彼婦人之口，可以出走。」云云是也。云「當坐淫，故貶之」者，推尋古禮，無女樂之文，魯人受之，故當坐淫佚之惡。既有淫佚之惡，去冬以見之。其晉悼公受女樂二八而爲霸者，《左氏》之事，何氏所不取，不得難此矣。云「魯人皆知孔子所以去」者，謂皆知魯公受女樂有淫佚之惡，所以孔子去之。云「附嫌近害，雖可書猶不書」者，正以其獲麟之後，得端門之命，而制《春秋》，乃自因之，即云己之本出，由饋女樂之故，魯國之人悉知所由，若其書之，即是附於嫌疑，近於禍患，④是以雖

非國家之諱，依例可書于經，孔子亦不書之，故曰「附嫌近害，雖可書猶不書」。○注「或說」至「象也」。○解云：孔子自書《春秋》而貶去冬，失謙遜之心，違辟害之義。蓋不修《春秋》已無「冬」字，⑤孔子因之，遂存不改，以爲王者之法，宜用聖臣，故曰「如有用我者，昔月則可，三年乃有成」是也。又《春秋》之說，口授相傳，達於漢時，乃著竹帛，去一「冬」字，何傷之有？

十有五年，春，王正月，邾婁子來朝。

驪鼠食郊牛，牛死，改卜牛。曷爲不言其所食？據食角。○驪，音兮。【疏】注「據食角」。○解云：即成七年「春，王正月，驪鼠食郊牛角，改

①「鋤」，杉浦校：「單疏鈔本作「鋤」。阮氏校勘記云：何校本「鋤」作「鉏」。沈氏《注疏正字》云：《史記》作「鉏」。」

②「馬」上，阮校：「何校本有「文」字是也。」

③「胆」，阮校引浦鍾云：「「胆」誤「胆」。」

④「患」，杉浦校：「單疏鈔本作「害」，是也。」

⑤「無」，原重文，阮校引浦鍾云：「衍一「無」字。」今據單疏鈔本刪。

卜牛，饌鼠又食其角，乃免牛」是也。漫也。①漫者，偏

食其身，災不敬也。不舉牛死爲重，復舉食者，內災甚矣，錄內不言火是也。○漫，亡半反，猶偏也。徧，音遍。

復舉，扶又反，下同。【疏】注「災不敬」至「是也」。○解

云：「言所以災其郊牛者，正以魯人不敬故也。云「不舉牛

死爲重」云云者，《春秋》之義，悉皆舉重，食、死並書，故

解之。食在死前而言復者，正以食輕於死，故對重以爲

復矣。云「內錄不言火是也」者，②即襄九年「春，宋火」，

傳云：「大者曰災，小者曰火。然則內何以不言火？」③

內不言火者，甚之也。何氏云《春秋》以內爲天下法，動

作當先自克責，故小有火，如大有災」也。④

二月，辛丑，楚子滅胡，以胡子豹歸。

夏，五月，辛亥，郊。曷爲以夏五月

郊？據魯郊正當卜春三正也，又養牲不過三月。【疏】

「二月辛」至「豹歸」。⑤○解云：僖二十六年「秋，楚人滅

隗」，何氏云：「不月者，略夷狄滅微國也。」昭三十年冬十

二月「吳滅徐」，何氏云：「至此乃月者，所見世始錄夷狄

滅小國也。」然則此亦所見世，夷狄滅小國而書日者，上

四年「夏四月庚辰蔡公孫歸生滅沈」之下，注云「日者，

定、哀滅例日。定公承黜君之後，有強臣之讎，⑥故有滅則危懼之，爲定公戒」是也。⑦○注「據魯」至「正也」。○

解云：即成十七年傳云：「然則郊曷用？郊用正月上

辛。」何氏云：「魯郊博卜春三月，言正月者，因見百王正

所當用也。」僖三十一年注云「武王既沒，成王幼小，周公

居攝，行天子事，制禮作樂，致太平，有王功。周公薨，成

王以王禮葬之，命魯使郊，以彰周公之德，非正，故上三

卜，吉則用之，不吉則免牲」者，是其魯郊博卜春三正之

①「漫」，阮校：「鄂本、閩、監、毛本同，唐石經、元本作

「曼」。按《釋文》作「漫也」。

②「內錄」，阮校引浦鍾云：「『錄內』字誤倒。」

③「何」，原作「可」。阮校：「當從監、毛本作「何」。」杉

浦校：「單疏鈔本「可」作「何」，毛本亦然。」今據改。

④「災」下，杉浦校：「單疏鈔本有「是」字。」

⑤「二月辛至豹歸」，杉浦校：「單疏鈔本作「二月辛丑

楚子云云」。阮校：「自此節至「養牲不過三月」節，

此本合爲一節。」

⑥「有」下，原有「滅」字，今據定公四年注及閣本刪。

⑦「是」下，杉浦校：「單疏鈔本無「也」字。」

義也。^①何氏必知然者，正以哀元年《穀梁傳》云「郊自正月，至于三月，郊之時。夏四月郊，不時。五月郊，不時」之文也。○注「養牲不過三月」。^②○解云：宣二年傳云：「帝牲在于滌三月。」彼注云「滌，宮名，養帝牲三牢之處也。謂之滌者，取其蕩滌潔清。三牢者各主一月，取三月一時，足以充其天牲」是也。三卜之運也。運，轉也。已卜春三正不吉，復轉卜夏三月，周五月，得二吉，故五月郊也。《易》曰：「再三瀆，瀆則不告。」不得其事，雖吉猶不當為也。不舉卜者，從可知。^③【疏】注「復轉卜夏三月」。○解云：猶言轉卜夏之正也。○注「得二至」可知。○解云：必知得吉者，正以經有郊文故也。若其不吉，宜言乃免牲，或言乃免牛，乃不郊矣。知其二吉者，正以僖三十一年傳云「三卜禮也」，「三卜何以禮」，「求吉之道三」。彼注云「三卜，吉凶必有相奇者，可以決疑，故求吉必三卜」也，是其得二吉乃可為事之義。今此五月而郊，故知得二吉也。云「《易》曰『再三瀆，瀆則不告』」者，《蒙》卦彖辭云：「蒙，亨。匪我求童蒙，童蒙求我，初筮告，再三瀆，瀆則不告。利貞。」鄭氏云「蒙者，蒙蒙物初生形，是其未聞著之名也。人幼稚曰童。亨者，陽也。互體震而得中，嘉會禮通，陽自動其

中，德於地道之上，萬物應之而萌牙生，教授之師取象焉，修道藝於其室，而童蒙者求為之弟子，非已乎求之也。弟子初問，則告之以事義，不思其三隅，相況以反，解而筮者，此勤師而功寡，學者之災也。瀆筮則不復告，欲令思而得之，亦所以利義而幹事」是也。引之者，欲道魯人瀆卜，故五月非郊之月而得吉非，^⑤是龜靈厭之，不復告其所圖之吉凶故也。然則卦象之義，乃是弟子請問師之事義，故言筮以況之。今此乃卜也，而引者，^⑥龜筮道同，亦何傷乎？云「不得其事」者，謂不得其事之宜，即五月郊天是也。云「雖吉猶不當為也」者，謂吉凶會以事之善惡為本，郊非其月，雖吉亦不得為，何者？正以

① 「魯郊博卜春三正之義」，原作「魯郊傳卜春三正之義」，京都本、再造善本「傳」作「博」，是。「之之」不辭，當衍一「之」字。今改。

② 「養」上，杉浦校：「單疏鈔本有『又』字，與何注合。」

③ 「可」，原作「何」，余本、京都本作「可」，本疏引同，今據改。

④ 「彖」，阮校：「按：『彖』當作『象』。」

⑤ 「非」，閩本作「兆」，是。

⑥ 「者」，杉浦校：「單疏鈔本作『道』。」

靈龜厭之，不復告其吉凶故也。云「不舉卜者，從可知」者，正以僖三十一年「夏，四月，四卜郊，不從」云云，舉卜。今此直言「五月，辛亥，郊」，不舉卜者，正以言郊則知卜吉明矣，故曰「從可知」。

壬申，公薨于高寢。

鄭軒達帥師伐宋。○軒達，《左氏》作「罕達」。【疏】「壬申」至「高寢」。○解云：說在莊三十二年。

齊侯、衛侯次于籛篠。①

○籛篠，其居反，下直居反。【疏】「齊侯」至「籛篠」。○解云：《左氏》作「籛挈」字，賈氏無說，文不備也。上九年「齊侯、衛侯次于五氏」，注云：「欲伐魯也。善魯能却難早，故書次而去。」然則今此亦然，故省文不注，而賈氏云「欲救宋，善恤鄰也」者，蓋與何氏異，或者九年之次以其無起文，故解為欲伐魯。今此上有軒達伐宋之文，下即云「齊侯、衛侯次于籛篠」，此則知欲救宋明矣。不注之者，從可知省文。

邾婁子來奔喪。其言「來奔喪」何？

據會葬以禮書，歸含且贈不言來。○含，戶暗反。贈，芳鳳反。②【疏】注「據會葬以禮書」。○解云：即文元年

「天王使叔服來會葬」，傳云：「其言來會葬何？會葬禮也。」云「歸含且贈不言來」者，即文五年「王正月，③王使榮叔歸含且贈」是也。奔喪，非禮也。但解「奔喪」

者，明言「來」者常文，不為早晚施也。禮，天子崩，諸侯奔喪會葬。諸侯薨，有服者奔喪，無服者會葬，邾婁與魯無服，故以非禮書。禮有不弔者三：兵死，壓死，溺死。○為，于偽反。厭死，於甲反。【疏】注「但解奔」至「晚施也」。○解云：在隱元年。○注「禮天子」至「溺死」。○解云：正以諸侯體敵而有會葬之禮，則天子之尊，兩有可知。《禮記·文王世子》曰：「喪紀以服之輕重為序，不奪人親也。」故知有服無服，有差降明矣。既有差降，奔喪近於會葬，故知但以奔與不奔為異也。云「禮有不弔者三：兵死，壓死，溺死」者，《春秋說》文。案邾婁子來奔喪，魯人無此三事，而引之者，以明不弔之類，非謂禮實同也。

秋，七月，壬申，姒氏卒。姒氏者何？

①「籛篠」，阮校：「盧文弨曰：《左氏》經作「渠蔭」，傳作「籛挈」。」

②「芳」，原作「勢」，今據閣本、宋本《釋文》改。

③「王」上，阮校引浦鏜云：「脫「春」。」

哀公之母也。姒氏，杞女。哀公者，即鄭公之妾

子。^①【疏】「姒氏卒」。○解云：《穀梁》作「弋氏」字。

○「姒氏者何」。○解云：欲言夫人，經不書薨，欲言其妾，謚同於夫，故執不知問。○注「姒氏杞女者」。○解

云：正以杞女爲姒姓，故知之。何以不稱夫人？

據母以子貴。【疏】注「據母以子貴」。○解云：隱元年傳

文。彼注云：②「禮，妾子立，則母得爲夫人，夫人成風是

也。」哀未君也。未踰年，不稱公。

八月，庚辰，朔，日有食之。是後衛蒯聵犯

父命，盜殺蔡侯申，齊陳乞弑其君舍。【疏】注「是後」至

「君舍」。^③○解云：即哀二年夏「晉趙鞅帥師，納衛世子

蒯聵于戚」是也。云「盜殺蔡侯申」者，^④在哀四年春。云

「齊陳乞弑其君舍」者，在哀六年秋。

九月，滕子來會葬。

丁巳，葬我君定公。雨不克葬。戊

午，日下昃，乃克葬。昃，日西也。《易》曰「日中則

昃」是也。下昃，蓋晡時。○昃，音側。晡，布吳反。

【疏】注「易曰日中則昃」。○解云：《豐卦》彖辭也。彼云

「日中則昃，月盈則食」云云，鄭注云「言皆有休已」，^⑤無常

盛」是也。

辛巳，葬定姒。定姒何以書葬？據不

稱小君，子般不書葬。【疏】注「據不稱小君」。○解云：

正以夫人書「葬我小君」，此不言小君，故難之。○注「子

般不書葬」。○解云：子般不書葬之事，在莊三十二年。

子般未踰年，是以不書葬。今定姒之子亦未踰年，與子

般義同，故乃據而難之。然則子般終不成君，故略之。

定姒之子終爲君，有即尊之漸，母以子貴，故書其葬，但

以今未踰年，故其母不稱小君。「未踰年之君，有子則

廟，廟則書葬」者，但當連作一勢讀之，乃可解。未踰

年之君也。哀未踰年也。母以子貴，故以子正之。

①「鄭公」，阮校：「諸本同，誤也。鄂本作「定公」，當據正。」

②「彼」，杉浦校：「單疏鈔本無。」

③「注是後至君舍」，杉浦校：「單疏鈔本作「注是後衛蒯聵犯父命者」，無「○解云」。」

④「殺」，杉浦校：「單疏鈔本作「弑」。」參哀公四年阮校。

⑤「休」，杉浦校：「單疏鈔本作「倦」。」

有子則廟，廟則書葬。如未踰年君之禮，稱謚者，方當踰年稱夫人。曾子問曰：「並有喪，則如之何？何先何後？」孔子曰：「葬，先輕而後重。其莫也，其虞也，先重而後輕，禮也。」【疏】注「如未」至「夫人」。○解云：未踰年之君，禮則無謚。今此定姒如未踰年君之禮，而稱謚者，正以方當踰年稱夫人故也。○注「曾子」至「禮也」。○解云：案《禮·曾子問》曰「並有喪，如之何？何先何後」，注云：「並謂父母若親同者同月死。」孔子曰「葬，先輕而後重。其莫也，先重而後輕」云云，「其虞也，先重而後輕，禮也」。今此何氏總而引之，是以直云「其莫也」、「其虞也」而已。引之者，欲道定公五月薨，定姒七月卒，非其並有喪禮，是以先葬定公，後葬定姒。若其同月，當定姒先葬矣。

冬，城漆。○漆，音七。

監本附音春秋公羊注疏定公卷第二十六

監本附音春秋公羊注疏哀公卷第二十七

起元年，盡十年

何休學

元年，春，王正月，公即位。

楚子、陳侯、隨侯、許男圍蔡。隨，微國。

稱侯者，本爵俱侯，土地見侵削，故微爾。許男者，戍也。

前許男斯見滅以歸，今戍復見者，自復。斯不死位，自復無惡文者，滅以歸可知。^①○復見，扶又反，下賢偏反。

【疏】注「隨微國」至「自復」。○解云：正以入《春秋》以來不稱爵，大夫名氏不得見經，故知其微。隱五年傳云：

「大國稱侯，小國稱伯、子、男。」此微國而稱侯，故須解之也。言「本爵俱侯」者，謂其初封之時，與齊、晉之屬俱稱

侯，故曰「本爵俱侯」也。今為小國者，但以土地見侵削故也，知非得褒乃得稱侯，如滕侯、薛侯之類，而云「本爵

為侯」者，正以滕、薛入桓篇之後，或稱滕子，或稱薛伯，故知隱篇稱侯，由朝新王得褒明矣。今此隨侯一無善行

可褒，二無稱伯、子之處，故知本爵為侯也。云「許男者戍也」，正以下十三年「夏，許男戍卒」，故知之。云「前許男斯見滅」者，即定六年「春，王正月，癸亥，鄭游速帥師滅許男斯歸」是也。^②昭十三年秋，「蔡侯廬歸于蔡，陳侯吳歸于陳」，為楚所歸，皆書之，戍歸不書，故知自復也。○注「斯不」至「可知」。○解云：諸侯之禮，固當死位，斯不死位，其國合絕。今而自復，不為惡文以見之者，正以定六年之時，書滅以歸，其惡已著，是以此處不勞見之。

饑鼠食郊牛。災不敬故。改卜牛。

夏，四月，辛巳，郊。

秋，齊侯、衛侯伐晉。

冬，仲孫何忌帥師伐邾婁。邾婁子新來奔

喪，伐之不諱者，期外恩殺惡輕，明當與根牟有差。○殺，所戒反。【疏】注「邾婁」至「有差」。○解云：邾婁子

^①「滅以歸可知」，阮校：「鄂本上有『從』字，此脫。」

^②「鄭游速帥師滅許男斯歸」，定公六年經作「鄭游速帥

師滅許，以許男斯歸」。阮校：「監、毛本『速』做

「逮」。『滅許』下，阮校引浦鏜云：「下脫『以許』二字。」

來奔喪，在十五年夏也。既來奔喪，於魯有恩，而魯伐之，爲惡明矣。內之有惡而不諱者，既在期外，恩殺惡輕故也。奔喪於去年之夏，伐在今年冬，故曰「期外」矣。宣九年秋取根牟，傳曰：「曷爲不繫乎邾婁？」諱亟也。」注云：「亟，疾也。屬有小君之喪，邾婁子來加禮，未期而取其邑，故諱不繫邾婁也。」然則彼以加禮未期，其恩猶重，伐之取邑，其惡深矣，是以諱之。今乃期外，恩殺惡輕，由是不諱，故曰「當與根牟有差」。

二年，春，王二月，季孫斯、叔孫州仇、

仲孫何忌帥師伐邾婁，取鄒東田及沂西

田。鄒，沂，皆水名。邾婁子來奔喪，取其地不諱者，義

與上同。○郭，^①火號反，徐音郭。沂，魚依反。【疏】「取

鄒東田及沂西田」。○解云：《公羊》之義，言田者，田多

邑少故也，而《穀梁傳》云「取鄒東田，鄒東未盡也。及沂

西田，沂西未盡也」，范氏云「以其言東西，則知其未盡

也」，與此別。《左氏》以「鄒東」、「沂西」爲邑名。

癸巳，叔孫州仇、仲孫何忌及邾婁子

盟于句繹。所以再出大夫名氏者，季孫斯不與盟。

○句繹，古侯反，下音亦。與，音預。【疏】注「所以」至

「與盟」。○解云：正以宣元年「公子遂如齊逆女。三月，

遂以夫人婦姜至自齊」。傳云：「遂何以不稱公子？」一

事而再見者卒名。何氏云：「卒，竟。但舉名，省文。」然

則今此伐邾婁，及邾婁子盟于句繹之經，亦是一事，而再

舉大夫名氏者，正由季孫斯不與盟故也。若此注內直云

所以再出大夫名者，無氏字，即決昭十三年「秋，公會劉

子、晉侯」以下「于平丘。八月，甲戌，同盟于平丘」，據彼

注云：「不言劉子及諸侯者，間無異事可知矣。」今此二經

亦間無異事，而再出大夫之名，故解之也。此注「氏」字，

或有或無，故如此解。季孫斯所以不與盟者，服氏云「季

孫斯尊卿，與仲孫氏伐敵，服而使二子盟」也者，即其義

矣。而《穀梁傳》云「三人伐而二人盟何？各盟所得」，^②

「季孫斯不得田，故不盟」，^③與何氏不合。

夏，四月，丙子，衛侯元卒。

①「郭」，閩本、宋本《釋文》作「鄒」，當是。

②「各盟所得」，阮校引浦鏜云：「《穀梁》所「作「其」，又此句下當脫「范氏云」三字。」

③「季孫斯不得田故不盟」，此句乃范寧《集解》語，非《穀梁傳》文，此誤引。

滕子來朝。

晉趙鞅帥師納衛世子蒯聵于戚。戚者何？衛之邑也。曷爲不言入于衛？據

弗克納未入國文，言納于邾婁，納者入辭，故傳言「曷爲不言入于衛」。【疏】「戚者何」。○解云：欲言其國，經典未有，欲言其邑，文無所繫，故執不知問。○注「據弗」至「于衛」。○解云：《公羊》之意，以爲戚與帝丘道塗非遠，但大同小異而已。今言「于戚」者，實是人于衛都，是以傳云「曷爲不言入于衛」矣。言「據弗克納未入國文，言納于邾婁，納者入辭」者，即文十四年秋，「晉人納接菑于邾婁，弗克納」。當爾之時，接菑實不入國，故曰「不克納」。未入國之辭，故曰「未入國文」。言「納于邾婁」，與「納蒯子於蒯」文同，是其已入國之辭，故曰「納于邾婁，納者入辭」也。今此上言納衛世子蒯聵，下無不克納之文，則是入國之辭矣。而言「于戚」，不言「于衛」，是以據而難之，故注者疊之曰「故傳言曷爲不言入于衛」。父有子，子不得有父也。明父得有子而廢之，子不得有父之所有，故奪其國文，正其義也。不貶蒯聵者，下曼姑圍戚無惡文，嫌曼姑可爲輒誅其父，故明不得也。

不去國見挈者，不言入于衛，不可醇無國文。輒出奔不書者，不責拒父也。主書者，與蒯子同。○爲，于僞反。去，起呂反。見挈，賢徧反，下去結反。【疏】注「不貶」至「子同」。○解云：正以犯父之命，理宜貶之，不謂更有經文可決也。然則文十四年卻缺納不正，貶之稱人，今趙鞅亦是納不當得位之人，而不貶者，正以納父罪不至貶也。彼傳云：「此晉卻缺也，其稱人何？貶。曷爲貶？不與大夫專廢置君也。」是其譏之義矣。云「故明不得也」者，正蒯聵無惡文，則知曼姑不得誅之明矣。云「不去國見挈者」云云，正以文十四年「晉人納接菑」，注云：「接菑不繫邾婁者，見挈于卻缺也。」今此不見挈者，不可醇無國文故也。云「輒出奔不書」云云，知輒出奔者，正以蒯聵之人故也。諸侯之禮，禮當死位，若其出奔者，皆書而責之。今不書者，正欲不責輒之拒父故也。云「主書者，與蒯子同」者，即僖二十五年「秋，楚人圍陳，納蒯子于蒯」。彼注云：「納蒯子書者，前出奔當絕，還入爲盜國當誅，書楚納之，與之同罪也。主書者，從楚納之。」然則定十四年夏，①「蒯聵出奔宋」之時，子無去父之義，已

①「夏」，阮校：「浦鏜云：『秋』誤『夏』。按：浦說是也。」

當合絕，今還入爲盜國，復當合誅，晉納之與同罪。主書者，從晉納，故曰與頓子同義。然則崩殯犯父之命，其惡明矣，但晉爲霸主，法度所在，而納逆命之子，奪已立之侯，故云主書者，從晉納矣。

秋，八月，甲戌，晉趙鞅帥師，及鄭軒達帥師，戰于栗，^①鄭師敗績。○栗，一本作

「秩」，二傳作「鐵」。【疏】「及鄭軒達戰于鐵」者。○解云：諸家之經，軒達之下皆有「帥師」，唯服引經者無，與諸家異。於鐵者，三家同，有作「栗」字者，誤也。今定本作「栗」字。

冬，十月，葬衛靈公。

十有一月，蔡遷于州來。畏楚也。州來，

吳所滅。【疏】注「畏楚也」。○解云：正以上文爲楚所圍，今遷而近吳，故知然也。云「州來，吳所滅」者，即昭十三年冬，「吳滅州來」是也。

蔡殺其大夫公子駟。稱國以殺者，君殺大

夫之辭。稱公子者，惡失親也。○惡，烏路反。【疏】注「稱國以殺者」，稱云「君殺大夫之辭」者，^②僖七年傳文。彼注云「諸侯國爲體，以大夫爲股肱，士民爲肌膚，故以

國體錄」是也。

三年，春，齊國夏、衛石曼姑帥師圍戚。齊國夏曷爲與衛石曼姑帥師圍戚？

據晉趙鞅以地正國，加叛文。今此無加文，故問之。【疏】「齊國」至「圍戚」。○解云：《公羊》之義，輒已出奔，曼姑稟誰之命而得圍戚者？下傳云「曼姑受命于先君

①

「晉趙鞅帥師及鄭軒達帥師戰于栗」，阮校：「唐石經、諸本同。《釋文》亦作「栗」，云「一本作秩，二傳作鐵」。疏本作「及鄭軒達戰于鐵」，解云：「諸家之經，「軒達」下有「帥師」，唯服引經者無。」「於鐵者」，三家同，有作「栗」字者，誤也。今定本作「栗」字。」按：「鄭軒達」下不言「帥師」者，蒙上「晉趙鞅帥師」也，今三家下有「帥師」，當衍。疏本與服氏無之，是也。疏又謂三家同作「戰于鐵」，定本作「栗」者誤，而《釋文》同定本作「栗」，區別之云「二傳作鐵」。案：陸德明所據之本，不及疏本也。」

②

「稱云」，杉浦校：「單疏鈔本無「稱云」二字，毛本亦無。按：「稱云」衍文，當刪去。」

而立輒」，①蒯聵奪輒，是以《春秋》與得圍之矣。○注「據晉」至「問之」。○解云：定十三年「秋，晉趙鞅入于晉陽以叛」，冬，「晉趙鞅歸于晉」。傳云：「此叛也，其言歸何？」以地正國也。其以地正國奈何？晉趙鞅取晉陽之甲以逐荀寅與士吉射。荀寅與士吉射者，曷爲者也？君側之惡人也。此逐君側之惡人，曷爲以叛言之？無君命也。」彼注云「無君命者，操兵鄉國，故初謂之叛，後知其意欲逐君側之惡人，故錄其釋兵，書歸而赦之」是也。然則趙鞅操兵鄉國加叛文，曼姑亦操兵鄉國，而使國夏首兵，不加叛文，是以弟子據而問之云：「齊國夏曷爲與曼姑首兵而圍戚乎？」伯討也。方伯所當討，故使國夏首兵。此其爲伯討奈何？曼姑受命乎靈公而立輒。靈公者，蒯聵之父。以曼姑之義，爲固可以距之也。曼姑無惡文者，起曼姑得拒之。②曼姑臣也，拒之者，上爲靈公命，下爲輒故，義不可以子誅父，故但得拒之而已。傳所以曼姑解伯討者，推曼姑得拒之，則國夏得討之明矣。不言圍衛者，順上文辟圍輒。○上爲，于僞反，下「爲輒」、「爲衛」、「不爲」同。【疏】注「曼姑臣也」。○解云：注言臣也者，欲道曼

姑者，乃是靈公之臣也，受命于靈公，當立輒，寧得違之乎？故得拒蒯聵矣。似若僖十年傳云：「君嘗訊臣矣，臣對曰：使死者反生，生者不愧乎其言，則可謂信矣。」彼注云：「上問下曰訊。」言臣者，明君臣相與言，不可負是。○注「不言」至「圍輒」。○解云：蒯聵去年入衛，今而圍者，止應圍衛，而言圍戚者，順上經文。且輒上出奔不見于經，若言圍衛，則恐去年蒯聵入于戚，今年圍衛者是圍輒矣，故言圍戚以辟之。靈公逐蒯聵在定十四年，立輒蓋在上二年將薨之時也。輒者曷爲者也？蒯聵之子也。然則曷爲不立蒯聵而立輒？據《春秋》有父死子繼。蒯聵爲無道，行不中善道。○中，丁仲反。靈公逐蒯聵而立輒。然則輒之義可以立乎？輒之義不可以拒父，故但問可立與不。曰：可。其可奈何？不以父命辭王父命，不以蒯聵命辭靈公命。以王父命辭父命，

①「于先君」，阮校：「浦鏜云：『于先君』，傳作『平靈公』。按：浦說是也。」

②「拒」，阮校：「當同傳作『距』，下同。」

「辭」猶不從。是父之行乎子也。是靈公命行乎蒯

聾，重本尊統之義。【疏】注「是靈」至「之義」。○解云：

即莊元年注云「念母則忘父背本之道也，故絕文姜不爲不孝，拒蒯聾不爲不順，脅靈社不爲不敬，蓋重本尊統，使尊行於卑，上行於下」是也。不以家事辭王事，

以父見廢故，辭讓不立，是家私事。以王事辭家事，

聽靈公命立者，是王事公法也。是上之行乎下也。

是王法行於諸侯，^①雖得正，非義之高者也，故冉有曰：

「夫子爲衛君乎？」子貢曰：「諾，吾將問之。」人曰：「伯

夷、叔齊何人也？」曰：「古之賢人也。」曰：「怨乎？」求

仁而得仁，又何怨？」出曰：「夫子不爲也。」主書者，善伯

討。【疏】注「是王法行於諸侯雖得正非義之高者也」。

○解云：正以上傳云：「不以父命辭王父命，以王父命辭

父命，是父之命行乎子也。」^②彼注云：「是靈公命行乎蒯

聾，重本尊統之義也。」傳又云：「不以家事辭王事，以王

事辭家事，是上之行乎下也。」故知宜是王法行於諸侯

矣，唯受靈公之命而拒蒯聾，而引王法行於諸侯者，正以

靈公於蒯聾，若似天子於諸侯，故取以況之。○注「故冉

有曰」至「伯討」。○解云：此《論語》文也。冉有所以疑

之者，正以輒之立也，雖得公義，失於父子之恩矣。云

「人曰伯夷、叔齊何人也」者，正以輒之拒父，非義之高，

不敢正言，故問古賢以測之。云「子曰古之賢人也」者，^③

言古之賢士，且有仁行。若作「仁」字如此解之，若作

「人」字不勞解也。云「曰怨乎」者，謂諫而不用，死于首

陽，然則怨周王乎？云「求仁而得仁，又何怨」者，言其

兄弟相讓而來，正以求爲仁道，卒得成讓，仁道遂成，不

欲汲汲乎求仁，有何孜孜而怨周王乎？云「出曰夫子不

爲也」者，正以伯夷、叔齊兄弟讓國，夫子以爲賢，而知輒

與蒯聾父子爭國者，夫子不助明矣。云「主書者，善伯

討」者，一則見輒之得正，二則見曼姑可拒，但主書善其

伯討，故曰「主書者，^④善伯討」。

夏，四月，甲午，地震。此象季氏專政，蒯聾

^①「於」，阮校：「蜀大字本、閩、監、毛本同，鄂本作

「乎」，何校本疏中同。」

^②「父之命」，阮校：「傳無「命」字。」

^③「人」，阮校：「段校本作「仁」，是也。」

^④「故」，原作「政」，今據京都本、再造善本、中華本、閩本改。

犯父命，是後蔡大夫專相放，盜殺蔡侯申，辟伯晉而京師楚，黃池之會，吳大爲主。【疏】注「是後」至「相放」。○注解云：即下文「蔡人放其大夫公孫獵于吳」是也。○注「盜殺蔡侯申者」。○解云：在四年。云「辟伯晉而京師楚」者，即下四年夏，「晉人執戎曼子赤歸于楚」，傳云「辟伯晉而京師楚」是也。云「黃池之會，吳大爲主」者，即下十三年夏，「公會晉侯及吳子于黃池」，傳云「吳何以稱子？吳主會也。吳在是，則天下諸侯莫敢不至也」是也。^①

五月，辛卯，桓宮、僖宮災。此皆毀廟也，其言災何？據禮，親過高祖，則毀其廟。【疏】注「據禮」至「其廟」。○解云：出《禮記·祭法》文。復立也。曷爲不言其復立？據立武宮言立。○

復立，扶又反，下及注同。【疏】注「據立武宮」者。○解云：在成六年二月。所以不據定元年「立煬宮者」，蓋從始據之，或科取一文亦何傷。《春秋》見者不復見也。謂內所改作也，哀自立之，善惡獨在哀，故得省文。

○見者，賢徧反，下同。【疏】注「謂內」至「省文」。○解云：《春秋》之義，^②諸是內所改作者，但遂其重處一過見

之而已，故餘輕處不復見之。^③所以然者，正以哀自立之，還於哀世災之，善惡獨在于哀，故得省文矣。似若襄三十一年「公薨于楚宮」，不言作楚宮者，^④正以襄自作之，還復襄自薨之，善惡獨在于襄，故得省文之類。云云之說，在襄三十一年。何以不言「及」？據雉門及

兩觀。○觀，工喚反。【疏】注「據雉門及兩觀」。○解云：即定二年「五月，壬辰，雉門及兩觀災」是也。敵也。親過高祖，親疏適等。何以書？上已問此皆

毀廟，其言災何？故不復連桓宮、僖宮。【疏】「何以書」。○注「上已」至「僖宮」。○解云：正以隱三年「秋，武氏子來求賻」，傳云：「其稱武氏子何？父卒，子未命也。何以不稱使？當喪未君也。武氏子來求賻何以

①「也」，杉浦校：「單疏鈔本無。」

②「之」，原作「逸」。阮校引浦鏜云：「『之』誤『逸』。」今據單疏鈔本改。

③「但遂」至「故餘」，阮校引浦鏜云：「『遂』誤『遂』，其餘誤『故餘』。」杉浦校：「單疏鈔本『遂』作『逐』，無『故』字。」

④「官」，原作「言」，今據中華本、閣本改。

書？」據彼注云：「不但言何以書者，嫌主覆問上所以說二事，不問求賻。」然則今此文亦有二事之嫌，主《春秋》見者不復見也，^①何以不言及？敵也。何以書，而不復為嫌者，正以上傳已云：「此皆毀廟也，其言災何？復立也。」分疏已訖，是以不復言「桓宮僖宮災何以書」矣。記災也。災不宜立。【疏】注「災不宜立」。○解云：謂其宮不宜立，若曰「以其不宜立，故災之然」。

季孫斯、叔孫州仇帥師城開陽。○開

陽，《左氏》作「啓陽」。開者，為漢景帝諱也。

宋樂髡帥師伐曹。○髡，苦昆反。

秋，七月，丙子，季孫斯卒。

蔡人放其大夫公孫獵于吳。稱人者，惡

大夫驕蹇，作威相放，當誅，故貶。○惡，烏路反。【疏】

注「稱人」至「故貶」。○解云：知是大夫者，正以《春秋》

之例，君殺大夫稱國，即僖七年「鄭殺其大夫申侯」之屬

是。^②大夫自相殺稱人，即文九年「晉人殺其大夫先都」

之屬是。則知稱國以放者，君自放之，即宣元年「晉放其

大夫胥甲父于衛」是也，^③則稱人以放，乃是大夫自相放，

即此文是矣。而言「作威」者，即《洪範》云「唯辟作威」是

也，今此大夫作威，故貶之。言當誅者，謂於王法當誅也。言故貶之者，正以大夫之貴，平常之時合稱名氏，故稱人為貶之。

冬，十月，癸卯，秦伯卒。哀公著治太平之

終，小國卒葬，極於哀公者，皆卒日葬月。○治，直吏反。

大，音泰。【疏】注「哀公」至「葬月」。○解云：即此「癸

卯，秦伯卒」，明年二月「葬秦惠公」是也。^④案昭元年

「夏，秦伯之弟鍼出奔晉」，傳曰：「秦無大夫，此何以書？

仕諸晉也。曷為仕諸晉？有千乘之國而不能容其母

弟，故君子謂之出奔也。」何氏云：「時秦侵伐自廣大，故

曰千乘。」然則秦伯是西方之伯，國至千乘，此注謂之小

國者，正以辟陋在夷，罕與諸夏交接，至於《春秋》，大夫

名氏不見於經，是以比之小國，其實非小者也。舊說

^①「主」，杉浦校：「單疏鈔本作「云」。按：「主」當作

「云」。

^②「七」，原作「十」。阮校：「浦鏜云：「七」誤「十」。

按：浦說是也。」今據單疏鈔本改。

^③「于」，原作「丁」，今據宣公元年經及中華本、閣本改。

^④「二月」，阮校：「按：「二」當作「三」。今按：葬秦惠

公在哀公四年三月，此誤。

云：地之張翕，彼此異時，蹙闢之數，不可同日而語。昭元年之時，自以千乘爲大國，至此還小，亦何傷也？而有疑焉？

叔孫州仇、仲孫何忌帥師圍邾婁。

四年，春，王三月，庚戌，盜殺蔡侯

申。^①弑君賤者窮諸人，此其稱盜以弑何？據宋人弑其君處曰稱人。○盜殺，音弑，下同。

【疏】「弑君」至「弑何」。○解云：文十六年冬「宋人弑其君處曰」之下，傳云：「大夫弑君稱名氏，賤者窮諸人。」然則師彼解爾，故此弟子據而難之。賤乎賤者也。賤

於稱人者。【疏】「賤乎賤者也」。○解云：彼注云：「賤者謂士也，士正自當稱人。」然則今此非士，故言「賤乎賤者也」。「賤乎賤者」孰謂？據無主名。謂罪

人也。罪人者，未加刑也。蔡侯近罪人，卒逢其禍，故以爲人君深戒。不言其君者，方當刑放之，與刑人義同。

○近，附近之近。【疏】注「罪人」至「刑也」。○解云：若其刑訖，當有刑稱，即襄二十九年夏「闔弑吳子餘祭」是也。^②今此言盜，又謂之罪人，故知未加刑也。云「蔡侯近罪人，卒逢其禍，故以爲人君深戒」者，「卒」詁爲「終」

也。○注「不言」至「義同」。○解云：即襄二十九年闔弑其君下注云：「不言其君者，公家不畜，士庶不友，放之遠地，欲去聽所之，故不繫國，^③故不言其君也。」然則此處之盜，仍未加刑，而亦不言其君者，正以方當刑放之，故與刑人義同也。

蔡公孫辰出奔吳。

葬秦惠公。

宋人執小邾婁子。

夏，蔡殺其大夫公孫歸姓、公孫霍。

晉人執戎曼子赤歸于楚。赤者何？

欲以爲戎曼子名，則晉人執曹伯言畀宋人，不言名歸。欲言微者，則不當書，故以不知問也。○曼，音蠻。畀宋，必利反，下同。【疏】「晉人」至「子赤」。○解云：《左

① 「殺」，阮校：「唐石經作『弑』。」

② 「子」，原作「于」，今據京都本、再造善本、中華本、閣本改。

③ 「故不繫國」，阮校：「浦鏜云：下脫『不繫國』三字。按：浦說是，否則與襄廿九年注不合。」杉浦校：「單疏鈔本『國』下有『不繫』二字。」

氏作「戎蠻子」也。○注「則晉」至「名歸」。○解云：即僖二十八年「三月，丙午，晉侯入曹，執曹伯，歸宋人」，彼則曹伯不言名，歸宋人不言歸，與此異，故執不知問。○注「欲言」至「當書」。○解云：欲言亦是楚之微者，自歸于楚，非戎子之名，則微者之例，不當書見，故以不知問之。戎曼子之名也。其言「歸于楚」何？據執曹伯，歸宋人，不言「歸于宋」。子北宮子曰：「辟伯晉而京師楚也。」此解名此言歸意也。②前此楚比滅頓、胡，諸侯由是畏其威，從而圍蔡，蔡遷于州來，遂張中國，京師自置，晉人執戎曼子，不歸天子而歸于楚，而不名而言歸于楚，則與伯執歸京師同文，故辟其文而名之，使若晉非伯執，而赤微者自歸于楚。言歸于楚者，起伯晉京師楚。主書者，惡晉背叛，當誅之。【疏】「辟伯」至「楚也」。○解云：成十五年春「晉侯執曹伯歸于京師」，是伯執人歸于京師之文。今戎曼子不言名，直言「晉侯執戎曼子歸于楚」，即是伯者執人歸京師無異，故名戎子以辟之。言赤歸于楚者，似楚之微者自歸，不于戎子然，故曰「辟伯晉而京師楚也」。○注「此解」至「誅之」。③○解云：言赤歸于楚之意也。云「前此楚比滅

頓、胡」者，即定十四年春，楚公子結帥師滅頓，以頓子嬖歸，④十五年春，「楚子滅胡，以胡子豹歸」是也。云「從而圍蔡」者，即上元年春，「楚子、陳侯、隨侯、許男圍蔡」是。云「蔡遷于州來」者，在二年冬。⑤云「遂張中國」者，猶言自盛大于中國也。云「京師自置」者，謂作天子自處置也。云「晉人執戎曼子，不歸天子而歸于楚」者，謂晉人畏其彊禦之勢，若京師矣。云「而不名而言歸于楚，則與伯執歸京師同文」者，若言執戎曼子歸于楚，則與成十五年「晉侯執曹伯歸于京師」同文。云「故辟其文而名之」者，為辟伯執歸京師之文，而名戎曼子也。云

- ① 「三」，原作「二」。阮校：「浦鏜云：『三』誤『二』。按：浦說是也。」今按：「晉侯入曹，執曹伯，歸宋人」在僖公二十八年三月，今據單疏鈔本改。
- ② 「名此言歸」，阮校：「鄂本作『名而言歸』，當據正。」
- ③ 「注此解至誅之」，杉浦校：「單疏鈔本作『注此解名而言歸意也云云』。按：依此本，則何注『此言』當作『而言』。」
- ④ 「嬖」，阮校：「閩、監、毛本作『辟』。」
- ⑤ 「二」，原作「三」。阮校：「浦鏜云：『二』誤『三』。按：浦說是也。」今據單疏鈔本改。

「使若晉非伯執」者，僖四年傳云：「稱侯而執者，伯討也。稱人而執者，非伯討也。」今此經云「晉人執戎曼子」，故云「使若晉非伯執」也。云「而赤微者，自歸于楚」者，若似楚之微者名赤，自歸于楚然，猶莊二十四年冬「赤歸于曹」之類。云「言歸于楚者，起伯晉京師楚」者，正以僖二十八年，晉侯「執曹伯以畀宋人」。然則諸侯自相執不言歸，今言歸者，^②欲起晉人以楚為京師故也。云「主書者，惡晉背叛，當誅之」者，言主書此事者，正欲惡晉以楚為京師，背叛天子，當命誅絕也。若然，楚人是時京師自置，寧知不惡之者，正以宣十八年秋七月「甲戌，楚子旅卒」，傳云：「何以不書葬？吳、楚之君不書葬，辟其號也。」然則吳、楚僭號非一朝一夕已，不書葬，一譏而已，自餘京師自置之事，理應不譏，故以此。^③

城西郭。○郭，芳夫反。

六月，辛丑，蒲社災。^④蒲社者何？據

鼓用牲于社，不言蒲。○蒲社，《左氏》作「亳社」。【疏】「蒲社者何」。○解云：正以社為積土，非火燒之物，而反書災，故執不知問。亡國之社也。蒲社者，先世之亡國，在魯竟。【疏】注「蒲社」至「魯竟」。○解云：《公

羊》解以為蒲者，古國之名，天子滅之，以封伯禽，取其社以戒諸侯，使事上。今災之者，若曰王教絕云爾。《左氏》、《穀梁》以為亳社者，殷社也，武王滅殷，遂取其社賜諸侯，以為有國之戒。然則傳說不同，不可為難。案今《穀梁》經傳皆作「亳」字，^⑤范氏云：「殷都于亳，武王克紂，而班列其社于諸侯，以為亡國之戒。」而賈氏云《公羊》曰薄社也者，^⑥蓋所見異。社者，封也。封土為社。其言災何？據封土非火所能燒。亡國之社

^①「傳」，原作「陳」，今據僖公四年傳及中華本、閩本改。

^②「今」，原作「公」。杉浦校：「按：『公』當作『今』。」今據單疏鈔本、閩本改。

^③「以」，單疏鈔本、監本、毛本作「云」。

^④「蒲社」，阮校：「唐石經、諸本同。《經義雜記》

曰：『《禮記·郊特牲》：『薄社北牖』注：『薄社，殷之社，殷始都薄。』《釋文》：『薄，本又作亳。』《書序》：『將遷其君於蒲姑。』《釋文》：『蒲如字，徐又扶各反，馬本作薄。』《史記·周本紀》作『遷其君薄姑』，是薄、蒲、亳三字古通。」

^⑤「字」，原作「宅」，今據單疏鈔本、閩本改。

^⑥「薄」，阮校：「何校本作『浦』。」

蓋揜之，揜其上而柴其下。故火得燒之。揜柴之者，絕不得使通天地四方，以爲有國者戒。○揜，意冉反。【疏】「亡國」至「其下」。^①○解云：公羊子不受于師，故言「蓋」也。○注「揜柴」至「四方」。○解云：即《郊特牲》云「天子之大社，必受霜露風雨，以達天地之氣也，是故喪國之社屋之，不受天陽也。薄社北牖使陰明也」是也。然《禮記》作「薄社」，何氏所見與鄭氏異。云「以爲有國者戒」者，言若不事上，當如此。蒲社災，何以書？記災也。戒社者，先王所以威示教戒諸侯，使事上也。災者，象諸侯背天子，是後宋事彊吳，^②齊、晉前驅，滕、薛俠轂，魯、衛驂乘，故天去戒社，若曰「王教滅絕云爾」。○背，音佩。俠轂，古洽反，下古木反，十三年同。乘，繩證反，十三年同。去，起呂反。【疏】「蒲社災何以書」。○解云：不直言「何以書」者，嫌覆問「柴其下何以書」，故復舉句而問之。○注「是後」至「驂乘」。○解云：《春秋說》文，謂下十三年黃池之會時也。

秋，八月，甲寅，滕子結卒。

冬，十有二月，葬蔡昭公。賊已討，故書葬也。不書討賊者，明諸侯得專討士以下也。【疏】注「賊

已討故書葬也」。○解云：此蔡昭公即上「盜殺蔡侯申」者是。隱十一年傳云：「弑則何以不書葬？」《春秋》君弑賊不討，不書葬，以爲無臣子也。然則今此蔡侯亦弑而書其葬，故知賊已討也。○注「不書」至「以下也」。○解云：孟子曰：「諸侯不得專殺大夫。」是以《春秋》之內，殺大夫不問有罪無罪，皆書而譏之。若殺微者，例所不錄。今蔡侯之賊乃微者，嗣子殺之，故不書見，故云「明諸侯得專討士以下也」。考諸正本，何氏之注盡於此，若更有注者，衍字矣。

葬滕頃公。○頃，音傾。

五年，春，城比。○比，本又作「苾」，亦作

「庇」，同音毗。《左氏》作「毗」。

夏，齊侯伐宋。

晉趙鞅帥師伐衛。

秋，九月，癸酉，齊侯處臼卒。

①「亡國至其下」，杉浦校：「單疏鈔本作『亡國之社蓋揜之者』，無『○解云』。按：注疏本誤，當據此本。」
②「彊」，原作「疆」，今據余本、京都本、閣本改。

冬，叔還如齊。

閏月，葬齊景公。閏不書，此何以

書？據楚子昭卒不書閏。【疏】注「據楚」至「書閏」。

○解云：即襄二十八年冬十二月，「甲寅，天王崩。」^①乙未，楚子昭卒」是也。彼注云：「乙未，甲寅，相去四十二日，蓋閏月也。」然則相去四十二日，明其不得同在一月，故以閏月言之。喪以閏數也。謂喪服大功以下諸

喪，當以閏月爲數。○閏數，所主反，下及注「月數」，^②

「閏數」同。【疏】「喪以閏數也」。○解云：此喪謂喪服

也，謂爲之服大功以下喪服者，皆以閏數之。此數讀如

「加我數年」之數，非頭數之數也。○注「謂喪服」至「爲

數」。○解云：此數乃爲頭數之數，謂九月、五月、三月之

喪，既是數月之物，故得數閏以充之，是以葬亦書閏矣，

何者？葬亦數月之物故也。喪曷爲以閏數？據

卒不書閏。【疏】「喪曷爲以閏數」。○解云：此喪亦喪服

大功以下者。喪數略也。略猶殺也。以月數，恩殺，

故并閏數。【疏】注「略猶」至「閏數」。○解云：此數亦如

「加我以數年」之數也。^③言大功以下之喪，所以得數閏

月者，正以恩殺故也。《鄭志》：趙商問曰：「經曰：『閏

月不告朔，猶朝于廟。』《穀梁傳》云：『閏月，附月之餘日，喪事不數。』又哀五年「閏月，葬齊景公」，《公羊傳》云：「閏月不書，此何以書？喪以閏數，喪數略也。」此二傳義反，於禮斷之何就？」答曰：「居喪之禮，以月數者，數閏。以年數者，雖有閏，無與于數也。」然則鄭氏之意，以爲彼云「喪事不數」者，謂期與三年也。此云「喪以閏數」者，謂大功以下也。若《穀梁》之意，以爲大功以下及葬，皆不數閏。云云之說，在襄二十八年。

六年，春，城邾婁葭。城者，取之也。不言

取者，魯數圍取邾婁邑，邾婁未曾加非於魯，而侮辱之不知足，有夷狄之行，故諱之，明惡甚。○邾婁葭，音加，又音遐，《左氏》作「邾瑕」。數，所角反。曾，才能反。行，下孟反。【疏】注「城者」至「惡甚」。○解云：正以襄二年「遂城虎牢」，傳云：「虎牢者何？鄭之邑也。其言城之何？取之也。」今言「城邾婁葭」，文與彼同，故知取之。

① 「王」，原作「下」，今據襄公二十八年經及中華本、閏本改。

② 「注」，原作「外」，今據閏本、宋本《釋文》改。

③ 「以」，阮校：「按：衍文。」

云「不言取之者，魯數圍取邾婁邑」者，即上三年冬「叔孫州仇、仲孫何忌帥師圍邾婁」，又上二年春「伐邾婁，取鄒東田及沂西田」之屬是也。先言圍者，便文故也。云有夷狄行者，正以貪而無親故也。

晉趙鞅帥師伐鮮虞。

吳伐陳。

夏，齊國夏及高張來奔。

叔還會吳于柤。○柤，莊加反。

秋，七月，庚寅，楚子軫卒。

齊陽生入于齊。

齊陳乞弑其君舍。弑而立者，不以當

國之辭言之，此其以當國之辭言之何？據

齊公子商人弑其君舍而立氏公子。○君舍，二傳作

「荼」，音舒。【疏】注「據齊」至「公子」。○解云：即文十

四年冬，^①「齊公子商人弑其君舍」是也。爲諼也。

此其爲諼奈何？問其義。○諼，況元反。景公

謂陳乞曰：「吾欲立舍，何如？」陳乞曰：

「所樂乎爲君者，欲立之則立之，不欲立則

不立，貴自專也。【疏】「所樂」至「不立」。○解云：言

人之所以愛樂乎其爲君者，貴慕其自專故也。然則此公

乃有爲而言，非王道也。^②君如欲立之，則臣請

立之。」陳乞欲拒言不可，恐景公殺陽生。陽生謂

陳乞曰：「吾聞子蓋將不欲立我也。」陳乞

曰：「夫千乘之主，將廢正而立不正，必殺

正者。晉世子申生是也。○乘，繩證反。【疏】注「晉世

子申生是也」。○解云：即僖五年「春，晉侯殺其世子申

生」是也。吾不立子者，所以生子者也，走

矣！」教陽生走。與之玉節而走之。節，信也。

析玉與陽生，留其半，爲後當迎之，合以爲信，防稱矯也。

奔不書者，未命爲嗣。○析，思歷反。爲後，于僞反，下

「乞爲同。矯，居兆反。【疏】注「節信」至「爲嗣」。○解

^①「冬」，阮校：「浦鍾云：『秋』誤『冬』。按：浦說是也。」

^②「然則此公乃有爲而言非王道也」，阮校：「監、毛本

「王」作「正」。按：齊召南云「公」字衍文，是也。」杉

浦校：「單疏鈔本無「公」字，「王道」作「正道」。」

云：言與之爲斷玉之信而令之走也。云「奔不書者，未命爲嗣」者，案定十四年秋「衛世子蒯聵出奔宋」，書見於經，故知陽生出奔不書者，未命爲嗣故也。然則公子陽生，但是母貴宜立，實非世子，而上傳云「廢正而立不正，必殺正者」，雖非夫人所生，但秩次宜立，謂之廢正亦何傷？而舊云陽生實是正世子，但未命爲嗣，故出入不兩書，若命爲嗣，即是大國之君，出入合兩書也者，^①非。景公死而舍立，陳乞使人迎陽生于諸其家。于諸，寔也，齊人語也。除景公之喪，期而小祥，服期者除。○期而，音基，下同。【疏】注「期而」至「者除」。○解云：期而小祥者，《士虞·記》文。言「服期者除」者，謂從服之徒矣。若其正服，臣爲君斬衰三年，寧得期而除乎？案景公之卒，在去年九月，至今七月，其實未期，而言「服期者除」者，蓋陽生之人，實亦九月，^②但事不宜月，故直時，是以傳云除景公之喪也。若然，案隱四年冬十二月「衛人立晉」，彼注云：「月者，大國篡例月，小國而，^③立、納、人皆爲篡。」然則大國之篡，例合書月，齊爲大國，而言事不宜月者，正以陽生之篡，陳乞爲之，故陽生之人欲移惡於陳乞故也，似若莊九年夏「齊小白入于齊」，何氏云「不月者，移惡于魯也」之類也。然則

大國之篡，所以月者，以其禍大故也。既移惡于陳乞，是以不月，正得述事之宜矣。諸大夫皆在朝，陳乞曰：「常之母，常，陳乞子。重難言其妻，故云爾。○難，乃旦反。【疏】注「常」至「云爾」。○解云：正以妻者己之私，故難言之，似若今人謂妻爲兒母之類是也。有

魚菽之祭，齊俗婦人首祭事。言魚豆者，示薄陋無所有。【疏】注「齊俗」至「祭事」。○解云：主婦設祭，禮則有之，何言齊俗者？正以主婦設祭之時，助設而已，其實男子爲首，即君牽牲，夫人奠酒，君親獻，夫人薦豆之類是也。若其齊俗，則令使婦人爲首，故此傳云「常之母，有魚菽之祭」，即其文是矣。○注「言魚」至「所有」。○解云：定元年「冬，十月，實霜殺菽」，彼注云：「菽，大豆。」然則彼已訓解，故此何氏直以豆言之。若依正禮，水陸僉陳，而止言魚與豆者，示薄陋無所有故也。願諸

①「者」，杉浦校：「單疏鈔本無。」

②「亦」，杉浦校：「當「在」字譌，下疏云「若然，鄉解云陽生之人，實在九月」可證。」

③「而」，阮校：「浦鏜云：「時」誤「而」。按：浦說是也。」

大夫之化我也。」言欲以薄陋餘福共宴飲。【疏】「願

諸」至「我也」。○解云：桓六年傳云：「曷爲謂之實來？」慢之也。曷爲慢之？化我也。」彼注云：「行過

無禮謂之化，齊人語也。諸侯相過，至竟必假塗，人都必朝，所以崇禮讓，絕慢易。今州公過魯都不朝魯，是慢之爲惡，故書實來。」見其義也。然則彼以州公過魯而無禮，故傳謂之「化我也」，今此陳乞亦以魚菽之薄物，枉屈諸大夫之貴重，亦是無禮相過之義，故謂之化我也。諸

大夫皆曰：「諾。」於是皆之陳乞之家。坐，

陳乞曰：「吾有所爲甲，甲，鎧。○鎧，苦代反。

【疏】「吾有所爲甲」。○解云：猶言我有所作得若干甲也。請以示焉。」諸大夫皆曰：「諾。」於是

使力士舉巨囊而至于中雷，^②巨囊，大囊。中央

曰中雷。○囊，乃郎反，又音託。雷，力又反。【疏】注

「中央曰中雷」。○解云：案《月令》「中央土」，云「其祀中

雷」，鄭注云「中雷，猶中室也」，「古者複穴，是以名室爲雷云」。庚蔚云：^③「複，地上累土，穴則穿地也。複穴皆

開其上取明，故雨雷之，是以因名中室爲中雷也。」^④故此傳云中雷，注云中央，謂室之中央也。諸大夫見之，

皆色然而駭，^⑤色然，驚駭貌。○色然，如字，本又作

「塤」，居委反，驚駭貌，又或作「危」。^⑥開之則闐

然，^⑦闐，出頭貌。○闐，丑鳩反，又丑甚反，一音丑今反，

見貌。《字林》云：「馬出門貌，丑衺反。」公子陽生

^①「實」，單疏鈔本、杉浦校毛本、京都本、再造善本作「寔」。

^②「囊」，阮校：「唐石經、諸本同。《釋文》：囊，乃郎反，又音託。按：《史記·齊大公世家》『囊』作『囊』，故音託。」

^③「庚」，阮校：「浦鏜云：『庚』誤『庚』。按：浦說是也。」

^④「複地上累土」至「爲中雷也」，《禮記·月令》疏引作「複謂地上累土爲之，穴則穿地也。複穴皆開其上取明，故雨雷之，是以後因名中室爲中雷也」。

^⑤「皆色然而駭」，阮校：「唐石經、諸本同。按：《一切經音義》引作『歛然』，此作『色』，蓋誤。」

^⑥「又」，余本、京都本、再造善本、宋本《釋文》作「本」。

^⑦「開之則闐然」，阮校：「唐石經、諸本同。按：《說文》：『覲，暫見也，從見炎聲。《春秋公羊傳》曰『覲然公子陽生』。』」

也。陳乞曰：「此君也已。」諸大夫不得已，皆逡巡北面，再拜稽首，而君之爾。時舍未能得衆，而陽生今正當立，諸大夫又見力士，知陳乞有備，故不得已，遂君之。○逡，七旬反。自是往弑舍。

陽生先詐致諸大夫，立於陳乞家，然後往弑舍，故先書當國，起其事也。乞爲陽生弑舍，不舉陽生弑者，諼成于乞也。不日者，與卓子同。【疏】注「故先書當國起其事也」者。謂書陽生入齊，乃在弑舍之前，所以起其先入後弑也。云「乞爲陽生弑舍，不舉陽生弑者，諼成于乞也」者，正以舉重略輕，《春秋》之常事，今而不書者，諼成于乞故也。○注「不日」至「子同」。○解云：僖十年「春，王正月」，「晉里克弑其君卓子」，何氏云：「不日者，不正遇禍，終始惡明，故略之。」然則今此陳乞弑舍，所以不日者，亦是不正遇禍，終始惡明，故略之，故曰「與卓子同」。若然，鄉解云陽生之人，實在九月，但事不宜月，故不書月。然則陳乞之事，宜云不月而云不日者，正以卓子之弑實書月，若言不月，則與卓子同，文不可設，故云「不日」也。案陳乞弑舍，實不書日，謂之不日亦何傷？然則陳乞弑舍之事，與里克弑卓子相類，而不月者，正以文承「陽生

入于齊」之下。陽生之事既不宜月，是以陳乞之事不得月也。若然，案僖九年「冬，晉里克弑其君之子奚齊」，注：「不月者，不正遇禍，終始惡明，故略之。」然則此亦不月，何氏不云「不月者，與奚齊同義」者，正以奚齊未踰年之君，與舍不類，寧得同之乎？

冬，仲孫何忌帥師伐邾婁。

宋向巢帥師伐曹。

七年，春，宋皇瑗帥師侵鄭。○瑗，于

眷反。

晉魏曼多帥師侵衛。

夏，公會吳于鄆。○鄆，似陵反。

秋，公伐邾婁。八月，己酉，入邾婁，

以邾婁子益來。人不言伐，此其言伐何？

據當舉入爲重。【疏】「人不」至「伐何」。○解云：莊十年

傳例：「粗者曰侵，精者曰伐，戰不言伐，圍不言戰，人

不言圍，滅不言人，書其重者也。」然則傳例云戰不言伐，

人不言圍，此云「人不言伐」者，正以此經舉伐言人，亦違

①「例」下，阮校：「浦鏜云：有『云』字。是也。」

舉重之例，是以據經以釋之。傳例云者，序用兵之次第，輕重備言，不足怪也。

內辭也，若使他人然。諱

獲諸侯，故不舉重而兩書，使若魯公伐而去，他人人之以來者，醇順他人來文。【疏】注「諱獲」至「來文」。○解

云：「若其不諱，宜舉重云「公人邾婁」，今不舉重而伐，入兩書，故知諱獲諸侯也。」云「使若魯公伐而去，他人人之

以來者」，以「來」是詣魯之常文，故何氏言來者常文，不為早晚施是也。今始若不諱，①宜云以邾婁子益至自某，

而經言來，故如此解。云「醇順他人來文」者，以上諱獲諸侯，故不舉重，使若魯人伐而去，他人自入之。今又言

來，②作外來詣魯之常文，故曰「醇順他人來文」也。邾

婁子益何以名？據「以隗子歸」不名。○隗，五罪

反。【疏】注「據以」至「不名」。○解云：即僖二十六年

「秋，楚人滅隗，以隗子歸」是也。絕。曷為絕

之？③據俱以歸。獲也。曷為不言其獲？

據獲晉侯言獲。【疏】注「據獲晉侯言獲」。○解云：即僖

十五年冬「晉侯及秦伯戰于韓，獲晉侯」是也。內大惡

諱也。故名以起之也。日者，惡魯侮辱邾婁無已，復人

獲之。人不致者，得意可知例。○惡魯，烏路反。復，扶

又反。【疏】注「故名以起之」。○解云：擅獲諸侯乃為大

惡，是以諱之，不言其獲。既不言獲，故云言其名以起其

見獲也。所以能起之者，諸侯之禮當死位，今不能死位而生見獲，書其名，起其絕也。案隱二年無駭「入極」之

下，傳云：「此滅也，其言入何？」內大惡諱也。昭四年「取鄆」之下，傳云：「滅之則其言取之何？」內大惡諱

也。今此又言「內大惡諱也」，重發傳者，正以往前二處人、取文異，今此上經雖亦言入，但書名之由，事須備釋，

是以又言。○注「日者」至「獲之」。○解云：隱二年注云：「入例時，傷害多則月。」此書日，故須解之。言「惡魯

侮辱邾婁無已」，即上六年「城葭」之下，注云：「魯數圍取邾婁邑，邾婁未曾加非於魯，而侮辱之不知足。」今復入

其國，獲其君，故書日以惡內也。○注「入不」至「知例」。

○解云：莊六年注：「公與一國及獨出用兵，得意不致，

①「始」，阮校：「閩、監本同，毛本作「使」。」

②「又」，原作「文」。杉浦校：「單疏鈔本作「又」。阮氏

校勘記云：「何校本「文」作「又」。按：「文」作「又」，是也。」今據單疏鈔本、何校本改。

③「絕曷為絕之」，阮校：「唐石經、諸本同。按：僖廿六年疏引此「曷」上有「之」字，此脫。」

不得意致伐。」即僖六年「公至自伐鄭」，二十九年「公至自圍許」之屬是。至於入他國，例不書致者，正以既能入國，得意可知，似若僖三十三年「公伐邾婁，取叢」之下，注云「取邑不致者，得意可知例」。

宋人圍曹。

冬，鄭駟弘帥師救曹。

八年，春，王正月，宋公入曹，以曹伯陽歸。曹伯陽何以名？據「以隗子歸」不名。

【疏】注「據以」至「不名」。○解云：即僖二十六年「秋，楚人滅隗，以隗子歸」是也。絕。曷爲絕之。據俱以

歸。滅也。曷爲不言其滅？據滅隗也。諱同姓之滅也。故名以起之。【疏】注「故名以起之」。○

解云：諱不得書其滅，故書其名，所以起其滅矣。所以能起之者，正以失地之君，例合書名，即桓七年穀伯綏、鄧吾離之下，傳云「曹何以名？」失地之君是，今曹伯陽

亦書其名，故可起其滅。何諱乎同姓之滅？據衛侯燬滅邢不諱。○燬，況委反。【疏】注「據衛」至「不

諱」。○解云：即僖二十五年「春，王正月，丙午，衛侯燬

滅邢」是也。力能救之而不救也。以屬上力能獲

邾婁而不救曹，故責之。不日者，深諱之。定、哀滅例

日，此不日者，諱使若不滅，故不日。【疏】注「不日」至

「故不日」。○解云：既書人以諱同姓見滅，而又日，故

曰深諱也。云「定、哀滅例日，此不日者，諱使若不滅，故

不日」，云云之說，在定四年。吳伐我。不言鄙者，起

圍魯也。不言圍者，諱使若伐而去。【疏】注「不言」至

「魯也」。○解云：正以莊十九年「冬，齊人、宋人、陳人伐

我西鄙」，注云：「鄙者，邊垂之辭，榮見遠也。」然則鄙者

邊垂之名，今不言鄙，直言伐我，故得起其圍魯矣。○注

「不言」至「而去」。○解云：國君當彊，折衝當遠，魯微

弱，深見犯，至于圍國，故諱之，但言伐者，差輕也。③

夏，齊人取譚及鄆。外取邑不書，此

何以書？所以賂齊也。曷爲賂齊？據上

① 「鄧吾離之下傳云曹何以名」，阮校：「浦鏜云：『皆」

誤「曹」字，「鄧」下脫「侯」。按：浦說是也。」杉浦

校：「單疏鈔本『鄧』下有『侯』字，『曹』作『皆』。」

② 「又」，閩本作「不」，當是。

③ 「也」，杉浦校：「單疏鈔本作『耳』。」

無戰伐之文。○憚，昌善反，一音昌然反，《字林》作「憚」，《左氏》作「闡」。【疏】「取謹及憚」。○解云：《左氏》、《穀梁》作「謹」、「闡」字。○「外取」至「以書」。○解云：宣元年「六月，齊人取濟西田」之下，傳云：「外取邑不書，此何以書？」注云：「據曹取之不書。」然則此傳云「外取邑不書，此何以書」者，亦據曹取濟西田不書，但從彼省文，是以不復注解。○注「據上」至「之文」。○解云：謂此上經無魯與齊戰伐之文，計無所謝，無事而賂，故難之。爲以邾婁子益來也。邾婁，齊與國，畏爲齊所怒而賂之，恥甚，故諱使若齊自取。○爲以，于僞反。【疏】「爲以」至「來也」。○解云：正爲七年「以邾婁子益來」，是以賂齊二邑也。○注「邾婁齊與國」。○解云：正以魯獲邾婁之君而賂二邑，若非齊之與國，理不應賂，云云之說，備于宣元年疏。

歸邾婁子益于邾婁。

獲歸不書，此書者，善魯能悔過歸之，嫌解邾婁子益無罪，書故復名之。○復，扶又反。【疏】注「獲歸」至「歸之」。○解云：正以僖十五年秦獲晉侯，後歸不書，故曰「獲歸不書」。今此書者，善魯能悔過歸之，故錄見之。○注「嫌解」至「名之」。○解

云：桓十五年傳例云：「歸者，出入無惡。」今此言歸，是以嫌其無罪也。經既書歸，作無罪之文，則嫌魯人解釋邾婁子，其罪合除，是以書見，^①故復名之，見其不善。所以書益之名，得見魯之有罪者，正以上七年以益來之時，傳云：「內大惡諱。」注云：「故名以起之。」然則初書名，起見魯罪，則知今復名者，^②其不善明矣。

秋，七月。

冬，十有二月，癸亥，杞伯過卒。○過，

古禾反。^③

齊人歸謹及憚。書者，善魯能悔過，歸邾婁子

益，所喪之邑不求自得，故不言來，使若不從齊來，與歸我濟西田同文。○喪，息浪反。^④【疏】注「書者」至「同

①「書」，杉浦校：「單疏鈔本作『常』，毛本亦然。」

②「知今」，原作「今知」。杉浦校：「按：『今知』當作『知今』。」今據單疏鈔本、京都本、再造善本、閣本改。

③「古禾反」，原作「古木反」，今據余本、京都本、再造善本、閣本、宋本《釋文》改。

④「息」，原作「自」，今據余本、京都本、再造善本、中華本、閣本、宋本《釋文》改。

文」。○解云：言所喪之邑不求自得者，正以言歸也。何者？歸者，自與之故也，^①若求乃得之者，當言取，即僖三十一年「春，取濟西田」，成二年秋「取汶陽之田」之屬是也。故不言來，使若不從齊來者，謂若此邑元不入齊，但以此來欲叛于魯，齊人取而歸之然。言與歸我濟西田邑同文者，即宣十年春，「齊人歸我濟西田」，傳云：「齊已取之矣，其言我何？言我者，未絕于我也。曷為未絕于我？齊已言取之矣，其實未之齊也。」注云「不言來者，明不從齊來，不當坐取邑」是也。然則彼以未之齊，故不言來，今此使若不從齊來，是以謂之同文矣。然則彼言我者，以其未絕于我，此不言我者，正以謹，僂實絕于我故也。濟西田未絕，齊人不當坐取邑，謹，僂實絕，齊人當坐取邑明矣。然則我與不，即是不同，而言同文者，正謂皆不言來以爲同文，何妨言我與不仍爲異乎？

九年，春，王二月，葬杞僖公。

宋皇瑗帥師取鄭師于雍丘。其言取

之何？據詐戰言敗也。○雍，於用反。【疏】注「據詐

戰言敗也」。○解云：即莊十年秋「荆敗蔡師于莘」，昭二十三年秋「吳敗頓、胡、沈、蔡、陳、許之師于雞父」，傳云

「此偏戰也，曷爲以詐戰之辭言之？不與夷狄之主中國也是也。易也。其易奈何？詐之也。詐謂陷阱奇伏之類。兵者，爲征不義，不爲苟勝而已。十三年詐反不月，知此不蒙上月，疾略之爾。○易也，以豉反，下同。阱，才性反。爲征，于僞反。【疏】注「詐謂」至「之類」。○解云：何氏蓋取《禮記·中庸》云：「人皆曰予知，驅而納諸罟獲陷阱之中，^②而莫之知辟也。」又言奇伏者，奇兵伏兵之謂也。○注「兵者」至「之爾」。○解云：下十三年「春，鄭軒達帥師取宋師于岳」，傳云：「其言取之何？易也。其易奈何？詐反也。」注云：「前宋行詐取鄭師，今鄭復行詐取之，苟相報償，不以君子正道，故傳言詐反。反猶報也。」然則兵之設也，爲欲征不義，豈欲苟勝而爲詐？故知《春秋》疾而略之，皆不書月矣。何者？《春秋》之義，偏戰者日，詐戰者月，所以然者，正疾其行詐，略之故也。今此二經，乃設陷阱奇伏，又爲詐之甚者，是以《春秋》復深略之。^③

① 「故」上，杉浦校：「單疏鈔本有『文』字。」

② 「陷」，原作「招」，今據京都本、再造善本、閣本改。

③ 「復」，杉浦校：「單疏鈔本無。」

夏，楚人伐陳。

秋，宋公伐鄭。

冬，十月。

十年，春，王二月，邾婁子益來奔。月

者，魯前獲而歸之，今來奔，^①明當尤加禮厚遇之。【疏】

注「月者」至「遇之」。○解云：正以上六年「夏，齊國夏、

高張來奔」，^②襄二十八年「冬，齊慶封來奔」之屬，則知來

奔魯者例合書時，今此書月，故如此解。文十二年「春，

正月，成伯來奔」，^③注云「月者，前爲魯所滅，今來見歸，

尤當加意厚遇之」也者，^④義亦通於此。以此言之，則知

昭二十三年「秋，七月，莒子庚輿來奔」，月者，爲下「戊

辰，吳敗頓、胡、沈、蔡、陳、許之師」書，莒子之奔雖在月

下，不蒙月。何氏所以不注之者，正以隱元年冬十二月，

「祭伯來奔」之下，^⑤注云：「月者，爲下卒也，出奔例時

也。」然則上已有注，故至庚輿之下，省文從可知。

公會吳伐齊。

三月，戊戌，齊侯陽生卒。

夏，宋人伐鄭。

晉趙鞅帥師侵齊。

五月，公至自伐齊。

葬齊悼公。

衛公孟彊自齊歸于衛。

薛伯寅卒。卒，葬略者，與杞伯益姑同。○伯

寅，二傳作「伯夷」，同音以尼反。【疏】注「卒葬」至「姑

同」。○解云：正以所見之世，詳錄小國，卒日葬月，是其

常文，即上四年「秋，八月，甲寅，滕子結卒」，冬十二月

「葬滕昭公」是也，^⑥今乃卒月葬時，故解矣。言「與杞伯

^①「奔」，原作「奪」，今據余本、中華本、閩本改。

^②「夏高張」，哀公六年經作「夏及高張」。

^③「春正月成伯來奔」，阮校：「浦鏜云：『春』下脫

「王」，「盛」誤「成」。按：浦說是也。」

^④「加」，原作「如」，今據京都本、再造善本、中華本、閩

本改。

^⑤「祭伯來奔」，阮校：「浦鏜云：『奔』衍。按：因傳有

「奔」字而誤增入也。」

^⑥「昭」，阮校：「浦鏜云：『昭』當爲「頃」。按：浦說是

也。」

益姑同」者，即昭六年「春，王正月，杞伯益姑卒」，注云：「不日者，行微弱，故略之。上城杞已貶，復卒略之者，人所見世，責小國詳，始錄內行也。諸侯內行小失，^①不可勝書，故於終略責之，見其義。」然則今比略之者，^②亦爲內行小失，故曰「與杞伯益姑同」。

秋，葬薛惠公。

冬，楚公子結帥師伐陳。吳救陳。救中

國不進者，陳，吳與國，救陳欲以備中國，故不進。【疏】

注「救中」至「不進」。○解云：正以僖十八年夏「狄救

齊」，「冬，邢人、狄人伐衛」，注云：「狄稱人者，善救齊，^③

雖拒義兵，猶有憂中國之心，故進之。不於救時進之者，

辟襄公，不使義兵壅塞也。」定四年冬，「蔡侯以吳子及楚

人戰于柏舉」，^④傳云：「吳何以稱子？夷狄也，而憂中

國。」注云：「言子起憂中國。然則夷狄之人，能憂中國

也，皆進之。」今此稱國不進者，正以救陳欲以備中國，故

不進也。知陳是吳之與國者，正以吳人救之故也。必知

欲以備中國者，非直見其不進，亦以陳於諸夏之時，乃是

吳之屬故也。

監本附音春秋公羊注疏哀公卷第二十七

①

「失」，原作「夫」。昭公六年何注作「失」，疏下文亦言「內行小失」，則當作「失」。今據京都本、再造善本、

閣本改。

②

「比」，單疏鈔本作「此」。阮校：「閩、監、毛本作「此」。」

③

「善救齊」，僖公十八年何注作「善能救齊」。

④

「柏舉」，定公四年經作「伯莒」，《釋文》云：「伯莒，《左氏》作「伯舉」。阮校引浦鏜云：「舉，經作「莒」。」

監本附音春秋公羊注疏哀公卷第二十八

起十一年，盡十四年

何休學

十有一年，春，齊國書帥師伐我。

夏，陳袁頗出奔鄭。○頗，破多反。

五月，公會吳伐齊。甲戌，齊國書帥

師及吳戰于艾陵。○艾，五蓋反。齊師敗績，

獲齊國書。戰不言伐，舉伐者，魯與伐而不與戰。不

從內與伐，使吳爲主者，吳主會，故不與夷狄主中國也。

言獲者，能結日偏戰，少進也。○與伐，音預，下「不與

伐」同。【疏】「獲齊國書」。○解云：宣二年春「獲宋華

元」之下，何氏云：「復出宋者，非獨惡華元，明恥辱及宋

國。」然則今此復出齊者亦然，但省文從可知，故不注。

○注「戰不」至「與戰」。○解云：戰不言伐者，莊十年傳

文。而此舉伐者，當爾之時，魯但與其伐，而不與其戰，

故得兩舉之矣。○注「不從」至「國也」。○解云：成二年

「六月，癸酉，季孫行父」云云，「會晉卻克」云云，「及齊侯

戰于鞏，齊師敗績」。注云：「大夫敵君不貶者，隨從王者

大夫，得敵諸侯也。」然則卻克之徒得敵齊侯者，正以魯

人與在，隨從王者大夫，是以得序于上而主齊侯。今亦

云魯公與伐，而不使吳爲主，序齊下者，正以吳是時爲主

會，若其與之，而序于齊上，即是夷狄之主中國，是以退

之矣。若然，案宣十二年，「晉荀林父帥師及楚子戰于

鄆」，林父序于楚子之上，亦應是不與夷狄之主中國。而

注云「不與晉而反與楚子爲君臣之禮，以惡晉」者，正以

楚莊王稱子，據彼君文成矣。有王伯之事，雖以臣及君，

不嫌晉直。今吳稱國，君文不成，而序國書之下，寧得類

乎？○注「言獲」至「進也」。○解云：莊十年秋，「荆敗

蔡師于莘，以蔡侯獻舞歸」。傳云：「曷爲不言其獲？不

與夷狄之獲中國也。」又昭二十三年秋，「吳敗頓、胡、沈、

蔡、陳、許之師于雞父」，「獲陳夏齧」。傳云：「不與夷狄

之主中國，則其言獲陳夏齧何？吳少進也。」注云：「能

結日偏戰，行少進，故從中國辭治之。」今經亦然，故以

言此。

秋，七月，辛酉，滕子虞母卒。

冬，十有一月，葬滕隱公。

衛世叔齊出奔宋。

十有二年，春，用田賦。何以書？據當

賦稅，爲何書。○爲何，于僞反，下「爲同宗」同。譏，

何譏爾？譏始用田賦也。田謂一井之田。賦

者，斂取其財物也。言用田賦者，若今漢家斂民錢，以田爲率矣。不言井者，城郭里巷亦有井，^①嫌悉賦之。禮，

稅民公田，不過什一，軍賦十井不過一乘。哀公外慕彊吳，空盡國儲，故復用田賦，過什一。○爲率，音律，又音類。乘，繩證反。復，扶又反。【疏】注「田謂一井之田」。

○解云：知如此者，正以《家語·政論》篇云「季康子欲以一井田出賦法焉」，又《魯語下》篇云「孔子謂冉求曰：田一井，出稷禾秉芻，正米不是過也」。^②案彼二文，皆論此

經用田賦之事，而言一井，故知然也。○注「不言井」至「賦之」。○解云：凡言田者，指墾土之處，言井者，但是

方里之名。若言用井賦，則嫌城郭里巷之內，但有一井之處，悉皆賦之，故云「不言井者，城郭里巷亦有井，嫌悉賦之」。○注「禮稅」至「什一」。^③○解云：即宣十五年

傳云「什一者，天下之中正也。什一行而頌聲作矣」是

也。云「軍賦十井不過一乘」者，何氏以爲公侯方百里，案諸典籍，每有千乘之義，若不十井爲一乘，則不合。鄭氏云「公侯方百里，井十則賦出革車一乘」者，義亦通于此。云「哀公外慕彊吳」者，即上十年春「公會吳伐齊」、十一年夏「公會吳伐齊」、此年夏「公會吳于橐臯」之屬是也。云「故復用田賦，過什一」者，對常賦以爲復矣。

夏，五月，甲辰，孟子卒。孟子者何？

據魯大夫無孟子。【疏】「孟子者何」。○解云：欲言魯

女，不言孟姬，欲言夫人，經不書葬，故執不知問。昭公

之夫人也。其稱孟子何？據不稱夫人某氏。

【疏】注「據不」至「某氏」。○解云：即隱二年冬「十有二月，乙卯，夫人子氏薨」之屬是也。諱娶同姓，蓋吳

女也。禮，不娶同姓，買妾不知其姓，則卜之。爲同宗

共祖，亂人倫，與禽獸無別。昭公既娶，諱而謂之吳孟

①「巷」，原作「若」，今據余本、鄂本及本疏改。

②「正」，阮校引浦鏜云：「『缶』誤『正』。」今按：《國語·魯語下》《四部叢刊》影明金李刊本作「缶」。

③「注禮稅至什一」，杉浦校：「單疏鈔本作『禮稅民公田不過什一也云云者』，無『○解云』。」

子。《春秋》不繫吳者，禮，婦人繫姓不繫國，雖不諱，猶不繫國也。不稱夫人不言薨，不書葬者，深諱之。【疏】「蓋吳女也」。○解云：公羊子不受于師，故疑之。○注「禮不」至「無別」。○解云：《上曲禮》云：「取妻不取同姓，故買妾不知其姓則卜之。」鄭氏注云：「為其近禽獸也。妾賤，或時非媵，取之於賤者，世無本繫者」是也。云「為同宗共祖，亂人倫，與禽獸無別」者，欲取《曲禮上》云「夫唯禽獸無禮，故父子聚麀，是故聖人作，為禮以教人，欲人以有禮，知自別於禽獸」之文乎？○注「昭公」至「孟子」。○解云：昭十年注云：「去冬者，蓋昭公娶吳孟子之年，故貶之。」然則此言昭公既娶者，^①謂從昭十年以來也。而諱之吳孟子者，即《論語》云「君娶于吳為同姓，謂之吳孟子」，《坊記》云「《魯春秋》猶去夫人之姓曰吳，其死曰『孟子卒』」是也。○注「春秋」至「國也」。○解云：②言「婦人繫姓不繫國」者，即隱元年「仲子」下，注云：「仲字，子姓，婦人以姓配字，不忘本也，因示不適同姓也。」二年「夫人子氏」之下，注云「子者，姓也。夫人以姓配號，義與仲子同」是。言昭公之時，諱之不謂之吳姬，謂之吳孟子，而《春秋》直謂之孟子，不繫吳者，正以婦人不繫國故也。言「雖不諱，猶不繫國」者，正以齊義、

穆姜之屬，^③亦不繫國言之故也。○注「不稱」至「諱之」。○解云：若言夫人，又若言薨，^④當言「夫人姬氏薨」，若葬，當言「葬我小君昭姬」，皆為大惡，大惡不可言，故曰「深諱之」也。而云「孟子卒」者，若言宋之長女，為魯侯之妾而卒之，猶如定十五年秋「嬖氏卒」之類。

公會吳于橐皋。○橐，章夜反，一音託。

秋，公會衛侯、宋皇瑗于運。○運，《左

氏》作「鄆」。

宋向巢帥師伐鄭。

冬，十有二月，蠆。何以書？記異也。

何異爾？不時也。蠆者，與陰殺俱藏。周十二月，夏之十月，不當見，故為異。比年再蠆者，天不能殺，

①「此」，京都本、再造善本作「其」。

②「云」，原作「去」，今據京都本改。

③「齊義」，閣本作「文姜」。單疏鈔本作「齊姜」，當是。

④「若言夫人又」，杉浦校：「單疏鈔本無『若言夫人又』」五字，毛本有。按：此五字，疏所據之本無，今有者，蓋是後人所加。

地不能理，^①自是之后，天下大亂，莫能相禁，宋國以亡，^②齊并於陳氏，晉分爲六卿。○蝶，音終，本亦作「螻」，注同。見，賢徧反。【疏】注「比年再螻」。○解云：即下十三年冬十二月螻是也。○注「宋國」至「六卿」。○解云：皆在春秋後。考諸舊本，「宋」是「宗」字，然則宗國猶大國。言「天不能殺，地不能理」，「天下大亂，莫能相禁」，是其紀綱之國，滅亡之象，是故齊并於陳氏，晉分爲六卿。若作「宋」字，何氏更有所見。《春秋說》云「陳氏篡齊三年，千人合葬，故螻蟲冬踊」者，是其螻爲齊亡之一隅也。案《左氏》及《史記》，皆云晉亡分爲魏、趙、韓，今云晉分爲六卿者，蓋其初時，晉君失政，六卿用事，不妨其下滅時但三家分之矣。

十有三年，春，鄭軒達帥師取宋師于岳。其言取之何？易也。其易奈何？詐

反也。前宋行詐取鄭師，今鄭復行詐取之，苟相報償，不以君子正道，故傳言詐反。反猶報也。○岳，五威反，一音魚及反。易，以鼓反，下同。鄭復，扶又反，秋以下注同。償，時亮反。【疏】「其言取之何」。○解云：上九年注云：「據詐戰言敗也，故此省文，不復言之也。」○注「前宋」至

「鄭師」。○解云：即上九年春「宋皇瑗帥師，取鄭師于雍丘」，傳云「其言取之何？易也。其易奈何？詐之也」是也。

夏，許男戊卒。比陳、蔡，不當復卒，故卒葬

略。○男戊，本亦作「成」。^③【疏】注「比陳」至「葬略」。○解云：昭八年冬「楚師滅陳」，十一年「楚師滅蔡」，至十三年秋「蔡侯廬歸于蔡」。陳侯吳歸于陳。二十年冬「十有一月，辛卯，蔡侯廬卒」，二十一年「春，王三月，葬蔡平公」。定四年「春，王二月，癸巳，陳侯吳卒」，夏「六月，葬陳惠公」。定六年，鄭游速滅許，^④「以許男斯歸」，今年「夏，許男戊卒」，秋「葬許元公」。然則陳、蔡之滅，非吳、廬之罪，及其存時，乃爲大國所復，但以不受封於天子，故書君以見之，仍以前君死位，非其自復，其國合存，故

① 「天不能殺地不能理」，余本「理」作「埋」。阮校引惠棟云：「二語見《荀子》，「理」當作「埋」。下「地不能理」不另出校。

② 「宋國」，阮校：「解云：『考諸舊本，「宋」是「宗」字，宗國猶大國。』按：當作「宗國」字，宗國謂魯也。」

③ 「男戊本亦作成」，宋本《釋文》作「男成本亦作戊」。

④ 「鄭游速滅許」，定公六年經作「鄭游速帥師滅許」。

許錄其卒葬也。而許男斯者，爲鄭所滅，不能死位，許國合絕，不足存之，而戌自復，罪惡深矣。若比之陳、蔡，不當合錄，而錄之者，正欲見其前君不死位，后君自復之惡深，是以書其卒葬，而去其日月以見矣。故曰「比陳、蔡，①不當復卒，故卒葬略」之也。

公會晉侯及吳子于黃池。吳何以稱子？據救陳稱國。【疏】注「據救陳稱國」。○解云：

十年冬，「吳救陳」是也。吳主會也。以言「及」也。

時吳疆而無道，敗齊臨菑，乘勝大會中國。齊、晉前驅，魯、衛驂乘，滕、薛俠轂而趨，以諸夏之衆，冠帶之國，反背天子而事夷狄，恥甚不可忍言，故深爲諱辭，使若吳大以禮義會天下諸侯，以尊事天子，故進稱子。○背，音佩。【疏】注「以言」至「而趨」。○解云：以經言「及吳」，

即知吳主會，何者？正及者汲汲之辭，②即僖五年夏「公及齊侯、宋公」以下，「會王世子于首戴」，注云：「言及者，因其文可得見汲汲也。」然則彼云「及齊侯」，齊侯主會，則知此言「及吳子」，吳子主會明矣，故云「以言及也」。云「時吳強而無道，敗齊臨菑，乘勝大會中國」者，即上十一年「五月，公會吳伐齊。甲戌，齊國書帥師，及吳戰于

艾陵，齊師敗績」者，是敗齊師于臨菑之事。正以吳爲夷狄，數伐中國而敗之，故謂之無道。「菑」字然有作「晉」字，若作「晉」字，以黃池爲近晉，晉人畏而會之，故曰「臨晉」。云「齊、晉前驅，魯、衛驂乘，滕、薛俠轂而趨」者，《春秋說》文也。以下傳及注云，則天下盡會，而《春秋說》特舉此六國，時爲之役，③故偏舉之，或言不盡意故也。○注「以諸」至「稱子」。○解云：諸夏衆強，不復如禮，反棄君父而事夷狄，恥辱之甚，不忍言，故深爲諱，進吳稱子矣。而言「冠帶之國」者，正以夷狄之人，不知冠帶故也，是以《穀梁傳》云：「吳王夫差曰：『好冠來！』」孔子曰：「大矣哉，夫差未能言冠而欲冠也！」范氏云「不知冠有等差，唯欲好冠」是也。吳主會，則曷爲先言晉侯？據申之會，楚子主會序上。【疏】注「據申」至「序上」。○解云：即昭四年「夏，楚子、蔡侯」以下「會

①「比」，原作「此」，今據上何注及單疏鈔本改。

②「正及者」，阮校引浦鏜云：「『正』下脫『以』。」杉浦校：「單疏鈔本『正』下有『以』字。」

③「時」，原作「陵」，今據京都本、再造善本、中華本、閣本改。

于申」是。不與夷狄之主中國也。明其實自以夷狄之彊會諸侯爾，不行禮義，故序晉於上。其言「及吳子」何？據鍾離之會殊會吳，不言「及」。僖五年

「公及齊侯」，齊侯主會益明矣。【疏】注「據鍾」至「言及」。○解云：即成十五年冬「叔孫僑如會晉士燮、齊高無咎」以下，「會吳于鍾離」是也。○注「僖五」至「明矣」。

○解云：即僖五年「公及齊侯、宋公」以下，「會王世子于首戴」。然則案如彼經，書公及齊侯，齊侯主會，此云「及吳」，則是吳子主會益明矣，何言「不與夷狄之主中國」乎？是以據而難之。會兩伯之辭也。晉序上者，主會文也。吳言「及」者，亦人往爲主之文也。方不與夷狄主中國，而又事實當見，不可醇奪，故張兩伯辭。先晉，言「及吳子」，使若晉主會爲伯，吳亦主會爲伯，半抑半起，以奪見其事也。語在下。○當見，賢徧反，年內皆同。【疏】注「吳言」至「文也」。○解云：凡言及者，汲汲之辭。今言「及吳子」，則似吳子先是在是，天下之人慕而往事之然，故曰「人往爲主之文」。○注「半抑」至「在下」。①○解云：序晉于上，是其抑之。言「及吳子」，起其爲伯也，故曰「半抑半起」矣。序晉于上，是其奪，言

「及吳子」，亦見其爲伯之事，故曰「奪見其事」。不與夷狄之主中國，則曷爲以會兩伯之辭言之？據伯主人。【疏】注「據伯主人」。○解云：謂爲伯者，主領會上之人矣。重吳也。其實重在吳，故言「及」。舉晉者，諱而不盈。【疏】注「其實」至「不盈」。○

解云：謂其實處權重在于吳，故言「及吳子」，作汲汲之文矣。經言公會晉侯，是其諱爲吳所主也。晉侯之下，即言「及吳子」，是其不盈滿其諱文也，何者？晉是大國而汲汲乎吳，還是吳爲會主之義也。僖二十三年夏，「宋公慈父卒」，傳云：「何以不書葬？盈乎諱也。」注云：「盈，滿也，相接足之辭也。」然則此言「諱而不盈」者，意欲取彼傳文矣。曷爲重吳？據常殊吳。【疏】注「據常殊吳」。○解云：即成十五年冬「叔孫僑如會晉士燮」以下，「會吳于鍾離」，襄十年「春，公會晉侯」以下，「會吳于柎」

①「注半抑至在下」，杉浦校：「單疏鈔本作『注半抑半起以奪見其事也』。」

之屬是也。^① 吳在是，則天下諸侯莫敢不至也。以晉大國，尚猶汲汲於吳，則知諸侯莫敢不至也。

不書諸侯者，為微辭，使若天下盡會之，而魯侯蒙俗會之者，惡愈。^② 齊桓兼舉遠明近，此但舉大者，非尊天子，故不得褒也。主書者，惡諸侯君事夷狄。○惡諸，烏路反。

【疏】注「不書」至「惡愈」。○解云：若欲實而言之，天下諸侯寧可悉至？但欲見其重在吳作偏至之辭而已。^③

其歷言某侯某侯，^④則實不至者不可空言，是以舉其最大之國，作天下盡會之義矣。○注「齊桓」至「褒也」。○解

云：僖二年「秋，九月，齊侯、宋公、江人、黃人會于貫」，^⑤傳云：「江人、黃人者何？遠國之辭也。遠國至矣，則中

國曷為獨齊、宋至爾？」^⑥大國言齊、宋，小國言江、黃，^⑦則以其餘為莫敢不至也。然則齊桓之時，非獨舉大以明

小，亦兼舉遠以明近。今此但舉晉者，非尊天子，不得褒為遠夷皆至之辭，則傳云「天下諸侯莫敢不至」者，據九州之

內言之，亦得謂之天下矣。○注「主書」至「夷狄」。○解云：《春秋》見義，非唯一種，一則見吳之強暴，一則見晉之

衰微，但主書之情，本惡諸侯君事夷狄，餘者兼見之矣。

楚公子申帥師伐陳。

於越入吳。

秋，公至自會。有恥致者，順諱文也。【疏】注

「有恥」至「文也」。○解云：莊六年注云：「公與二國以上出會盟，得意致會，不得意不致。」然則今此冠帶之國，斂手從夷，乃是可恥之次，而致之者，正欲順其諱文，使若吳尊事天子以會諸侯，諸侯得意，以會致之然，故曰「順諱文也」。

晉魏多帥師侵衛。此晉魏曼多也，曷

①「桓」，原作「相」，今據襄公十年經及京都本、再造善本、中華本、閣本改。

②「惡愈」，阮校：「桓二年疏引此下有『也』字，此脫。」

③「作偏至」，原作「偏至」，今據單疏鈔本、京都本、再造善本改。

④「其」上，杉浦校：「單疏鈔本有『如』。按：以此本為長。」

⑤「會于貫」，阮校：「按：經文作『會于貫澤』，此及僖九年盟葵丘疏皆無『澤』字。」

⑥「獨」下，僖公二年傳有「言」字。

⑦「小國」，僖公二年傳作「遠國」。阮校：「按：當作『遠國』。」

爲謂之晉魏多？據上七年言曼多。○魏多，《左氏》作「魏曼多」。【疏】注「據上」至「曼多」。○解云：即上七年春，「魏曼多帥師侵衛」是也。譏二名。二名，非禮也。復就晉見者，明先自正，而后正人。正人當先正大以帥小。【疏】注「復就」至「帥小」。○解云：定六年冬，「仲孫忌帥師圍運」，傳云：「此仲孫何忌也，曷爲謂之仲孫忌？譏二名。二名非禮也。」注云：「爲其難諱也。一字爲名，令難言而易諱，所以長臣子之敬，不逼下也。《春秋》定、哀之間，文致大平，欲見王者治定，無所復爲譏，唯有二名故譏之。」然則彼已於魯見訖，今復就晉見之者，明先自正，而后正人也。等是正人，而於晉者，見當先正大國，以帥于小國故也。

葬許元公。

九月，螽。先是用田賦，又有會吳之費。○之費，芳味反，下同。【疏】注「先是用田賦」。○解云：在十二年春。

冬，十有一月，有星孛于東方。孛者

何？彗星也。其言「于東方」何？據北斗言星名。○孛，音佩。彗星，囚歲反，又息遂反。【疏】「孛

者何」。○解云：欲言是星，星名未有，欲言非星，錄爲星稱，故執不知問。○注「據北」至「星名」。○解云：即文十四年「秋，七月，有星孛于北斗」是也。然則彼人于北斗，言其所孛之星名，今言于東方，故難之。見于旦也。旦者，日方出。時宿不復見，故言東方，知爲旦。

【疏】見于旦也。○解云：「于」字亦有作「平」字者，誤也。○注「旦者」至「爲旦」。○解云：旦者，日方出地，未相去離之辭，故曰「旦者，日方出」。當爾之時，宿皆不見，故曰「時宿不復見」也。星孛仍見，餘宿已沒，是以不復指其孛之星，漫道其方而已，「故言東方，知爲旦」也。何以書？記異也。周十一月，夏九月，日在房心。

房心，天子明堂布政之庭，於此旦見，與日爭明者，諸侯伐主治，^①典法滅絕之象，是後周室遂微，諸侯相兼，爲秦所滅，燔書道絕。○治，直吏反。燔，扶元反。【疏】注

「周十一月夏九月日在房心」。○解云：《堪輿》云「九月日體在大火」，故曰「日在房心」也。云「房心，天子明堂

①「伐主」，阮校：「鄂本作「諸侯代王治」，余本「伐」亦作「代」，當據正。」

布政之庭」，出《堪輿》，《星經》亦云也。○注「是後」至「道絕」。○解云：《春秋說》云：「趨作法，孔聖沒，周姬亡，彗東出，秦正起，胡破術，書記散亂，孔子不絕也。」既言「周姬亡，彗東出」，故知由此字星，周室遂微也。言「秦正起」，亦由此字星。《秦本紀》云：「始皇名正，以二十六年滅周，而并天下。」故云「諸侯相兼，為秦所滅」也。始皇，胡亥並悉焚書，聖人之道于斯絕矣，故曰「燔書道絕」。

盜殺陳夏彊夫。○陳夏，戶雅反，一本作「廉」。①彊夫，苦侯反，又古侯反，一本作「嫗」，音同，二傳作「夏區夫」。

十有二月，螻。黃池之會，費重煩之所致。

十有四年，春，西狩獲麟。何以書？

記異也。②何異爾？非中國之獸也。③然則孰狩之？稱西言狩，尊卑未分，④據無主名。○

狩，手又反。麟，力人反。【疏】「何以書記異也」。○解云：麟者仁獸，太平之嘉瑞。而言記異者，當爾之時，周室大衰，為天下所厭，漢高方起，堯祚將興者謂之瑞，⑤亡者謂之異，然則何氏云吉凶不並，⑥瑞災不兼之有乎？義亦通於此。○「非中國之獸也」。○解云：謂有聖帝明

王，然後乃來，則知不應華夏無矣。然則以其非中國之常物，故曰「非中國之獸」，不謂中國不合有。若似昭二十五年「有鸛鵒來巢」之下，傳云「何以書？記異也。何

①「陳夏」至「作廉」，王引之《經義述聞》：「『夏』與『廉』聲不相近，『夏』字無由通作『廉』。『廉』蓋『廡』字之誤。古聲『夏』、『廡』相近，故『夏』通作『廡』。《檀弓》『見若覆夏屋者矣』，鄭注曰：『夏屋，今之門廡也。』是『廡』與『夏』聲義相近也。《公羊》古本蓋作『廡』，今作『夏』者，後人以二傳改之也。」

②「何以書記異也」，阮校：「唐石經、諸本同。《隸釋》載漢石經《公羊》殘碑「何以書」上有「十有四年」字。據此及隱公傳，知經傳別行，傳首皆載某公年數。後人以經合傳，始刪傳中紀年矣。」

③「何異爾非中國之獸也」，阮校：「唐石經、諸本同。《春秋左氏傳序》正義引孔舒元《公羊》傳本作「今麟，非常之獸。其為非常之獸奈何」，與注本迥異。」

④「分」，原作「公」，今據余本、中華本、閣本改。

⑤「堯祚將興者謂之瑞」，阮校：「浦鍾云：『將』下當脫『復』字。孫志祖云：以《禮運》正義校之，浦說是也。」杉浦校：「按：此疏原作「堯祚將興與興者謂之瑞」，後人誤脫一「興」字也。」

⑥「氏云」，阮校：「按：二字衍。」

異爾？非中國之禽也」之類是也。若然，皆非中國之物，鶴鵠言有來，而麟不言有來者，正以麟是善物，《春秋》慕之，欲其常於中國，非今始有，非今始來之義，是以《穀梁傳》云「其不言來，不外麟于中國也。其不言有，不使麟不恒於中國也」是也。○注「稱西」至「未分」。○解云：西者，四時之叔，是為卑稱。狩者，天子諸侯之事，乃是尊名，故曰「稱西言狩，尊卑未分」也。必知狩是天子諸侯之事者，正以僖二十八年「天王狩于河陽」，^①桓四年春「公狩于郎」之屬故也。薪采者也。西者，據狩言方地，類賤人象也。金主芟艾，而正以春盡，木火當燃之際，舉此為文，知庶人采樵薪者。○薪，音新。芟，所銜反。^②艾，魚廢反。樵，在焦反。【疏】「薪采者也」。○解云：薪采，猶言采薪也。言是庶人采薪者矣。○注「西者」至「方地」。○解云：謂據其處，道其方地，曰西狩也。^③○注「類賤人象也」。○解云：正以西方為兌，少女之位，女子之卑，草木衰落，亦非可貴之義，故曰「類賤人象也」。○注「金主」至「薪者」。○解云：經言西者，賤人象。金主芟艾，持斧之義，而文正以春盡，是火當絕木之時，今乃舉此為文，即知庶人持斧，破木燃火之意，^④故曰「知庶人采樵薪者」。似若漢高祖起于布衣之內，持三

尺之劍而以火應之，君臨四海，從東鄉西，以應周家木德之象也。^⑤薪采者，則微者也，曷為以狩言之？據天子諸侯乃言狩，「天王狩于河陽」、「公狩于郎」是也。河陽冬言狩，獲麟春言狩者，蓋據魯變周之春以為冬，去周之正而行夏之時。○去周，起呂反。行夏，戶雅反，下「于夏」同。【疏】注「天王狩于河陽」。○解云：在僖二十八年。云「公狩于郎」者，在桓四年春。○注「河陽」至「之時」。○解云：若使周之正月，^⑥乃夏之

- ① 「僖二十八年」下，阮校：「浦鏜云：脫「春」。按：「春」乃「冬」字之誤。」今按：「天王狩于河陽」在僖公二十八年冬，阮校是。
- ② 「銜」，原作「街」，今據余本、中華本、閩本、宋本《釋文》改。
- ③ 「解云」至「曰西狩也」，杉浦校：「單疏鈔本無「解云」二字，「方」下有「之」字。」
- ④ 「破」，杉浦校：「單疏鈔本作「斫」。按：「破」當「斫」字誤。」
- ⑤ 「以應」，杉浦校：「單疏鈔本作「以絕」。按：上云「以火應之」，則此處作「以絕」是。」
- ⑥ 「若使」，杉浦校：「單疏鈔本作「若依」。」

仲冬，得冬獵田狩之時，①即《大司馬》職云「仲冬教大閱，遂以狩田」是也，但孔子作《春秋》，欲改周公之舊禮，正朔三而反，當欲行夏之時，取夏之孟冬以爲狩時，夏之仲冬不是田狩之月，是以桓四年春正月，「公狩于郎」，何氏云「狩例時，此月者，譏不時」。周之正月，夏十一月也，陽氣始施，鳥獸懷任，草木萌芽，②非所以養微者」是也。③然則河陽言狩者，周之季冬，當夏之十月，故得言狩矣。案僖二十八年冬，「天王狩于河陽」之時，乃冬言狩，今獲麟之經春言狩者，蓋據魯爲王而改正朔，方欲改周之春以爲冬，去其周之正月而行夏之時，由此之故，春而言狩矣。大之也。使若天子諸侯。曷爲大之？據略微。【疏】注「據略微」。○解云：隱元年「九月，及宋人盟于宿」，傳云：「孰及之？內之微者也。」注云「內者，謂魯也。微者，謂土也。不名者，略微也」是。然則《春秋》之道略於微者，今而大之，故以爲難矣。爲獲麟大之也。曷爲爲獲麟大之？據鶴鵠俱非中國之禽，無加文。○爲獲，于僞反，下「爲獲」，「孰爲」，注「爲誰」，「知爲」皆同。鶴，音權。鵠，音欲。【疏】注「據鶴」至「加文」。○解云：即昭二十五年夏「有鶴鵠來巢」是也。

麟者，仁獸也。狀如麕，一角而戴肉，設武備而不爲

害，所以爲仁也。《詩》云「麟之角，振振公族」是也。○

振，之人反。【疏】「麟者仁獸也」。○解云：《五行傳》云

「東方謂之仁」，又云「視明禮修而麟至」，言人君但當其視能明，其禮又修，而麟至也，是以《春秋說》云：「麟生於

火，游於中土，軒轅大角之獸。」然則麟爲土畜而言仁獸

者，④正以設武備而不害物，所以爲仁。而《異義》《公

羊》說云：「麟者，木精，一角，赤目，爲火候。」下注亦云

「麟者，木精」者，正以設武備而不害物，有仁之物，屬東

方，赤目，爲火候，火乃木之子，謂之木精亦何傷。又《鵠

冠子》云「麟者，北方玄枵之獸，陰之精」者，正以五行相

配言之，水爲土妃，水土構精而生麟，得土氣者性似父，

得水氣者性似母，蓋以麟得水氣，故云「玄枵之獸，陰之

①「田」，原作「日」，今據中華本、閩本改。

②「牙」，阮校：「毛本改「芽」。」

③「者」，阮校：「何校本無「者」字。」今按：桓公四年何注無「者」字。

④「畜」，原作「蓄」。京都本、閩本作「畜」，下疏亦言「土畜」，則作「畜」是。今據改。

精」也。○注「狀如」至「是也」。○解云：《釋獸》云：「麀，麀身牛尾，一角。」郭氏曰：「角頭有肉。」故此云「狀如麀，一角」也。《廣雅》云：「麟，狼額肉角。」故此注云「而戴肉」。云「設武備而不爲害，所以爲仁也」者，欲道中央之畜，而傳得謂之仁獸之義。云「《詩》云『麟之角，振振公族』是也」者，在《麟趾》之篇也。引之者，欲道麟角末有肉，示有武而不用，故得謂之仁。當時公族，皆振振然而信厚，亦爲仁之義，故得并引之。有王者則至，上有聖帝明王，天下大平，然后乃至。《尚書》曰：

「簫韶九成，鳳皇來儀。擊石拊石，百獸率舞。」《援神契》曰：「德至鳥獸，則鳳皇翔，麒麟臻。」○大平，音泰，下「大平」皆同。拊，芳甫反。援，音袁。麒麟，音其。【疏】注「上有」至「乃至」。○解云：若今未大平而麟至者，非直爲聖漢將興之瑞，亦爲孔子制作之象，故先至。故《孝經說》云：「丘以匹夫徒步，以制正法。」是其賤者獲麟，兼爲庶人作法之義也。○注「尚書」至「率舞」。○解云：《咎繇謨》之文也。彼鄭注云：「簫韶，舜所制樂。」宋均注《樂說》云：「簫之言肅，舜時民樂其肅敬，而紀堯道，故謂之簫韶。或云：韶，舜樂名。舜樂者，其秉簫乎？」鄭氏又云：「樂備作謂之成，簫韶作，九備而鳳皇乃來儀，

止巢乘匹。擊石拊石，百獸率舞者，石，磬也，百獸，服不氏所養者，謂音聲之道與政通焉。」引之者，欲道上有聖帝明王，天下大平，瑞物乃來之義。○注「援神」至「麟臻」。○解云：《釋獸》云：「驪，如馬一角，不角者驪。」舍人云：「驪如馬而有一角，不有角者名驪。」然則麒麟非直雄雌之異，其體亦別。無王者則不至。辟害遠也。當春秋時，天下散亂，不當至而至，故爲異。【疏】注「辟害遠也」。○解云：謂無道之世，刳胎殺夭，是以瑞物亦不來游也，即《家語》云「孔子曰：刳胎殺夭，則麒麟不至，擗巢毀卵，則鳳皇不翔」是也，故云「辟害遠也」。有

①「紀」，阮校引段玉裁云：「『紀』爲『紹』之誤。」杉浦校：「單疏鈔本『紀』作『紹』。」

②「者」上，阮校引段玉裁云：「當脫『舞』字。」

③「其」，杉浦校：「單疏鈔本無。」

④「無王者則不至」，阮校：「唐石經、諸本同。杜氏《春秋左傳序》云：『《春秋》之作，《左傳》及《穀梁》無明文。』正義曰：『今驗何注《公羊》，亦無作《春秋》事。案：孔舒元《公羊》傳本云『有王者則至，無王者則不至，然則孰爲而至？爲孔子之作《春秋》』，是有成文也。』今何注本此下無此二句。」

以告者曰：「有麇而角者。」^①孔子曰：「孰爲來哉？孰爲來哉？」見時無聖帝明王，怪爲誰來。○有麇，本又作「麇」，亦作「麇」，皆九倫反，麇也。

【疏】「有以」至「角者」。○解云：即《孔叢》云「叔孫氏之車子曰鉏商，樵于野而獲麟焉，衆莫之識，以爲不祥，棄之五父之衢。冉有告孔子曰：『有麇肉角，豈天下之妖乎？』」夫子曰：「今何在？吾將觀焉。」遂往。謂其御高柴曰：「若求之言，其必麟乎？」到，視之曰：「今宗周將滅，無主，孰爲來哉？茲日麟出而死，吾道窮矣。」乃作歌曰：「唐虞之世麟鳳游，今非其時來何由？麟兮麟兮我心憂」是也。然則此告者，其冉求也。若以《孔叢》合之此傳，則鄉云薪采者，還是鉏商也。而《春秋》不言之者，略微故也。不言爲漢獲之者，微辭也。故《春秋說》云「不言姓名爲虛主」，宋氏云「劉帝未至，故云虛主。若書姓名，時王惡之」，是其義也。○注「見時」至「誰來」。○解云：下注云：「夫子素案圖錄，知庶姓劉季當代周，見采薪獲麟，知爲其出。」然則夫子素知此事，而云「孰爲來哉」以怪之者，蓋畏時遠害，假爲微辭，非其本心，注解其語，故見時無聖帝明王，^②怪爲誰來矣。或者素案圖錄，知劉季當代周，但初見之時，未知薪采獲麟爲之出，

仍自未明，故作此言也。乃後詳審，方知爲薪采者所獲，於是煥然而寤，是以泣之，亦何傷乎？反袂拭面，涕沾袍。^③袍，衣前襟也。夫子素案圖錄，知庶姓劉

①「有麇而角者」，阮校：「按：《隸釋》載漢石經作「麇」，即「麇」之隸變。《爾雅·釋獸》：「麇，麇身牛尾。」郭注引《公羊傳》曰「有麇而角」，是古本作「麇」也。《石經考文提要》云：宋景德本、鄂洋官書本皆作「麇」。」

②「見」，杉浦校：「單疏鈔本作「云」。按：「見」爲「云」之誤。」

③「反袂拭面涕沾袍」，阮校：「唐石經、諸本同。疏本作「反袂拭目涕沾袍」，云「目」亦有作「面」字者，「袍」亦有作「衿」字者」。按：《釋文》作「沾袍，步刀反」。《經義雜記》曰：「《說文》：袍，襦也，「衿，交衽也」。是當作「涕沾衿」，衿、襟皆俗字，作「袍」非也。《論衡·指瑞》云「反袂拭面泣涕沾襟」，《春秋正義》云「下沾衿之泣」，《離騷》「霑余襟之浪浪」，皆可證。又杜氏《春秋序》亦作「反袂拭面」，疏本作「拭目」，非。」今按：《春秋左傳正義》卷一「至於反袂拭面」，疏曰：「《公羊傳》稱「孔子聞獲麟，反袂拭面，涕沾袍」。則唐時各本同作「袍」字。」

季當代周，^①見薪采者獲麟，知爲其出。何者？麟者，木精。薪采者，庶人燃火之意。此赤帝將代周居其位，故麟爲薪采者所執。西狩獲之者，從東方王於西也，東卯西金象也。言獲者，兵戈文也。言漢姓卯金刀，以兵得天下。不地者，天下異也。又先是螻蟲冬踊，彗金精埽，置新之象。夫子知其將有六國爭彊，從橫相滅之敗，秦項驅除，積骨流血之虞，^②然後劉氏乃帝，深閔民之離害甚久，故豫泣也。○袂，彌世反，衣袖也。涕，他禮反。袍，步刀反，又步報反，衣前襟也。襟，音金。王於，于況反。下「火王」、「而王」、「之王」同。從橫，子容反。驅除，並如字，又上丘具反，下直據反。【疏】「反袂拭目」。○解云：「目」亦有作「面」字者。云「涕沾袍」者，「袍」亦有作「衿」字者。以衣前襟言之，袍似得之。○注「夫子」至「代周」。○解云：蓋見《中候》云「卯金刀帝出，復堯之常」，是其案圖錄。從亭長之任而爲天子，故謂之庶姓矣。○注「何者」至「之意」。○解云：《春秋說》云：「麟生於火，游於中土，軒轅大角之獸。」然則麟爲土畜而言木精者，正以《公羊》說云：「麟者，木精，一角，赤目，爲火候。」既爲火候，是木之子，謂之木精亦何傷？舊云木生火，火生土，麟爲土畜，亦受氣于祖，性合人仁，故爲木精

也。庶人采薪，本供庖爨，意欲燃之，故曰「采薪，庶人燃火之意也」。木雖生火，火復燒木，即漢以火德承周之后，而能滅之，故曰「此赤帝將代周居其位」也。云「故麟爲薪采者所執」，其若不然，麟爲異物，體形不小，薪采隻夫，寧能輕獲之乎？○注「西狩」至「天下」。○解云：言西狩獲之者，即是從東方而王於西方之象，卯在東方，金在西方，故曰「東卯西金象也」。言獲者，兵戈之文，是其有刀之義也，故曰「言姓卯金刀，以兵得天下」，言劉季起於豐沛之間，提三尺之劍而入秦宮，是其卯金刀從東王於西，以兵得天下之事也。○注「不地」至「異也」。○解云：所以不言西狩于某獲麟者，正以麟見於魯，^③乃爲周王將亡之異，^④是以不舉小地之名，亦得爲王魯之義，故曰「不地者，天下異也」。云「又先是螻蟲冬踊」者，即上

①「姓」，余本、鄂本、京都本、再造善本作「聖」。

②「虞」，阮校：「鄂本作「虐」，不誤。解云：「虐」亦有作「害」者。」

③「麟」，原作「譏」。杉浦校：「按：「譏」當「麟」之誤。」今據單疏鈔本、京都本、再造善本改。

④「王」，阮校：「閩本同，監、毛本改「室」。」

十二年「冬，十有一月，螽」，十三年冬「十有一月，螽」是也。云「螽金精埽旦置新之象」者，^②即上十三年「冬，十有二月，有星孛于東方」，傳云「孛者何？螽星也」者是。孛從西方鄉東，故曰金精。螽者，埽除之象，鄉晨而見，故曰「埽旦」也。然則螽蟲冬踊者，乃是天不能殺，地不能理，^③故爲六國爭強，天下大亂之象也。金精埽旦，乃是秦項驅除，劉氏乃帝之義，故何氏云焉。○注「夫子」至「之敗」。○解云：六國者，即燕、齊、楚、韓、魏、趙也。^④當爾之時，齊據東蕃，燕、楚強于南北，韓、魏、趙居於晉洛之間，各自保險，迭相征伐，故曰「六國爭強」也。《戰國策》云：「秦橫有周，故謂之橫。燕、楚南北而遠，故謂之從。蘇秦在東而相六國，謂之合從。張儀在西而相秦以戎，^⑤謂之連橫。」故彼下文「從成則楚王，橫成則秦帝。蘇公居趙，秦兵不敢東伐。張儀在秦，楚兵絕于西」是也。蘇公既死，張儀以橫滅從，是「從橫相滅之敗」也。○「秦項驅除」。○解云：始皇據秦，藉滅周之資而殄六國，項羽因胡亥之虐而籠括天下，皆非受命之帝，但爲劉氏驅其狐狸，除其豺狼而已，故曰「秦項驅除」。○注「積骨」至「泣也」。^⑥○解云：「虐」亦有作「害」者。爾時天下土崩，英雄鵠起，秦項之君，視人如芥，殺函之處，積骨

成山，平原之地，血流如海，故曰「積骨流血之虐」也。自此以後，高祖乃興，故曰「然後劉氏乃帝」。顏淵死，子曰：「噫！噫，咄嗟貌。○噫，於其反。咄，丁忽反。」【疏】注「噫咄嗟貌」。○解云：咄嗟，猶歎息，即里語曰咄嗟之間也。《弟子傳》云：「顏淵少孔子三十歲，三十二而卒。」以此言之，則顏淵之生，昭十九年矣。及其卒時，當哀三年，而至此乃言之者，傳家追言之，亦何傷？天喪予！予，我。○喪，息浪反。予，羊汝反，我也。【疏】「天喪予」。○解云：聖人之道，當須輔佐而成，是以《家語》及《殷傳》云：「自予得回也，門人加親也。」今而遭命，故曰「天喪予」。而《論語》云「非助我者」，謂非師徒

① 「二月」，阮校：「浦鏜云：『一月』誤『二月』。按：浦說是也。」

② 「埽」，原作「歸」，今據京都本、再造善本、中華本、閣本改。

③ 「理」，單疏鈔本作「埋」。

④ 「魏趙」，阮校：「閩、監、毛本作『趙魏』。」

⑤ 「戎」，阮校：「當從毛本作『成』。」

⑥ 「注積骨至泣也」，杉浦校：「單疏鈔本作『注積骨流血之虐云云者』，無『○解云』。」

弟子共相發起之義，蓋欲顯聰敏，非是不助也。子路

死，子曰：「噫！天祝予！」祝，斷也。天生顏

淵，子路，爲夫子輔佐，皆死者，天將亡夫子之證。○斷，

丁管反。【疏】「子路死」至「祝予」。○解云：若依《左

氏》，^①則獲麟之后，當哀十五年，衛太子蒯聵入國之時，

子路乃死，衛人醢之。孔子聞之，爲之覆醢。今已言死

者，公羊子於後言之，未足爲妨也。「自予得由也，惡言

不至於耳」，是其爲輔佐之義也。注「祝，斷也」者，言天

祝惡己之道德，亦是斷絕之義也。○注「天生」至「之

證」。○解云：若欲以理言之，則四科十人，游、夏之徒，

皆爲夫子之輔佐，故《孝經說》云：《春秋》屬商，《孝經》屬

參」是也。今特言二人者，以其先卒故也。良輔之內，二

人先死，亦非祐助之義，故曰「將亡夫子之證」。西狩

獲麟，孔子曰：「吾道窮矣！」加姓者，重終也。

麟者，大平之符，聖人之類，時得麟而死，此亦天告夫子

將沒之徵，故云爾。【疏】「西狩」至「窮矣」。○解云：麟

之來也，應於三義：一爲周亡之徵，即上傳云「何以書？

記異也」是也。二爲漢興之瑞，即上傳云：「孰爲來哉？

孰爲來哉？」雖在指斥，意在於漢也。三則見孔子將沒

之徵，故此孔子曰「吾道窮矣」是也。○注「加姓」至「云爾」。○解云：正以上文再發「子曰」，皆不加姓故也。云「麟者，大平之符，聖人之類」者，以皆有聖帝明王，然後乃見，故謂「之類」也。注又云「時得麟而死」者，即《孔叢子》云「麟出而死，吾道窮矣」是也。^②

《春秋》何以始乎隱？據得麟乃作。【疏】

注「據得麟乃作」。○解云：止以《演孔圖》云「獲麟而作

《春秋》，^③九月書成」是也。而《揆命》篇云「孔子年七十

歲，知圖書，作《春秋》」者，何氏以爲年七十歲者，大判言

之，不妨爾時七十二矣，猶如「卜世三十，卜年七百」之類

也。祖之所逮聞也。託記高祖以來事，可及問聞知

者，猶曰我但記先人所聞，辟制作之害。【疏】「祖之所逮

聞也」。○解云：何氏以爲公取十二，則天之數，故隱元

年「益師卒」之下，注云「所以二百四十二年者，取法十二

公，天數備足」是也。今此傳云「祖之所逮聞」者，謂兼有

①「左」，原作「在」，今據中華本、閩本改。

②「吾」，原作「言」，今據京都本、再造善本、閩本改。

③「止」，阮校：「閩、監、毛本作『正』。」杉浦校：「單疏

鈔本『止』作『正』，毛本亦然。」

天數之義，亦託問聞而知，亦取制服三等之義，故隱元年注云「所以三世者，禮，為父母斬衰三年，為祖父母期，為曾祖高祖父母齊衰三月」是也。○注「託記」至「之害」。

○解云：假託云道我記高祖以來事者，謂因已問父得聞昭、定、哀之事，因父問祖得聞文、宣、成、襄之事，因祖問高祖得聞隱、桓、莊、閔、僖之事，故曰「託記高祖以來事，可及問聞知者」。以此言之，則無制作之義，故曰「我但記先人所聞，辟制作之害」也。所見異辭，所聞異辭，所傳聞異辭。所以復發傳者，益師以臣見恩，此

以君見恩，嫌義異。於所見之世，臣子恩其君父尤厚，故多微辭也。所聞之世，恩王父少殺，故立煬宮不日，武宮日是也。所傳聞之世，恩高祖曾祖又殺，故子赤卒不日，子般卒日是也。○傳，直專反，注「傳聞」同。復，扶又反。臣見，賢徧反，下「欲見」同。少殺，所戒反，下同。般，音班。【疏】注「所以復發」至「義異」。○解云：隱元年「冬，十有二月」，「公子益師卒」，傳云：「何以不日？遠也。所見異辭，所聞異辭，所傳聞異辭。」然則彼已有傳，今復發之者，正以益師之卒所以不日者，以其恩遠，孔子所不見，欲道當時之君無恩于其臣，是以大夫之卒，不問有罪與不，例皆不日以見之，是以須發二魁與辭之

言。①今此西狩獲麟當所見之世，已與父時之事，欲道當

時之臣有恩于其君，故為微辭，不忍正言其惡，是以復須發傳，道其三代異辭之意。然則言益師以臣見恩者，言益師之經，以臣之故，見君恩之薄厚也。云「此以君見恩」者，今此獲麟之經，以君之故，見臣恩之厚薄，其義實異，故重發。案桓二年「成宋亂」之下，傳云：「內大惡諱，此其自言之何？遠也。所見異辭，所聞異辭，所傳聞異辭。」何氏云：「所以復發傳者，益師以臣見恩，此以君見恩，嫌義異也。」然則桓公之時，已發見君恩之傳，今復發之者，正以桓公之時，欲見其臣無恩於其君，是以不為之諱大惡。今時有恩于其君，為之諱而作微辭也。彼注云「嫌義異也」，此復注云「義異」，是其一隅，何氏不決之者，從可知省文也。云「故多微辭也」者，即定元年傳云「定、哀多微辭」，注云「定公有王無正月，不務公室，喪失國寶。哀公有黃池之會，獲麟，故總言多」是也。云「故立煬宮不日」者，即定元年秋九月「立煬宮」是也。云

①「二魁與辭」，單疏鈔本作「三世異辭」，閩本作「三代異辭」，本疏下文又言「是以復須發傳，道其三代異辭之意」，則作「三代異辭」是。

「武宮日」者，即成六年二月，辛巳，立武宮是也。正以《公羊》之義，失禮鬼神例日，故如此解之也。云「子赤卒不日」者，即文十八年「冬，十月，子赤卒」是也。^①云「子般卒日是也」者，即莊三十二年「冬，十月，乙未，子般卒」是也。文十八年「子卒」之下，傳云：「子卒者孰謂？謂子赤也。何以不日？隱之也。何隱爾？弑也。弑則何以不日？不忍言也。」注云「所聞世，臣子恩痛王父深厚，故不忍言其日，與子般異」是也。何以終乎哀十四年？據哀公未終也。【疏】注「據哀公未終也」。○

解云：正以未見公薨之文故也，且以《左氏》言之，即哀二十七年，公遜於越而因卒，則知今未終。曰：「備

矣！」人道浹，王道備，必止於麟者，欲見撥亂功成於

麟，猶堯、舜之隆，鳳皇來儀，故麟於周爲異，《春秋》記以爲瑞，明大平以瑞應爲效也。絕筆於春，不書下三時者，起木絕火王，制作道備，當授漢也。又春者歲之始，能常法其始，則無不終竟。○道浹，子協反，一本作「市」。^②

撥，卜末反，理也。應，應對之應。【疏】注「人道」至「效也」。○解云：「浹」亦有作「市」字者。正以三代異辭，因父以親祖，以親曾祖，^③以曾祖親高祖，骨肉相親極于此，

故云「人之道浹」也。^④云「王道備」者，正以撥亂于隱公，功成于獲麟，懷懷治之，至于大平，故曰「王道備」也。云「必止至於麟者」，^⑤正以獲麟之後，得端門之命，乃作《春秋》，但孔子欲道從隱撥亂，功成于麟，是以終於獲麟以示義，似若堯、舜之隆，制禮作樂之後，簫韶九成，鳳皇乃來止巢而乘匹之類也。云「故麟于周爲異」者，即上傳云「何以書？記異也。何異爾？非中國之獸也」是也。云《春秋》記以爲瑞者，「記」亦有作「託」者，今解從「記」也。^⑥云「明大平以瑞應爲効也」者，言若不致瑞，即大平無驗，故《春秋》記麟爲大平之効也。○注「絕筆」至「漢也」。○解云：四時具，然後爲年，此乃《春秋》之常，今不書下三時者，欲起木應之君將亡，欲別起爲王，是以

①「赤」，阮校引浦鍾云：「衍。」

②「市」，原作「市」，今據余本、中華本、閩本、宋本《釋文》改。下「市」字同，不另出校。

③「以」下，當脫「祖」字。

④「之」，阮校引浦鍾云：「衍。」

⑤「至」，何注無此字。阮校引浦鍾云：「『至』衍。」

⑥「從」，原作「彼」。阮校引浦鍾云：「『從』誤『彼』。」今據單疏鈔本改。

此處不得記之。且獲麟既記，^①制作之道已備，當欲以之授于漢帝，使爲治國之法，是以不得錄于三時矣。○注「又春」至「終竟」。○解云：所以然者，始正，則僖十六年傳云「朔有事則書，^②晦有事不書也」者，^③義亦通此。君子曷爲爲《春秋》？據以定作五經。【疏】「君子曷爲爲春秋」。○解云：君子，謂孔子。曷爲今日始爲《春秋》乎？嫌其大晚於諸典之後。○注「據以定作五經」。○解云：何氏以爲，孔子領緣五經，皆在獲麟之前，故言此。^④何氏知然者，正以《論語》云：「孔子曰：吾自衛反魯，然後樂正，《雅》、《頌》各得其所。」案孔子自衛反魯，在哀十一年冬，則知料理舊經，不待天命者，皆在獲麟之前明矣。而《論語》直言樂正《雅》、《頌》，文不備矣。言料理五經在獲麟之前，何故作《春秋》獨在獲麟之後乎？故據五經以難之。撥亂世，撥猶治也。反諸正，莫近諸《春秋》，^⑤得麟之後，天下血書魯端門曰：「越作法，孔聖沒，周姬亡，彗東出，秦政起，胡破術，書記散，孔不絕。」子夏明日往視之，血書飛爲赤鳥，^⑥化爲白書，署曰《演孔圖》，中有作圖制法之狀。孔子仰推天命，俯察時變，却觀未來，豫解無窮，知漢當繼大亂之

後，故作撥亂之法以授之。○近，附近之近，又如字演，以善反。【疏】「撥亂」至「春秋」。○解云：孔子未得天命之時，未有制作之意，故但領緣舊經，以濟當時而已。既獲麟之後，見端門之書，知天命已制作，以俟後王，于是選理典籍，欲爲撥亂之道，以爲《春秋》者，賞善罰惡之書，若欲治世，反歸于正，道莫近于《春秋》之義，是以得天命之後，乃作《春秋》矣，即上云治世之要務，義亦通於此。○注「得麟」至「之狀」。○解云：《演孔圖》文也。疾作王者之法，孔氏聖人將欲沒矣，周王姬氏將亡，是以十三年冬彗星出于東方矣。秦始皇名正，方欲起爲天子，其子胡亥破先王之術，當爾之時，書契紀綱盡皆散亂，唯有孔氏《春秋》口相傳者，獨存而不絕。孔子聞之，

- ①「記」，杉浦校：「單疏鈔本作「訖」，爲是。」
- ②上「則」字下，杉浦校：「單疏鈔本有「終理故也」四字。按：注疏本誤脫。」
- ③「有」上，傳公十六年傳有「雖」字。
- ④「故」，原重文，今據單疏鈔本、閣本刪。
- ⑤「莫近諸春秋」，阮校：「浦鏜云：《詩序》及《爾雅序》疏引何注有「莫近猶莫過之也」七字，今疑脫。」
- ⑥「鳥」，阮校：「鄂本「鳥」作「烏」，當據正，疏同。」

使子夏往視其血書，其血乃飛爲赤鳥，其書乃化爲白書，署之曰：此是《演孔圖》中義理，乃有制作之象，制法之形狀矣。案《秦本紀》云：「秦皇爲無道，周人以舊典非之，乃用李斯之謀，欲以愚黔首，於是燔《詩》、《書》。」云。然則始皇燔《詩》、《書》，而言「胡破術」者，謂始皇燔之不盡，

亦燔之，科舉之亦何傷？云「孔子仰推天命」者，謂

「仰推天命，即端門之命是也。云「俯察時變」者，即蠡蟲冬踊，彗星埽旦之象是也。欲尊天命，故以俯仰言之。

云「却觀未來，豫解無窮，知漢當繼大亂之後，故作撥亂之法以授之」者，謂知其承大亂之後，天下未醇，故作治亂之法以授之矣。若欲託之《春秋》，即所傳聞之世是也，故桓三年「夏，齊侯、衛侯胥命于蒲」，傳云：「胥命者何？相命也。何言乎相命？近正也。此其爲近正奈何？古者不盟，結言而退。」彼注云「善其近正，似於古而不相背，故書以撥亂也」是也。則未知其爲是與？其諸君子樂道堯、舜之道與？作傳者

謙不敢斥夫子所爲作意也。堯、舜當古歷，象日月星辰，百獸率舞，鳳皇來儀，《春秋》亦以王次春，上法天文，四時具，然後爲年，以敬授民時，崇德致麟，乃得稱太平，道同者相稱，德合者相友，故曰「樂道堯、舜之道」。○其

爲，于僞反，注「所爲」同。是與，音餘，下及注同。【疏】「則未」至「是與」。○解云：爲，音于僞反。公羊子謙不敢斥言孔子作《春秋》，故依違云，則未知其爲此《春秋》，可以撥亂世而作之與？○「其諸」至「道與」。○解

云：其諸，辭也，即桓六年「子公羊子曰「其諸以病桓與」」，注云「其諸，辭也」是也。君子，謂孔子。不知爲是孔子愛樂堯、舜之道，是以述而道之與？○注「堯舜」至

「之道」。○解云：言「堯舜當古歷，象日月星辰」者，《堯典》文也。云「百獸率舞」者，《舜典》、《咎繇謨》皆有此文也。云「鳳皇來儀」者，《咎繇謨》文也。云「《春秋》亦以

王次春，上法天文，四時具，然後爲年，以敬授人時」者，欲似堯、舜當古歷，象日月星辰，以敬授人時也。云「崇德致麟，乃得稱太平」者，欲似堯、舜百獸率舞，鳳皇來儀是也。云「道同者相稱」者，謂孔子之道同于堯、舜，故作

《春秋》，以稱述堯、舜是也。云「德合者相友」者，友者，同志之名，言孔子之德合於堯、舜，是以愛而慕之，乃作

《春秋》，與其志相似也。末不亦樂乎堯、舜之知君子也？

末不亦樂后有聖漢，受命而王，德如堯、舜之知孔子爲制作。【疏】「末不」至「子也」。○解云：孔子之道，既與堯、舜雅合，故得與堯、舜相對爲首末，然則指

孔子言「不亦」也。堯、舜之時，預知有己而制道術，預知有己而爲君子而慕之，己亦預制《春秋》授劉帝，是孔子亦愛慕堯、舜之知君子而効之。制《春秋》之義以俟後聖，待聖漢之王以爲法。【疏】「制春」至「后聖」。○解云：制作《春秋》之義，謂制《春秋》之中賞善罰惡之義也。以君子之爲，亦有樂乎此也。樂其貫於百王而不滅，名與日月並行而不息。【疏】「以君」至「此也」。○解云：君子，謂孔子。所以作《春秋》者，亦樂此《春秋》之道，可以永法故也。○注「樂」至「不息」。○解云：《春秋》者，賞善罰惡之書，有國家者最所急務，是以貫通于百王而不滅絕矣，故孔子爲后王作之。云「名與日月並行而不息」者，謂名之曰《春秋》，其合于天地之利，生成萬物之義，凡爲君者不得不爾，故曰「名與日月並行而不息」也。

監本附音春秋公羊注疏哀公卷第二十八

鳴謝

《儒藏》精華編惠蒙善助，共襄斯文；謹列如左，用伸謝忱。

本煥法師

智海企業集團董事長 馮建新先生

NE·TIGER時裝有限公司董事長 張志峰先生

張貞書女士

付剛先生

壹佰萬元

壹佰萬元

壹佰萬元

壹佰萬元

伍拾萬元

